

近代中國史料叢刊第十八輯
沈雲龍主編

李肅毅伯（鴻章）奏議

章洪鈞編
吳汝綸編

文海出版社印行

李肅毅伯奏議

及門吳章洪鈞編輯

卷一

初到上海覆陳防勦事宜摺

權衡滬鎮緩急摺

代徵長江洋稅急難籌解摺

上海西兵情形片

覆奏通靖等處江港請飭嚴防摺

查明江海關代征長江稅內並無洋貨進口稅片

請飭多隆阿回援金陵摺

覆議江南糧臺併歸江北摺

覆奏近日軍情摺

整飭常勝軍片

覆奏添募揚勇片

請優卹曾貞幹摺

請設外國語言文字學館摺

覆奏趙景賢死節摺

分路規取蘇州摺

裁減蘇松太糧賦浮額摺

清查蘇松漕糧積弊片

關稅留抵軍餉摺

駕馭西兵片

防勦大畧情形摺

黃翼升不能赴援臨淮片

克復蘇州摺

駢誅八降酋片

籌辦大畧片

進圖浙西片

初到上海覆陳防勦事宜摺

同治元年四月十八日

奏為欽奉疊次

諭旨恭摺覆陳仰祈

聖鑒事竊同治元年四月十二日准通商大臣薛煥

咨開承准議政王軍機大臣字寄三月二十七

日奉

上諭本日已明降諭旨令李鴻章署理江蘇巡撫松
滬兵勇衆多而紀律不明於勦匪未能得力即著
將各兵勇詳加簡閱汰去老弱挑選精銳遴派得
力壯弁管帶以資防勦李鴻章務當體察洋人之

性設法籠絡上海洋鎗隊頗資得力外國人時常
誇耀其力該署撫不妨多為教演以鼓舞洋人至
華爾等名利兼圖亦當遇事牢籠毋惜小費鎮江
一城為大江南北關鍵地屬緊要前據曾國藩奏
稱該處係進兵形勝之區擬令該署撫帶兵前往
駐紮為規復各城之計現在揚防萬分喫緊都興
阿之軍不敷分布如該署撫能紮鎮城則大江南北
均資聯絡該署撫既膺疆寄蘇省之地均所管
轄如將上海事宜布置稍定可以分身赴鎮其赴
滬各營應留上海若干之處均著酌量辦理再據

毛鴻賓奏臬司陳士杰請在籍養親已明降諭旨
准其開缺江蘇按察使以劉邨膏署理矣劉邨膏
深得民心疊經中外保奏並著曾國藩李鴻章察
看如該員於軍務可期得力則李鴻章往鎮江後
所有上海軍務即可責成該員接辦倘該員不能
駕馭楚軍即著該署撫另簡得力之員管帶並將
上海附近失陷各城會同洋人相機進兵節節攻
復以顧餉源並為將來夾攻之計等因欽此又承
准議政王軍機大臣字寄三月二十八日奉
上諭昨據曾國藩奏李鴻章到滬布置粗定仍親赴

鎮江察看情形分兵防守所統水師即由梁山賊營衝過以達於鎮已諭令都興阿分飭各路將弁嚴密駐守一俟李鴻章回鎮後即飭各軍會同勦洗李鴻章身膺疆寄大江南北均歸統轄務當與都興阿和衷共濟以期水陸夾攻將竄踞揚屬逆氛剋期掃蕩方為不負委任等因欽此又四月十三日准薛煥咨開承准議政王軍機大臣字寄四月初二日奉

上諭據吳棠奏髮逆竄撲揚城都興阿兵勇未滿兩萬賊衆兵單情形萬緊現在逆匪蔓延至揚城北

路司徒廟等處請飭水陸兵分道接應等語李鴻章所部兵勇前據曾國藩奏稱分三起下駛業經諭令該署撫將上海事宜布置稍定帶兵駐紮鎮江俾都興阿得資聯絡現在揚防喫緊恐難曠日待援著李鴻章即令後起赴防兵勇於行抵瓜儀時先其所急會合都興阿之軍迅將撲揚逆匪奮力勦擊毋誤事機倘李鴻章能先赴鎮江一帶相機應援尤屬妥善等因欽此仰蒙

聖訓周詳力籌兼顧伏讀之下感悚莫名臣於三月初八日帶陸勇二千人搭輪舟由皖啟行初十

日抵滬續到兵勇至四月初四日止共計五千
五百人俱紮營上海城南現尚有楚勇兩營未
至總兵黃翼升所帶淮揚水師四千餘人協勦
東西梁山一帶尚無下駛準期屢接督臣曾國
藩來函以兵勇訓練未熟人數未齊目下斷不
宜出仗臣親駐營盤督率操演未敢少懈近來
洋人助勦連復嘉定青浦二城英國水師提督
何伯迭次與臣會商諄催派兵會勦浦東之川
沙南滙奉賢金山等廳縣急不可待臣之兵力
何足以云會勦惟外國兵將為我出力豈可重

拂其意臣於十五日接受撫篆即派所部四千人進紮南匯縣之周浦鎮由北路相機攻勦英法各兵自松江進金山衛由南路相機攻勦兩路分進相距百數十里既可掣賊匪之勢亦不至絕洋人之歡如浦東廳縣乘勢肅清當屯重兵於金山衛以堵浙江全省踞賊東竄之路此臣謹遵

諭旨體察洋人之性設法籠絡之微意也松滬水陸各軍人數雖衆紀律不明久邀

聖明洞鑒若逐加挑汰擇換將領束以楚軍規制訓

練整頓必須數月乃有眉目署臬司劉卹膏樸
實廉正深得民心現委辦臣軍營務藉資練習
亦須數月後察看能否接辦臣從曾國藩討論
軍事數年見其選將練兵艱苦經營不期旦夕
之速效到滬後兩晤英提督何伯謂外國募兵
之法須操練六個月乃使出仗其戰勝攻取固
由鎗礮之精亦由紀律之嚴江南大營平素絕
不操練故兵勇習氣最深收拾頗難鎮滬各防
皆沿此弊臣在上海恐未即有化弱為強之效
臣往鎮江亦未必無一傅衆咻之虞但臣職分

所在不敢畏難當遵

旨詳加簡閱悉心選汰如能將上海水陸各軍兩三月間整理就緒付託有人然後出江周歷北岸以達於鎮可無內顧之憂容臣隨時察度奏明辦理此臣籌畫兵事次第布置之大略也鎮江為南北關鍵自古用兵必爭之地今日進兵形勝之區臣亟思移駐彼間與上游諸軍及都興阿之師就近聯絡况揚防喫緊屢奉諭旨飭援復何敢稍存推諉惟臣既在上海甫經接任一切尚未措手固未容舍之他去其後起未

到者僅有兩營新募之勇實不足自當一路洋
船又不肯中道停泊勢難令其於行抵瓜儀時
上岸援勦頃據喬松年稟報都興阿督軍嚴守
賊已向西北撤退如果鎮揚再警俟臣處水師
下駛酌留數營於裏下河各口以固江防若臣
移駐鎮江則當會同都興阿互相援應合力掃
蕩臣才力庸弱本不敢居統轄南北之名兵數
單寡暫無以備分援各路之用伏乞

皇上鑒臣愚悃期以歲時俾練成勁旅或上游另有
續撥之師庶近防遠勦稍有可恃此臣目前力

量不能赴救揚川之實情也所有疊奉
諭旨據實覆陳緣由恭摺由六百里具陳伏乞
皇上聖鑒訓示謹

奏

--	--	--	--	--	--	--	--	--	--	--

權衡滬鎮緩急摺

再欽奉五月初一日

寄諭鎮江為南北關鍵現在北岸肅清急宜以重兵駐紮為進規江甯之計李鴻章如能抽身赴鎮則呼應較靈於大局較有裨益其上海兵勇該署撫亦可於抵鎮後會商曾國藩派員前往整理著曾國藩迅即會商李鴻章酌量情形通籌全局如何可以帶兵及早到鎮先占形勝最為得策蘇省紳士之言恐有偏私李鴻章必當審察定見不可過信等因欽此又奉五月十四日

寄諭現在楚軍東下已攻克太平蕪湖等城即日進
規九洑洲為合圍金陵之計惟賊勢窮蹙必將鋌
而走險江北尚稱完善而防兵單薄甚屬可虞前
次疊諭李鴻章赴鎮與江北各軍聯絡一氣著即
恪遵前旨迅將滬防事宜妥為辦理即日前往鎮
江整頓一切大局所關想該署撫必不敢遷延貽
誤也至滬上兵勇應如何設法裁汰整頓之處仍
著李鴻章妥籌兼顧並揀派得力大員赴滬管帶
以資得力等因欽此仰蒙

聖慮殷諄指示親切伏讀之下感激莫名臣接督臣

曾國藩來函頗以進攻金陵兵單為虞又接曾國荃五月初十日自金陵雨花臺來信我軍祇能圍其西南兩面深溝高壘以水師為根本以江面為糧路先為自固徐圖制賊非添二萬餘人不能合圍訊生賊供洪逆調蘇湖兩處之賊回援恐成持久之勢等語臣查金陵城大而堅從前和春張國樑擁八九萬之衆圍攻日久功敗垂成今蘇浙兩省徧地賊區黏連一片處處可以進援尤與昔年情形迥異所恃楚師穩鍊較勝他軍賊數衆多未盡精悍曾國荃以水師

為根本當可立足但軍數不及二萬其力不足
以合圍即未能制其死命此次偽忠逆黨羽撲
犯松滬負創而遁聞將連合杭湖賊衆赴救金
陵臣深代懸慮亟欲馳往鎮江就近援助無如
臣原部陸軍僅數千人分兩處則均不得勁專
一路則尚可自立兵事重大臣何敢易言之也
滬中官民向恃洋人為安危乃援賊未來之先
洋人分兵四出援賊大至之後洋人斂兵不動
臣揆度夷情似非暗與賊通坐觀成敗實係懾
於賊衆不敢向前若非臣親督兵將痛挫兇鋒

患且不測以是知洋人不可專恃滬防必須自
強臣忝任蘇撫既不能棄滬中每月二十萬餉
源之地又不敢緩鎮江接應上下游各路之師
左右思維實無長策至滬上原有水陸兵勇逐
營簡汰整頓非臣親自部署不能鈐制所帶諸
將中尚有勇敢樸實之材實少應變馭衆之選
且資望皆淺未可令其獨當一面臣斷不偏信
紳士之言貽誤大局惟軍事以得人心為本臣
之譴陋到滬後稍繫軍民之望未便輕自移動
遽失衆心曾國藩處似亦無統兵大員可派來

滬可否容臣將滬事辦妥即移師出江以慰
聖慮抑臣更有言者馮子材等催臣前往實欲臣到
鎮為該軍籌餉未必為進勦起見現在江北完
善地方所出之餉專供都興阿一軍尚無缺乏
畛域已分江南止存鎮滬兩處每月僅能由滬
分給三萬無地可另籌鉅款臣實深內愧馮子
材尚能戰守而兵勇疲惰已非一日長江師船
大半朽壞劫奪成風臣即頡頏其間止能自立
一軍未便控制諸將若輕言整頓先失和衷之
義若親軍太少亦無整頓之資此皆實在為難

情形臣不敢稍有徇隱謹先附片密陳伏乞

聖鑒訓示謹

奏

卷一

下

--	--	--	--	--	--	--	--	--	--

代徵長江洋稅急難籌解摺

奏為查明江海關代徵長江稅及本年春季江海關收稅各銀數分繕清單並軍餉萬緊急難籌解情形恭摺具陳仰祈

聖鑒事竊本年正月十四日承准總理各國事務衙門咨行抄片內開漢口九江雖已通商而進出稅鈔均係上海征收實在上海關共代收九江稅若干代收漢口稅若干查明數目派員解交湖北江西二省以濟軍需等因奉

旨依議欽此當經前撫臣轉飭遵辦去後嗣准湖廣

督臣官文委派湖北候補道張曜孫來滬催提
代征洋稅迭經臣等飭令江海關查明數目分
別撥交在案茲據海關監督蘇松太道吳煦詳
稱漢口九江運土貨出長江正稅並復進口半
稅由上海征收係遵照定章辦理江海關所收
漢口九江來貨之進口正稅即係代征漢九兩
關正稅所收由上海運往長江各貨之復進長
江半稅即係代征漢九兩關復進口半稅滬關
並無別項進口稅餉當即督飭總稅務司費士
來確查代征漢九兩關銀數旋據復稱前二項

稅款該司稅於上年十一月初一漢口開關之
日起即將所收稅銀另冊登記惟是各商船來
往長江一船之內時有漢口九江兩處之貨且
運入長江貨物洋商並不逐一報明孰為運往
漢口孰為運往九江即偶有報明亦難保報往
漢口者不因漢口價低改往九江報往九江者
不因九江不能得價改往漢口以致兩關稅銀
難以分晰若長江通商以來漢關未設以前該
司稅初不料漢口另行設關又不知復應劃還
已將所收該兩口稅數載入本關征收簿日久

款多難以剔出即時彙報應請照會漢口九江
詳細注明各該口起下貨稅便可據以分別江
海關代征之數等語該道覆查運入長江之貨
必須知其實在何口起卸始能指為何關進口
之稅長江運出之貨亦須知其從何口下餞始
能指為何關出口之稅乃洋商運貨入江得價
則售市價既有低昂銷路須從其便漢九兩處
即該商亦不能預定其自長江運貨至滬究係
來自何口多未報明即偶有報明亦難據以為
憑是進出兩項均未便由滬懸擬強為分別業

經造冊詳請前撫臣薛煥咨查漢九二關各自
填注在案至此項代征之稅本應隨時解還惟
上海賊氛環逼堵勦喫緊自去冬以及今春各
防兵勇數逾五萬需餉浩繁咸豐十年冬間曾
經前撫臣薛煥奏明請將上海關稅釐捐儘數
提充本省餉需又是年奉撥京餉八十萬兩亦
經前撫臣奏奉戶部議准自蘇常失陷僅存上
海一隅設法防勦入不敷出尚係實在情形應
俟該省軍務稍定分年籌補等因奉
旨依議欽此欽遵轉行遵照在案現在統計每年洋

稅收數不過二百餘萬每月僅收銀二十餘萬
除照章核扣英法各二成賠款外月稅不過十
餘萬兩代征漢九二關之稅即在其中連所收
釐捐併計亦祇二十餘萬而每月兵餉軍火即
須三十餘萬加以協濟鎮江等處兵餉本省俸
廉兵米等款及京外飭撥緊要之款無不取給
於稅捐目前之入不敷出即可知從前之收不
敷放以致墊欠累累一籌莫展決裂堪虞不得
不援照舊案請將前項長江稅課先行留抵上
洋防勦餉需一俟軍務稍定遵即趕緊解還一

面督飭該司稅將上年十一十二月至本年正
二三月代征銀數逐一準核開具代收長江稅
並今年春季江海關收稅細數清摺兩扣呈請
奏咨各等情前來臣復查上海關稅儘數提充
本省軍餉數年來辦有成案匪自今始臣在安
慶時道路傳聞每月滬關收稅有四五十萬之
說到滬後留心察訪乃知浮言未可盡信接任
以來屢向吳煦面詰該關所收洋稅確數據稱
新關洋稅係總稅務司費士來經收登簿確有
案據關道雖總司其成不能絲毫撓越洋人收

稅向極認真如稍有不實不盡洋商斷不依從
既登簿冊即儘收儘解非比內地各關積習書
吏可滋弊混因將本年春季所收稅數清摺呈
核臣查摺內所開至旺之月除扣賠款及船鈔
外僅得實銀十餘萬衰月僅及十萬代征長江
稅尚在其中則收數並不為多臣四月十五日
蒞任視事以前其留抵軍需各款均係前撫臣
薛煥任內之事其自四月十五日以後為日無
多代征之數計亦無幾業經遵照部行劃撥湖
北應解京倉米價銀七萬兩似足相抵而滬關

究竟代征漢口九江稅銀各若干業經造冊咨
請自行填注必俟註明咨覆始能分別劃抵况
上海為蘇省一綫餉源有滬地然後有稅餉今
蘇杭踞逆切近窺撲必欲得而甘心洋人雖議
助防究係未可專恃自須練成一支勁旅以保
重地而張

國威若將代收之稅盡數撥還餉必不繼則兵亦不
能練松滬舊有兵勇經此次大股逆賊沖潰已
由臣遣散一萬五千餘人內又選派將領挑收
精銳二千餘人加以臣由上游帶來水陸萬餘

人及各防水陸舊部並南匪降卒英法各國礮
勇合之仍不下四萬即逐漸裁汰該處地勢平
坦頭頭是道欲保上海即不能不兼守松江寶
山及浦東各廳縣人數太少亦不濟事臣日夜
焦籌罔知所措總計松滬軍餉及鎮江協款並
製造軍火賞卹各項得人綜核每月亦須銀三
十餘萬兩近更奉撥總司稅赫德置辦輪船鎗
礮等價銀二十五萬兩又商運京倉米石先付
價銀十一萬三千兩此皆必不可欠之款又奉
撥袁甲三軍餉每月二萬兩催逼日緊實屬應

接不暇據該署司吳煦稟稱上海月收釐捐銀
十餘萬關稅銀十餘萬專抵本處兵勇糧餉尚
多不敷除由臣嚴查積弊隨時設法整頓撙節
動支並將奉撥要款督飭該署司趕緊挪解外
可否籲懇

聖主鴻慈俯念

微臣

到任未久軍餉竭蹶准其循照舊

案暫將代征漢九兩關之稅先行留抵俟赫德
赴鄂議定設關章程再陸續籌款補解俾臣訓
練兵勇藉資鼓勵合力進剿以顧大局而保危
疆臣不勝悚息感盼之至所有查明江海關代

征長江稅及本年春季江海關收稅各銀數分
繕清單恭呈

御覽並軍餉萬緊急難籌解各緣由謹會同兩江督
臣曾國藩通商大臣臣薛煥專摺馳陳伏乞

皇上聖鑒訓示施行謹

奏

上海西兵情形片

再六月初四日欽奉五月十七日

寄諭總理各國事務衙門奏外國與賊接仗構釁甚深聞將調集印度兵大舉助剿請飭江浙督撫迅速籌議一摺據崇厚函稱英領事吉必勛聲稱青浦嘉定二城難以抵禦現在退回上海休息有另調印度兵前來秋間大舉之說該王大臣等慮及外國兵入內地攻勦不特得一處伐守一處足為中國腹心之患即得一處焚燬一處亦實地方瘡痍之災請飭曾國藩等設法防範等語英法兩國

與髮逆仇隙已深若調大兵分路進攻盡如嘉定
青浦之事則利不償害且恐守以西兵運掉不能
由我為患曷可勝言萬一金陵尚難遽拔而印度
大隊已到應如何預籌會攻不致授柄於彼之處
著會商妥議等因欽此臣查英法兩國退出嘉定
青浦情形迭經奏報在案該國提督先與臣定
議原派中國兵勇三千外國兵三百協守嘉定
華爾所部專守青浦乃援賊大股驟至合圍洋
人苦守旬日力不能支乃挾中國兵遽行退出
並未及一一焚燬嗣經臣督軍擊退援賊該逆

仍分守嘉青二城布置完好如果被外國兵焚燬淨盡髮逆亦不能再守是其明徵聞上海海洋商衆議因嘉青敗退頗損外國兵威私相詬怨以英法提督辦理不妥遂有秋後調兵大舉之說昨英國水師提督何伯過臣營探問上下游各路軍情臣即面詢有無秋後調兵成議所調係何國之兵據稱八月以後本國有兵萬餘來滬再復嘉青布置嚴守然只在上海附近百里內攻勦不便遠征該提督並稱本訂於六七月回國換防因此遲留等語並未據指明調印度

兵臣查洋人性情堅執不受商量其陸軍不紮營壘專恃礮火故賊少則操必勝之券賊多則生疑怯之情中國兵勇先須紮營自立腳步與外國會攻遲速進退實難與之強合臣俟此間布置稍妥應遵

諭旨移駐鎮江行止未敢自定且得力兵勇人數較少若以孤軍深入有戰無守有勦無援似非穩著若須留滬進取當另籌自強之策洋人即調兵助勦只可曲意羈縻仍須各打一路方不致授柄於彼細察夷情嘉青復失該提督等既深

內愧即秋後調集重兵不過復此二城以雪前憤或不遽深入為患再查閱英國六月初七日新聞紙內有云漢口有地一處英國要買價未議定但華官作事不甚快速最好英國代華官攻破一城俟此地講定再行交給城池等語即此見洋人詭詐多端未知湖北督撫曾否留心防備除迭奉

寄諭飭查各節再由督臣曾國藩核奪會奏外所有上海西兵情形謹先附片縷晰密陳伏乞

皇上聖鑒訓示謹

奏

卷一

十一

覆奏通靖等處江港請飭嚴防摺七月十三日
奏為欽奉

諭旨恭摺覆陳仰祈

聖鑒事竊臣等欽奉六月十八日

寄諭潘祖蔭另片奏楚軍乘勝進逼金陵大局安危
所繫鎮江揚州已有備禦惟通州靖江泰興等處
江港可通者十餘處由江南太倉常熟江陰出口
即能闖入賊若乘虛擾及裏下河等處江北軍餉
無籌即全師不壯等語著曾國藩李鴻章設法兼
顧派令妥員防守保全完善之區原摺片著抄給

閱看等因欽此臣查江防大段由靖江而上至瓜洲為內江由靖江而下至海門崇明為內洋自瓜洲至通州五六百里向皆責成各水師分防其南岸之江陰口福山口徐六涇口楊林口劉河口賊巢密布時時出江搶擄船隻游匪劣勇逋逃勾結臣自四月接任後迭經咨飭李德林等分段巡緝並咨商黃彬設法堵剿六月間江洋盜劫之案日凡數起商船阻絕南北不能通行經臣商調副將華爾帶輪船隊伍於七月初二日出吳淞口就近剿劉河賊巢毀賊卡三處

攻奪該口內新老兩鎮救出商船三十餘隻難
民數百平其方圓礮臺二座斬短髮粵人七八
百名洋鎗斃其乘馬悍賊土人指為粵賊頭目
楊姓者也其自楊林口而上接連通靖江港紛
錯可以漏賊者何至十餘處竊意江南全局鮑
超由東壩進曾國荃由金陵進秋冬以後賊必
不支上游無懈可蹈恐併出南岸各口就食於
裏下河州縣而狼福江面遼闊巨浸泊天一經
偷渡闌入通如即成噬臍之患臣每與督臣曾
國藩緘商深用焦慮署提臣黃翼升所帶水師

皆長龍舢板於洋面風潮沙性實不相宜現暫
留副將陽利見蔡東祥所部四十船巡防三江
口兵力單薄勢難兼顧他處其餘一百數十號
調入松江泖澱各湖頭頭是道尚不敷用曾秉
忠礮船現已裁撤大半合之黃翼升新營祇可
專力湖防至於通靖江防似應仍責成黃彬所
部師船肅清江面嚴扼北竄計年內外赫德購
到船礮定可得用或俟九浹洲克復由督臣曾
國藩商之楊載福彭玉麟分一軍下駛則一切
皆資整頓不獨為外江內河設防已也惟目前

別無救急之法可否請

旨勅下都興阿黃彬妥籌布置嚴飭諸鎮將實力防禦通靖泰興各口岸倘有疎虞俾賊闖入裏下河即惟分防之鎮將是問再上年都興阿黃彬奏調廣東紅單船四十號來江助剿本年復委郭定猷赴粵守催臣查原奏本以舊船間多損壞調到新船裁替而現據南台候補道許如駿詳稱黃彬以裁船原議籌給一月餉銀以作路費又有不給餉銀起行仍在江南隨幫按成攤放舊欠之說是新船入江仍未能即撤舊船由

該臺迭次詳請另籌新餉專款前來臣復查南
台進款分供水陸兩軍實已萬分拮据現經臣
核定餉章另片附陳何能再有增益况赫德所
購外國船不久必到當蘇餉艱窘之際豈能議
添兩分重餉此項紅單等船調到若使枵腹荷
戈豈得毫末之力若仍自求口食尤開騷擾之
端查水師各幫內原續催紅單船七十七隻兼
之大洋艦快蟹拖罾各項戰船共三百餘號目
下縱有抽減約計以船身稍舊者旋泊駐防以
其稍堅固者出江堵擊似尚足敷調撥其新船

到防之期計與赫德礮船不相先後兩項相較
洋船已別無變動之法紅單尚可在緩議之條
籌思至再惟有並請

飭令都興阿黃彬暨廣東督撫臣將前調紅單等船
四十號即行停止如已報起程毋論駛至何處
即速追令回粵勿庸來江以節糜費所有欽遵
諭旨設法保全完善之區請飭水師鎮將嚴堵通靖
泰興各港口并請將前調廣東紅單等船四十
號即行停止各緣由會同協辦大學士兩江督
臣曾國藩專摺覆陳伏乞

皇上聖鑒訓示謹

奏

查明江海關代征長江稅內并無洋貨進口稅
片

再查明江海關代征長江稅銀並軍需萬緊急
難籌解緣由經臣等於本年五月二十七日恭
摺馳

奏奉

旨戶部總理各國事務衙門知道單二件併發欽此
欽遵在案惟查官文原片內開洋商由上海運
洋貨進長江又由長江運土貨回上海應完長
江進出口正稅及土貨復進長江半稅均令在

上海完交以上皆係長江應收之稅等語因思洋貨向無一貨兩稅之例既完海關進口稅即不能再完長江進口稅所奏恐與例未符且聞江漢關已奏明於七月初一日照更定新章起征事關稅款出入若不確切查明必多轉轄當飭該關道吳煦復查去後旋據詳稱上年總理各國事務衙門奏定各口通商章程第一款內載洋商由上海運洋貨進長江須在上海將進口正稅完納等語則湖廣總督所奏不為無因但查洋貨以先到之關納稅為定既在進口之

海關納稅無論轉運何口均准給免照免其重
征自道光年間五口通商以來各海關一體照
辦天津新定條約亦復相同漢口九江兩處既
准通商辦法自當一律若一貨兩稅洋商狃於
成例恐難允遵所有長江通商以後上海關代
征貨稅祇有長江運來土貨應完漢口九江出
口正稅及由上海運入長江土貨應完漢口九
江復進口半稅兩項其由上海運入長江洋貨
歷條遵照條約給發免照委無代征長江進口
正稅等情請奏前來臣復核無異相應請

旨飭下總理各國事務衙門並湖廣督臣查照辦理
昨總稅務司赫德由鄂回滬臣雖未接晤據薛
煥吳煦均稱該總司稅熟悉各關稅務深知原
委現擬赴京應如何分別收征諒可議定第查
蘇杭迭陷以後僅存上海一隅為各貨滙聚之
所並非各貨行銷之所祇緣先在海關納稅並
代收各口正半各稅是以收數較旺然除扣英
法四成外每月至多不過二十萬少則十餘萬
儘放松滬正餉鎮江協餉計尚不敷而遠近各
省視為膏腴傳聞異詞咸將取給於此其隨時

特出之款奉撥之款不一而足通計每月用費約需四十萬即連本處捐釐並計久已萬難支撐今江漢關自行征税各口又索免單銀兩則此後海關應收之稅更少各軍餉需及會防經費從何取給決裂恐在目前臣受

恩深重方欲練成勁旅隨同諸將帥規復舊疆無如稅額驟減軍餉日絀臣適逢其會動多掣肘惟有督飭司道力求樽節以待事機之轉亦不敢徒事呼籲上煩

塵慮因查明江海關代征長江稅內並無洋貨進口

稅一層不得不據情申辯並將滬餉前後大略
附便陳明伏乞

皇上聖鑒訓示謹會同通商大臣臣薛煥附片具
奏

請飭多隆阿回援金陵摺閏月二十四日

奏為大股援賊上犯金陵甯國各軍病勇太多恐
難久禦強寇請

旨速飭多隆阿統軍來援以維大局而助成功恭摺

懋陳仰祈

聖鑒事竊偽忠王輔王等調集各路逆匪上援賊勢
浩大正深焦慮接據江蘇藩司曾國荃閏八月
初十日稟稱近日迭訊賊供偽天王尚據金陵
老巢偽忠王頭隊已抵丹陽擄掠九十月間定
必合力謀我該司從前進兵時勇力強壯尚能

戰守又恃鮑超一軍可速來援不意夏秋以後
疾疫流染每營病故八九十名勇病日多其無
病者不過一二成隊似此光景不惟難以制賊
即自守亦無把握鮑超軍士疾病死亡相等勢
不能速離甯國且恐為偽侍王等牽制或偽忠
王橫截其間與金陵隔絕該司深入危地不可
孤立無援倘羣賊環至亟肆疲我病軍不能禦
強寇南岸別無援師支持日久何堪設想請會
商督臣官文曾國藩奏調多隆阿折回渡江會
勦俾軍心有可指望等情前來臣查偽天王洪

逆潛移蘇州之說係七月間由蘇逃出偽職劉萬東來滬臣與黃翼升當面詰訊據供云然臣比於奏報中附陳並聲明恐未確實不謂竟屬謠傳曷深惶悚大兵之後災疫流行軍中尤甚鮑超曾國荃所部轉戰勞苦其致病之由殊堪憫念惟各路探報偽忠王李秀成偽輔王楊輔清偽護王陳坤書等合股上竄分援金陵甯國偽侍王李世賢又欲由浙東併力來會蓄謀甚狡股數甚衆適值鮑超曾國荃兩軍病疫繁興之際如曾國荃前敵營盤稍有蹉跌則太平無

湖防兵皆單賊可循江邊上竄而鮑超一軍且受圍困不特關係蘇浙兩省之全局實關係皖南江西數省之大局也八年李續賓之於三河以孤軍無援而敗鄂皖因之騷動十年和春張國樑之於金陵以後路圍困而敗蘇浙因之糜爛前鑒具在不可不思患豫防東南軍興以來湖北江西安徽數省戰爭不休生民待盡經營曾國藩胡林翼等選將練兵艱苦經營十年之久上游始報肅清今各處敗賊聚於蘇浙一隅勢漸衰弱其機會固難得矣臣愚以為宜趁此時

合衆人之力以謀之張四面之網以困之使其
衝突不動窮極思散庶幾有平賊之一日此賊
平則淮北之捻匪陝西之回匪河南山東之教
匪四川貴州之苗匪聞之膽落自當漸次削平
聖主中興之大業可立致矣統計現在上下游各路
兵數皆僅可自立而不可以進援甯國金陵近
日軍情亦僅可以守而不可以戰非另有大枝
援兵則賊勢將不可制曾國藩先以秦中事急
屢次奏止多隆阿南來彼時金陵防務狃平且
盼鮑超能進東壩不圖洪容海投誠事既中變

鮑軍疫病增多波折忽生可憂甚大伏思前奉
諭旨令勝保督辦陝西軍務勝保威望素著或可獨
任陝事多隆阿忠勇智略衆所共推粵賊惟陳
玉成最悍乃為多隆阿擒滅忠輔侍各逆必畏
多隆阿之先聲多隆阿所帶馬步隊皆百戰勁
旅與鮑超曾國荃共事有年深相投洽從前每
遇急難亦常相救助倘蒙

皇太后

皇上俯念江南事體重大

飭令多隆阿迅速取道河南皖北由和州逕趨金陵

兩三月間即可南渡既收駕輕就熟之效必有擒渠掃穴之功曾國荃勇於進取已抵金陵城下當能堅忍苦守以待援師若無援救之人終恐莫保若非多隆阿之力亦斷不能援臣智慮短淺何敢妄議大局且不知陝省近日勦辦情形若何惟據曾國荃函稟情詞迫切臣待罪蘇撫既欲早復財賦之區稍濟京餉仰體

君父之急又懼事勢多變前功盡棄全局復壞權度時宜不得不激切上陳曾國藩相距較遠往返函商動輒踰月若待商定會奏多隆阿師期更

一
三
恐違誤是否有當謹冒昧專摺由驛奏

聞伏乞

皇太后

皇上聖鑒訓示采擇施行謹

奏

覆議江南糧臺併歸江北摺十月十九日

奏為欽奉

諭旨恭摺覆陳仰祈

聖鑒事竊臣等欽奉閏八月初一日

寄諭有人奏請將江南糧臺歸併江北辦理等語據稱江北地方現設南北兩臺南臺係候補道許如駿辦理北臺係候補道許道身辦理一臺有一臺之用一切委員局費在所必需當此經費支絀之時南臺一局大可歸併北臺辦理不獨樽節度支即將來北岸肅清各營渡江會勦糧臺事權歸一

呼應尤靈亦因時因地量為變通之法惟兩岸餉源盈絀懸殊恐致彼此互相牽混惟有分明界畫以南臺籌定水陸進款專供水陸兩營之用北臺向有之款專濟北營不得絲毫通融辦理仍無窒礙等語所籌係為慎重餉糈起見於現在情形亦相符合著李鴻章吳棠詳細籌商若令許道身兼辦南北兩臺有無窒礙抑或仍須令許如駿分辨之處據實具奏等因欽此臣等跪誦之下仰見我皇上樽節餉需整頓臺務之至意伏查南北岸皆隸蘇省從前南軍駐金陵北軍駐揚州相距較遠

因地籌餉不得分臺供支自金陵大營潰散
江南財賦全失僅馮子材一軍退守鎮城與揚
州一江之隔兩岸水陸各營聲息相聞本無庸
分作兩臺徒添委員局費之需且啟畛域紛爭
之漸現在南臺進款經臣等於七月間奏定有
案鎮江陸營軍餉除滬上協款及鎮關洋稅外
仍須由江北籌濟水師軍餉以沿江釐金為大
宗亦應由江北督查若以北臺兼辦南臺係屬
就近經管事理極順况北岸肅清後揚州稍設
防兵亦應分兵渡江會勦誠如原奏所稱糧臺

事權歸一呼應尤靈是併臺之議於目下地方情形固無窒礙於將來軍務全局且有裨益臣等往返函商並察看候補道許道身精明幹練才具優長以之總辦兩臺可期勝任應即將江南糧臺歸併江北統歸許道身一手經理其鎮營支應本由南臺派員承辦今南臺既撤查有鎮江府知府金以誠熟悉情形應令隨營支放仍由許道身總司其事該營除正餉外一切軍火製造須隨地隨時通盤籌畫其南北支放及水陸分解事宜悉照向章辦理即有時通融緩

急仍不准牽混絲毫一面飭令候補道許如駿
交卸南臺趕緊造報無須再令分辦該臺委員
併行裁撤以節糜費而歸劃一至許道身本任
秦州知州現在兩臺合併支發浩繁恐難再顧
地方公事應即另委接署俾得專心籌辦臣等
仍當隨時查察責令該員將裏下河各屬丁漕
督催各州縣實力徵解沿江口岸各項釐捐會
同水師鎮將逐加整頓核實支放以期滴滴歸
公庶於併臺節餉章程不致有名無實再欽奉
寄諭遴委江北大員勸捐兵米一節臣等查上年江

北捐借共派四十萬兩條按淮揚通海十四廳
州縣分派現仍仿照勸辦改捐借為捐米統清
淮滬上南北臺併為一捐由各屬印委認定捐
數銀米並繳分限分解兩淮鹽運司喬松年素
顧大局條理精當臣等已飭委該運司督辦會
同許道身妥速籌勸其印委各員認真出力者
准予優獎怠玩違誤者立予撤叅如此明定章
程於捐餉可期踴躍所有臣等遵

旨會議各緣由是否有當謹合詞恭摺覆

奏伏乞

皇上聖鑒訓示遵行謹

奏

--	--	--	--	--	--	--	--	--	--	--

1111

覆奏近日軍情摺

奏為縷陳近日軍情恭摺覆

奏仰祈

聖鑒事竊十月二十五日承准議政王軍機大臣字
寄十月十二日奉

上諭李鴻章奏擊破四江口援賊大獲奇捷一摺此
次逆賊糾合大股圖犯青嘉經官軍擊退賊膽已
寒即應趁此聲威進搗崑山若能將該城克復則
松滬之門戶益固即進勦蘇城之路亦通該逆必
應回顧不敢悉衆救援金陵著李鴻章體察情形

一
迅速進攻該撫前奏所稱改造小划兵船計當造
成即可會同黃翼升水陸前進以為節節進勦之
計李鴻章自簡署巡撫以來軍務地方均能稱職
頗為嘉悅已明降諭旨補授江蘇巡撫該撫益當
感激知遇益矢公忠斷不可稍自滿假以期常承
恩眷勉之懷之等因欽此仰蒙

聖慈優渥

訓誨周詳感激之餘震悚無地除已另行具摺恭謝
天恩專差賫進外伏查前次四江口大捷擒斬甚衆
賊膽已寒若有數路之兵乘勢進搗崑太或冀

漸次得手無如臣軍分守浦東西各城既不能
併歸一處前敵兵力本單苦戰十餘晝夜疲乏
損傷無隊可換必須畧予休息蘇常附近州縣
賊皆堅守崑山太倉相為犄角尤為蘇州門戶
賊所必爭必救之地若我以孤軍深入而賊以
四面來抄堅城阻於前糧路斷於後此危道也
臣之愚計欲俟上游諸軍攻勦得手使該逆奔
救不遑然後乘其敝而蹙之以收前後夾擊之
勢庶無進退狼顧之虞探聞金陵解圍後忠賊
李秀成分股回蘇添守崑太布置極嚴其大股

仍分竄甯郡和含專走皖南北空虛之地以牽掣上游兵勢臣前派員弁赴皖添募十餘營據報陸續啟程督臣曾國藩以蕪湖一帶防務喫緊暫留協守急切斷難抵滬臣現有兵數能進一面而不足防數面之抄襲能當前路而無以備後路之接應將舍太而圖崑賊可繞嘉定以竄入將舍崑而圖太賊可繞青浦以竄入左右籌思尚不敢輕進貽誤惟有督率將士嚴申戒備俟有可乘之機即行奮迅進取以期仰慰宸廑至前奏改造小划已由曾國藩委派處州鎮總

兵李朝斌製造太湖水師臣與黃翼升復派將
弁赴上游添釘船隻目下正在興工須明年二
三月間配齊弁勇下駛黃翼升所部師船現分
扼青崑蘇嘉各交界亦待船勇到齊水陸合力
節節進勦臣一介庸儒屢被

朝廷不次之擢當盡其力所能為勉圖報稱斷不敢
因循苟且自外

生成所有近日軍情及相機籌辦各緣由理合專摺
由驛馳陳仰祈

皇上聖鑒訓示謹

奏

卷一

三十七

整飭常勝軍片

再白齊文不遵調遣劫餉毆官已經臣

奏明嚴密拿解並將另委叅將李恒嵩會同英國
兵官奧倫管帶常勝軍緣由附陳在案溯查常
勝軍本華爾舊部其初不過千人吳煦楊坊等
始意欲藉以禦寇新糧夫價及一切軍火支應
視官軍加至數倍漫無限制陸續增至四千五
百餘人并長夫礮船輪船經費月需餉銀七八
萬兩前此收復松江青浦等城未嘗不兼資其
力遂日益驕蹇漸成尾大不掉之勢且籌思累

月久欲稍加裁抑而事關中外交涉之端未便輕於發難此次白齊文逞兇跋扈立即撤其兵權事當更替之初須求補救之法英國提督士迪佛立初不願中國官員會帶臣與之往復辨論舌敝脣焦數日以來始獲定議士迪佛立原定條約十三條臣覆加勘正增為十六條於十一月二十五日蓋印移交分執並咨明總理衙門備案其條約大要如裁汰常勝軍為三千人減定長夫額數口糧刪除病房及日用房費種種浮濫之款既可以稍節餉需又如中國派員

會帶口糧由臣處派員經管眼同外國官散放
松城內外地方事宜外國管帶官不得干預購
買軍火須有撫臣文書管帶官不准私購懲辦
諸勇須聽中國會帶官主意各條亦可以漸收
兵柄自此次定約庶以後辦理稍有頭緒至於
白齊文逃匿不出據吳煦等稟稱該犯經士提
督派兵官押解來滬現有英國兵船看管至今
並未交出係藉口華爾白齊文先後託買軍火
賬未算清等語復據英國領事請由臣處派員
赴兵船會算賬目臣查常勝軍先前經用款項

從未稟報臣衙門並無案據未便會算代償當
即飭吳煦楊坊自行清理相應請

旨將三品頂戴白齊文先行革去職銜仍俟英國交
出該犯並責令吳煦楊坊拏解臣營照中國軍
法懲辦其常勝軍先經議派英兵官奧倫會帶
茲據英國定約隨後奏明交兵官戈登管帶該
二人者臣均未悉其底蘊現在奧倫甫經接帶
會同吳煦李恒嵩赴松點驗勇數裁減冗費粗
立章程似尚實心幫助將來能否持久有無偏
執私見不致再生枝節之處容臣隨時察酌妥

辦具奏臣惟諄飭吳煦核實整頓和衷籌商於
調停籠絡之中仍寓裁制控馭之道以期協力
保衛仰副

聖鑒所有籌議整飭常勝軍各緣由謹會同頭品頂
戴辦理通商大臣臣薛煥附片具陳伏乞

聖鑒訓示謹

奏

												卷一 一 丁
--	--	--	--	--	--	--	--	--	--	--	--	--------------

覆奏添募揚勇片 十二月二十七日

再欽奉十二月初十日

寄諭李鴻章招募揚勇原因滬上兵力未厚第江北各營月餉僅止三兩且須五六十日始能一關必致該處得力之勇改名應募相率引去於江北軍務大有關係著李鴻章飭知委員張家瑜等即行停止該撫籍隸皖北廬鳳一帶民風素稱强悍若派員前往招募必可訓練成軍並著酌量辦理上海月餉雖多何以每名有七八兩至十兩十二兩之多恐有常勝軍潛赴江北招募之事尤當嚴行

禁止等因欽此伏查臣處各營兵勇皆照曾國藩
楚軍章程每名月給銀四兩二錢五錢不等無
論餉源盈絀臣恪守舊章斷不敢妄有更變近
因稅釐短收不得已而酌發半餉代購食米滬
上新糧昂貴數倍江北兵勇之苦奚減揚營且
以江北各屬完善之區供給揚州一軍以上海
一隅稅捐所入供給臣軍與各國教練之勇並
分濟鎮江安慶各軍其餉數之多寡亦可懸揣
而得矣至所稱月領口糧銀七八兩至十兩十
二兩者外國教練勇目頗有此數從前徇洋人

之請相沿成例習為固然臣方日議裁減豈肯
令所部各營尤而效之壞亂營制虛費帑項

聖明慮及常勝軍過江招募固知臣軍無此餉額臣
亦無庸深辨惟目下防勦喫緊兵力單薄以致
欲取崑太則分路並進而不足欲援常昭則臨
時抽調而無從迭次奏明在案前派員赴皖北
募成十營經曾國藩截留九營分守無為廬江
等處故就近派赴淮揚添募以濟孤軍之急仍
嚴飭該員弁不准收募揚營兵勇旋據募回五
營臣親加點驗均係裏下河土著與皖北客民

於揚營防務似無關礙常勝軍亦無潛赴江北
招募之事昨准都興阿來咨臣已據實咨復而
都興阿疑慮過甚遽以上瀆

宸聰仰煩

聖訓周詳莫名欽悚除飭知張家瑜停止招募外所
有查明各緣由理合附片復陳伏乞

聖鑒謹

奏

請優卹曾貞幹摺 十二月十七日

奏為即用知府曾貞幹在金陵營次積勞病故請
旨格外加恩賜卹恭摺奏祈

聖鑒事竊據藩司曾國荃稟稱胞弟曾貞幹於咸豐
三年以諸生隨兄曾國藩募勇三百人擊賊常
甯之洋崗旋會水陸各軍東下自岳州假歸咸
豐八年因兄曾國華殉難三河慨然有殺賊復
仇之志前湖北巡撫胡林翼札委募湘勇千人
赴鄂防勦十年克復太湖縣城經湖廣督臣官
文奏保訓導并加國子監學正銜嗣圍攻安慶

漸次統帶至五千人屢次擊敗援賊克復安慶
省城奉

旨以同知直隸州選用時安慶初復江北各城多為
賊據該員駐守樅陽鎮以固皖東門戶同治元
年隨曾國荃大營肅清江北各城渡江紮營三
山夾會賊赴援青陽數萬人環攻三山營壘該
員以一軍力戰支持卒解賊圍遂進克繁昌縣
城又會水師克復魯港南陵奉
旨賞給迅勇巴圖魯名號又進克蕪湖縣城遂圍金
陵該員獨當江東橋一路七八月間病瘧醫治

甫愈適忠逆李秀成侍逆李世賢率賊數十萬
赴援金陵時曾國荃駐雨花臺當金陵東路該
員當西路力保餉道兼援東路之急苦守力戰
四十餘日十月初五日擊退大股援賊奉

旨加恩以知府用初八日該員與福建提督楊岳斌
察看九洑洲賊壘設法進攻感受風寒舊疾復
發以十一月十八日卒於江東橋營次等情前
來臣查補用知府曾貞幹素負奇氣為諸生時
專習擊刺超距之法有幽并俠骨自曾國藩奉
命督辦軍務曾國華曾國荃皆從事行間該員以諸兄

受

國厚恩感激圖報益習為勞苦忍飢寒隆冬短韜衷
袒不御棉衣初帶勇三百人楊岳斌彭玉麟皆
其幫辦該員知為大將才力言於曾國藩使各
將一軍論者服其知人治軍有紀律尤善拊循
戰士人樂為之用履危蹈險堅固不搖忠侍大
股赴援金陵屢爭奪官軍餉道該員從容布署
戰守兼施晝夜防護無少休息使賊卒不得逞
以去先後克復安慶蕪湖各城及解金陵賊圍
實該員之力居多而在軍中日久勞苦憂思該

員精氣亦已竭矣又逆揣金陵之賊勢必北渡
解圍四日即與楊岳斌冒風雨乘舟上下謀攻
九洑洲以遏竄路屢接曾國荃稟報敘述該員
戰績徒以曾國藩親弟未敢聲請獎敘臣欲專
摺保奏又念曾國藩公忠之誼不欲為諸弟敘
勞乞

恩實出至誠若由臣具奏亦涉形迹之私欲俟克復
金陵後彙案敘保而遽一病不起於臣心尤為
遺悔該員年甫踰三十並無親生子嗣初謀帶
勇時先撫兄子紀渠為子本年五月其妻鄧氏

又已病故聞其病中譖語但以殺賊守濠為言
忘家為

國至性耿耿蘄然無所顧念尤為難得伏查曾國
藩兄弟五人為

國家效力疆場先後死事者二人一門忠義海內
欽仰從前候選同知曾國華殉難三河經胡林
翼奏請

加恩賜諡以其勞績宣付史館茲曾貞幹在軍營病故
其生前功績之盛與所以積勞致疾之由迥非
尋常將士可比臣知之較深不敢任其湮沒可

否仰邀

諭旨准照二品例賜卹並予

賜謚於本籍及死事地方建立專祠仍宣付史館特

予立傳出自

逾格天恩所有曾貞幹在營病故請

旨優卹緣由謹繕摺具奏伏乞

皇上聖鑒訓示謹

奏

											11
--	--	--	--	--	--	--	--	--	--	--	----

請設外國語言文字學館摺

同治二年正月二十日

奏為援案請設外國語言文字學館恭摺仰祈

聖鑒事竊臣前准總理衙門來咨遵議設立學習外

國語言文字學館為同文館等因伏維中國與

洋人交接必先通其志達其欲周知其虛實誠

偽而後有稱物平施之效互市二十年來彼酋

之習我語言文字者不少其尤者能讀我經史

於

朝章憲典吏治民情言之厯厯而我官員紳士中

絕少通習外國語言文字之人各國在滬均設

立繙譯官一二員遇中外大臣會商之事皆憑
外國繙譯官傳述亦難保無偏袒捏架情弊中
國能通洋語者僅恃通事凡關局軍營交涉事
務無非雇覓通事往來傳話而其人遂為洋務
之大害查上海通事一途獲利最厚於士農工
商之外別成一業其人不外兩種一廣東甯波
商夥子弟佻達游間別無轉移執事之路者輒
以學習通事為逋逃藪一英法等國設立義學
招本地貧苦童穉與以衣食而教肄之市兒村
豎來歷難知無不染洋涇氣習亦無不傳習彼

教此兩種人者類皆資性蠢愚心術卑鄙貨利
聲色之外不知其他且其僅通洋語者十之八
九兼識洋字者十之一二所識洋字亦不過貨
名價目與俚淺文理不特於彼中兵刑食貨張
弛治忽之大謬焉無知即遇有交涉事宜詞氣
輕重緩急往往失其本旨惟知藉洋人勢力播
弄挑唆以遂其利欲蔑視官長欺壓平民無所
忌憚即如會辦防堵一節間與通習漢語之大
酋晤談尚不遠乎情理而瑣屑事件勢不能一
一面商因而通事假手其間勾結洋兵為分肥

之計誅求之無厭排斥之無理支銷之無藝欺
我聾啞逞其簧鼓或遂以小嫌釀大衅洋務為
國家懷遠招攜之要政乃以樞紐付若輩之手遂
至彼己之不知情偽之莫辨操縱進退汙不得
其要領此非細故也京師同文館之設實為良
法行之既久必有正人君子奇尤異敏之士出
乎其中然後盡得西人之要領而思所以駕馭
之綏靖邊陲之原本實在於此惟是洋人總匯
之地以上海廣東兩口為要種類較多書籍較
富見聞較廣語言文字之粗者一教習已足其

精者務在博采周咨集思廣益非求之上海廣東不可故行之他處猶一齊人傳之之說也行
之上海廣東更置之莊嶽之間之說也臣愚擬
請仿照同文館之例於上海添設外國語言文
字學館選近郡年十四歲以下資稟穎悟根器
端靜之文童聘西人教習兼聘內地品學兼優
之舉貢生員課以經史文藝學成之後送本省
督撫考驗作為該縣附學生准其應試其候補
佐貳佐雜等官有年少聰慧願入館學習者呈
明由同鄉官出具品行端方切結送局一體教

習藉資照料學成後亦酌給升途以示鼓勵均由海關監督籌試辦隨時察核具詳三五年後有此讀書明理之人精通番語凡通商督撫衙門及海關監督應添設繙譯官承辦洋務即於學館中遴選承充庶關稅軍需可期核實而無賴通事亦斂迹矣夫通商綱領固在總理衙門而中外交涉事件則兩口轉多勢不能以八旗學生兼顧惟多途以取之隨地以求之則習其語言文字者必多人數既多人才斯出彼西人所擅長者測算之學格物之理制器尚象之

法無不專精務實泐為成書經譯者十纔一二
必能盡閱其未譯之書方可探蹟索隱由粗顯
而入精微我中華智巧聰明豈出西人之下果
有精熟西文轉相傳習一切輪船火器等巧技
當可由漸通曉於中國自強之道似有裨助如
蒙

俞允一切章程及薪資工食各項零費容臣督同關
道設法籌畫或仍於船鈔項下酌量提用其廣
東海口可否試行有無窒礙之處應請

飭下該省督撫體察辦理臣愚昧之見是否有當伏

乞

皇上聖鑒訓示遵行謹

奏

覆奏趙景賢死節摺

奏為遵

旨查明道員趙景賢死節情形恭摺覆陳仰祈

聖鑒事竊臣鴻章於同治元年閏八月初四日接奉

同治元年八月二十二日

寄諭李鴻章另片奏湖州失守情形已明降諭旨令

曾國藩等查明文武下落具奏矣趙景賢被執不

屈大節凜然現尚被賊羈禁蘇城仍著該撫隨時

密探情形具奏等因欽此又奉同治元年閏八月

十七日

寄諭趙景賢現在是否尚在賊中抑係已經殉難仍
著李鴻章查明並湖州城內文武各官下落一併
咨會曾國藩左宗棠查明速奏等因欽此欽遵分
別咨行轉飭查探去後茲據江蘇候補知府趙
炳麟稟稱本年四月初九日有堂姪孫趙桂生
杭人吳姓先後自蘇城賊中逸出到滬稟知堂
姪前布政司銜福建糧道趙景賢於三月十八
日在蘇城遇害當查死節各情僉稱被執到蘇
後該逆誘逼相從百折不回求死不得自太倉
敗賊回蘇播言趙景賢勾結內應有襲蘇之意

偽慕王譚紹光即於三月十八日設席招飲酒
次相詰曰汝通妖兵耶答以我本官兵何得謂
通汝獻蘇城耶答以蘇本

大清土地何得謂獻又曰汝今死期至矣景賢仰天
大笑曰求之一年而不得者今何幸也遂肆口
謾罵譚逆即取洋鎗對胸一擊而殞連日搜捕
餘黨甚急各等語伏查該故道誓守湖州血戰
三年嬰城固守五閱月糧盡援絕而陷迨被執
到蘇百計誘逼矢志不移卒以身殉遵飭查詢
死節情形據實稟報並開具事蹟節略呈請

奏懇

恩卹等情前來臣等查趙景賢係前刑部侍郎趙炳
言之子由舉人選授宣平縣教諭改官內閣中
書未及供職成豐三年奉

旨籌辦本籍團練遂專湖防一面之任三解城圍每戰
輒數晝夜殺賊動盈萬至不可數計先後奪獲
賊船大小千數百號猶以其間分兵四出赴援
杭州協勦嘉興並克復安徽廣德州及浙江之
長興德清安吉武康孝豐等縣以功累擢至福
建糧道成豐十一年冬杭省再陷四面皆賊湖

郡勢成孤注該員誓以死守賊既屢受創銜恨入骨竟掘其父趙炳言之墓而益糾大股合圍困之該員先於太湖大錢口添紮水師營以通糧道及是冬十二月大雪三日夜湖冰合如平地賊履之而過我師船膠於凍不能戰大錢口為賊奪踞運道遂絕猶時時開城出擊奪賊糧以濟食於是賊相戒不與戰移其糧屯遠處而圍攻益急元年正月初十日臣國藩奉

寄諭垂詢趙景賢能否赴任著酌度情形諭令辦理

臣宗棠暨前江蘇撫臣薛煥亦奉

寄諭密速設法傳諭該道交代經手事件輕裝赴任
各等因時甯廣時時有賊臣國藩臣宗棠專人
前往均由半塗折回三月初三日該道始於圍
城中密奉薛煥飭知赴任及賞加布政使銜之
恩旨軍氣復為一振當是時閩疆喫緊需才孔亟假
使趙景賢遵

旨交替湖防自赴新任誠如

恩諭移其捍衛桑梓之力以保障閩疆厥功亦屬甚
偉揆以為

國惜身之義亦未始無辭而該道感激益深効死

益堅義不忍去密寄帛書至滬與其叔趙炳麟
有衆志成城守死善道之語其素所蓄積可知
也自三月以後糧餉軍火俱盡軍民剝樹皮掘
草根以食猶能擒斬奸細禁止搜掠忍飢耐戰
至五月初三日力竭城陷距賊匪圍城之日已
五月有餘從來各處守城無如此之久者趙景
賢以辦團紳士倡率兵民同心効命可敬可哀
臣等遠隔賊巢數百里無路能援負疚徒深城
破後趙景賢抽刀自斫被譚逆奪阻執之至蘇
賊始則極肆凌辱至披頰流血欲以摧折其盛

氣已復謬為恭敬百端誘脅該道漠不為動作
絕命詩四章有云亂刃交揮處危冠獨坐時又
云厚貌徒為爾孤忠矢靡他偽忠王李秀成旋
有遣歸之意致書以漢壽亭侯歸漢為言景賢
答書以為擬不於倫並有歸我者之知己不如
殺我者之尤為知己等語先後參證則當時情
事宛然可見大義凜凜終能尋約可謂皎然不
欺其志者也核其死事顛末洵屬忠貞蓋世無
愧完人其長子深彥年甫十二歲聞湖州之陷
痛父情切即先服毒自盡已經湖南撫臣毛鴻

賓奏請

獎卹次子五人濱彥年十歲滋彥年七歲其幼者尚在襁抱遠寄湖湘孤苦無依聞景賢在圍城中及臨終時未嘗以置念也相應詳細陳明請

旨將布政使司銜福建督糧道趙景賢交部照布政司陣亡例從優議卹並請

特旨予謚准於湖州本籍地方建立專祠其事蹟節略隨摺咨送軍機處請

旨宣付史館予立特傳以彰忠蓋除查明湖州城內文武各官下落再行具奏外理合先將道員趙

景賢死事情形遵

旨查明合詞恭摺覆陳伏乞

皇上聖鑒訓示謹

奏

分路規取蘇州摺 五月十一日

奏為調派各軍分路堵剿現籌大概情形恭摺奏

祈

聖鑒事竊崑新克復後即應乘勝進規蘇城四月十
七八等日程學啟督帶水陸各營進紮峴子山
大小唯亭界浦角直等處距蘇之婁門約二十
餘里紮營甫定程學啟與戈登各乘小舟至城
下察看形勢該城周圍數十里各門紮有賊壘
數十座城內外守賊共有五萬餘人堅拒不動
我軍僅由東北一路進攻未足制其死命臣密

察賊情盱衡地勢蓋有可慮者三有可幸者二
查蘇常杭嘉為東南財賦最盛之區逆眾佔踞
四年徵糧收稅取精用宏且時以財粟接濟金
陵轉輸各路金陵是其老巢而蘇常杭嘉又為
金陵根本賊必死守而力爭之以成犄角之勢
以護糧餉之源此其可慮者一也江南多水蘇
嘉各郡尤甚湖河蕩港千百通聯津路迷離橋
梁斷續戰船有不能徧及之處陸軍有望洋而
歎之時我難進而賊易守不比中原四戰之地
山川瘠苦之邦克一名城則各城之賊無所繫

戀望風而走即如前此常熟解圍太崑迭克擒
斬悍逆實不下四五萬蘇嘉各賊亦未嘗不膽
寒然猶死力抗拒蓋恃地形之險足以自固又
念妻妾財帛之厚不肯遽棄臣由松滬進兵乃
為蘇省偏隅嘉興對面蘇嘉並圖則無此兵力
舍嘉圖蘇則動輒牽制此其可慮者二也偽忠
王李秀成為諸賊之冠不甚耐戰而最多狡謀
據有蘇杭嘉湖四郡之地其餘各偽王皆其死
黨悉聽指揮咸豐十年圖解金陵圍困而繞竄
浙江以取遠勢十一年圖救安慶而繞竄江西

湖北以取遠勢去年迄今圖救金陵而分竄皖
南北又欲繞竄揚州裏下河以取遠勢茲我軍
進逼蘇州該酋仍徘徊金陵上下不即回顧遣
其心腹黨羽分守蘇嘉若此間攻勦過急則或
挈衆來援或另圖竄踞均意中之事此其可慮
者三也惟是江皖浙東各有重兵堵截又赤地
千里無所掠食聞鮑超與曾國荃所派各軍連
復巢縣含和已追至江浦浦口其另股竄天長
揚州者人數雖多饑疲實甚都興阿吳棠等果
能竭力堵守不使竄入裏下河鮑超等再速克

二浦扼斷北賊過江之路則各軍分投勦辦較易收拾此其可幸者一也李秀成李世賢自分踞蘇浙氣勢日盛近歲以來屢挫於官軍各路損傷不下數十萬其精銳計不甚多各軍攻奪不下數十城其膏腴亦去其半現在蘇浙各賊惟嘉興陳炳文一股較多而悍有蔣益澧扼其前臣軍綴其後至常州無錫直接金陵東壩賊援甚廣深入頗難但使我軍穩紮穩進得寸得尺毋再失機徐圖制敵此其可幸者二也臣軍水陸添募及收撫各城降衆已踰四萬督臣曾

國藩以蘇郡可圖太湖可進又派處州鎮總兵李朝斌統率太湖水師十營剋日下駛協力攻勦現擬酌分三路以勦為堵由崑山進蘇州為一路以程學啟所部陸軍當之由常熟進江陰無錫為一路以李鶴章劉銘傳所部陸軍當之署提臣黃翼升督淮揚水師各營往來調度相輔並進戈登帶常勝軍移駐崑山專備各路游擊援應由泖澱湖進吳江平望太湖為一路李朝斌水師當之以上三路皆欲規取遠勢以翦蘇州枝葉而後圖其根本也又恐分路並進杭

嘉湖各賊繞竄浦東窺撲松滬復派常鎮道潘鼎新帶所部八營扼紮金山衛編修劉秉璋帶所部七營扼紮洙涇副將楊鼎勳帶所部五營扼紮張堰聯為一氣以防內竄俟浙軍得手即相機前後夾勦現據程學啟稟報二十九日在陽澄湖迎擊賊船擒截千餘仍即日移紮大小官塘及外跨塘一帶步步進逼李鶴章稟報業將常熟駱國忠降衆編立八營逐漸訓練分置防勦並會督各軍進紮常熟西三十里之王莊探明前面賊營由顧山至無錫城外連互不絕

卷一
係偽章王偽潮王偽侍王帶領賊衆六七萬希
圖抵禦擬併力兜擊再與黃翼升劉銘傳等規
復江陰又據戈登稟稱俟小輪船雇齊或協攻
吳江或協勦無錫冀斷各賊援蘇之路臣惟諄
飭諸將穩慎以圖互相援救以固全局而慰
宸廑除續後戰狀再行馳報外所有調派各軍分路
堵勦各緣由謹繕摺由驛具陳伏乞

皇上聖鑒訓示謹

奏

裁減蘇松太糧賦浮額摺日同治二年五月十一

奏為蘇松太三屬歲征浮額積弊太深請比較近年完數酌中定額以收實課而廣

仁施恭摺具奏仰祈

聖鑒事竊惟大學理財之道於天下必曰平周官土均掌土地之征必曰均禹貢九等大宰九賦不外平均今天下之不平不均者莫如蘇松太浮賦上溯之則比元多三倍比宋多七倍旁證之則比毘連之常州多三倍比同省之鎮江等府多四五倍比他省多一二十倍不等以肥磽而

論則江蘇一熟不如湖廣江西之再熟以寬窄而論則二百四十步為畝有縮無贏不如他省或以三百六十步為畝五百四十步為畝而賦額獨重者則由沿襲前代官田租額也夫官田亦未嘗無例矣伏查

大清戶律官田起科每畝五升三合五勺民田每畝三升三合五勺重租田每畝八升五合五勺沒官田每畝一斗二升是官田亦有通額獨江蘇則不然攷宋紹熙中朱子行經界法吳糧每畝五升耳厥後籍蔡京韓侂胄等莊為官田又賈

似道廣買公田元代續加官田明祖平張士誠
又没入諸豪族田皆據租籍收糧宣德中巡撫
周忱知府况鍾奏減蘇松糧百萬石疏中稱蘇
府秋糧二百七十餘萬石內民糧止十五萬餘
石餘皆官糧是二者未嘗合并官糧自七斗六
升民糧自五升嘉靖中令各州縣盡括境內官
民田裒益之分攤定額長洲縣官田最多故額
最重他縣他郡官田遞少故額遞輕今長洲等
縣每畝科平米三斗七升以次不等折實粳米
多者幾及二斗少者一斗五六升遠過乎律載

官田之數此蘇松太重賦之源流也自明以來行之五百年不改而其中升降盈縮則因時而異蘇州府志稱明臣周忱奏令輸布一匹準米一石輸銀一兩準米四石又稱課吏以催科六七分為上考終明之世無徵至八九分者

國朝康熙十三年前撫臣慕天顏疏有曰無一官曾經徵足無一縣可以全完無一歲偶能及額雍正中奏準江蘇漕米折徵每石銀一兩其時銀價每兩易錢七八百文以此觀之前明及國初賦額雖重大都逋欠準折有名無實而已嗣

是承平百餘年海內殷富為曠古所罕有江蘇
尤東南大都會萬商百貨駢闐充溢甲於寰區
當是時雖擔負之夫蔬果之傭亦得以轉移執
事分其餘潤無論自種佃種皆以餘力業田不
關仰給之需遂無不完之稅故乾隆中年以後
辦全漕者數十年無他民富故也惟是末富非
本富易盛亦易衰至道光癸未大水元氣頓耗
商利減而農利從之於是民漸自富而之貧然
猶勉強支吾者十年迨癸巳大水而後始無歲
不荒無縣不緩以

國家蠲減曠典遂為年例夫癸巳以前一二十年而一歉癸巳以後則無年不歉且鄰境皆不歉而蘇松太獨歉此何理也謂為州縣捏災此三十年中督撫司道更數十人之多豈無一二不肯黨同欺妄之人而且

聖主不加斥戶部不加駁廷臣科道不加糾此又何理也誠以賦重民窮有不能支持之勢部臣職在守法自宜一切不問堅持不減之名疆臣職在安民實因萬不得已為此暗減之術始行之者為前督臣陶澍前撫臣林則徐皆一代名臣揣

其意必謂減額則永不能加災緩則後不為例
原冀民氣漸甦無難復舊初不意年復一年且
年甚一年而不可返也臣竊惟前辦全漕之時
間遇水旱辦成災者一辦帶徵者九帶徵之後
依然全漕故以年計為減成以十年計非真減
成也今則年年辦災永無帶徵之日乃真減成
也又官墊民欠一款道光之初數僅分釐癸巳
以後馴至一二成夫所謂墊者豈州縣之果能
墊哉不過移雜墊正移緩墊急移新墊舊移銀
墊米以官中之錢完官中之糧將來或額免或

攤賠同歸無著猶之未完也故歷年糧冊必除去墊欠虛數方得徵收實數以此數民固未嘗完也伏查蘇屬全漕一百六十萬厥後積漸減損蓋自道光中年始於今三十年矣禮曰以三十年之通制國用言綜乎三十年之大凡斯以後可知也今試以道光十一年起至咸豐十年止三十年中運數分計之辛卯以後十年共數一千三百餘萬內除官墊民欠得正額之七八成辛丑以後十年共數九百餘萬內除官墊民欠得正額之五六成咸豐辛亥以後十年共數

七百餘萬內除官墊民欠得正額之四成而已
自粵逆竄陷蘇常焚燒殺掠之慘遠接宋建炎
四年庚戌金阿朮故事蓋七百有三十年無此
大劫臣鴻章親歷新復各州縣向時著名市鎮
全成焦土孔道左右蹂躪尤甚又各賊不能相
統此賊所踞難免彼賊劫掠故賊境即不與官
兵交界亦皆連阡累陌一片荆榛凡田一年不
耕便為荒田今已三年矣各廳縣冊報拋荒者
居三分之二雖窮鄉僻壤亦復人煙寥落間於
頽垣敗井之旁遇有居民無不鵠面鳩形奄奄

待斃傷心慘目之狀實非鄭俠流民圖可比已
復之松太如此未復之蘇州可知而欲責以重
賦責以數倍他處之重賦向來暴斂橫征之吏
所謂敲骨吸髓者至此而亦無骨可敲無髓可
吸矣

皇上視民如傷未傷者猶且如傷况已傷而傷又至
重者乎斯即據情籲請全行蠲免三五年在
皇上如天之仁必蒙

俞允惟是

天庾正供停運三年軍精浩繁度支仰屋其何以

濟臣等所不敢出此也又荒田召種有順治年間各省屯田之例可援然墾熟既遠升科更遲現報荒田三分之二已荒者議蠲未荒者議減將所存僅止一二成亦臣等所不敢出此也至於辦灾例案自七八成而五六成而四成咸豐三年聞警拋荒僅止三成若稍存苟且彌縫之見援拋荒之案減而又減約得二三成非不可以塞責但前督撫臣之所以為此者尚或冀其復舊今則明知無復舊之望而徇於積習不以直陳是全無為

國之心徒有罔上之咎又臣等所不敢出此也臣等細核歷年糧數咸豐十年中百萬以上者僅一年八十萬以上者六年而皆有官墊民欠十餘萬在其中是最多之年民完實數不過九十萬成案如是民力如是積弊之後大難之餘催科一事棘手尤倍臣等蒿目艱難悉心籌畫上體

宵旰憂民之切下維軍國待用之殷於萬難偏重之中求兩不相妨之道似宜用以與為取以損為益之一法比較歷來徵收各數酌近十年之通

改定賦額不許捏災不許挪墊於虛額則大減於實徵則無減窮變通久於此時為正辦或者謂據此定額未免過少不知減餘之數仍通省莫重之數尚非宋元舊額不得謂少且不自今日始也咸豐十年以前歷年如是未嘗於歷年國用有減也彼時兵革未興生聚未改田園廬舍未有損非猶是完善之江蘇乎夫完善之江蘇僅有此數即殘破之江蘇不應仍有此數今臣等於殘破之餘請照完善之時定額且不接近年最少之數不做借墊欠虛數誠不敢謂必有

把握若仍執久置不用之虛額衡量多寡欲求轉逾乎完善之時

皇上聖明洞鑒有是事乎有是理乎事理所必無即刑法所必窮恐賢如劉晏李巽不賢如裴延齡李實亦且束手無策矣又或者謂數既猶是何不仍夫舊貫尚有冀於將來不知乾嘉之江蘇實千歲一逢之盛會不可為例竊謂自茲以往如天之福東南無事休養生息二三十年冀可復咸豐及道光末年之江蘇更二三十年冀可復道光中年之江蘇而懸此虛額數十年以待

之無論無此政體恐異日之利未必能復目前之害已不可支蓋臣等今日之所辦所謂以與為取以損為益者方將借減賦之名為足賦之實所以能照完善之時定額者其機括全在減賦二字中也何以言之辦災辦緩權在胥役防弊雖有百法舞弊奚啻千端止此民力止此地產不減額之弊在多一分虛數即多一分浮費減額之效在少一分中飽即多一分上供減額既定胥吏無權民間既沾實惠公家亦有實濟是為轉移之善術一也吳民死亡之外大半散

之四方故鄉賦重望而生畏尋常蠲緩不足去
重賦之名招之不來荒田愈久愈多何法以治
之惟聞減賦之令必當爭先復里是為勞來之
善術一也往者諸城被陷官吏一空鄉團抵死
拒敵鑼聲所達萬衆爭先小股賊匪見輒卻走
即以三首縣言洞庭香山金市各鄉有相持至
七八月之久者固由

朝廷恩澤之至深亦徵愚賤天良之未泯此時減
賦令下彼見

皇上於經費匱乏之時尚有此度越尋常之舉有不

感生望外踴躍輸將者乎是又激勸之善術一也大抵以事理而論殘破之視完善必應遞減而有此三者可以彌補此遞減之數則又以事理決之臣等所謂以與為取以損為益者此也現在蘇郡尚陷賊中聞各鄉多為暗圍之約待時而動以應官兵即如常熟反正鄉民毀賊卡殺賊目者凡十餘處崑山克復沿湖居民截殺竄賊無數是其明證一聞減賦之令必當感激涕零望風增氣他日軍麾所指弩矢之驅必更奮箠壺之雅必更誠又未始非固結招徠之一

法臣等伏查順治八年三月奉

上諭凡故明仇怨地方或一處加糧甚重我朝並無仇
怨何可踵行此等情由詳察具奏欽此於是江
西袁瑞等府明初因陳友諒抗師加糧倍重布
政司莊應會奏復舊額蘇松獨未及上請又雍
正三年三月十九日怡親王奏請酌減蘇松浮
糧奉

旨蘇松之浮糧當日部臣從未陳奏常塵

皇考聖懷屢欲施恩議減今怡親王等悉心籌畫斟酌
奏請朕體

皇考愛民寬賦之盛心準將蘇州府額增銀蠲免三十萬兩松江府十五萬兩欽此又乾隆二年奉

上諭江省糧額尚有浮多之處著再加恩免徵銀二十萬兩欽此部文照雍正三年例辦理仰惟

列祖

列宗當東南全盛之時猶復

軫念民依如此其深且厚況今日之兵燹孑遺流離瑣尾至於此極也乎漕糧為惟正之供而蘇松獨曰浮糧曰浮賦見諸

列聖諭旨及郡縣志書不以為嫌是知實有浮多應減

之處留以待我

皇太后

皇上行之者也惟有籲懇

聖慈鑒察特沛

殊恩俯准減定蘇松太三屬糧額由臣等督飭司道設局分別查明各州縣情形以咸豐中較多之七年為準折衷定數總期與舊額本輕無庸議減之常鎮二屬通融核計仍得每年起運交倉漕白正耗米一百萬石以下九十萬石以上著為定額即以此後開徵之年為始永遠遵行不

准更有墊完民欠名目似此核實辦理不特酌
十年二十年之通相較固無所絀卽酌三十年
之通相去亦不甚遠至官墊民欠本屬弊政新
復之地百款皆空無可墊而欲其墊弊更百出
必宜永遠禁止又嗣後非大旱大水實在荒歉
者不准捏災著為令伏願

皇太后

皇上俯念蘇松各屬為十八省未有之重賦非他處
被陷州縣可比又為七百年未有之大難非歷
年被災例案可比去無益之虛籍求有著之實

徵下延億萬垂盡之生上繼

累朝未竟之志民生幸甚

國計幸甚如蒙

俞允欽遵俟蘇屬肅清一體辦理先自松太創行由
臣等設局擬定章程其漕糧一切瑣屑款目酌
定歸併汰除以省煩文而昭實際續再縷晰具
奏謹將歷年起運數目繕具清單又蘇松財賦考
一書曾收入

四庫館於重賦始末言之頗為詳盡一并恭呈
御覽所有蘇松太三屬歲徵浮額積弊太深請比較

近年完數酌中定額緣由謹合詞恭摺具陳伏
乞

皇太后

皇上聖鑒訓示謹

奏

清查蘇松漕糧積弊片

再蘇松漕糧積弊視他省為甚其最不公平者莫如大小戶之分蓋州縣徵收錢糧皆有折色平餘缺分之肥瘠以錢糧之多寡為衡應酬之豐殺又以缺分之肥瘠為準錢糧重則折色平餘亦較豐酬應亦較鉅積習相仍而朝廷之正供可緩陋規之成例必不可裁州縣一切取之糧戶而蘇松太三屬漕額獨重世家大族亦獨多皆能以正供定額與州縣相持於是

一切攤之民戶惟所誅求漫無限制因有大小

戶之名一以貴賤強弱定錢糧收數之多寡不
惟紳與民不一律即紳與紳亦不一律民與民
亦不一律紳戶最少者一石完不足一石多者
遞增最多者倍之民戶弱者完折約三四石當
一石強者遞減尤強者不足二石而紳與民又
各有全荒之戶紳以力免民以賄免同一百畝
之田有不完一文者有完至百數十千者大率
以小戶之浮收抵大戶之短價小戶不勝其苦
其黠者又詭寄於大戶而大戶益多小戶益少
其勢遂偏重於一二安分之平民而催科敲朴

之慘拘繫之繁無一非傷民氣者推原其故皆由錢糧額徵過重激成大戶把持之勢而迫州縣以出於剝削小民之計此又明以來五百餘年積漸之習流極於今日無可為善全之術者也故以核減浮糧為理漕之綱即以辦理均賦為治漕之用當先除去大小戶名目使州縣不得意為高下以肆其苛勒而後浮收之弊乃可次第清楚臣查錢糧浮收自嘉慶以後漸次增加其時州縣之殷富已漸不如從前而浮收反日重者則以彌補州縣虧空定為攤賠之計挪

東掩西弊端百出一切取償於錢糧各管上司
知其弊而無能禁制又運糧之旗丁收漕之倉
書互相需索年甚一年其始因浮收而有浮費
其後浮費日增浮收亦遂積為固然日求取盈
官民相為疾視無復上下相維之意故臣以為
蘇松漕糧核減後必以革除大小戶名目為清
釐浮收之原以裁減陋規為禁止浮收之委如
蒙

皇上天恩俯准將蘇松浮糧酌中定額臣即督飭司
道等設局清查隨各州縣風土人情之宜明立

章程酌定折價紳衿平民一例完納永遠革除
大小戶名目不使州縣陵虐小民敢為暴斂而
不顧亦不使各項陋規困苦州縣迫使病民而
不辭謹先將大概情形縷晰上陳伏乞

皇太后

皇上聖鑒訓示謹附片具

奏

--	--	--	--	--	--	--	--	--	--	--	--	--	--	--	--	--	--	--	--	--

三

四

關稅留抵軍餉摺 同治二年五月三十日

奏為查明實在情形請

旨將江海關所收各稅仍准留抵上海軍需並照案
請銷折耗恭摺奏祈

聖鑒事竊准戶部咨奏參江海關征收洋稅等銀全
數動撥軍需無存一摺於同治元年十二月初
一日奉

旨依議欽此查原奏內開例載各省關稅銀兩管關
監督於年滿季滿時遵照定例解交部庫該督
撫毋得率行指撥如遇有迫不及待之項准其

聲敘實在情形專摺奏明辦理今江海關自咸
豐十年七月二十六日起至十一年七月二十
五日止征收西洋各國稅鈔及進口洋藥稅銀
內地子口半稅出口土貨半稅關照船進出口
正稅以及內地絲商補納三關稅銀內除扣交
英法各二成並折耗等銀統計一年期滿共實
存銀一百三十一萬八千七十七兩六錢七釐
六毫據該撫奏稱因軍務喫緊動撥無存等語
查該關征收西洋各國稅鈔銀兩除洋藥稅一
項例應專款解京外其正半各稅應恪遵定例

專款存儲分批解部即不得已借撥軍需亦應
先行奏明方准動用其代征太平北新贛關絲
稅銀兩亦應查照舊章撥還三關今該撫並未
奏明承任該關道將征存洋稅及代征三關絲
稅銀兩藉稱軍需支絀全數撥解已與定例不
符況子口稅土貨半稅等項俱係近年奏明新
增並非該關本有之稅豈容一并動用且不將
掣回實收送部請嚴飭該關道將動撥洋稅銀
兩掣回庫收送部查核銀數相符方准開銷仍
一面造冊報銷其子口稅土貨半稅等項但令

於接到部文之日在新征稅銀項下照數解部以充京餉至代征三關絲稅亦令先行解部一面知照各該關歸入題報案內聲明報部核銷以清款項倘有玩延再奏明嚴叅並請將擅自動撥稅銀之關道吳煦交部照例議處嗣後該關自咸豐十一年七月二十五日以後所征洋稅正項除扣交二成外其餘均應奏明方准動用其子口稅土貨半稅代征三關絲稅全數解部不准絲毫動撥現既擅動如延不提還即著落該關道照數賠繳以重稅課再查江海關自

道光二十三年五口通商洋商完納稅鈔銀兩
每百兩請開銷折耗銀二兩惟天津粵海等關
洋商完納稅鈔均每百兩開銷折耗銀一兩二
錢與五口通商成案有減無增今海關征收稅
鈔仍開銷折耗銀二兩自係遵照舊案辦理以
後應援照天津粵海二關新章每百兩開銷折
耗銀一兩二錢仍於年終送部查核等因准此
臣查咸豐十一年以前收支關稅各款均非臣
任內之事前管關道吳煦雖另案革職該員在
任有年係屬一手經理責無旁貸當即劄行現

署蘇松太道黃芳會同吳煦迅將動撥洋稅銀兩趕緊造冊報銷並遵照部咨指飭事理刻速分別詳辦去後茲據詳稱江海關征收洋稅咸豐七八九等年均儘數解交蘇省籌餉局彙撥軍餉是在蘇常未失守時已不能循例解部十年四月蘇省淪陷太倉嘉定青浦相繼失守上海一隅之地大股賊匪時來撲竄經前撫臣薛煥調集兵勇分投堵剿保此危城所需糧餉以及置備軍火暨協濟鎮江兵餉為數甚鉅別無可籌是年十二月由薛煥奏請將海關所征洋

稅子口土貨半稅並洋藥稅銀儘數抵撥本省
軍餉是已

奏明有案並非擅自動撥且均經掣有批迴將來
辦理報銷自當一併送部核銷至所云接到部
文之日於現在新征稅銀項下照數提回分款
解部一節查現在嘉青崑新常昭太倉各城雖
經克復而蘇常各屬尚為賊踞官軍分投防剿
力圖進取調募愈衆需餉愈多不得不隨時接
濟內若鎮江協餉每月奏定三萬兩源源撥解
又英法二國駐兵上海自十一年冬間辦理會

防凡租賃兵房支應出隊舟車夫馬等款又奉總理衙門與英法公使議定上海教練洋鎗勇六千八百餘名以上兩項共月需經費銀四五萬兩不等又常勝軍四千餘人向有外國兵官管帶教練其辛工口糧章程較各項弁兵加倍相沿已久按月支放不能稍欠所用皆外國軍火並租備輪船等價計數尤昂均為軍需則例所未載亦經迭次奏明在案此外尚須籌備水陸各營軍火并蘇藩司衙門借撥俸餉等款每月合共需銀四五十萬兩放款常不及半而海

關所征各稅自元年十一月後漢口九江開關
長江來貨悉在該關就近完納滬關收數較前
大減自本年四月後各口免單又改為存票收
數較前更減前屆關期所撥銀兩既係入不敷
出現征正稅並子口土貨半稅及洋藥稅每月
實在收數不過十萬以內儘抵本省軍餉萬分
竭蹶全賴捐釐貼補勉強支持若使專款存儲
分批解部必至餉匱兵譁有關大局惟有仍照
前奏請將現征正半各稅及洋藥稅一併留抵
上海軍需俾救阡危而免決裂俟蘇省肅清中

外兵勇遣撤再當遵解部庫以顧京餉至折耗
一項緣上海自道光二十三年開市通商海關
設立銀號各洋商赴號完稅俱用九六七成色
銀若責令補水該洋商非特不允照補反稱額
外需索而海關放解餉銀必須回火傾鎔足色
庫寶每兩折耗銀三四分至五六分不等經前
撫臣傅繩勳於道光二十九年奏請折耗銀三
分在於正稅內作正開銷奉部議核減一分每
兩准銷二分如再不敷由該管關道自行設法
籌補歷經遵辦在案此次部議十一年七月二

十六日以後改令援照天津粵海新章每百兩
開銷折耗銀一兩二錢查粵海關新定章程無
從查悉至天津關試辦章程第一款內開條約
所載洋稅舊定每百兩另交傾鎔銀一兩二錢
今照新章均按部頒庫平完納足紋裁撤傾鎔
之費將來起解部餉責成官號按照天津關餉
傾成足色庫寶每百兩由官加給傾鎔耗費銀
一兩二錢等情是天津關所請加給傾鎔耗費
銀一兩二錢係因洋商完納庫平足紋裁撤另
交傾鎔銀兩而設而海關折耗實因洋商完稅

所交上海通用市銀向稱松江錠祇九六七成色並無足色一經回火傾鎔每兩已折耗銀三四分至五六分不等原案每兩請銷折耗三分部議核減一分准銷二分如有不敷尚須關道籌補當日減定之數實係因地制宜蓋其回火折去之耗由於上海本地銀色太差較他處為獨多在銀號經收稅餉本無例支工食所需房租飯食辛工硝炭等項向賴傾鎔銀一兩二錢以資開銷是以開辦新章十餘年來洋商隨正另交傾鎔工費而折耗仍准並銷折耗與鎔工

本條兩款判然不同亦並行不悖今既准免洋
商另交鎔工此款即歸無著若又核減折耗銀
號固無力賠墊關道亦無法籌補應請仍照原
案每百兩准銷銀二兩以免流弊其銀號鎔工
如有不敷容另行籌議等情詳請具奏前來臣
復加查核前屆關期將所征洋稅儘撥軍需勢
非得已經前撫臣專摺奏明有案尚非擅行動
用置京餉於不顧現在兵數日增稅數日減以
稅抵餉隨收隨放不敷甚鉅此中外所共見共
聞萬不能提還前款亦不能存儲批解以致貽

誤江南大局至海關折耗每百兩准銷銀二兩
實緣本地銀色太低洋商既不另交鎔工銀號
無從貼賠火耗與天津各關礙難一律且本係
部臣減定未便再事核減該道等所議委係實
在情形可否仰懇

天恩俯念蘇省軍務喫緊仍照前奏將現征正半各
稅及洋藥稅一併留抵上海軍餉并照舊章請
銷折耗免其置議臣運籌無方未能兼顧京餉

紓

宵旰之憂勤塞部臣之責望殊屬咎無可追惟江南

用兵以來關稅極旺之時尚不能分款解部至
臣今日徵稅愈絀募兵愈衆中外交涉之事愈
多各項開銷迫不及待積欠纍纍焉有餘款可
以報撥如託

皇上威福一二年間東南肅清中外各軍陸續裁撤
自當遵解部庫稍濟艱難所有江海關現收各
稅仍留抵蘇省軍需並照案准銷折耗各緣由
謹繕摺具陳伏乞

皇上聖鑒訓示謹

奏

--	--	--	--	--	--	--	--	--	--

駕馭西兵片

再臣於二十一日由蘇州婁門外跨塘折赴崑山接見弋登面商進取機宜該兵官以蘇城太大兵力甚單請添雇英國弁兵一百五十名幫同領隊攻打冀可得手臣因需費過鉅且專用洋兵易生後患未遽允行該兵官再四要求准添洋兵百名月給薪糧一萬元無論蘇州攻克與否以一箇月為限即行辭退如克蘇城常勝軍與程學啟所部分入駐守五日後仍將常勝軍撤回崑山該兵官於守城一節據稱遵示辦

理於添雇洋兵一節云須與英國陸路提督伯
郎妥商似另有意見臣姑置不與較昨於王莊
行營果接李恒嵩稟述英提督伯郎已為戈登
接至崑山請臣折回會商一切臣以江陰軍情
緊急不得分身令李恒嵩轉告伯郎隨後回滬
商議蓋深知洋人性情我苟暱就相商彼即多
方挾制頃據李恒嵩稟覆伯郎謂須赴京都一
行約三箇禮拜期回即帶英兵攻勦蘇城等語
臣查江南地勢各郡縣一線平排四水環繞本
屬不易攻取臣由松滬進兵嘉興在其南常州

居其北蘇州界其中面面賊巢若萃我兵力專
攻一處各路之賊必包抄而入不但蘇城難克
即已復之城亦難盡守是以克復崑太後臣紆
籌全局必須分路前進或掎或角取遠勢以制
大敵我可以抄賊之後賊不能抄我之後漸逼
漸緊漸擊漸敗使賊大勢不振筋脈不舒則蘇
州一城早遲可克克亦易守此臣區區愚慮深
恐債事不求速效之微意也現在相度情形程
學啟一軍由蘇嘉交界攻入已將蘇浙之賊截
成兩樞兵數雖單得黃翼升李朝斌兩枝水師

足可依護自立蘇賊因此亦形慌亂循序漸進
但使他處無大挫失稍緩時日當可得手常勝
軍弁勇戰守實未可靠所恃者英人借給戈登
開花大小礮位甚多軍火雜械時肯濟助臣故
與英官曲意聯絡冀為我用以助中國兵力所
不逮惟戈登助攻名義甚順功成之後或不致
另開衅端臣亦可嚴辭拒絕至英國酋長之意
欲為中國克復一二省城難保非為通商要挾
張本李泰國兵船於九浞洲下關攻克後無所
施展英人又見賊勢日窮不待求助而欲助攻

蘇州若拒其所請既非和好相待之誼若任其所之必有太阿倒持之憂該提督伯郎氣驕性悞臣遇事婉商往往以正言折之彼見臣意不甚求助乃稱赴京酌商果至總理衙門飾詞嚇詐王大臣自能洞燭其情相機核辦惟其中情節碍難懸揣臣途次倥傯不及密函知會用敢據實縷晰陳明伏乞

敕下總理衙門如果伯郎赴京似應仍照臣與戈登面議之語止許戈登協攻勿庸伯郎督勦酌量商飭該兵官遵照如英提督必調兵助攻仍先

與要約克復後立即退出由臣妥籌布置不得
別有要求是否有當併候

聖裁謹附片具

奏

防勦大畧情形摺 同治二年八月初八日

奏為行抵江陰籌布防勦大畧情形恭摺奏祈

聖鑒事竊臣於八月初四日由福山行抵江陰察看

城外四門賊遺石壘甚多東北城堞均為大礮

轟塌城內房屋多被炸礮擊壞自二十九日擊

退大股賊後城中日逃出投誠之賊數百人

遂得內應外攻克此堅城訊據生擒賊供偽廣

王李愷順於初一夜渡河淹斃各營將士血戰

日久除陣亡外受重傷者已逾千人呻吟相向

本應畧加休養再行進兵惟當賊鋒大挫之際

機會難失臣與黃翼升劉銘傳李鶴章等悉心
籌議如兵力足用則須分三路一進常州一進
無錫一進蘇州之間門使各城之賊首尾難顧
無如臣部陸師不過四萬東自金山衛海塘起
西至江陰止橫互四五百里面面賊巢處處喫
重其蘇州四圍皆水賴有淮揚太湖兩枝水師
分段扼紮以補陸軍所不逮若更遠畧常州斷
難自相照攝為今之計以規取蘇州為要而蘇
州旱路止有三條一由胥門葑門以達吳江平
望程學啟派水陸五營扼之一由婁門以達崑

山程學啟帶陸師十營水師三營扼之一由閭
門許關以達無錫須將無錫攻克始能由此路
進是故吳江為南路咽喉無錫為北路咽喉欲
披其腹心須先搯其咽喉庶可漸逼漸緊現踞
守常州之偽護王陳坤書有衆十餘萬素稱強
盛雖經我軍擊敗難保不圖再逞踞守無錫之
偽潮王黃擺子有衆五六萬堅守不出當飭各
軍乘勢蹙之擬令劉銘傳帶所部九營進紮江
常錫三交界之青暘鎮兼防護逆繞襲我後周
盛波帶五六營進紮無錫之美蓉山郭松林帶

六營進紮無錫之緱山道員張樹聲總兵滕嗣武帶十營進紮張涇橋為郭松林周盛波後路援應又令總兵黃中元帶三營進紮蕩口前之大橋角以堵蘇賊竄常熟之路凡此數路均須黃翼升分派師船相為依護以固糧路而助攻勦李鶴章自督小隊往來調度總期進可制賊止可自立探聞護逆一股尚分踞常錫之交曾國荃來函又稱偽忠王因蘇常危急將由金陵回援我軍前進必有大戰事臣惟諄飭諸將力求穩慎相機夾擊至江陰縣城關係南北岸大

局必須擇一能將嚴密置守查有總兵銜儘先
副將駱國忠去冬投誠獻城各路悍賊數十萬
圍攻常熟三月有餘該將督衆堅守終賴保全
經臣迭加訓勵忠勇激發近來營規益整此次
協攻江陰所部尤為出力即派該將督帶四營
移守並令副將張桂芳鄭龍彪各帶水陸一營
助之查江陰重地舊設京口協副將一缺以資
控制其補授是缺之成發翔已奉
旨簡放總兵奏署是缺之淮揚水師右營營官陳東
友現駐守吳江之同里並經臣保奏奉

旨以總兵記名簡用未能到任如蒙

聖恩即以副將駱國忠署理京口協員缺俾專責成
該將必更感激効命是否有當出自

聖裁臣先調上海捕盜局恒川鐵皮輪船兩隻助攻
江陰部署既定仍留鐵皮船協守江陰口即乘
恒川輪船駛回上海臣離滬一月聞近來各局
釐捐因官軍得手蘇嘉常內地震動商貨難通
捐數驟減臣軍本年欠發口糧已三箇月各營
苦戰嗷索亦殊可憫又通商洋務並須回滬清
理臣於拜摺後即行啟程所有籌布防勦大畧

情形理合恭摺由驛馳奏伏乞

皇上聖鑒訓示謹

奏

--	--	--	--	--	--	--	--	--	--	--	--	--

730

1278

黃翼升不能赴援臨淮片

同治二年十月初四日

再前奉七月二十日

寄諭上海戰船足數分布黃翼升所部淮揚水師著將一半留助防勦一半速赴臨淮惟淮滬兩處相距較遠黃翼升往來布置能否兼顧仍著曾國藩李鴻章酌量辦理等因欽此臣查曾國藩奏調黃翼升赴淮之時程學啟一軍尚紮唯亭離蘇城四五十里江陰尚未克復此間軍情較緩而臨淮兵單事急正難支持是以督臣權宜酌調嗣後迭奉

諭旨圖攻蘇州程學啟兵不滿萬由婁門進逼南至
葑門盤門北至齊門陸師分紮二十餘里緊接
城根與賊隔河對壘城賊時出竄撲自忠逆回
蘇又糾約嘉湖賊衆擾我吳江同里後路現忠
侍各大股又竄併無錫與李鶴章劉銘傳等相
持苦戰各路悍賊萃全力以爭此中權各軍水
陸亦當萃全力以支此危局淮揚水師本有十
二營自八月二十九日在大橋角失利被忠逆
輪船炸燬奪燬舢板十九隻經臣將該營官張
學仕叅革並裁撤一營現僅十一營分駐嘉善

之西塘蘆墟二營蘇城東面之金鷄湖獨池湖
二營北面之陽澄湖一營蠡口治長涇二營大
橋角一營無錫之大高山河內一營均與陸軍
相為依護協助防勦黃翼升自帶二營來往蘇
錫之交四處策應李朝斌所統太湖水師船隻
較少專顧吳江之九里湖葉澤湖夾浦口及蘇
城南面之黃天蕩寶帶橋五龍橋各防仍隨時
入太湖雕勦賊勢過重地面太寬處處喫緊實
無可抽調接替迭經臣縷晰緘商督臣求為緩
調督臣顧念大局亦知臣軍愈形喫重不忍逼

催惟連接咨函轉准楊岳斌彭玉麟咨稱前派
助援臨淮之丁泗濱王吉等戰船自秋涉冬煤
米告罄衣服不足各勇飢病已滿兩月定期亟
須飭調出江協勦東壩催令黃翼升即率所部
數營於十月中旬趕到臨淮接防等語現在江
浙三城以蘇州為關鍵各路賊勢以蘇錫為最
多况蘇城六門已圍其四無錫官軍迭獲勝仗
攻勦正緊若合水陸之力勦除忠侍各股則蘇
州無錫兩城可漸得手即金陵杭州兩處亦大
鬆勁若於四面水鄉中抽出一枝水師則罅漏

甚多門戶自開不獨蘇錫難攻且長忠侍各賊
內竄之志關係全局實非淺鮮臨淮援軍四集
似可自保所有黃翼升淮揚水師應請暫留協
攻俟蘇州無錫克復再飭分帶數營前往臨淮
卽毋庸兼顧蘇滬除再緘懇督臣轉商楊岳斌
彭玉麟查照核辦外謹附片縷陳伏乞

聖鑒訓示謹

奏

--	--	--	--	--	--	--	--	--	--	--

1111

克復蘇州摺 同治二年十一月初四日

奏為督飭各軍攻勦蘇垣賊勢窮蹙倒戈內應官軍入城截殺分別解散克復蘇州省城恭摺馳

奏仰慰

聖廛事竊連日攻克婁齊葑盤四門外長城賊壘城賊膽寒謀乞內應各緣由經臣於二十二日馳報在案先是偽忠王部下偽王郅雲官伍貴文汪安均周文佳等因回援蘇錫屢戰屢挫蘇省四路圍困金陵官軍攻奪孝陵衛糧路斷絕該逆大勢已去轉求管帶魁字營副將鄭國魁遞

稟乞降臣以城大且堅猝難攻破暫行給諭招
撫令程學啟鄭國魁反覆開導曉以利害多設
方畧脅以兵威該偽王汪安均郤雲官先後密
約程學啟單騎相見於城北洋澄湖情詞懇順
求勿開礮轟打臣與程學啟籌商蘇城本係忠
逆巢穴該逆往來援救行蹤無定其城守事宜
專交粵西老賊偽慕王譚紹洸主持譚逆堅忍
兇狡百倍尋常從前杭州湖州各城均係該逆
攻陷必須除此巨患勒令該降衆等或生擒忠
逆或斬慕逆首級來獻始准收撫程學啟戈登

自二十日起逐日逼抵城根挖壘濬濠修築礮臺安設大礮布置攻具為即日轟打之勢城內賊衆惟慕逆一股守志甚堅餘皆解體忠逆見人心散亂即於二十日夜帶所部萬餘由胥門出光福靈岩一帶小路搭橋而去二十三四等日程學啟督隊攻婁齊二門李朝斌督水陸各軍攻葑盤二門黃翼升督水師牽制閭門竄路晝夜不撤愈攻愈緊二十四日午刻慕逆傳令各偽王上城堵禦正在對衆指揮郤雲官商令偽天將汪有為出其不意立拔腰刀刺殺之大

衆呼噪齊入將慕逆死黨殺斃千餘郤雲官稟
求調兵入城協勦是夜開齊門迎降程學啟即
飭鄭國魁鄭國榜帶兩營隊伍入城彈壓二十
五日清晨郤雲官等賫慕逆譚紹洸首級來獻
臣令營中降卒驗視無訛城內脅衆概行薙髮
程學啟親督各隊入婁門安撫降衆並督軍搜
勦慕逆餘黨兩廣人數百名李朝斌張遇春何
安泰等帶隊由盤門截殺黃翼升等由閭門截
殺又斃五六百名解散數千人惟投誠賊黨有
四偽王四天將之衆欲求添立二十營隨同勦

賊該酋等久在賊中為大頭目狼子野心恐其難制臣與程學啟暨諸將密商宜乘其窮蹙設法驅除免致尾大不掉另生枝節因令程學啟遣親信隊伍駐守婁齊對盤各門二十六日未刻程學啟督同劉士奇陳有昇楊鼎勳張遇春王永勝周良才葉廷杓朱寶元等帶隊分門並進程學啟下令曰該降衆若意圖佔踞結黨橫行者殺無赦願解散者給路票回籍間有埋伏衢巷館舍開鎗抗拒經我軍排齊鎗礮來往衝擊斃悍賊二千餘名餘衆肉袒稽首乞就遣散

亦有捆載輜重妻財驚遁出城於是城內稍就
清理立將省城克復臣即日入城巡視並令程
學啟督帶八營入城駐守一面會督地方官紳
將存城降衆難民妥籌遣散安置之方以善其
後此二十四五六等日外攻內應勦撫兼施克
復蘇州省城之實在情形也臣查蘇省被踞四
載與金陵杭州為逆匪三大巢窟互相犄角此
其腹心一氣粘連根柢極為深固臣由上海偏
隅節節進攻本不得勢但以人力苦爭賊衆兵
單時深惴慄仰賴

皇上指授機宜多方激勵而督臣曾國藩遣將助兵
隨事商榷中外水陸將士和協一心遂得屢挫
兇鋒圍逼城根黨衆乞降渠魁授首先下名城
實非微臣愚慮所及皆緣

聖主中興

威德遠被氣機大轉賊勢日衰金陵杭州當可以次
得手慶幸之餘惟加戒慎遇缺提奏提督勅勇
巴圖魯南贛鎮總兵程學啟忠勇謀畧有古名
將之風自隨臣來滬所向無前戰功最多經營
蘇城甫及半年兵不滿萬每動一著即制賊命

兵如神操勞過度近得頭暈咳血之症仍勉
支持應如何優加獎勵之處出自

聖裁英國兵官會帶常勝軍權授江蘇總兵戈登奮

勇勤苦洞悉機謀火攻利器尤多贊助擬請

旨酌加賞賚俾事竣回國藉示榮寵統領太湖水師

記名提督處州鎮總兵李朝斌統領淮揚水師

遇缺提奏提督淮揚鎮總兵黃翼升勞苦戰爭

謀勇兼裕蘇州面面皆水惟水師之功居多該

二員均已

賞穿黃馬褂應請

旨酌予優獎臣未便擅擬至尤為出力將領擬保官階另繕清單籲懇

恩施其餘出力之文武將弁兵勇及投誠賊目擇其可用者俟查核明確續請

獎敘攻勦蘇州迭次陣亡將弁並繕清單懇

恩敕部各照原銜從優議卹所有克復蘇州省城各情形理合會同協辦大學士兩江督臣曾國藩繕摺由驛六百里加緊馳陳伏乞

皇太后

皇上聖鑒訓示施行謹

奏

卷一

一

駢誅八降酋片

再蘇州逆首偽納王郜雲官偽比王伍貴文偽
康王汪安均偽甯王周文佳偽天將范啟發張
大洲汪懷武汪有為等因官軍圍攻緊急乞降
內應該酋等願望太奢恐有後患分別驅除解
散各緣由業經臣於二十六日

奏報大畧在案先是官軍入城查探降衆實有二
十餘萬其精壯者不下十萬郜雲官等歃血立
盟誓同生死獻城後遂佔住閭胥盤齊四門於
街巷各口堆石置卡隱然樹敵又添招蘇城附

近賊黨陸續進城堅求准立二才營並乞

奏保總兵副將官職指明何省何任其挾衆要求之狀種種堪虞臣思受降如受敵必審其強弱輕重能否駕馭在我若養虎貽患苗沛霖宋景詩皆其前鑒即幸而如李世忠至今滁州等城仍未退出蘇省財賦名區豈容該酋等擁衆盤踞致貽無窮之憂况郜雲官等積歲巨酋在賊中封至偽王偽天將其罪惡已不可赦今圍困始降毫無悔罪之意仍多非分之求將來斷不能遂其所欲即斷不能無反側之心因傳令該

酋等八人來營謁見詎部雲官並未雉髮維時
忠逆李秀成尚在望亭距蘇甚近部雲官等皆
係忠逆黨羽誠恐復生他變不如立斷當幾登
時將該偽王天將等駢誅派程學啟督隊入城
捕搜逆黨於是降衆二十萬成繳軍器乞就遣
散臣復派妥弁挑留精銳二千人分置各營其
餘陸續資遣安置臣即於二十九日入城駐守
督率官紳分投撫卹人心大定不謂戈登因臣
先調常勝軍回駐崑山未與入城之功忽生異
議先曾謂納逆不應殺慕逆茲又謂不應殺納

逆聲稱即帶常勝軍與官兵開仗經道員潘曾
瑋總兵李恒嵩勸止乃又招去納逆義子郜勝
鏞暨久從蘇賊之廣東人千餘名意殊叵測又
愆愆英國提督伯郎繙譯官梅輝立來蘇辨詰
臣告以自督軍來滬先收南匯降酋吳建瀛准
帶千人次收常熟降酋駱國忠准帶二千人均
肯退出城池謹受約束故以戰功保至副將信
用不疑臣並非好殺降者茲部雲官等所求太
奢欲踞省城關係太大未便姑容養癰成患且
誅八酋而後能解散二十萬衆辦法似無不是

戈登先期調回崑山事在倉猝未及商量蓋一
商詢則彼必極力沮格此事遂無了局矣該提
督則以英國不喜殺人是使戈登無詞以對外
國強派臣辦理錯誤臣姑勿深辯惟其悻悻見
於詞色據稱申請公使與總理衙門議定再將
常勝軍作何區處其意殆挾該軍與我為難耳
臣維戈登助勦蘇城近來頗為出力是以督同
程學啟曲意寵絡俾為我用迭經據實奏報仰

懇

恩獎不料成功之後既索重賞仍生衅端值此時事

多艱中外和好臣斷不敢稍涉鹵莽致壞大局
惟洋人性情反覆罔知事體如臣禱昧恐難駕
馭合宜設英公使與總理衙門過於爭執惟有
請

旨將臣嚴議治罪以折服其心臣不勝感激悚惶之
至理合附片縷晰密陳伏乞

皇太后

皇上聖鑒謹

奏

籌辦大略片

再偽忠王李秀成自十年春間攻破金陵長圍
迭陷蘇常杭嘉湖各處上竄江西湖北先後擄
脅潰兵游匪衆以百萬計分置各城又盡得東
南財賦之區取精用宏日以強大幾至不可收
拾自去歲屢戰屢敗及投降各城精銳散亡不
下二十餘萬今年春夏間竄皖北失利經上游
官軍截殺解散又十數萬衆其自九洑洲過江
僅存四五萬人維時偽天王驚惶失措猶賴李
秀成回金陵主持守局而忠逆以蘇州為分地

事急故須回援其部衆悍酋布滿蘇浙總以踞
守蘇省之偽慕王譚紹洸偽納王郜雲官踞守
杭州之偽聽王陳炳文偽歸王鄧光明踞守無
錫之偽潮王黃子澂為最該酋等各擁衆數萬
與臣軍搏戰較久謀勇兇狡實倍他賊臣本無
辦賊之才亦無必勝之兵幸值

兩宮

皇太后孜孜求治昕夕憂勤

皇上福祚中興威德遠布是以天奪其魄藉各路官
軍為之驅除計蘇州之捷勦除偽慕納比康甯

五王及四天將解散近二十萬人無錫之捷勦除偽潮王父子擒斬解散約五萬人金陵浙江各軍擒殺解散之數更不勝計忠逆黨羽已孤巢穴已失據擒賊僉供該逆踉蹌西走隨行僅兩萬餘人將赴金陵設法解圍曾國荃鮑超等兵勢正盛攻勦正緊料其無法解救則挾偽天王洪秀全及其母妻眷屬由浙皖交界上竄江西福建以尋回粵之路臣駐蘇省徧察賊中城守規畫布置極有條理深以未得擒殺此酋為恨若逸出江閩恐仍蔓延為患現在曾國藩派

兵回防江西左宗棠派兵分截皖南固已豫有
戒備但使該逆不再竄踞城池變為流賊勦滅
較易至常州偽護王陳坤書一股約衆數萬能
守而不耐戰與忠逆夙有嫌衅近稍解釋溧陽
偽侍王李世賢戰守俱悍人數尚多與忠逆同
宗素好似皆聽忠逆為進退杭州之聽逆陳炳
文係安徽人歸逆鄧光明係湖南人聞忠逆有
回粵之志多不願從嘉湖蓄糧甚富尚須死守
幸各路兵力皆強布置甚穩如金陵杭州再有
一處得手賊勢自必瓦解臣即日馳赴無錫籌

度分布進取之方擬令程學啟會同李朝斌劉秉璋潘鼎新水陸各軍由平望太湖乍浦兜勦浙西之賊冀與左宗棠蔣益澧之軍前後夾擊李鶴章劉銘傳各軍相機進常州宜興兜勦蘇境之賊冀與曾國荃鮑超之軍前後夾擊欲分各路賊勢藉固蘇滬藩籬總須慎之又慎斷不敢恃勝而驕自取顛覆惟各軍自春徂冬幾於無日不接仗無日不移營傷亡病瘵累累相屬即能戰之將多有積勞致病天氣苦寒須略休養臣未忍過於督催惟有體察軍情仍無坐失

機會所有近日賊情及籌辦大略附片具陳伏
乞

聖鑒訓示謹

奏

進圖浙西片

再臣欲保蘇滬門戶不得不進圖浙西以勦為堵各城踞逆抗拒者設法攻打投誠者乘勢招撫係辦賊一定機宜潘鼎新受平湖乍浦海鹽之降臣意初欲盡遣之劉秉璋潘鼎新等皆以前路賊勢尚多地形散漫我軍分布防勦實苦單薄且與浙軍中隔杭嘉海甯各城難遽聯絡誠慮逆衆鋌走或有潰裂之時不得已暫就降人可用者撫而留之准該降酋備貲自効仍隨時籌捐接濟此目前權宜辦法臣飭潘鼎新等

嚴明約束力禁騷擾平湖乍浦等處我軍守之
海鹽則我軍督降衆守之似尚操縱由我惟左
宗棠行營相距較遠由杭達滬必須繞甯波渡
海新復地方不可一日無官若拘泥文法俟浙
省委員來署恐多遲誤且客軍及降人雜處或
且裹足不前可否變通辦理仿照前湖北撫臣
胡林翼進勦安慶太湖潛山由鄂委員代理地
方成案暫由臣慎選妥員於收復浙省府縣時
就近暫委代理以便調協軍民彈壓撫綏仍咨
明浙省備案俟浙委到後再飭交卸或俟杭城

克復左宗棠兵力能及再統由浙省核辦之處
其暫留降衆仍責令經手人員逐漸遣散是否
有當伏乞

聖鑒訓示謹

奏

--	--	--	--	--	--	--	--	--	--	--	--	--	--	--	--	--	--	--	--	--	--

214

214

李肅毅伯奏議

及門章洪鈞編輯

卷二

前撫徐有壬請專祠片

程學啟請卹摺

裁遣常勝軍摺

請俟湖州克復再協攻金陵片

籌畫湖州金陵緩急片

擬抽隊會剿金陵摺

金陵克復改派各軍截剿敗匪摺

進規廣德片

京營弁兵到蘇學製外洋火器摺

陳明蘇省兵餉片

援案請發餉票找抵欠餉片

請裁富明阿一軍分協甘皖軍餉片

豁免攤款摺

劉銘傳等軍暫難赴豫遠征摺

派兵由海道援閩摺

籌畫軍餉片

用款與洋人交涉權宜酌定片

軍需用款酌量變通片

李元度請免發遣摺

各軍分援淮徐摺

酌度軍情無庸出省督勦摺

密陳勦捻事宜片

署理總督籌辦大概情形摺

派兵航海赴津摺

海關應撥北新贛州太平三關絲稅請免補解片

籌調洋鎗礮隊赴津兼籌製造片

覆奏殷兆鏞等條陳江蘇釐捐摺

置辦外國鐵廠機器摺

覆陳督軍河洛摺

江北新漕民折官辦摺

請飭議新漕全數解折片

上海裁撤會防局摺

謝署欽差大臣遞陳大畧摺

謝授欽差大臣遞陳下情摺

前撫徐有壬請專祠片同治三年二月二十二日
再據運同銜候選同知徐震燿稟稱職父前任
江蘇巡撫徐有壬於咸豐十年四月當賊逼蘇
城力籌守禦嗣因逆衆麇至省垣失陷正在督
隊迎勦賊已直撲內署力不能禦被刀刺帽將
墜尚手自整冠抗聲大罵立時遇害族叔工部
主事徐曾庾幕友候選理問鮑鄂銜家人楊安
同時被戕次第候選郎中徐震翼投池水死庶
母施氏妹淀姑均自縊僕婦劉氏裴氏亦俱焚
死當經前兩江總督何桂清前浙江巡撫王有

卷二
齡以合署殉難情形具奏咸豐十年五月初八

日奉

上諭江蘇巡撫徐有壬著加恩照巡撫例賜卹其妾施氏及子女僕婦等並同時被戕之候選理問鮑鄂銜工部主事徐曾庚均著交部分別旌卹等因欽此經

部議

奏請照二品官陣亡例議卹並奉

硃批著予諡欽此各在案今幸於本年十月二十五日

蘇州克復職遂即匍匐赴蘇尋求遺骨於十一

月二十四日尋至撫署前陶然亭側埋有棺木

六具內有黑漆一具開認頭顱骨角的係職父
並於胸際檢得當年辦公圖記一方胸膛間有
槍火傷痕右天平骨血痕隱現反覆辨認無誤
謹備衣冠擇日重殮等情臣當飭令蘇州府縣
前往照料 即率同文武僚屬祭奠如禮仍暫
厝蘇城俟該原籍湖州克復旋里安葬並據徐
震耀開具履歷事蹟清冊請

奏前來查徐有壬道光九年進士由戶部郎中

簡授四川成綿龍茂道歷升廣東運司四川臬司雲南
藩司咸豐三年調任湖南藩司五年丁母憂回

籍督辦湖州國防八年服闋奉

旨督辦江南糧臺事務旋升授江蘇巡撫時督臣為何
桂清藩司為王有齡有壬處其間不苟為同異
外若粥粥無能內嚴厲自守意將有所設施一
旦江南軍潰丹陽繼陷常州棄逃人力無可挽
回獨有一死自靖於封疆守土之義合署從殉
忠孝節烈正氣猶存異乎臨難苟免者矣有壬
敦尚實學尤精天算貫通中西術居京師日臺
官往往就決所疑闡明四元絕學發有明以來
數百年不傳之祕著有務民義齋算學行於世

服官數省所至皆有政蹟其在湖南藩司任內
及回籍團防籌餉募軍屢卻大敵晚受

文宗顯皇帝特達之知遂以死報

國孤忠亮節歷久益繫人思除將履歷事蹟清冊
咨送軍機處備查外應懇

天恩准於蘇州建立專祠其同時殉難之家屬幕友
人等一並祔祀以彰忠蓋並宣付史館立傳出
自

皇太后

皇上逾格鴻慈再有壬僅二子次子震翼從死撫署

長子正三品廕生候選同知徐震耀當時留籍
辦理團防未及於難今得為有壬收骨孤露餘
生亦堪憫惻謹並附片陳明伏乞

聖鑒訓示謹

奏

程學啟請卹摺 同治三年三月二十一日

奏為統兵大員因傷出缺恭摺奏

聞仰祈

聖鑒事竊照遇缺提奏提督南贛鎮總兵世襲雲騎尉勃勇巴圖魯程學啟猛攻嘉興府城鎗子貫入頭腦既絕復甦擡回醫治漸有轉機經臣迭次奏明在案程學啟自知傷重不肯服藥臣再三慰勸並延請內外科醫士進藥數劑言語神氣稍為清楚臣初二日出省赴楊舍督勦復往看視程學啟言賊雖潰敗勢尚悍衆請飭諸將

卷二
慎重兜擊又言人才難得恨將死不能為

國家驅除殘寇輒哽咽流涕向臣太息臣猶勉以
安心調治不必焦急並屬地方官時往照料迨
臣由江陰境內追賊至青陽忽接省信以程學
啟日漸危篤頭左偏傷處成洞時有髓流火毒
貫喉六日滴水不入惟神志尚清初九日屬家
丁為穿

御賞黃馬褂望

闕叩頭旋繞室行走數步見案上有茶舉杯至口
不能下咽淒然淚下並令其營務處知州韓杰

馳赴臣處屬專心勦賊不及等候回省語不及私臨絕時大呼心事未了

聖恩未報腦漿迸流當於初十日子時出缺臬司郭柏蔭督同府縣親視含殮料理後事並據稟報前來臣適行抵常州接信之餘不勝悲悼各營將士慟哭失聲江浙遠近官紳士民無不同聲呼搶伏查程學啟籍隸安徽桐城遭亂被擄英逆四眼狗欲重用之程學啟以該逆荼毒百姓嘗自逃去為賊追回拘繫不得脫咸豐十一年四月間今浙江撫臣曾國荃督軍進逼安慶程

學啟密赴曾貞幹營中納款曾國荃兄弟見其志趣忠勇迥異尋常降將遂留營帶隊攻勦旋克復安慶省城程學啟之功居多經督臣曾國藩等奏報在案其時臣在安慶熟聞程學啟智勇可任適奉

命赴滬倉卒召募幾不能軍請帶程學啟所部兩營東來曾國藩曾國荃念臣孤行危地無以自立慨然允准同治元年三月臣與程學啟等至滬五月虹橋之捷八月北新涇之捷十月四江口之捷皆殺賊近萬大挫兇鋒實賴程學啟多謀

善戰以少擊衆威名自此大振臣因為程學啟陸續增募至萬餘人部勒嚴整所向克捷先後克復青浦嘉定太倉鎮洋崑山新陽吳江震澤各州縣二年七月進徇蘇州蘇州為羣賊淵藪城大糧多非四萬人不能合圍程學啟以水陸一萬人由婁門外跨塘逐漸進勦苦心經營將城東之寶帶橋五龍橋城北之蠡口黃埭城西之澣關虎邱各處石卡賊壘次第埽平分兵布紮又兩次分隊遠勦嘉興援賊於八坼平望一帶又助勦忠逆大股援賊於大橋角望亭一帶

又分勦湖州援賊於太湖東山一帶距老營皆
六七十里出奇入險賊中怖為神兵臣於奏報
蘇州克復摺內謂程學啟用兵如神每動一著
即制賊命蓋紀實也十月間收復蘇城降酋郜
雲官等九人謀 半城擁衆近二十萬意圖脅
制戈登煦煦婦人之仁脅令收撫稍一濡忍變
生肘腋程學啟謂曾在賊中熟知情偽此輩罪
尊重大殺數頭目即可解散餘衆保全實多臣
故毅然誅其酋散其黨蘇城大局頃刻即定戈
登雖偶反覆久之公論自明羣疑遂釋其能謀

能斷亦近時武將所罕見自西洋各國稱強海上兵法固甚雄整尤恃洋鎗炸礮為攻戰利器程學啟隨臣入滬留心講求每與臣言外夷輕視中國必須練兵自強取彼之長去吾之短該部操習洋鎗數千枝整齊變化已與洋兵相埒前攻蘇城每受戈登之侮乃發憤學習炸礮陰結洋弁之精於礮事者與之晝夜研究礮具及木心藥性準頭用法往往自出新意去冬克平望堅城今春轟嘉興名郡臣豫購覓三十二磅六十八磅大洋礮三尊交給演放竟能指揮如

意功效迭著不獨賊畏之如虎即上海各國酋
長洋商莫不震懼其為人戈登初相猜忌聞其
死也流涕歎惜目為中國好將向臣索該提督
打仗時隨身長旗二件將來攜回本國以為記
念程學啟深心遠略謀勇精勤為中外所共知
設使天假之年功業詎止於此正月間曾國藩
商調該軍赴金陵協攻程學啟以進兵嘉興勢
難撤回惟以身受曾國荃濶拔之恩耿耿圖報
與臣約俟嘉興常州克復當帶礮隊赴金陵隨
攻殲此老巢以酬知遇若程學啟不即喪亡有

益於疆場者甚大今年甫三十五歲遽因攻克
嘉興隕身鋒鏑每念時事多艱將才不易臣誠
私心痛之程學啟無子以嫡姪建勛為後年尚
幼小惟其攻克安慶後兩年之間又連復江浙
名城十數處並克復蘇州省城似為東南第一
戰功茲為

國捐軀可否仰乞

天恩准照提督陣亡例從優賜卹

特旨予諡宣付國史館立傳並於安慶蘇州嘉興各
府建立專祠以彰忠蓋出自逾格

鴻施再正繕摺聞欽奉三月初九日

恩旨以嘉興克復

賞給程學啟白玉翎管一枝白玉搬指一箇玉柄小
刀一把荷包一對臣即敬謹派弁費送蘇州交
程學啟家屬祇領祭告以慰忠魂合併聲明所
有遇缺提奏提督南贛鎮總兵因傷出缺緣由
謹會同協辦大學士兩江督臣曾國藩具奏伏

祈

皇太后

皇上聖鑒訓示謹

奏

裁遣常勝軍摺 同治三年五月初二日

奏為裁遣常勝軍連日辦理就緒各情形遵

旨覆陳仰祈

聖鑒事竊常州克復後定議裁撤常勝軍臣於四月

初七日附片陳明當即督飭丁日昌等妥速辦

理旋奉四月十四日

寄諭戈登帶隊協勦現在常州攻克該洋人不言進
攻金陵竟肯先行遣散免將來許多枝節實屬不
可失之機會該撫自應乘勢利導妥為遣散如戈
登將所部布置妥協洋弁均皆回國則是戈登真

心要好始終如一僅止頒給旗幟功牌不獨無以
酬其勞且恐無以饜其欲即著李鴻章飭令丁日
昌李恒嵩等與戈登妥為辦理一俟辦有就緒即
將如何再行嘉獎戈登之處迅速奏聞等因欽此
仰見

聖慮周詳柔遠防患之至意茲據丁日昌回省面稟
并據戈登李恒嵩具稟於二十五日辦理遣散
完竣等情前來謹為我

皇上縷細陳之緣常勝軍起於美國人華爾其初不
滿千人陸續增至四千餘人糧餉軍火惟意所

欲無從核減同治元年秋冬間調令助勦金陵不能成行遂致白齊文之變臣在上海與英提督領事等反覆論議舌敝脣焦始得更定章程兵額裁至三千月餉發至七萬餘元合之購辦軍火賞卹雜支各款每月須十萬元有零戈登接帶後臣加意撫馭遇事尚受商量而性急多疑每有反覆自今春金壇楊舍兩次挫衄戈登頗覺氣餒三月二十二日常州之役城已轟破未能爬入戈登目擊常勝軍之不能得力四月初六日再舉攻城戈登即請以我軍為前敵常

勝軍為後隊蓋自知不如我軍之用命也常城克復即將洋鎗隊調回崑山派令丁日昌前往會商撤遣戈登意甚欣悅乃臣於十五日接據巴夏禮申陳以議裁常勝軍一事必須知會駐滬英官轉稟駐京公使查核辦理並據赫德來函謂蘇省雖已肅清金陵湖州兩處賊竄可虞引咸豐十年以前之事為戒極言常勝軍不可遽裁譬喻百端戈登似為所動丁日昌等往復開導忽迎忽拒尚欲迎合巴赫二人之議留礮隊六百名鎗隊一千餘名丁日昌復探其情謂

之曰爾在中國助勦功成回國中外傳名不及
此時裁撤將來接帶者儻如白齊文之類鬧出
事端豈不為爾聲名之累巴夏禮赫德係局外
人方以常勝軍為十分可靠故不肯遽裁爾何
不將此軍近日不能得力實情自與剖論免得
自己聲名為他人所累戈登深以為然即於十
七夜馳赴上海其時赫德已北上遂與巴夏禮
再三辯論巴夏禮始得釋然惟以上海要地請
由臣酌派得力兵勇駐守屬戈登轉達等情戈
登回崑山述其語丁日昌恐洋人或又中變即

於談次請戈登將應答之語親書洋字一紙留存以免巴赫二人藉口並繕譯節略由戈登等函稟到臣閱其與巴首問答之詞首言洋鎗隊兵頭多非正兵不諳兵法朝夕飲酒兵丁自去自來遇事便與官軍作對只知增添口糧不想作事因此數層不妥故戈登立意相勸遣散次言巴夏禮是為中國地方起見並非多事屬臣不必與之鬪氣等語臣先已備文劄復巴夏禮為具言兩年戰事常勝軍會合官軍與官軍獨自分路攻勦之顛末與常勝軍近日底細所以

議裁之故並告以現在辦法係酌留得力礮隊
六百人鎗隊三百人海生輪船數十人已及原
額三分之一並非全裁且前敵各要隘皆有重
兵駐守上海後路無虞竄入以力破巴酋等藉
詞要挾之端一面即飭戈登李恒嵩丁日昌迅
速照辦飛催代理關道應寶時籌借銀兩交知
府賈益謙賞往崑山節次據稟連日發餉收取
號衣洋鎗挨次撤遣於二十五日遣散淨盡戈
登以該軍兵勇向挾外國人以自重外國人一
有挑唆兵勇即靡然從之肆行無忌先將外國

兵頭撤遣厚給川資限三日內出城違者嚴辦
次即遣散中國兵勇按路途之遠近年分之淺
深打仗之受傷與否酌給盤費驅令出城不准
逗留生事均已貼然就道查外國弁目一百零
四名受傷頗多除月餉外按名酌給賞卹途費
自七十五元以次遞增至四千元不等勇丁除
月餉外其分領賞卹者共二千二百八十八名
自兩元以次遞增至一百元不等又海生輪船
礮船鎗船暨通事書識等分別給賞共用遣散
經費洋十二萬二千八百元有零又補給月餉

六萬元有零所有軍械洋鎗帳篷號衣船隻小
大礮位全數呈繳驗收現留礮隊六百名經臣
委派副將羅榮光管帶調紮蘇城外之澣關留
外國兵頭十一名幫同教習聽管帶官號令約
束已與戈登議明隨後如撤遣回國只加給一
月口糧其鎗隊三百名暫留崑山交李恒嵩督
率巡防並留外國兵頭一名隨同彈壓以免各
國流氓冒充滋事各兵丁改穿中國號衣約計
每月口糧共需銀一萬數千兩仍由關道籌發
此後逐漸訓練操縱由我自不致另生枝節臣

查常勝軍利器在礮火而洋弁貪恣兵勇驕悍
錮習殊深久為蘇省隱患兩年以來每思乘機
善遣徒以軍事方棘外人把持未易就理現值
蘇常肅清戈登辭退竟肯主持議撤雖巴夏禮
赫德從中阻撓戈登猶為我出力多方排解十
餘日間分別遣留糜費固多而辦理甚速可免
後來無窮之憂實屬真心要好始終如一彼既
不肯領收銀兩自應請

旨再行優獎聞戈登似欲邀

賞黃馬褂以為歸國寵榮足見向慕中國之殷查戈

登自上年春間會帶常勝軍協同官兵攻克福
山解常熟之圍又克復太倉州崑山吳江各縣
及蘇州省城本年克復宜興溧陽縣及擊退楊
舍竄賊攻克常州府城均屬異常出力厥功甚
偉可否

特旨頒賞黃馬褂出自

逾格鴻施再據上海來信巴夏禮以常勝軍既經裁
遣欲另議教練良法仿照外國章程保守永久
其意仍不過攬我兵權耗我財力臣擬添調數
營駐守上海附近地方屬戈登先為轉商應由

臣處調度不便再准英官干預戈登似以為然
但不知巴夏禮與英提督伯郎有無異議除俟
該酋等如何辨難再行相機妥辦外所有裁遣
常勝軍部署就緒各緣由理合縷晰具奏並照
抄英領事巴夏禮申陳及劄復該領事各一件
又繙戈登與巴夏禮問答節略一件恭呈

御覽伏乞

皇太后

皇上聖鑒訓示施行謹

奏

請俟湖州克復再協攻金陵片

同治三年五月十七日

再臣欽奉五月初八日

寄諭李鴻章所部兵勇攻城奪隘所向有功礮隊尤為得力現在金陵功在垂成髮捻蓄意東趨違恐掣動全局李鴻章豈能坐視著即迅調勁旅數千及得力礮隊前赴金陵會合曾國荃圍師相機進取速奏膚公李鴻章如能親督各軍與曾國荃會商機宜勦辦更易得手著該撫酌度情形一面奏聞一面迅速辦理等因欽此仰見

聖謨廣遠

訓示周詳曷勝欽悚臣於攻克常州後未敢遽議協
勦金陵一以臣部兵將苦戰經年傷病疲乏未
得休養若遽令遠出誠恐再衰三竭無裨大局
一以曾國荃全軍兩年圍攻一篲未竟屢接來
書謂金陵所少者不在兵而在餉現開地道十
餘處約有數處五六月間可成如能及早轟開
自必無須協助又疊准曾國藩咨緘屬令派兵
接防句容東壩溧水高淳各處又准左宗棠咨
商撥兵進規長興以掣湖州賊勢臣因湖郡賊
氛尚熾實為蘇省切近之憂應先派勁旅進規

長興協以湖郡俟湖州克復門戶穩固然後分
兵會圖金陵方無後顧之慮是以揀派郭松林
劉士奇王永勝楊鼎勳等軍會攻長興現已進
逼城根勢難遽行撤動而蘇常新復各郡縣內
防湖州竄匪外堵金陵竄路節節設守未可一
處空虛常勝軍裁遣後英酋巴夏禮等方以松
滬腹地無備日與饒舌臣固未可遠離臣之兵
力亦僅勉支堵剿至臣部礮隊向稱得力者一
則常勝軍礮隊向係洋弁二三十人領帶專管
安設施放各事昨經戈登分別撤遣仍留得力

洋弁十餘人巴夏禮謂奉英君主之諭不准再令出隊打仗臣未便相強項始派員接管須操練三五個月漸求精熟方可派出攻勦一則提督程學啟所遺礮隊內有大礮三尊可以攻城有英人備雷幫同教習現為王永勝劉士奇帶往長興一則提督劉銘傳礮隊內有法國人攻隸中國之總兵畢乃爾幫同操習然大礮少而小礮多可以攻營劫寨而專攻一城尚不敷用前攻常州時臣調齊三軍礮隊分門合攻月餘乃下金陵城大而堅洪李各逆負固老巢非嘉

興常州可比曾國荃地道如轟不開必須礮隊協助則臣處所有礮隊須全調前往合力猛攻且有得力礮隊亦須有得力鎗隊而與礮隊素習者相為護持庶築牆爬城稍有把握忠逆現在金陵城內稔知炸礮虛實故非厚集礮力多選奮勇不能操券目前常勝軍所遺礮隊既未練成程學啟所遺礮隊已往長興劉銘傳近在句容亦擬添酌礮位操練兩月再行攻勦除由臣督飭各軍趕緊操習一面多製炸彈廣儲攻具聽候調撥外擬請俟湖郡克復蘇防稍鬆再

飭協攻金陵以求有濟仍隨時咨商曾國藩曾
國荃酌度辦理所有遵

旨覆陳各緣由伏乞

聖鑒訓示謹附片具

奏

籌畫湖州金陵緩急片

再前奉

諭旨飭調勁旅數千及得力礮隊赴金陵會攻當經
臣以湖州未復礮隊未齊暫難分撥各緣由於
十七日據實覆陳在案旋又迭奉五月十一十
六十九等日

寄諭飭催臣撥兵會勦金陵或親往會攻毋稍避嫌
推諉等因又迭准曾國藩曾國荃咨函遵

旨催令臣酌帶勁旅萬餘人並開花礮隊親赴金陵
會商攻勦臣查金陵關係東南數省大局如能

迅速攻拔江鄂賊勢可漸瓦解況在江蘇本境
臣義所應為敢存畛域之見臣在曾國藩營中
從事多年與曾國荃素相投契現又諄切商催
更無嫌怨之可避臣聞

命以來復接曾國藩等咨緘心急如焚恨不能剋期
就道惟湖州賊股甚衆附城數十里內面面賊
壘堵逆黃文金輔逆楊輔清等均係百戰悍賊
浙師似難獨力制之且浙軍僅能扼東南兩面
其西北瀕臨蘇常中隔一湖湖面極寬處處接
壤浙師勢難兼顧現因湖州未復東自吳江平

望西至宜興溧陽數百里間均須分守牽掣許
多兵力長興攻克足扼湖州之吭若郭松林各
軍乘勝進趨與潘鼎新吳淞南潯各營李朝斌
太湖水師各營分路並進或可漸冀得手又不
知東南浙軍能否齊進如即調攻金陵臣軍大
半分守各城惟郭松林劉士奇王永勝楊鼎勳
等為游擊之師其鎗隊最為得力自須調往又
恐湖賊乘間內竄若欲臣會攻金陵復令臣協
勦湖州臣力實有不給若令臣棄湖州而赴金
陵事體固分輕重時勢固有緩急臣敢不仰體

朝廷與督臣殷殷責望之意但使臣統兵遠去而湖
賊窺伺入境孰與主持調度若僅分兵遠去少
則無濟於事多則各統將資望相等號令不一
與曾國荃各軍錯處圍城之下曾國藩與臣皆
不放心且各軍礮隊現尚未齊將來湊齊時間
有雇用洋人教習恐亦非諸將所能節制籌思
至再似乏兼全之術項據郭松林等稟稱現在
天氣炎熱洋鎗連放三四次即紅多則炸裂開
花礮放至十數出後即不能著手昨攻長興各
項礮具俱已震損亟須回蘇脩整以後節交三

伏戰事頗難亦係實在情形惟是迭奉

嚴旨飭臣軍會攻金陵曾國藩兄弟又屢次檄調事

關大局無論有濟與否必應竭力相助臣擬日

內由太湖馳赴長興前敵察看軍情賊勢相機

調撥仍即折回蘇城恭候

諭旨酌奪辦理所有籌畫大概情形附片具陳伏乞

聖明訓示謹

奏

擬抽隊會勦金陵摺 同治三年六月十七日

奏為馳赴長興察酌大勢擬先抽派鎗礮隊一萬
四千人會勦金陵仍撥兵分守太湖東西兩岸
俟浙軍進勦湖州相機夾攻恭摺仰祈

聖鑒事竊臣疊奉

諭旨撥兵會勦金陵當經兩次附片馳陳並聲明長
興克復親赴前敵察看軍情賊勢相機調撥臣
於六月初一日由蘇啟行途次接奉五月二十
九日

寄諭著於所部各營內挑選精壯便捷善於攻城者

二三十人即交劉銘傳等帶赴金陵長興如即克復該撫統率諸軍助攻金陵不日定俟湖州克復等因欽此又奉六月初四日

寄諭著李鴻章仍遵前旨俟長興克後赴援金陵並令劉銘傳督帶選鋒先行馳往助勦等因欽此仰見

宵旰憂勤先其所急之至意臣由太湖沿途察看逕抵長興查知前次攻克該城斃賊甚衆逆首劉官方是否死於亂軍之中未得確據援逆敗退四安湖州等處雖尚負固而賊氣漸衰長興距

湖州六十里形勢最為扼要賊與我所必爭既
經攻克若不分兵他往自應乘勝進攻惟念屢
奉

廷旨諄諄以會勦金陵為急督臣曾國藩迭次奏咨
並聞鄂賊已竄過麻城黃岡有直趨皖境之勢
誠恐金陵饑困之賊偵知援逆漸近死灰復燃
於大局殊有關礙臣由長興回蘇後即檄調南
贛鎮總兵王永勝所部十營古州鎮總兵劉士
奇所部八營由長興拔隊並程學啟所遺開花
礮隊交王永勝等督帶前往又調現駐句容之

遇缺提奏提督劉銘傳各營五成鎗隊並所部
畢乃爾開花礮隊又調現紮溧陽南渡之提督
周盛波挑選精銳鎗隊一千人併歸劉銘傳一
起剋日會合赴援金陵因天氣酷熱軍士遠役
易致疾病屬令曉夜登程分起徐行其輜重糧
藥礮位子彈均由水路裝運長江千里船隻維
艱須月杪方能齊備該軍等行抵金陵應由何
路進隊何門紮營何處安礮已諄諭各將細心
妥籌稟請曾國荃指示調度並派劉銘傳先赴
金陵周察地勢熟商辦理現在湖州未復蘇防

未鬆臣暫難遠離俟各軍拔營後如此間防勦大局布置定妥臣擬乘坐輪船攜帶常勝軍所遺礮隊前往協攻仍剋期往還以圖兼顧至湖州賊股尚衆附城三十里面面堅壘昨准左宗棠來緘不欲急攻吳興先規安吉孝豐以斷竄路現孝豐已復浙軍正圖安吉一時似難直趨湖州而蘇境與湖州接壤中隔太湖有李朝斌水師足以禦之其太湖西岸由長興而達宜興溧陽是長興須留重兵臣揀派郭松林楊鼎勳十五營分屯長興城內外並調現守溧陽之道

員吳毓芬水陸五營移駐長興之夾浦口而調
總兵周盛傳三營接守溧陽其太湖東岸由吳
淩南潯而達平望潘鼎新一軍分扼數處尚嫌
單薄擬調現駐松江之劉秉璋七營進紮平望
與潘鼎新合力堵勦如浙軍由湖州東南進偏
則湖西郭松林各軍與湖東潘鼎新各軍即可
聯絡並進會同李朝斌由大錢小梅各口進蹙
湖郡西北以勦為堵聊分賊勢而助長圍總之
金陵湖州兩處攻勦均尚費手臣之兵力原不
足以兼營惟金陵關係數省全局如能協力攻

克則湖州自必解體區區愚慮欲遵

旨協攻金陵仍兼防湖賊內竄相機而動所有酌量
分撥各緣由繕摺馳陳伏乞

皇太后

皇上聖鑒訓示謹

奏

卷二

二二五

金陵克復改派各軍截剿敗匪摺

同治三年六月十九日

奏為金陵克復改派各軍截剿敗匪並擬乘機分

路會攻湖州恭摺仰祈

聖鑒事竊前派劉銘傳劉士奇王永勝各軍協剿金陵正在料理啟程適准曾國荃飛咨江甯省城於十六日午刻用地道克復仰惟

皇太后

皇上宵旰憂勤刻刻以金陵老巢未拔為慮茲曾國荃冒暑督戰有志竟成從此東南大局立見轉移各省竄賊聞而解體無難以次削平皆緣

聖德感孚天人應助仰承

先皇未竟之志藉慰

列聖在天之靈率士臣民同深欣慶况臣忝司疆土獲見肅清其懽忭感賀下忱尤無既極除克復詳細情形由督臣曾國藩等具奏外惟金陵賊首是否就擒全股能否殲滅曾國荃來咨未及詳敘各處探報亦未確知誠恐敗匪乘間冲竄臣飛檄現守句容之劉銘傳現守東壩之黃中元鄭國魁現守溧陽南渡之周盛波等分兵嚴守城隘一面探明賊蹤合力兜勦務使悉數殲擒

毋或漏網臣初檄調王永勝劉士奇兩軍由長興拔赴金陵但留郭松林楊鼎勳分守該城兵力稍單難遽深入茲飭王永勝等折回長興併由太湖西岸進紮劉秉璋潘鼎新兩軍併由太湖東岸進紮仍會同李朝斌太湖水師與浙軍會勦湖州左宗棠所部現分攻安吉如即得手則漸偏漸緊可與蘇軍通氣臣惟督飭郭松林等聯絡齊進以圖合力攻克仰慰

聖廑所有金陵克復改派各軍分投堵勦緣由繕摺馳陳伏乞

皇太后

皇上聖鑒訓示謹

奏

進規廣德片

再金陵既克湖州踞賊偽堵王黃文金偽輔王
楊輔清等擁衆十餘萬仍圖死守一以湖郡襟
山帶湖西南則疊嶂層巒東北則千港百汊形
勢甚險糧食甚多足以自固一以廣德四安安
吉各處分衆踞守犄角勢成該逆可由此上竄
徽浙而江西大股亦可由徽浙經廣德而回援
湖州蓋湖州其堂奧而廣德四安其門戶也現
在安吉一路左宗棠派兵堵勦臣復飭郭松林
王永勝劉士奇楊鼎勳等由長興呂山進攻尹

隆橋大德橋一帶賊壘直搗中堅如能剋期攻
拔則由湖州至四安之路已斷惟探聞廣德州
城內外有偽王數人帶萬餘賊踞守該處東達
湖郡西通東壩北接建平溧陽為賊匪往來要
道實皖浙江蘇三省樞紐之區目下蘇境肅清
腹地無事臣擬派現守句容溧水之遇缺提奏
提督劉銘傳統帶所部並現守南渡之提督周
盛波各營由東壩建平前進以勦為堵相機攻
取倘得廣德而守之湖賊去路既梗羽翼漸孤
而江西皖南回竄之路亦少且與郭松林等西

路各軍兩面夾擊較為得勢惟聞由建平至廣德山徑叢歧人烟荒涼河路不通轉運極艱是以數年以來曾國藩屢議分兵攻守而力有未逮臣屬劉銘傳督率各軍酌度機宜仍力顧東壩溧陽各防穩慎籌辦至廣德四安去路若斷誠恐湖賊鋌險內竄沿湖東面亦須添兵協勦潘鼎新所部由舊館晟舍進紮劉秉璋所部由吳淞軋村進紮勢已聯絡惟自湖濱之大錢口迤東而至昆山昇山賊營林立必須次第攻打又添調現守常州之簡用道張樹聲所部六營

由平望前進會同潘鼎新劉秉璋合力進取仍
分顧後路以防竄突並飭隨時商會浙軍分道
夾勦互為聲援所有近日調派各路軍情除咨
明兩江督臣曾國藩閩浙督臣左宗棠外理合
附片縷陳伏乞

聖鑒訓示謹

奏

京營弁兵到蘇學製外洋火器摺同治三年七月二十九日
奏為奉發京營弁兵到蘇分派各局學習製造外
洋火器遵

旨酌定薪水等項恭摺覆陳仰祈

聖鑒事竊臣於本年五月間奉

寄諭總理各國事務衙門奏請派京營弁兵學製火
器一摺據稱練兵之要制器為先洋人所製炸礮
炸彈等項尤為行軍利器現在李鴻章軍營製造
此項火器已有成效擬請飭火器營於曾經學製
軍火弁兵內揀派武弁八名兵丁四十名發往江

蘇一體學習等語所奏自係為思患預防起見本
日業經諭令火器營照該衙門所請派撥矣此起
弁兵俟抵江蘇後即交李鴻章差委專令學習炸
礮炸彈及各種軍火機器如能留心學習著有成
效者准該撫從優奏請獎勵其有怠惰偷安不遵
約束者即照軍法治罪該撫務當明定勸懲俾該
弁兵等盡心講求以期備得西人之妙該弁兵等
到蘇後該撫務須加意稽察妥為防閑俾祕妙之
傳不致稍有漏洩方為妥善所有應給薪水等項
即由江蘇酌定支發准其作正開銷等因欽此並

先後接准總理各國事務衙門暨三口通商大臣崇厚咨會此項弁兵已由津附搭輪船赴蘇即經行知蘇松太道飭俟該弁兵等到滬時妥為照料隨據該署道丁日昌呈報護軍參領薩勒哈春等官兵四十八員名跟役十二名於六月二十日抵滬遵將自津來滬輪船價值在於船鈔項下發給并備船送至蘇省臣接見該參領等並將各兵丁逐名點驗逐細教導令其悉心講求緣臣軍先後購覓西洋炸礮每月操練攻勦需用炸彈甚多不能不添設製造局分濟

應用計現開炸彈三局一為西洋機器局派英國人馬格里雇洋匠數名照料鐵鑪機器又派直隸州知州劉佐禹選募中國各色工匠幫同工作一為副將韓殿甲之局一為蘇松太道丁日昌之局皆不雇用洋人但選中國工匠仿照外洋做法當即酌令儘先參領薩勒哈春候補副參領崇喜並護軍校常英玉慶等四員帶京營兵廿名赴洋人馬格里等礮局又令儘先副參領色布什新並護軍校達隴阿等二員帶京營兵十名赴韓殿甲礮局又令額外空花翎德

俊並護軍校常慶等二員帶京營兵十名赴丁日昌所設礮局該三局分酌學習參互考校責成局員會督弁兵指引各項門徑並隨同匠作勞身苦思究其精微臣仍隨時查詢試能否以定優劣立賞罰以示勸懲該弁兵等如學習有效必當遵

旨從優保獎若怠惰偷安或該管官約束不嚴各局員未經細心教導亦必分別懲處俟製造略臻精熟再酌選明白勇敢者派往礮隊營中學習演放步伍準頭逐漸推求以期稍得西法之妙

至該弁兵等應給薪水等項奉

旨由蘇省酌定支發作正開銷臣查此項新糧無案
可循飭由報銷局查照軍需則例開呈京營弁
兵調往軍營應支鹽折等項分別擬具支數請
示前來惟蘇省兵燹之餘食用較貴各局工匠
因係製造祕器多方羈縻其口糧較常例均加
數倍况該弁兵由京遠道來南學製火器要件
責令格外用心薪糧應較軍營加厚以示鼓勵
當即酌定職分較大之參領薩勒哈春副參領
崇喜色布什新空花翎德俊等四員每員每月

支給薪水庫平銀三十六兩其幫帶之護軍校
常英玉慶達隴阿常慶等四員每員月支給庫
平銀二十四兩兵丁四十名每名月支給庫平
銀八兩跟役十二名每名月支給庫平銀三兩
書識紙張雜費每月共支給庫平銀十兩均不
計建總共月支庫平實銀六百零六兩自六月
二十到滬之日起支按月由海關道庫給發作
正開銷除咨總理衙門暨戶部備案外所有京
營弁兵奉發到蘇分派各局學製外洋火器酌
定應支薪水等項各緣由理合繕摺覆陳伏乞

皇太后

皇上聖鑒訓示謹

奏

陳明蘇省兵餉片

再臣初到上海所部水陸不過萬人前任移交
兵勇四萬多不能戰除當時被賊沖潰外其餘
悉數裁汰而賊勢浩大夷情詭變臣不自揣量
妄思分路進剿以振

國威而伐敵謀然與曾國藩上游之師左宗棠浙
東之師相去千餘里中隔賊巢孤立無援不能
不陸續添募求自強之術方議分三大枝進取
一由太倉崑山進蘇州則程學啟與戈登常勝
軍當之一由常熟進江陰無錫而達常州則劉

銘傳李鶴章郭松林等當之一當浦東金山衛
進浙江之平湖乍浦而達嘉興則潘鼎新劉秉
璋等當之同治二年夏間臣處陸軍六萬人募
練甫齊相輔並進八月以後忠逆李秀成由金
陵回援糾合侍逆李世賢輔逆楊輔清護逆陳
坤書聽逆陳炳文等大股六七十萬分撲前敵
各營叛匪白齊文又為忠逆募洋匪數百搶小
輪船三隻助守蘇城軍情危急萬狀仰賴
聖主威福以次勦平亦由兵數較衆軍火鎗礮較精
各將士均尚奮勇効命非臣所能為力也惟是

添募愈多需餉愈鉅臣抵滬時薛煥吳煦皆以
上海稅捐養現兵五萬斷斷不敷督臣曾國藩
軍餉尚不能稍分接濟此外撥款更無絲毫能
給臣接手後逐漸添營多方購備外洋鎗礮用
度更繁又值漢九開關滬稅大減之際因於釐
捐一項加意整頓敷衍至今幸未詳潰而臣軍
去年僅欠四箇月口糧今年已逾八月乃止發
過四箇月之餉僅及半關臣惟激勵各軍忍飢
血戰不敢瑣屑上

聞自去冬以來金陵攻勦喫緊准督臣咨令月撥四

萬兩臣即督同滬上司道按月勉力分濟鎮江
三萬則解至今年夏間為止今全省雖就肅清
而被擾各屬人民稀少田野荒蕪蚩蚩了遺仍
多凍餒而死臣職司守土方救死扶傷之不暇
日與官紳謀所以招墾撫卹之方但苦無款可
籌何忍於災區再有脔削以是拓土雖廣而用
財更多取利益薄竊恐外間不知輒謂肅清省
分指撥要款必致無可撥解上煩

聖廔此臣不能不豫為陳明者也至江西餘氛未殄
有鮑超左宗棠各軍分投追剿自應無需添兵

臣軍暫守境上如一兩月後賊無回竄信息當
分別裁撤酌留洋鎗炸礮隊三萬人以備海防
而資控守藉可節省餉需惟各軍積欠太多一
經凱撤必須酌補口糧以為行資司道各庫及
各釐局隨收隨放毫無存儲未知能否設法借
墊按月扣還容臣督籌妥辦續行具奏所有蘇
省兵餉籌辦大略緣由理合附片據實陳奏伏
乞

皇太后

皇上聖鑒訓示謹

奏

卷二

四十一

援案請發餉票找抵欠餉片

再目下江浙肅清軍務大定臣部勇丁擬酌量
遣留前已附片

奏明在案查臣軍糧餉專賴松滬及蘇屬釐捐接
濟瘡痍之後進款總無起色各軍口糧向係前
後牽算壓放只及半關三年以來統計欠餉已
七八百萬兩兵勇連年苦戰恢復全省功成之
後一旦遣歸別無希冀只此應得找欠之餉合
之總數固為鉅款分之各勇仍屬無幾既無折
扣之理更無籌補之方前准江甯將軍富明阿

咨以江北水師裁船欠餉請援照鎮防成案一律給發餉票准予請獎亦准其移獎親族子弟毋庸令加二成實銀以示體恤將來江北陸軍裁撤並照章辦理各等因臣當即分行營務支應各員會同各統領議商蘇軍裁撤能否仿照鎮揚各軍現案辦理據議稟復欠餉既鉅只有按照程途遠近酌補現銀以為行資其餘欠項以票給抵准其請獎並移獎親族子弟惟鎮營餉票抵欠辦法係查照皖北軍營章程准照籌餉事例減成銀數執持餉票具呈請獎曾經部

議加以二成實銀此為軍營未經裁撤常行之
例此次富明阿援照奏辦復以該兵官等既不
能實領欠銀僅得餉票而於報捐之款仍令加
實銀殊不足以示體恤蓋裁兵宜於速散欠餉
利在速清若令以現銀加成請獎則積欠久困
之勇丁從何得銀必至報銷遲滯裁勇因此觀
望久聚不散尤恐別滋事端此加收現銀一層
與清釐欠餉之意適為相左而不能相成者也
故欲籌補欠餉體恤兵艱必須餉票流通而欲
餉票收捐迅速必須無庸加收實銀如此權宜

辦法無論裁撤之勇固可截數找補即留防之
軍亦得藉清積欠其餉票赴捐應作實銀收捐
核照籌餉事例減成銀數請獎不必加搭實銀
則兵勇得票如得實銀不致久久難給於

國計毫無虧損而軍需亦易清楚但向來捐案彙
奏甚緩更宜加意鼓勵按三月一卯出

奏則捐生自必踴躍裁兵亦利遄歸各等情由蘇
藩司劉郇膏覆核議詳請

奏前來臣查所議尚為妥協合無仰懇

天恩俯准照辦並敕部知照施行所有援案請發餉

票找抵欠餉並照實銀收捐緣由理合附片陳

明伏乞

聖鑒訓示謹

奏

--	--	--	--	--	--	--	--	--	--

卷一

十一

請裁富明阿一軍分協甘皖軍餉片

同治三年十月二十五日

再臣等疊奉

寄諭飭解甘省軍餉以東南分濟西北本屬義不容辭惟江蘇各屬蹂躪過久元氣太傷必須加意休養軍務雖定而海疆重地防兵未敢遽撤臣

鴻章復蒙

恩飭署兩江轄境過寬則兵力尤不可少頃調劉銘傳李鶴章等洋鎗隊萬餘人隨臣國藩進剿皖鄂仍須籌養勁旅以備調撥援應所有蘇滬釐稅等款自應仍照舊章先濟本省軍食至臣國

藩所部分駐金陵及皖南北者尚有五萬餘人
即蘇皖鹽務釐卡照舊撥解不敷甚鉅仍須臣
鴻章隨時設法籌濟查江北淮揚通海各屬較
為完善歷年供支揚防一軍絲毫不能外撥現
在裏下河安靜無事楚省逆氛遠距數千里前
敵重兵節節堵扼揚州與金陵僅隔一江總督
既移駐省垣臣鴻章可就近派兵接防臣國藩
由皖北兜勦亦無竄越後路之虞如有疏失應
惟臣等是問富明阿所部兵勇擬請
特旨飭令分起妥為遣撤庶騰出江北之餉以一半

分解甘省要需以一半分濟皖軍前敵似於大局有裨臣等通盤籌畫為裁軍節餉起見是否有當伏乞

聖鑒訓示施行謹合詞附片具

奏

豁免攤款摺 同治三年十一月初五日

奏為蘇省咸豐十年以前攤補清查各款懇

恩一律豁免以消官累而紓民困恭摺奏祈

聖鑒事竊據蘇州布政使劉卹膏會同江安蘇松各

糧道詳稱蘇省額征錢漕最重攤捐款目最多

今蒙

恩飭辦理減賦一經減定賦額應即酌定征價力禁
浮收從前之弊竇欲盡消除後此之攤捐必歸
無著即如官墊民欠已奏明禁革即三次清查
四次清查續辦清查案內墊欠之數最鉅迨三

案定後照章查辦其本員已故子孫並無官職家產亦已盡絕者歸於無著項下由外籌補又道光二十五六七八等年墊完漕尾前經援案奏請於道光三十年秋後起分作四年帶征征不足數著落原墊及接征之員分賠賠不足數立予參革未完銀兩亦歸無著籌補又道光二十一二等年夷務兵差不敷因公挪缺亦有由外攤補之款為數均屬不貲其籌補之法於通省州縣中按缺分之優瘠派銀數之多寡分年歸款名似有著而後任已為前任所累且錢漕之

羨餘雖取之於官仍係取之於民既已派令攤
補難保無恣意浮收之弊更恐正項錢糧藉端
挪掩又其甚者有提無解徒託空言不惟李代
桃僵抑且盜鈴掩耳州縣之稍知自愛者負累
無窮其不肖者藉端朘削民生日困職此之由
茲際東南大定吏治更新所有從前攤捐積款
應請

奏准一律豁免等情前來臣伏查三次清查酌提
羨餘彌補蘇省雖已咨報提補足額尚有續查
無著待補之款而四次清查續辦清查及墊完

漕米兵差不敷案內待補者尤屬為數累累且
查咸豐十年以前蘇省尚有在外攤捐之款或
由州縣詳明有案或由府司遇事飭捐並有因
公會議分年攤補各項雖未

奏咨有案而捐攤名目則同因之挪動庫款均須
歸補計自江甯失守後蘇松五府州屬次第被
擾倉庫焚掠一空物故人亡壞亂已極前五案
之攤款及由外之攤捐久經停攤茲幸大功告
歲全省肅清復奉

特恩減免浮糧浮糧既減羨餘亦因之並減若將前

五案之籌補等項銀款仍責令現任人員按數分別起攤不特案據無存款目轉轉而物力已盡官累無窮殊非與民更始之義檢查四次清查案內如應追官欠之前任嘉定縣知縣楊遇恩等員已由原籍廣東遵照

恩詔條款咨請豁免此係本身應追之款既可照例請豁則蘇省各屬籌補前任虧缺無著之款情事更輕且查江西省道光二十五年豁免清查等案查出官墊民欠及攤補兵差經費並因公挪缺等款經督臣曾國藩於同治元年間奏

奉

恩旨全行豁免江蘇事同一律惟有仰懇

天恩俯將前五案籌補攤補銀兩及咸豐十年以前一切由外捐攤各款援照江西成案

准予概行豁免其餘流攤名目永遠禁革消官累即以紓民困從此根本既清末流可截庶倉庫絲粒可歸實在州縣亦無所藉詞似亦澈清吏治慎重度支之道所有請免攤捐積款永禁流攤各緣由恭摺具陳伏乞

皇太后

皇上聖鑒訓示謹

奏

三十一

三十一

--	--	--	--	--	--	--	--	--	--	--

12

12

劉銘傳等軍暫難赴豫遠征摺

同治三年十二月十九日

奏為欽奉

寄諭體察軍情據實覆陳仰祈

聖鑒事竊臣承准議政王軍機大臣字寄十二月初

九日奉

上諭賊由南召北趨魯山窺伺河汝僧格林沁張之
萬先後督軍馳紮葉縣曾國藩前派分赴楚豫之
劉連捷劉銘傳等軍曾否到防著曾國藩李鴻章
迅檄劉連捷等所部星速馳赴豫境毋許再有稽
延等因欽此臣查劉銘傳周盛波各營在蘇境轉

戰數年所用皆係外洋軍火劉銘傳營內並有
練成開花礮隊一營共洋礮二十餘尊大者四
五千觔小亦千餘觔數百觔不等車架器具均
仿照洋式笨重異常礮彈火藥動需數萬蘇省
水鄉賴有船隻運駛故赴機應敵不致遲誤一
經派往陸路攜帶轉運萬分掣肘勢難如期應
調臣前在金陵曾國藩商調該軍赴皖當以南
循大江北沿淮河駐紮防勦軍火礮彈由蘇轉
解雖遠而尚能運到雖遲而可期決勝若調往
西北水道不通接濟不及誠恐遷地弗良是以

曾國藩奏明劉銘傳等軍宜以三河尖固始為老營凡皖豫交界有警相機勦辦蓋欲就淮河為轉運之路蘇省當設法籌濟也臣於十二月
初六日自金陵起程回蘇其時曾國藩先奉

寄諭飭調劉銘傳等營赴豫與臣再四籌商苦無善策臣於初十日抵蘇十一日接據劉銘傳由六安來稟以該軍與周盛波各營自廣德溧陽移營渡江沿途雨雪阻滯長行將近一月始抵六安兵勇不勝疲憊因內河水涸舟膠倉卒趨行所有洋鎗炸礮配用藥彈不能多運尚遺礮隊

及洋軍火數萬屯留建平須俟來春水長始可
設法陸續運營未便即赴豫省陸路遠征以致
誤事各等情臣查劉銘傳周盛波皆係蘇軍驍
將向來奉調即行毫無避蕙臣等既檄令出境
斷不敢稍分畛域惟該軍專恃鎗礮軍火制敵
角勝目前既未運齊似難遠調南召魯山在豫
省西北由六安三河尖西去千餘里均係旱路
不通水道糧餉軍火由蘇解濟又遠隔數千里
萬萬不及必致中途饑匱且賊蹤飄忽節節落
後亦恐於大局無裨臣統帶該軍較久深悉實

在情形不敢不詳細上陳可否俟明春水長察
酌入豫道路何處可通舟楫易於轉運再行相
機調度俾臻穩慎仰懇

聖明俯准照辦曷勝感戴所有劉銘傳等營暫難赴
豫遠征各情理合恭摺由驛據實覆陳伏乞

皇太后

皇上聖鑒訓示謹

奏

派兵由海道援閩摺 同治四年正月二十九日
奏為遵

旨酌派兵將擬由海道赴閩援勦恭摺覆陳仰祈
聖鑒事竊臣欽奉同治三年十二月二十一日

寄諭著於蘇省防兵內酌量抽撥礮隊赴閩歸左宗
棠調遣等因欽此又十二月二十六日

寄諭由蘇赴閩水道可通著李鴻章與左宗棠妥為
籌商飭劉銘傳統帶所部星速赴閩等因欽此又

同治四年正月二十日

寄諭李鴻章即籌畫軍裝口糧令劉銘傳等分隊入

閩並催令趕緊部署起程無任觀望等因欽此臣
正在籌商調派復准左宗棠咨催前來查劉銘
傳周盛波等二十四營人數較多據報正月初
進紮皖豫交界之三河尖離蘇已千餘里若再
調回由蘇赴閩遠道既易疲乏師期必致遲誤
且豫省捻逆飄忽無常暫留該軍駐淮河上游
堵扼回竄於局勢似亦相宜容會商督臣曾國
藩隨時察度辦理惟閩賊日肆披猖迭奉
諭旨酌量抽撥又准左宗棠咨函商催臣何敢推諉
謹就蘇省防兵內就近調撥查有奉

旨飭令赴任之福建陸路提督郭松林統帶松字楚
勇七營遇缺題奏提督楊鼎勳統帶勳字淮勇
六營均係洋鎗隊訓練精整歷年轉戰蘇常嘉
湖等處所向有功應飭赴閩協勦並令記名總
兵曹仁美帶護衛營併歸郭松林統領記名提
督黃中元帶親兵二營併歸楊鼎勳統領以厚
兵力至閩省與蘇並非連界由溧陽南去則隔
皖南江西兩省由吳江東去則隔浙江一省內
地水道實不能通况由皖浙入閩崇山峻嶺迤
邐千里客軍遠去呼應不靈饋運不繼將若之

何臣再四籌思只有由滬航海至廈門登岸較為便速現在侍逆大股久踞漳州勾結洋人窺伺泉廈廈門為通商要口距漳甚近由此相機進剿亦較得勢臣檄令郭松林楊鼎勳等由建平東壩拔隊來蘇整頓軍裝籌給口糧一面飛飭江海關道丁日昌商雇火輪夾板等船豫備分起裝載前往其船價即於關稅內提給作正開銷惟洋船雇值過昂該關收稅日絀久已不敷支解一旦增此鉅款籌措維艱俟能籌出若干銀兩雇定若干船隻裝得若干兵勇即催令

迅速起程續再奏報所有酌派兵將擬由海道
赴閩援剿緣由恭摺由驛馳陳伏乞

皇太后

皇上聖鑒訓示謹

奏

籌畫軍餉片

再欽奉

寄諭閩省餉源早竭飭臣處派兵籌畫軍裝口糧並於到閩後源源接濟左宗棠來函亦謂客軍入境米鹽薪草均無從購辦須請代籌月餉閩中蹂躪瘠苦固係實情惟蘇省亦殘破之區僅上海稍為完善從前江浙未復各路商賈聚集一隅籌捐尚易近來富商四散市貨彫零關稅捐釐驟形減色而臣部水陸七萬人月餉過鉅支絀時虞去年秋冬之交方裁撤數千人督臣曾

國藩以臣軍鎗礮軍火尚為精利南北軍情未
定不宜遽撤嗣又迭奉援豫援閩之

旨計撥往皖北劉銘傳等一萬數千人現派赴閩郭
松林等八千人均須力籌接濟本省防兵除淮
揚太湖两支水師向食蘇餉外陸軍尚有三萬
餘人分守要地亦難聽其飢潰以入抵出不敷
甚多加之本年奏撥京餉二十萬甘皖協餉時
來催逼若以一省兼顧數省蘇力必不可支諒
邀

聖明俯鑒惟本省軍餉嗷索實有不容緩置之情即

如此次援閩道路險遠郭松林楊鼎勳等求給
兩月口糧十餘萬雇用洋船經費恐亦將近十
萬此皆分外添出之款臣督同司道設法騰挪
不知能否應手該軍到閩後即照臣處糧台放
餉章程一律普放每月只得半關越境遠勦勞
苦實甚比照左宗棠所部二萬八千餘人由浙
月撥十四萬已得全餉者亦恐甘苦之不均然
臣未敢遽請分濟也惟有照蘇省各營餉章暫
行勻撥查由滬附海船轉解廈門滬廈兩處均
須設局擬令海關道丁日昌在滬籌解已革廣

東候補道段喆於閩粵沿海情形均甚熟悉擬
派該員隨隊照料前往廈門會同興泉永道鄧
廷枏妥籌接運第臣軍向例按照各營人數另
給食米柴薪油燭等項俾臨敵不至缺乏戰守
方能久支需費無多而關係最要蘇省去閩絕
遠人地生疎勢難瑣屑代謀昨已緘覆左宗棠
請其酌飭地方官或委員籌款就地采辦隨營
轉運期無缺誤應懇

恩飭下福建督撫臣趕速籌辦該軍到閩後既歸左
宗棠調遣將來調令進剿賊勢軍情未能預定

若去廈門過遠臣處無從轉解蘇省亦難兼管
並請

豫飭福建廣東各督撫就近協力籌濟勿得推諉所
有籌畫軍需大概情形理合附片陳明伏乞

聖鑒訓示謹

奏

用款與洋人交涉權宜酌定片

再蘇滬軍需案內常勝軍用款為向來軍需所
無又英法兵官教練洋鎗礮隊湘淮各營添雇
洋人教習及租置輪船買用外洋軍火製造西
洋礮火均經先後隨摺聲明具奏有案據督辦
報銷局蘇州藩司劉卞膏等詳稱常勝軍及英
法教練洋鎗礮隊勇糧同治元年十月初六日
以前應歸前兼署蘇藩司蘇松太道吳煦一手
開報以後用款常勝軍截至三年四月裁遣止
其教練勇糧並各營教習洋人辛工及租買各

項輪船購買外洋軍火製造西洋礮火等五款
截至三年六月底止共請銷銀二百七十八萬
八千三百八十八兩八錢三分八釐一毫係於
藩關各庫捕盜經費釐捐等項內陸續提撥另
開收支款目詳請具

奏前來臣查前五項用款皆與洋人交涉無例可
循經臣隨時權宜酌定飭發並無浮冒理合附
片具陳並照繕清單恭呈

御覽一併存案免其造報再前項既屬例所不及嗣
後支放各款仍應核實專案奏報請銷其法國

教練龐宇營口糧由會防經費項下動支者應
歸外銷由關道庫動支即附入

奏銷彙辦合併陳明伏乞

聖鑒謹

奏

--	--	--	--	--	--	--	--	--	--	--

111
111

軍需用款酌量變通片

再前奉

上諭同治三年六月以前各處軍務未經報銷之案免其造報其自本年七月起一應軍需凡有例可循者務當遵例支發其例所不及有應酌量變通者先行奏咨備案等因欽此仰見

朝廷實事求是至意曷勝欽服除三年六月以前軍需用款歸於另案奏報清單外查楚軍向以五百人為一營每百人用長夫三十六名臣所統湘淮陸軍原照楚軍向章連長夫共六百八十

名為一營每月支餉銀二千八百餘兩係按勇百名內勇目十名每名日支銀二錢正勇九十名每名日支銀一錢五分長夫三十六名每名日支銀一錢綜計所支銀數與准銷勇糧每月支銀四兩五錢成案有減無增惟勇營向不准銷夫價而長夫一項移營拔隊挑運鍋帳可以不拉民夫不佔民房至臨敵交仗分送粥飯子藥與賊對壘日夜修濠築卡皆賴長夫為之其得力實與勇丁無異應作為力勇開報至陸軍內間添洋鎗礮隊一二哨勇丁亦須加增則

一營有七八百名不等節經造具官弁銜名兵勇總數清冊咨送軍機處戶部有案又水師官弁向來只支鹽菜跟役不支例馬草乾馱折實屬不敷食用是以淮揚撫標太湖各起水師官弁均照陸軍一體支給例馬草乾馱折等項其水陸各營五六品軍功之哨官向照外委例支給鹽折均與厯屆造銷成案稍有未符自應遵旨先行奏明立案以備嗣後據實開報除咨戶部外所有軍需用款酌量變通緣由謹附片陳明伏乞

聖鑒再楚軍章程兵勇陣亡受傷卹賞銀兩俱由營
全數給領不由原籍找給亦與例案未符先經
分咨戶兵二部查照在案合併陳明謹

奏

李元度請免發遣摺

奏為陳明已革臬司前功足錄母老堪憐可否懇恩免其發遣恭摺仰祈

聖鑒事竊臣等接部咨同治三年十二月十九日奉上諭已革浙江臬司李元度著從重發往軍臺効力贖罪等因欽此謹查此件部議全案臣等均未及見惟恭讀邸抄所載前後

諭旨知李元度於罷職後被言官撫拾前事奏劾曾國藩復自陳前參本屬從嚴李元度原有兼人之才懇請酌量錄用左宗棠查奏亦稱原參各

節失實而咎由自取各等語是李元度功罪始末早在

聖明洞鑒之中臣等竊仰體

朝廷追念前勞愛惜人才之意有不能已於言者彼此緘商不謀而合用敢臚陳事蹟干瀆

聖聰李元度以湖南舉人集練起軍咸豐五年洎八年轉戰撫州建昌廣信一帶常以數千之勇當石達開楊輔清數十萬之衆軍無宿糧惟以忠義激勵士卒每戰則自策馬出陣礮子集於頰血濡袍袖危險不顧臣葆楨實親見之弋陽貴

溪廣豐玉山諸縣卒賴保全當是時江西糜爛
微元度力戰大局幾壞咸豐十年守徽之役賊
已逼門庭空無備禦元度倉猝入城受代甫數
日而陷非戰之罪也當經曾國藩奏參革職等
問臣鴻章實力爭之欽奉

文宗顯皇帝諭旨有李元度謀勇兼優挫衄可惜人才
難得之語遠近聞之莫不感涕嗣帶勇援勦湖
北江西尋擢授浙江臬司時江浙徧地賊氛元
度以偏師走數百里追勦乃飾報勝仗而不能
救杭州之失既再被劾率請裁撤所部索領欠

餉又失之急迫種種獲咎誠如部議所云罪有
應得臣等亦無庸代為申辯惟李元度少孤其
母守節數十年撫此一子年近七旬家無次丁
元度今蒙重譴方將遠離菽水之養託付伊誰
桑榆之景旦夕莫保計荷戈赴戍之日即倚閭
永訣之時懸想此情實堪矜憫臣葆楨前在廣
信府任內圍城岌岌賴元度倚角救護共事數
年見其能耐艱苦忠勇奮發遂聯為姻親矢同
心力以報

國家非為私也臣鴻章曾在曾國藩軍中知元度

頗深嘗謂其血性足以幹事而知人則不甚明
其才識足以謀事而帶勇則非所長當咸豐三
四年間曾國藩在湖南練勇造船百凡草創人
多視為難事惟元度獨信從之厥後進勦江鄂
軍情之利鈍不一局外之謗議多端人或視為
畏途惟元度常左右之一時名將如塔齊布羅
澤南李續賓楊岳斌等皆與元度深相交契臣
玉麟臣超與共患難十餘年而不料其數奇若
此也近世提振東南全局首推曾國藩與前湖
北撫臣胡林翼查咸豐八年二月間胡林翼特

疏奏調李元度赴浙防勦稱其素性忠義才足
任事十年五月薦舉人才疏中又稱李元度血
誠果毅志節清嚴其同列刻章如左宗棠劉蓉
暨臣葆楨等均蒙

特旨擢用若元度果無足取胡林翼亦豈肯再三密
陳春秋傳曰善善從長惡惡從短書曰罪疑惟
輕功疑惟重臣等各以所知證諸公論竊謂李
元度後此雖有可議之罪前此究有不可掩之
功且係節母孤子在平民例得留養况其曾為
國家出力之人夫通下情宣上德人臣之職也以

人事君之義臣等雖至愚陋不敢忘也拘嫌疑
之小節置是非之大公或竊竊歎息相顧而不
發一言又臣等所不敢出也伏思

聖朝微勞必錄

孝治方隆上年道員王沐因案發遣迨江西肅清臣
葆楨陳其前功並以母喪未葬據實籲懇遂荷
恩施免其遣戍今李元度前功多於王沐而有母年
衰情同一例仰惟

錫類之仁必在矜全之列所有已革浙江臬司李元
度可否懇乞

天恩免其發遣之處出自

高厚鴻施如蒙

俞允該革員應繳臺費銀兩即由臣等公同捐廉代
繳合並陳明謹會同兵部侍郎署漕運總督臣
彭玉麟浙江提督臣鮑超合詞恭摺具陳伏乞

皇太后

皇上聖鑒訓示謹

奏

各軍分援淮徐摺 同治四年四月初四日

奏為遵奉

諭旨飭催各軍分往淮徐援剿恭摺覆陳仰祈

聖鑒事竊臣承准軍機大臣字寄三月二十四二十

六等日奉

上諭迅飭張樹珊吳毓芬馳赴邳宿防守其劉銘傳

一軍飭由蕭碭一路前進等因欽此查道員吳毓

芬所部四營派赴揚州接防業於三月二十二

日附片陳明在案先是漕臣吳棠來咨商調吳

毓芬赴浦策應臣以揚州重鎮關係緊要吳毓

募兵力本單未可遠離因檄令現守鎮江之廣
西右江鎮總兵張樹珊統帶樹字六營護軍一
營洋鎗隊馳赴清江相機堵剿據報已於四月
初二日自鎮城拔隊渡江又准督臣曾國藩咨
商添派遇缺提奏臬司張樹聲前往淮徐查張
樹聲係張樹珊之胞兄久歷戎行謀勇兼優今
年正月經臣調蘇總理營務釐局藉資歷練督
臣商調該員赴徐督勦冀於軍務地方均有裨
益臣即飭令該臬司於三月二十九日起程北
去連准吳棠咨函檢逆大股竄至邳州沐陽境

內清江萬分喫緊臣又嚴催張樹聲張樹珊等督隊兼程計日內必可抵浦淮揚鎮總兵歐陽利見帶所部礮船四十號計亦早抵清江得此水陸兩軍合之淮徐原防兵勇分布扼勦裏下河門戶當可保固該逆不得逞於海沫恐將由徐邳回竄蒙亮准曾國藩咨會已調直隸提督劉銘傳會同遇缺提奏提督周盛波等統率所部由六安前進臨淮徑赴徐宿一帶防勦臣又迭加咨催該提督等迅速拔營迎頭截堵惟臣部各隊所用外洋鎗礮軍火繁重異常迭經

奏明在案以之推鋒陷陣較可得力第轉運笨滯
又無馬隊可利遄行北路陸多於水捨逆騎多
於步流竄無定飄忽靡常誠恐各營為軍裝步
行所累或不能疾馳速追又甫經調勦捻匪地
勢賊情均未熟悉亦須慎重布置臣仍隨時諄
飭各統將合力兜勦勉赴事機並咨請督臣漕
臣就近調度所有遵

旨派撥各軍分往援勦各緣由繕摺由驛覆陳伏乞
皇太后

皇上聖鑒訓示謹 奏

酌度軍情無庸出省督勦摺

同日 治四年四月十

奏為酌度南北軍情暫無庸出省督勦恭摺覆陳

仰祈

聖鑒事竊臣飭催劉銘傳張樹聲各軍馳往淮徐援
勦並郭松林楊鼎勳兩軍先後起程航海援閩
各情業於三月初四四月初四等日專摺馳報
在案嗣據張樹聲張樹珊等稟稱已於初六日
統帶樹字等七營行抵清江適捻股回竄邳州
沐陽境內清淮空虛該軍暫紮河北鎮定人心
並准漕臣吳棠函稱邳宿運河已經各水師布

扼清淮原防陸軍已悉數派赴宿北堵剿應令
張樹聲等暫行扼防裏下河門戶俟劉銘傳等
大隊到齊即可相機並進合力兜擊又據宿遷
縣知縣吳元漢探稟初九日捻逆回竄經官軍
擊敗遂向山東郟城馬頭集西北一帶逃竄等
語恭讀迭次

寄諭以揚防已撤清淮兵單恐裏下河完善之區或
有疏虞又奉四月初四日

寄諭該督撫應否出省前赴江北督勦之處著酌度
辦理迅速馳奏等因仰見

聖主屢念要區指示機宜曷勝欽悚如果捻蹤逼近
清淮吳棠獨力難支臣等先其所急自應帶隊
出省會同督勦惟從前捻逆竄海州時吳棠已
商調水陸各營分布扼守嗣回竄邳沐界內距
清淮將近二百里黃翼升暨歐陽利見等水師
與張樹聲等陸軍先後趕到劉銘傳於初六七
等日周盛波於十二日自六安分起拔營亦剋
期可至聲援已壯賊踪愈遠裏下河斷可無虞
即淮徐各郡必可保守臣身任地方籌兵籌餉
兼辦洋務百緒紛煩未便遠離惟隨時會商督

臣漕臣妥為調度並飛催劉銘傳周盛波張樹
珊等相機前進會合兜勦以期顧全大局仰慰
聖廑至福建陸路提督郭松林統帶所部由上海乘
坐輪船於三月初四五等日抵廈門登岸十三
日進紮漳州城外鎮南一帶十六日會同閩軍
擊敗大股援賊於赤嶺擒斬約二千餘人記名
提督楊鼎勳亦督所部於三月十五十七等日
抵廈即由海澄進漳州南路聯絡協勦惟聞漳
城賊守甚堅人數甚衆又有洋匪接濟軍火雖
經盤獲數案但沿海廳縣多被賊踞尚未能一

律禁絕李世賢汪海洋皆著名悍逆負固巢穴
難遽即下即使漳州攻克恐將由粵界出竄江
楚邊境固須嚴備蘇浙後路仍當豫防臣所派
援閩各軍隨時由海道酌濟餉項軍火南北軍
情似應兼籌並顧所有酌度情形暫無庸出省
督勦各緣由繕摺由驛馳陳伏乞

皇太后

皇上聖鑒訓示謹

奏

--	--	--	--	--	--	--	--	--	--	--

11

11

密陳勦擒事宜片 同治四年五月初六日

再密陳者僧格林沁督師數載屢次勦滅大股賊匪實為

京畿屏蔽北路保障今變生意外賊勢復張念

國家之多難痛老成之彫喪臣聞信之餘憂惶無措初以為擒逆晝夜急馳避兵亂竄勢已窮蹙有僧格林沁追勦可期旦夕撲滅曾國藩與臣專防江皖協勦閩賊但使沿江沿海水陸通行之處自度兵力尚可制之臣軍由江南勦賊入手本宜水而不宜陸嗣因西洋火器精利倍於

中國自同治二年以後分令各營雇覓洋人教練使用炸礮洋鎗之法傳習日久頗窺奧妙故派往南路戰守稍有把握而各營軍火輜重視他軍尤為煩多普國藩所立楚軍營制每營五百人僅用抬鎗小鎗一百二十餘桿臣軍每營則用洋鎗四百餘少亦三百餘桿洋藥銅帽每開一仗則須數萬觔其開花礮隊礮具之笨重藥彈之繁冗每出一仗則須數十巨艦裝運此非他人所能深知他省所能接濟者也楚軍營規無論調援何處事勢緩急仍守古法日行三

四十里半日行路半日築營糧藥隨帶到處可
以立脚勞逸飢飽之間將領節養其氣力體卹
其艱苦是以用兵十餘年卒能成功為其能自
立於不敗之地致人而不致於人臣軍陸戰亦
用此法此又非他省將帥所能仿行非他軍但
圖野戰不肯紮營者所能合一者也往見僧格
林沁統帶馬步隊窮年累月逐賊而行到處掠
食不於險要形勢及賊匪歸路竄路布置扼紮
以逸待勞竊疑其用兵別有師法又慮疲憊日
久將有大挫而未敢越俎建言伏讀迭次

寄諭飭該親王持重養銳冀其或稍省悟不謂竟以
此一蹶弗振然其忠勇勤勞實非諸臣所及臣
等能毋深痛曾國藩威望忠略特出冠時仰見
聖明倚任得人惟以儒臣帶兵向未騎馬督戰又自
金陵克復東南漸就肅清所部兵將陸續裁撤
惟鮑超一軍最為得力近又潰變嘗與臣言精
力積憊願求退息臣方極力勸阻外省調兵各
事臣方竭力相助目下事機緊急關係重大尚
未接准來函想必仰體

聖慮剋期就道惟江西鮑超潰勇無人收拾滋蔓可

虞漳州雖已克復據郭松林楊鼎勳函稱賊必由廣東邊界上竄江西是皖南蘇常防備益須嚴密臣軍分防蘇境三萬餘人內水師居多不能遠調陸師僅侍講學士劉秉璋十營常鎮道潘鼎新十營總兵王永勝劉士奇等十七營尚屬大枝勁旅若南路有警即須分投堵剿曾國藩若再商調似亦不能多派致海疆餉源重地或有疏虞昨已緘商曾國藩現在劉銘傳已抵徐州張樹聲周盛波已抵宿遷該三軍共一萬七千餘人合之可當一面請該大臣酌留調遣

卷二
七十一
屢奉

寄諭嚴催劉銘傳繞赴直隸自應先其所急護衛畿疆前接該提督來函云由六安僱程二十餘日始抵徐防該軍全係步隊拔行笨滯軍裝尚多落後即繞道赴直行走需時軍火糧餉各省未能接濟冒暑遠役士卒必多病憊若令飢疲逐賊轉恐損銳且曾國藩既奉

命北征兵將素習正可藉資驅策臣竊料黃河寬深溜急該地方官但將渡船收提沿河北岸分責兵練扼守多置疑兵該逆斷難飛渡更請

特旨嚴飭該督撫於賊到地方督令郡縣各守城垣
紳民各守圩寨萬一偷渡北竄當不遽擾亂大
局曾國藩督兵繼進先聲奪人諒可驅賊他走
至目今欲圖制捻之策臣愚以為非令直東皖
豫各省居民堅壁清野官督民團去邪扶正認
真辦理則賊得就地覓食擄人增黨為患竟無
底止非令各省整練步隊勁旅扼要紮營伺近
邊擊則賊得任意去來徵調徒增疲乏無裨實
用非令各將帥多練馬隊則無力兜追勦辦殊
難痛快東三省騎兵尤宜趕緊添練以備北方

明末流寇嘉慶年間川楚教匪正與此股捻逆情形相似辦法亦須參倣曾國藩與臣部各軍於北省地勢未熟賊情亦異又無馬隊可利馳逐當徐籌變通之方斷不能如僧格林沁之神速各省會勦責成督撫須擇真正知兵者同心合力以期有濟近來練兵調將往往似是而非軍情隔膜應請

皇上於久在軍營帶勇著有成效文員中慎選擢用假以便宜不責速效而求遠畧不驚虛談而考實濟庶緩急可恃而殘寇可漸滅矣臣因事勢

危迫冒昧直陳未知有當萬一否伏乞

聖鑒裁擇施行謹附片密

奏

署理總督籌辦大概情形摺同治四年五月初六日
奏為欽奉

諭旨恭謝

天恩並籌辦大概情形恭摺奏祈

聖鑒事竊臣於五月初四日承准軍機大臣字寄四
月二十九日奉

上諭曾國藩著即攜帶欽差大臣關防統領所部各
軍星夜出省前赴山東督勦兩江總督已有旨令
李鴻章暫行署理即著前赴金陵接印任事兩江
任大責重李鴻章務須悉心經理仍隨時與曾國

潘安商曾國潘軍營調兵集餉各事宜該撫並當
妥為籌畫不得稍有遲誤等因欽此當即恭設

香案望

闕叩頭祇謝

天恩伏念臣吳疆承乏三載於茲雖思竭慮以効忠
竊愧過多而功少仰荷

酬庸曠典

異數迭加兄弟同列封圻將佐多膺專閫每念寇氛
未靖時勢多艱輒互相儆戒懼有隕越致負

聖主倚畀之隆茲復

特降恩綸暫權督篆聞

命震悚日夜旁皇竊以臣籍隸安徽該省係總督兼
轄例須迴避又兩江政務殷繁所屬蹂躪已久
彫瘵萬分善後各事兵餉二端在在棘手誠如
聖諭任大責重微臣才智短絀非所克勝揣分量力必
應籲辭固請惟親王僧格林沁勦賊陣亡捻氛
日熾直東一帶失此長城中外震驚

宵旰憂勞急盼曾國藩前往督師需人接替臣何敢
拘泥常例引嫌避位致誤事機擬即料理交卸
馳赴金陵暫行接印此間善後如濬河興學撫

卹勸農及常鎮招墾荒田上海通商洋務均次第辦有端緒藩司劉卹膏接護撫篆情形熟悉地方一切可無貽誤惟蘇境水陸防軍三萬餘人均已分布各隘又援勦福建之提督郭松林楊鼎勳兩軍共八千餘人援勦徐州淮揚之提督黃翼升劉銘傳周盛波臬司張樹聲道員吳毓芬等軍共二萬數千人除黃翼升李朝斌兩枝水師係曾國藩舊部餘皆由臣募練而成各軍餉糧軍火專指蘇滬稅釐歷經奏明在案統計每月餉需及製造采辦各項雜支額款將近

五十萬而蘇滬稅釐及藩庫地丁牽算月入不足三十萬挪東掩西儘力湊濟雖前敵各營時時匱乏呼號徒以恩義相維尚不至於譁潰臣獨心憂之是以迭次奉撥京餉義不敢辭甘餉迄難定數每月能解一萬已為勉力臣非忍恣置西陲實迫於不容已也臣暫署督篆距蘇較近所有調度兵將籌畫餉需自當引為己責隨時會商曾國藩照章悉心經理以期仰副宸廑至通商篆務係臣兼辦現未奉

明諭臣謹暫帶通商

欽差大臣關防前往隨事飭令江海關道丁日昌等
妥為辦理仍請

旨定奪除俟交卸起程續行馳報外所有接奉

諭旨恭謝

天恩並籌辦大概情形理合繕摺由驛具陳伏乞

皇太后

皇上聖鑒訓示謹

奏

派兵航海赴津摺 同治四年五月初九日

奏為遵

旨酌派兵將由滬航海赴天津登岸南趨東省藉固
畿疆門戶並籌辦大畧情形恭摺覆陳仰祈

聖鑒事竊臣欽奉

諭旨暫署兩江督篆業於初六日繕摺馳陳旋又接

奉五月初一日

寄諭德州一帶與河間接壤距京甚近尤恐蓄意北
趨震及畿輔是江南援軍遲到一日則逆焰鳩張
日甚一日後患將不可勝言李鴻章務當於所部

各軍內商撥勁旅數枝速派得力鎮將統帶由上海乘坐輪船北駛或由膠州登岸西趨濟南或由天津登岸由景德地方南趨東省均著李鴻章酌量迅速辦理等因欽此仰見

聖主審幾防患綢繆至周臣渥受

重恩瞻戀

關廷誠恐逆眾銳意北趨畿疆稍有震驚則臣等罪戾滋大伏讀憂思寢饋俱廢頃准曾國藩來函以金陵所部湘勇早議全數遣散且南人北去難期得力擬即督帶淮勇劉銘傳周盛波張

樹珊各軍前往等語劉銘傳等均存徐境由東南向西北節節兜進藉以遮蔽淮徐兼顧糧道後路勢不能遽繞赴北續奉初三日

寄諭崇厚已起程取道景州前赴畿南又有劉長佑扼守大名一帶河岸似畿防漸臻嚴密惟慮兵力未厚若東南數道並進逼賊北趨則有防不勝防之勢臣所部各軍已大半出省援剿又須防閩賊回竄論事勢則緩急宜備實係不可再分論大義則輕重相形必當先顧北面躊躇再四豈能恣然查有布政使銜常鎮道潘鼎新順

天舉人原籍安徽自成豐七年在皖北帶勇隨營協勦十一年克復三河後經曾國藩札調募勇隨臣東下同治元年以來迭次克復浦東各廳縣及浙西嘉湖郡縣上年湖州報捷奉

特旨賞穿黃馬褂嗣委兼統上海英國教練勇該員器識沈毅勇畧兼優於洋人火器用法頗知究心所部鼎字淮勇十營洋鎗居多內有開花砲隊一營砲位器具皆臣陸續購自外洋為中土難得之物堪為海疆鎮守茲令由海道赴天津登岸進景州德州為畿輔一助聲勢江海關道

丁日昌適來蘇省臣與該道等面籌雇備輪船
及將來接濟軍火各事宜潘鼎新感激

國恩矢圖報効願即日整治行裝俟丁日昌將輪
船雇齊率隊迅往該軍到天津後在直隸境內
應由劉長佑酌量妥為調遣入山東境後應仍
由曾國藩調遣該軍鎗砲隊軍裝子藥最為繁
重不比他處陸營可以輕賫行走其所到之處
必須地方大吏派委妥員設法伺應陸路則多
備車輛水路則多備船隻源源轉運庶可按次
僱行應請

旨勅下直隸督臣先派大員在津迎護豫備剝船往
大沽接運再雇船由天津運河陸續裝運南下
其開花砲隊或留重大者在津坐鎮酌挑輕砲
隨隊行走由潘鼎新自行相機妥辦該軍初往
北路地勢未熟人數稍單似宜循運河左右穩
慎防勦與劉銘傳等互為援應則氣脈易貫運
道易通並請

豫飭山東撫臣於該軍入東後一體照料至該軍航
海遠役應由臣籌給行糧惟蘇省釐稅短絀出
境及在防各軍需餉甚鉅每月僅放半關迭經

奏明在案此次輪船雇價及五千入月餉立需八九萬兩竟無力措此鉅款查本年奉撥滬關京餉二十萬臣已奏定分季撥解所有春季五萬兩業經匯解其夏季五萬兩該道正擬報撥今潘鼎新一軍赴津實為

京畿根本起見事機緊要自應先其所急以公濟公仰懇

勅部准其暫行截用作為該軍北援餉需嗣後仍設法籌解十萬兩以符本年派數再臣軍向例按照各營人數另給食米柴薪油燭等項出境遠

勦勢難供支此次潘鼎新一軍援直應查照郭松林等軍援閩由閩支發成案無論在何省防勦即歸何省接支勿得推諉貽誤該軍入直後每月餉項並請

旨飭令直東督撫按月各撥銀一萬五千兩為數無多必應如期接濟無令缺乏其軍火一切要需他省未能措辦應由臣督令丁日昌隨時由滬籌撥搭海船運津交天津道轉解潘鼎新行營應用所有遵

旨酌派兵將航海赴津籌辦大畧情形恭摺由驛六

百里加緊馳陳伏乞

皇太后

皇上聖鑒訓示施行謹

奏

--	--	--	--	--	--	--	--	--	--	--

三十一

三十一

海關應撥北新贛州太平三關絲稅請免補解
片

再上海初設洋關時內地商人販運湖絲來滬
議令補納北新贛州太平三關稅課由江海關
代為征收除太平關稅數由該關核入額征

題報所收銀兩仍彙入江海關洋稅報解向不解
還外其北新贛州二關按月截數造冊撥還嗣
開辦新章准洋商領照自赴內地買絲完納半
稅因自咸豐十一年三月二十三日起無論中
外商人運來湖絲一律改完內地半稅免補三

關稅課經前撫臣薛煥具

奏准部議以太平等三關絲稅既歸入江海關征收應俟一年期滿將共完內地半稅若干報部照從前應征之數酌量比較撥補三關等因是雖有撥抵之虛額究不必有補解之實銀自成豐十年四月以後蘇省軍務愈緊餉需浩繁各該關道儘數湊放歷經

奏咨有案雖聲明俟軍務平定再行籌補但愈積愈多以數十萬之鉅款斷無彌補清理之日據江海關道丁日昌迭次詳請

奏懇免補前來臣查上海通商之始湖絲出口皆由內地商人轉運本應逢關納稅是以令其補納三關稅課今准洋商自赴內地買絲即由洋商逕運粵東亦祇照章完一半稅無逢關納稅之理是所謂三關絲稅名實顯屬不符部議仍於半稅項下比較撥補三關蓋恐該三關稅額驟減藉以抵補虧累耳然即以湖絲半稅而論每百觔只收銀五兩並無耗銀而按照向例撥補三關每湖絲百觔北新關應撥正銀八錢五分七釐六毫贛州關應撥正銀九錢一分九釐

一毫太平關應撥正銀一兩四錢三分二釐合
共應銀三兩二錢八釐七豪連加一耗銀併計
共應銀三兩五錢二分九釐五毫七絲除撥三
關外海關僅餘半稅銀一兩四錢七分四毫三
絲原定章程實已偏枯况上海洋稅向以絲茶
為大宗近來湖絲每由甯波出口不必盡來上
海茶葉自漢九開關凡楚西二省運出之茶均
由漢九兩關征收滬關雖有出口之茶竟無可
征之稅是以同治元年以前滬關月收至二三
十餘萬兩自漢九添關後每月至多不過十餘

萬除扣英法四成外僅存數萬今昔情形不同
稅額大減而本省軍需及指撥京協各餉紛至
沓來應接不暇更何能分餘力以補三關而北
新贛州等關且以稅額為詞或委員催提或撥
抵別項海關無可籌付徒費文移臣愚以為與
其日久宕懸轉滋輻輳曷若因時變通務求實
在合無仰懇

天恩俯准將江海關現征內地半稅項下應撥三關
絲稅自成豐十年四月以後一律免其補解歸
入蘇省軍需案內報銷並請嗣後悉照太平關

舊案由江海關將代徵三關銀數按年劃清分
另造冊移知各該關核入額徵數內

題報所入銀兩仍彙入江海關洋稅動放軍需俟
軍務告竣防軍全撤儘數報解以昭平允而免
延誤是否有當伏乞

聖鑒訓示謹附片具

奏

籌調洋鎗礮隊赴津兼籌製造片

同治四年五月十六日

再臣欽奉五月初七日

寄諭許彭壽潘祖蔭奏請飭江蘇巡撫解落地開花礮並揀諳悉製造火器之員由輪船北上一摺著即查明戈登所練洋鎗各隊尚有若干酌量派撥迅即由輪船赴津並將落地開花礮多為籌備一併由輪船帶來其帶隊洋人應否酌派數員隨同內地將弁管帶如今其前來必須妥籌章程核定餉項以免臨時藉口事後要挾等弊丁日昌能否令其北上如該員不能離滬即另派妥員帶領熟

諳製造火器之匠役數人趕緊前來一面籌畫調
派一面奏聞等因欽此臣先奉五月初一日

寄諭飭派得力鎮將統帶勁旅北援當即籌派常鎮
道潘鼎新統領所部淮勇十營內有開花礮隊
一營由滬航海赴津於五月初九日馳

奏在案此次許彭壽等請飭解開花礮與臣所籌
不謀而合並據崇厚奏請調派戈登舊隊仍可
邀同外國人幫同統領等語查從前中國將弁
於洋鎗開花礮未諳施放不得不用洋弁管帶
本屬一時權宜挾制要求既不能免牢籠駕馭

亦未易言總須主兵者兵力自強方能操縱由
我用彼而不為彼所制苟在我稍有把握即不
必假以重權江蘇之常勝軍原係外國人幫同
統領波瀾迭出糜費滋多且與洋人交涉各事
均受牽制嗣戈登去後所存洋鎗隊千人以余
在榜袁九皋兩副將分帶而統於潘鼎新其接
手之兵官哲貝只予以教練虛名俾約束各兵
頭不准干預營事故兩年以來巴夏禮雖局外
數數饒舌哲貝等尚恪守規條潘鼎新所部另
有開花礮隊一營上年攻拔晟舍湖州等處迭

著成效復逐漸添置礮具朝夕操練已臻純熟
該營向募有洋人隨營教習由該道節制調換
糧餉均有定章不致藉口要挾自無庸另派管
帶其余在榜所帶洋鎗隊五百餘人袁九皋所
帶三百餘人連餘丁計共一千餘名即係戈登
舊部駐紮青浦之鳳凰山巴夏禮以人數太少
屢請增添臣力持不允亦以潘鼎新全軍分駐
松江塘橋本有輪換教練之議今潘軍既經北
調該處僅存此營戈登巴夏禮原議以此專防
上海若再抽調不足以饜服外人之望臣飛飭

丁日昌體察情形一面預籌募補一面妥商巴夏禮等如何將余在榜一營交潘鼎新統帶北去兵力較厚余在榜同該營弁勇已熟悉洋人鎗礮火箭用法亦無須洋弁管帶前往致難銜束惟此項弁勇因牽涉洋人向須按月發餉不能絲毫拖欠若調令出省遠勦勢難由滬接濟臣前已將潘鼎新月餉請由直東分濟即邀俞允各該省未知能否照辦若再加以洋人所練鎗隊一營正恐撥款難靠必致誤事應請

豫飭總理各國事務衙門會同戶部逐細籌畫知照

遵辦此籌調戈登練存洋鎗礮隊之大畧也丁
日昌到滬年餘情形愈熟聲望日孚刻值臣軍
四出援勦各路糧餉子藥轉運接濟根本多在
滬上以及雇備潘鼎新赴津輪船籌補鳳凰山
教練勇額購辦外洋軍火在在關係緊要全賴
丁日昌督率籌辦方無貽誤萬不能離滬北上
其所設上海製造砲局向由該員經理潘鼎新
此行約攜帶大小開花砲子一萬餘顆蘇滬各
局存儲尚多仍可隨後運濟北路縱有大戰事
足供施放臣嘗與洋弁討論火器稔知巨砲攻

城刦營最利而用子最多至平原曠野行陣自
隨止須十二磅及九磅六磅長砲及田雞砲較
為輕靈又苦不能及遠以之驚亂賊騎虛張聲
威自可制勝惟陸路轉運費力究不若水路之
進退自如則用子亦必不能多臣仍飭潘鼎新
到直東後察酌情形稟商崇厚等如應設局製
造即妥議章程再由臣飭商丁日昌酌派該局
熟練之員帶領匠役器具由輪船赴津開局鑄
造炸彈以資應用容俟籌商定議再行覆
奏此遵籌製造火器人員擬赴天津設局之大畧

也頃據丁日昌稟稱天津輪船雇價比前赴廈門較貴匆遽之間洋商居奇恐未能定雇多隻臣仍督催籌辦俟稍就緒即於本月二十日由江路駛赴金陵除交卸撫篆接署督篆日期分別恭疏

題報潘鼎新起程有期再速馳奏外所有遵旨籌派先行覆陳各緣由伏乞

聖鑒訓示謹附片具

奏

覆奏殷兆鏞等條陳江蘇釐捐摺

同治四年六月初一日

奏為欽奉

諭旨據實覆陳仰祈

聖鑒事竊臣承准軍機大臣字寄同治四年五月十

九日奉

上諭有人奏功臣宜知警戒請嚴加訓迪俾得保全等語據稱江蘇巡撫李鴻章戰功雖著而子惠未孚百姓之流離者未盡收恤地畝之荒蕪者未盡開墾不聞德政惟聞厚斂並以侍郎殷兆鏞前疏極言江蘇橫徵暴斂之害皆指李鴻章而言等語

李鴻章自簡任江蘇巡撫以來疊克城池肅清全省厥功不為不大惟以該省事同創始委用之人較多則流品易雜籌餉之途稍廣則民怨易滋今軍務未竣待用孔亟抽釐之局自不能全行裁撤若如該侍郎所奏各捐未免太形瑣屑至官親幕友游客劣紳爭充委員擅用令箭旗牌等事紳董稍假事權擅作威福恐亦事所難免著李鴻章將不肖委員嚴加裁汰釐卡仍以歸併為主俟軍務肅清再行次第裁撤另片奏江蘇各項捐款加以各項田捐歲可收銀四千萬兩等語江蘇捐款雖

繁亦斷不能如所奏之多究竟可得若干如何開
支著李鴻章造冊報部核銷該撫受委任之重惟
當體朝廷痾瘵在抱之念與民休息以期日臻上
理以上各情有則改之無則加勉以無負諄諄詰
誡之意原摺片並殷兆鏞摺均著抄給閱看將此
諭令知之欽此伏讀再四既感我

皇上優容之厚

訓誨之殷又愧臣忝任疆吏以軍需為急不能要結
紳士致招物議又自恨不守儒生愚拙之分謬
附戰功叨竊太過盈滿致災惟既帶兵不得不

卷二
籌餉既籌餉不得不任怨殷兆鏞至以恃功朕
民相譏或又以歲收四千萬聳聽未免意存傾
陷若非

聖主明鑒萬里洞燭隱微則當局為難之苦衷無以
自明後此辦事之掣肘固知所措中夜以思駭
汗戰懼曷能自己但近年以來廷臣奏請停減
釐捐者不止一人不止一次而外省未有一處
停減豈督撫大吏皆不肖皆恃功耶亦事關大
局有所不容已也臣早欲覆陳去冬准廣東督
撫咨抄會奏抽釐助餉熟籌利弊一摺於本未

源流言之最為切盡而未聞

明詔如何指示茲奉

旨以軍務未竣待用孔亟釐局不能全裁是

聖明實已鑒及凡毛鴻賓等已陳各節臣固毋庸再

瀆姑就江蘇情形論之向稱財賦最盛以地丁

漕糧鹽課關稅四者為大宗自咸豐三年賊陷

金陵江南北大軍雲集分兩台供支蘇甯兩藩

司進款各顧一面不相通融和春張國樑統兵

七八萬人月餉五十萬上海稅捐及蘇藩司

丁糧正款已足敷用尚不借釐金之力而其時

紳士把持議論紛繁當事亦未能認真興辦自
蘇常迭陷僅存上海一隅藩庫丁漕絲毫無收
薛煥招集兵勇四萬餘人僅資滬關稅項幸漢
口九江尚未開關洋稅月收三十餘萬仍不足
用乃擴充釐局以增益之臣於同治元年四月
接署撫篆隨帶水陸各營僅及萬人將薛煥舊
部裁汰簡練合之華爾常勝軍亦不過四萬人
以入抵出欠缺無幾旋值漢九開關滬稅遞減
僅足養洋兵及分濟鎮江一軍而臣軍攻勦日
急添募愈多至二年夏間水陸已增至七萬餘

人餉無所措不得不專恃釐捐乃將滬釐大加整頓並仿照上游楚軍辦法克復一處即酌添卡局以濟軍需商民僉謂官兵能殺賊救民無不踴躍樂輸創鉅痛深之餘方有好義輕財之舉蘇松被擾較輕生意尤旺故捐卡稍密常鎮蹂躪最苦至三年四月克復常州後不再添釐局臣固斟酌行之非敢壹意操切此蘇省抽釐助餉之原委也凡有卡局處所臣均親歷查勘於河湖扼要立總卡收捐於港汊紛歧立巡卡照票以杜繞漏一徵一驗相隔或五七十里實

無十里五里設卡重征之事照上海定章每千
錢取三十四十不等實無十錢抽三之事由浙
滬至蘇或捐兩次或捐三次按成本之輕重貨
色之高下刊章共守亦無綢緞須捐八九次木
料須捐五六次之事殷兆鏞摺內所稱茶棚桌
子賭場桌子點心剃頭擔糞擔日捐數千文至
數十文並有妓女捐名色蘇省捐目雖多本由
商賈繁盛貨物輻輳因地制宜亦何至有此等
荒唐之事造謠誣蔑駭人聽聞不知其意何居
至所稱官親幕友游客劣紳爭充委員董事擅

用令箭旗牌等事前湖北撫臣胡林翼嘗言辦理釐捐須依唐臣劉晏之法引用士人不使胥吏經手則弊端較少是以湖南北釐捐分濟本省及各省征勦之餉為日最長而功效最著由於擇人而用不專令候補人員及地方州縣經辦臣初仿而行之無論本籍外籍但求廉勤不苟者延請入局官親幕友實未充當此差游客紳士亦必審慎擇取迨全省肅清或謂候補人員必須兼用於外省員紳漸去漸少臣督同總局司道明察暗訪一有弊竇立予叅撤數年

來奏參咨革之案曾見迭出未敢稍事姑容至
今箭係行軍所用未聞用之釐卡旗牌告示以
曉諭商賈砲船弁勇以保護行旅亦無擅作威
福之事此蘇省釐卡辦法之大畧也至有人另
片奏江蘇各項捐款加以各縣田捐歲可收銀
四千萬兩等語奉

旨江蘇捐款雖繁亦斷不能如所奏之多究竟可得
若干如何開支著造冊報部核銷仰蒙

聖慈洞鑒曷勝欽感查我

朝定鼎之初每年直省所入丁漕僅一千數百萬

自乾隆六十年海內殷富鹽務關稅迭加整頓
戶部所入每年多至四千餘萬嘉慶道光以後
入不敷出至咸豐間每年例入之數十不及三
四矣茲乃謂蘇省偏隅凋敝之餘能籌出乾隆
盛時各省所入四千萬之巨款非獨不識時務
且似不通掌故其正摺責人以學道不知彼之
所學何道也查蘇省出入各款緣奉上年七月
初十日

上諭各處辦理軍務未經報銷之案准將收支款目
總數分起開列清單奏明存案免其造冊報銷

臣即欽遵辦理業於本年二月十七日將蘇滬軍需第一案收支款目開單具奏茲又將第二案收支各款另摺陳奏均係實收實放毫無捏飾綜計先後單開如釐捐一項自元年四月至二年六月止共收銀三百四十九萬餘兩又另單自元年十月至三年六月止共收銀八十八萬七千餘兩又自二年七月至三年六月止共收銀二百六萬二千餘兩此其已報達部者計兩年有零共收釐捐銀六百四十餘萬數目不為不鉅江楚各省釐金每年各不過百數十萬

茲於蘇松二百餘里內歲收釐捐將三百萬辦
事不為不力自蘇杭金陵克復東南腹地肅清
商賈四散不盡聚於上海亦不盡走蘇境釐金
日以減色目今衰旺牽算月不過二十萬若如
殷兆鏞所奏非惟不減反從而日增月益果有
增益何至收數轉絀耶至如何開支其三年六
月以前經臣分案逐款臚列固可一目瞭然嗣
後當遵

旨報部彙銷獨念去秋以來金陵及各路兵勇陸續
遣散臣軍將士亦未嘗不久役思歸蘇省紳商

更莫不翼撤兵裁卡臣若乘機盡撤所部慰軍士凱旋之樂邀流俗免捐之譽而臣得解兵柄進退綽然未始非計之得者徒以餘氛未淨

厚恩未報一旦有警無以應

君父之急遠巡未決乃至今年奉

旨調蘇軍援閩三月奉

旨調蘇軍援淮徐五月奉

旨調蘇軍援直東事變迭生強起立應計郭松林楊

鼎勳八千餘人潘鼎新五千五百人皆雇用輪

船航海遠征船價行糧軍裝各項格外驟費至

三十萬兩而劉銘傳周盛波各軍一萬四千人
轉戰皖北山東糧餉轉運弗絕於路其分防蘇
境及金陵揚州徐州內外江海淮河各處水陸
各營又將近四萬人饋餉不繼則譁譟堪虞軍
數不減於在蘇攻勦之時而費用轉倍於尋常
有事之時徒恃釐捐養戰士出款增而卡局未
增商民尚不甚怨殷兆鏞以蘇屬巨紳為貴近
之臣不以

國家大局為念乃倡為浮議肆口詆誣上以眩惑
朝廷之聽下以鼓動愚民之氣遠近傳播使有藉

口以遂其背公貌法之私臣固不能不寒心以
後官斯土者更無所措手矣既荷

聖明垂鑒臣當引疚自責隨時督飭甄汰委員酌量
歸併卡局仍籌顧各路緊要餉需仰副我

皇上諄諄誥誡之意至所稱百姓流離未盡收恤地
畝荒蕪未盡開墾此臣日夜疚心長太息者竊
惟撫吳三年到處捐賑施粥施寒衣織具歲不
下數十萬緡存活尚衆常鎮荒田太多今春遴
委員紳知府高梯簡用道府陳鼎等前往設局
招墾由蘇籌發穀種六萬石捐款六萬串農具

十數萬約計十縣中官墾民墾之田新添者百餘萬畝雨澤應時欣欣有生意江皖毗連災區且有聞而慕者臣實自愧惠政之未周仁心之未盡也抑臣更有請者臣由海上用兵兼辦通商洋務稔知西洋各國兵餉足器械精專以富強取勝而中國虛弱至此士大夫習為章句帖括輒囂囂然以經術自鳴攻訐相尚於尊主庇民一切實政漠不深究誤訾理財之道為腴利妄擬治兵之人皆怙勢顛倒是非混淆名實論事則務從苛刻任事則競趨巧偽一有警變張

皇失措俗儒之流弊人才之敗壞因之此最可
憂我

皇上冲齡踐阼秉承

兩宮

皇太后聖訓攘除寇亂中興盛業必可馴致惟於用人
聽言二端推求實濟堅持定見務為遠大之謀
深維富強之術消內患杜外萌蔑不由是臣雖
情愚無識幼讀父書早躡科第咸豐三年蒙
文宗顯皇帝派往軍營迄今十有三年飽歷艱難出入
生死身家度外榮利泊然乃蒙

聖朝委任之隆

宵旰望治之切忍辱負重不敢自避嫌怨恆兢兢焉
以軍實未充民生未安為懼要其設施無非為
公家籌畫絕無一毫自私自利諒亦可以共見
共聞現捻患方亟曾國藩督師在外後路籌餉
籌兵關係至要臣何忍別有希冀一俟捻賊蕩
平撤軍歸農屆時有以謝中外之責望庶無負
聖主始終保全之恩所有感激愧悚下忱據實披瀝
覆陳伏乞

皇太后

皇上聖鑒謹

奏

I

置辦外國鐵廠機器摺 同治四年八月初一日
奏為置辦外國鐵廠機器併局製造並飭奉派京
營弁兵分起到廠學習恭摺具陳仰祈

聖鑒事竊自同治元年臣軍到滬以來隨時購買外
洋鎗砲設局鑄造開花砲彈以資攻勦甚為得
力上年春間蒙總理各國事務衙門函詢學製
各種火器成效何如當即詳細具覆以短炸砲
與各種炸彈均能製造其長炸砲及洋火藥非
得外國全副機器不能如法試造現亦設法購
求以期一體學製至於各項運用之妙與洋人

之貴重此器暨日本視中國之強弱以為向背
各情形亦推闡陳明經總理衙門抄函恭呈

御覽並以臣函中所言慮患防微與該衙門所籌適
相符合宜趁南省軍威大振洋人樂於見長之
時將外洋各種機器實力講求期得盡窺其中
之祕有事可以禦侮無事可以示威等語於同

治三年四月二十八日奏蒙

諭旨飭由火器營派撥護軍叅領薩勒哈春等官兵
四十八員名到蘇經臣酌派在丁日昌韓殿甲
及洋人馬格里等三局分學製造專摺覆

奏在案查製造船砲軍火各種機器有通用者其
專用者若買製齊全須數十萬金雇覓中外匠
工採購外洋銅鐵木炭等料亦需費不貲臣處
所設西洋砲局其機器僅值萬餘金不全之器
甚多只可量力陸續添購以求進益前由曾國
藩派人赴英美各國探訪該處船廠機器實價
臣並議及此物若託洋商回國代購路遠價重
既無把握若請派弁兵徑赴外國機器廠講求
學習其功效遲速與利弊輕重尤非一言可決
不若於就近海口訪有洋人出售鐵廠機器確

實查驗議價定買可以立時興造進退之權既
得自操尺寸之功均獲實濟擬飭海關道丁日
昌在滬訪購如製器之器已可購得若干仍應
添補若干或宜另擇妥口試辦容通盤籌議略
有端倪方可入

告以上各情均經節次函陳總理衙門一面飭訪購
辦此臣處前此議辦鐵廠機器之原委也又去
年十二月初九日欽奉

寄諭昨據御史陳廷經奏綠營水師廢弛請飭整頓
營伍製造軍火一摺著曾國藩李鴻章會同商酌

奏明辦理原摺著抄給閱看等因欽此遵查原奏
所議軍火一節大意以夷情叵測恃有戰艦機
器之精利逞其貪縱然彼機巧之器非不可以
購求學習以成中國之長技請於廣東等處海
口設局行取西洋工匠製造船砲以期有備無
患等語雖語焉不詳未得要領而大致與總理
衙門暨臣所籌議不謀而合曾國藩平時亦持
此論自應遵

旨商酌辦理茲據丁日昌稟稱上海虹口地方有洋
人機器鐵廠一座能修造大小輪船及開花砲

洋鎗各件實為洋淫濱外國廠中機器之最大者前曾問價該洋商索值在十萬洋以外是以未經議妥茲有海關通事唐國華歷游外國多年熟習洋匠本年因案革究贖罪情急與同案已革之扞手張燦秦吉等願共集資四萬兩購成此座鐵廠以贖前愆廠內一切機器俱精所有匠日照舊發價任憑遷移調度其餘廠中必需之物如銅鐵本料等件另值銀二萬兩由該關道籌借款項給發採買以資興造先行請示前來當查唐國華一案既情有可原報效軍需

贖罪亦有成案可援此項外國鐵廠機器覓購甚難機會尤不可失批飭速行定議稟候分別具

奏並飭該廠一經收買即改為江南製造總局正名辨物以絕洋人覬覦其丁日昌及韓殿甲舊有兩局即歸併總局一切事宜責成該關道丁日昌督察籌畫會同總兵韓殿甲暨素習算造之分發補用同知馮煥光候選知縣王德均熟諳洋軍火之候選直隸州知州沈保靖一同到局經理所有出入用款收發器具稽查工匠分

派委員數人各司其事分飭遵照去後旋據丁日昌等查造該廠機器物料件數清冊擬具開辦章程約有數端一核計局用房租薪水及中外匠工等有定之款月需銀四千五六百兩其添購物料多寡不能預定大約每月總在一萬兩以外一查原廠所用之洋匠計留八人其匠目科而一名技藝甚屬精到所有輪船鎗砲機器俱能如法製造現擬於華匠中留心物色督令操習如有技藝與洋人等者即給以洋人工食再能精通則拔為匠目以示鼓勵一現造洋

鎗器具尚未全備已令匠目趕製全副約大小四十餘件數月可以成功如式仿製即省工力惟已製洋鎗則必需銅帽既得銅帽又必需洋藥皆係相因而至之物不容偏廢但聞製藥機器工料尤為繁重容再設法購求俾可推行盡利一查鐵廠向以修造大小輪船為長技此事體大物博毫釐千里未易絜長較短目前尚未輕議興辦如有餘力試造一二以考驗工匠之技藝其鑄錢織皮挖河犁田諸器雖可仿製但其法式同中有異觸類引伸尚須考究尤當權

其輕重緩急庶不致凌躐無序一前奉議飭以
天津拱衛

京畿宜就廠中機器仿造一分以備運津俾京營
員弁就近學習以固根本現擬督飭匠目隨時
仿製一面由外購求添補但器物繁重非窮年
累月不能成就尚須寬以時日庶免潦草塞責
一查本廠現在虹口每年房租價銀六七千兩
實為過費兼之洋涇濱習俗繁華游藝者易於
失志廠中工匠繁多時有與洋人口角生事均
不相宜應請擇地移局其他所議如機器宜擇

人指授工匠不令隨意去留費用宜實報實銷
賞罰宜明定章程以上各條均屬切實臣查此
項鐵廠所有係製造之器無論何種機器逐漸
依法仿造即用以製造何種之物生生不窮事
事可通目前未能兼及仍以鑄造鎗砲藉充軍
用為主月需經費容臣隨時於軍需項下通融
籌撥如將來各種軍器仿造洋式造成取攜甚
便即可省購買洋軍火之費上海虹口地方設
局於久遠之計殊不相宜稍緩當籌款另建房
屋移至金陵沿江偏遠處所以便就近督察曾

國藩采辦西洋機器俟到滬後應歸併臣處指
置至前次派在丁日昌韓殿甲兩局之護軍校
達隴阿等四員京營兵二十名已飭入廠學習
其儘先叅領薩勒哈春副叅領崇喜等所帶弁
兵本在蘇州西洋砲局該局機器與上海鐵廠
亦自同源仍可互相觀摩惟此事形下不離形
上與規矩不能與巧將來各弁兵所得之淺深
恐難以一例繩也機器製造一事為今日禦侮
之資自強之本總理衙門原奏言之甚詳已在
聖明洞鑒之中抑臣尤有所陳者洋機器於耕織刷

印陶埴諸器皆能製造有裨民生日用原不專為軍火而設妙在借水火之力以省人物之勞費仍不外乎機括之牽引輪齒之相推相壓一動而全體俱動其形象固顯然可見其理與法亦確然可解惟其先華洋隔絕雖中土機巧之士莫由鑿空而談逮其久風氣漸開凡人心智慧之同且將自發其覆臣料數十年後中國富農大賈必有仿照洋機器製作以自求利益者官法無從為之區處不過銅錢火器之類仍照向例設禁其善造鎗砲在官人役當隨時設法

羈縻耳天下至奇至異之事究必本於平常之
理如或不然則推之必不能遠行之必不能久
陳廷經原奏以中國修造鐘表推之於機器雖
有精粗大小之別可謂淡言微中中國文物制
度迥異外洋獠狂之俗所以郵治保邦固丕基
於勿壞者固自有在必謂轉危為安轉弱為強
之道全由於仿習機器臣亦不存此方隅之見
顧經國之畧有全體有偏端有本有末如病方
亟不得不治標非謂培補修養之方即在是也
如水大至不得不繕防非謂濬川澮經田疇之

策可不講也事無鉅細樂成固難而圖始尤不
易自來建一議興一利勞臣志士纏綿而經營
之及乎習之既久相安於無事或幾不察其所
自來而追溯創議之初於此中難易得失之數
幾經審慎曷敢鹵莽而一試哉臣於軍火機器
注意數年督飭丁日昌留心訪求又數月今辦
成此座鐵廠當盡其心力所能及者而為之日
省月試不決效於旦夕增高繼長尤有望於方
來庶幾取外人之長技以成中國之長技不致
見絀於相形斯可有備而無患此則臣區區愚

誠之所覲幸者也除唐國華贖罪一案另片附
奏並咨總理衙門外所有置辦外國鐵廠機器
併局製造並京營弁兵分廠學習緣由謹會同
協辦大學士兩江總督臣曾國藩恭摺由驛具

奏伏乞

皇太后

皇上聖鑒訓示謹

奏

覆陳奉

旨督軍河洛摺 同治四年十月初八日

奏為欽奉

諭旨恭摺覆陳仰祈

聖鑒事竊臣前奉九月初六日

寄諭令臣督帶楊鼎勳等軍馳赴河洛一帶防剿兼

顧山陝門戶飭與曾國藩等會商覆奏仰見

宵旰焦勞思患豫防之至意臣當即欽遵

諭旨函商曾國藩原擬俟兵餉大端籌有把握再行

縷晰復奏旋准曾國藩咨抄九月十九日覆陳

摺片內稱河洛現無可勦之賊淮勇亦無可調
之師李鴻章若果入洛豈肯撤東路布置已定
之兵挾以西行坐視山東江蘇之糜爛而不顧
等語似屬切中事情曾國藩因業經覆奏未另
與臣覆信臣再四籌思彼覆疏中已陳之言皆
臣所欲言而不敢遽言之隱大局所關臣未便
稍有立異但不知

批旨如何定見五中旁皇瞻前慮後仍有不能已於
言者綜其大要約有三端一兵勢難遠分也我
朝從前武功專恃兵力此次軍務全資勇力臣初至

軍營習聞周天爵琦善向榮和春諸臣之議論
皆謂旗綠弁兵馴謹而易調遣各省勇丁桀驁
而少紀律其不得已而用勇就地招募隨時遣
汰尚無甚流弊若遠調數千里外終必詳潰誤
事成豐初年廣西所募潮勇最多向榮張國樑
等帶赴江南沿途騷擾卒至十年三月金陵之
變一潰而遂不可收拾矣自曾國藩江忠源胡
林翼李續賓等創練楚勇不用一兵蓋深知綠
營廢弛已久習氣太深萬不足以殺敵致果而
以楚將練楚勇恩信素孚法制嚴密又由湖南

北轉戰江皖一水可通人地相宜是以歷久而能成功然李績宜唐訓方以楚勇勦淮北之捻劉長佑以楚勇勦直隸之騎馬賊均未大著功效則以離鄉太遠南北異宜勇性未能馴服何能得其死力曾國藩兄弟有鑒於此故於金陵克復東南軍事將竣即將所部湘勇全數遣撤但屬臣暫留淮勇以備中原勦捻自係因地制宜夫捻匪係皖豫東三省無賴糾合而成其隸皖籍者大都穎蒙亳宿人皆在淮北臣籍隸廬州實在淮南所部淮勇則廬州六安安慶揚州

人居多皆濱江之處於長江上下防勦最宜軍士戰於其鄉亦較得力其性情風氣與淮北迥殊同治元年臣初由安慶赴滬湘勇以去路太遠多不願從乃商之曾國藩就臣鄉里團練久戰之士選將來伍逐漸添募如程學啟劉銘傳潘鼎新張樹聲周盛波等始僅為營官帶數百人耳嗣因打仗可靠各增募至數千人今遂為淮勇最勁之六究之用於江淮南北千餘里內必可指揮如意若逐漸調於山東河南邊境尚能勉強相從若遽遠赴河洛山陝並預備勦除

京東馬賊甘肅回匪之用水土不習誠恐遷地弗良勇心渙散不獨素食穀米驟改麥麵一端為可慮也且

朝廷期望於臣欲以西北軍事相屬不過以臣在蘇粗立戰功而臣亦惟賴所部將士踴躍用命若令臣去平素慣用之健將勁兵不得隨行臣復何能為役曾國藩籌設徐州濟甯周家口等處防軍皆臣部最得力者臣若不調西行則聲勢不能大振若全調他往則東皖無以自立若另圖添募馬步而隨身先無親信可恃之兵勇必

致敗軍債事而無裨於全局此兵勢不能遽分之實情也一餉源難專恃也凡欲滅賊必先治兵欲強兵必先足餉欲籌餉必先得人與地臣自咸豐三年至八年皆在皖北軍中竊見和春鄭魁士之軍戰陣頗勇旋因餉缺而潰袁甲三翁同書等繼之更因餉絕而敗即十年江南大營之潰十一年浙江之陷皆由於糧餉斷絕官文胡林翼籌鄂餉以供東征曾國藩進圖江皖以江西湖南廣東釐金為餉源左宗棠以浙餉辦閩浙之賊臣以滬蘇入款辦浙江之賊皆能

自我為政轉輸不匱幸而歲事從古至今言兵
事未有不先籌餉楛者也

諭旨慮及皖豫髮捻一日不除盛京甘肅勢難兼顧
誠以捻滅而後騰出餉需非徒捻滅而後騰出
兵力有餉則到處兵勇皆可用無餉則已成勁
旅亦無用也陶茂林雷正綰均係多隆阿部下
百戰驍將昔何勇而今何怯其一潰再潰之故
可想而知曾國藩夏間奉

命勅捻臣忝署江督即以後路籌餉引為己任以安
其心數月以來分屯豫東蘇皖千餘里湘淮兵

勇四萬餘糧運供支源源協濟又兼籌蘇松揚
州留防各陸營長江外海各水師皖南北江南
防勦遣撤各湘軍之餉雖以入抵出不敷尚多
竭力勻撥幸無貽誤臣若奉

旨西征現在前路勦擒後路分防各軍之餉尚無專
責之人即臣帶兵遠出餉源當出於何處籌餉
當責成何人亦未蒙

聖明指示若無確然可指之款率衆前行必為雷正
綰陶茂林之續若非切實可靠之人維持後路
亦無以安曾國藩與臣軍各將士之心臣嘗默

籌熟計目今大患在捻與回自應先圖滅捻若以現餉養現兵約計河南可養戰士一萬五千山東可養戰士二萬安徽可養戰士一萬江蘇可養戰士六七萬湖北可養戰士四五萬各省督撫果熟諳韜畧認真籌餉練兵使一兵得一兵之用通力合作勿存推諉爭忌之心則兵與餉可漸足一二年間可奏效若

皇上專派督勦大員而各督撫謂事有專屬或擁兵觀望或玩視軍需或勝則爭功敗則諉咎遂使客兵出境種種牽掣亦難必其收功之迅速矣

臣若赴豫欲圖兜滅此捻必須多練馬隊以備
沖突廣置車騾以資轉運需餉甚鉅豫中蹂躪
已久力難供應若專指蘇餉目下蘇滬稅釐分
供前敵淮軍已虞飢潰再添募馬步人數益衆
道路益遠勢必不支臣一經離任恐亦不能遙
制此餉源不能專恃之實情也一軍火難常接
濟也臣軍久在江南勦賊習見洋人火器之精
利於是盡棄中國習用之抬鳥鎗而變為洋鎗
隊現計出省及留防陸軍五萬餘人約有洋鎗
三四萬桿銅帽月需千餘萬顆粗細洋火藥月

需十數萬觔均按月在上海香港各洋行先期
采買陸續供支臣每親自料理又有開花砲隊
四營一為潘鼎新帶往濟甯一交劉秉璋鎮守
蘇州其副將羅榮光劉玉龍兩營為臣親兵現
分守金陵城外之下關江東橋兩處江口緣洋
人最重開花砲目下長江通商番舶來往奸人
覬覦偵知有此利器可稍奪凶魄洋砲重者千
餘觔輕亦數百觔其砲具之堅精藥彈之繁冗
臣講求數年稍窺祕要他人多未及見更未與
知臣既辛苦練成若出省督師必須酌量調往

藉壯聲威惟砲隊所用器械子彈盡仿洋式所需銅鐵木煤各項工料均來自外國故須就近設局製造蘇州先設有三局嗣因丁日昌在滬購得機器鐵廠一座將丁日昌韓殿甲兩局移上海鐵廠曾經

奏明欲再移設金陵附近濱江偏僻處所為久遠之計但事體繁重須有精心果力者主持其事方冀漸收功效臣若遠赴他省則砲局與鐵廠久必廢弛不但技藝不能漸精且慮工需多有缺乏而臣軍接濟亦將有斷絕之時臣部將士

皆已熟習洋器慣用勦賊設此後臨敵不能應
手或遠道解運不及將若之何臣與洋將共事
數年彼視軍火鎗砲為行軍第一重大之事中
國將領往往隔膜置之無怪軍威不能自振臣
軍所向則以此為命脈關係誠不敢輕以付託
此軍火恐不能常接濟之實情也臣所慮者只
此三端倘蒙

皇上天恩俯憫愚忱熟思審處俾微臣帶兵遠出日後
更無掣肘之患臣得效命疆場努力設謀幫同
曾國藩等為

國家殲此殘寇雖萬死有所不辭臣知曾國藩陳
奏在前久未續奉

諭旨敢再冒昧披瀝上陳伏乞

皇太后

皇上聖鑒訓示謹

奏

江北新漕民折官辦摺

奏為會籌江北新漕民折官辦分別解運情形恭

摺覆陳仰祈

聖鑒事竊臣等承准軍機大臣字寄同治四年八月

二十五日奉

上諭戶部奏江浙來年海運請飭催趕辦一摺江北

久經肅清各屬本年新漕應即徵收本色掃數起

運惟本年河運係封雇民船誠恐米數太多不無

掣肘如江北全漕不能概由河運即由該商酌量

情形劃分成數河海並運一切章程趕緊妥議奏

明辦理等因欽此遵經轉飭代理江甯藩司勒方
錡署江安糧道李鴻裔妥議籌辦茲據會詳前
來伏查江北淮揚徐通四府州屬額徵起運漕
米十六萬餘石本年淮揚等處夏旱秋澇被灾
較重尚未勘定分數約計可徵米九萬餘石竊
自咸豐三年以來運道不通漕船盡壞應徵漕
米均經

奏明飭屬變價分解揚徐各糧台充餉各州縣因
徵米既須變價即按逐年米價折收錢文易銀
解台臣崇於試辦河運時將各省漕糧因軍需

孔亟先後改徵折色之處附片陳明在案今年揚防盡撤欠餉已清臣鴻章曾豫飭司道本年漕價必應全數解京雖有急需不得援例截留以實部庫惟江北漕價部定每石折銀一兩四錢嗣糧台因米價日增軍餉日絀歷年飭令加增各州縣以收錢盈餘並節省幫費等項全數捐解充餉每米一石解銀二兩四錢當軍務緊急之時民間咸知為

天庾正供竭力報効官民相安十餘年來從無鬧漕抗糧之案今若改徵本色民間完米既慮弊端

百出而以米運京之費一無所措本年試辦河
運每米一石所用船價耗米運腳經費雇挽繚
纜席片及通倉經紀箇兒錢等項約共需銀二
兩數錢民間完納漕糧既不能違例加收運費
州縣徵米起運亦不能勒令賠貼解資則此每
石運費二兩數錢臣等實無從挪墊至本年蘇
松起運漕米可較上屆加增海運沙船無多正
虞不敷裝運勢不能加入江北漕米則江北之
漕仍須另籌河運臣等往返函商並督飭司道
各員再四熟籌惟有仿淮徐等屬民折官辦章

程變通辦運本屆江北全漕約米九萬餘石擬請令各州縣照舊每米一石折收銀二兩四錢全數解司以一半按部定例價每石作銀一兩四錢先行解京其餘一半派員於米糧薈萃之區分投採買江北粳米無多米色不能一律仍照試行章程紅白兼收粳私並買約計米價每石需銀二兩有餘以一半解部例價外之節存銀一兩又益以例支漕項行月贈五給丁等銀作為一半河運之費計尚不敷再由外設法籌補事竣分別報銷此次雇用民船並起運事宜

容臣等參酌上屆試辦河運章程續行妥議具
奏所有遵

旨會議辦理情形合先恭摺覆陳伏乞

皇太后

皇上聖鑒訓示謹

奏

請飭議新漕全數解折片

再查此次籌辦江北新漕采買運京權宜試行
尚未知能否應手南漕停運已久大亂之後亟
應與民休養一旦改議徵收起運各有為難謹
為

皇上滙陳之漕弊積久愈深大畧不外於丁胥遞事
誅求幫兌互相魚肉究其受害最切厥惟小民
道光間諸臣章疏

宣宗諭旨言及州縣浮收旗丁幫費未嘗不深恨次骨
終以積重難返無可如何道光二十七年王大

臣戶部議將南漕改徵折色以實部庫而甦民
因為前督臣李星沅奏駁未行咸豐元年江蘇
撫臣傅繩勳力陳浮收幫費弊端請收折色又
經部科議駁蓋以數百萬之米易銀則銀必貴
以數百萬之銀易米則米亦必貴皆不敢輕為
嘗試迨至時勢所迫改為折色數十年錮弊不
期除而自除彫瘵之民於以少得休息今若重
收糧米必致諸弊復萌夫小民之情減則順而
加則逆稍有抑勒勢將難堪軍興十有餘年閭
閻項尾流離不忍徧視雖有完善之處而官捐

私借畝費抽釐幾無一歲能寬亦無一家得免
困苦至此非大培元氣不特瘡痍莫起兼慮鋌
險生端旁觀者謂完米完錢並無二致何以折
色易而本色難不知徵收折色照部定每石折
銀一兩四錢必不敷買米之數州縣所收縱有
增益民間以部價相衡斷不能加至倍蓰即如
江北近年折至二兩四錢已較江楚各省為多
然照市價亦僅能買米一石耳民間輸納較易
力量較省若令備米交倉則向所謂剔斛淋尖
風篩打樣以及併合包勻各種苛勒乘機而來

紳士包漕棍徒攬抗亦聞風自起民間以米上
兌有一石完至數石者更有由單鋪席挂號抽
豐等項訛取錢變米色與銀錢不同明屬潔淨
乾圓何難指為醜米格外需索更屬防不勝防
是完收本色總較現在折收之數有增無減近
日民力實有不逮江北尚屬一隅之地既收本
色將來須推及兩楚江西而江楚漕折較江北
為減收米必更掣肘似應寬以數年之力俟各
省軍務大定防軍全撤次第籌酌舉行驟議改
徵恐滋事故此所謂徵收之難也至於起運南

糧唐代用轉般法沿水置倉由江而淮而汴遞輸於官宋崇寧中改為直達明季置屯衛我朝因之今漕船盡廢欲全數修復約需銀三千萬兩若轉般之法必先建倉南漕正耗四百餘萬石以一倉儲萬石計之須四百餘倉一時均無此鉅款浙蘇海運歷屆幸安乃近年北口通商各貨為洋船攬載沙船生意淡薄減歇之後虧朽過多本屆蘇浙之漕尚慮不敷裝運斷不能益以江北之米即原運之數亦恐此後海船日少不能不預為熟籌則惟有仿直達之策以民船

代漕艘較為近便臣崇本年試行河運原欲為先事之導以濟海運之窮雖已挽運抵通而通費不貲雇船亦極艱苦卸米之後尚無回空日期聞山東戴村壩復決河水洩枯濟甯已上乾涸已多前船年內不歸則來年需用之船必致無人受雇且近來勦捻各軍皆由運河轉運軍裝餉米兵差日多民船日少雇價日重沿途之偷竊運道之阻滯在在堪虞只可強試一行而米數必不能多遲速必不能定此所謂起運之難也有此二難若欲解運本色漸復舊規固非

咄嗟可辦即采買雇船耗費滋多亦非經久之
策臣等籌思至再力為其難本年江北之米仍
擬照上年訖行河運章程再行試辦而以半折
半運通融用費冀稍彌補而免貽誤若半銀之
數不以例價解京則少每石一兩之節存半米
更不能起運近時捻蹤飄忽往來運河左右蹤
迹靡常內河船隻愈見稀少屆期能否雇覓齊
全及運行無阻之處當隨時察看情形

奏明辦理抑臣等更有請者此次漕米運至通州
連米價及運腳雜費每石總須合銀四兩數錢

無可再省本屆蘇浙海運稍多京倉儲備亦稍
裕似不爭此四五萬石之米且因此修理沿途
牘壩挑濬長河耗費更鉅尤為不值莫若全數
解折省出運費每石可實折銀二兩四錢在津
通買米填倉既可盈無絀即以之抵放俸甲
亦得實惠均霑似於

國計不無裨益並請

敕下部臣迅速通籌妥議核覆飭遵理合據實附片

陳明仰祈

聖鑒訓示謹 奏

上海裁撤會防局摺 同治四年十二月十九日
奏為上海裁撤會防局仍練兵接防要地恭摺具

陳仰祈

聖鑒事竊據署蘇松太道應寶時稟稱咸豐十一年
冬間上海賊氛環逼籌議中外會辦防勦經江
浙紳士呈由前撫臣薛煥奏奉

上諭江浙紳士請借英法官兵勦賊上海為通商要地
自宜中外同為保衛著與英法兩國迅速籌商辦理
但於勦賊有裨朕必不為遙制等因欽此經前蘇松
太道吳煦與各官紳會商舉辦先於十一年十

二月十四日在洋涇浜設立會防公所與英法提督領事各官籌商防勦之策開築濠牆建造砲台一面添練砲勇隨同西兵四出攻擊並支應夫船糧草食物以利軍行嗣又雇備輪船迎接臣軍東下迨同治元年三月大軍蒞滬整兵籌餉屢克名城未及三年肅清全省即於上年四月間遵劄將洋涇浜會防公所停撤仍留分局數處併歸蘇松太道衙門兼辦以備支應現在英法在滬防兵均已回國會防分局於本年十一月底全行裁撤又吳淞口原有法國防兵

駐劄由該處團防局董事辦理支應本年七月間亦將供應全停裁捐撤局計自十一年十二月開辦會防至今閱時四載所用經費悉在本局捐款項下支銷並未動用正項合將會防撤局緣由稟祈察核

奏咨等情前來臣查從前上海會防局之設緣時勢危迫不得不籠絡洋人薛煥原奏內即已聲明只可謂一時權宜之計究之中西兵弁實不能在一路會勦致受牽制先是西兵克復青浦嘉定二縣旋得旋失待官軍再舉而後定自嘉

定復後進攻蘇屬各城惟戈登率常勝軍以從
英法弁兵總未離滬城一步是以臣軍抵滬數
月即經會防原紳馮桂芳潘曾瑋等呈請撤局
維時臣以戰事方亟上海係後路根本西兵屯
駐城內外索應月糧房租夫價需費甚鉅既相
習為固然未便遽翻前說致生他衅因暫留會
防一局稍示羈縻逮至蘇常肅清金陵告捷彼
族無可借口英法駐滬之兵以次撤退自上年
八月起丁日昌應寶時等與該提督領事再四
商催始將歷年占住上海學宮城隍廟園及大

境青蓮菴諸處陸續讓還節經咨明總理各國
事務衙門從此滬城風氣一清界限分明實皆
仰賴

朝廷德威所被事機十分順手而會防局從容蒞事
亦得有始有終殆非該局官紳始願所及計三
四年來動用經費為數不貲悉就華商設法籌
捐臣於本年二月奏報軍需清單內已聲明
此項應歸外銷再英法未撤兵之先據英領事
巴夏禮以上海係通商最要口岸須由中國練
兵接防該公使復向總理衙門瀆請臣即酌留

上海城南高昌廟法國教練勇四百人鳳凰山
英國教練勇千餘人仍揀派英法武弁各數人
分司教習令由中國官統帶並派記名總兵鄭
海鰲帶淮勇親兵一營赴鳳凰山駐紮兼統教
練各營會同上海道節制調遣其勇丁口糧草
程改照楚軍營制按月由關稅內撥給外國弁
兵止管教習鎗砲不准干預營務並與該領事
等議明此後該軍進止機宜與洋弁應否撤換
之處悉由督撫統兵大員主政以重海防而肅
體制所有裁撤上海會防局仍練兵接防各緣

謝署欽差大臣瀝陳大畧摺

同治五年十月二十七日

奏為欽奉

諭旨恭謝

天恩並瀝陳大畧情形專摺馳陳仰祈

聖鑒事竊臣承准軍機大臣字寄十月二十日奉

上諭曾國藩著再賞假一箇月在營調理欽差大臣

關防著李鴻章暫行著理必須迅將東股辦竣方

可騰出兵力專意西路即著通籌全局妥為辦理

應否移紮豫境適中之地並著酌量奏聞等因欽

此仰蒙

聖慈簡畀

訓示周詳欽感之餘倍增惶悚伏念臣一介庸儒毫無知識前在蘇省薄立寸功皆由諸帥協力將士苦戰而成臣並無指揮謀畧猥蒙

厚賞濫膺重任夙夜懷慚前奉

旨飭令進駐徐州本係總督管轄之地疆吏應辦之防清淮以東宿蒙以南如兵力能及臣皆責無旁貸固不敢稍有推諉茲復奉

命接署

欽差大臣則凡髮捻所到之區衆人束手之際皆將

責望於管以臣智術短淺才力薄弱實難勝此
艱鉅非敢沽謙抑之虛名拘辭讓之末節揆時
揣分戰慄驚怖誠有不能自己於衷者惟恭繹
聖諭因曾國藩積勞致疾重煩

塵念令臣暫行署理為一時權宜之計若再三堅辭
往返耽延既無以仰體

宵旰之憂勞且令曾國藩病軀候代情誼亦覺歉然
展轉焦思惟仍仰懇

聖明從容籌議另簡知兵大員督辦勦擒軍務或俟
曾國藩調理就痊仍舊辦理俾臣稍安愚拙獲

免大戾感戴

高厚曷有既極但就目前局勢有必須豫為籌度者
有不敢預為限制者謹為

聖主一一陳之上年九月奉

旨令臣帶兵馳赴河洛臣即恐一離本任則糧餉軍
火均無所出當將可慮三大端據實詳細覆陳
在案曾國藩本年八月二十三日附片奏稱將
帥帶兵勦賊非督撫手有理財之權者軍餉必
不應手係閱歷真切之語年餘以來曾國藩在
前督師臣在後籌餉患難與共休戚相關雖士

馬未盡飽騰而臣之心力實已交瘁怨謗亦所
不辭自臣來徐甫踰一月後路糧餉轉運相隔
漸遠每恐呼應不靈若再逐賊出境遠駐豫省
軍務大局未必遂能有濟而各軍餉需本任公
事必多貽誤即蒙

派員接署督篆各有責任各有作為何能與前敵痛
癢相連始終如一若強爭則徒失和衷若隱忍
則必分畛域軍需稍有掣肘斯功效全無潰敗
立見臣去年摺內固已言之詳且盡矣且臣自
問本心於一切榮利素知恬澹若從此脫卸地

方事件專意辦賊事機可赴神智不紛猶可勉力報効若因餉缺而潰亦非

朝廷所以用臣督師望臣成功之意臣從軍十數年稔知軍情利鈍之由其樞紐不在賊之難辦而在糧餉軍火之難接濟曾國藩老病侵尋自萌退志臣每諄切懇勸謂若不耐軍事之勞頓即請回任籌餉坐鎮要區彼總以精力衰憊相謝然亦以勦擒全軍專恃兩江之餉若經理不得其人全局或有震撼與臣再三密商迄無嘉謨可以入

告是不得不仰賴

朝廷之善為區處矣今

諭旨並未令人接辦江督與通商要件而詢及應否
移禁豫境臣若至豫省邊界離江甯千餘里離
蘇滬千數百里軍儲之調發屬吏之稟承文牘
往還動踰月未有不遲誤者後路根本重地
皆新復之區又々通商口岸設有蠢動更難兼
顧臣反覆推究事理務求一是綱領全在得人
皇上若仍令臣兵餉兼籌須以駐紮徐州而止應仍
如曾國藩前奏東路稍鬆當回金陵或駐清江

力籌餉運乃足以固軍心而維大局擒逆在東則督飭各軍就近兜勦擒若趨豫則體察諸軍之勞逸東路之防務更番酌調跟追前往與鮑超曾國藩等軍會合夾擊劉銘傳等忠勇奮發臨敵應變均尚可靠臣隨事籌商調度似不致遽有失機若

皇上專責臣以討賊在本境可兼管地方駐別省即不能兼管地方如不兼管地方軍需當責之何人缺乏當如何處置非一二空談能有實濟此必須預為籌度者也至擒逆久成流寇臣軍打

仗雖尚得力而馬隊太少不及賊馬之多且悍
曾國藩固屢言之臣到徐後審察軍情可以勝
賊而尚不足以滅賊蓋賊敗後抱隊急走日百
餘里我軍步隊至速日七十里賊隨地擄糧
我軍須賣糧而行現各軍略置車駝賣糧不過
旬日旬日之後就地采辦而賊過處人烟荒涼
城鄉窮苦往往停留三四日購不出一日之食
且餉銀遠道解送亦不應手軍士忍飢赶路催
逼太緊恐生潰變我停一日賊去已數百里此
勦擒追賊之苦前親王僧格林沁所統馬隊尚

多而仍屢蹶不振者職是之由曾國藩接手後
有鑒於此故始為設立四鎮旋議扼守運河沙
河使地勢收窄賊勢較感較易兜勦目下運防
水深隄密尚可扼住冬春淺涸尤須加意其實
魯河沙河地段太長人力難齊終辦不成為今
之計自應用謀設間徐圖制賊或感之於山深
水複之處棄地以誘其入然後各省之軍合力
三四面圍困之或陰招其饑疲裹脅之衆使其
內亂殘殺否則投降免死給資遣回以解散其
窮蹙致死之心而披離其黨羽或另有設守致

困之法容臣與湘淮各將帥及各省督撫相勢
妥籌但能同心協力冀有殲賊之時軍事隨時
隨地變幻無常此不敢豫為限制者也至任賴
等逆東竄之股蓄意撲運河不動即下竄清淮
經劉銘傳潘鼎新張樹珊各軍分路兜擊月餘
幾於無日不戰劉銘傳追逼尤緊奔馳尤苦據
報該逆已於二十三日由鉅野西北竄去似向
鄆城一帶劉銘傳等亦跟蹤而進趁地勢以圖
夾擊惟前有黃河水套之阻西南出曹考地勢
散漫無可控扼恐仍由此入豫或回永碭均未

可知准曾國藩來咨已派劉秉璋周盛波兩軍
東來如能早到當飭會合兜勦以厚兵力而期
聚殲所有欽奉

諭旨恭謝

天恩並瀝陳大略情形謹繕摺由驛六百里具

奏伏乞

皇太后

皇上聖鑒訓示謹

奏

謝授欽差大臣瀝陳下情摺

同治五年十一月十三日

奏為恭謝

天恩瀝陳下情仰祈

聖鑒事竊臣接准兵部火票遞到同治五年十一月初一日內閣奉

上諭曾國藩著回兩江總督本任暫緩來京陛見江蘇巡撫一等肅毅伯李鴻章著授為欽差大臣專辦勦匪事宜欽此並承准軍機大臣字寄同日奉上諭本日已明降諭旨令曾國藩回兩江總督本任授李鴻章為欽差大臣專辦勦匪事宜該大臣膺

此重任自當益加奮勉以竟全功等因欽此當即
恭設香案望

闕叩頭謝

恩又准軍機大臣字寄十一月初八日奉

上諭李鴻章俟曾國藩回任後辦餉有人即著相度
情形馳赴前敵軍營就近調度等因欽此伏念臣
前奉

諭旨命臣暫署

欽差大臣當經憑陳微臣智短才薄難勝此任仰懇

聖明從容籌議另簡知兵大員督辦軍務或俟曾國

藩調理就痊仍舊辦理誠以督臣曾國藩老成
重望自受

命勦捻以來其於地勢賊情分防合擊無在不焦勞
籌畫特捻匪剝疾流竄迥非粵逆之比官軍往
來追躡力有所窮是以奏功未能迅速微臣自揣
豈有奇謀勝算可以過之乃荷

聖恩簡任加以策勵欲再辭則迹涉畏難欲前去則
後無付託日夜輾轉悚惶萬分仰蒙

皇上洞鑒兩江所出餉需實關勦捻全軍命脈
特命曾國藩回任籌辦俾臣後路無掣肘之虞

聖慈曲逮俯察艱難無微不至臣等應如何感奮復何敢稍有推諉致誤事機謹當恪遵

諭旨俟曾國藩回任後料理交卸馳赴前敵惟臣熟知曾國藩積勞久病時形衰憊其前奏不能見容及畏閱公牘等語皆係實情屢接來函深以地方政務煩重精力不支必欲堅辭回任臣雖專函商懇但既迭請開缺在先亦自恐貽誤於後其素性耿介量而後入固久在

聖明鑒照之中捻股現盡入豫曾國藩適在西路計鮑超劉松山所部湘軍已由曾國藩檄往陝汝

一帶其餘各大枝皆臣淮軍舊部臣即未受

欽差關防本可籌商調度臣暫不赴豫亦尚無妨設

臣與曾國藩皆離本任根本重地孰與維持於
大局確有關礙感激之餘不無過慮臣惟有隨
時勉循職守殫竭駑庸以報

鴻慈於萬一所有微臣感悚籌慮愚忱理合繕摺馳陳

伏乞

皇太后

皇上聖鑒訓示謹

奏

--	--	--	--	--	--	--	--	--	--

100

100

李肅毅伯奏議

及門章洪鈞編輯
吳汝綸

卷三

請飭曾國藩回任片

行抵歸德布置大畧摺

行抵濟甯籌防運河摺

陳明辦賊大致暫難親赴前敵摺

覆陳東軍維防失事摺

不罷運防片

覆陳剿辦情形片

銘軍贛榆大勝陣斃任柱摺

生擒賴逆東捻肅清摺

籌辦目前緊要各事片

搜捕餘黨賴逆正法摺

籌勦張總愚捻股摺

請飭辦堅壁清野片

請派張樹聲辦轉運片

覆奏督軍北上摺

渡黃察辦轉運相機調度摺

覆陳進勦情形摺

追賊北上附陳籌畫情形摺

覆奏催飭劉銘傳北上片

兜勦獲勝並布置大畧摺

議防馬頰河就地感勦摺

張總愚全股蕩平摺

查明張總愚實已投水淹斃直東肅清摺

請入覲片

請加恩從前督辦諸臣片

覆議凱撤南勇並籌西事摺

張總愚投水確實並各軍裁撤片

銘軍暫紮張秋摺

請修曲阜孔廟片

會籌分別遣留各軍摺

川鹽分成派銷摺

查覆川黔教案摺

請飭曾國藩回任片 同治六年正月十九日
再湘淮勦捻全軍糧餉軍火專恃兩江迭經曾
國藩與臣漉陳均已仰邀

鑒察年來臣在後路竭力籌畫所屬官吏不稍掣肘
湘勇來路較遠人數較少尚可勉發全支淮勇
各軍去年僅能發給九關除積欠口糧不計外
以入抵出每年總欠三個月近日徵調奔馳動
輒數千里疲苦缺乏軍心勞怨徒恃臣等恩誼
相維各統領約束尚嚴未至譁潰然臣等無日
不凜凜迫於時勢不得已也 臣今已卸督篆無

地方之權卽無籌餉之責昨與曾國藩商議餉源仍指江蘇除外洋軍火米糧長夫車騾襍項絲毫不可缺誤外淮軍餉銀每年至少必須放足九關俾臣得以激厲將士齊心辦賊但以現餉養現軍蘇力已不能支若再添募馬隊經費更無所出躊躇再四相對咨嗟曾國藩久勞於軍所稱衰病情形實無捏飾惟感蒙

聖主倚畀之隆臣復仰體

眷懷以大義相勸勉似可力疾任事捻匪已成流寇蔓延數省剿辦本無把握況臣才智極短深以

不能滅賊為懼仰求

朝廷諒臣之愚忠不責臣以速效臣敢不悉心報稱
竭蹶支撐所幸陝甘軍務已奉

旨責令左宗棠督辦左宗棠才力有餘當能制賊潼
關以內臣軍斷難遠顧至東豫皖鄂江蘇五省
無論何處緊急臣必提師赴援與各督撫和衷
商辦稍効綿薄勉顧大局惟長江千里空虛番
舶如織游勇橫行自臣去金陵後時恐小有蠢
動回顧不及督臣必須常駐省會坐鎮四方曾
國藩慮臣照料難周移駐徐州力顧東路並以

回任跡涉畏難取巧具見公忠蓋抱貞介素心
臣亦深為感敬但臣在江年久審知後路籌餉
察吏督臣綜攬大綱不可遠離臣即赴豫鄂而
東運各防尚有布置遇有捻警亦必令追兵速
來曾國藩即回金陵臣必隨時隨事虛衷商榷
與駐徐調度無甚懸殊可否仍乞

聖明敕令曾國藩早日回省久於其任則東南已成
之局不致敗壞即中原方張之寇終可殄除通
計天下大勢關係良非淺鮮臣無任覬幸悚禱
之至理合附片陳明伏乞

皇太后

皇上聖鑒訓示謹

奏

1.2.1

1.2.1

行抵歸德布置大畧摺 五月二十四日

奏為行抵歸德察度賊情調派布置大畧 臣即進

駐濟甯兼顧南北相機督籌恭摺仰祈

聖鑒事竊任賴捻逆由東境戴廟搶過運河 臣先赴

歸德就近調派各情業於本月十八日馳報在

案是夜 臣帶親軍馬步隊冒雨啟行二十二日

馳抵歸德途次欽奉十七日

寄諭著即移營東境擇要駐紮居中調度等因 臣初

慮捻逆過河如循汶上鄒滕舊路下竄嶧邳則

徐淮喫重 臣當進駐徐州如由泰安濟南東竄

青萊則東境喫重臣當進駐濟甯皆須由歸德
分路也二十二日在柘城行營接據丁寶楨潘
鼎新函報十四五日賊已竄往泰安潘鼎新由
單縣兩晝夜馳抵濟甯添備糧藥即由滋陽曲
阜向泰安追勦劉銘傳十七日在單縣堤上得
信是夜亦拔赴濟甯候餉到營即向東進發臣
聞守運東軍全調往勦恐賊乘虛回竄飛飭周
盛波周盛傳等由曹縣拔往濟甯之長溝擇要
堵扼又恐賊由泰安折竄沂海則清江裏下河
門戶可虞飛飭王永勝開字營由單縣沈宏富

奇字營由徐州均拔赴宿遷暫紮董鳳高鳳字
營孔昭右華字營併扼韓莊要路豫備南路援
勦劉秉璋李昭慶援鄂甫回周口臣令劉秉璋
一軍即赴濟甯休養再候調遣現派南路各陸
軍令臣弟昭慶馳赴徐州宿遷察看緩急會商
黃翼升水師相機防勦日內劉秉璋李昭慶均
可抵宋臣與面授機宜即日督隊由虞城單縣
金鄉逕赴濟甯兼顧南北軍情居中策應迭據
探報該逆分為兩股一往甯陽迤北奔竄一向
萊蕪青石關奔抵接萊蕪縣稟報十五日巳竄

至該縣西毛埠村等處揣度賊情似向青州一路目前可無虞北竄劉銘傳潘鼎新向有擠入登萊海隅趁勢圍逼制賊奔竄徐圖聚殲之議此次復申前說請臣商調皖豫各軍出境協守東蘇運河西岸杜其回突銘鼎兩軍會合東軍再於東三府等處相度要隘步步逼緊使其一入不得再出即或逸出仍與往來追躡感入海隅而止等語查捻賊已成流寇逼之不流然後會師合勦原係殄賊上策明臣孫傳庭謂須驅之於必困之途取之於垂死之日如第一彼一

此爭勝負於矢石之間即勝亦無關於蕩平實
為勦辦流寇篤論臣去冬十一月間奏稱須感
之山深水復之處棄地以誘其入然後合各省
兵力三四面圍困之亦是陰師其意本年三月
左宗棠曾國荃商就湖北襄河東岸白口地方
設圍困賊五月間臣又擬就曹單豐碭黃河舊
隄分段布紮冀感賊黃運之間皆欲就地勢以
圖兜圍無如賊蹤蹙疾兵力未齊瞬息百變竟
未辦到茲賊既深入東境臣軍久役疲乏斷不
敢謂感賊海隅之議遂有把握但與其任令長

驅各省流毒無窮似不若誘令盤旋偏隅得辦
且辦臣已密屬潘鼎新劉銘傳儘力追躡如果
賊竄登萊我軍即於膠萊咽喉設法扼逼使北
不至竄入畿疆南不得蔓延淮南局勢自較緊
湊臣並緘商李鶴年酌調張曜宋慶兩軍進紮
汶上運西開河一段英翰酌調張得勝黃秉忠
程文炳各軍進紮宿遷至灘上運河西岸以備
接應前敵張之萬酌調成子河防軍及淮揚鎮
水師移防清淮及阜甯之射陽湖以杜窺竄襄
下河之路各督撫素顧大局諒無不竭力籌維

惟事機會猝賊勢僥悍地段太長恐有力不從
心之處臣姑懸擬大畧借助各軍其賊蹤是否
逕趨登州膠萊能否阻扼各軍能否趕及運西
能否徧防應俟隨時察商辦理未便預為限制
如以上兩策皆辦不到亦惟有抽派各軍輪替
進勦以圖逼賊早回運西再行相機酌辦再臣
自周口起程後日日遇雨農田渥澤均霑秋禾
可期暢茂合並附陳仰慰

聖塵所有行抵歸德調派布置大畧仍即進駐濟甯
各緣由謹繕摺由驛六百里馳陳伏乞

皇太后

皇上聖鑒訓示謹

奏

行抵濟甯籌防運河摺六月初六日

奏為行抵濟甯後調派各軍分路兜勦並籌商運河防務大概情形恭摺仰祈

聖鑒事竊臣前過歸德察度布置擬先守運河慮賊海隅各情於五月二十四日馳報在案二十五日劉秉璋李昭慶帶隊由周口馳抵歸德臣分飭劉秉璋隨臣往濟甯料理東境運防李昭慶趕赴徐州宿遷察看蘇境運河督催淮軍各營與皖軍聯絡扼紮臣即於二十六日由宋啟程二十九日行抵濟甯與劉銘傳晤商一切適接

潘鼎新二十七日追賊至長山稟報捻逆已過
濰縣其勢似趨登萊劉銘傳即督所部於六月
初一日由濟拔行由泰安萊蕪徑趨青州為中
路潘鼎新由濰縣昌邑赴萊州為北路又派徐
州鎮董鳳高昭通鎮沈宏富馬步十五營由邦
城蘭山進莒州為南路三路兜截而前欲偪入
登萊絕地會合東軍相機扼堵如能扼之於膠
萊河一帶使其不能復出臣再抽調運防各軍
輪往替紮更番進擊如各軍尚未到齊或布紮
未定而賊已回竄劉銘傳等相機兜抄臣督運

防各軍隨地攔截使之不得遽竄運西仍須感
入海隅乃有殲賊之一日迭准山東撫臣丁寶
楨咨函亦以登萊三面距海河渠環錯山徑崎
嶇馬賊無可駛騁亟思就地勦除與臣等意見
相合惟任賴各股實粵逆捻匪百戰之餘兼游
兵散勇裹脅之衆狡猾剽悍未可易視若兵力
未足兜圍而迫之過緊畫地過狹使其窺破機
關勢必急圖出竄稍縱即逝全局又非故臣必
先布運防以杜出路次扼膠萊以斷咽喉其追
賊之軍未達膠萊則須急進以徧感之既達膠

萊則宜聯紮以圍困之業將此意緘復丁寶楨
請其至平度州後與劉銘傳潘鼎新察商就地
布置無論能否堵住而制流賊之法必先能堵
而後能勦也連日接准河南撫臣李鶴年函復
已派張曜宋慶兩軍出省協守東境運河臣令
該軍分紮東平以上靳口至黃河沈家口百餘
里周盛波分紮開河至靳口一帶劉秉璋分紮
濟甯至開河一帶楊鼎勳分紮趙村石佛至南
陽湖一帶又准安徽撫臣英翰咨復已派黃秉
鈞英字一軍赴宿遷運河向上游扼紮張得勝

凱字一軍赴貓兒窩灘上向下游扼紮程文炳
強字一軍居中策應並調水師三營入運巡護
英翰擬隨後親往督率等語臣飭李昭慶即督
所部由灘上黃林莊接守至韓莊八閘一帶如
此部分大段畧定各軍先後報到趕緊興築士
氣尚為奮發但冀一月之間賊未竄出運防可
漸就緒臣擬仍商調湖北防軍萬人出境酌換
運防再替出勁旅一二枝入東兜擊如果運西
固守則皖豫鄂蘇腹地稍安祇此東海偏隅迨
逐兇圍施功較易區區愚慮非敢謂遂有把握

然事勢至此欲就地利合人力以謀之未便畏
蕙自阻也李鶴年函稱豫軍全調出境恐張總
愚由秦回竄惟荆紫關尚嫌空虛伏讀五月二

十三日

寄諭左宗棠現已督軍分兩路入關著即與陝省兵
勇夾擊兜圍迅將此股在陝殄盡免致流入鄂豫
等因仰蒙

洞燭幾先曷勝欽服左宗棠劉典分進潼關荆紫關
似已周密其潼關閩鄉一路豫省已有守兵可
否

敕下左宗棠酌留數營嚴扼荆紫關使張逆不得乘
間逸出庶陝軍可以就地殲除臣等專辦東賊
亦無後慮再臣既設防運西其直隸開州大名
等處防軍專備曹鄆渡河之路似可無虞將來
賊若撲運不動難保不折而窺黃張秋地當衝
要防兵甚單可否

敕下直隸督臣轉飭臬司張樹聲暫移所部進紮張
秋北岸一帶聯絡東軍嚴為布扼且與臣軍隔
河聲息相通策應較便實於全局有裨所有行
抵濟甯後調派各軍分路兜勦並籌商運河防

務大概情形謹繕摺由驛五百里馳陳伏乞

皇太后

皇上聖鑒訓示謹

奏

陳明辦賊大致暫難親赴前敵摺六月十七日
奏為陳明微臣辦賊大致及現在情形暫難親赴
前敵先令劉銘傳就近妥商調派恭摺仰祈
聖鑒事竊承准軍機大臣字寄六月十三日奉

上諭丁寶楨奏追賊獲勝並布置扼勦一摺東省兵
力未厚劉銘傳董鳳高沈宏富等軍須星馳前進
互為聲援庶足以杜回竄又恐諸將會合呼應不
靈防勦機宜間不容髮著李鴻章即星夜馳赴前
敵就近調度以期呼應靈通迅殲羣醜等因欽此
查臣前商調皖豫各軍協守運河西隄派令劉

銘傳潘鼎新董鳳高沈宏富等三路前進倂賊膠萊會合東軍相機扼堵等情疊經於五月二十四日六月初六日具奏在案茲

諭旨飭臣速赴前敵迅圖殲賊而臣調兵未集布防未定不得不將臣懸擬辦賊大致及現在情形為我

皇太后

皇上詳悉陳之自來流賊最難追勦而賊流之速尤莫如今日之捻逆中原平曠萬騎衝突無可限制日輒百數十里或二百里無論我軍步隊笨

帶力不相及即使及賊見仗而此截彼竄橫行
側出賊路不窮我力必有時而窮迨日久追逐
疲憊為賊所乘往往一蹶不振自勤捨以來十
數年如一轍雖追賊神速如僧格林沁尚且不
能成功臣等自問萬不能及故欲滅此賊計惟
有覓地兜圍之一法臣曾屢奏及之曾國藩始
思變計初議四鎮之設繼議沙河賈魯河之守
本年春間左宗棠曾國荃又擬為白口之圍皆
欲偏之不流威之漸緊也自臣受事抵豫賊已
入鄂各軍與賊轉戰鄂豫數月迄無機勢可乘

惟有嚴檄諸軍往來躡擊智術短淺實無解於
朝廷之責備迨賊由豫竄東臣思東省運防屢經賊
撲向稱可恃遂急注意布扼曹單豐碭舊河堤
欲困之運黃之間以為得地乃不數日而賊已
渡運臣由歸德馳赴濟甯與劉銘傳等函商不
得已復為感賊登萊之計先借各省兵力協守
運河西堤以圖圍制而遏回竄續奉六月初五
日

寄諭抄發劉長佑英翰等原摺皆言之甚切與臣所
部署均屬相符是日前辦賊舍此竟無良策臣

更衡量利害之重輕與其馳逐終年流毒江皖
東豫楚各省不如棄一隅以誘之與其往復運
東濟泰兗沂青及蘇之淮徐海各屬均受其害
不如專棄登萊以扼之膠萊河之守不密則登
萊無可扼運河之守不密則膠萊仍不足恃賊
蹤已向膠東事勢至此機會可圖但求萬全不
爭一日故臣立意必運堤與膠萊河兩防均已
布定乃可抽兵進勦庶打一仗是一仗滅一賊
少一賊賊智自困而兵力不疲明知此計至愚
至拙亦至難然不若此更不足以制賊疊經緘

商丁寶楨屬其勿遽窮追反驅出境即兵力未
集而迫之過緊使之窺破機關轉虞脫逸並告
以威之一字宜求實濟勿尚虛鋒恭讀六月初
四日

寄諭丁寶楨宜妥籌兼顧杜賊回竄不可專事尾追
致賊延蔓等因尤服

聖謨之炳照 臣惟日夜圖維先固守局而後進兵此
臣籌辦之大致也東蘇兩境運堤袤長千里苟
非各督撫關顧大局通力合作 臣軍斷不敷用
皖豫派到各軍與淮軍分守宿遷以下地段 臣

前已奏明現今於西岸排築長牆分哨過運東就舊牆修繕礮臺倚角護守方在漏夜興工非月餘不得牢固而宿遷以下至清江運隄幾二百里尚無守兵漕臣張之萬兵力止能自保蘇省防軍無可再調臣僅調前金門鎮王鍾華提督魯洪達水師三營分布宿遷亨濟關下至鹽河籍口壩一帶但苦無陸師依護欽奉初五日寄諭復經函商浙江撫臣馬新貽請其速派五千人北上協守宿遷桃源運堤以補其隙尚未接復疊准李瀚章曾國荃咨稱已派提督譚仁芳總

兵劉維楨率萬二千人劉長佑咨稱已派臬司
張樹聲率總兵余承惠等四千人前來助守
均尚未得起程日期故運防猶未布滿即暫無
兵替入膠萊至膠萊河距南北海口潘鼎新函
稱二百七十里丁寶楨則云約三百里以每營
三里計之須百營布守至少亦須八十營劉銘
傳等三路之師日內先後已到然步隊止四十
六營臣復擬調豫軍宋慶十二營淮軍王永勝
開字十營由運河續行抽往必合之丁寶楨所
部東軍三十一營始可密布丁寶楨止允以十

一營相助而臣添調運防之宋王兩軍又須牆
工稍就乃可拔隊若丁寶楨盡以東軍協守目
前畧可敷用未知果否准行連日據報賊蹤盤
旋萊陽掖縣仍向東北駛竄臣飭劉銘傳等如
賊外向當設法堵入並商請丁寶楨移營分扼
若膠萊之守未成即未能銳意擊賊若賊或竄
出膠萊諸將必能跟蹤急追臣雖庸懦前勦辦
江蘇粵逆凡遇堅城要地每多親往督攻蓋勦
守賊與辦流賊情事本自不同況此時運防各
軍已到者築牆紮營既須就近督飭布置而直

隸湖北浙江未到者尚有二萬餘人沿途催趲
照應及將來調派抽替皆臣所當主持皆須在
濟甯居中籌辦若遽舍之前進則五省客兵何
所稟承運防門戶未扃膠萊咽喉未斷臣即親
往尚無裨益而於大局轉有妨礙兵事百變臣
誠不敢謂運防既成滅賊必有把握然立意已
定則經營尤須盡善此臣暫難即赴前敵之實
情也伏讀初五日

寄諭前敵各軍督兵大臣號令不及諸將進止不齊
難免互有觀望應揀派威望素著大員統領前敵

諸軍以一進止之處著該大臣酌量辦理等因欽
此查臣部湘淮各將久共戰陣素相輯睦號令尚
無不齊此次派兵入東臣因直隸提督劉銘傳
深達機要與潘鼎新同建倒守運河進扼膠萊
之議曾令該提督就近察酌前敵情形妥籌調
派隨時會商丁寶楨協同東軍籌辦膠萊一帶
扼勦事宜但使諸將力所能勉臣函牘交催當
不致誤一俟各省調兵到齊運河膠萊兩防部
署畧定臣再抽選勁旅移營前往督飭進擊以
期聚殲總之此時大局先圖兜因此賊不求一

時戰功臣若令劉銘傳潘鼎新等追進登萊計
亦可獲小勝驅之使出惟念捻逆流竄多年數
省生靈塗炭實貽

聖上宵旰之憂及今地利人力幸有可辦之機惟辦
理須有次第臣何敢避迂緩之名而不竭力經
營顧彼失此貽誤全局仰懇

聖慈曲鑒稍寬時日以責臣效臣不勝悚切屏營之
至所有微臣辦賊大致現在情形暫難即赴前
敵先令劉銘傳就近商籌調派各緣由恭摺由
驛六百里馳陳伏乞

皇太后

皇上聖鑒訓示謹

奏

覆陳東軍維防失事摺八月二十二日

奏為欽奉

諭旨據實詳晰覆陳仰祈

聖鑒事竊臣欽奉七月二十八日

密諭飭拏戴廟及維西兩次失事之王心安正法又

奉八月初三日

寄諭以山東貢生張垚等聯名呈訴東省兵勇勦賊不足害民有餘飭臣查辦等因仰見

皇上整飭戎行嚴申軍律曷勝欽悚臣查行軍首重紀律而紀律嚴明要在主帥之賞罰公平功罪

允當已革總兵王心安經前撫臣閻敬銘派令帶勇分守運河戴廟一段臣於六月下旬巡閱河防見該處北岸長牆重濠布置頗嚴若弁勇實力憑守何至倉猝遽陷當據該處被害民人投遞聯名稟控十數紙均稱五月十二日黎明賊至河邊王心安所部未經拒戰鎗礮無聲代賊毀牆賊即於朱萬美營前過河焚擄等語臣復訪問東省官紳僉稱王心安平時剋扣勇糧軍心離怨營規不整以致讓賊偷渡衆論藉藉似非無因即籍隸濟南之前任兩廣總督毛鴻

賓曾經保薦丁寶楨六月初間致臣書亦云丁
寶楨予智自雄慢師輕敵先有以王心安舉動
乖常防務恐不足恃為言者該撫喝斥之未幾
而賊果由彼處飛渡矣王心安戴廟失事時使
丁寶楨據實奏參即不立置重典亦令荷戈遠
戍尚足昭公道而服人心乃丁寶楨奏報猶復
飾陳戰狀仰荷

聖慈暫令寬宥洵屬格外

恩施臣以孤軍逐賊與各督撫及各省主兵須和衷
共濟未便輕有譏彈致生嫌釁當賊竄過運河

臣於五月十八日摺內但畧陳東軍廢弛貽誤
及至濟甯後賊竄青萊欲與丁寶楨劉銘傳等
急圖膠萊河防臣軍力單不得不求助東軍尤
須開誠布公委曲聯絡惟聞東軍在膠萊牆壘
未堅勇糧未放恐致誤事曾密函婉勸丁寶楨
留意詳查該撫覆書云並無其事乃未幾而賊
又從濰河東軍汎地竄出矣夫守河責成各有
汎地必以能守汎地與否為功罪丁寶楨咨抄
七月二十三日奏稿意以濰河不守諉咎於藩
司潘鼎新請撥東軍查潘鼎新僅統鼎軍步隊

十二營初以膠萊北口海難七八十里無可設防乃議由膠萊河南平地橫紮牆濠三十餘里北接濰河以十營守之臣與丁寶楨皆迭奏有案潘鼎新又以鼎軍二營接守濰河西岸十餘里其下至海口尚空六七十里鼎軍何能獨認但盛夏水漲該處暫無須多兵入秋後水漸淺涸潘鼎新函請添撥撫臣派軍往守皆係分所當為丁寶楨令王心安平字四營與道員王成謙常武十營陸續往紮既無派歸潘鼎新統率明文潘鼎新即不能兼管迨至失事距該藩司

表三
汎地四十餘里賊衆一撲即渡常武軍相離最近尚不及救似不能苛責四十餘里外之鼎軍而丁寶楨事後牽混不責部將之不能堅守轉怪藩司之屢請添兵是非似欠分曉潘鼎新蒙恩僅予議處已在

聖明洞鑒之中惟各軍汎地乃行間功罪所關臣不敢不畧為剖晰也臣於濰河疏防後函詢劉銘傳潘鼎新實在情形據劉銘傳函復捻過濰河距銘傳汎地過遠當時不知其詳初一日沂州途次見王心安潰勇詢知該逆撲犯王心安所

紮海神廟魚里鋪等處賊隊入營官軍尚多不
知其四營隊伍傷亡過半王成謙常武軍營牆
最近並未出隊接應等語潘鼎新函稱灘河空
虛先以鼎軍二營與王心安四營分守一半嗣
王成謙帶常武十營到防僅以八營填紮王心
安四營原防地段鼎新因其認地過短與之力
爭該道堅不肯添又以海神廟以下無牆之河
商令王心安移守王心安已奉丁寶楨飭調回
膠王成謙強留之頗相齟齬鼎新因賊已壓境
苦勸王心安暫留協守甫兩日賊警大至王成

謙又不肯就近抽援二十日辰刻賊已過河鼎
新接其是刻回信云並無賊蹤係王心安心虛
等語其手書具在也賊撲河西王心安所部亦
陣亡數百人此次失事究非戴廟之比鼎新未
能兼顧咎有應得而王成謙畏蕙取巧罪實難
辭若專咎王心安則取巧者自謂得計請力持
平允據情衡斷等語臣覆查王成謙所呈紮營
地圖與潘鼎新函稱無異臣就王心安前後兩
次疎防情形逐細考究戴廟駐守年餘牆堅濠
深竟任賊衆偷竄厥咎甚重至難西四營原守

汎地王成謙強令讓出移置海神廟無牆之岸
賊警逼近長牆未紮移防甫二日而即失事其
情不無可原道員王成謙統帶常武十營赴灘
籌防既商留王心安協守應令仍守原段設王
心安再有失事無可置喙乃該道利其已成營
牆以八營填紮王心安四營地段而令王心安
移守無牆之處賊來倉猝又不分隊就近應援
實屬畏葸取巧亦應分別叅辦臣過沂州晤丁
寶楨面詢王心安如何處分丁寶楨謂此次灘
河失事王心安應無罪曾諭知王心安若

朝廷加罪必為力爭已令統帶九營赴日照防勦等語臣雖奉

旨查辦王心安現統多營近在敵若派員拏解誠恐激之生變丁寶楨壹意袒護亦有掣肘之虞應否仰懇

聖恩將王心安罪名量從末減抑仍查照前奉

諭旨嚴飭山東撫臣另派幹員接帶該營再行拏辦之處伏候

聖裁山東候補道王成謙應否請

旨暫行革職留營効力以為奸巧誤事者戒王成謙

原呈分扎紮維河地段草圖一紙併呈

御覽以備查核此外各軍如有畏縮騷擾情事容臣隨時查明懲辦所有欽奉

諭旨據實詳晰覆陳緣由恭摺由驛具奏伏乞

皇太后

皇上聖鑒訓示謹

奏

--	--	--	--	--	--	--	--	--	--	--

三

三

不罷運防片

再臣於八月初十日在沂州拜摺後即督隊啟
行十一夜馳抵臺莊次日接劉銘傳飛報初八
日在贛榆沙河鎮佳穀山一帶遇賊鏖戰竟日
追逐二十餘里擒斬頗多據擒賊供稱任賴逆
首意圖撲竄運河臣因宿遷仰化集下至桃源
清江西岸尚無陸軍駐扼即派襄辦軍務山西
布政使劉秉璋督率所部及總兵沈宏富奇字
七營由臺莊過河趕赴桃源會合浙軍聯繫至
清江以上設法堵扼劉秉璋等即於十四日分

起拔行旋接劉銘傳報稱初十日追抵郟城賊
南竄紅花埠趕辦軍糧再行追躡十三四等日
勦賊於沫陽之黃泥河等處連獲勝仗生擒領
白旂左隊逆酋蔡有城據供該逆恐秋後連東
無所掠食急欲由桃源一帶空虛之處搶撲連
河等情適據浙軍統將李耀南余朝貴稟稱行
抵清江已奉漕臣張之萬飭令進紮六塘河南
岸史家集莊家灘沈家渡等處會同歐陽利見
王可陞所部分段扼堵十五六日賊隊竄至宿
遷對岸及六塘河劉老澗一帶分投猛撲皖軍

程文炳漕標姚廣武等晝夜扼擊均甚出力連日陰雨運河增漲宿遷以上長牆森布似可無虞惟六塘河日漸淺涸各軍甫經到防未知能遏奔突否張之萬來函亦以仰化集以下運河未經設防如竄過六塘即可過運臣飛飭劉秉璋馳抵桃源先就西岸分紮營壘設賊南竄於半渡扼擊之並令劉銘傳潘鼎新等緊躡賊尾兜擊牽制但恐阻雨阻水道路泥濘師行致多阻滯殊為焦急至從前議守運河原恐膠萊之防倉卒難成畫遠圍以扼歸路所集皖豫鄂各

軍皆以守本境者移守外戶能守固有裨大局
即不守可剋期回援計固兩便而臣軍全係步
隊追勦數省奔逐數年功效毫無精力實甚疲
憊無論賊竄何處責望悉歸於微臣軍士必苦相
驅迫勞怨不支勢且潰決臣日夜憂之諸將稍
懷忠義者皆力勸就地圍賊使其竄地較狹追
勦較近我得藉屯守以更番休息賊或限方隅
而漸有窮期以是曾國藩創守賈魯沙河與運
東臣又議守膠萊河與運西皆萬不得已相機
勢而為之非謂遂有把握也自去歲豫軍疏於

汴南今則齊軍一疏於戴廟再疏於濰西人力不齊前功盡棄膠萊河防三百餘里尚不可靠沿運千里調兵數省敢自謂可恃乎

朝廷因賊竄濰河甚慮運防難以堵截曾國藩聞賊竄出亦有咨緘商及守運似可中止實係老成之見臣反覆籌思賊正在急欲出運萬一力堵不住亦勝負之偶然若先撤運防是示賊以弱也守運各軍早夜修防尚無疲倦較窮年追逐者勞逸飢飽畧殊忽令守又忽令不守是使軍心惶惑也運河東南北三面賊氛來往竄擾

官軍分路兜逐地方必受蹂躪然不過數府州
之地驅過運西則數省流毒無窮同是疆土同
是赤子而未便歧視也今使罷運防而另有制
賊之法臣必速罷若更無可制賊似不若得守
且守能戰即戰盡人力以待事機如因地段寫
遠疏漏致賊逸出或冬令水涸冰凍慮生他變
再行相機變通辦理賊無常勢兵無定形以臣
才力兵力竭蹶之狀辦此流賊尤不敢懸擬成
局容隨時察度賊情會商曾國藩暨各督撫妥
慎籌奪除劉銘傳戰績續行詳報外所有近日

軍情並籌辦大畧理合附片瀝陳伏乞

聖鑒訓示謹

奏

表三

--	--	--	--	--	--	--	--	--	--	--

覆陳剿辦情形片 九月十七日

再欽奉九月初六日

寄諭皖軍擊賊之時並未聞該大臣派出一軍來機
要截初不料觀望遷延一至於此又九月初八日

寄諭昨接英翰奏皖軍在順河集擊退捻匪劉銘傳
潘鼎新等何以並未緊追互相夾擊其為意存忌
刻縱賊誤事已可概見等因欽此伏讀之下惶悚
曷勝查八月十四日劉銘傳在沐陽擊賊獲勝
賊即於十五六日竄至宿遷對岸圖撲運河臣
於八月二十二日附片畧陳陰雨河漲宿遷長

牆森布似可無虞並令劉銘傳等緊躡兜擊但
恐阻雨阻水師行多滯等語蓋宿遷之交河道
紛歧一雨便漲人馬難渡十六日以後晝夜大
雨臣料劉銘傳等追軍斷不得速劉秉璋督軍
赴桃源運防十六日過宿遷適賊騎在對岸游
奕礮船擊退函稱宿防尚無大股撲犯皖軍尚
可自支臣逐日派弁赴河干探視亦稱各營守
禦尚嚴皖將並無告急求援之文臣又料宿防
必可無虞十八九以後賊漸上移聲稱撲犯密
灣皖軍張得勝汎地臣派郭松林馳往督令各

軍嚴守二十一二等日忽報賊衆全股北走臣
知係追軍趕上旋接劉銘傳潘鼎新函報在末
阻雨數日十九日從泥淖中鳧河進躡二十日
抵宿遷之程寨略一抄擊賊即驚遁我進一步
賊退一步未敢拒戰而宿遷運防以鬆臣於九
月初九日彙摺補陳在案大概軍營習氣賊甫
至則羣事張皇賊一退則鋪張戰績臣向所痛
惡每誠諸將稟報賊情戰事勿得一語虛飾以
便據實上陳自忝任軍事以來臣疏具在可覆
按也英翰遠在潁郡系念運防又力顧大局派

程文炳等出境助勤 臣與該撫交好有年公義私情均深敬佩何至稍存忌刻縱賊觀望為此悖義昧良之舉膠萊潰防以後

朝廷責備日嚴他人處此或打一仗報一仗甚且未戰報勝以期稍寬咎戾 臣自念庸懦無比謬負重肩揜勢方張殄滅無術日夜憂懼即諸將追賊小勝何足蓋愆賴各省協力合謀奚須猜忌區區愚誠伏乞

鑒察至丁寶楨以濰河前事謂 臣徇私諉咎倒置是非仰蒙

聖明詳切訓誡臣敢不懍遵臣與丁寶楨本無嫌怨
自夏間賊入東後彼即欲逐賊出境固身任地
方之常情臣初謀困賊膠萊繼圖扼賊運防丁
寶楨皆不甚謂然惟臣專辦剿捻必思所以制
賊之方扼膠萊為一策其次則感之運河以東
竄地較狹追剿較易無論能否辦到勢固不得
不辦即如賊出維河將近兩月若非運防有備
賊颺疾如飛必已竄過兩省官軍步隊尾追何
及劉銘傳追賊最速每稱往年追至千餘里行
至一兩月方得見仗轉瞬則又失之今賊在運

東不過數日數程便可躡擊一交冬令野無所
掠賊或漸窮出運不能則必求戰臣現整集各
軍擬籌出三大枝為合力兜剿之計但擒逆人
馬衆多我軍須加整練不能不稍待時日臣斷
不因丁寶楨妄生訛議致涉遷延惟臣所慮實
有二端東軍約二萬餘人兵將多不得力劉銘
傳周盛波各營降賊據賊供知東軍不足畏官
紳士民亦皆知之丁寶楨拒諫飾非終不省悟
此可慮者一也客軍入境呼應不靈全賴地方
官扶助照料既擒賊到處流竄賊至兵隨城寨

俱閉惟地方官偵知是兵辦運糧草給價購買
則賊常飢而兵可飽而賊亦不難滅矣臣前已
奏奉

諭旨一再嚴飭並分派員紳赴東省各郡豫商購儲
尚未據報購存若干銘鼎威各軍昨過邾城仍
辦糧不出目下各軍不憂賊之難打獨恐軍之
常飢從古不能責飢軍以用命此可慮者二也

臣受

恩至重默籌大局絕不敢稍參私見亦未便引嫌絀
默謹據實附片瀝陳伏乞

聖鑒謹

奏

奏

銘軍贛榆大勝陣斃任柱摺十月三十日

奏為劉銘傳善慶馬步各軍乘勝追賊至贛榆城
南大獲勝仗陣斃兇悍逆首偽魯王任柱即任
化邦現仍星夜緊追以期乘勢盡殲餘黨恭摺
馳陳大畧情形仰慰

聖鑒事竊銘軍十七日在安邱濰縣之交大戰獲勝
情形經臣於二十五日馳奏在案賊敗後竄向
諸城南趨劉銘傳督率馬步各軍奮力兜躡二
十二日追至日照地方先鋒馬勇與賊接仗鎗
傷偽魯王任柱右耳際尚不甚重該逆逕奔江

南贛榆縣境劉銘傳同善慶等二十四日追抵
贛榆任逆憤急裹創拚命決一死戰挑選馬步
悍賊數萬預伏贛榆城南村林後欲乘我軍遠
道疲乏以圖一逞劉銘傳與善慶等是日未刻
齊抵城下詢問土人俱稱竄青口一帶距城甚
遠蓋賊過民逃不知其詭狀也劉銘傳督隊由
城東進天忽大霧垂映四野昏不見人該逆突
分數大股蜂擁撲來善慶等整隊攔頭迎擊沖
殺三四回合馬上洋鎗連環施放任逆衆而且
悍幾不能支劉銘傳親督先鋒馬勇將賴汝洸

牛遂兩股擊敗復督步隊上前接應任逆自率
馬賊數千直沙我後經善慶等分隊擊回該逆
猶率親兵步賊拚死拒敵劉銘傳善慶嚴督馬
步各軍大呼殺入鎗礮如雨賊中忽自驚喊曰
魯王受鎗傷死矣賊衆一轟而潰我軍勇氣百
倍乘勢趕殺但見一羣悍酋圍簇任逆屍身用
快馬負馱而去餘衆狂奔其馬賊過衆我軍搶
屍不得追殺二十餘里揜斬極多伏屍遍野旋
降出藍旗賊馬數十匹俱稱任逆被鎗子洞穿
腰肋登時斃命劉銘傳善慶等仍督隊趕追以

期乘勢盡殲賊黨業經兩次專弁飛馬馳報到
臣查偽曾任桂即任化邦係亳州積年巨捻
最為兇悍之首逆所帶藍旗馬步悍黨最多四
年四月親王僧格林沁曹南之挫據迭次擒賊
降賊皆供該逆尤與僧親王死鬪者臣屢密屬
劉銘傳懸賞購綫使其自相戕殺若軍士能於
陣前擒殺該逆許以破格保獎並賞銀數萬兩
劉銘傳前於安邱戰勝後函稱有逆首潘貴升
專人密信願謀殺任逆贖罪圖功該提督允給
三品花翎並賞銀二萬兩等語此次據報任逆

死於亂軍鎗礮之中或謂係官軍洋鎗擊斃或謂即係潘貴升暗鎗中傷匆遽之中尚難查究臣據劉銘傳善慶函報並細詢兩次來弁是日接仗及賊匪敗遁擒賊衆供情形則任桂伏誅似已確鑿無疑餘任確查核辦此股捻逆以任化邦及偽遵王賴汝洸牛洛紅之子牛遂等三人為首賴汝洸係廣西老賊詭詐多謀任化邦馬賊最悍牛遂步隊最多然賊中皆稱任化邦善戰各路官軍屢為所窘任逆不除則餘黨斷不得滅今仰賴

聖主威福兇渠先已授首實足伸

天討而快人心惟其悍黨尚多各軍乘機兜擊解散
脅從招納降酋冀可漸次掃蕩潘鼎新唐仁廉
已先後由莒州日照向南兜追郭松林楊鼎勳
二十六日自濟甯拔隊由滕嶧逕趨邳贛皖軍
程文炳等亦由邳城就近迎剿臣督催各統領
倍道星夜馳往與劉銘傳前後夾擊軍勢四合
勦辦當可得手又慮用獸猶鬪鋌而走險並飛
飭下游運河及六塘河防軍嚴加堵守勿任竄
越以收聚殲之功臣俟劉銘傳等續報賊情稍

定或再馳赴南路督籌妥辦頭品頂戴直隸提督劉銘傳忠勇耐勞追賊神速此次陣殲巨逆擬先請

旨優加賞賚頭品頂戴杭州副都統善慶驍勇敢戰鎗技無敵擬懇

恩賞穿黃馬褂已革副都統溫德勒克西謀勇穩練擬請

旨開復原官仍交軍機處記名遇有副都統缺出儘先簡放其餘尤為出力將士俟劉銘傳等查明具報續請優獎所有陣斃逆首偽魯王任桂即

任化邦官軍仍星夜緊追兜剿大畧情形理合
由驛六百里先行馳奏仰慰

聖塵伏乞

皇太后

皇上聖鑒訓示謹

奏

生擒賴逆東擒肅清摺 十二月十九日

奏為擒逆餘衆自壽光大捷後南奔江境由清淮
下走高寶邵伯迭經追軍擊敗復竄揚州東北
灣頭瓦窑舖一帶經臣部准軍華字營攔河截
劉生擒首逆餘賊悉數殲除東蘇皖豫鄂五省
一律肅清恭摺馳陳仰慰

聖鑒事竊擒逆餘衆數百騎由清淮下走高寶邵伯
各軍晝夜兜追並經臣查明逆首賴汶光尚未
殲斃各緣由於十九日丑刻馳陳在案頃復接
據派防揚州之統帶華字營淮勇即選道吳毓

蘭亭稱十一日戌刻賊衆突至灣頭立即出隊
迎擊獲勝星夜派兵四路趕追該道督游擊梅
宏勝參將杜長生游擊吳輔仁由運河東岸向
前追殺遇賊於瓦窰鋪雨夜昏黑逆騎數百拚
死拒戰五更時該逆縱火燒屋志在逃逸我軍
冒雨直前砍殺吳毓蘭於火光中望見一騎馬
老賊手執黃旂指揮知是逆首連放數鎗賊馬
創斃當將該逆生擒餘逆紛紛投河淹斃並擒
賊衆三十餘名東路一股勦滅無遺訖據賊衆
指認生擒者實係逆首偽尊王賴汶光該逆亦

自認不諱年四十一歲面黃有鬚容再解送訊
辦副將吳育仁等由運西沿河追殺三更時遇
賊於槐子橋馬賊正在放火我軍鎗礮迭施一
擁而前殺賊百餘名生擒二十餘名餘逆向西
南奔竄淮陽水師營官繆福賓吳家榜鹽捕營
都司曾德麟齊來兜勦合力擒捕西路餘匪亦
殲滅無遺所有著名擒酋皆在擒殺之內現仍
四路搜追長江水師提督黃翼升山西藩司劉
秉璋候選道李昭慶均隨後督隊追趕接應各
等情前來臣查粵捻兩逆糾合而成約有數股

倡亂已十數載上年冬間始分為二一竄陝西
小閩王張總愚係張落刑之姪向不若任賴等
股之衆且悍該股專係捻逆並無粵逆在內一
竄山東偽魯王任柱等係蒙毫捻首偽遵王賴
汝洸等係粵逆餘黨任柱馬步賊為最善戰賴
汝洸為最善謀兩逆狼狽相倚固結不解自親
王僧格林沁督兵苦戰數年賊漸窮蹙死黨已
不踰萬四年四月僧親王殉節曹南逆勢驟張
擄脅愈衆兩江督臣曾國藩受任於敗軍之際
緣僧親王舊部潰散添調湘淮各軍久戰東南

於北方地利賊情尚未深習是以督辦年餘迭
獲勝仗而未遽成功去年臘月臣遵

旨接受帥篆其時任賴等股入鄂飽掠官軍勝敗參
半鮑超今年正月十五日永隆河大捷稍挫其
鋒奏稱賊數尚不下十萬曾國藩與臣會於徐
州諄諄以逆勢猖獗勦辦無功為恨屬臣耐煩
忍辱務將此股設法殄除以報

國恩而酬同志臣自維才力遠不逮僧格林沁曾國
藩諸臣值此時艱義無諉卸既面懇曾國藩回
任為籌後路糧餉一切軍情調度事宜仍懍遵

諭旨隨時咨商以資裨益並與皖豫漕鄂各疆臣通力合作趁賊竄東境為倒守運西進紮膠萊就地圍勦之議前直隸督臣劉長佑署安徽撫臣英翰河南撫臣李鶴年前湖北撫臣曾國荃及臣兄署湖廣督臣李瀚章實贊成之各派重兵越境分段聯紮臣因兵力不足又遵

旨咨商浙江撫臣馬新貽亦派三千人來助膠萊之防經營數月而潰逆焰復熾仰蒙

聖明督責綦嚴猶曲諒事勢之難不遽為讒謗所撓私衷感愧早作夜思惟冀運防守固先制賊使

不流勦兵加勁乃虜賊使自困九月以前劉銘
傳潘鼎新周盛波迭獲小勝實因賊衆兵單未
能制其死命臣復揀派郭松林楊鼎勳抽併運
防大隊剋日整練決一死戰十月十七日劉銘
傳安邱之捷已得機勢二十四日劉銘傳復設
計殲斃任逆賊膽大寒而黨羽未盡摧也潘鼎
新二十八日海州上莊之戰斃悍賊甚夥十一
月十一二日劉銘傳唐仁廉等在濰縣壽光抄
擊一晝夜賊衆心攜投降遂多郭松林楊鼎勳
潘鼎新繼之無戰不捷至二十九日壽光彌河

之役劉銘傳郭松林楊鼎勳追七二里始得接
仗戰至十數回合又追殺四十餘里斬獲幾三
萬人賊之精銳器械騾馬輜重拋盡蓋軍興以
來罕有之事軍士回老營者臣親加拊慰皆面
無人色其饑憊勞苦亦可憫矣敗賊到宿遷後
沿運乞降遠近軍民共知其窮蹙已極乃悍酋
賴汝洸前在瀾河敗後落水未斃復糾同逆黨
千餘騎衝出六塘河防經漕臣張之萬趕緊調
隊兜追黃翼升劉秉璋李昭慶水陸馬步銜尾
而下節節進勒祇賸數百騎逼入高寶水鄉臣

與曾國藩先派有華字營在揚州運河扼守諸
軍戮力前截後追竟能殲除全股肅清五省實
非臣等始願所敢期此皆仰賴

兩宮

皇太后宵旰焦勞

皇上德威遠播廷臣贊畫於內疆臣合謀於外數省
將竭力用命艱險備嘗故收功如是之速臣與
弟李昭慶受

恩極渥無可報稱不敢再邀

獎敘自取灾眚所有臣軍諸將勦擒三年論功以直

隸提督劉銘傳為第一福建提督郭松林杭州副都統善慶記名提督陳振邦湖南提督楊鼎勳次之長江水師提督黃翼升山東布政使潘鼎新山西布政使劉秉璋涼州鎮總兵周盛波等又次之謹先繕具清單伏懇

恩施此次生擒逆首賴汶洸之候選道吳毓蘭謀勇兼優應懇

特恩破格立予簡放道員實缺並

賞加布政使銜以示優獎其餘出力將弁兵勇及籌餉轉運著有勞績人員容臣查明核實分案列

保其各省會同防勦出力員弁及地方紳董均
請

飭下各該督撫查核奏獎以示激勸至逆首賴汝光
俟臣提解來營訊供再行請

旨辦理所有擒逆全股撲滅東蘇皖豫鄂五省肅清
各緣由謹繕摺由驛六百里加緊馳陳仰慰

宸廑伏祈

皇太后

皇上聖鑒訓示謹

奏

籌辦目前緊要各事片

再欽奉十二月初七日

寄諭東省擒勢雖感該大臣務趁此機會迅圖殄盡
此後搜捕餘匪安插降衆事事均關緊要等因欽
此 臣思目前緊要之事須次第籌辦者實有數端
東擒人數本衆 臣仰體

皇上好生之仁勦撫兼施自十月間任逆伏誅即徧
張示諭播散敗賊中准令投誠免死嗣是我軍
每次戰勝紛紛乞降十一月二十九日壽光大
捷全股瓦解棄械環跪者不絕於道諸將因追

勦擊急送回運防老營自齊甯下至六塘河降
衆與兵勇間雜即前敵馬步隨隊協勦者亦尚
不少亟須清理安插其有田里可歸應分別資
遣遞解回籍飭地方官妥為照料若無業游惰
而又精悍能戰者暫留營伍嚴為約束漸化其
桀驁之氣再謀分遣此安插降衆應急辦而難
遽就緒之實情也東南及中原數省用兵年久
物力凋瘵民氣浮囂游勇會匪到處糾劫外憂
內患潛伏根苗各省綠營頽廢素為宵小所輕
尚須藉軍威以鎮攝臣所部各軍自同治元年

秉璋潘鼎新皆迭請開缺出於至誠臣以此揜
未減義無可辭郭松林八月來營即約以賊平
歸養揚鼎勳體弱多病更難久支今倖獲成功
將士勞苦極矣用馬不竭馬之力用人不竭人
之力似應留其有餘仍備異日馳驅即臣自成
豐三年正月從軍今已十五年矣無歲不親戎
馬苦身焦思時懼隕越苟其稍可支撐豈敢遽
求退息惟年未五十飽嘗艱險精力已不如前
實難久忝重任俟裁遣稍有端緒應再懇

恩准將

欽差大臣關防專員賚京呈銷諸將請假當酌量准
行或所部裁撤後酌飭赴任如堅請開缺果其
情事不可強留當再據實奏懇此又體察軍情
宜稍休暇而難遽責令遠役之實情也所有日
前緊要各事須次第籌辦大畧謹附片奏明伏
乞

聖鑒謹

奏

搜捕餘黨賴逆正法摺十二月二十七日

奏為派兵搜捕餘匪據報經皖軍全數收撫並逆首賴汝光就地正法各情恭摺仰祈

聖鑒事竊捻逆任賴等股次第殲除臣於十九日循例報捷並聲明官軍仍四路搜追在案旋接揚防道員吳毓蘭稟稱十一夜擒獲賴逆仍派隊在河西搜捕逃匪水師營官繆福賓吳家榜亦帶隊登岸分投截擊十二日黎明有零星馬賊被兵衝散三五成羣均經追獲惟霧雨迷離對面莫辨尚有敗匪向天長逃去李昭慶十三日

自揚州派令道員余思樞總兵葉志超楊歧珍
馬步隊由天盱儘力前追據余思樞稟稱十五
日抵天長探詢賊股十餘人竄天邑之汜河被
鄉團擒殺淨盡另股二百餘人由來安之自來
橋竄往盱眙津泥鎮余思樞連夜緊追十六日
黎明反之督令弁勇圍練兜擊殺賊十餘人奪
馬數十匹適前提督李世忠專人聲稱伊已招
降遂將賊衆帶往該提督舊縣圩內等情臣稔
聞李世忠與該捻首素多熟識今春撫臣英翰
曾令伊設法招撫當即函飭余思樞等妥商酌

辦山東藩司潘鼎新追至清江亦派提督戴春
林馬隊赴盱眙搜捕回報擒酋李允等實已投
降李世忠此外並無餘孽臣正在疑慮間又據
前江南提督李世忠二十日稟稱前蒙撫臣英
翰屢邀助辦勦撫曾到潁州就商密辦難期得
手今因賊被圍困恐其竄逃趕赴舊縣團防適
敗賊由自來橋逃至內有偽魏王李允等跪求
投誠據李允口稱被官軍擊散情願管押限期
招降西捻贖罪查點馬騾二百餘匹擒黨約二
百餘名當誑勸李允等即隨該提督由水路速

投大營立功自贖並留賊數十名在舊縣看守
馬匹以堅其信各等語查逃匪既在皖境李世
忠係英翰屬令招撫李允等酋已解送潁州英
翰當能相機辦理不致復為後患聞牛遂任厭
皆在其內想英翰必分別妥辦奏報在途此次
擒賊已經勦撫淨盡臣軍馬步各隊已飭各撤
回原防休息矣至逆首偽遵王賴汝光一犯臣
前已奏明提解來營訊供接准兩江督臣曾國
藩咨稱已批飭統帶華字營道員吳毓蘭會同
兩淮運司李元華訊取確供即在揚州就地正

法仍照上年克復金陵擒獲偽忠王李秀成之
例由臣備文傳首被擾各地方以昭炯戒等因
先據吳毓蘭稟呈賴逆親筆書寫供詞詳述十
餘年來謀叛情形資格之老狡計之多一一如
繪實已毫無疑竇黃翼升李昭慶過揚營面訊
賴汝洸均函稱該逆詞氣崛強與李秀成情狀
相似不可遠解致有疎虞吳毓蘭即遵批於十
六日會同城地方官將該逆正法仍由臣行知
安徽河南陝西湖北江蘇山東六省遞相傳首
俾雪敷天之憤該逆親筆供詞甘心背叛不敢

壅於上

聞謹照抄原文恭呈

御覽內稱頭目任化邦牛宏升張宗禹李蘊泰等皆
係擒首任化邦已在贛榆殲斃牛宏升即牛洛
紅上年經周盛波戰敗受傷而死牛遂即牛洛
紅之子李蘊泰即偽魏王李允合併聲明所有
派兵搜捕餘匪經皖軍全數招撫逆首賴汝光
就地正法各緣由謹繕摺由驛馳陳伏乞

皇太后

皇上聖鑒訓示謹

奏

奏

籌勦張總愚擒股摺七年正月十二日

奏為張總愚擒股突竄畿南遵

旨籌派各軍由東入直相機攔勦臣趕緊布置後路
各事即起程北上督率調度恭摺奏祈

聖鑒事竊東擒任賴等股勦除後業將臣軍將士馳
逐數年疲憊已甚宜稍休養難遽遠役各實情

附片懇陳仰蒙

恩諭准予休息各營追賊南下至歲杪正初始收隊

回營人困馬乏勞苦萬狀臣徧加拊循宣傳

德意靡不感激涕零挾纊同溫旋奉正月初一初四

初七等日

寄諭飭催劉銘傳善慶溫德勒克西馬步各營迅赴河北進勦臣查劉銘傳一軍自同治四年春間奉調北征馳逐數省迄未稍休戰功最多而疲勞亦最甚臘月下旬劉銘傳自清江追賊回邳州灘上老營函稱積受寒濕傷疾並發兩腿麻木瘡癩徧體不能乘騎諄請開缺卸兵或乞假三箇月暫予調養等情臣派員前往看視患病屬實焦灼無似因屬臣弟李昭慶順道觀慰並請其由水路力疾同舟來濟甯晤商一切除夕

到濟臣與朝夕聚會精神雖尚可支惟腿疾增劇萬難騎馬肝氣上衝動輒憤怒暴急不能自已蓋由秉性忠勇追賊三年之久艱苦備嘗心力交瘁至任賴諸逆俱滅而其身亦病矣迭蒙諭旨飭赴河北彼亦以張總愚股匪亟須勦辦但體氣久虧力不從心自恨負

恩辜職惟求寬予假期臣既慄

聖訓催督之嚴又憐該提督積勞致病之苦又恐

畿疆有警無能解救旁皇中夜寢食難安合無仰

懇

聖慈暫予賞假調養俟劉銘傳病體稍愈臣即催令督隊北行欲圖勦滅張捻非該提督親臨前敵恐不能收功耳至善慶溫德勒克西馬隊共千餘名善慶所部由河南帶來七百餘名加以僧格林沁舊部黃旗馬隊三百餘名均係吉林黑龍江官兵出征十數年疲病思歸久無鬪志劉銘傳善慶屢請撤換臣以軍事緊急慮致耽延每激勸該軍如同心努力將任賴巨股撲滅定為懇

恩凱撤回旗溫德勒克西所帶察哈爾馬隊三百餘

名亦甚疲乏臘杪東捻告平善慶等即稟稱各起官兵均求撤回其時已奉

寄諭調赴直隸臣愧無詞以對將士遂函屬善慶溫德勒克西由邳州老營來濟愷切勸諭或張捻速平再行凱撤或到直隸另有他隊撥補即行撤換該副都統等深明大義已由灘上調取隊伍整頓鞍馬剋期北行善慶溫德勒克西孰習勒捻機宜惟所部大單又極疲憊不足自當一路與淮軍步隊依護既久親若弟昆若益以勁騎輔以臣軍或可為

國家捍禦疆圉也正繕摺間又欽奉正月初八日
寄諭賊竄開州井店地方與畿輔路路可通該大臣
如由山東徑趨直境督率所調各軍自北而南節
節進勦較為得勢等因並准河南撫臣李鶴年函
稱張曜宋慶兩軍在湯陰擊賊大勝但馬隊太
少不能制賊死命賊已北趨邯鄲一路臣查直
豫交界地勢平坦賊騎馳騁必速畿南各屬向
少寨堡猝被寇警蹂躪何堪聞信之餘焦憤莫
釋臣軍專勦任賴等股力竭筋疲已成強弩之
末劉銘傳適因傷病暫難遠征諸將亦多告疲

乏休養整頓實需時日以行軍常理而論本不
宜操之過盛致有蹉跌惟畿疆警報迭至必當
提師赴援臣立即檄調總兵周盛波周盛傳等
馬步十一營由徐州韓莊拔隊來濟會合藩司
潘鼎新鼎宇全軍及善慶溫德勒克西馬隊陸
續進發由東阿渡黃後視何路有警即向何路
截勦臣趕緊布置後路轉運糧餉軍火各事並
催提督郭松林楊鼎勳整飭大隊隨後繼進臣
俟部署稍可就緒即起程北上督率趨行過河
後察度賊蹤地勢擇要駐紮妥商調度庶幾稍

竭綿薄仰慰

宵旰憂勤於萬一所有遵

旨籌派各軍由東入直相機擱勒臣趕緊布置後路
各事即起程北上督率調度各緣由謹繕摺由
驛六百里覆陳伏乞

皇太后

皇上聖鑒訓示謹

奏

請飭辦堅壁清野片

再辦流寇以堅壁清野為上策嘉慶初年川楚
教匪辦理十數年卒賴此以收功即任賴捻股
流竄中原數省畏圩寨甚於畏兵豫東淮北民
風强悍被害已久逐漸添築圩寨深溝高壘到
處與城池相等是以捻逆一過即走不能久停
肆擾近年惟湖北陝西被擾最甚以素無圩寨
籌辦不及賊得盤旋飽掠其勢愈張直晉向無
捻患民氣尤為樸懦未能築寨自守張總愚本
極狡猾又係窮寇南有黃河之阻必致縱橫馳

突無處不流百姓驚徙蹂躪詎有已時徒深浩
歎且畿疆河北平原曠野古稱四戰之地無險
可守辦流賊與辦守城踞寨之賊情形迥異流
賊專於避兵守此則竄彼迎左則趨右交臂旋
失情勢使然非盡兵將之不力也聞該逆自竄
陝西北山後渡黃入晉沿途擄獲騾馬愈衆步
賊多改為騎我軍騎少步多即騎兵每人不過
一馬追逐病斃即已無馬視賊匪每人可二三
騎隨地擄添情形則又迥異自古辦賊必以彼
此強弱飢飽為定衡賊未必強於官軍但彼馬

多而我馬少自有不相及之勢彼可隨地擄糧
我須隨地購糧賊常飽而兵常飢又有不能及
之理今欲絕賊糧斷賊馬惟有苦勸嚴諭直隸
山西河北紳民趕緊堅築圩寨一有警信收糧
草牲畜老弱壯丁於內既自固其身家兼以制
賊死命及今為之亡羊補牢尚未甚晚若待深
受荼毒再議補築經費更難措籌如果十里一
寨賊至無所掠食兵至轉可買食賊雖流而其
技漸窮或可尅期撲滅伏乞

皇上特頒訓諭諄飭地方官紳妥速籌辦實力奉行

勿以空文搪塞於軍務大局裨益匪淺臣深知
擒賊無攻城技倆無奸細內應即圩寨堅密亦
不敢攻仍求隨時

申儆近畿大小官吏遇警鎮靜嚴守城隘賊必避而
他走切勿誤聽訛言驚惶遷徙致亂人心區區
愚慮敢再冒瀆上陳惟祈

聖鑒謹附片具

奏

請派張樹聲辦轉運片

再行軍以籌糧為第一要義去年圍賊運東併軍兜勦迭請

飭下山東撫臣嚴飭州縣酌提公款購備米麩草料俟追軍過境給價取用該撫遵飭各地方官照辦臣並另委員紳分投購儲嗣各軍追賊過緊日行或百數十里不及迂道借糧仍有忍飢數日未飽一餐者若毫無儲備必至誣瀆貽誤臣每與諸將討論軍情不慮捻之難打實畏兵之常飢劉銘傳轉戰最久追逐最速總以萬衆枵

腹為勦捻最苦之境臣從前往來直隸道中目擊地瘠民貧上年旱澇尤甚赤地千里米珠薪桂客軍所過欲立籌數萬人之食多賣數日之糧斷不可得此最可憂臣軍皆係南人素食大米北征以來賴曾國藩創為四鎮屯兵之議就運河淮河為糧路源源運濟倖告成功茲遽移往無米糧無運道之區辦理諸形掣肘查直隸臬司張樹聲深知軍士艱苦熟習地方情形應請

飭派該臬司籌辦臣軍赴直後轉運嚮導各事宜並

勅下署直隸督臣官文嚴飭各州縣豫提公款趕購糧草芻料各十萬斛儲備公所俟援軍過境給價取用輓轡周轉照數買補屆時如有缺誤由臣等據實奏參聞天津倉儲有粳米可否懇

恩先行借撥二三萬石責成張樹聲督率印委由水道分運河間保定大名等處儲存以濟軍食再由江蘇督撫臣照數籌運歸補臣仍咨商江蘇撫臣督同上海海道隨時由滬搭海船運解糧餉軍火至津轉運行營俾資接濟所有豫籌軍食各緣由伏乞

聖鑒迅飭施行謹附片具

奏

覆奏督軍北上摺正月十六日

奏為遵

旨據實覆奏並迅撥潘鼎新善慶溫德勒克西郭松
林楊鼎勳周盛波唐仁廉諸軍倍道入援暨臣
草草布置後路剋日親督北上先後起程日期
恭摺馳陳仰祈

聖鑒事竊臣昨因張總愚股匪突過漳河竄擾畿南
即經派撥山東藩司潘鼎新副都統善慶溫德
勒克西等軍赴直會勦及臣親督入衛各情形
於十二日馳報在案茲接奉正月十二日内閣

奉

上諭本日據宮文崇厚奏擒匪北竄衡水定州一帶
等因欽此並連奉正月初一十二日

寄諭各一道臣跪讀之餘戰慄惶憤急莫可名狀
惟奉

旨查詢劉銘傳善慶溫德勒克西各軍是否李鴻章
於接奉諭旨後未經催令起程抑係該員等任意
逗留著據實覆奏臣前已略陳梗概敢再將實在
情形為我

皇上瀝陳之查臣軍自入東勦擒以來任賴等股約

十萬衆肆擾東境兇焰鴟張臣每念此賊不平則中原之禍靡有已時即西北之憂亦未有艾而滅賊大計要必於冬春之交乘其飢困併力殄除故於運黃兩防布置穩固後即選將併兵與之角逐嚴督諸將剋日圖功諸軍耐凍忍飢日馳百數十里始棄輜重後并鍋帳而棄之各裹乾糧日夜奔逐用能仰託

威福倖立寸功自壽光大捷以後餘賊全趨海贛下走淮揚東境已無賊蹤東軍亦早回防休息而臣軍仍乘勝南下直追至揚州分至安徽之盱

昭五河等處生擒巨寇殄平餘孽年底始克歲
事劉銘傳善慶溫德勒克西於十二月二十五
六等日分起馳回邳州灘上老營潘鼎新郭松
林楊鼎勳諸軍於十二月二十九三十正月初
二三等日先後回至濟甯老營解甲暫息臣親
加拊視各士卒面無人色手胼足跛衣履不全
疲憊不堪馬匹倒斃大半迭經奏明有案仰荷
聖慈准暫予休息合營感戴

皇仁歡呼雷動劉銘傳三年轉戰勞苦尤甚積受寒
溼手足麻木瘡癩偏體不能乘騎臣因該提督

素資得力囑其始終奮勉毋得偷安而目擊其
狼狽情形策勵之餘實深矜憫臣以勦辦東捻
為己責初不料西捻張總愚一股由山右直趨
河朔又肆蔓延慮事之疏咎無可辭先奉

諭旨准劉銘傳將所部稍為休養整頓正月初旬迭
奉

諭旨催令劉銘傳善慶等赴河北進勦臣即嚴飭各
營趕緊汰去病弱添補缺額製辦衣履整備鞍
馬不准刻刻延向來游擊之師疲勞已甚須休養
整練兩三月然後可用今尚未踰兩旬也各營

向以火器制勝子藥槍礮軍裝均須配帶自去
冬輕騎逐賊鍋帳輜重沿途拋棄寄頓今奉調
遠征必應逐件收集并另行添補又糧臺分設
徐州清江領給餉項往來千里動需時日軍中
事件繁瑣有一不給難以遠行若倉猝登程徒
有赴援之名必難責赴援之效臣深悉兵艱催
令起程亦不能不畧待齊備將領各知大義既
入援畿輔斷不敢有意逗留茲奉

諭旨賊勢深入畿疆臣聞信之餘五中欲裂恨不奮
飛馳援稍紓

君父之急一切籌備各項亦無暇逐細經營除劉銘
傳患病屬實已乞

恩稍予養息暫難成行外潘鼎新鼎字全軍並善慶
溫德勒克西馬隊已於正月十六日拔營飭令
兼程由東阿德景進發唐仁廉馬勇於十八日
跟蹤北上郭松林楊鼎勳武毅勳字等營亦陸
續進發臣俟周盛波所部由徐州調到擬於二
十日親督啟行由東入直查勦捻非馬步大隊
不能得勁直境地勢平曠尤須用衆臣軍強弩
之末遷地弗良事機所值敢稍推諉但冀沿途

地方官能為預備芻糧俾無缺乏必當視賊所向繞由東北向西南攔勦聯絡諸軍或掎或角共維大局所有據實覆奏及親督諸軍北上日期謹恭摺由驛六百里馳陳伏乞

皇太后

皇上聖鑒訓示謹

奏

渡黃察辦轉運相機調度摺正月二十八日

奏為潘鼎新善慶馬步等營行抵直境徑趨饒陽
進勦臣由東阿渡黃至張秋察辦轉運催提周
盛波郭松林楊鼎勳各軍陸續北上隨時察度
賊情相機調度恭摺仰祈

聖鑒事竊臣調派各軍分起援直業於正月十二
六日兩次馳陳在案潘鼎新督率所部於十八
九日由東阿渡黃善慶溫德勒克西於二十日
渡黃唐仁廉馬勇於二十一日渡黃銜尾北發
潘鼎新二十日馳抵德州探聞賊由保定南竄

饒陽恐其久踞肆擾或東竄河間天津大局攸
關因督隊倍道邁征二十一日過直隸景州二
十二日抵阜城即改由獻縣西境徑趨饒陽臣
知該藩司勇往赴敵隊伍稍單飛飭善慶溫德
勒克西唐仁廉等馬隊趕速前進會合兜勒庶
可自當一路旋接潘鼎新二十三日獻西來函
云途遇東軍王心安潰勇紛紛回獻詢知該軍
二十二日在饒陽接仗挫衄賊馬甚多仍在饒
陽一帶該軍即趕前攔擊等語善慶等二十三
日抵德州已率部前往大約二十五六日方能

與鼎軍會合唐仁廉二十五日續抵德州據稱
沿途麩料難購馬力疲乏計潘鼎新日內早有
戰事若善唐各營趕上馬步相輔或可稍挫賊
鋒殊深焦盼聞劉松山郭寶昌兩軍已逼饒陽
北面該逆迭陷祁饒兩城其焰漸熾各軍須穩
慎進戰前截後兜此擊彼應先得一二勝仗再
厚集其勢與之角逐即難就地殲除必將窮奔
出境若以無制之師單弱之隊輕為嘗試挫敗
既易賊氣立張故兵家慎言戰以戰而必不勝
不如不戰之養威重矣捨極狡悍張總愚尤窮

寇死黨非戰勝不足以寒其膽非久戰屢勝之
軍則人馬器械徒以餉賊臣所知者劉松山湘
軍打仗甚穩郭寶昌皖軍進隊尚猛迭據該提
鎮稟報遠役久追人馬飢困恐尚不足大戰豫
軍宋慶張曜勇隊皆籍隸穎毫熟悉捻情當不
至挫現經官文相機調度諒臻妥協臣軍疲憊
之餘又勇丁多係南人一渡黃河水土食物俱
不相習此次奉調北來將領迫於大義勉力邁
行而勇夫無知竊聞北地荒旱缺糧間多逃走
亦無可如何之事臣不敢謂進戰即有把握惟

督同諸將設法激勸隨時募補體恤其艱苦以冀用其死力耳臣所調周盛波一軍由徐州北來候至二十日未到臣即自帶小隊先行起程由東阿過黃河順道至張秋運河口察看後路糧餉軍火轉運事宜兼候盛軍聚齊昨已督飭委員籌批黃運交匯於阻之處在張秋設立轉運局以通南北餉道周盛波在後督押尾隊先令其弟周盛傳率部北行頃已趕到張秋臣即日督率起行由東昌至德州再察賊情如已南趨或進駐冀州大名一帶如賊尚趨東北視何

處糧草最便暫行屯紮就近調度直境兵馬過
衆芻糧不給此最可憂屢咨緘商請署督臣官
文預籌速辦頃准函覆已令各地方官提款購
備並因張樹聲派充行營翼長難遽分身另委
候補知府張光藻赴河間一帶隨營照料嚮導
或可無誤軍食郭松林楊鼎勳大隊在濟甯整
頓軍裝深恐過河以後直東糧草艱絀難資飽
騰臣又飛催陸續進征據報於二十七八等日
分起北行黃河渡船稀少若無阻滯二月初旬
可到該軍過河後察看賊趨何路再向何路兜

勦途次迭奉

寄諭敬悉北路防軍已厚無虞鋌走下懷曷勝欽慰
臣軍自可由東南相機夾擊以取犄角之勢惟
賊善流走直境平坦千里無高山大川以扼之
兵雖多仍布不滿且強弱不齊殊未易言聚殲
此實在之事理不敢大言以取咎戾也所有潘
鼎新善慶馬步等營行抵直境徑趨饒陽進勦
臣渡黃後至張秋察辦轉運催提周盛波郭松
林楊鼎勳各軍陸續北上隨時察度調度各緣
由謹繕摺由驛六百里馳陳伏乞

皇太后

皇上聖鑒訓示謹

奏

覆陳進勦情形摺 二月十五日

奏為欽奉

諭旨恭摺覆陳並派隊進勦情形仰祈

聖鑒事竊 臣行抵德州業將籌辦防勦大畧於十一

日馳陳在案十二日接奉初五日

諭旨令各統兵大臣並各督撫均歸恭親王等節制

等因十三日接奉初七日

寄諭令 臣等抽撥馬步勁旅相機兜勦等因十四日

接奉初八日

寄諭崇厚奏賊勢逼近津南飭 臣於天津河間一帶

相機進紮等因當即分別欽遵辦理臣前抵德
州探知捻逆盤旋深州衡水交界距德甚近即
擬派郭松林楊鼎勳大隊由景阜前往兜勦十
二三日該兩軍隊伍輜重整頓齊備即於十四
日由景州武邑西北徑趨深衡之交視賊所向
會合劉松山郭寶昌張曜宋慶等軍分路壓勦
逼賊南趨頃據探報該逆連日被各軍及鄉團
堵勦情急意欲渡河南竄適滹沱河雪水漲發
衡水一帶不能偷渡臣軍又自德州進逼逆衆
現往西南逃遁等語臣初至此間不知滹沱河

上游藁城正定等處水勢若何該處有無防兵
逆蹤原無定向若不得渡必圖他竄深州一面
既有劉松山等軍排進保定防軍亦厚計無可
虞北竄臣緣東路空虛諄飭郭松林楊鼎勳從
東面兜進藉以遮蔽景獻一路該兩軍馬步四
十營素稱勁旅遇賊當可痛勦但恐我軍一到
賊已旁竄臣又屬令該提督等無論賊走何處
總須猛力追壓使之不得喘息臣即日督帶周
盛傳馬步十一營進紮景州為郭松林等後繼
如該逆越滹沱而南臣再相機進駐大名一帶

就近調派與左宗棠等會籌布置山東撫臣丁
寶楨現駐河間准咨稱該撫親督王心安七營
在河間居中調撥已派楊飛熊八營扼紮任邱
又派莫組紳十營四出追勦是其兵力尚非甚
單賊勢現趨西南河間情形稍鬆聞該處糧草
艱貴似未便兩軍並紮致多擠雜臣軍帶赴北
路者郭松林楊鼎勳為一大枝已派進勦潘鼎
新善慶等合為一枝已派扼紮保定西北礙難
移調現僅周盛傳馬步十一營隨臣護衛此外
並無他軍其零星各營尚留防黃河以南劉銘

傳因病請假所部暫未能北來倘必令臣專防
河間天津一帶應請調回郭松林楊鼎勳等勿
庸進勦由臣帶赴東北妥籌布扼丁寶楨即可
帶東軍回本境分防德州臨清東昌等處伏乞
聖明核示遵行抑臣更有陳者勦捻與勦他賊情形
迥異賊蹤飄忽瞬息百變祇須揀派大枝勁旅
敢戰宿將與之隨地兜逐相勢勦辦不能取決
進退於數十百里之外致誤機宜臣前在山東
辦任賴等股只管選將練兵不管臨敵調度諸
將皆賴臣無所牽掣得以放手勦辦倖告成功

至防捨亦與防他賊情形迥異捨賊無攻城奪寨伎倆故城寨易防而平原難防凡城池失陷必其城已倒坍或無壯丁可守也平原四達則只能守城寨城寨之外不能禁大股之不衝突馬賊之不游駛惟大山大水可以扼之直境四望寬平除滹沱滏陽衛運各河西定東定一帶畧可設法置守但人少亦不濟事此外有勦法無堵法其言防言堵似只虛聲而無甚實濟臣於辦捨粗有閱歷既有所見不敢不據實懇陳除咨呈神機營王大臣查覈外所有派隊進勦

緣由謹繕摺由驛六百里馳陳伏祈

皇太后

皇上聖鑒訓示謹

奏

追賊北上附陳籌畫情形摺 四月初八日

奏為^{微臣}行抵東昌探知賊竄東北駸及津郡臣所

派各軍節節抄前攔勦臣即遵

旨北上相機調度並附陳籌畫情形恭摺仰祈

聖鑒事竊捻逆折趨東昌各軍追勦迭勝臣由開州

繼進東郡各情於三月三十日馳陳在案先因

賊騎颺疾恐入東後逕奔東北密飭郭松林楊

鼎勳潘鼎新等倍道急馳務繞由北路沿運河

南岸儘力兜截但使賊不得渡運北趨庶可援

護津門屏蔽畿輔郭松林楊鼎勳潘鼎新善慶

等深知緩急雖值連日陰雨久役飢疲激厲軍
心晝夜趨進昨據潘鼎新善慶等稟報二十七
八日在茌平高唐等處追逐屢獲勝仗二十九
日追過平原三十日繞至吳橋日行百數十里
節節抄前攔勦惟地勢平曠西擊東奔祇有兼
程緊躡以冀會合津郡及各路追軍設法牽制
遏其竄渡以維大局等語臣冒雨趨行初六日
至東昌探聞該逆已竄滄州南皮境內距津不
遠臣所派郭楊潘善各軍均當追及左宗棠督
劉松山張曜宋慶程文炳等初五日已由德州

進景州以北計北路兵力已厚足資堵遏臣深慮各軍趕到賊又折回南擾官軍奔命不遑轉瞬又落賊後正在緘商英翰請其督皖軍進駐臨清豫籌布扼臣即暫駐東昌聯絡布置俟賊回竄就地迎擊欽奉四月初三日

寄諭以定安等兵力單薄飭臣迅督諸軍馳赴吳橋一帶扼要駐紮以為前敵諸軍調度目下賊勢駸駸北走臣雖派大枝勁旅剋期前驅心繫京畿憂惶莫釋惟有遵

旨遄行不遑顧及後路拜摺後即督同周盛波吳長

慶等營由東昌起程馳赴德州吳橋等處扼紮
就近相機調派冀補救於萬一臣查捻逆久成
流寇張總愚尤極狡猾頻年竄擾北地擄馬最
多平原曠野瞬息百里我軍步隊與為躡逐實
苦不及近來軍行日至百餘里為用兵十數年
來之變格然軍士如此奮勉猶不能迅圖殄滅
非力不能敵蓋勢不足制之也窮年累月飢走
疲憊徒勞我師誠恐一旦潰蹶難支轉生意外
之變臣不得已屢為就地圍制之請迭商左宗
棠等擬設長圍以困之無如黃河以北平坦千

里網羅難施由於地勢使然懷慶形勢最險賊
竟不肯深入張逆鑒於任賴等股之覆轍一聞
圍紮立即死力沖出亦不容我閒暇次第施工
議者言京運河一線設防感之海東一隅較得
地勢惟運河自天津至張秋黃河口計一千二
百里內張秋至臨清二百四十里年年黃水倒
灌於成平陸尤費兵力約須十餘萬人方可分
布現計直東豫主客各軍僅及十萬臣慮其有
守無戰潰決為患左宗棠慮局勢疏廓難於有
成皆係實情或又謂待賊回竄豫境分守漳衛

河及張秋至臨清運隄以感之費兵亦近十萬
又恐偏賊入晉總之圍局不得猝成賊騎難禁
紛竄卽嚴督諸軍日以追勦為事能勝賊而未
足以滅賊久且有疲師覆軍之憂可勝惴惴微臣
智術短淺於事勢之難畧有所見不敢不據實
質陳謹繕摺由驛馳奏伏乞

皇太后

皇上聖鑒訓示謹

奏

覆奏催飭劉銘傳北上片

再欽奉四月十七二十等日

寄諭以劉銘傳三月假期已滿飭催督率所部迅赴
北路勦賊仰見

聖主愛惜將材訓勵交至欽感莫名竊查劉銘傳與
臣生同鄉里少負不羈之材血性忠勇智略明
達近時武將中實所罕見蘇省肅清非臣之功
劉銘傳與程學啟之功為多任賴捨股蔓延數
省倖而殄滅亦非臣之功劉銘傳一人之功也
追逐三年疲憊實甚五年冬臣初至徐州督師

劉銘傳晤稱必欲速了此賊以求開缺歸農臣
當時望其成功許以事竣代奏去冬任柱授首
後劉銘傳迭次手書堅申前請是以臣曾附片
奏過一次明知時事多艱將材難得臣向於部
將然諾不欺未忍強逼也迨東捻全股撲滅劉
銘傳扶病來濟甯相見乞退更切其時適西捻
出竄將及河朔迭奉

諭旨令該提督統兵協勦該提督久勞致病骸腫不
能乘騎係屬實情臣不敢遽為代請開缺但請
假三月俾得靜心調養並將所部銘軍委該軍

營務處道員丁壽昌暫行代理駐防邳州認真操練以待劉銘傳假滿視師自臣援直後劉銘傳回籍就醫久無來信未知其骸疾果否全愈三月間臣因捻勢日猖生獲賊洪賊中恐劉銘傳復出時時探問臣已兩次手書專弁赴劉銘傳處諄催來營襄助聞督臣曾國藩亦為懇切函催茲迭奉

恩諭又經恭錄檄行去後惟恐驛遞梗阻該提督或藉病遷延致誤師期劉銘傳於捻情地勢最為熟悉相淮皖豫各統將素皆心折微臣文弱辦賊

之才自愧弗如可否仰蒙

恩旨令劉銘傳總統前敵馬步各軍

飛飭兩江督臣曾國藩署安徽撫臣吳坤修就近催
令迅速統軍北上與臣等共籌滅賊之方該提
督啟行時如須添募兵馬添製器械等件並請
飭曾國藩籌款助給俾無掣肘該提督通習書史素
明大義諒無不急難赴公自干清議是否有當
伏乞

聖鑒訓示謹附片具

奏

兜勦獲勝并布置大畧摺閏月二十日

奏為各軍連日兜勦獲勝並布置調派大畧恭摺

仰祈

聖鑒事竊初十日以前勦辦情形經臣於十一日馳
報在案該逆於十一日南竄高唐往平界內陳
國瑞在天官廟抄出賊前率隊痛勦擒斬甚多
倣斃悍首陳熊一名十二日東軍王正起等在
往平夜戰大勝擄獲騾馬無數張曜宋慶適至
夏津東南一帶攔頭扼截匪騎散漫徧野宋慶
等突出猛擊大股倉皇折走生擒賊騎五十餘

名奪馬百餘匹皖軍程文炳牛師韓等是日亦
在高唐迤西截擊迭有擒斬十三日陳國瑞遇
賊於往平清平之交儘力勦洗賊不戀戰向東
潰走十四五日以後又竄禹城平原一帶昨又
由陵縣之南竄往臨邑據生擒賊供逆情窘迫
時圖搶渡運河現在連旬晴燥張秋黃河口業
已斷流東昌臨清開河淺涸殊甚東皖淮軍聯
紮牆濠布置綦嚴兵力較厚似尚無虞自臨清
北至滄州運河上通衛河雖有來源日落水二
三寸西岸直東民團齊集紮牆官文派臬司張

樹聲道員歐陽正墉丁寶楨派候補道王成謙
等分投督催臣又添派直東紳士道員李逢春
袁德俊提督傅振邦前往會同聯絡督勸以冀
剋期集事一律高厚昨因水淺賊近德州上下
牆工間有斷缺之處潘鼎新帶隊由減河來德
飭令先其所急拔往景州東岸分飭弁勇過河
替修吳橋至景界長牆三十餘里又令周盛傳
帶隊由四女寺過河替修故城至德州長牆五
十餘里運西團勇見官軍通力合作為保身家
愈增踴躍旬日之間可期大致竣工有牆有水

稍資堵禦惟河道過於綿長自連鎮北至滄州
西岸有京營馬隊直省練軍協同民勇分段防
守連鎮南至臨清數百里則皆專恃民團強弱
不齊未盡可靠各省客軍俱在前敵本難分撥
南勇性情口音與北人均不相習民團既不願
與之雜處客軍亦不能全行替防臣等再四籌
維只有揀派各軍輪替出擊更番休息其久迨
疲乏須暫休息之軍即在運河東岸擇要屯駐
俟賊竄近立起迎擊以勦為防左宗棠已派劉
松山郭寶昌喜昌等軍自連鎮北至滄州減河

東岸分紮與捷地楊鼎勳等軍就近策應臣亦
飭派張曜宋慶分紮夏津高唐一帶程文炳紮
陵縣吳橋一帶遇賊回竄整隊截擊兼為運防
遮護臣前因北運河寬深礙船可以得力咨商
曾國藩飭調長江水師提督黃翼升督帶數營
前來助防昨准曾國藩咨覆已令黃翼升統淮
揚水師五營北赴張秋候調日來黃水消落各
礙船阻滯張秋不得進口殊為焦急早晚若得
大雨河水增漲礙船駛入分布運防當較有把
握耳東昌以南前派郭松林駐紮嗣因進勦喫

緊先令道員丁壽昌帶銘軍北來替防但該處
運河極涸水僅數寸仍虞地長兵單已咨商河
南撫臣李鶴年將現守滑縣之提督馬德昭六
營調往東昌以南與丁壽昌聯絡布守據報業
經啟程郭松林昨已帶隊抵德臣令與潘鼎新
善慶春壽溫德勒克西及侍衛陳國瑞等會合
由陵縣前進覘賊所向併力痛勦以期早就殲
除所有各軍連日兜勦獲勝並布置調派大畧
恭摺由驛馳

奏伏乞

皇太后

皇上聖鑒訓示謹

奏

11.7.70

(T.5)

--	--	--	--	--	--	--	--	--	--	--

議防馬頰河就地感勦摺 五月十五日

奏為捻逆竄向東北各軍分投攔擊獲勝擬偪令
南趨再圖就地感勦恭摺仰祈

聖鑒事竊捻股於前月杪敗竄西南圖撲運防當經
郭松林潘鼎新王心安等軍追躡在平境內由
西迤南遁走各情臣與英翰丁寶楨等先後馳
奏在案五月初四五日以後天氣酷熱軍士追
急疫病繁興臣飭郭松林潘鼎新等暫紮陵縣
臨邑一帶適中之地伺賊竄近邊擊以逸待勞
張曜宋慶駐軍恩縣夏津屏蔽西北運防休養

旬日令即趕緊拔赴東路輪替追勦初七八日
賊由武定陽信海豐等處北趨劉松山郭運昌
喜昌馬步各軍由東光向鹽山追勦張曜宋慶
由樂陵馳向正北春壽統所部馬隊由樂陵向
東北前進十二日午後張曜宋慶行抵鹽山之
盤村適與該逆相值樹林叢密出其不意宋慶
率副將劉廷參將蔣向鈞等由左路進張曜率
總兵程之偉副將李永芳等由右路進恐先放
鎗礮匪衆恃馬疾遁不能痛勦故皆捲旗猛入
相距既近該匪盤踞村庄正在休息經各隊爭

先進殺刀矛已及始令鎗礮連環逆衆登時驚
亂人馬倉皇悍賊紛紛倒地兩軍奮殺追十餘
里該逆始糾合大股回拒復經兩軍奮勇盪決
匪勢不支向西南狂奔我軍緊追三十餘里天
氣炎熱人馬困極始行停歇計生擒賊目李幼
順韓耿二名長髮真捻一百三十餘名短髮裏
脅七百餘礮斃斬馘甚夥並獲騾馬三百餘匹
劉松山等聞亦於是日勦賊獲勝尚未報到該
逆逕向西南敗竄張曜等恐其疾窺運河十三
日會同劉松山均繞賊西且攔且躡臣探聞甯

津已有賊蹤飛飭提督吳長慶由桑園帶隊赴吳橋攔截郭松林由陵縣挑派馬步向東兜擊該逆知西路有兵復向正南偏東往德平竄去是晚暮至臨邑城東北十餘里各村踞宿潘鼎新適駐臨邑急令步隊乘夜襲之二鼓後該逆酣睡我軍突入賊巢鎗矛兼施下家廟各村踞賊悉數殲擒五鼓收隊查點各營奪獲騾馬六百餘匹據擒賊供稱張宗先一股殲除殆盡十四日潘鼎新仍出隊跟勦計可與張曜宋慶等會合商辦矣臣查該逆窮窘之餘尤極僥倖運

東地勢平曠縱橫七八百里暑日追奔徒疲士卒尚難制賊死命且久晴之後運河日涸西岸民團協守未可深恃處處皆有鋌走之虞臣愚以為宜趁黃河伏汎盛漲時縮地圍紮以運河為外圍而就恩縣夏津高唐之馬頰河截長補短劃為裏圍偪賊西南層層布置佔地較狹困賊較易收功或可較速諸將多持此議臣已商同丁寶楨檄飭恩夏清平各屬官紳號召民團就馬頰河西北岸聯築長牆分派員弁前往督催日來漸次興築但未卜何時竣工又飭郭松

林潘鼎新周盛波等各督弁勇由臨邑陵縣接築牆壕與馬頰河民圩接氣俟將來追賊過濟陽各軍合力圍築直至黃河北岸先困賊於西南一隅再行分隊輪替逐戰庶賊騎有所限制而勦辦稍有把握所慮賊情譟詐未肯深入各軍心力不齊趕辦不及耳所有官軍分投攔擊獲勝擬偪令南趨再圖就地感勦各緣由謹繕摺由驛馳陳伏乞

皇太后

皇上聖鑒訓示謹

奏

奏

張總愚全股蕩平摺六月二十九日

奏為連日督軍追勦屢獲大勝逆首張總愚率衆
由臨邑西趨自投絕地經劉銘傳郭松林選帶
馬隊會合各軍步隊就勢兜圍據劉銘傳等馳
報六月二十八日已在荏平南鎮一帶將西捻
張總愚全股蕩平先將大概情形專摺馳報仰
慰

聖鑒事竊各軍迭次大捷賊勢衰感降散漸多經臣
等馳奏有案旋據劉松山稟報十九日探知賊
竄商河樂陵之次二十日帶隊趕到賊即向北

潰奔追二十里擒斬約二百餘名未刻又追二十餘里賊踞鹽山之保和寨劉松山於是夜初更進勦將賊衝為數起搜殺數百該逆向西敗走天明時於高粱中搜獲長髮百餘名花旗頭目周祿帶馬賊二百餘人來降復向西進追至滄州之陳古村等處該逆又向西南逃走截殺三四百名又據潘鼎新郭松林稟報二十一日賊由德平南竄郭松林是夜派夏青雲馬勇襲破賊館一處獲老捻數十名騾馬五十餘騎郭松林即督隊繼進二十二日天明抵盧塞及之

賊衆拚死拒戰潘鼎新陳國瑞張得勝等均經
趕至各有擒斬追三十餘里逆酋羅六率敗賊
三百餘騎來降郭松林收之仍追過德平西南
十五里賊忽折向東南各莊屯息仍敢馳馬回
犯郭松林與善慶溫德勒克西分東西迎擊賊
亦分兩路猛拒潘鼎新帶步隊由秫叢中分道
截擊賊遂狂走生擒鎗斃約百人是日郭松林
潘鼎新陳國瑞先後追抵商河二十三日張逆
涉水向西南逃竄二十四日已由平原向高唐
二十五日潘鼎新追百二十里冒雨至高唐聞

賊已向博平清平一帶圖撲運河幸東昌臨清張秋閘河水深各營嚴守賊不敢近又馬頰河黃水漫入先經臣與丁寶楨嚴飭該官紳於河西北岸聯築長牆數百里足限戎馬賊方詢知入我穀中竄地愈狹死期將近矣臣於二十三日奏明派劉銘傳調齊馬步即日進追誠恐各軍久追疲乏得此生力馬軍助戰或可酌就地勢一兩仗了之二十五日劉銘傳郭松林由陵縣會師南追袁保恒亦同往聯絡豫皖各軍二十六日馳抵高唐賊仍向西南竄走臣正深焦

盼間頃據劉銘傳郭松林二十八日午刻在荏
平縣之南鎮行陣中草書數百言專弁馳遞德
州內稱二十七日賊由博平向東昌迤南李海
塢竄撲河牆當經守軍擊退劉銘傳等議於徒
駭河沿河橋口紮住劉銘傳步隊由桃橋守至
南鎮郭松林步隊由桃橋守至博平袁保恒往
博平約會宋慶張曜由博平守至東昌將賊圍
在徒駭黃運之間庶馬隊可就地兜逐二十八
日早賊由西向東回竄劉銘傳當即調集馬步
迎擊該逆且戰且走追勦數里值郭松林東來

馬步全軍攔住去路又兼河道分歧水溜泥陷
劉銘傳郭松林兩軍馬隊五六千人縱橫合擊
大股賊匪全數擒斬張總愚僅帶數十騎北逃
馬勇追上該逆聞已棄馬遁入高粱叢中又聞
有投水淹斃之說劉銘傳當派鄧長安率馬隊
四路兜尋尚未回報張總愚之愛子張葵兒被
郭松林所部擒獲並拏頭目甚多尚未細查張
總愚之姪張正江率數十騎逃至南鎮正遇劉
銘傳所派駱國忠左右兩軍堵住拏獲極多約
共生擒老賊三四千人騾馬儘數奪獲詳細捷

狀容即查明續報正函稟間善慶溫德勒克西
追殺已回據稱賊已報盡各等語前來 臣面詢
劉銘傳善慶等兩起所派吉林黑龍江官兵均
稱未初由彼啟程戰事已畢四外並無游騎惟
恐有悍目餘黨逃伏秫叢中現派馬隊搜勦各
路官兵均正搜捕餘匪劉銘傳等並令降賊素
識張總愚面貌者懸立重賞四處購求無論
是死是生務得確實下落該逆本在運河圍套之
內現在河水極漲各處防軍嚴密皆欲得而甘
心斷不容其漏網張總愚本有勢窮即自尋死

不肯顯受刑戮之說其投水淹斃似尚可信除
俟有確實下落再行馳報所有各軍防勦出力
人員及防河團練擬請

恩旨飭下該統兵大臣及各督撫自行核實次第保
獎其獲捷情形並各詳細具奏外所有督軍連
日追勦屢獲大勝逆首張總愚率衆由臨邑西
趨經劉銘傳郭松林會合各軍就勢兜圍全股
蕩平先將大概情形由驛六百里加緊馳陳仰
慰

聖塵伏乞

皇太后

皇上聖鑒訓示謹

奏

卷三

三十一

查明張總愚實已投水淹斃直東肅清摺七月初八日

奏為查明逆首張總愚實已投水淹斃現得有降

賊確供各軍搜捕餘匪淨盡直東境內一律肅

清恭摺馳陳仰祈

聖鑒事竊官軍會勦擒逆全股蕩平業將大概情形

馳奏在案先是張逆率眾於六月二十六日圖

撲東昌一帶運河經丁寶楨督軍擊退是日午

後由豫軍馬德昭防段直東西南該逆偵知劉

銘傳已調六成步隊出勦銘軍所守李海務以

下地段過遠防兵甚單即於是夜初更大股分

撲李海務周家店等處河牆道員丁壽昌趙宗
道提督劉克仁總兵劉朝幹等嚴督守兵暗伏
不動俟該逆衝至運河外濠連施鎗礮逆猶不
退經開花礮彈轟入賊叢始退踞河東村莊丁
壽昌等復派提督劉盛瑞總兵丁達材帶隊出
襲賊館捨斬甚衆該逆奔向西南又於四更後
猛撲七級以北河牆鳧水競渡劉克仁督軍轟
擊斃賊無算趙宗道趕至接應賊乃敗遁二十
七日潘鼎新率隊由東昌迎截黎明過陳家口
十餘里收降李志明等二百餘人據供竄運不

能即折回東北午後過陳家集及賊於沙河逆
衆拚死回拒我軍併力壓勦追至荏平所屬之
廣平鎮二十八日潘鼎新張曜宋慶等軍由荏
平西南兜追沿途擒獲甚夥張總愚率其死黨
銳向北面竄逃適劉銘傳郭松林善慶溫德勒
克西馬步各軍攔頭截擊並先將徒駭河各橋
口分銳扼紮斷其去路各軍四面圍勦擒斬殆
盡其戰狀前已備陳嗣據劉銘傳郭松林查明
張總愚之兄張宗到其弟張宗先姪張正江及
其族人張元即平頭王並賊中帶隊頭目陳大

老坎三老坎四老坎馬老三樊大等均於陣前
擒殺惟據擒賊供稱張總愚於亂軍中先帶數
十騎逃走經官軍追急餘賊潰散該逆僅帶八
人向東北秫叢中走去劉銘傳等派隊四路跟
尋杳無蹤跡當令道員余思樞率同淮軍各馬
隊搜捕餘匪附近各州縣尋覓殆徧數日以來
已無一賊但聞民間紛傳張總愚投水淹斃旋
據統領豫軍張曜稟稱該營續收降賊王雙孜
供稱是日實隨張總愚逃至徒駭河邊親見張
總愚棄馬投河淹斃當飭將王雙孜解送德州

臣督同候補京堂袁保恒等親提訊問據供跟隨張逆九年二十八日之敗張逆帶小兵八人逃走王雙孜即在八人之內張逆自稱罪孽已重無可求生先欲逃過黃河無奈黃水漲漫萬不能近走至徒駭河濱勸令隨從七人各自逃命張逆即下馬脫衣投水而死等語臣再四研訊王雙孜人尚老實所供張逆投河時情節語氣歷歷如繪證之各營降衆所稱張總愚平日屢說事急必自尋死不肯顯受刑戮亦屬相符是其投水伏誅毫無疑義惟刻下黃水盛漲灌

入徒駭深不見底事隔多日該逆屍身隨水漂流必已腐爛無從尋認謹照抄王雙孜供詞恭呈

御覽仍將該降人羈留在營備質各處逃匿餘匪業經搜捕淨盡並無一名漏網各路官軍均已撤回原營暫行休息再陸續凱撤回省臣伏查捻逆倡亂十數年流毒數省去冬任賴等股倖就削平不圖張總愚渡河北竄震驚

畿輔仰累

宵旰憂勞徵兵籌餉日昃不遑皆緣臣等督師無狀

致此疎虞負咎滋甚四月間賊竄運東臣稔知
流寇非圍制不行因與左宗棠官文崇厚英翰
丁寶楨等議就直東運河滄州減河圍築長牆
欲趁伏汎盛漲時盛地兜減其時地廣兵單有
劉無防經臣咨商官文棟派直隸臬司張樹聲
道員歐陽正墉督飭沿河民練修守長牆丁寶
楨亦派道員王成謙接修東境河牆直屬團練
修守本境及協濟東境者工費甚鉅全局有裨
六月十六日張逆率衆猛撲景德之交倖獲保
全臣又商同丁寶楨督勸民團就馬頰河西北

岸至陵縣臨邑一帶聯築牆濠作為裏圍該逆
被創勢窮南遁自投羅網各軍乘機緊追就地
兜勦遂得迅速殲滅都興阿左宗棠及臣等始
願皆不及此實賴

聖主鴻福

廟堂決勝於上神機營暨諸王大臣控制於中各省
將士奔走効命於外乃使跳梁小丑醜迅就蕩平
為中原軍務一大結束微臣躬在行間獲睹

昇平愧無絲毫補助祇有私衷慶忭而已所有勦賊
最為出力人員謹先核開清單懇

恩准予優獎餘俟查明彙案分別奏獎所有逆首張
總愚實已投水淹斃各軍搜捕餘匪淨盡直東
境內一律肅清各緣由謹由驛六百里加緊馳
奏伏乞

皇太后

皇上聖鑒訓示謹

奏

卷三

六十二

請入覲片七月初八日

再軍事大定所有安插降衆裁撤營勇各事宜
自須次第妥籌辦理臣擬飭所部各軍漸移南
下以便就近措置惟臣自咸豐三年正月奉

文宗顯皇帝派往軍營團練防勦嗣由編修存升外任
疊蒙我

皇上不次之擢計五年蘇撫兩署江督再調楚督臣
固未嘗一日不在軍中祇緣兵事餉事責任繁
重每於奉

命拜官之時不敢循例請

覲瞻戀

闕廷夢魂飛繞茲值中原奠定微臣解甲有期犬馬戀
主之誠不能自己可否容臣將行營緊要各事料簡

粗畢即輕騎馳赴京師恭覲

天顏跪聆

聖訓俾一切得有遵循如蒙

俞允臣軍有劉銘傳郭松林潘鼎新等各統將在營

會商照料暫可放心俟臣由京回營再與曾國

藩丁日昌會商籌借餉需陸續遣撤現在勤檢

事竣所有臣原領

欽差大臣關防一顆應否由臣賁京恭繳之處伏候
皇太后

皇上聖鑒訓示遵行謹附片具

奏

請加恩從前督辦諸臣片

再擒逆倡亂已歷十數年雖未多踞城池其善
攻善守亦不及粵匪而剽悍善戰實過之從前
督辦諸臣如前

欽差大臣僧格林沁袁甲三等皆疊次掃穴擒渠戰
功卓越雖未克悉數蕩平其滅賊之心久而愈
奮今在事各軍馬步多係該前大臣等舊部愴
懷遺烈莫不感激涕零至現任大學士兩江總
督曾國藩接辦年餘謀定後戰雖未立見速效
而長牆圍制之策實已得其要領臣得變通盡

利以竟全功實自曾國藩開之且自回任後事
事與臣和衷共濟籌餉籌兵不遺餘力忠懇之
誠無間去留現幸仰託

聖主威靈中原底定可否分別

加恩以慰忠盡此外凡勦擒以來文武大員歿於王
事者可否

飭部查明一律

推恩用廣

皇仁而作士氣出自

皇太后

皇上逾格鴻慈臣愚昧之見是否有當伏乞
聖鑒訓示謹附片具

奏

--	--	--	--	--	--	--	--	--	--	--

覆議凱撤南勇並籌西事摺 七月二十日

奏為欽奉迭次

諭旨恭摺覆陳仰祈

聖鑒事竊奉

寄諭以崇厚英翰所陳善後各條令臣等安速議奏
查崇厚前奏體恤將領擇養驍健選拔西征三
事業奉六月初七日

諭旨飭准照辦當經傳知所部將弁兵勇無不踴躍
歡呼用能剋期滅賊嗣奉七月初五日

寄諭抄示英翰所奏各條內稱裁撤直隸練軍留勇

三
扼紮一節接准官文函稱宣化練軍地居獨石
張家等邊口遵化軍則

東陵重地且近接邊關保定軍則省會要區屏蔽近畿
擬於此三處汰弱留強未敢悉議裁撤至南勇
久戰之餘誠為勁旅但慮直民愚蠢或未能耕
鑿相安等語似係老成慎重之見臣愚以為兵
丁之不得力非獨直省為然軍興幾二十年其
初調兵多而募勇少而賊勢日猖厥後去兵用
勇規制一新粵匪擒匪次第削平功效大著蓋
由緣營習氣太深分布太散兵丁大半驕惰將

弁又不一心勇則募自田野多樸拙習苦之人
統領營哨各官自行挑選一氣呼應易於効命
惟有事之時募勇以救急應變無事之時練兵
以緝盜安民是皆不可偏廢欲化弱兵為強兵
立法與用人二者不可不大加變通目下軍事
大定勇丁逐漸裁撤各省綠營漸復舊規必須
及時整頓

畿輔拱衛關係尤重若專用本省兵勇人地自較
孰習防務亦可經久惟須將領得人認真簡練
耳欽奉初九日

寄諭飭將各省征軍撤回大河以南責令在防京兵
及本省官兵搜捕餘匪毋庸借撥客軍致多擾
累似可無須留勇扼紮矣 臣所部淮軍均係南
人轉戰六七年去家數千里久役思歸本是人
情若留駐北方開革告假往返不便米糧藥械
接濟難常即嚴為約束而兵與民素不相習久
亦未必相安 臣不敢不鯁鯁過慮也至皖省應
留重兵並免查究前案一節英翰在皖年久熟
諳民情所請於皖軍內挑留一萬二千人分為
四枝選派將領分駐要地聯絡彈壓並請

明諭宣示凡擒逆未平以前所有為匪之人已經投誠遣散一律准予自新不准該處紳團再行尋仇控殺地方官吏亦不得藉端苛求此後再有作奸犯科責成地方官嚴辦以安反側而遏亂萌實係因時制宜之策應請

敕下兩江督臣安徽撫臣遵照察度妥辦臣復查安徽之潁亳宿蒙江蘇之徐海山東之曹沂河南之歸汝各屬地界毗連風氣獷悍自古中原禍亂大率萌蘖於此擒匪起於蒙亳煽聚勾結徧及東豫擾攘數省今倖而撲滅散勇降衆惟皖

徐豫東交界之人為最多即使設法安插而民貧地瘠生計艱難勢不能人人得所目前兵威鎮懾斷不可少尤須地方大吏慎選嚴明廉惠之牧令加意教養認真緝捕安徽撫臣宜常駐潁壽一帶就近督察控制並懇

飭下江皖東豫各督撫曉諭交界各州縣圩寨團練照舊整理以期化莠為良即有滋事散勇零股馬賊亦不得逞志矣至崇厚奏稱弁勇有願西征聽其自行報名英翰奏稱西征宜專用一軍前往一節臣查陝甘回匪股數雖多皆係土著

有巢穴室家之戀非粵捻各逆肆亂外省者可
比辦法宜勦撫兼施逐漸措置左宗棠前次面
稱該處兵力尚非不足各營將弁自西來者僉
謂不患戰之不勝而患無糧可購無水可飲是
以雷正綰曹克忠楊岳斌等所部皆係勁旅終
歸潰散鮑超所部亦屢調不前就現在情形而
論左宗棠全軍盡留在陝即甘境各軍不聞兵
單只聞糧絀是其所急不在添兵而在濟餉與
籌糧也自來西陲用兵遠或數十年近或十餘
年而後定蓋屯田轉運均極迂遠非旦夕所能

奏功該處民久乏糧至無民則何從覓食兵已
乏食若添兵則徒以釀亂說者謂移得勝之師
以圖大舉似是兵家常談而於西事利害得失
之故未深究耳左宗棠老於軍事所部將弁必
不乏人若有餉有糧隨地募練可得驍健勇丁
斷不宜強調他軍轉難得力現在各營將領征
戰多年甫經凱撤皆欲沐

朝廷寬大之恩乞假休息弁勇亦尚無報名願往者
大抵將之於帥弁勇之於將皆須恩信素孚忠
奮易生廉頗思用趙人自昔為然且用勇與用

兵迥殊兵可互調而勇不可改調與其改調不
如另募此行間實在下情不敢稍有隱飾也以
上三事為善後大端微管見所及謹繕摺據實
由驛覆陳伏乞

皇太后

皇上聖鑒訓示施行謹

奏

--	--	--	--	--	--	--	--	--	--



卷三



一

張總愚投水確實並各軍裁撤片

再逆首張總愚投水淹斃前據降人王雙孜口
供錄呈在案旋又據豫軍張曜等解送續收降
賊王結巴臣親加研訊亦在張總愚逃走八人
之內所供與王雙孜相符是其投水伏誅毫無
疑義是日全股殲除張逆亦斃嗣經各處搜捕
並無實在匪蹤惟各營未撤游勇降衆冒混難
分民間不無驚擾自以撤軍安民為最要豫軍
宋慶張曜等已於十六日拔隊由臨清南樂一
帶回豫長江提督黃翼升統帶各營水師並姚

廣武所帶清淮水師均趨閘河有水分起回南
臣部各軍遵

旨即令劉銘傳郭松林等陸續移撤由張秋渡河暫
行分紮徐州濟甯周家口各要地以資鎮扼俟
臣赴京

陛見南旋後會商曾國藩等籌補欠餉徐議裁併陳
國瑞亦來德州稟商撤遣臣為咨催江西浙江
協餉飭該員一面妥為資遣侍講學士袁保恒
因臣處軍務已竣仍飭回京候補王萬釗所統
勦軍駐防滄州減河在崇厚函商暫留鎮守俟

各軍遠撤再令凱旋善慶溫德勒克西所部馬
隊出征年久疲苦萬狀臣本允俟捨股蕩平即
行撤回迭經奏奉

俞旨茲奉初九日

寄諭飭該副都統管帶回京暫駐南苑已飭糧台趕
給餉項以便剋日赴京惟善慶馬隊由豫省調
來者向食豫餉積欠甚鉅臣咨緘撫臣李鶴年
迅速解濟未知能應手否鹽山南皮慶雲一帶
蹂躪最苦鹽梟素多此次投賊者雖殲斃不少
將來客軍撤盡難保無土匪飢民乘間搶劫應

請

飭下官文崇厚督飭地方官認真撫卹並酌派本省
兵隊就近巡緝以安良善而清亂源所有餘賊
肅清各軍陸續凱撤及責成地方文武撫卹巡
緝各緣由謹附片縷陳伏乞

聖鑒訓示謹

奏

銘軍暫紮張秋摺八月初八日

奏為各軍陸續凱撤遵

旨飭派銘軍暫紮張秋迤北兼顧畿南一帶以資鎮

撫臣將各事料理粗畢赴京

陸見起程日期恭摺仰祈

聖鑒事竊迭奉

寄諭令將所部並各營兵勇陸續移撤大河以南臣

於七月二十日附片覆陳大畧在案自二十一

日以後東皖各軍分起渡河適值河南上游漿
澤漫口河水驟落兩岸淺灘淤沙陷没人馬渡

船亦少直至月杪皖軍始漸渡盡郭松林所部
八月初一二日由東昌啟行潘鼎新所部初三
日由德州啟行沿途遇有零星散勇無論何軍
業飭潘鼎新等押帶過河資遣回籍勿任逗留
滋事其駐防滄州減河總兵王萬釗所統勦軍
現因直境各軍遠撤檄令營務處道員段喆馳
往會同王萬釗統率該軍由運西取道南下妥
為約束周盛波唐仁廉張樹屏所部亦均令陸
續分起南渡欽奉七月十六日

寄諭毛昶熙請飭劉銘傳統帶所部在大順廣一帶

駐防八月初五日

寄諭英翰請飭劉銘傳扼駐畿南均令臣妥籌具奏
查直隸所屬地方南勇久駐與民情恐不相習
運餉購糧亦多不便前月二十日臣已專疏陳
明劉銘傳所部紀律素嚴在東省威信尤著該
軍統領提奏臬司劉盛藻丁壽昌謀勇俱優劉
銘傳倚之如左右手今春劉銘傳與劉盛藻假
歸丁壽昌代統銘軍調赴東昌堵守運河嗣劉
盛藻先行回營操防整肅該處紳民感頌頃因
張秋一帶游勇較多爭留該軍暫駐彈壓劉銘

傳以臣將入都

陸見奉

旨飭將在營兵勇移撤過河妥為鈐制與臣再四熟
商銘軍駐守事宜暫交伊姪劉盛藻代統可期
穩練該提督即先赴濟甯徐州會商諸將妥籌
安置並擬馳往金陵商請督臣曾國藩籌借餉
項議補舊欠俟臣南旋再行酌定分別撤留茲
奉

旨應否飭紮畿南以資鎮撫著臣統籌全局具奏等
因查直省兵燹以後民氣彫瘵地方安靜暫可

無事似應與為休息若驟調大枝客軍移紮近畿轉使自相驚疑毛昶熙英翰皆慮日後或有他警遠處徵調不及蓋為黃河所阻最滯師行今銘軍暫紮張秋迤北西距大名僅一百八十里北距河間屬境亦不甚遠尚可就近兼顧畿南該處兵民相安兼之張秋一水下達清江采辦米糧轉運餉械接濟較便萬一再有戰事劉銘傳必兼程赴營督勦平日操練巡防各事劉盛藻實能維持不敝將來曾國藩若赴直督新任劉銘傳當更樂為効力也 臣將諸事部署粗

畢擬於初十日自德州起程由天津通州入京
稍伸戀

闕之忱並遵

旨將原頒

欽差大臣關防齎帶至京恭繳敬謹覆

命現在德州上下一帶居民復業恐臣北行後或有

游勇散匪滋擾派提督吳長慶統親兵數營暫

留德境鎮撫俟臣出京後一併督帶南下以臻

妥慎所有各軍陸續凱撤飭派銘軍暫紮張秋

迤北兼顧畿南及微臣赴京

陸見起程日期謹繕摺由驛覆陳伏乞

皇太后

皇上聖鑒謹

奏

請修曲阜孔廟片

再山左為聖賢桑梓之邦十餘年間捻匪會匪蹂躪殆徧兗曹兩府尤屬捻匪出入衝途臣上年駐師濟甯距曲阜僅九十里東捻肅清以後親率僚屬祇謁

孔林瞻仰

聖廟榱桷剝落丹漆黯然尼山書院鞠為茂草怒馬傷懷詢之行聖公臣孔祥珂據稱軍興以來屯產荒廢入款不敷歲修久輟屢次估工皆因經費無出而止臣維弭亂之道以倡明正學為

表三
先東民居近聖里被澤尤深年來兩次平糶均在東境臣方以貽害偏隅為憂凡築牆濬濠借用民力之處諭以大義無不樂從各處紳團捐助糧草協勦竄賊亦甚踴躍以此見民心大可恃而聖教之推暨廣也曲阜

孔廟實為我

朝重道崇儒根本之地自應及時修葺俾壯觀瞻前年大學士兩江督臣曾國藩督師過謁曾倡此論比以軍務倥傯未遑定議臣謹查

林廟各工多有坍塌一律興繕需款浩繁目前財

力實不能逮惟

大成殿九間檐宇脫折久之必有傾塌之虞擬請
飭下兩江湖廣督臣於該省撤軍就緒後各速籌銀
二萬兩彙解山東並由山東撫臣在本省籌銀
二萬兩遴派妥員鳩工庀材擇要興修務期輪
奐維新以仰副

皇上偃武修文之至意謹附片具

奏

會籌分別遣留各軍摺

十一月十日
會馬新貽丁日昌

奏為會籌大局分別遣撤留防各軍恭摺仰祈

聖鑒事竊臣鴻章於

陸辭後南旋經過德州將吳長慶所部並親兵各營
督帶過河順往張秋察看劉盛藻銘軍分防布
置情形尚為嚴整即由濟甯徐州宿遷一路接
見各統領飭將弁勇久役思歸者補給欠餉先
行陸續遣散計劉銘傳銘軍裁遣馬隊一營潘
鼎新鼎軍裁遣馬隊三營步隊八營郭松林武
毅軍裁遣馬隊七營步隊十營周盛傳盛軍裁

遣馬隊二營唐仁廉裁遣馬隊三營張樹屏樹
字步隊三營全行撤遣已故提督楊鼎勳所部
勳軍由滄州減河撤回現飭營務處道員段喆
會同王萬釗等裁遣勳字馬隊三營步隊十營
合共遣撤馬步隊五十營勇夫已踰三萬人臣
於十月二十六日馳抵江甯省城會商曾國藩
等通籌大局僉以淮勇只可酌裁不可盡撤中
原及東南各省粵捻諸逆擾攘幾二十年費無
數人力財力艱苦經營始克奏功臣身在局中
極知挽回之不易矣現在用兵甫靖省分降衆

散勇無業可歸會匪游民到處勾結徒以懾於
軍威不敢妄動亂機之來往往起於微而乘於
忽若不稍留勁旅以資鎮壓一有警變召募遠
調均趕不及必將不可收拾惜目前之小費忘
日後之巨患臣等何敢出此茲公同酌定銘軍
馬步人數較多紀律素嚴暫令臬司劉盛藻統
帶駐紮河北東昌張秋一帶曾國藩以直隸練
軍尚未定議北路不宜太空俟履任有期當再
察酌調遣濟甯居南北要衝藩鼎新所部僅留
七營兩哨駐防該藩司到任後隨時稟商山東

撫臣相機酌辦江蘇徐州毗連東皖豫邊界土
匪出沒無常最為重鎮除該鎮弁兵分汛巡防
並馬步勇隊四營仍嫌單薄擬暫留提督吳長
慶步勇八營馬隊三營擇要駐扼會同徐州鎮
道協力妥辦又蘇境沿江千餘里伏莽殊多空
虛尤甚擬令道員段喆俟撤遣就緒帶勳字五
營擇要移駐與長江水師聯絡巡緝稍壯聲威
金陵為東南關鍵城大兵單現經曾國藩留湘
勇星豫三營駐防城內臣鴻章擬留總兵劉玉
龍開花礮隊一營仍紮下關江口均交臣新貽

等酌量調遣 臣鴻章將赴湖廣本任該省居上游四戰之地游匪肆行防勇尚未盡撤非帶親軍前往難資鈐制擬將提督郭松林裁贖步隊五營總兵周盛傳裁贖步隊九營馬隊三營並親兵鎗礮隊二營調令隨去以便汰弱留強如將來江皖稍有蠢動即調回策應以顧全局以上留防各軍 臣等再三籌議按時度勢因地制宜誠屬必不可少餉需已漸節省除藩鼎新所部月餉向由山東解濟現以本省藩司裁贖之軍留防本境應請

旨仍飭東省酌減籌濟其餘各營本食蘇餉應由蘇省分別籌解接濟仍由臣等隨時會商妥酌俟各路游勇斂跡邊患漸紓地方可臻奠固再行次第撤裁似於南北善後大局較為穩慎曾國藩晤商定議後於十一月初四日起程北上屬臣等會銜繕疏所有分別遣撤留防各軍緣由謹會同大學士調任直隸督臣曾國藩合詞恭摺由驛具陳伏乞

皇太后

皇上聖鑒訓示謹

奏

奏

奏

川鹽分成派銷摺 八年七月二十九日

奏為遵

旨妥籌川鹽行楚體察情形未可遽禁暫行分成派
銷恭摺覆陳仰祈

聖鑒事竊臣等前准軍機大臣字寄同治七年十二
月十一日奉

上諭曾國藩奏請禁川私入楚收復淮南引地當交
戶部議奏茲據該部遵議辦理著即將川鹽行楚
章程妥籌停止至曾國藩所稱准鹽並收鄂釐淮
銷果暢鄂餉即可加增將來所收鄂釐較之川稅

收數能否不至大相懸殊著李鴻章等體察情形具奏等因欽此並准抄寄戶部原摺前來臣查兩湖為淮南引地銷路最廣曾國藩原奏以楚岸興廢關係淮南大局欲及時力爭圖復舊制誠為正辦臣同治四五年在署兩江總督任內亦嘗持此議而未果行去冬由金陵經過馬新貽復以籌禁川鹽諄諄見屬臣方慨然許之今正蒞任後接見官紳徧加訪詢此次由鄂西上所過皆川鹽行銷地界沿途逐細查察衆論僉爭以為川鹽行楚不可遽禁者蓋有六端請為

聖明縷晰陳之湖北宜昌一帶未經兵亂以前向為川私充斥雖自巴東以下沿江設卡晝夜巡守而峽江勢若建瓴瞬息百里人力難施無從堵截荆宜名為淮岸訪之耆民百餘年來從未有食淮鹽者自咸豐初年設局收稅化私為官商民稱便悉就範圍若明示停截川鹽既無可權之稅成本愈輕奸販愈多勢必徧地皆私不可收拾無益於淮而有損於鄂此不可遽禁者一也鄂省施南一府及長樂鶴峰兩州縣向係川鹽引地歸州巴東又有借食川鹽之例本不得

盡謂之私川省捷為廠鹽專行貴州近緣黔邊
不靖繞由湖北至湖南常沅永綏入黔若禁川
鹽入楚豈能併向例行楚及應由楚運黔者概
禁之耶既不得一併禁止則官私牽混勢將不
可究詰是以上年秋間郭柏蔭奏停票路鹽稅
禁止入楚而於川鹽未敢議及部議以楚省地
居四達私鹽處處可通洵屬瞭然形勢臣屢飭
弁兵協同淮局委員分赴黃德襄棗等處堵緝
北私潞私而地痞梟販恃為營生往往糾眾拒
捕釀成巨案欲圖疏銷淮鹽不得不逐漸整頓

若再堵川鹽川淮並行已久必更譁然茲事利未睹而害先見此不可遽禁者二也鹽有川淮之分地有淮楚之別而天下大同總歸於籌餉淮鹽在鄂每百觔共取課釐銀壹兩貳錢川鹽入楚每百觔取正加稅及公費錢一串八百文其數不相軒輊若禁川鹽而川私不可盡堵從前所收川稅又不能取償於淮鹽

國家每歲徒棄百餘萬之餉爭引地之虛名受虧帑之隱患殊為不值此不可遽禁者三也鄂省財賦以鹽與釐為大宗川鹽課費其指款坐撥

者每年荆川滿營二十一萬有奇戶部十萬內
務府五萬固本京餉六萬荆宜留防水師二萬
數千兩皆絲毫不容短缺此外甘省協餉本省
軍餉大半取給即停川鹽而淮銷果暢淮釐分
給數省現擬每引協鄂約及四兩較之川稅收
數仍必大減而本省待用又無可稍減儻淮銷
竟無把握屆時另請改撥部臣亦有為難此不
可遽禁者四也川引額派各州縣行銷自行楚
後始不至積壓且於完課外加捐加釐每引一
張銀錢併計約六十餘兩每年改配運楚川省

可多得七十萬兩為接濟鄰餉大宗况聞川鹽
行楚井竈捆載增至數萬人重慶肩販川河緯
夫又不下數萬人此輩皆無業游民易聚難散
猝議封禁則失業太多後患難言想吳棠等亦
未敢遵辦此不可遽禁者五也凡民可與樂成
難與圖始鄂省借銷川引將二十年沿江上游
食慣川鹽市價較淮鹽每觔多錢十數文或二
十文不等而民皆利之蓋由川鹽色味俱優價
錢隨市起跌故行銷甚暢淮鹽色味俱劣價錢
定有額數故行銷甚滯小民好惡本有恒情勢

難以日用細故強所不欲若加迫脅必多擾累
此不可遽禁者六也以上數端係目前實在情
形所謂及之而後知履之而後艱臣何敢匿不
上

聞致誤大局惟既准部臣與曾國藩等議復舊制
仰蒙

聖訓諄飭妥籌又不得不設法遷就迭經函商兩江
督臣馬新貽派員在於荊州沙市設局配銷暫
定為川鹽八成淮鹽二成試行籌辦以期漸減
漸復並出示剴切勸諭商民一體遵照如尚有

窒礙再隨時會商變通辦理以求有濟其川鹽
收稅章程仍未便遽行停止轉滋流弊所有川
鹽行楚體察情形未可遽禁暫行分成派銷緣
由謹會同湖北撫臣郭柏蔭合詞繕摺由驛覆
陳伏乞

皇太后

皇上聖鑒訓示謹

奏

查覆川黔教案十月初三日

奏為欽奉疊次

飭查川黔民教各案先將大概情形並派員赴黔會
查恭摺覆陳仰祈

聖鑒事竊九月初八日在四川順慶府途次承准軍
機大臣字寄同治八年四月十八日奉

上諭酉陽州團民殺斃教民教民殺斃團民一案著
即會同崇實吳棠悉心籌辦等因欽此九月十八
日馳抵成都因將前奉

密諭事件逐細查辦未便遽與崇實吳棠會商先咨

取全案卷宗詳悉披閱證以途間所聞大略相同除民教仇殺各情業經崇實等據實

奏明並將委勘辦理情形及民教互殺人數造冊咨送總理衙門外卷查李國安即教士李國確係洋人其燒殺李國安之兇手係已就拏獲倡亂打教焚毀教堂之首犯劉幅審有初供可據應俟將該犯覆訊並飭提餘犯研究明確即行按律治罪以服洋人之心至覃教士率衆殺斃平民多命之案該教士覃輔臣聞係川人亦應按照條約由中國官嚴拏審明照例治罪以昭

平允惟據稱主教范若瑟七月間回國覃教士
隨之而去未知確否臣遵即商同崇實等相機
妥籌設法次第辦理似不致別生枝節又於九
月二十五二十七等日疊奉九月初五十三等
日

寄諭遵義教士被傷殞命事關中外交涉要件著即
派委通曉時務之員馳赴貴州會同曾璧光迅速
查明秉公辦理據實具奏仍著總理衙門隨時咨
催妥速辦結各等因欽此伏查此案起衅情由法
使與貴州撫臣所稱大相徑庭不知實在底裏

何似臣所帶隨員無多且乏熟悉洋務之人惟
查有按察使銜甘肅補用道余思樞隨臣最久
結實可靠已派令馳往遵義一帶察訪確情據
實稟覆並面授機宜飭隨時稟商撫臣曾璧光
會同該撫所派委員督飭官紳妥為籌辦黔省
軍務未平民氣浮囂教士恣肆若辦理稍有偏
重則仇隙必將愈深既患民心憤激而事變茲
多又恐教士尋衅而禍端莫測較他省尤為棘
手若如法使所稱勒令教民跨越十字架跪寫
出教甘結及趙教士被傷殞命梅教士恐亦被

殺等情則必先有以安撫教士之心使不致愆
惠法使在京曉讀然後相機持平從容解釋民
教仇隙庶可弭釁端而紓

宸廑案關中外交涉要件必宜責成地方官速辦而
洋人堅韌嗜利邊民衆憤難平恐難剋期了結
已飛致曾璧光囑將現辦情形先行

奏咨勿稍諉延臣俟會同崇實吳棠籌商就緒即
起程順往重慶就近體察各情再行據實奏

聞如果事機稍鬆仍速回鄂清理本任公事所有川
黔民教各案大概情形及派員赴黔會查緣由

合先繕摺由驛六百里覆陳伏乞

皇太后

皇上聖鑒訓示謹

奏

李肅毅伯奏議

及門吳章汝洪鈞編輯

卷四

籌陳援黔大畧摺

酌籌援陝派撥摺

帶軍赴直摺

行抵直境分兵邊界摺

起程赴津并陳教案情形摺

覆奏劉銘傳督辦陝西軍務摺

籌議天津機器局片

裁併通商大臣酌議應辦事宜摺

籌議天津設備事宜摺

遵議日本通商事宜片

籌議口外辦運庫科駐兵摺

籌議口外調兵運糧緩急摺

查閱大沽礮臺片

幼童出洋肄業事宜摺

籌議製造輪船未可裁撤摺

密籌調員接統銘軍摺

奏報機器局經費摺

1901

試辦招商輪船摺

宋慶暫緩赴甘片

籌議黃運兩河摺

請行海運片

酌定各省協賑摺

統籌工賑事宜摺

派隊航海防臺摺

籌議海防摺

籌辦鐵甲兼請遣使片

籌議海防六條

--	--	--	--	--	--	--	--	--	--	--

遵

旨援黔籌陳大畧摺 同治九年正月十三日

奏為恭謝

天恩籌陳大畧情形仰祈

聖鑒事竊臣於同治九年正月初七日承准軍機大臣字寄八年十二月初七日奉

上諭貴州軍務日久未有起色著即馳赴貴州所有川楚貴州各軍均歸節制倘各軍不能得力即行裁撤咨明崇實吳棠劉崐將此項兵籍仍解赴李鴻章軍營充餉該督上年凱撤之師其中不乏驍

勇者即酌量奏調赴黔廣西防邊之兵如須調赴黔省會剿並著酌度辦理李翰章署理湖廣總督著將應解餉需源源轉運此外協黔各省著李鴻章曾璧光隨時咨催接濟等因欽此並奉是日明發

諭旨一道臣當即恭設香案望

闕叩頭謝

恩伏念臣以駑鈍之資屢膺軍旅重任茲因黔苗負固仰蒙

授鉞專征敢不殫竭愚誠力圖報稱惟苗疆構亂幾

二十年將帥迭更迄未底定固由兵威不盛實由餉項太虧近年川楚派兵進援聲勢稍壯甫克數城而事機中沮臣自上年莅楚入蜀竊嘗深求其故湖南席寶田等軍先後添募三萬人分紮數路月需餉銀十七八萬兩聞每月僅能籌發二十日口糧四川唐炯等軍先後增募一萬八千餘人歲需餉銀百餘萬聞已欠至五十餘萬將士藉口餉缺不克進取若遽加裁併又無力補發欠款黔省主軍自張文德都勻饑潰後劉士奇接署提督亦苦募練無資各省派協

月餉非不肯籌應只以兵燹之後財力維艱京
甘各緊餉急於星火不得不儘先湊撥即不得
不置西南邊患為後圖茲奉

飭由臣等咨催臣何能強其力所不逮者而使之遵
辦是川楚有著之餉尚不足以自贍其派援之
軍黔餉雖名奉部撥而實為無著臣身歷行間
十數載稔知無餉則兵不可用今黔餉奇絀臣
奉

命前去並未奉增的實餉款必仍不免師老無功之
譏此餉事之為難也黔地跬步皆山苗巢險悍

尤在貴東一帶與湖南邊境毗連周迴數千里
荒巖密菁猿壁獠崖非人迹所能到外間勁旅
扳援上一峻坡已喘息不能行動雖數路進剿
往往岩谷所阻十里五里聲息難通又溪峒毒
瘴疫癘時作最不宜於客兵與平地用兵迥異
上年三月楚軍黃飄之敗距川軍紮營處僅隔
數十里援救無及此其明證苗人自佔巢穴本
無遠志但欲剷除斷難剋期易曰高宗伐鬼方
三年克之東漢時劉尚馬援皆中興名將乃以
征苗敗沒我

朝雍正年間鄂爾泰合數省之力經略九年甫定而復叛嘉慶初年福康安移師討苗亦合數省之力深入不利後十餘年而始定成事具在班班可考今頑苗梗命愈久蹂躪愈廣收拾愈難非有勁軍鉅餉期之歲月何能立見功效臣去春接曾璧光來函謂上下游可指日肅清而崇實吳棠劉崐等奏報每有徼倖目前一鼓盪平之語似於事勢尚多隔膜臣自揣才力遠遜前賢時會艱難更百倍之向來督剿粵捻所部將領習於平地戰陣於山險煙瘴之區誠恐遷地

弗良用他人已成之軍又慮心志不一此地勢
軍情之為難也自來用兵必先講運道曾國藩
與臣先後剿捻皆於金陵設總糧台清江徐州
濟甯州口分設轉運局臣上年赴直援剿又於
張秋德州天津增設轉運數千里糧餉軍火轉
輸不絕前敵乃無掣肘今忽易北而南沿途必
須籌辦而轉運非水道不行查由江鄂上至黔
境後路須由長江前路須由灘河節節逆流挽
運遲滯川河灘高水險由鄂至重慶舟行須三
月餘且多失事不若由鄂至湖南常德辰州較

便從前平三藩定苗疆皆以常德為兵餉總匯
而進兵駐節之地亦多在辰沅一帶其勢然也
第後路過遠需費甚鉅至苗地民散田荒無糧
可購川楚各軍皆於數百里外購運米糧崎嶇
負戴常苦不繼他處車運牛運之法均不能用
惟專用夫運每夫負米四斗險路日行僅二十
里其何能濟其糜費阻絕之處諸可類推人一
日不再食則飢兵士豈有不食而戰之理苗民
諺曰不怕官府兵多只怕官府糧多蓋險遠購
運費錢費力苗亦知其不得多耳此米辦轉運

之為難也以上三難皆係實在情形臣既奉

命督師雖事值萬難奚敢稍有諉卸但若冒然前往

明知無濟而又不預為籌畫尤於微臣平日治軍

敬事之素志大相刺謬現已緘商兩江督臣馬

新貽江蘇撫臣丁日昌能否仿照上年剿捻舊

章增撥餉項籌濟軍火俾無缺乏至臣舊部智

勇之將如劉銘傳郭松林潘鼎新周盛波等皆

可當一面或稱傷病未愈或慮人地未宜臣並

函屬其來鄂面商再行酌量奏調未便強從湖

北入款僅敷每年全解京餉及月解甘餉四萬

並留防各水陸之用恐無餘力多贍黔軍仍俟
署督臣李瀚章到任與郭柏蔭妥籌轉運解濟
之法並將臣歷年東北用兵經手各事未盡清
釐之處商請署督臣就近咨商各督撫妥辦總
之黔省兵事尚非急在旦夕臣向來任事未敢
遲誤此次遠征苗疆距京幾及萬里一切進止
調度自須臨事妥酌機宜以期有濟仰懇
聖明勿責速效並隨時諭令各督撫臣通力合作俾
可逐漸圖功臣當恪守孔聖懼事好謀之訓常
存漢臣鞠躬盡瘁之思冀仰答

高厚隆施於萬一除俟李瀚章到鄂交替並後路籌
有規模即行起程由湘赴黔外所有恭謝

天恩並籌陳大略情形謹據實繕摺由驛五百里覆
奏伏乞

皇太后

皇上聖鑒訓示謹

奏正月十三日

軍機大臣奉

旨另有旨欽此

--	--	--	--	--	--	--	--	--	--	--

奉

旨援陝酌籌派撥摺 二月三十日

奏為欽奉

諭旨赴陝西督辦援剿酌籌派撥情形恭摺仰祈

聖鑒事竊 臣承准軍機大臣字寄同治九年二月十

六日奉

上諭西路猖逆分竄秦境蔓延榆綏延各屬該處土匪潰勇本未芟除淨盡深恐勾結為患李鴻章本令督兵入黔郭松林等軍尚屬不少即著就現有之兵先行統帶入陝剋日迅速前進將竄陝各猖

逆悉數掃除並著扼要駐紮與定安李宗義劉典
所派各軍聯絡聲勢加意防範其北山上匪潰勇
並著派得力之師次第搜捕淨絕根株等因欽此
並奉是日明降

諭旨一道跪聆之下仰見

聖謨廣遠籌備精詳曷勝欽悚臣前因督師圖黔酌
調舊部勁旅正在函商直隸督臣曾國藩分撥
劉銘傳所部銘軍兩江督臣馬新貽飭撥吳長
慶親兵各營尚未定議至留防鄂省之湖北提
督郭松林僅裁剩步隊五營不足以當一路廣

西右江鎮總兵周盛傳貴州安義鎮總兵唐仁廉所統慣戰馬隊於黔中山險不宜正月間業飭遣撤騎卒改練步軍茲奉

旨率師援陝局勢又變查西北地形平曠非馬步兼用不能得力狃騎飄忽肆竄尤非馬隊無以制勝臣與郭松林等再四籌商身邊無一騎一駝何以應敵致遠亟飭該提督派員分赴皖豫一帶趕募馬隊五營步隊十營周盛傳趕募馬隊四營剋期齊集認真訓練並添購車騾豫辦糧草以利師行由鄂入陝餉項軍火節節轉運均

由陸路事體亦甚繁重現於湖北省城設立後
路糧臺分遣委員沿途察勘設局接運應俟諸
務籌布就緒郭松林周盛傳等募練成軍即督
催分起前進昨准河南撫臣李鶴年緘咨據西
安軍需局探稟陝匪有竄鄂之說湘營潰勇陸
續東來請豫籌堵扼等因臣已飛飭現駐襄樊
之記名提督譚仁芳速撥兩營往紮河南浙川
之荆子關要隘以扼商南竄路仍分隊聯紮河
口樊城以固邊防署督臣李瀚章日內抵鄂擬
即交卸篆務將前敵兵餉後路轉運一切妥與

籌議再行剋日啟程相機籌辦以期仰副
聖主委任之重所有遵

旨赴陝援剿酌籌派撥情形謹繕摺由驛五百里覆

陳伏乞

皇太后

皇上聖鑒訓示謹

奏二月三十日

軍機大臣奉

旨另有旨欽此

--	--	--	--	--	--	--	--	--	--	--

遵

旨帶軍赴直摺 七月初五日

奏為欽奉

密諭酌帶各軍剋日起程馳赴近畿一帶相機駐紮
恭摺覆陳仰祈

聖鑒事竊 臣前抵潼關派兵分路進紮業經奏奉

上諭著進駐西安隨時相度機宜會商蔣志章次第
妥辦等因欽此當將周盛傳進軍北山糧運各事
料理粗定即於六月十二日自潼關啟行赴省
沿途阻雨二十七日始抵西安正與蔣志章籌

布防務七月初四日承准軍機大臣密寄六月二十八日奉

上諭天津滋事一案曾國藩奏請將辦理不善之天津府縣交部治罪而法使羅淑亞必欲將該府縣立即正法疊諭曾國藩崇厚據理駁斥斷不能如此辦法本日據崇厚奏稱法國水師提督都伯理現已到津崇厚前往會晤所言與羅使無異並據繙譯官德微理亞聲稱如至二十七日尚無切實回信即將在京法人帶赴上海曾國藩病瘵復發卧床不起勢甚危篤等語已派毛昶熙前往天津

會同曾國藩辦理並令丁日昌由海道赴津幫同商辦惟該國既有兵船到津亟應豫籌備禦曾國藩病勢甚重一時實乏知兵大員可資戰守刻下陝省軍情稍鬆著李鴻章移緩就急酌帶郭松林等軍剋日起程馳赴近畿一帶駐紮屆時察看情形候旨調派現在事勢緊急該督務須迅速前進毋稍遲誤其陝省防剿事宜即著知照左宗棠蔣志章妥籌辦理將此由六百里加緊密諭知之等因欽此微臣伏讀之下震悚焦急莫可名言前准總理衙門暨曾國藩函知津事原委臣竊料夷

情叵測即商請曾國藩酌帶親軍勁旅移紮附近衝要若該酋無理取鬧尚可稍有搪抵並密飭現駐直東之臬司劉盛藻丁壽昌各帶銘軍相機準備昨接曾國藩六月二十三日函稱法使羅淑亞照會欲將天津府縣抵命該府縣並無大過不得已奏交刑部治罪已覺內愧方寸外干清議等語臣正增憂系茲蒙

聖明指示斷不能如此辦法仰見

權衡至當該酋等平日脅

朝廷以制官脅官以制百姓其心固甚畏百姓也今

未根究下手兇犯先欲官為抵償不但無以服天津士民之心亦無以服天下臣庶之心夫是非者立國之本此案誣在津民業經事事認錯情理備至而羅淑亞等恃強逞忿不論是非之公並欲使我

國家紊亂其是非即令隱忍遷就後將何以立國想毛昶熙丁日昌到津後必與曾國藩等妥商趕緊訪拏兇犯議抵惟該國既有兵船到津聞復往安南等處陸續徵調

京畿根本重地豈可束手受制於人誠如

聖諭亟應豫籌備禦臣昔在蘇滬與洋人久相交涉
所部將士與洋兵曾共戰陣習知其平素伎倆
專恃火器水陸船礮我軍或難與爭長陸路野
戰彼族亦難操必勝蓋大礮笨重不宜運行又
洋人不能自紮營壘一敗則無歸宿也迭准左
宗棠咨函甘省軍務漸有起色陝回敗殘無多
期之歲月必能得手

聖主可釋西顧之憂微臣當以畿輔為急現已傳知郭
松林周盛傳等督催各營速整行裝剋日分起
啟程臣擬先帶馬步親軍八營於初七日由西

安進發至潼關渡河取道山西馳赴近畿一帶
擇要駐紮屆時請

旨遵行一面咨商署湖廣督臣李瀚章趕飭後路各
臺局改道解運餉銀軍火以期接濟無誤其陝
省防剿事宜遵即知照左宗棠蔣志章妥籌辦
理所有酌帶各軍剋日啟程赴直緣由謹繕摺
由驛六百里加緊覆陳伏乞

皇太后

皇上聖鑒訓示謹

奏七月初五日陝西西安行營拜發六百里加緊

軍機大臣奉

旨另有旨欽此

行抵直境分兵邊界詔八月初四日

奏為行抵直境遵

旨派兵分紮晉豫邊界恭摺仰祈

聖鑒事竊臣由潼關渡河入晉業於七月十四日馳
報在案途次迭奉七月十八二十等日

諭旨飭將所帶各營分紮直隸邊境獲鹿一帶及河
北彰德山西平定等地方臣先已檄飭郭松林
武毅全軍由陝洛過河暫紮彰德衛輝等處周
盛傳所部由韓城分起渡黃至平陽會合齊進
茲查山西平定直隸井陘一帶山徑險狹糧草

艱貴不宜屯紮多營因令周盛傳統率馬步各
隊暫紮平陽洪洞等處休養操練臣自率親軍
八營按站前進於八月初四日行抵井陘擬即
赴獲鹿暫駐就地籌辦糧運以濟軍食抑臣更
有陳者欽奉

密諭現在天津之事未即決裂若調兵信息早為洋
人窺破必致又生疑忌等因查官軍越境遠役與
營中出隊情事不同若朝發夕至原可聲東擊
西故為不測茲由陝入直二千餘里人馬二萬
有奇後路調撥餉械軍火前路籌辦車馬糧料

有一不備不可行軍洋人教民布滿內地豈能處處掩人耳目臣此次迫於六月二十八日

嚴旨倉猝成行幸而天津和議可就不至遽有戰事若稍決裂我軍遠來疲乏糧餉軍火布置諸難齊備深懼無以應敵負咎滋重夫用兵之道與馭夷之法皆須虛實奇正互用洋酋好為大言內怯多疑遇事專講利害強弱臣嚮在江南辦理交涉棘手事件往往兵威稍盛彼族氣焰稍減議辦亦易就緒蓋嚴兵衛正所以保和局也前曾國藩奏稱因無備之故辦理過柔寸心抱

疾臣奉

命帶兵赴直何可仍以無備而往即使調兵信息各處傳聞為洋人窺破或轉因其疑忌而中外和議可以速成非理要挾可以裁抑彼既挾兵船而來似不能禁我之不調兵彼若先開礮則先開衅非我調兵即啟衅也況此次和議成後中國諒非永不設備若果認真設備洋人亦不能毫無覺察無論其覺察與否疑忌與否當先盡其在我勿予以無情無理之口實略示以不茹不吐之風裁目前天津之案必為拏犯賠堂日

後自強之策必求練兵製器理與勢兩不偏廢
庶於大局有裨臣已遵

旨分飭各軍遠紮晉豫邊界所慮一旦有警呼應不
及愚昧之見不敢不預為陳明謹繕摺由驛馳
奏伏乞

皇太后

皇上聖鑒訓示謹

奏八月初四日直隸井陘縣行營拜發五百里

軍機大臣奉

旨另有旨欽此

--	--	--	--	--	--	--	--	--	--	--

起程赴津并陳教案情形摺 八月十九日

奏為遵

旨迅赴天津恭報起程日期並籌大略情形仰祈

聖鑒事竊臣承准軍機大臣密寄八月十五十七等

日欽奉

上諭著即馳赴天津會同曾國藩丁日昌成林督飭

辦理並奉十五日明發

諭旨一道臣於十二日行抵保定將親軍各營布紮

休養料理後路糧餉軍火轉運事宜接見司道

諮詢地方切要利弊甫有端緒臣體素羸弱自

夏徂秋督隊冒暑馳驅感受溼熱加之憂念
國事寢食頓廢肝疾增劇正在服藥調理擬稍復
元赴津接篆迭蒙

明詔敦促職居疆吏何敢稍有諉延茲定於二十二
日起程赴津聞陸路阻水多處擬掉小舟循大
清河東下約計五六日可抵津郡再行察酌情
形會商妥辦准曾國藩函稱現獲各犯認供可
正法者七八人應分別議罪者約二十餘人擬
於二十三日先行奏結等語該督臣亦知洋人
傷斃較多要犯議抵辦不及數難免饒舌惟津

民萬衆齊心狡賴又事後深知悔懼或遠颺無蹤或堅不吐供不比一家一人之事可以儘數吹求無礙大局自丁日昌到後窮搜力索捕治已極認真事關動衆尤慮刑逼株連附會羅織致成冤獄而激衆怒不獨非中國政體所宜即揆諸各國平素道理不肯輕易殺人傳教專為行善之意亦微有不合所期日後與民相安豈在一時快意仇忿若欲以示警戒正法八人與議罪二十餘人辦法不為不重遠近必皆寒心臣竊料以後各處不至再有此等巨案若殺戮

太過實為洋人永遠之患尤非各國厚待中國
百姓之心想總理衙門王大臣必已與各國使
臣詳切開導矣臣力所能及當隨時督飭地方
官設法訪拏訊辦斷不肯略存袒護致令洋人
含冤亦未便過事苛求轉令百姓解體愚昧之
見是否有當謹繕摺由驛馳

奏伏乞

皇太后

皇上聖鑒訓示遵行謹

奏八月十九日保定省城拜發五百里

軍機大臣奉

旨另有旨欽此

覆奏劉銘傳督辦陝西軍務摺十月初三日
奏為欽遵

諭旨斟酌機宜通籌全局據實覆陳恭摺仰祈

聖鑒事竊臣於十月初一日承准軍機大臣字寄九
月二十九日奉

上諭前任直隸提督劉銘傳治軍有律疊著戰功此
次一聞宣召即日兼程北來其忠勇報國之忱尤
堪嘉尚現在津案已結無須用武該提督年力正
強豈可令其投閒置散因思李鴻章赴直時已率
郭松林周盛傳所部全軍東來僅留譚仁芳五營

駐紮西安此時甘軍剿匪正當喫緊陝省兵力空
虛深虞該匪竄突若令劉銘傳督辦陝西軍務振
旅西征不特陝境可得安全即甘軍亦可免後顧
之慮似於大局較有裨益至楚軍與淮軍雖向不
相習而陝事甘事各有責成料不敢各存意見也
著李鴻章斟酌機宜據實覆奏如劉銘傳於西事
不甚相宜或於他省軍務可期辦理有效之處亦
著妥籌具奏該提督已於昨日召見俟李鴻章覆
奏到日即可明降諭旨其駐紮滄州及丁壽昌所
帶銘軍已有一萬餘人加以駐紮直隸邊境之周

盛傳郭松林等軍亦有一萬數千人兵數實不為少以有用之兵置之無事之地徒耗餉需若以百戰勁卒遽予裁撤亦屬可惜著李鴻章通籌全局或酌留直隸若干以資拱衛或撥給劉銘傳若干以資剿賊其餘各營應如何分地布置之處並著悉心籌畫迅速具奏將此諭令知之欽此仰見

聖主權衡緩急措置咸宜猶蒙

詢及芻蕘臣自媿駘愚敢不熟慮深籌直抒所見以備

采擇竊念軍興二十年來惟粵捻二逆竄擾最廣且

久咸豐年間如向榮和春德興阿張國樑等皆以武臣督師無效 臣時往來諸軍中見其兵將強弱不齊而主客多存意見因無地方之責也厥後官文胡林翼以湖廣督撫肅清上游曾國藩左宗棠與 臣以江浙督撫肅清下游曾國藩胡林翼等募練楚軍 臣募練淮軍專以選將練兵製器為急上下一心糧餉應手是以倖獲成功蓋粵匪為踞賊督師非兼地方則呼應不靈也至捻逆流竄數省先後亦數易帥剿流寇與剿踞賊情形不同非僅量吏所能辦淮軍於北

路人地較宜故亦倖獲成功今陝甘之回雲南
之回貴州之苗起於仇殺而迹似竊據皆無大
志遠略亦邊疆之踞賊耳非能將兵而任地方
者不足以了之甘回跨連西北尤

國家切近之患其初多隆阿劉勳陝回最稱神勇
惜中道戰歿未竟其用楊岳斌謀勇沈毅為水
師第一名將而局量稍褊粹令統率陸軍易南
而北用違其才又值粵捻未平餉力難分軍多
潰變於是陝甘蹂躪盡矣而楊岳斌亦憤不再
出此兩失之道也劉蓉劉典皆帶楚軍迭任陝

撫左宗棠繼往督師論者每謂楚軍宜於南而
不宜西北曾國藩亦嘗為是言然左宗棠每欲
專用楚軍平回匪近因事機屢變稍參用雷正
綰黃鼎金運昌傅先宗等而於他將仍鑿柙不
入現在圍攻金積堡屢破堅寨冀即得手馬化
澂一股若可殲除甘事當漸有起色若甘軍稍
振則陝事亦鬆似無須別置一軍致左宗棠或
生疑忌臣前赴陝本擬待秋後即請撤歸者正
為此也茲

諭旨以陝省兵力空虛深虞該匪竄突擬令劉銘傳

督辦陝西軍務自係備豫不虞之計臣查劉銘
傳智勇才略可當一面於軍事歷著成效久在
聖明洞鑒之中其治軍以操練紀律為要愛民除害
為本至其意度豁達性情爽直能駕馭將士而
使各盡力能決機俄頃而應變不窮近年辭官
歸里折節讀書深明大義其志趣願為
國家効死力雅不欲以武人自居陝省軍務如催
修塞堡安插降回資遣散勇籌辦糧料轉運等
事在在與地方交涉督師者號令黜陟不能必
行動多掣肘以武臣臨之更難著力倘

聖意必責成以陝事似須破除常格兼任地方事權
歸一該員從臣多年事事維持調護俾竟厥功
今若遠出誠恐磨練未深致辜

朝廷委任仍求

聖主隨時誘掖訓戒勿任他人牽掣排擠庶克陶成
大器備異日干城之用陝中楚勇尚多不甚得
力欠餉既鉅裁遣為難又分駐西安三原之譚
仁芳七營係食鄂餉分駐潼關之馬德昭李承
先各營分駐神木府谷之宋慶各營均食豫餉
若令劉銘傳督師似可察度機宜就近調度其

所部銘軍馬步一萬二千餘人丁壽昌現因補授天津道已飭交臬司劉盛藻兼統自應由劉銘傳帶往郭松林周盛傳兩軍前因豫省彰德糧食艱貴已調郭松林統武毅各軍移紮德州桑園晉省購糧用罄已調周盛傳統盛仁各營移紮濟甯以就運河糧路臣既奉

命移督畿疆義應竭力捍衛自須酌留勁旅以固門戶即中原各省大亂初平人心未定水旱災祲饑驅為盜會匪游勇降衆到處勾結各國通商傳教又往往滋事遠近震驚綠營弁兵斷不足

以禦大敵新募之勇多不可靠時局岌岌看似
無事若一有事便慮不支迥非道光以前承平
景象可比實未敢謂為已治已安也曾國藩赴
任江南方與臣商調銘軍移駐徐州一帶請劉
銘傳幫同整練江防如劉銘傳移師西向所有
郭松林周盛傳等軍如何分地布置或撥給若
干以資助剿並各省撥定額餉如何分濟之處
均應俟此次奉

旨後劉銘傳回營曾國藩抵任再與籌商妥協次第
奏明辦理所有欽遵

諭旨斟酌機宜通籌全局緣由是否有當謹據實繕摺由驛覆陳伏祈

皇太后

皇上聖鑒訓示謹

奏十月初三日

軍機大臣奉

旨另有旨欽此

籌議天津機器局片 十月二十六日

再欽奉十月十二日

寄諭天津機器局應如何斟酌添製開拓之處著李鴻章妥為妥畫奏明辦理該督於此事講求有素務當督飭津局委員事事悉心研究將此中機巧竟委窮源庶可有裨實用等因欽此 臣查製器與練兵相為表裏練兵而不得其器則兵為無用製器而不得其人則器必無成西洋軍火日新月異不惜工費而精利獨絕故能橫行於數萬里之外中國若不認真取法終無由以自強竊

謂士大夫留心經世者皆當以此為身心性命之學庶幾學者衆而有一二傑出足以強國而贍軍臣自媿智短力分迄無成就前在江蘇督撫任內創設上海金陵機器兩局分造輪船鎗礮火箭銅帽等件略有端緒歷年軍中撥用實利賴之惟馳驅在外未能躬親督率嘗以有初鮮終為懼洋鎗炸礮皆非洋火藥施放不能取準而及遠臣軍每向西國購運其價較中國土藥微昂究不若自製洋藥之多且便總理衙門奏令崇厚在津購辦機器設局造藥足補南局

所未備且隱寓防患固本之意極為遠慮深謀其初不得不雇洋人指授所望內地員匠學其器而精通其意久之自能運用轉相傳習乃為經久之道又凡仿製洋器每年所用工料銀較之每年所出之貨必比采買之價稍貴即稍貴亦係值得不為虛糜崇厚奏稱據密妥士云再添研藥機器三分則所出火藥可增三倍較之采買即可節省等語臣昨與成林親往該局查看面詢密妥士又不敢據為成說蓋其夸大之詞也惟該局規模粗具垣屋尚須加修機器尚

須添製火藥亦尚未開造自應就此基緒逐漸
擴充逐事核實非廉正熟悉而有條理之員不
足與謀查有湖北補用道沈保靖前經 臣委令
督辦上海機器局事事皆賴其創制如雇用洋
匠進退由我不令領事稅務司各洋官經手以
免把持定購外國機器貨料自擇各洋商評訂
收貨給銀務取該國發貨洋文單為憑委員各
有專司其冗食不究心者汰去之華匠學徒按
日點工給價無稍冒混立法最稱精善是以滬
局開設數年已造成輪船四隻洋鎗大小開花

礮洋火箭等項接濟各軍應用者均不下數千
件出貨較多而用款並不甚費以視閩局專任
稅務司法人日意格津局專任領事官英人密
妥士將成尾大不掉之勢似稍勝之沈保靖因
臣平捻後軍器可減久任勞怨力辭局務隨營
差遣臣不得已緘商前兩江督臣馬新貽撫臣
丁日昌暫令道員馮煥光知府鄭藻如照舊接
辦滬局頃以天津機器局奉

旨交臣籌畫辦理臣即密屬沈保靖留心察度擬即
遴委該員總司其事該員再三固辭大抵關涉

洋務自好者已不願為洋務而又兼出納銀錢
更多望而卻步隨俗則恐無實濟認真則必叢
怨尤然惟其不願為者乃可與有為此等苦情
諒邀

聖明俯鑒沈保靖與臣交近三十年堅明耐苦絲毫
不欺不苟實所深信可否請

旨飭令該員總理天津機器局事務以資熟手臣當
督同該員監管中外各員匠逐細講求悉心研
究務期有裨軍用仰副

聖慮惟係已成之局牽涉洋人窒碍殊多更張不易

密安士屢次來謁 臣諄諄誥誡以覈實利用為
要該領事人尚和平要好或可相與有成容再
察酌妥辦並一切整頓開拓章程隨時督飭沈
保靖相機籌議具

奏事關鉅要不得不據實詳晰質陳伏乞

皇太后

皇上聖鑒訓示謹附片具

奏 十月二十六日

軍機大臣奉

旨另有旨欽此

裁併通商大臣酌議應辦事宜摺 十月二十六日
奏為欽奉

諭旨裁撤通商大臣歸併總督經管酌議應辦事宜
先陳大略恭摺仰祈

聖鑒事竊臣承准軍機大臣字寄十月二十日奉

上諭總理各國事務衙門奏遵議毛昶熙請撤三口
通商大臣條陳一摺著照所議三口通商大臣一
缺即行裁撤所有洋務海防各事宜著歸直隸總
督經管照南洋通商大臣之例頒給欽差大臣關
防以昭信守山東登萊青道所管之東海關奉天

奉錦道所管之牛莊關均歸該大臣統轄通商大臣業已裁撤總督自當長駐津郡就近彈壓呼應較靈並著照所議將通商大臣衙署改為直隸總督行館每年於海口春融開凍後移紮天津至冬令封河再回省城如天津遇有要件亦不必拘定封河回省之制李鴻章當懍遵此次改定章程將洋務事宜悉心籌畫海防緊要尤須通籌全局選將練兵大加整頓楊村河西務王慶坨等處應否修築礮台撥營分駐均著該督酌度情形妥為籌辦畿輔水利本宜講求而畿東尤亟應如何設法

宣洩以利農田著慎選廉能之吏次第興辦至天津新鈔兩關稅務應否添設海關道一員專司其事著李鴻章一併酌議具奏等因欽此跪聆之下仰見

朝廷因時制宜慎固封守臣以菲材渥蒙

倚畀調任畿疆方以不克勝任為懼茲更兼管洋務海防事煩責重深虞叢脞貽誤戰慄萬分除俟欽差大臣關防頒發到日再行恭摺叩謝

天恩外臣竊維天下大勢首重畿輔中原有事則患在河防中原無事則患在海防保定控扼河朔

又居直境適中之地昔人於此建置省城實得形要是以歷任總督均須駐省辦事總攬全局天津偏在一隅似非督臣久駐之所惟自各國通商開埠公使駐京津郡為往來衝途尤為京師門戶關係極重近因民教紛爭釀成巨案地方撫馭未善通商大臣又恐呼應不靈後患殊多不得不思變計

諭旨准照總理衙門所議裁撤三口通商大臣洋務歸總督經管並令長駐津郡整頓海防洵屬未雨綢繆之策臣前奉

旨駐津籌辦彈壓撫綏各事今值歸併通商事同創
始法貴變通自應久駐此間逐漸經畫目前最
急者須先添設海關道一員查咸豐十年十二
月間崇厚由長蘆鹽政改授三口通商大臣職
分較卑按照條約並無載明通商大臣與領事
交涉儀式往來公文俱用照會平行迨崇厚存
升侍郎相沿已久碍難更改茲臣以總督兼辦
又蒙
特頒欽差大臣關防各國和約載有專條未便過事
通融致褻

國體而啟外人驕慢之漸且臣曾兼任南洋通商大臣五年舊例尚在未可前後易轍計惟添設海關道比照各口現定章程責成道員與領事官稅務司等商辦一切隨時隨事稟臣裁奪其有應行知照事件臣即札飭關道轉行領事遵照至往來會晤儀節務皆斟酌適宜此等事理雖小動關體制不敢不慎又中外交涉案件洋人往往矯強有關道承上接下開諭調停易得轉圜不獨常洋兩稅須人專管也向來地方添設員缺多就閒缺裁改各口關道並有兼轄地

方之責查直省道缺各當要地無可改併天津
道承辦海運每年南漕百萬石由該道陸續接
運赴通煩難已極未能兼任洋務致有偏廢相
應請

旨准令添設津海關道一缺專管洋務及新鈔兩關
稅務凡華洋交涉案件責令該道督同府縣各
官認真妥辦並由直隸總督揀員請補俾可呼
應得力如蒙

俞允即請

敕部先行鑄給關防未盡事宜仍續行妥議具奏至

選將練兵籌備海防一節尤為目今要務緣營
弁兵惰窳已久就中挑選加餉操練外貌即似
整齊實恐難當大敵此各省近來練兵通病不
獨直隸為然總理衙門奏令擇任將領自係至
當不易之論往往百戰名將練勇則易為力練
兵則無成效者餉額有多寡人地有生熟又緣
營文法太密牽制苦多不能盡廢其法與人而
別開生面也曾國藩本年四月續奏馬步練軍
章程經部議准似較從前營制差強惟新舊練
軍尚未一律兵多戀家遠調仍逃喫苦不慣其

中情弊隨時整飭變通或者有裨實用天津向
練洋槍隊大致可觀惟平日並不紮營臨事未
敢深恃大沽海口南北礮臺最為扼要而守兵
過單守具亦未精備楊村河西務王慶坨等處
均係由津進京要路將來應否撥營分駐修築
礮臺以壯聲勢均當次第妥酌辦理臣前由保
定赴津僅帶小隊兩哨昨因銘軍遠去業調駐
省親軍鎗礮隊二營來津護衛並奏派記名提
督廣西右江鎮總兵周盛傳統盛仁各營為拱
衛畿輔之師該軍行役經年甫抵濟甯擬令略

為休息整隊北來暫在景州滄州一帶屯紮操
練以備肆應津案甫結民情不免觀望洋人尤
多疑懼現兵船在此守凍臣姑以虛聲靜鎮徐
圖布置使共相安至畿東水利自元時設宮耕
屯未幾復罷廢後建言雖多行之迄無成效蓋
由北方天時地利人事皆有滯礙難行之處崇
厚前於軍糧城開墾渠田五百餘頃聞不久亦
多淤廢容再察看妥籌試辦所有裁併通商大
臣酌議應辦事宜先陳大略各緣由謹繕摺由
驛覆陳伏乞

皇太后

皇上聖鑒訓示謹

奏十月二十六日

軍機大臣奉

旨另有旨欽此

籌議天津設備事宜摺 十二月初一日

奏為欽奉

諭旨妥議籌辦天津設備事宜恭摺覆陳仰祈

聖鑒事竊臣承准軍機大臣字寄同治九年閏十月

二十六日奉

上諭英翰所陳天津海防宜設水陸提督擇威望素著之大將畀以斯任統其舊部作為提標兼轄海防水陸各營等語著李鴻章斟酌機宜妥議具奏至所稱銘軍西去畿輔空虛請將淮軍調駐海口並令沿江沿海暫緩撤防嚴行戒備等語著曾國

藩李鴻章會商妥議實力辦理等因欽此並奉鈔
英翰原摺到 臣伏查津案雖經議結武備必須
講求此中國百年之計非一朝夕所能為功也
咸豐己未庚申之際僧親王以忠勇宿將調集
旗綠兵數萬人歲糜餉數百萬經營海口迄至
一蹶弗振蓋由彼此強弱情形未能深悉而鹵
莽出之幾誤大局自粵捻平後議者有謂乘此
軍威大舉復仇迨本年五月津事初起攘臂而
爭又不知凡幾矣幸賴

皇太后

皇上堅持定見處以鎮靜俾內外諸臣得以從容擘畫將就息爭今事定而議設備誠宜及時振作豈可隱忍苟安惟臣粗識夷情默籌時勢無論以一中國敵數強國戰備固不易言即以守局而論必從籌餉練兵製器下手今天下全力耗於陝甘即雲貴尚不暇圖若海防江防認真整理每歲至少必須千萬以上從何措辦此籌餉之難也兵之不鍊由於餉之不給我

朝定制兵丁額餉極少不足以養戰士軍興以後各省停餉虛伍現尚僅發五六七成不等虧苦

太久欲如乾嘉以前尚有可用之兵恐不遽得
其有裁兵增餉或抽練加餉者亦屬無幾以制
內匪尚不可靠而望其禦外侮耶此練兵之難
也中國兵器遠遜洋人無智愚皆知之蘇直甫
經設局購辦機器學習製造鎗礮藥彈雖比中
土習用者較精而比之西洋新製瞠乎其後需
之歲月或有進益若急求勝殊不自量又況有
器而不皆能用用之而不盡其妙似是近日通
病此製器練器之難也以上三者皆吾之內不
足內不足而張皇於外以之虛喝敵人尚不失

為兵機以之欺蒙

聖主必至貽誤

國事臣所萬萬不敢出此也惟是練軍練器本疆
吏應辦之事臣自督師剿賊以來所日夜經營
者惟此為亟茲忝司拱衛兼理通商一息尚存
此志何敢少懈但只能就目前兵力餉力竭力
圖維盡心籌辦耳如英翰原奏所稱天津宜設
海防提督兼轄水陸各營一節查天津自

國初已為重鎮除設總兵一缺外雍正年間添設
天津水師營以滿洲都統統之專為捕盜護漕

又添設天津河標營以河道總督統之專為治
河均與天津鎮相表裏其時並無海氛設官置
戍不厭詳備後雖以次裁併道光二十二年因
敵船煽擾粵浙海防喫緊改設大沽協副將一
缺津鎮共添新兵四千七百名咸豐八年又改
設協標海口左右六營兵制漸增究未必有實
濟同治初年通商大臣崇厚就津沽通永鎮協
標內迭次挑練弁兵三千餘名操習洋鎗礮隊
籌增餉項隊伍技藝尚為整齊自較原營額兵
差強惟未經大戰不習紮營誠恐臨事難恃臣

近始督令移駐營盤稍習勞苦然畚鍤之事動輒需人又除調赴歸綏防剿外存營練兵不過二千餘名只可徐為整頓英翰摺內所稱專設海防提督名位較崇按之舊制與現今事體似均相宜所部將士仍照勇隊操防訓練不改從緣營章程亦與練軍規模相仿惟久著威望之大將既慮難得其選兼轄水陸各營則目前並無水師亦無多陸營兵事只論強弱似不專在職分虛設提督而無得力之兵應手之餉於事何裨臣故不敢輕議更張應俟隨時體察大局

情形再行妥酌奏辦又原奏所稱銘軍西去畿輔空虛請將淮軍郭松林周盛傳兩大枝全調海口一節查郭松林所部武毅軍已分撥步隊十營交劉銘傳帶往陝西其餘馬步十營調回湖北因餉需缺乏又飭裁遣馬隊三營僅留步隊五營馬隊二營分防鄂境不得謂之大枝周盛傳所部盛仁各軍一萬二千人尚稱勁旅前因就糧濟甯屯紮操練冬寒地凍津沽營壘礮台均不能施工曾飭該提督單騎來津徧察大沽北塘海口及津通各處形勢據稱畿東津南

濱海一帶四野平曠一片荒沙海口礮台但求
土木興築均宜不在兵數過多而後路數百里
間必須重兵堅壘巨礮相望節節布置聯絡乃
可自立不敗之地而爭勝於人若置重兵於海
口荒灘鹹水之區後路聲援不厚稍有蹉跌誤
事甚大目下兵力既尚不能大舉該軍只
宜移紮靜海滄州之間整肅操防以備肆應而
作聲勢勿遽偏紮海口徒使彼族驚疑而我軍
前後皆成孤立此危道也所言似是老成持重
之見與臣意慮相符來歲春融應飭遵照相機

籌辦抑臣更有陳者津郡形勝以水為險當九
河之下游今直境五大河皆匯於城外之海河
而東入於海郡城獨在五大河及海河之南係
前明衛城舊基狹陋尤甚前明以控扼薊遼為
要其城在河北則為失險今日以控扼海氛屏
障京畿為要其城在河南亦為失險此古今建
置時勢之不同必宜量為變通者也蓋洋船不
能深入內河如城在河北我可憑河設險添置
礮台礮船護衛城池較為得勢臣前於議覆津
海關道事宜摺內已聲明將來宜就運河北岸

圍築新城另建官署為經久防患之計迄尚未
奉

俞旨據臣管見此為津郡設備第一急務即如咸豐
三年粵逆北竄同治七年捻逆北竄津城危在
呼吸幸得外援賊即退卻否則斷難久守咸豐
十年海口失事即棄津城夷氛直入通州無可
阻遏皆緣有城無池又不得控扼之勢故也今
若據運河北岸屹築一城圍以礮台礮船兼用
子牙大清北運諸河之險以鯁塞由津赴通之
喉牙只要布守得人似較海口尤有依據

京城亦多一遮蔽惟人情可與樂成難與圖始南
北運河之交市廛櫛比約計收買民地定購磚
料鳩工庀材必須事事格外堅實規製宏遠所
需經費甚鉅一時無可籌措若失機會亦殊可
惜臣再四籌畫惟有各省解存津局練餉制錢
百餘萬串現在戶部無需提解可否准臣於此
項內搏節動用核實籌辦俾濟要需伏乞

聖恩勅部敷覆施行所有欽遵

諭旨妥議籌辦天津設備事宜繕摺由驛覆陳伏乞

皇太后

皇上聖鑒訓示謹

奏十二月初一日

軍機大臣奉

旨著該部歸入李鴻章前擬津海關章程摺一併議
奏欽此

遵議日本通商事宜片

再欽奉閏十月二十六日

寄諭英翰以日本籲請通商恐貽後患殷殷以杜絕
為請此事因該國意嚮甚堅業已令其特派大員
到時再與妥議條約自無再事拒絕之理至將來
如何明定章程以期永遠相安著曾國藩李鴻章
預行妥籌詳悉奏明庶臨時較有把握等因欽此
仰見

聖明於懷柔遠人之中寓思患豫防之意欽佩莫名
臣伏查日本古倭奴國在東洋諸島中夙稱強

大距蘇浙閩界均不過數日程元世祖以後與中國不通朝貢終明之世倭患甚長東南各省屢遭蹂躪史稱倭性桀黠初由中土禁絕互市明世宗時盡撤浙中市舶提舉司又不置巡撫者四年濱海奸人得操其利勾結導引倭寇遂劇自

國初朝鮮內附聲威震讐倭人固不敢越朝鮮而窺犯北邊亦從未勾內奸而侵掠東南實緣制馭得宜畏懷已久順治迄嘉道年間常與通市江浙設官商額船每歲赴日本辦銅數百萬觔

咸豐以後粵匪踞擾此事遂廢然蘇浙閩商民
往日本長崎島買遷寄居者絡繹不絕日本商
人遊歷中土亦多庚申辛酉後蘇浙糜爛西人
脅迫日本不於此時乘機內寇又未乘危要求
立約亦可見其安心嚮化矣今彼見泰西各國
業與中國立約通商該國亦已與泰西立約通
商援例而來似係情理所有之事該土向非中
土屬國本與朝鮮琉球越南臣服者不同若拒
之太甚勢必因泰西各國介紹固請彼時再准
立約使彼永結黨援在我更為失計自不如就

其求好之時推誠相待俯允立約以示羈縻前
該委員柳原前光等來謁每稱西人強逼該國
通商心懷不服而力難獨抗欲與中國通商以
冀同心協力又華人在該國經商者西國領事
每欲代管必須互定條約自為鈐束等語無論
是否真心立言亦似得體嗣復呈交前通商大
臣成林議約底稿一本大意總欲比照西國成
例辦理明春該國使臣前來自須有一番辨論
惟既允議約在先斷難拒絕於後計惟與承辦
議約之員屆時相機妥議章程請

旨定奪似未便預立限制致有滯礙據臣愚見中外既定和約均宜各派官員往駐該國庶消息易通勢力均敵若有來無往聽憑該國使臣簸弄脅制究非長策近年奉

詔迭次派員往泰西各邦通好業與從前隔闕情形小異惟華人往西國者絕少中國暫未便派員久駐日本近在肘腋永為中國之患聞該國自與西人定約廣購機器兵船仿製鎗礮鐵路又派人往西國學習各色技業其志固欲自強以禦侮究之距中國近而西國遠籠絡之或為我

用拒絕之則必為我仇將來與之定議後似宜
由南洋通商大臣就近遴委妥員帶同江浙熟
習東洋情形之人往駐該國京師或長崎島管
束我國商民藉以偵探動靜而設法聯絡牽制
之可冀消弭後患永遠相安是否有當伏祈

勅下總理衙門核議施行所有遵議日本通商事宜
附片詳悉覆陳伏乞

聖鑒訓示謹

奏十二月初一日

軍機大臣奉

旨該衙門知道欽此

四七五

四七五

籌議口外辦運庫科駐兵摺 二月初六日
奏為口外霍呢齊地方已由察哈爾派員辦理接
運毋庸另派以免紛歧並酌議庫科兩處擬令
宣大官兵各駐一城俾有專責恭摺仰祈

聖鑒事竊 臣欽奉正月十七日

上諭奎昌文碩奏請飭撥官兵赴科防守一摺著張
廷岳阿爾塔什達於前調宣化大同兩鎮官兵二
千名到庫後即各撥五百名配齊軍器派員管帶
前赴科布多駐紮以資防守等因欽此又奉正月

二十七日

上諭福濟等片稱請飭口北道隨帶委員並張家口
現存烏城餉項迅到霍呢齊辦理接運酌撥貢果
爾馬隊護守糧臺等語著李鴻章即飭口北道前
往辦理如該道未能分身即由李鴻章何璟各派
得力道府迅即出口接辦等因欽此仰見
眷念邊防軫懷兵食

聖謨廣運欽悚莫名惟查此次奉調各起征兵赴烏
庫協防該城均非產米之區大軍雲集枵腹堪
虞是以遵

旨飭委口北道奎斌在張家口設立糧臺採辦米石

源源運濟責任至重斷無可以分身之理至口
外臺站皆係蒙古地面官軍經過需用蒙古包
及駝隻廩羊等項須向游牧各旗設法勸辦內
地文員派往蒙地情形不熟言語不通動形掣
肘必誤事機去冬福濟奏請由直省派員出口
設立糧臺奉

旨令臣等會商辦理臣當以頭臺至賽爾烏蘇一帶
業經察哈爾都統添設轉運可毋庸另議設臺
分咨查照在案文盛上年陳奏亦聲明口內採
辦征兵口糧責成口北道專司其事口外應設

分局由文盛派員經營自係體察情形因地制宜之策頃准文盛咨送正月二十一日覆陳妥籌征兵出口事宜摺內擬於頭臺六臺十二臺各另派官一員兵十名自十八臺起至四十四臺擬將參領貢果爾所帶官兵分段撥駐遞送糧餉即令貢果爾在十八臺駐紮總司催趲是口外各臺籌辦接運已極周密且霍呢齊係二十五臺尚是察哈爾所轄即在文盛籌辦接運之內福濟前奏自係未悉情形此事必須畫一不可再議更張至推河以北赴烏赴庫臺跼迭

奉

嚴旨催飭各該將軍大臣就近設復亦係分內應辦之事無所用其推諉此時各軍糧食為最要既由張家口糧臺採辦沿途各臺祇須接遞轉運應責成貢果爾一手經理似未便另由內地派員往辦徒涉紛歧而於挽運仍無實濟據口北道奎斌稟覆該臺採買裝運各事極繁若再赴口外設臺於無糧無人呼應不靈之地是去有事之所於不顧轉駐無事之地而觀望亦覺無此辦法此口外霍呢齊業經辦理接運毋庸另

行派員之實情也又宣大官兵各撥五百名分
赴庫科兩城駐紮防守一節查庫倫在張家口
之北四十六臺科布多又在庫西三十二臺兩
城相距數千里茲奎昌等奏令宣大兵各分兩
處不特兩鎮統帶之員兼顧為難即運糧轉餉
由後路分解兩城必多輻輳歧誤凡軍營調隊
宜整不宜散宣大遠戍之卒各僅一千本甚單
薄聚紮尚可得力分散恐皆無用且用兵必取
地勢之相宜科城在西該城商賈向在歸化城
采辦食物一切晉省現又在歸化設立轉運糧

局若以大同兵一千名駐守科城弁兵接濟易通即家信銀兩亦便寄帶是科城與大同官兵相宜也庫倫在北該處商民向在張家口采辦食物一切直省現又在口設立糧臺若以宣化兵一千名駐守庫倫弁兵接濟易通即家信銀兩亦便寄帶是庫倫與宣化官兵相宜也與其分撥兩處致軍情多有不便不如各駐一城俾防務得有專責可否請

旨敕下庫倫科布多大臣俟宣大官兵到庫後即留宣兵駐庫而調大同兵全隊赴科人數並無增

減庶兩鎮統帶各易鈐束兩省解運較易專籌
勿再零星分撥轉於防務無裨此宣化大同官
兵各撥五百分赴庫科微有空礙之實情也口
外用兵籌糧籌運均極艱難必求人地相宜乃
克有濟各將軍大臣等倉猝集議或未暇一一
深謀惟於實在事理隔膜之處臣既有所見不
敢不據實遞陳理合恭摺馳

奏是否有當伏乞

皇太后

皇上聖鑒訓示謹

奏二月初六日

軍機大臣奉

旨另有旨欽此

再臣欽奉正月十七日

上諭科城訓練兵丁需用練兵章程及洋鎗隊等項
陣圖號令著李鴻章酌量給發並於天津洋鎗隊
內揀派官二員教習十名前赴科城俾資訓練等
因欽此當即恭錄札飭欽遵辦理茲據天津鎮
總兵陳濟清遵派六品藍翎儘先把總大沽協

後右營額外外委任得魁六品頂戴儘先把總
王振海二員帶同教習日兵六品頂戴正嘎巴
王殿邦等十名前赴科城聽候派委教練揀同
洋鎗隊陣圖營制呈送查核前來除札支應局
酌發三個月薪糧並分別加給川資銀兩飭令
迅速起程仍分咨察哈爾都統轉飭口外台站
照給乘騎駝馬按程護送前進暨咨明科布多
大臣於該官兵等到科後照章酌加口分以示
鼓勵外理合附片覆陳伏乞

聖鑒謹

奏二月初六日

軍機大臣奉

旨另有旨欽此

籌議口外調兵運糧緩急摺 四月初九日

奏為口外台站車駝缺乏征軍轉運孔亟續調赴
庫官兵擬請暫緩派撥以便專籌糧運恭摺覆
陳仰祈

聖鑒事竊 臣 欽奉二月十一日

上諭張廷岳等奏庫倫前調防兵難以分撥並探聞
回匪意圖東犯各摺片著李鴻章再於直隸所屬
各鎮酌調兵一千名派員管帶馳赴庫倫與前調
宣化官兵一併聽候張廷岳等調遣等因欽此又
奉三月二十日

上諭張廷岳等奏請飭直隸續調官兵迅速到防等語前調宣化官兵一千名此時計可出口所有續撥之兵著即飭令趕緊部署早日成行等因欽此

又奉四月十九日

上諭軍行糧食最為緊要該官兵裹帶行糧轉瞬即將罄盡亟應源源接濟著飭令口北道廣為購辦陸續運解前諭李鴻章續調直隸官兵一千名前赴庫倫究竟曾否調派何人統帶定於何時起程著該督即行奏聞等因欽此先是臣迭奉

寄諭遵即緘商直隸提臣傅振邦擬由古北口練軍

各營內酌量派撥官兵一千名遴員統帶以備
續調正在往返籌商復奉此次

寄諭仰見

聖主睠懷邊徼軫念征軍

訓示周詳

聖謨廣運跪聆之下欽悚莫名惟查張家口至庫倫
四十六台至烏城六十四台皆係蒙古沙漠地
面內地官兵奉調出口辦裝有費裹糧有費從
征數千里外又非旦夕即可撤防必令內無室
家之慮外無饑潰之虞始可責以効命軍士習

知邊塞艱苦往往憚於遠役即如此次大同官
兵到口後環求調劑情詞迫切幾釀事端經文
盛多方開導復為奏請每兵一名賞銀五兩始
於四月十三日分起就道宣化練兵奉調之初
經臣嚴飭台局將應需各項妥為籌備數月始
克成行甫至三台地方車駝短少應付極形竭
蹙復經該鎮王可陞督飭統帶游擊徐平川設
法催趲臣復允以到防後代催糧餉兼籌養家
必無缺乏而後前進本年調防烏庫馬步官兵
已有五千餘人沿途台站儲備柴米應付車駝

苦累已極若再添調直兵隨後繼進無論畿輔
練軍不宜抽調空虛遠道赴防能否得力支久
而台站先有坐困之勢糧餉尤有不繼之時此
增兵之難也各營軍裝糧械專恃各台車駝挽
送前經文盛籌借駝匹每台分撥一百隻數月
以來飛挽接運殆無虛日陸續倒斃現堪驅使
者每台僅有駝二三十隻雖續經雇車雇駝竭
力幫運專供弁兵乘騎已屬不敷周轉更難兼
顧糧運迭據口北道奎斌稟稱前由糧台發運
之米各台均有停積四月以前運米並無油布

袋遮蓋堆積草地設遇雨水必致蒸變大同官
兵約於五月初三日始能全數出口其時節交
夏至盛暑之際駝隻例須放青不能再任負載
文盛派員赴錫林等處雇覓車輛亦未知能否
應手各軍陸續抵防裹帶之糧即將罄盡專盼
後路接濟牛車笨滯日行不過三四十里又不
由台站行走道途較為紆折夏令大雨時行尤
難刻期運送設米石日久遇雨蒸變即使轉解
到營亦恐難資兵食此籌運之難也凡此二難
皆口外用兵寔在情形臣於去冬欽奉

諭旨徵調即飭委逐細確探深知塞外艱窘迫非內地可比與其兵多而無益於事不如兵少而餉可持久迭經奏蒙

聖鑒在案現在杜嘎爾行抵哈爾呢敦以馬匹疲瘦水草缺乏蒙古生計維艱需用各物皆難應手尚在貢鄂博地方駐紮未能按程端進是其明徵伏查此次文盛等籌備台站轉運應付不遺餘力無如天時物力均有所限口外各城既非產米之區全恃內地購運一有不繼貽誤匪輕倘台站因疲累而逃散前軍因饑乏而譁潰耗

費損威所關更鉅此尤臣私憂竊懼者耳所幸蘇彰阿帶吉黑馬隊已抵烏城宣化頭起步隊亦即抵庫據口北道探詢口外商人均稱庫倫等處甚屬平靜並無賊信宣軍探稟亦同目下甘省西北靈寗一帶回氛肅清兵力甚厚烏城又有大枝勁旅駐紮今昔時勢本自不同即使竄來零匪斷不能越烏城而東犯庫倫且宣化所謂官兵兵夫計一千三百餘人訓練尚為整齊協防庫城似已稍壯聲威但今後路糧藥如期運解該處餉項按月放給若遇緩急當有可

恃臣現飭口北糧台俟大同官兵行走畢後即稟商文盛將各台存積米麵趕緊趲運並將五六月應需米糧提前運解以免夏令遇雨阻滯各軍枵腹堪虞其續派古北口練兵一千名仍飭預為整備俟秋涼後台站駝匹敷用屆時烏庫兩城如續有確實警信再行調派出口庶於軍情大局有裨臣久在行間習知用兵之難首在足食孔聖垂訓必不得已先議去兵而後議去食其理千古不能易也厯考漢唐出塞之師數月必還其時口外有征無防即我

朝雍乾年間故事大舉沙漠權設台站亦不過一
半年即撤軍換防未有久屯重兵於漠北無糧
無賊之地者今時財力艱難如此台站疲累如
彼不在徵調之無兵而在饋運之難繼是以微臣
始終審慎未敢稍涉張皇僅以遵

旨調派一奏塞責愚慮所及不敢不據寔遞陳以備
採擇所有續調赴庫官兵擬暫緩調派以便專董糧
運接濟征軍各緣由是否有當謹恭摺由驛覆
陳伏乞

皇太后

皇上聖鑒訓示謹

奏

五
口

五
口

查閱大沽礮臺片 四月二十二日

再臣因天津教案各國賠卹銀兩大致議結中外商民均甚相安於四月十二日輕騎減從馳赴大沽北塘海口一帶查勘形勢並察度防軍布置礮臺營壘從前曾格林沁設防大沽南岸原有三營礮臺五座今僅存一營內礮臺三座其原紮郝家莊河口礮臺已被洋兵拆去洋房佔住北岸原有兩營礮臺三座今僅存一營內礮臺二座臺基尚為得勢惟臺上兵房礮洞板薄土鬆面面受敵斷不足以禦外侮四圍營牆

亦甚卑薄牆根為海潮所齧木椿土坯易就傾
壞礮位既少佳品架具多不齊全現在洋船來
往口內並有洋人常住礮營左右窺探消息臣
思海疆要口不可不設兵防備即不得不逐漸
培脩密飭大沽協副將羅榮光督率兵夫擇要
興築先將營壘加挑堅厚作裏外夾牆俾弁兵
可護身抵敵又擬於礮臺前面仿照洋式加築
護臺高出平地數丈俾我能擊人而又防人之
擊我臺頂不至十分喫重又牆外宜添築攔潮
土壩一道免致潮汐侵刷惟沿海四五十里內

斥鹵不毛土性鹹散不可取築僧格林沁當日亦由內地運土應用其餘一草一木無非購自遠方異常昂貴核計工料即就原營礮臺布置堅穩已需十數萬金津郡無此財力只有隨時籌畫如湊出若干經費即飭做若干工程現設礮位均係崇厚勸捐湊集大半粵東土礮固不如洋兵近日新礮之精亦遠遜外洋前數十年之礮臣已飭調舊存蘇局大小炸礮及江甯礮局製成洋礮陸續運津並委員添購西洋新式巨礮數尊以備酌量更換操習凡此之類需之

歲月籌有款項庶幾稍有可觀然亦不過聊壯
聲威未敢遽云禦大敵也至北塘與大沽犄角
相距三十里咸豐十年洋兵從此登岸進攻抄
襲後路關係亦要該處尚存南北岸礮臺三座
近年並未撥營駐守頽廢益甚 臣現調通永鎮
總兵周得勝帶遵化練軍一千名移紮北塘設
法布扼徐圖脩整總之海防較內地之防費餉
十倍禦外夷較禦內地之賊費力十倍目今各
國洋人進踞堂奧海口之險彼此共之門戶已
為洞開而防務未便棄置 臣查閱既畢即於十

七日回津所有海口礮臺擬籌布置情形理合
附片據實密陳伏乞

聖鑒訓示謹

奏

同日
軍機大臣奉

旨另有旨欽此

幼童出洋肄業事宜摺 十一年正月十九日

臣曾國藩跪
臣李鴻章

奏為遵派委員攜帶幼童出洋肄業兼陳應辦事
宜恭摺仰祈

聖鑒事竊 臣等擬選聰穎子弟前赴泰西各國肄習
技藝以培人才業於十年七月初三日專摺會
奏在案旋准總理衙門覆奏不分滿漢子弟擇
其質地端謹文理優長一律送往每年所需薪
水膏火准於江海關洋稅項下指撥等因知照
前來伏查挑選幼童出洋肄業固屬中華創始

之舉抑亦古來未有之事所有攜帶幼童委員
聯絡中外事體重大擬之古人出使絕域雖時
地不同而以數萬里之遙需之二十年之久非
堅忍耐勞志趣卓越者不足以膺是選查有奏
調來江之四品銜刑部候補主事陳蘭彬夙抱
偉志以用世自命挹其容貌則粥粥若無能絕
不矜才使氣與之討論時事皆能洞燭幾微蓋
有遠略而具內心者又運同銜江蘇候補同知
容閱前在花旗居處最久而志趣深遠不為習
俗所囿同治二年曾派令出洋購買機器該員

練習外洋風土人情美國尤熟游之地足以聯
外交而窺祕鑰以上二員上次摺內業經奏明
均堪勝任相應請

旨飭派陳蘭彬為正委員容閔為副委員常川駐紮
美國經理一切事宜此時不敢遽請獎敘將來
辦有成效再由 臣等從優酌保至挑選幼童應
在上海先行設局頭批出洋後即挑選次年之
第二批又挑選第三第四年各批與出洋之員
呼吸相通查有鹽運使銜分發候補知府劉翰
清淵雅純篤熟悉洋務業經檄令總理滬局事

宜所有駐洋及在滬兩局中外大小事件由陳
蘭彬等互相商辦各專責成茲將臣等前奏所
未及者酌擬應辦事宜開列清單恭呈

御覽仰懇

飭下總理衙門核覆施行所有遴派委員攜帶幼童
出洋肄業兼陳應辦事宜緣由理合恭摺會陳

伏乞

皇太后

皇上聖鑒訓示謹

奏

謹將挑選幼童及駐洋應辦事宜分條開列恭
呈

御覽

一 挑選幼童不分滿漢子弟俱以年十二歲至
二十歲為率收錄入局由滬局委員查考中
學西學分別教導將來出洋後肄習西學仍
兼講中學課以孝經小學五經及

國朝律例等書隨資高下循序漸進每逢房虛昴
星等日正副二委員傳集各童宣講

聖諭廣訓示以尊君親上之義庶不至囿於異學

一幼童選定後取具年貌籍貫暨親屬甘結收局註冊在滬局肄習以六個月為率察看可以造就方准資送出洋仍由滬局造冊報明通商大臣轉咨總理衙門查考至洋局課程以四箇月考驗一次年終分別等第報查其成功則以十五年為率中間藝成後游歷兩年以驗所學然後回至內地聽候總理衙門酌量器使奏明委用此係選定官生不准半途而廢亦不准入籍外洋學成後不准在華洋自謀別業

一出洋委員及駐滬辦事所有內外往來文件
應刊給關防洋局之文曰奏派選帶幼童出
洋肄業事宜關防滬局之文曰總理幼童出
洋肄業滬局事宜關防均經臣刊刻飭發以
資信守

一每年八月頒發時憲書由江海關道轉交稅
務司遞至洋局恭逢三大節以及朔望等日
由駐洋之員率同在事各員以及諸幼童望
闕行禮俾嫻儀度而昭誠敬

一出洋辦事除正副二委員外擬用繙譯一員

教習一員查有五品銜監生曾恆忠究心算
學兼曉沿海各省土音堪充繙譯事宜光祿
寺典簿附監生葉源濬文筆暢達留心時務
堪充出洋教習事宜業由 臣 檄飭遵照屆時
隨同正副委員一併前往

一每年需用經費查照奏定章程於江海關洋
稅項下指撥洋局用款下年應用之項於上
年六月前由上海道籌撥銀兩眼同稅務司
匯寄外洋交駐洋之員驗收其滬局用款即
交滬局總辦支銷惟原奏係二十年内共用

一百二十萬金約計每年須六萬兩而細加推算分年應用之款參差不齊不能適符六萬之數如首數年滬上設局幼童齊往用款較鉅第四年竟至八萬九千六百餘兩末數年幼童已歸用款較減第十九年僅需二萬三千四百餘兩此外各年遞推亦皆多寡懸殊茲由陳蘭彬等核開清單某年應用銀若干交江海關道署存照按年寄洋仍由該道分析造報以昭核實

籌議製造輪船未可裁撤摺 五月十五日

奏為遵

旨通盤籌畫製造輪船未可裁撤仍應妥籌善後經
久事宜恭摺密陳仰祈

聖鑒事竊 臣 欽奉同治十一年二月三十日

密諭前因內閣學士宋晉奏製造輪船糜費太重請
暫行停止當諭文煜王凱泰斟酌情形奏明辦理
茲據奏閩省輪船原議製造十六號定以鐵廠開
工之日起立限五年經費不逾三百萬兩現計先
後造成下水者六號具報開工者三號其撥解經

費截至上年十二月止已撥過正款銀三百十五萬兩另解過養船經費銀二十五萬兩用款已較原估有增造成各號輪船雖均靈捷較之外洋兵船尚多不及其第七八號船隻本年夏間方克葺工第九號出洋尚無準期應否即將輪船局暫行停止請旨遵行等語左宗棠前議創造輪船用意深遠惟造未及半用數已過原估且禦侮仍無把握其未成之船三號續需經費尚多當此用款支絀之時暫行停止固節省帑金之一道惟天下事創始甚難即裁撤亦不可草率從事且當時設局

意主自強此時所造輪船既據奏稱較之外洋兵船尚多不及自應力求制勝之法若遽從節用起見恐失當日經營締造之苦心著李鴻章左宗棠沈葆楨通盤籌畫現在究竟應否裁撤或不能即時裁撤並將局內浮費如何減省以節經費輪船如何製造方可以禦外侮各節悉心酌議具奏等因欽此仰見

聖主力圖自強規畫遠大欽佩莫名臣竊維歐洲諸國百十年來由印度而南洋由南洋而東北闖入中國邊界腹地凡前史之所未載互古之所

未通無不款關而求互市我

皇上如天之度概與立約通商以牢籠之合地球東西南朔九萬里之遙胥聚於中國此三千餘年一大變局也西人專恃其鎗礮輪船之精利故能橫行於中土中國向用之弓矛小鎗土礮不敵彼後門進子來福鎗礮向用之帆篷舟楫艇船礮划不敵彼輪機兵船是以受制於西人居今日而曰攘夷曰驅逐出境固虛妄之論即欲保和局守疆土亦非無具而能保守之也彼方日出其技與我爭雄競勝挈長較短以相角而

相陵則我豈可一日無之哉自強之道在乎師
其所能奪其所恃耳况彼之有是鎗礮輪船也
亦不過創制於百數十年間而侵被於中國已
如是之速若我果深通其法愈學愈精愈推愈
廣安見百數十年後不能攘夷而自立耶日本
小國耳近與西洋通商添設鐵廠多造輪船變
用西洋軍器彼豈有圖西國之志蓋為自保計
也日本方欲自保而偏視我中國中國可不自
為計乎士大夫囿於章句之學而昧於數千年
來一大變局狃於目前苟安而遂忘前三三十

年之何以創鉅而痛深後千百年之何以安內而制外此停止輪船之議所由起也 臣愚以謂國家諸費皆可省惟養兵設防練習鎗礮製造兵輪船之費萬不可省求省費則必屏除一切國無與立終不得強矣左宗棠創造閩省輪船曾國藩飭造滬局輪船皆為

國家籌久遠之計豈不知費鉅而效遲哉惟以有開必先不敢惜目前之費以貽日後之悔該局至今已成不可棄置之勢苟或停止則前功盡棄後效難圖而所費之項轉成虛糜不獨貽笑

外人亦且浸長寇志由是言之其不應裁撤也
明矣至奉

旨詢及經費如何減省一節閩廠相距過遠臣實不
知其詳但就滬津機器各局情形推之凡西人
製器往往所製之器甚微而所需以製器之器
甚鉅機器重大必先求安置穩固之地培土釘
椿建廠添屋不惜工本積累歲月而後成其需
用器具缺一不備則必各件齊全方能下手而
選料之精必擇其良而適用者尺寸恰合不肯
略有遷就其不中繩墨皆在屏棄之列又經營

構造時有變更或甫造未成忽然變計則全料已經折改廢棄且以洋匠工價之貴輪船件數之繁儻製造甚多牽算尚為合計若製器無幾逐物以求分晰工料之多寡則造成一器其價有逾數倍者矣凡造鎗礮輪船等項無事不然閩廠創始係由法人日意格德克碑定議立約該二人素非製造輪船機器之匠初不過約略估計迨開辦後逐漸增多勢非得已其造未及半而用數已過原估或造更加多而用費轉就減省似屬西人製器事理之常實未便以工部

則例尋常製法一律繩之惟廠工既已粗備以後不過工料薪費數大端應如何設法節省之處請

勅下福建督撫臣會同船政大臣沈葆楨隨時督飭樽節妥辦省其所當省而非省其所必不可省斯於事有濟矣又奉

旨詢及輪船如何製造方可以禦外侮一節臣查兵法須知己知彼乃得制勝之要訪聞英國兵船三百六十餘隻在諸國為最多內有鐵甲船四十餘隻法國先有兵船三百餘隻現減至二百

四
十
隻
內
鐵
甲
船
六
十
餘
隻
美
國
兵
船
二
百
餘
隻
內
鐵
甲
船
五
十
餘
隻
俄
國
兵
船
三
百
餘
隻
內
鐵
甲
船
二
十
餘
隻
布
國
兵
船
僅
百
餘
隻
內
鐵
甲
船
六
隻
現
又
續
籌
添
造
此
皆
西
洋
數
大
強
國
勢
力
相
埒
其
餘
小
弱
諸
邦
或
兵
船
數
十
隻
百
隻
不
等
然
而
上
年
布
法
之
戰
法
兵
敗
於
陸
路
雖
戰
船
多
而
堅
且
數
倍
於
布
尚
無
把
握
兵
事
勝
敗
固
難
言
已
大
概
西
洋
商
船
只
可
運
載
兵
糧
輜
重
其
兵
船
則
分
數
等
小
者
曰
根
駁
艙
面
置
砲
數
尊
用
以
哨
探
巡
防
今
閩
廠
所
製
萬
年
清
伏
波
安
瀾
等
船

滬廠所造恬吉操江測海等船大小尺寸雖稍異總之不離乎根較式樣至外洋兵船大者馬力或七八百匹食水至二三十丈置礮兩層至四五十尊閩廠尚未試造現滬局造成第五號船身長三十丈機器馬力四百匹鍋爐均在船腹水線之下艙面及兩旁兩層置礮二十六尊確係仿照外國三枝桅兵船做法英館新聞紙稱係中國第一號大船信不虛也然食水已十九尺內江淺涸時便虞阻擱又據滬局道員馮焄光稟稱上年法國有鐵甲船至滬該員登舟

察看船礮堅利異常本年四月英國鐵甲船又
至滬俱泊吳淞江外不能進口該道等往觀水
線之上鐵甲厚十寸內襯木板厚十八寸船幫
均係夾層中可藏人即轟破外層而裏鐵未穿
外水不能灌入機器鍋鑪及兩層巨礮均在厚
鐵甲之中其首尾鐵皮稍薄水線之下鐵皮不
過五六分船內礮位用電氣線燃放各礮一時
同響又用汽機輪轉起旋較人力尤為神速等
語此等制作實堪奇詭蓋根較不若大兵船之
堅猛兵船又不若鐵甲船之堅猛以鐵甲船禦

兵船當之輒糜况根駁乎惟船愈堅大則費愈多今欲我數年創始之船遽敵彼百數十年精益求精之船不待智者而知其不逮然就已成者而益求精未必其終不逮也中國大勢陸多於水練陸軍視練水軍尤亟即使兵船造精非專恃輪船可以禦侮况如天津海口最淺次則江南之吳淞口福州廣東進口均有淺處外洋大兵船鐵甲船勢難深入即長江金陵以上亦不能駛我之造船本無馳騁域外之意不過以守疆土保和局而已海外之險有兵船巡防而

我與彼可共分之長江及各海口之利有輪船
轉運而我與彼亦共分之或不讓洋人獨擅其
利與險而浸至反客為主 臣嘗督同滬局委員
籌議仿造兵船以該局現造五號為度不宜更
求加大庶無事時揚威海上有警時仍可收進
海口以守為戰該局員匠近由英國覓得小鐵
甲船式樣身短中寬底平僅置巨砲數尊其圓
活砲臺在船中段食水淺而不能出洋聞西國
用以守口最宜曾國藩上年曾經奏明仿造尚
未開工第為禦侮之計則不妨多為之備彼見

我戰守之具既多外侮自可不作此不戰而屈
人之上計即一旦齟齬彼亦陰懷疑懼而不敢
遽爾發難若慮制勝無甚把握而遂自隳成謀
平日必為外人所輕臨事只有拱手聽命豈強
國固本之道哉惟是

國家經費支絀製造輪船既未可裁撤必須妥籌
善後經久之方竊查閩廠用費專指閩海關洋
稅每月五萬滬廠用費專指江海關二成洋稅
均係撥定專款應請仍就原款節縮經營暫無
庸另請添撥惟閩廠洋匠過多需費較重若有

不足再由船政大臣等隨時奏辦至於養船之費當分兵船商船二端閩廠兵船現議酌撥沿海各省巡防分養嗣後添造兵船無可分撥擬請裁撤各省內外洋紅單拖繒艇船而配以自造兵輪船即以艇船脩造養兵之費抵給輪船月費應請

旨飭部凡有議脩各項艇船者概予奏駁令其改領官廠兵輪船以裨實濟緣紅單拖繒等船實不如輪船之迅利雖費倍而功用亦倍之也沿海沿江各省尤不准另行購雇西洋輪船若有所

需令其自向閩滬兩廠商撥訂製庶政令一而
度支可節矣至載貨輪船與兵船規制迥異閩
滬現造之船裝載無多商船皆不合用曾國藩
前飭滬廠再造兵船四隻外另造商船四五隻
閩廠似亦可間造商船以資華商領雇總理衙
門去冬已函商及之臣前與曾國藩籌議中國
殷商每不願與官交涉且各口岸輪船生意已
被洋商佔盡華商領官船另樹一幟洋人勢必
挾重貲以傾奪則須華商自立公司自建行棧
自壽保險本鉅用繁初辦恐無利可圖若行之

既久添造與租領稍多乃有利益然非有熟悉商情公廉明幹為衆商所深信之員為之領袖擔當則商人必多顧慮自有此議聞華商願領者必准其兼運漕糧方有專門生意不至為洋商排擠惟運漕事體繁重現又無船可雇自應從緩酌議將來各廠商船造有成數再請

勅下總理衙門商飭各省妥為籌辦抑臣更有進者船廠機器之用非鐵不成非煤不濟英國所以雄強於西土者惟藉此二端耳閩滬各廠日需外洋煤鐵極夥中土所產多不合用即洋船來

各口者亦須運用洋煤設有閉關絕市之時不但各鐵廠廢工坐困即已成輪船無煤則寸步不行可憂孰甚南省如湖南江西鎮江臺灣等處率多產煤特無抽水機器僅能挖取上層次等之煤至下層佳煤為水浸灌無從汲淨不能施工誠使遴派妥員招覓商人購買機器開採價值必視洋煤輕減通商各口皆可就近廣為運售而洋煤不阻自絕船廠亦應用不窮至楚粵鐵商咸豐年前銷售甚旺近則外洋鐵價較賤中土鐵價較昂又粗硬不適於用以致內地

鐵商十散其九西洋鍊鐵鍊銅及碾捲鐵板鐵條等項無一不用機器開辦之始置買器具用本雖多而煉工極省煉法極精大小方圓色色俱備以造船械軍器土鐵貴而費工洋鐵賤而得用無怪洋鐵銷售日盛土鐵營運漸稀也近來西人屢以內地煤熾為請謂中土自有之利而不能自取深為歎惜聞日本現用西法開煤鐵之礦以興大利亦因與船器相為表裏曾國藩初回江南有試采煤窰之議而未果行誠能設法勸導官督商辦但借用洋器洋法而不佳

洋人代辦此等日用必需之物採煉得法銷路必暢利源自開惟其餘利且可養船鍊兵於富國強兵之計殊有關係此因製造船械而推廣及之其利又不僅在船械也要之法待人而後行事因時為變通若徒墨守舊章拘牽浮議則為之而必不成成之而必不久坐讓洋人專利於中土後患將何所底止耶所有遵

旨悉心籌議緣由謹繕摺由驛密陳伏乞

皇太后

皇上聖鑒訓示謹

奏

密籌調員接統銘軍摺八月初二日

奏為遵

旨密籌曹克忠所部銘軍撤回安插擬先請

飭調幹練大員來津商定機宜赴陝接統以弭後患
恭摺仰祈

聖鑒事竊臣承准軍機大臣密寄七月二十八日奉
上諭前因武毅右營勇丁潰散並有戕害營官情事
當經諭知穆圖善俟左宗棠進駐蘭州即督率得
力兵勇移紮乾邨一帶並察看曹克忠能否得力
所部勇丁如何分別撤留令該將軍悉心酌度奏

明辦理茲據邵亨豫奏稱曹克忠自接統銘軍後
駕馭未能得宜時逾半年與兵將總不浹洽該提
督久患足疾於營哨各官疏於接見軍心已搖訛
言四起附近居民紛紛遷徙營弁亦多乞假請飭
李鴻章密籌辦理等語軍營統帥全在謀勇兼施
聯絡軍心申明紀律曹克忠既不能約束勇丁致
令戕官潰散是其不勝統帥之任已可概見近復
患病不能接見營哨各官則其兵將離心猜疑日
積勢所必至此軍素稱勁旅現在不但無益陝防
且恐激生事端致滋後患著李鴻章悉心籌畫將

曹克忠所部銘字一軍應如何撤回安插俾有用
之兵不至潰散為患地方是為至要穆圖善於行
抵乾邲後妥為布置俾銘軍去留得以迅速酌定
不至日久患生邵亨豫於銘軍未撤之先務當不
動聲色妥為調處以弭亂萌該署撫原片著抄給
李鴻章穆圖善閱看將此由五百里各密諭知之
等因欽此跪聆之下仰見

聖慮周詳

指示嚴切欽悚莫名臣前因曹克忠為多隆阿部下
得力之將又在秦隴素有戰聲劉銘傳請假回

籍已奉

旨允准並據該提督

奏請曹克忠接統銘營自應體察軍情不致齟齬
臣相距太遠若另請

簡派他人恐轉於軍情未洽不敢豫存成見仍諄屬
曹克忠到營後妥為撫馭勿變舊章勿逞客氣
又緘勸劉銘傳從容商辦勿稍疏率孰意曹克
忠行抵西安即與劉銘傳意見不合及至乾州
則劉銘傳急於交卸曹克忠即行奏參皆覺未
甚妥愜而已無從追悔此臣慮事之疏知人之

閣所夙夜負疚者也各營將士經劉銘傳一手
募鍊轉戰十年如接統者恩信未孚衆情斷難
浹洽臣迭次馳書曹克忠竭誠勸誡謂其入手
時辦理鹵莽恐失軍心以後當加意聯絡整頓
俾為我用六月間忽接曹克忠函稱該提督足
疾數月未愈武毅右營竟有會匪勾串譁潰狀
官情事聞之不勝焦憤當又緘屬該提督務勤
於接見將領約束營哨上下不稍隔闕指臂庶
可相聯昨接其七月十六日來書據稱與各統
領營官推心置腹病時常在臥室接見並無不

洽之處軍心似已帖服惟陝省民情浮動誤聞
游勇捏造流言或不免附和張皇並以該提督
足瘡加劇人地不宜請選賢能往代等語臣維
軍中易將本極難事察度曹克忠詞意目前尚
不至遽形決裂當即復書慰勉並允徐籌替人
再行妥辦以安其心茲復欽奉

諭旨以此軍素稱勁旅現在不但無益陝防且恐激
生事端應如何撤回安插俾有用之兵不至潰
散為患地方

聖謨深遠處置精當臣反覆籌思計無踰於此者但

若令曹克忠撤回無論其病體未愈退志已萌
即勉強遵行亦恐呼應未靈激生他變臣處又
無與銘軍素習可當一面之人惟查有遇缺提
奏按察使劉盛藻自同治元年創募銘營即隨
劉銘傳在營帶隊馳驅南北倚之如左右手該
員威惠廉正軍士翕服劉銘傳素性跣弛臨敵
則自將督戰無事或請假離營皆賴劉盛藻頻
年坐鎮督率訓練是以克成勁旅所向無前七
年捻平後臣奏令劉盛藻代統銘軍萬衆駐防
張秋河北兼顧畿南曾國藩蒞直兩年指揮如

意銘營到處兵民相安劉盛藻之力也嗣劉銘
傳復出奉

旨移師赴陝臣力勸劉盛藻偕行以資彌縫臣救之
益劉盛藻因親老久役決計引歸劉銘傳亦不
忍重拂其意今曹克忠撫馭未宜陝西撫臣邵
亨豫河南撫臣錢鼎銘來信皆欲劉盛藻復起
視師而該臬司鄉居恬淡自回籍後並無隻字
與臣通問臣念銘營素極整肅經此變易習氣
頗難挽回撤留皆須妥議必得威望與將士素
孚者接統然後撤回安置可漸順手昨已專函

劉切諭令劉盛藻兼程北來妥商辦理以維大局合無仰懇

天恩敕下安徽撫臣英翰飛飭該臬司兼程赴直與臣籌酌機宜再令迅速往陝接統銘軍妥撤回南徐壽安置冀可弭茲隱患將來穆圖善行抵乾州既經帶有得力兵勇可否請

旨飭令該將軍勿庸留調銘營免滋搖惑除俟劉盛藻到直赴陝有期再行具

奏外所有遵

旨密籌銘軍撤回安插擬調員妥辦各緣由理合繕

摺先行由驛據實覆陳伏乞

皇太后

皇上聖鑒訓示施行謹

奏

奏報機器局經費摺九月十七日

奏為天津機器局自九年八月至十年十二月動用經費各款援案開單奏報恭摺具陳仰祈

聖鑒事竊查天津機器局自同治六年四月開局起至九年七月底止經前任三口通商大臣崇厚等將創辦情形動用經費開列簡明清單具奏
欽奉

上諭天津機器局告成所有開單用過銀數即著准其開銷應如何斟酌添製開拓之處著交李鴻章妥為籌畫奏明辦理等因欽此 臣遵即將該局事

務悉心妥籌酌量開拓飭委湖北補用道沈保靖總理其事並委津海關道陳欽會同經理迭經奏明在案該道等接辦以來加意研求配製洋火藥銅帽添造機器礮彈礮架等件均屬精利適用增建廠房添購礮器興造藥庫加築圍牆亦經次第規畫駕馭中外匠役寔心寔力處置裕如整頓一切具有條理可冀漸收成效惟上年夏秋霖雨連旬洪流暴漲局地低窪遂成巨浸非特新建工程勢須停頓即已成各工購到料物猝遭淹浸諸形棘手該道等督率員役

極力補救將機器房座設法保護並將技藝未
精之洋匠分別辭退以節經費總管洋官美國
領事密妥士於機器未甚精覈亦即因病撤差
另募熟手接辦交冬以後水勢稍退涸出各廠
早經修復其淋硝合藥廠基低處逐漸培高鑄
鐵熟鐵鋸木等新廠未竣各工趕緊相機籌辦
增購外洋碾藥機器亦俱陸續運到仍就現在
規模妥為措置所有該局動用款目自同治九
年八月起至十月底止係前署三口通商大臣
成林等經辦九年閏十月起至十年十二月底

止係該道等經辦前任通商大臣崇厚報銷案內尚餘銀壹千參百伍拾捌兩伍錢貳分參毫物料約值價銀數千兩該局陸續由關庫四成洋稅項下領過銀貳拾伍萬陸千捌拾兩捌錢玖分伍釐陸毫共計一年零六個月支用銀貳拾肆萬肆千玖百捌拾兩玖錢柒分捌釐貳毫壹絲貳忽截至十年冬底止仍存銀壹萬貳千伍百陸拾陸兩陸錢貳分參釐陸毫捌絲捌忽尚餘一切物料約值銀伍萬數千兩甚為覈實節省茲據該道等詳稱局內所購機器料物

來自西洋名目互異筆難盡譯其製造諸法隨時與洋匠講求改變費工費料較多中外匠役量才給值高下懸殊又復隨宜損益均無例價可循核與軍需營造各則例寔是在不能相符亦未能劃期造報仍懇援照成案開單請銷會詳請奏前來 臣查該道沈保靖在上海辦理機器局務多年於外洋製器事理聞見較熟時與津海關道陳欽經營商榷深費苦心且能破除情面嚴束員匠樽節經費毫無虛糜 臣就近隨事督察日省月試據詳各節委係寔在情形若飭

令將名目件數逐細造銷勢必多方遷就轉非
核寔之道謹援照向章繕具簡明清單恭呈

御覽合無仰懇

天恩勅部查照成案照單准銷寔於局務有裨除分
咨總理各國事務衙門戶部知照外所有天津
機器局一年零六個月動用經費據寔開單緣
由理合恭摺具陳伏乞

皇太后

皇上聖鑒訓示謹

奏

謹將天津機器局自同治九年八月起至十年
十二月分止收支各項銀兩分別款目繕具清
單恭呈

御覽

計開

舊管項下

一原存庫平銀壹千參百伍拾捌兩伍錢貳分
參毫

新收項下

一收津海關陸續移撥四成洋稅庫平銀貳拾

伍萬陸千捌拾兩捌錢玖分伍釐陸毫

一收總理洋人美領事密妥士等借支物料繳
回原價庫平銀壹百拾陸兩壹錢捌分陸釐
以上共收庫平銀貳拾伍萬陸千壹百玖
拾柒兩捌分壹釐陸毫

開除項下

一給發員弁司事人等薪水心紅紙張等項庫
平銀壹萬肆千伍百陸拾伍兩玖錢壹分壹
釐捌毫陸忽

一給發總理洋人及各廠洋匠薪水工食等項

庫平銀肆萬柒千肆百肆拾陸兩柒錢貳分
伍釐貳毫柒絲伍忽

一給發仿造外洋機器火藥銅帽工匠學徒夫
役工食等項庫平銀貳萬捌千玖拾兩捌錢
捌分伍釐捌毫肆絲捌忽

一給發採買外洋銅鐵鋼鉛木植煤炭硝磺漆
油錘水雜物及起運器料公司保險輪帆各
船腳價等項庫平銀陸萬伍千玖百伍拾壹
兩壹錢伍分柒釐柒毫伍絲柒忽

一給發採買外洋廠屋住房藥庫挖濠墊土各

工購買外洋油松火泥及采辦缸甌瓦石等
項庫平銀參萬捌千柒拾貳兩參錢參分參
釐陸毫捌絲捌忽

一給發定購藥礮銅帽捲銅皮機器及購到火
輪機磨各件海防備用後門進子鋼礮等價
及洋行墊本利銀公司保險等項庫平銀肆
萬參千伍百柒拾貳兩參錢壹分肆毫

一給發天津行營製造局及上海操江測海輪
船巡防津沽支撥物料等項庫平銀柒千貳
百捌拾玖兩陸錢陸分參釐肆毫參絲捌忽

以上共支庫平銀貳拾肆萬肆千玖百捌
拾捌兩玖錢柒分捌釐貳毫壹絲貳忽
寔在項下

一存庫平銀壹萬貳千伍百陸拾陸兩陸錢貳
分參釐陸毫捌絲捌忽

試辦招商輪船摺 十一月二十三日

奏為派員設局招商試辦輪船分運來年江浙漕糧以備官船造成僱領張本恭摺具陳仰祈

聖鑒事竊查本年五月間 臣於議覆製造輪船未可裁撤摺內籌及閩滬現造輪船皆不合商船之用將來間造商船招令華商領僱必准其兼運漕糧嗣准總理衙門奏覆以間造商船華商僱領一節李鴻章沈葆楨俱以為可行應由該督撫隨時察看情形妥籌辦理等因奉

旨依議欽此旋准總理衙門函屬遼諭有心時事之

員妥議章程俟官船工竣成規具在承租者自
爭先恐後誠為力求寔濟起見臣反覆籌維現
尚無船可領徒議章程未即試行仍屬空言無
補因思同治六七年間曾國藩丁日昌在江蘇
督撫任內迭據道員許道身同知容閱創議華
商置造洋船章程分運漕米兼攬客貨曾經寄
請總理衙門核准飭由江海關道曉諭各口試
辦日久因循未有成局僅於同治七年借用夾
板船運米一次旋又中止本年夏間臣於驗收
海運之暇遵照總理衙門函示商令浙局總辦

海運委員候補知府朱其昂等酌擬輪船招商章程嗣又據稱現在官造輪船內並無商船可領該員等籍隸松滬稔知各省在滬殷商或置輪船或挾資本向各口裝載貿易向俱依附洋商名下若由官設立商局招徠則各商所有輪船股本必漸歸併官局似足順商情而張

國體擬請先行試辦招商為官商浹洽地步俟機器局商船造成即可隨時添入推廣通行又江浙沙甯船隻日少海運米石日增本屆因沙船不敷諸形棘手應請以商局輪船分裝海運米

石以補沙甯船之不足將來雖米數愈增亦可
無缺船之患等情臣飭據津海關道陳欽天津
道丁壽昌等覆核皆以該府朱其昂所議為然
請照戶部核准練餉制錢借給蘇浙典商章程
准該商等借領二十萬串以作設局商本而示
信於衆商仍預繳息錢助賑所有盈虧全歸商
認與官無涉朱其昂承辦海運已十餘年於商
情極為熟悉人亦明幹當即飭派回滬設局招
商迭據稟稱會集素習商業殷富正派之道員
胡光墉李振玉等公同籌商意見相同各幫商

人紛紛入股現已購集堅捷輪船三隻所有津滬應需棧房碼頭及保險股分事宜海運米數等項均辦有頭緒並稟經臣咨商江浙督撫臣飭撥明年海運漕米二十萬石由招商輪船運津其水脚耗米等項悉照沙甯船定章辦理至攬載貨物報關納稅仍照新關章程辦理以免藉口昨據浙江糧道如山詳稱該省新漕米數較增正患沙船不敷撥用請令朱其昂等招商輪船分運浙漕較為便捷又准署兩江督臣張樹聲函覆以海運難在僱船今有招商輪船以

濟沙衛之乏不但無礙漕行寔於海運大有裨益當嚴飭江海關道等和衷協力勿致善舉中輟等語是南北合力籌辦華商輪船可期就緒目前海運固不致竭蹶若從此中國輪船暢行閩滬各廠造成商船亦得隨時租領庶使我內江外海之利不致為洋人佔盡其關係於

國計民生者寔非淺鮮除由 臣隨時會同南洋通商大臣督飭各口關道妥商照料並切諭該員紳等體察商情秉公試辦勿得把持滋弊並咨明總理各國事務衙門戶部查照外所有試辦

招商輪船分運江浙漕糧各緣由理合繕摺具

陳伏乞

皇太后

皇上聖鑒謹

奏

宋慶暫緩赴甘片十二月初六日

再迭據提督宋慶函稱屢奉定安鮑源深咨行寄諭俟來歲春融仍著該軍拔隊赴甘協勦現在料理行裝聽候續調惟查甘境殘破太甚各營軍糧皆從川陝購運路遠費艱該軍向指豫餉經河南撫臣錢鼎銘照章撥解已屬竭蹶圖維駐防秦邊尚可敷衍口食若遠赴甘隴所需糧運巨款豫省力難添籌中道必至不支等語臣查甘省及口外情形皆不難於添兵而難於添餉若不添餉則軍裝糧草轉運不及即強將勁卒

亦不能枵腹圖功且恐接濟偶缺軍心不固譁
潰易生是添兵轉不如無兵也宋慶所慮固係
實情左宗棠老於軍事向不欲多調客兵蓋深
知甘境糧運維艱增兵無益前調宋慶往助想
因湘營進取西甯苦戰力單為此不得已之計
亦未籌及該軍糧運當由何處加撥茲據劉錦
棠稟報西甯克捷逆酋馬桂源等負創遁逃軍
情大有轉機湘軍必可堵挂至甘涼肅州一帶
又有金順督師協助前敵不患乏人似宋慶無
須速往鮑源深統籌大局預防後患亦欲留宋

慶一軍扼堵河西及邊外門戶可否仰懇

敕下鮑源深傳知宋慶暫緩西進俟糧運經費籌措
有著或甘省軍情再有變動迅即催令拔隊庶
於前後防勦機宜均有裨益理合附片具陳伏
乞

聖鑒訓示謹

奏

籌議黃運兩河摺 十二年閏六月初三日
奏為遵

旨從長計議黃運兩河情形據實詳細覆奏恭摺仰
祈

聖鑒事竊臣承准軍機大臣字寄同治十二年二月初一日奉

上諭前因喬松年奏籌辦黃運兩河情形文彬丁寶楨奏請仍挽復淮徐故道並御史游百川奏河運並治宜詳籌妥辦等情當經降旨交軍機大臣會同六部九卿妥議具奏茲據遵議會奏請派大員

前往山東查勘各等語黃河自銅瓦鑲決口改道北行後泛濫山東境內久為漕運民生之害現在淮徐故道既難規復豈可聽其自然不為修治喬松年前奏堵合霍橋決口築隄束水使由張秋八里廟一口下注入海旁流分注藉以濟運所擬辦法究竟是否可行有無窒礙必須籌畫萬全方可興辦此事關係重大固不可日久因循亦未便輕率從事李鴻章曾在山東剿辦捻匪於黃運兩河閱歷既久自必熟悉著該督將喬松年等所奏悉心體察從長計議應如何妥籌辦法期於漕運民

生兩有裨益及辦理有無把握之處據實詳細具奏等因欽此仰見

聖慮周詳實事求是欽悚莫名臣自少壯南北奔走嗣督師追賊往來河上迭就黃運兩河築圍圍賊雖於河務非所素習而閱歷變遷討論掌故采擇衆議略有見聞奉

命後復遴派幹練耐勞之員分投前往訪察測量茲謹悉心妥議為我

皇上詳細陳之伏查治河之策原不外恭親王等所奏審地勢識水性酌工程權利害四語而四語

之中尤以水勢順逆為要現在銅瓦鑲決口寬約十里跌塘過深水涸時深逾三丈舊河身高決口以下水面二丈內外及三丈以外不等如其挽河復故必挑深引河三丈餘方能吸溜東趨查乾隆年間蘭陽青龍岡之役費帑至二千餘萬大學士公阿桂奏言引河挑深一丈六尺人力無可再施今豈能挑深至三丈餘乎十里口門進占合龍亦屬創見

國初以來黃河決口寬不過三四百丈尚且屢堵屢潰常開數年而不成今豈竟能合龍而保固

乎且由蘭儀下抵淮徐之舊河身高於平地約三四丈風沙成堆老淤堅結年來避水之民移住其中村落漸多禾苗無際若挽地中三丈之水跨行於地上三丈之河其停淤待潰危險莫保情狀有目者無不知之而歲久乾隄即加修治必有受病於不易見之處萬一上游放溜下游旋決收拾更難議者或以河北行則穿運為運道計終不能不強之南行以會清口臣查嘉慶以後清口淤墊夏令黃高於清已不能啟壩送運道光以後禦黃壩竟至終歲不啟遂改用

灌塘之法自袁浦洩黃入湖湖身頓高運河水少灌塘又不便遂疊次奏行海運彼時河務運務實有岌岌不可終日之勢蓋自明末迄

國初借清刷黃頗蒙其利厥後河淮不能合流天時地利人事三者皆窮今即能復故道亦不能驟復河運非河一南行即可僥倖無事也恭讀道光八年十二月初五日

上諭江境禦黃壩上下一帶黃河積年淤墊以昔證今已成不可救藥之勢等因欽此

聖慮周詳早已洞悉無遺此淮徐故道勢難挽復且於

漕運無甚裨益之實在情形也至河臣喬松年所擬就東境束黃濟運一節臣查當年清口淤墊卽是借黃濟運之病乾隆二十三年八月

諭河臣白鍾山曰引黃入運黃水多挾泥沙一入運河易致淤墊非甚不得已不可輕為此遷就之計嘉慶

十五年十二月十九日

諭河臣陳鳳翔曰因利漕先已病河權其輕重寧使暫時剝運渡黃必不可復用借黃濟運之計各等因欽此道光五年洪湖潰洩兩江督臣孫玉庭等復議引黃濟運數渡之後卽見填淤起剝磨淺卒

至未終其事是

歷朝聖訓昭垂至明至確往事覆車可為永鑒今張秋
運河寬僅數丈兩岸廢土如山若引重濁之黃
以閘壩節宣用之水勢抬高其淤倍速人力幾
何安能挑此日進之沙且所挑之沙仍堆於積
年廢土之上雨淋風蕩河底日高閘亦壅塞久
之黃必難引明臣萬表劉天和等僉以此事害
多於利非淤即決譬之以病為藥以狼兵止寇
語殊痛切宏治初年荆隆口銅瓦鑲等處屢次
大決皆先因引黃濟張秋之運遂致導隙溢觴

臨清地勢低於張秋數丈而必以後無掣溜奪
河之害臣亦不敢信也至霍家橋堵築隄工程
尤不易辦該處本非決口乃大溜經行之地兩
頭無隄無岸一望浮沙並無真土可取若興作
於茫茫沙水之中目前無從起手無從立腳即
勉強築沙堆隄節節逼溜下做竊恐浮沙易塌
適足櫻河之怒而所耗實多日後防守難資終
為痼疾一遭潰陷水仍別穿運道而不專會張
秋豈非全功盡棄至同知蔣作錦所擬導衛濟
運原因張秋以北無清水灌運故為此議惟查

元村集迤南有黃河故道地多積沙施工不易
且以全淮之強不能敵黃尚致倒灌停淤豈一
清淺之衛遂能禦黃濟運耶彼其意蓋襲取山
東諸水濟運之法不知泰山之陽水皆西流因
勢利導十六州縣一百八十泉之水源旺派多
自足濟運衛水來源甚弱北流最順今必屈曲
注之南行一水何能兩分其勢實多不便况平
時淺可膠舟漲時極其渾濁若攔河作閘遏水
一遇伏秋盛漲閘必衝決新渠必淤即幸不決
不淤而使上駛之蘆鹽下運之豫糧及來往商

船皆停阻於河而聽命於閘勢不能行若令蘆
鹽改由臨清運河入豫則三省鹽綱紊亂窒礙
尤多若欲分沁入衛以助其源而沁水猛濁一
發難收昔人已有多明戒豫民必多驚惶若必多
方更變另謀引水灌運必至如南河清口故事
徒增漏卮無可持久此借黃濟運及築隄東水
工程均無把握與導衛濟運難行之實在情形
也惟河既不能挽復故道則東境財賦有傷水
利有礙城池難於移置鹽場間被漫淹如撫臣
丁寶楨所奏各節均屬可慮臣查大清河源寬

不過十餘丈今自東阿魚山下至利津河道已
刷寬半里餘冬春水涸尚深二三丈岸高水面
又二三丈是大汎時河槽能容水五六丈矣奔
騰迅疾水行地中此人力莫可挽回之事亦禱
祀以求而不易得之事目下北岸自齊河至利
津南岸齊東蒲台民間皆接築護埝迤邐不斷
雖高僅丈許詢之士人每有漲溢出槽不過數
尺尚可抵禦並無開口奪溜之事岱陰之水如
繡江等河亦經擇要築隄汎至則漲汎過則消
受災不重至如齊河濟陽齊東蒲台利津各縣

城近臨河岸十九年來幸官民防守無恙以後
可守則守不可守則遷似應隨時相勢設施若
於此時驟議遷徙經費無籌民情難喻無此辦
法惟鄆城一縣地本窪下現已淪沒水中須籌
移置東省鹽場在海口者雖受黃淤產鹽不旺
經撫臣竭力經營南運膠萊之鹽時為接濟引
地無虞淡食惟盤剝多費價值稍昂耳夫河在
東省固不能云無害但得地方官補偏救弊設
法維持尚不至為大患昔乾隆十八年銅山決
口不能收功尚書孫家淦曾有分河入大清之

疏乾隆四十六年蘭陽大工屢敗垂成大學士
嵇璜又有改河行大清之疏此外表曰修錢大
昕胡宗緒孫星衍魏源諸臣議者更多其時河
未能北流尚欲挽使北流今河自北流乃轉欲
挽使南流豈非拂逆水性恭讀嘉慶十六年八

月十二日

上諭南河近年以來年年漫口前此已糜費三千餘萬
均經竭力措支辦理毫無成效今復鉅工疊出數將
千萬國家豈能以有制之帑金注無常之漏卮等因
欽此大抵南河堵築一次通計約費七八百萬歲修

約七百餘萬統計工需已在宗祿名糧民欠之上寔為無底之壑蓋因河身日高水行不順雖窮天下之力而不能必保安瀾今河北徒近二十年未有大變亦未多費巨款比之往代已屬幸事且環拱

神京尤得形勝自成豐五年銅瓦鑲東決後粵捻諸逆竄擾曹濟幾無虛日未能過河一步而直東北岸防堵有所憑依稍省兵力更為

畿輔百世之利此兩相比較河在東雖不亟治而後患稍輕河回南即能大治而後患甚重之實

在情形也近世治河兼言利運遂致兩難率無
長策元明大河南行始能開會通以運漕至河
北徙則無如運何斷難一治而兩全事窮則變
變則通為今之計似不得不出於河自河漕自
漕現在議漕政者鮮不以規復舊章為望然此
兩言可以決耳運河有水可漕無水則不可漕
水能分其自然之有餘者如南旺之制則可漕
反是則不可漕同治初年大溜全趨張秋尚能
灌運嗣溜勢南滾運隄節節穿斷漕船繞坡河
至八里廟而黃水不能入運不得已引溝塍雨

水逐段倒塘灌放艱險已極豈可一再嘗試即
運河黃淤歲積歲挑亦難久行若以全漕阻聚
河干俸此無常之水其所害又非徒勞費已也
若如前人所議漕船順河而東由利津渡海入
天津取道固捷但江船不能涉河河船不能放
洋勢難強為若做前代置倉轉搬之法建倉設
官一不得人便滋流弊而由張秋至臨清陸輓
二百餘里車馬盤兌之繁費陰雨雪變之折耗
何可勝計且北路亦無許多剝船可備接運反
覆籌維竟無別有利運之術臣愚以為

天庾正賦惟蘇浙為大宗

國家治安之道尤以海防為重當今沿海數千里
洋舶駢集為千古以來創局已不能閉關自治
正不妨借海道轉輸之便逐漸推廣以擴商路
而實軍儲蘇浙漕糧現既統由海運臣前招致
華商購造輪船搭運頗有成效江廣等省自軍
興後奏改減價折漕民心大定若復徵解本色
苦於運費無措加之於民則必滋事變取之於
公又無此閒款似應暫准照章折解仍由各督
撫隨時體察情形如可酌提本色若干石即運

滬由海船解津較為便速如京倉尚有不足更隨時指撥漕折銀兩由南省采買運津或派員在天津招商采辦亦尚合算應請

旨敕下戶部從長計議妥籌辦理至運道雖不能暢通河務亦未可全廢此時治河之法不外古人因水所在增立隄防一語查北岸張秋以上至開州境二百餘里有古大金隄可恃為固張秋以下抵利津海口八百餘里岸高水深應由山東撫臣隨時飭將原有民埝保護加培南岸自安山下抵利津多傍泰山之麓誠為天然屏障

惟安山以上至曹州府境二百餘里地形較窪
為古鉅野澤即宋時八百里之梁山泊也自宋
元迄我

朝凡河決入大清之年無不由此旁注曹單鉅野
金鄉各邑甚至吞湖併運漫溢數十州縣波及
徐淮為害甚烈其侯家林決口現雖堵築堅固
惟上下一百餘里之民埵高者丈餘低者數尺
斷難久恃此處若有一失則迤南之運道水櫃
復被沖淤廬舍民田更遭蕩析其患不可勝言
且黃河流分勢緩北路原行通暢入海之道亦

恐漸形淤淺或生他變相應請

旨敕下山東撫臣丁寶楨於秋汛後悉心勘估酌籌
款項將侯家林上下民捻做照官隄辦法一律
加高培厚若能接築至曹郡西南責成地方印
委設法守護更為久遠之計沿河各州縣民人
田地淪入正河身十餘年情殊可憫應查明分
別蠲緩錢糧海口鹽場商運各事並隨時酌量
變通妥辦又銅瓦鑲決口現已衝寬十里水勢
猶日向東坍刷若不設法約攔久必泛濫南趨
至於決口以下蘭儀東明境內地勢平行現雖

刷有溝槽而中洪不深大汛漫灘仍東西坍塌
不定亦不可無遙隄以杜竄越擬請

勅下河東督臣喬松年就近察看形勢應如何量築
隄埝與東省曹州之隄相接俾資周防而期順
軌綜計自安山上至銅瓦鑲決口接築南隄距
北金隄約六七十里作遙為遮攔之勢去水較
遠取土較易工費較省此六七十里中大水所
常漫者不過二三十里所急流者不過三五里
任其游波蕩漾寬緩水勢以漸趨下游寬半里
深數丈之大清河緩急得以節宣不至逼激沖

突別尋去路斯為穩著其隄內河內民田仍可
隨時視溜勢之遠近地勢之高低搶種麥禾不
至全無收穫似於民生亦無大礙至淮徐故道
涸出舊河身千數百里水不復行居民佔種年
年豐收並請

勅下江蘇河南山東各督撫分委妥員會同地方官
查明酌議升科以免私墾爭奪之患所有遵
旨籌議黃運兩河情形謹具管見詳細據實覆陳是
否有當伏乞

皇上聖鑒訓示謹

奏

奏

奏

請行海運片

再目今黃河北徙河運一廢不可再復凡識時務者皆知之任事諸臣或謂應復淮徐故道或謂宜就東境東水濟運皆於無可如何之中作萬有一然之想寔與神禹治水行所無事之大旨相悖既不免於鑿必為之無成臣正摺內已言之詳矣部臣奏令江北漕糧每年由運河試解赴通亦欲羈縻運道使不遽廢起見無如年復一年自安山至張秋臨清三百里間情形日變險阻迭出近歲黃漲入運可資浮送為時極

暫同治九年十一年黃汎始終並未灌運遂改用陸運與搶蓄雨水二策艱難危險之狀概可想見即能運通亦僅十萬石內外究於倉儲漕政何裨久之試辦者必至不能辦而止 臣於覆疏內請仍推廣海運蓋就其易且大者言之而議者又不免驚詫其實自道光六年創辦海運以濟河運之窮咸豐以後無年不由海運無年不兼采辦京倉命脈賴以維繫顧習焉不察耳今南北宦商往來率以海舶為通衢捷徑獨至運糧則有戒心將謂夷情叵測豈肯舍各口通

商而無端開衅將謂沙船短缺何難借官商輪船而自顧本根就中國洋面運中國官糧外人斷不敢欺侮即有他變我停運而彼亦須停貿易洋人不若是愚也若慮緩急之間京儲匱乏似應於無事時多籌起運多方采買使數年中得有一年之蓄內顧可以無虞查嘉慶年間大學士劉權之奏言南漕運抵京倉綜計公私費用每石需銀十八兩積弊相沿實為秕政今人皆欲復河運殊不思河運之病

國病民至此海運費大減而運極速固倍省於河

運矣至江浙采買成案每石連水腳剝價銀不
過二兩七八錢視海運正漕尤省昨與輪船招
商局紳董籌議除每年搭運蘇浙正漕外若遵
照采買定價領銀赴南省產米地方購運若干
石於正供完後逕解赴通交收不至貽誤如奉
允行再飭議章程咨部覈辦

國家但移河費運費為之節省其餘以併力於海
防斯本末並治富強可馴致矣合再附片具陳
伏乞

聖鑒訓示謹

奏閏六月初三日

臣等

謹

酌定各省協賑摺 八月初三日

奏為遵

旨酌定東南各省協撥直屬賑款並陳災歉籌辦大概情形恭摺仰祈

聖鑒事竊臣接准部咨同治十二年七月二十日奉
上諭本年夏間雨水過多永定河南岸決口被水地方田廬多被沖沒小民蕩析離居殊深憫惻前據
順天府奏請截留漕糧八萬石備賑當經降旨允
准因思畿輔被災甚廣亟應妥籌撫恤著加恩於
東南各省釐金關稅鹽課項下合撥銀三四十萬

兩以資賑濟由李鴻章酌定各省應解數目一面
於直隸藩庫運關各庫內無論何款先行動支俟
各省解到時歸款其順天所屬應需賑濟銀兩若
干即於此款內撥給並著李鴻章會商萬青藜彭
祖賢奏明辦理該總督府尹務當督飭地方官查
明被災戶口核實散放妥為賑恤總期寔惠及民
毋令一夫失所用副朕軫念災黎至意該部知道
欽此仰見

聖主體念時艱亟籌拯救

天恩高厚宸宇同欽伏查直隸地方本年秋季收中稔

大田均已播種六月間得雨深透乃竟連旬不止各處隄河廢弛已久近歲僅能量籌補苴尋常雨水尚可容納今則彌月大雨西北口外及直晉豫諸山之水奔騰匯注各河同時異漲處處出槽漫溢平地閏六月十五日永定河南四工九號漫口水由固安霸州一帶東下當經奏報參辦即委員馳往會同該河道勘籌搶堵而潮白溫榆蘄運拒馬等河亦多沖決順屬近山沿河州縣皆受水害大清褚龍濬沱漳衛等河經過新城雄縣安州蠡縣高陽安平饒陽河間

獻縣任邱保定霸州元城大名吳橋交河青縣
靜海衝蕩頗甚文安大城勢更窪下引河因積
滂甚深工未及半水至復遭淹沒然瀦龍河有
新修南隄濬水不能橫灌西淀有新挑趙王河
盛潦稍資減洩大清河半以盧僧中亭兩河為
出路中亭洩水頗利惜盧僧工尚未竣又被沖
淤天津各河雖甚涌溢幸先加築隄工略資塘
護無如萬派之水總匯一隅僅賴海河一道迤
運出口勢難暢達夏初由陳家溝疏濬淮魚淀
引河冀由北塘口分洩歸海因費絀未能深挑

自七月初上游諸河滔滔下注津郡周圍百數
十里一片汪洋海潮正盛朝夕頂托不得歸墟
三壑河上下及南北運河隄段極形危險臣督
飭文武暨練軍防營分投竭力搶護加高子壘
至三四尺而水與壘平七月十九日西北風狂
暴鼓浪掀騰漫過隄頂數尺人力難施竟將運
隄東岸沖刷數口水注南窪村莊禾稼多被淹
浸約計天河保定三府屬天津靜海安州雄縣
受災為重河間獻縣任邱蠡縣高陽新城青縣
滄州交河東光吳橋等處災數不等餘則情形

尚輕西南各府州及永遵所屬間有被水較重
現尚未據報齊地方連遭災侵總由臣等奉職
無狀未能先事補救撫躬循省悚懼莫名惟成
灾稍遲江浙漕米已全數抵通未便再截本省
向係缺額無從羅掘上屆南省捐項又早用罄
賑需無措正擬籲懇

鴻施仰蒙

恩命特頒於東南各省釐金關稅鹽課項下合撥銀
三四十萬兩令臣酌定各省應解數目先行籌
款墊辦凡有血氣之倫孰不聞

詔書而感泣因思東南各省本係財賦之區祇以兵燹之後元氣未蘇京協各餉籌解已形竭蹶惟畿疆重災疊困情形萬窘除此協撥之外寔亦無可設措臣曾任兩江湖廣即閩浙廣東等省盈絀亦略知梗概謹遵

旨察度各該省財力酌定應解數目請撥江蘇江海關洋稅銀五萬兩甯蘇滬三局釐金各銀一萬兩江安糧道庫節存漕項銀二萬兩共十萬兩江西釐金銀五萬兩九江關常洋稅銀三萬兩共八萬兩湖北江漢關洋稅銀三萬兩釐金銀

三萬兩共六萬兩浙江釐金銀三萬兩浙海關
洋稅銀二萬兩共五萬兩福建稅釐銀五萬兩
廣東鹽課銀五萬兩安徽釐金銀一萬兩統共
東南七省合撥銀四十萬兩各省但勉為其難
臣處即有所指望諒各督撫臣公忠體

國深知

畿輔救荒出自

特恩非尋常協款可比必能並濟兼籌共維大局臣
已諄飭司道無論何款設法籌墊先應急需惟
錢糧鹽課尚未啟徵即徵起亦應就款解支關

2
稅短收又另有抵用斷難虛懸久待應請

勅下各該督撫臣飭屬迅速照數通融籌撥務於冬
初解到以資接濟而歸墊款臣現派員分赴奉
天牛庄河南道口等處采買襍糧為直屬賑撫
之需仍照上屆奏案免徵釐稅並迭飭司道府
分督印委親履查勘實在災歉村莊核定分數
據實稟辦其災重處已先籌款派員酌量撫卹
永定河漫口亦經撥款開工搶堵可期早日合
龍津河各隄並飭趕緊築堵上游各處隄河又
經此次大水沖缺淤墊甚多若任其廢弛嗣後

即水小之年難免漫溢必須擇要修治天津附近仍擬添開引河冀其暢洩歸海庶下不壅則上不潰統計工費繁鉅臣力雖不足以兼營而既顧目前尤防後患惟有工賑並舉俾灾黎藉資傭趁要工亦不至誤時統俟查明灾分併核奏辦現在節逾秋分海已收水上游河流逐漸消減仍飭各地方官寔力疏導積水以期無誤種麥其順屬賑銀昨准府尹臣函商計需八萬兩應於協款內分批墊撥凡賑撫事宜當與府尹臣謹遵續奉

諭旨嚴督官紳認真稽查核實經理務使實惠均霑
倘官紳稍有侵冒即行從嚴叅辦除分別咨行
外所有遵

旨酌定東南各省協撥直屬賑需並災歉籌辦大概
情形理合會同兼管順天府府尹臣萬青藜順
天府府尹臣彭祗賢恭摺具陳伏乞

皇上聖鑒訓示謹

奏

統籌工賑事宜摺十月二十八日

奏為遵

旨統籌直隸應辦河工費款過鉅東南各省甫撥賑
需擬緩俟來年再行酌請添撥現湊提藩庫銀
兩先辦尾閘各工恭摺仰祈

聖鑒事竊臣前奉八月二十二日

寄諭內閣學士宋晉奏近畿連年被水請飭以工代
賑一摺據稱直隸河道漫溢連歲水災與其併力
籌賑不如擇要修工請飭該督以現撥帑金酌提
一半拯恤災區以一半趕擇河道緊要者速為修

治工賑兼施兩收其效至現撥帑金尚不敷用並
飭續撥款項以成鉅工等語近年來直省河患頻
仍亟宜設法疏治期於一勞永逸至宋晉所陳辦
法是否可行著李鴻章統籌全局悉心酌核迅速
具奏原摺鈔給閱看等因欽此 臣維直隸七十餘
河而大者有五曰永定河濤沱河大清河北運
河南運河皆各容納衆流勢兼力猛或地處狹
窄或挾沙壅泥既易墊淤復多泛濫雍正乾隆
年間節次大加修治皆費數百萬之帑歷十餘
年之功始有成效嘉道以後經費不支未能大

修治咸豐以後軍需繁鉅南北運河歲費層遞
減撥永定河歲修要款亦減而又減於是河務
廢弛日甚閘壩隄埝無一不壞減河引河無一
不塞此五大河者受病同深每遇積雨盛漲橫
衝四溢併歸窪區連成一片正不獨永定一河
之為害而天津係各河下游總匯僅有海河一
道迤邐出口不能暢達尤為全局之病無論近
數年雨水過大成災較廣即水小之年亦必難
免漫淹是各河之皆應及時修治無待再計矣
臣抵直以來幾經籌畫竊念本省向係缺額無

可經營部庫尚屬空虛外省僅能自顧勢難籲
請惟於上兩年災案内勻撥賑款量為補苴節
經奏報有案今年水災蒙

敕撥東南各省協款臣於八月初酌定銀數請撥摺
內亦經陳明工賑並舉擬添開天津歸海引河
並擇辦上游隄河各工在案直省河道一日不
治水患一日不息民困一日不蘇臣忝任畿疆
時深疚悚明知頻年賑卹蠲豁所費實多斷非
長策而各河淤廢太久工程太鉅較雍正乾隆
年間尤甚若設法疏治期於一勞永逸亦非數

十萬金所能濟事宋晉以撥款不敷請再續撥以成鉅工洵屬切要之論惟東南各省兵燹後民力已窮元氣未復京餉既闕緊要西路軍需各處防餉皆不能減省

萬年吉地甫經興工又須分批勻撥各該省兼籌並顧竭蹶未遑前撥直省賑款臣迭經咨函商懇因奉

特恩為畿輔救荒要需勉力措解然拮据之狀往往形於來牘目下若再添撥誠恐周轉不開或致顧此失彼似只可斟酌緩急逐漸舉辦俟來年

察度情形如必不可已之工再行酌量奏撥庶
各省財力稍得展舒而直省河務亦不任偏廢
至天津引河應自三岔河口陳家溝開挖起至
北塘歸海使通省尾閘多一分洩之路工段過
長約估需銀十五萬兩其大清河上下游緊要
隄河及文安大窪引河河間獻縣滹沱引河或
工已及半或情形太重皆應先辦計尚需銀十
四萬兩均擬明春興作以工代賑俾災黎藉資
傭趁查今年各省協款銀四十萬兩除去順屬
賑銀八萬兩府尹與倉場侍郎商撥潮白河工

程銀二萬兩永定河漫口工費銀八千兩直屬
採買賑糧銀七萬兩分撥各州縣賑撫銀六萬
五千兩僅贖銀十五萬七千兩以之撥作前項
工需尚短銀十三萬餘兩臣不得已商飭藩司
移緩就急擬於司庫地丁項下湊撥銀十萬兩
以助工賑要需仰懇

天恩俯准提用其不敷之數即由南省賑捐尾款及
練錢生息海關新增洋藥釐各項儘力湊濟仍
俟事竣照案彙開清單奏報所有統籌工賑事
宜理合恭摺覆陳伏乞

皇上聖鑒訓示謹

奏

派隊航海防臺摺 同治十三年六月十八日

奏為遵

旨籌派洋鎗隊航海馳赴臺防並請調駐陝銘軍東
來以備南北海口策應恭摺密陳仰祈

聖鑒事竊臣欽奉同治十三年六月初八日

寄諭著由北洋大臣調撥洋鎗隊三千人南洋大臣
調撥二千人均乘坐輪船赴台該郡現有兵勇不
甚得力李鴻章李宗羲務當迅速調派令其剋日
起程前往等因欽此仰見

皇上慎固海疆整軍馭遠

聖謨廣運欽佩莫名伏查此次日本構兵生番焚掠
牡丹等社實屬顯違和約妄啟釁端經沈葆楨
派令藩司潘蔚等親赴琅瑯與該中將西鄉從
道據理駁詰該酋猶復藉詞狡展未肯遵照撤
兵居心殊為叵測台灣水陸兵備自不可不厚
集其勢預伐詭謀惟沈葆楨原奏請由北洋借
撥久練洋鎗隊三千南洋二千查直隸大枝防
軍現只廣西右江鎮總兵周盛傳所統盛仁等
營正在大沽海口以內修造新城添築礮台工
尚未竣

畿輔重地必須留備緩急礙難分調南洋鎗隊無
多分駐金陵蘇揚上海等處防務緊要亦難酌
撥且兵勢聚則氣盛散則力弱若於兩處零星
抽撥兵將素不相習轉恐臨敵貽誤臣處迭准
沈葆楨函咨台灣現辦情形先經與兩江督臣
李宗義江蘇撫臣張樹聲往返緘商查有記名
提督唐定奎所統現駐徐州之武毅銘字一軍
向隸提督劉銘傳部下隨臣劉辦髮捻轉戰數
省極為得力唐定奎樸誠明幹素為將士所服
臣於同治十年九月內奏報曹克忠赴陝接統

銘軍摺內聲明撥交若干營外餘仍撤回徐州屯駐以備南北援應曾將此軍可備征調情形函覆沈葆楨暨總理衙門查照該大臣此次陳奏自係尚未接准前函現在臺灣需兵設防應仍移緩就急力顧大局擬即飛飭唐定奎統帶所部步隊十三營合計六千五百人由徐拔赴瓜州口分批航海赴臺聽候沈葆楨調遣該軍向習西洋鎗砲訓練有年步伐整齊技藝嫻熟將士一心尚可資指臂之助其提督陳鳳樓所帶該軍馬隊三營一哨仍暫留徐州宿遷巡緝

地方臣一面商請李宗義等飭調滬局輪船暨
僱用招商局輪船駛赴瓜洲分赴襄載東渡委
令道員盛宣懷往來照料並緘請沈葆楨酌派
閩廠兵船入江接餞俾期迅速該軍所需月餉
軍襖子藥等項督飭後路台局源源籌濟不令
稍有缺乏至彭楚漢前奉

諭旨飭赴本任籌辦福州等處海防月內交卸來京
即令遵

旨剋日赴任唐定奎一軍自可無庸再令彭楚漢統
帶以免紛歧再欽奉五月三十日

密諭各省沿海口岸甚多亟應一體設防聯絡聲勢
以期有備無患著 臣等統籌全局悉心會商布置
等因竊念日本藉番拓地悍不旋師恐是中外
構亂之始無論蘇浙江海各口防兵單薄即北
洋二千餘里口岸林立亦多空虛若令募新軍
實在無此餉力惟有添調久練勁旅屯紮後路
適中之地以壯聲援查甘省現早肅清陝境防
務已鬆擬請

旨勅下陝西撫 臣 連飭記名臬司劉盛藻統率陝防
武毅銘軍馬步二十二營星夜兼程拔赴山東

濟甯及江南徐州一帶擇要駐扼以備南北海口策應由臣會商李宗羲相機調派除直隸應辦海防隨時妥籌具奏外所有籌派洋鎗隊航海馳赴臺防並請調駐陝銘軍緣由理合恭摺由驛六百里密陳伏乞

皇上聖鑒訓示謹

奏

--	--	--	--	--	--	--	--	--	--	--

111

111

籌議海防摺十一月十二日

奏為欽奉

諭旨詳細籌議海防緊要應辦事宜恭摺密陳仰祈
聖鑒事同治十三年九月二十九日承准軍機大臣
密寄奉

上諭總理各國事務衙門奏海防亟宜切籌將緊要
應辦事宜撮敘數條請飭詳議一摺沿江沿海防
務經總理各國事務王大臣並各該將軍督撫等
隨時籌畫而備禦究未可恃亟應實力講求同心
籌辦堅苦貞定歷久不懈以紓目前當務之急以

裕國家久遠之圖該王大臣所陳練兵簡器造船
籌餉用人持久各條均係緊要機宜著李鴻章等
詳細籌議將逐條切實辦法限於一月內覆奏此
外別有要計亦即一併奏陳不得以空言塞責等
因欽此旋又准總理衙門抄奏知照以丁日昌
續擬海洋水師章程六條請飭彙入該衙門前
奏一併妥籌覆奏奉

硃批依議欽此仰見

朝廷思患預防力圖自強之至意欽服莫名臣查各
國條約已定斷難更改江海各口門戶洞開已

為我與敵人公共之地無事則同居異心猜嫌
既屬難免有警則我虞爾詐措置更不易周值
此時局似覺防無可防矣惟交涉之事日繁彼
族恃強要挾在在皆可生釁自有洋務以來迭
次辯結之案無非委曲將就至本年日本興兵
台灣一事經總理衙門王大臣與該使多方開
諭幾於管禿脣焦猶賴

聖明主持於上屢

飭各疆臣嚴密籌防調兵集船購利器築礮台一時
並舉雖未即有把握而虛聲究已稍壯該酋外

一
二
三
四
五
六
七
八
九
十
十一
十二
十三
十四
十五
十六
十七
十八
十九
二十
二十一
二十二
二十三
二十四
二十五
二十六
二十七
二十八
二十九
三十
三十一
三十二
三十三
三十四
三十五
三十六
三十七
三十八
三十九
四十
四十一
四十二
四十三
四十四
四十五
四十六
四十七
四十八
四十九
五十
五十一
五十二
五十三
五十四
五十五
五十六
五十七
五十八
五十九
六十
六十一
六十二
六十三
六十四
六十五
六十六
六十七
六十八
六十九
七十
七十一
七十二
七十三
七十四
七十五
七十六
七十七
七十八
七十九
八十
八十一
八十二
八十三
八十四
八十五
八十六
八十七
八十八
八十九
九十
九十一
九十二
九十三
九十四
九十五
九十六
九十七
九十八
九十九
一百

怵公論內懾兵威乃漸帖耳就款於

國體民情尚無窒礙未必非在事諸臣挽救之力
臣於台事初起時即緘商總理衙門謂明是和
局而必陰為戰備庶和可速成而經久洋人論
勢不論理彼以兵勢相壓我第思以筆舌勝之
此必不得之數也夫臨事籌防措手已多不及
若先時備豫倭兵亦不敢來烏得謂防務可一
日緩哉茲總理衙門陳請六條目前當務之急
與日後久遠之圖業經綜括無遺洵為救時要
策所未易猝辦者人才之難得經費之難籌時

域之難化故習之難除循是不改雖日事設防猶畫餅也然則今日所急惟在力破成見以求實際而已何以言之歷代備邊多在西北其強弱之勢主客之形皆適相埒且猶有中外界限今則東南海疆萬餘里各國通商傳教來往自如麇集京師及各省腹地陽託和好之名陰懷吞噬之計一國生事諸國構煽實為數千年來未有之變局輪船電報之速瞬息千里軍器機事之精工力百倍砲彈所到無堅不摧水陸關隘不足限制又為數千年來未有之強敵外患

之乘變幻如此而我猶欲以成法制之譬如醫
者療疾不問何症概投之以古方誠未見其效
也庚申以後夷勢駸駸內向薄海冠帶之倫莫
不發憤慷慨爭言驅逐局外之訾議既不悉局
中之艱難及詢以自強何術禦侮何能則茫然
靡所依據自古用兵未有不知己知彼而能決
勝者若彼之所長己之所短尚未探討明白但
欲逞意氣於孤注之擲豈非視

國事如兒戲耶臣雖愚闇從事軍中十餘年向不
敢畏縮自甘貽憂

君父惟洋務涉歷頗久聞見稍廣於彼己長短相形之處知之較深而環顧當世餉力人才實有未逮又多拘於成法牽於衆議雖欲振奮而未由易曰窮則變變則通蓋不變通則戰守皆不足恃而和亦不可久也謹就總理衙門原議逐條詳細籌擬切實辦法附以管見略為引伸丁日昌所陳間有可採一併彙入核擬以備芻蕘之獻仍請

勅下在廷王大臣詳晰謀議請

旨定奪總之居今日而欲整頓海防舍變法與用人

別無下手之方伏願我

皇上顧念社稷生民之重時勢艱危之極常存欲然
不自足之懷節省冗費講求軍實造就人才皆
不必拘執常例而尤以人才為亟要使天下有
志之士無不明於洋務庶練兵製器造船各事
可期逐漸精強積誠致行尤需歲月遲久乃能
有濟目前固須力保和局即將來器精防固亦
不宜自我開釁彼族或以萬分無禮相加不得
已而一應之耳所有遵

旨詳議緣由謹繕摺密陳並將議覆各條繕具清單

恭呈

御覽伏乞

皇上聖鑒訓示謹

奏

籌辦鐵甲兼請遣使片

再正在繕摺間承准軍機大臣密寄十月二十

八日奉

上諭文祥奏敬陳管見一摺台灣之事雖權宜辦結
後患在在堪虞日本與閩浙一葦可抗倭人習慣
食言難保不再生枝節前因議買鐵甲船及水礮
台各節倉猝莫辦刻下事機已緩亟宜趕緊籌畫
以期未雨綢繆著沈葆楨等悉心籌商並著李鴻
章李宗羲將前議購買未成之鐵甲船水礮台及
應用軍械等件迅速籌款購辦庶幾兵械精良有

備無患等因欽此並抄錄文祥原摺到臣查沈葆楨十月十四日來函倭使大久保已抵琅瑯業經約期撤兵自不致再有變局惟文祥慮及日本距閩浙太近難保必無後患目前惟防日本為尤急洵屬老成遠見該國近年改變舊制藩民不服訪聞初頗小關久亦相安其變衣冠易正朔每為識者所譏然如改習西洋兵法仿造鐵路火車添置電報煤鐵礦自鑄洋錢於國計民生不無利益並多派學生赴西國學習器藝多借洋債與英人暗結黨援其勢日張其志不

小故敢稱雄東土藐視中國有窺犯台灣之舉
泰西雖強尚在七萬里以外日本則近在戶閩
伺我虛實誠為中國永遠大患今雖勉強就範
而其深心積慮覬覦我物產人民之豐盛冀俾
我兵船利器之未齊將來稍予間隙恐仍狡焉
思逞是鑊甲船水礮台等項誠不可不趕緊籌
備惟巨款既無可指定造亦尚需時臣已於覆
議總理衙門造船一條內詳切言之至前曾議
買鑊甲船一為沈葆楨飭日意格議購之丹國
鑊船因事中罷昨丹國使臣拉斯勒福過津面

詢據稱此船約值銀六十萬兩與日意格報價不符臣屬該使來春由京回津再議一為出洋委員容閱在美國查報有新造未成鍍甲船一號需洋銀一百七十萬元臣詢駐津美領事據稱此船未必合用總稅司赫德亦向總理衙門言及恐其不甚可靠臣批飭上海道信致容閱切實考較再行稟核以上二船雖議購而未成此外洋商獻圖者甚多因相隔過遠需費過巨誠恐誤買舊船未敢遽訂似須委員前往該國議購為妥其水礮台船一項總理衙門現飭赫

德向英國詢問價值上海洋行亦有承攬訂購者據滬局委員馮焌光等稟稱該局仿造一隻明春可成似尚不難陸續添置惟是有備而無患者立國之根基不戰而詘人者攻心之上計自來備邊馭夷將才使才二者不可偏廢各國互市遣使所以聯外交亦可以窺敵情而中國並其近者而置之殊非長駕遠馭之道同治十年日本初議條約臣與曾國藩均奏請該國立約後中國應派員駐劄日本管束我國商民藉探彼族動靜冀可聯絡牽制消弭後患上年甫

經換約未及籌辦而該國遂於今春興兵來台
若先有使臣駐彼當能預為辨阻密速商辦否
則亦可於發兵之後與該國君臣面折廷爭較
在京議辦更為得勁今台事粗定此舉未可再
緩擬請

勅下總理衙門王大臣遴選熟悉洋情明練邊事之
三四品京堂大員請

旨賞給崇銜派往駐劄日本公使外託鄰邦報聘之
禮內答華民望澤之誠倘彼別有詭謀無難偵
得其情相機控制聞該國橫濱長崎箱館各處

中國商民約近萬人既經立約本不可置之度外俟公使到彼應再酌設總理事官分駐口岸自理訟賦以維

國體不特此也即泰西諸大邦亦當

特簡大臣輪往兼駐重其祿賞而定以年限以宣威信通情款其在中國交涉事件有不能議結或所立條約有大不便者逕於該國總理衙門往復辨證隨時設法商議可漸杜該使蒙蔽要挾之弊似於通商大局有裨是否有當理合附片覆陳伏乞

聖鑒訓示謹

奏

才口

謹將總理衙門原奏緊要應辦事宜逐條切實
辦法並將丁日昌續奏各條併入詳細擬議恭
呈

御覽

一原奏練兵一條內稱若求實在可禦外患事
較辦髮捻諸賊為更難兵亦較辦髮捻諸賊宜
更精洵是不刊之論蓋髮捻苗回諸賊皆內地
百姓雖有勇銳堅忍之氣而器械不及官軍之
精備可以勦撫兼施若外洋本為敵國專以兵
力強弱角勝彼之軍械強於我技藝精於我即

暫勝必終敗敵從海道內犯自須亟練水師惟
各國皆係島夷以水為家船礮精練已久非中
國水師所能驟及中土陸多於水仍以陸軍為
立國根基若陸軍訓練得力敵兵登岸後尚可
鏖戰礮台布置得法敵船進口時尚可拒守但
用旗綠營弓箭刀矛抬鳥鎗舊法斷不足以制
洋人並不足以滅土寇即如直隸練軍屢經挑
選整頓近始兼習洋鎗小炸砲以勦內寇尚屬
可用以禦外患實未敢信各省抽練之兵大率
類此用洋鎗者已少用後門鎗及炸砲者更少

其勢只可加練而不可減練只可添練洋鎗以求制勝而不可拘執舊制以圖省費前督臣曾國藩於同治十年正月覆奏籌備海防摺內謂沿海之直隸奉天山東三省江蘇浙江兩省廣東福建兩省沿江之安徽江西湖北三省各應歸併設防沿海七省共練陸兵九萬沿江三省共練陸兵三萬統計每年需餉八百萬兩因無款可籌議遂中止茲總理衙門擬以曾經制勝之洋鎗隊練習水戰丁日昌擬選練陸軍合天下得精兵十萬人與曾國藩前奏用意略同惟

陸軍與水師用法各殊練法亦異水師猶可上
岸擊賊陸軍未可強令操舟似不宜兩用以致
兩誤 臣愚以謂沿海沿江各省現有練兵鎗隊
雖不及曾國藩丁日昌所擬十餘萬之多然與
其多而無用不若少而求精但就現有陸軍認
真選汰一律改為洋鎗砲隊凡綠營額兵疲弱
勇營酌加裁減其餉即加給新練之隊沿海防
營並換用後門進子鎗於緊要口岸附近之處
屯紮大枝勁旅無事時專講操練兼築堡壘有
事時專備游擊不准分調各海口防仿照洋式

修築沙土砲台以地步寬展橢圓堅厚為要砲位宜間用口徑八寸至十餘寸者擇將擇兵演習之務在及遠愈遠愈妙務在能中不中不發即所謂藥能對症有備無虞者矣

一原奏簡器一條西國水陸戰守利器以鎗砲水雷為大宗砲有前後門生熟鐵純鋼之分鎗有前後門滑膛來福之異水雷有用觸物磨物電氣發火之別竊嘗考究其圖與器而得其大略洋鎗一項各國改用後門以其手法靈捷放速而及遠其舊製前門鎗賤價售於中國每為

外人所輕英俄德法美泰西五大強國也其後
門鎗名目英之至精者曰亨利馬梯呢其次曰
士乃得俄曰俾爾打叻德曰呢而根法曰沙士
鉢美曰林明登以利鈍遲速較之則英之亨利
馬梯呢精於俄俄之俾爾打叻精於美美之林
明登又精於英之士乃得及德法諸鎗也林明
登士乃得二種近年已運入中國臣處及沈葆
楨均購存林明登數千枝上海機器局亦能仿
造惟兵勇粗疏者多士乃得機簧較簡購價較
省修造較便現擬令各營酌換士乃得鎗而間

以林明登認真操習由漸而精並令津滬各局先購林明登造子機器仿製子藥銅捲以便接濟仍與總理衙門商購英國亨利馬梯呢鎗若干枝又與俄領事訂購俾爾打叻鎗千枝以備將士選鋒者操用至礮位一項英德兩國新式最精德國克鹿卜後門鋼礮擊敗法兵尤為馳名臣逐年購到克鹿卜大小礮五十餘尊分置大沽礮台天津防營其最大者兩尊口徑八寸足抵前門砲口徑十一二寸之子力然每尊價約二萬元苦於無力多購或謂鋼砲過大藥力

過猛用久或至損裂故英國多用前門熟鐵來
福長彈大砲曰烏理治曰阿墨斯得郎曰回德
活特三家尤著大者口徑十一寸至十五寸身
重至八萬觔以上子彈重至六百磅能打穿二
十餘寸厚之鐵甲惟起運維艱價值尤貴中國
尚無購用者陸路行仗小砲則以德國克鹿卜
四磅彈後門鋼砲美國格林連珠砲為精捷臣
又各定購數十尊以備游擊要需目下滬甯各
局只能仿造十二磅至六十八磅之圓彈銅鐵
炸砲淮軍習用已久遠勝中國舊製而不及西

洋新式之精仍擬仿照烏理治阿墨斯得郎之式箱以熟鐵而機器未備外國每造鎗砲機器全副購價須數十萬金再由洋購運鋼鐵等料殊太昂貴須俟中土能用洋法自開煤鐵再添購大爐氣錘壓水櫃等機器仿造可期有成若克鹿卜之鋼砲曰德活特之熟鐵砲係用生鋼生鐵鑄成該廠自有秘法更未易學步矣至水雷一項轟船破敵最猛從前南北花旗之戰南兵獲雷力居多德法之戰法國兵艘十倍於德而波羅的海法艘未敢深入全仗水雷之功其

法分為兩類一為定而不動之水雷或連於木
椿木排之間或用錨定其方位使沉水中或陸
地城堡被攻時於缺口要路安置此專為自守
而設一為能行動之水雷或浮水面順風力飄
動或用機器自行或於鐵船首伸出長竿置之
或專作拖帶水雷之船此可為攻敵之用近來
格致之學日精水雷之法亦日精多以強水觸
物磨物及電線發火其觸而發火磨而發火比
用法點放者尤佳用藥僅五六十磅無論何種
兵船皆可轟破其底聞各國皆講究此物製存

極多其用時必於水中排列數行每口安放數十具使敵船疑畏不敢進滬津各局現只能仿造其粗者而電機銅絲鐵繩漿皮等件仍購自外洋須訪募各國造用水雷精藝之人來華教演庶易精進至火器盡用洋式砲子火藥兩項亦係要需津局有造藥機器一副日出二千餘磅已可敷用惟鎗砲多而子彈尚少滬局僅造藥機器一副日出無幾宜添購機器在蘇甯推廣製造各省防江防海需用洋鎗砲之子藥均宜設局在內地仿造否則事事購自洋商殊無

以備緩急且閩滬津各機器局逼近海口原因取材外洋就便起見設有警變先須重兵守護實非穩著嗣後各省籌添製造機器必須設局於腹地通水之處海口若有戰事後路自製儲備可源源運濟也

一原奏造船一條查布國防海新論有云凡與濱海各國戰爭者若將本國所有兵船逕往守住敵國各海口不容其船出入則為防守本國海岸之上策其次莫如自守如沿海數千里敵船處處可到若處處設防以全力散布於甚大

之地面兵分力單一處受創全局失勢故必聚
積精銳只保護緊要數處即可固守等語所論
極為精切中國兵船甚少豈能往堵敵國海口
上策固辦不到欲求自守亦非易言自奉天至
廣東沿海袤延萬里口岸林立若必處處宿以
重兵所費浩繁力既不給勢必大潰惟有分別
緩急擇尤為緊要之處如直隸之大沽北塘山
海關一帶係京畿門戶是為最要江蘇吳淞至
江陰一帶係長江門戶是為次要蓋京畿為天
下根本長江為財賦輿區但能守此最要次要

地方其餘各省海口邊境略為布置即有挫失
於大局尚無甚碍惟既欲固守必須將所有兵
馬砲位軍械輜重並工局物力儲備堅厚雖軍
情百變而不離其宗

廟謀閫算平昔之經營臨事之調度皆不可一毫錯
亂道光二十一年夷船入長江而全局始震
咸豐十年夷兵犯津通而根本遂危彼族實能
規我要監制我命脈而我所以失事者由於散
漫設防東援西調未將全力聚於緊要數處今
議防海則必鑒前轍揣敵情其防之之法大要

分為兩端一為守定不動之法如口內砲台壁壘格外堅固須能抵禦敵船大砲之彈而砲台所用礮位須能擊破鐵甲船又必有守口巨砲鐵船設法阻擋水路並藏伏水雷等器一為挪移泛應之法在兵船與陸軍多而且精隨時游擊可以防敵兵沿海登岸是外海水師鐵甲船與守口大砲鐵船皆斷不可少之物矣現計閩廠造成輪船十五號內有二號已在台灣遭風損壞滬廠造成輪船六號內有二號馬力五百匹配砲二十六尊與外國大兵船相等其餘各

船皆僅與外國小兵船根鉢相等然已費銀數百萬有奇物料匠工多自外洋購致是以中國造船之銀倍於外洋購船之價今急欲成軍須在外國定造為省便但不可轉託洋商誤買舊船徒糜巨款訪聞兵船及鐵甲船以英國為最精英之官廠公司廠均以造鐵甲之優劣相與爭衡日新月異應揀派明於製造略知兵事之員選帶學生工匠前往由總理衙門會商駐京使臣移知該國兵部俾得親赴各廠考究何等船制最為堅緻靈捷並宜於中國水道者與其

議價定造即將帶去華匠兵士附入該廠及武備院學習造工並講求駕駛操練之法俟成船後配齊礮位隨船回華庶有實濟而中國船廠仍量加開拓以備修船地步至擬設兵船數目如丁日昌所稱北東南三洋各設大兵輪船六號根鉢輪船十號合共四十八號自屬不可再少除將中國已造成二十號抵用外尚短二十八號竊謂北東南三洋須各有鐵甲大船二號北洋宜分駐煙台旅順口一帶東洋宜分駐長江外口南洋宜分駐廈門虎門皆水深數丈可

以停泊一處有事六船聯絡專為洋面游擊之師而以餘船附麗之聲勢較壯約計定造鐵甲船每隻需銀百萬兩內外費已不貲只有先購此項分年籌辦其有餘力再置他船或由閩滬各廠陸續仿造兵船總以足成四十八號為度惟守口大礮鐵船即所謂水礮台船亦係西洋新製利器以小船配極重之礮輔助岸上礮台四面伏擊阻遏中流能自行動最為制勝凡要口須添設一二艘聞在外國定購每船連礮約價銀十餘萬兩但笨滯不能涉海須將礮位鐵

甲分拆運載來華裝配應俟委員到彼一併察
辦如價省運便陸續購造二十號分佈南北各
口抑或由外洋購大礮由華廠照式仿造鐵船
更可次第添置至丁日昌奏稱裁併五十號艇
船可養給一號大兵輪船裁併十號濶頭舢板
可養給一號根鉢輪船計省沿海水師舊制各
船糜費以之供給大小四十八號輪船尚覺有
盈無絀等語查同治十一年五月臣於覆奏船
政事宜摺內擬請裁撤各省艇船即以各船修
造養兵之費抵給輪船月費經總理衙門議令

各該督撫奏辦迄今並未議覆今添購鐵甲等
船巨款必須另行籌集俟購回時養船練兵一
切費用應如丁日昌所議請

旨勅下江蘇山東浙江福建廣東沿海各省將舊置
及新添紅單拖罟艇船舢板等項分別裁併專
養輪船以免虛糜而資實用

一原奏籌餉一條近日財用極絀人所共知欲
圖振作必統天下全局通盤合籌而後定計新
疆各城自乾隆年間始歸版圖無論開闢之難
即無事時歲需兵費尚三百餘萬徒收數千里

之曠地而增千百年之漏卮已為不值且其地
北鄰俄羅斯西界土耳其天方波斯各回國南
近英屬之印度外日強大內日侵削今昔異勢
即勉圖恢復將來必不能久守屢閱外國新聞
紙及西路探報喀什噶爾回首新受土耳其回
部之封並與俄英兩國立約通商是已與各大
邦勾結一氣不獨伊犁久踞已也揆度情形俄
先蠶食英必分其利皆不願中國得志於西方
而論中國目前力量實不及專顧西域師老財
痛尤慮別生他變曾國藩前有暫棄關外專清

關內之議殆老成謀國之見今雖

命將出師兵力餉力萬不能逮可否

密諭西路各統帥但嚴守現有邊界且屯且耕不必
急圖進取一面招撫伊犁烏魯木齊喀什噶爾
等回首准其自為部落如雲貴粵蜀之苗瑶土
司越南朝鮮之略奉正朔可矣兩存之則兩利
俄英既免各懷兼併中國亦不至屢煩兵力似
為經久之道况新疆不復於肢體之元氣無傷
海疆不防則腹心之大患愈棘孰重孰輕必有
能辨之者此議果定則已經出塞及尚未出塞

各軍似須略加覈減可撤則撤可停則停其停撤之餉即勻作海防之餉否則只此財力既備東南萬里之海疆又備西北萬里之餉運有不困窮顛覆者哉至此時開辦海防約計購船練兵簡器三項至少先需經費一千餘萬兩本年八月間戶部奏覆文祥寬籌餉需摺內議請暫停內府不急之需而海防用項仍無可籌姑令各省先儘各項存款移緩就急抵充防費究之各省留支奉撥之數視歲入之數無不浮溢數倍更有何款可以存留借抵必不得已應仍照

總理衙門五年奏案專提部存及各海關四成洋稅一款為目前開辦之需除津海東海關四成奏歸天津機器局江海關四成內之二成奏歸上海機器局山海江漢兩關四成內奏明撥充奉兵及淮軍月餉淡水一關奏留台防軍需均為海防而設毋庸置議外其餘各海關四成洋稅及部庫歷年提存四成應請專備總理衙門及海防統帥大員會商撥用此後即責令各關另款封存逕行報解不准本省借留亦不必再解部庫致多轉折此項每年計可得銀百數

十萬兩加以部庫另存三百餘萬其有不敷擬
仍暫借洋款由續收四成項下撥還或另行設
法歸楚以應急需其息銀以七八釐為度歸本
以十年八年為度亦各國常有之事無足詫慮
也至於日後久遠之費當於開源節流求之現
在丁漕課稅正供之外添出釐金捐輸二款百
方羅掘仍不足用捐輸所得無幾流弊甚大而
內地釐金又為半稅所絀如銅鐵羽呢洋布等
類皆關民生日用洋船轉運迅捷輸納又僅半
稅於是奸民包攬冒騙大宗貨物皆免完釐因

稅則載在和約無可議加以致彼此輕重懸殊
商民交困叢雀淵魚之喻何堪設想丁日昌擬
設廠造耕織機器曾國藩與臣迭奏請開煤鐵
各礦試辦招商輪船皆為內地開拓生計起見
蓋既不能禁洋貨之不來又不能禁華民之不
用英國呢布運至中國每歲售銀三千餘萬又
銅鐵鉛錫售銀數百萬於中國女紅匠作之利
妨奪不少曷若亦設機器自為製造輪船鐵路
自為轉運但使貨物精華與彼相埒彼物來自
重洋勢不能與內地自產者比較我利日興則

彼利自薄不獨有益釐餉也各省諸山多產五金及丹砂水銀煤之處中國數千年未嘗大開偶開之又不得其器與法而常憂國用匱竭此何異家有寶庫封錮不啟而坐愁飢寒西士治地質學者視山之土石即知其中有何礦竊以為宜聘此輩數人分往徧察記其所產擇其利厚者次第開挖一切仿西法行之或由官籌借資本或勸遠近富商奏股合立公司開得若干酌提一二分歸官其收效當在十年以後臣近於直之南境磁州山中議開煤鐵飭津滬機器

局委員購洋器僱洋匠以資倡導固為鑄造軍器要需亦欲漸開風氣以利民用也近世學者鑒於明季之失以開礦為弊政不知弊在用人非礦之不可開也其無識紳民惑於鑿壞風水無用官吏恐其聚眾生事尤屬不經之談刻下東西洋無不開礦之國何以獨無此病且皆以此致富強耶若南省濱江近海等處皆能設法開辦船械製造所用煤鐵無庸向外洋購運權其餘力並可養船練兵此軍國之大利也至於洋藥一項流毒中國本年三月間欽奉

寄諭以醇親王請飭密籌杜絕飭即妥議辦法等因
臣查閱醇親王摺內有不必倉猝施行要在矢志弗懈俟外洋鴉片不來再嚴中國罌粟之禁等語實屬洞達大體適因台灣事起未便置議茲查洋藥自印度進口每年約七萬數千箱售銀三千餘萬之多英國明知害人之物而不欲禁洋商販運並欲禁中國內地自種其用意殊極狡很上年修約總理衙門與英使言之屢矣並預聲明既不能禁英商之不販洋煙即不能禁華民之不食洋煙惟有暫行弛禁罌粟不但

奪洋商利權並可加增稅項將來計窮事道難保不出於此其時英使聞之亦頗心動而該國卒不見聽臣即再與辦理恐亦無益應仍循總理衙門原議陰相抵制以致洋藥漸來漸少再加厲禁為宜查雲貴川陝山西各省多種罌粟疆臣臺諫每以申明禁令為言是徒為外洋利藪之毆授吏胥擾索之柄究之罌粟日種日廣勢仍不可遽禁聞土藥性暖價廉而癮亦薄不比洋藥為害之烈為今之計似應暫弛各省罌粟之禁而加重洋藥之稅釐使外洋煙土既無

厚利自不進口然後妥立規條嚴定限制俾吸食者漸戒而徐絕之民財可杜外耗之源國餉並有日增之勢兩得之舉也查洋藥每箱百觔新關正稅三十兩釐捐則各省多寡不同福建每箱捐銀三十六兩江蘇每箱捐銀三十二兩北洋天津等關捐銀二十四兩捐愈重則偷漏愈多英國條約原有洋藥如何征稅聽憑中國辦理之說如能於洋稅一律議加自可毫無滲漏裨益更大否則南北各口通定一加重捐數均照閩省之式無稍參差以免趨避專收作海

防經費由統帥提用合之亦成巨款此外沿江沿海各省皆令整頓貨釐鹽釐每省每年限定酌撥數萬兩協濟海防以上數端皆開源之事也若夫裁艇船以養輪船裁邊防冗軍以養海防戰士停宮府不急之需減地方浮濫之費以裨軍實而成遠謀亦節流之大者苟非上下一心內外一心局中局外一心未有不半途而廢者矣

一原奏用人一條擬派統帥責成經理及遴派得力提鎮將領為之分統查南北洋濱海七省

自須聯為一氣方能呼應靈通惟地段過長事
體煩重一人精力斷難兼顧各督撫未必皆深
知洋務兵事意見尤不能盡同若責成統帥調
度既恐扞格不通若會同各省商籌又恐推諉
貽誤從前辦粵捻各賊何嘗不屢簡統帥臣亦
曾備位其間深知甘苦餉權疆政非其所操不
過徒擁空名而各督撫仍不能不問兵事畛域
分則情形易隔號令歧則將士難從是欲一事
權而反紊也何況有事之際軍情瞬息變更倘
如西國辦法有電線通報徑達各處海邊可以

一刻千里有內地火車鐵路屯兵於旁聞警馳援可以一日千數百里則統帥尚不至於誤事而中國固急切辦不到者也今年台灣之役臣與沈葆楨函商調兵月餘而始定及調輪船分起裝送又三月而始竣而倭事業經定議矣設有緊急誠恐緩不及事故臣嘗謂辦洋務制洋兵若不變法而徒驚空文絕無實濟臣不敢明知而不言也竊計北洋三省設一統帥即才力倍於臣者尚慮不能肆應南洋四省口岸更多似亦非一統帥所可遍及若因創設鐵甲兵船

等項須責成大員督籌經理如前江西巡撫沈葆楨前江蘇巡撫丁日昌皆究心此事熟悉洋情似堪勝任至丁日昌擬設北東南三洋提督分統各船不為無見但文武兼資素習風濤駕駛輪船操法者實不易得耳抑臣更有陳者用人最是急務儲才尤為遠圖洋人入中國已三十餘年駐京已十餘年以兵脅我殆無虛歲而求練達兵略精通洋法者恒不數覲由於不學之過下不學由於上不教也軍務肅清以後文武兩途仍舍章句弓馬末由進身而以章句弓

馬施於洋務隔膜太甚是以沈葆楨前有請設
算學科之奏丁日昌前有武試改鎗礮之奏皆
格於部議不行而所用非所學人材何由而出
近時拘謹之儒多以交涉洋務為免人之具取
巧之士又以引避洋務為自便之圖若非

朝廷力開風氣破拘攣之故習求制勝之實濟天下
危局終不可支日後乏才且有甚於今日者以
中國之大而無自強自立之時非惟可憂抑亦
可恥臣愚以謂科目即不能驟變時文即不能
遽廢而小楷試帖太蹈虛飾甚非作養人才之

道似應於考試功令稍加變通另開洋務進取一格以資造就現在京師既設同文館江省亦選幼童出洋學習似已闢西學門徑而士大夫趨向猶未盡屬者何哉以用人進取之途全不在此故也擬請嗣後凡有海防省分均宜設立洋學局擇通曉時務大員主持其事分為格致測算輿圖火輪機器兵法礮法化學電氣學數門此皆有切於民生日用軍器製作之原外國以之黜陟人才故心思日出而不窮華人聰明才力本無不逮西人之處但未得其法未入其

門蓋無以鼓勵作新之耳如有志趣思議於各種略通一二者選收入局延西人之博學而精者為之師友按照所學淺深酌給薪水俾得研究精明再試以事或分派船廠礮局或充補防營員弁如有成效分別文武照軍務保舉章程奏獎升階授以濱海沿江實缺與正途進身無異若始勤終怠立予罷革其京城同文館上海廣方言館習算學生及出洋子弟學成回國皆可分調入局教習並酌量派往各機器局各兵船差遣如此多方誘掖勸懲兼施就所學以課所

事即使十人中得一成就已多一人之用百人
中得十成就已多十人之用二十年後製器駛
船自強之功效見矣

一原奏持久一條竊以古無久而不敝之法惟
在辦事之人同心協力後先相繼日益求精不
獨保境息民兼可推悟新意裕財足用如泰西
各國皆起於彈丸之地創造各樣利器未及百
年而成就如此之精規畫如此之遠拓地如此
之廣豈非其舉國上下積慮殫精人思自奮之
效乎中國在五大洲中自古稱最强大今乃為

小邦所輕視練兵製器購船諸事師彼之長去
我之短及今為之而已遲矣若再因循不辦或
旋作旋輟後患殆不忍言若不稍變成法於洋
務開用人之途使人人皆能通曉將來即有防
海萬全之策數十年後主持乏人亦必名存實
亡漸歸頽廢惟有中外一心堅持必辦力排浮
議以成格為萬不可泥以風氣為萬不可不開
勿急近功勿惜重費精心果力歷久不懈百折
不回庶幾軍實漸強人才漸進製造漸精由能
守而能戰轉貧弱而為富強或有其時乎是天

下臣民所禱祀求之者也

卷之三

禮記

李肅毅伯奏議

及門章洪綸編輯

卷五

輪船招商請獎摺

上海機器局報銷摺

卞長勝等赴德國學習片

煙台議結澳案摺

請飭官吏講求條約片

閩廠學生出洋學習摺

選派船政生徒出洋肄業章程清摺

出洋監督薪費及生徒經費清摺

籌議台灣事宜摺

創辦克鹿卜砲車馬乾片

議升祔典禮摺

借撥晉賑摺

籌撥晉豫賑款摺

籌辦晉賑片

海防經費免再抽撥片

駐洋幼童勻撥經費摺

籌議京城晉省運糶摺

整頓招商局事宜摺

海運官物統歸商局片

海防機局款難分撥摺

查覆滹沱河工難辦摺

外國捐賑請嘉獎片

購製軍火畫一辦法摺

淮軍裁勇就餉摺

李鳳苞兼管學生采辦等事片

韓超請宣付史館摺

密勸朝鮮通商西國摺

籌議交收伊犁事宜摺

驗收續購船砲摺

籌議購船選將摺

請催海防經費片

武弁回華教練摺

德國兵官請給寶星片

軍機大臣 密寄

軍機大臣 密寄

議覆中外洋務條陳

輪船招商請獎摺 光緒元年二月二十七日

奏為前保輪船招商出力員紳與津通驗收轉運
漕糧人員無涉謹詳細聲明仍請照擬給獎恭
摺仰祈

聖鑒事竊臣前因創辦輪船招商在事員紳歷年苦
心經營有裨大局於上年漕竣時擇尤奏請獎
敘聲明與津通驗收轉運漕糧人員無涉應不
併計等因並以此事實關海防根本洋務樞紐
抄奏咨請總理各國事務衙門查核各在案茲
吏部以未將緣何與津通驗收轉運人員無涉

應不併計之處詳細奏明應令覆奏再行核辦
等因知照到臣伏查各國通商以來火輪夾板
日益增多行駛又極迅速中國內江外海之利
幾被洋人佔盡且海防非有輪船不能逐漸布
置必須勸民自置無事時可運官糧客貨有事
時裝載援兵軍火藉紓商民之困而作自強之
氣且各口華商因無官辦章程多將資本附入
洋商輪船股內尤非

國體所宜臣於同治十一年五月間議覆製造輪
船未可裁撤摺內曾籌及商船一節經總理衙

門奏覆應由該督撫隨時察看情形妥籌辦理
復函屬遠諭有心時事之員妥議章程等因臣
即於是年夏間商令道員朱其昂等酌擬輪船
招商章程設局招徠俾華商原附洋商股本歸
併官局購造輪船運糧攬貨以濟公家之用畧
分洋商之利緣此事本係創始凡聯絡官商招
集股本選買船隻僱用管駕並於各口建立棧
房碼頭事體極為煩重籌辦極為艱難華商初
猶觀望洋人又復嫉忌往往跌價相爭非開誠
布公堅持定見不足以服衆而自立該員紳等

苦心經營力任艱鉅竟底於成頻年迭加開拓
漸收利權計有自置輪船並承領閩廠輪船八
號現又添招股分向英國續購兩號分往南北
洋各海口及外洋日本呂宋新嘉坡等處貿易
迭次裝運江浙漕糧上年秋間承載銘軍赴台
灣轉運糧餉源源接濟均能妥速無誤從此中
國輪船可期暢行實為海防洋務一大關鍵所
裨於

國計民生殊非淺鮮該員紳等不無微勞足錄自
應及時鼓勵臣前奏漕運出力不過畧舉一端

要之創辦輪船招商勞績非尋常局務等項可比更與津通驗收轉運人員絕無干涉應不併計相應詳細聲明仰懇

天恩准將原保道員朱其昂等照擬給獎以資觀感理合恭摺覆陳伏乞

皇太后

皇上聖鑒訓示謹

奏

上海機器局報銷摺 光緒元年十月十九日

北洋通商大臣大學士直隸總督臣李鴻章
南洋通商大臣兩江總督臣沈葆楨 跪

奏為滬局創設機器歷年動支經費各款援案開
具簡明清單恭摺仰祈

聖鑒事竊自同治初年 臣鴻章孤軍入滬進規蘇浙
輒以湘淮紀律參用西洋火器利賴頗多念購
器甚難得其用而昧其體終屬挾持無具因就
軍需節省項下籌辦機器選僱員匠仿造前膛
兵槍開花銅砲之屬上海之有製造局自此始
其地為各國官商薈萃之場其人皆有炫奇鬪

巧之智一名一藝奔湊爭先孰楛孰良見聞較
捷取彼之長益我之短自強之基莫大於是六
年曾國藩奏辦輪船請撥江海關洋稅一成八
年馬新貽丁日昌續請添撥一成而後局用有
常款踵事無止境先後承辦道員沈保靖馮煥
光知府鄭藻如等類能苦心探索引伸觸類拓
取法之門徑守核實之常經臣等事事加意督
察固無日不責其成效不惜費亦不任浪費也
茲據馮煥光等詳稱頻年用款漸巨積牘亟應
清釐計自同治六年五月動支洋稅之日起截

至十二年十二月底止共收江海關二成銀二百八十八萬四千四百九十七兩九錢八分九釐四毫共用購器製造建廠薪工等項銀二百二十三萬六千二百二十四兩六錢八分九釐一毫實存料物等項銀六十四萬八千二百七十三兩三錢三毫請歸入下次舊管列報所有開除各款俱係慎重搏節惟事屬創始經緯萬端料物取給外洋則昂一器講求數樣則昂匠價優於常例則昂種種淆異悉費權宜固不敢狃於故常亦不敢絲毫浮冒等因具詳請奏前

來臣等公同覆核該局製造大端有五而纖悉
零畸之事不計焉一曰輪船開造之始精擇程
式詳繪表裏成算既定將船殼鍋鑪汽機分為
三門以洋匠三人領華工數百且助且學經年
累月始得入水配用已造成者為惠吉操江測
海威靖海安木兵船五號海安丈尺加廣實馬
力千八百匹巨砲二十兵丁五百在外國為二
等在内地為巨擘又成鐵殼小輪船三號其造
而未成者為海安同式之第六號兵船夾板商
船小鐵甲兵船目今海上要需無如鐵甲自當

因勢利導速求進益冀日起而有功以補購致
之不足一曰鎗砲向曾造英法美兵鎗馬鎗數
種今則改造後門鎗專主林明敦底鐵中鐵鐵
管鋼管之式別有所謂馬梯泥士乃得者法明
而器猶未備向曾造生鐵輕銅田雞砲多尊今
則議改烏理治鋼膛鐵箍前門炸彈之式別有
所謂克虜卜回特活得者用宏而力有難兼禦
侮之道砲甚於鎗縱不能如島族絕大窮凶之
制尚當勉求精利取攜自如庶幾船台不等虛
設一曰火藥彈子年來購買及自製鎗砲何止

數千百具要皆不耐土藥不受劣彈若非及時配辦並分別前膛後膛大小長短之度臨事何所設施利器直同廢物該局又在局西十里之龍華地方分廠治具如法開造約計每日出藥千磅出林明敦彈子五千顆就中試用化學兼造白火藥及各種錘水均有成就所造砲彈月計不足歲計有餘此物貴多貴精未敢稍涉大意蓄艾之方得寸則寸也至於製器建廠一事器體互異名色綦繁而統謂之機器造船造鎗砲造火藥彈子是謂機器大宗此外鎔銅鍊鐵

鋸木挖泥抽水打樁起重印書印圖等事亦皆
機器為之入手以重價購自外洋迨至隨事遞
增或仿舊式或出新裁或攷圖說往往由局自
造工料亦復浩繁增機器必增廠屋以資會歸
綜前後營造計之局以內工藝正副各廠及庫
房畫圖房方言館公務廳共十七座局以外船
砲藥彈各廠及洋樓輿圖局共十五座大船塢
一區皆係價買民地經營近十年而後規模粗
具締造之艱有如此又如繙譯課士一事西法
兼博大潛奧之理苦於語言文字不同將欲因

端竟委窮流溯源舍繙書讀書無善策該局陸續仿購西書數十種厚聘西士選派局員相與口述筆譯最要為算學化學汽機火藥砲法等編因屬關係製造即如行船防海練軍採煤開礦之類亦皆有裨實用現譯出四十餘種刊印二十四種藉是稍窺要領牖啟高明又挑選生徒數十人住居廣方言館資以膏火中西並課一挾其祕一學其學製造本原始不出此此其局務大略聊可舉數者也臣等考其歲入之數至多不過四十萬而一隅兼數局之任一曰倍

千人之供尚能規畫成宜成造之件應付數省
精緻適用自開局以來凡例所本無用所必有
率皆稟承臣等斟酌定議此次總核放款委係
實用實銷毫無浮混但名目繁瑣剖晰棼如難
以循例造報理合援照天津成案彙繕簡明清
單恭呈

御覽仰懇

天恩逾格准予開銷以清款目而策後效除分咨總
理各國事務衙門戶部工部查照外所有上海
機器局自同治六年五月起截至十二年十二

月底止動支經費各緣由謹合詞恭摺具陳伏
乞

皇太后

皇上聖鑒訓示再滬局創設之後初次報銷此摺係

臣鴻章主稿合併聲明謹

奏

卞長勝等赴德國學習片

光緒二年三月二十六日

再旨遵

旨籌布海防迭經籌款定購西洋新式後膛鎗砲分發各營督飭操練並轉託德國克鹿卜砲廠代僱德國都司李勦協來津與之訂立合同議明三年為期教習克鹿卜後膛鋼砲該都司悉心指授砲隊操法日臻嫻熟現屆期滿銷差回國由臣優給川資並商令李勦協帶同花翎游擊卞長勝等七人赴該國武學院講習水陸軍械技藝俟學成回華再分撥各營教練以期漸開

風氣李勳協性情忠篤與卞長勝等相習已久
慨然允行業與議定章程飭卞長勝等會同李
勳協於三月二十一日由津附搭輪船起程竊
維外交之道與自固之謀相為表裏德國近年
發奮為雄其軍政修明船械精利實與英俄各
邦並峙而該國距華較遠並無邊界毗連亦無
傳教及販賣洋藥等事臣前晤該國駐京使臣
巴蘭德謂中國如派人前往學習船政軍政彼
國必當盡心教導是該國素敦友誼亟應及時
聯絡師彼長技助我軍謀近年閩滬各局奏派

學生赴英美等國游歷肄業無非為實事求是力圖自強起見茲臣所派游擊卞長勝等久歷行陣素諳洋器更令出洋精求博覽兼有李勣協援引照料徧赴德國各廠局軍營及砲台兵船切實考究以增益其所不能似亦造就人材之一法所需出洋用費應在海防經費內核實支銷其德國都司李勣協盡心教練著有成效擬請

旨賞給二等寶星佩帶回國以示優異除由臣函屬德國公使巴蘭德轉致該國兵部外務大臣妥

為照護並緘商總理衙門仍將出洋員弁銜名
籍貫造冊咨送外理合附片陳明伏乞

聖鑒訓示謹

奏

煙台議結滇案摺 光緒二年七月二十七日

奏為行抵煙台後與英國使臣會商一切事務現
已議立條款畫押互換作為滇案完結恭摺馳
陳仰乞

聖鑒事竊臣前奉

諭旨派為全權大臣馳赴煙台與威妥瑪會商一切
當經奏報於六月二十八日由津乘輪船起程
東駛二十九日申刻行抵煙台威妥瑪已先到
煙七月初三日會晤議商雲南戕害馬加理一
案該使堅求將全案人證提京覆訊若不允行

他事無可商辦其注意尤重在岑毓英主使謂
觀審之格維訥由滇回緬沿途查訪情節更真
彼已令格維納於閏五月杪回英面陳又將全
案文卷證據賞送該國查核約一月內該國必
有辦法回信此時即與議商仍須咨請本國作
主等語臣與反覆駁辯以滇案業經

欽派大員往查訊取供證確鑿斷無再行提京覆訊
之理若必欲提質須將所得岑毓英指使文札
信據或的確可靠見證交出查驗當據以請

旨定奪若聽信傳聞之言並無真憑確證遽將督撫

大員提訊中外各國皆無此辦法該使允將格
維訥所記簿據譯送日久總未送交初五初八
等日威妥瑪梅輝立來晤十一日臣又赴威妥
瑪處會商仍執前詞以相抵拒該使又提及去
秋在總理衙門議定辦理滇案優待駐京大臣
整頓通商事宜三大端須一併議辦乃可結案
其慾甚奢而所言甚肆適俄德美法日奧六國
駐京使臣及英德兩國水師提督均會集煙台
臣故示整暇往來談讌並詣其鐵甲大兵船閱
看操練該兵官等迎送禮儀恭謹臣因於十二

日

萬壽聖節邀請各國公使提督至公所燕飲慶賀自威
妥瑪以次各舉觴起立稱頌情誼頗為聯絡於
是各國使臣公論亦謂無確實憑據擅請提京
為非十三日威妥瑪始允另議辦法謂前在京
擬有八條英國臣民皆不滿意現格維訥到後
朝議尚未知如何若另想辦法必得比八條所
要更多更重方可服英人之心所擬條款須全
答應即轉請本國結案不必再說提京等語十
五日該使先送來一函堅明要約以條款當通

盤合併酌議如不允行決然停議如可允行彼此畫押為憑臣即復函以如皆於彼此有益無損各省地方均辦得動自可酌允倘有中國體制所未協力量辦不到者亦未必勉強允行俟定議後再據情具奏請

旨定奪各等語十七日該使來寓先譯述英文大略十八日將譯漢條款送交臣逐加查核其昭雪滇案六條皆總理衙門已經應允惟償款銀數未定其優待往來三條一京外兩國官員會晤禮節似因今春部院大臣往來多未拜會各省

督撫接見外國官員儀制互有歧異欲商訂以
免爭論一通商各口會審案件一中外辦案觀
審兩條可合併參看查近來各口關道與領事
雖照約有會審之名仍歸承審者聽斷會辦亦
屬虛文若照所擬分別妥議定章或稍經久觀
審一節亦經總理衙門於八條內允行矣至通
商事務原議七條一通商各口請定不應抽收
洋貨釐金之界並欲在沿海沿江沿湖地面添
設口岸該使以道光二十二年江甯和約第十
款英國貨物在海關納稅後准中國商人通運

天下經過內地稅關照舊輕納不得加增等語
厥後因此議改子口稅為他口毫不另徵之據
是第一子口似應在內地舊設常關處所遂謂
必須離海口數十里或百餘里定為子口界址
其界內免再收洋貨釐捐名為照約似亦近情
且查各省釐捐多在通商口岸百貨鱗集之處
若准定子口界所失過多斷不可行一請添口
岸分作三項以重慶宜昌溫州蕪湖北海五處
為領事官駐紮湖口沙市水東三處為稅務司
分駐安慶大通武穴陸溪口岳州碼斯六處為

輪船上下客商貨物長江一帶竟欲一網打盡
用意極為貪狡以上二條係該國注意多年所
必欲得者迭與總理衙門議論未就本年德國
修約又嗾令合力要求幾有不允不休之勢一
洋藥准在新關併納稅釐一洋貨半稅單請定
畫一款式華洋商人均准領單洋商運土貨出
口商定防弊章程一洋貨運回外國訂明存票
年限一香港會定巡船收稅章程一各口未定
租界請再議訂以上五條如洋藥釐稅由新關
併徵既免偷漏亦可隨時加增土貨報單嚴定

章程冀免影射冒騙諸弊香港妥議收稅辦法均尚於中國課餉有益其餘亦與條約不背該使又擬明年派員赴西藏探路請給護照因不便附入滇案優待通商三端之內故列為專條臣緣該使先既約定各條須通盤合併酌議有允有不允則即停議恐又事敗垂成因就其稍可通融者酌量允行改添字句免滋弊混而全力專注免定口界添設口岸兩事與之反覆爭論該使忽允忽翻自十九日起逐日會議至二十四日彼乃肯確允免定口界僅於租界免抽

洋貨釐金臣查洋人租界為地無幾各通商口
惟上海租界有抽釐局卡他處釐局皆在租界
之外且指明洋貨則土貨仍可抽收將見洋藥
加徵稍資撥補似於大局無甚妨碍至添口岸
一節總理衙門已允宜昌温州北海三處赫德
續請添蕪湖口亦經臣奏准在案今仍堅持前
議准添四口作為領事官駐紮處所其重慶派
英員駐寓總理衙門已於八條內議准未便即
作口岸臣知川江峽灘險阻輪船萬不能行姑
聲明俟輪船能上駛時再行議辦至沿江不通

商口岸上下客商貨物一節自長江開碼頭後
輪船隨處停泊載人運物因未明定章程碍難
禁阻該使既必欲議准似不在停泊處所之多
寡要在口岸內地之分明且今與訂上下貨物
皆用民船起卸仍照內地定章除洋貨稅單查
驗免釐有報單之土貨只准上船不准卸賣其
餘應完稅釐由地方官一律妥辦等語是與民
船載貨查收釐金者一律旋與赫德密商據稱
如此辦理該總稅司敢保洋稅毫無偷漏釐課
並無耗損只須各地方關卡員役查察嚴密耳

該使先請湖口等九處 臣與釐定廣東之水東
係沿海地方不准驟開此禁岳州距江稍遠不
准繞越行走姑允沿江之大通安慶湖口武穴
陸溪沙市六處輪船可暫停泊悉照內地抽徵
章程 臣復與德國使臣巴蘭德議及該國修約
添口即照英國定議辦理亦一舉兩得之計也
威妥瑪諄請半年後開辦口岸俾英人知滇案
有此貼補早沾利益租界免洋貨釐洋藥並納
釐稅須與各國會商再行開辦因准另為一條
倘以後各國不允亦於我無損至派員赴西藏

探路一節將來恐有棘手而條約應准游歷亦無阻止之理臣於原議內添由總理衙門駐藏大臣查度情形字樣並與言明如有阻滯切勿勉強致有後悔該使頗以為然屆時應由總理衙門妥慎籌酌縱難阻其弗往但囑沿途加意護送自無他虞其餘節目關係尚輕茲為迅速結案起見未便過於拘執致因小故或生他變迨至諸議就緒商及滇案償款一節該使謂不敢自專須請本國定數惟去冬專為此事調來飛游幫大兵船四隻保護商民計船費已近百

萬難保不向中國討取等語意極閃爍臣謂兩國並未失和無認償兵費之例諄囑其定數乃可結案庶幾一了百了該使謂吳淞鐵路正滋口舌如臣能調停主持彼即擔代仍照原議作二十萬臣思鐵路一事洋商既經購地興築豈肯中廢若久擱置亦屬可虞當允派員往商該使遂欣然定議因訂於二十六日率同中外在事各員齊集公所將繕就會議條款華英文各四分較對無訛彼此畫押蓋印互換該使復具結案照會臣轉咨總理衙門照辦除照錄威妥

瑪與臣十四十六等日訂約往覆函稿一摺威
妥瑪原議條款節略一摺臣與威妥瑪會議改
定條款一摺威妥瑪允即結案照會一摺恭呈
御覽並將畫押條款二分一咨送總理衙門查核一
存臣處備案外所有會商一切事務議立條款
完案各緣由謹繕摺由輪船遞天津交驛六百
里馳陳仰慰

慈廑伏乞

皇太后

皇上聖鑒訓示施行再臣拜摺後料理起程即日回

津威妥瑪亦即回京合併聲明謹

奏

請飭官吏講求條約片

再此次辦理滇案年餘之久英國使臣威妥瑪反覆要挾忽請提京忽請免罪且牽涉通商多增口岸臣雖權宜擬結實屬憤恨填膺若使此案未出之先該省督撫詳慎開諭地方官紳何敢如此橫肆迨案出後即為辦獲正兇何至該使得以藉口乃前雲南巡撫兼署雲貴督臣岑毓英始則漫不經心延不奏報迨經

寄諭飭查總理衙門迭函諮詢又未能據實奏辦以致外國疑為指使議論繁多幾開兵釁是該撫

原有應得之咎惟既經權宜辨結該使於李珍
國及腊都等犯尚為請免罪名此時復將該撫
請予處分恐又啟該使之疑應否

加恩免議之處臣未便擅擬惟查各口通商以來各
省口岸及內地徧設教堂均有洋人雜處且時
有執持護照外國官員人等游歷往來愚氓無
知豈能盡諳法紀或緣細故而啟忿爭或因傳
譌而致滋鬧人命案件本難保其必無竊維

朝廷丕冒之仁中外既無歧視情法自應持平自
來地方命案辦理速則怨忿易消辦理遲則訛

言易起况洋人性多貪急尤宜杜其借端臣聞
上年日本有戕殺德國領事官之事該君臣立
即撫慰德國駐日公使數日內辦獲正兇其案
遂結今年土耳其國屬地同時戕殺法德兩國
領事亦不過數月之間已獲犯償款完案況中
國素為萬國所尊仰若我滇案辦理迅速自不
至波瀾迭起上煩

聖座各省地方官吏於洋務隔膜既多當此時勢艱
難罕能為

國家分憂遠慮倘均如岑毓英之任性貽誤誠恐

後患方長應請

旨嚴飭各直省督撫督飭所屬地方官講求條約先
事防維倘遇有外國官民被戕之事迅即飭屬
查明嚴緝真正兇犯勒限辦結倘有任意遷延
虛飭等弊致開邊釁立予重懲庶期消患未萌
免蹈前轍臣為事關大局附片密陳伏乞

聖鑒訓示謹

奏

閩廠學生出洋學習摺

光緒二年十一月二十九日

奏為選派華洋監督率領閩廠學生出洋學習以儲人才而重防務恭摺仰祈

聖鑒事竊臣徐楨前於同治十二年十一月奏陳船工善後事宜摺內請於閩廠前後學堂選派學生分赴英法兩國學習製造駕駛之方及推陳出新練兵制勝之理速則三年遲則五年擬令船廠監督日意格詳議章程經理衙門議請飭下南北洋大臣會商熟籌等因奉

旨依議欽此欽遵在案旋因台灣有事倥偬未及定

議上年臣等籌議海防摺內於出洋學習一事
斷斷焉不謀同辭及臣日昌臣贊誠先後接辦
船政察看前後堂學生內秀傑之士於西人造
駛諸法多能悉心研究亟應遣令出洋學習以
期精益求精臣等往返函商竊謂西洋製造之
精實本於測算格致之學奇才迭出月異日新
即如造船一事近時輪機鐵骨一變前模船身
愈堅用煤愈省而行駛愈速中國仿造皆其初
時舊式良由師資不廣見聞不多官廠藝徒雖
已放手自製止能循規蹈矩不能繼長增高即

使訪詢新式孜孜效法數年而後西人別出新奇
中國又成故步所謂隨人作計終後人也若不
前赴西廠觀摩考索終難探製作之原至如駕
駛之法近日華員亦能自行管駕涉歷風濤惟
測量天文沙線遇風保險等事仍未得其深際
其駕駛鐵甲兵船於大洋狂風巨浪中布陣應
敵離合變化之奇華員皆未經見自非目接身
親斷難窺其祕鑰查製造各廠法為最盛而水
師操練英為最精聞廠前堂學生本習法國語
言文字應即令赴法國官廠學習製造務令通

船新式輪機器具無一不能自製方為成效後
堂學生本習英國語言文字應即令赴英國水
師大學堂及鐵甲兵船學習駕駛務令精通該
國水師兵法能自駕鐵甲船於大洋操戰方為
成效如此分投學習期以數年之久必可操練
成才儲備海防之用至學生中有天資傑出能
習礦學化學及交涉公法等事均可隨宜肄業
惟人數既多道里遼遠非遴選賢員派充監督
不足以資統馭而重責成查有三品銜候選道
李鳳苞學識閎通志量遠大於西洋輿圖算術

及各國興衰源流均能默討潛搜中外交涉要務尤為練達實屬不可多得之才以之派充華監督必能勝任至訪詢各國官廠官學安插學生延請洋師仍應有情形熟悉之員聯絡維持主客方無隔閡臣孫楨原奏所稱正一品銜閩廠監督日意格前已回國經臣等催調來華商辦一切該員久襄船政條理熟諳於船廠學生情誼亦能融洽以之派充洋監督必可勝任六月間李鳳苞日意格二員來津稟商臣鴻章適有烟台之役即攜該員等同往飭令籌議章程

奏案結後曾將該員等所議各節抄送總理衙門核奪茲經臣等再四討論復與李鳳苞日意格切實核減學生員數以三十名為度肄業年限以三年為度責以成效嚴定賞罰出洋經費分年匯解約共需銀二十萬兩此項經費必應籌定有著之款臣鴻章前議由閩省額撥南北洋海防項下酌提動用先儘釐金撥解釐金不敷即在閩海關四成洋稅項下就近湊撥旋准福州將軍臣文煜咨稱閩關四成洋稅暫無存款俟第六十五結屆滿再行核數撥解等因新

授閩浙督臣何璟過保定時臣與面商一切亦
深以為然茲由臣日昌函致臣鴻章議定由閩
省釐金項下籌銀十萬兩閩海關四成洋稅項
下籌銀五萬兩船政經費項下均撥銀五萬兩
是此二十萬之數均已議有著落查照分年滙
解章程第一年七萬三千兩有奇第二年六萬
兩有奇第三年五萬八千兩有奇並游歷及應
支教習脩金等費隨時核比撥匯閩力雖甚拮
据必能酌量緩急以符定議應請於海防額餉
內作正開銷查西洋各國均以中國遣人赴彼

學習為和好證驗前派幼童赴美國英使即有
該國大書院極多將來亦可隨時派往之語秋
間滇案議結時臣鴻章面告威妥瑪以擬遣學
生赴英學習該使允俟總理衙門知照到日轉
致本國外部九月間威妥瑪回國過晤臣復與
商明照辦惟該國兵船定例稍嚴聞日本近時
已有七人在英兵船學習臣在烟台閱視洋操
即見有日本武弁在英國鐵甲船隨同操演今
議學生分班送往又有郭嵩燾等駐英商辦當
無碍難之處至法使白來尼屢以日意格辦船

有效為言此舉現擬令該監督等率同學生於
明年正月啟行應請

飭下總理衙門迅速分別知照英法駐京公使令其
轉達本國妥為照料臣鴻章於本年三月間因
洋員李勳協回國之便派令武弁卞長勝等七
人同赴德國軍營學習兵技當時未派監督心
甚懸念此次李鳳苞出洋飭令該員按三個月
一次由輪車馳赴德國兼查卞長勝等功課並
請總理衙門酌量照會德國駐京公使一體知
照辦理近自同治十二年籌遣幼童赴美學習

之後上年日意格回國臣葆楨遣學生數名隨
往游學本年臣鴻章又遣卞長勝等赴德學習
此次又派李鳳苞等率領學生分赴英法兩國
從此中國端緒漸引風氣漸開雖未必人人能
成亦可拔十得五實於海防自強之基不無裨
益謹將臣等籌議船政學生出洋章程及經費
數目分繕清單恭呈

御覽仰懇

飭下總理衙門核准施行所有遴員派充華洋監督
率領閩廠學生出洋肄業緣由理合會同兼署

閩浙總督福州將軍臣文煜新授閩浙督臣何
璟恭摺由驛具陳伏乞

皇太后

皇上聖鑒訓示謹

奏

謹將選派船政生徒出洋肄業章程繕具清單
恭呈

御覽

計開

一奏派華洋監督各一員不分正副會辦出洋肄
業事務俟挈帶生徒到英法兩國時兩監督
公同察看大學堂大官廠應行學習之處會
同安插訂請精明教習指授如應調赴別廠
或須更換教習仍令會商辦理其督課約束
等事亦責成兩監督不分畛域如兩監督分

駐英法之時則應分投照顧其華員及生徒
經費歸華監督支發洋員洋教習及華文案
經費歸洋監督支發每至年底由兩監督將
支發各數會銜造報凡調度督率每事必會
同認真探討和衷商榷期於有成萬一意見
不合許即據實呈明通商大臣船政大臣察
奪

一選派製造學生十四名製造藝徒四名交兩
監督帶赴法國習學製造此項學生既宜另
延學堂教習課讀以培根柢又宜赴廠習藝

以明理法俾可兼程並進得收速效以備總
監工之選其藝徒學成後可備分廠監工之
選凡所習之藝必須極新極巧倘仍習老樣
則惟兩監督是問如有別廠新式機器及砲
台兵船營壘礦廠應行考訂之處由兩監督
隨時酌帶生徒量繪其第一年除酌帶量繪
外其餘生徒可以無須游歷第二第三年約
以每年游歷六十日為率均不必盡數同行
亦不必拘定時日
一選派駕駛學生十二名交兩監督帶赴英國

學習駕駛兵船此項學生應赴水師學堂先
習英書並另延教習指授水雷鎗砲等法俟
由兩監督陸續送格林回次抱士穆德大學
院肄習其間並可帶赴各廠及砲台兵船礮
廠游歷約共一年再上大兵船及大鐵甲船
學習水師各法約二年定可有成但上兵船
之額可援日本派送肄業之例陸續拔尤分
班派送五六人其未到班者仍留大學堂學
習既上兵船須照英國水師規制除留辮髮
外可暫改英兵官裝束其費由華監督歸經

費項下支給內有劉步蟾林泰曾二名前經
出洋學習此次赴英即可送入大兵船肄業
一製造生徒赴法國官學官廠學習駕駛學生
赴英國格林回次抱士穆德學堂並鐵甲大
兵船學習應請總理衙門先行分別照會駐
京英法公使咨會本國外務院准照辦理其
英國學習各事或再由中國駐英
欽差大臣就近咨商辦理兩項學生每三個月由
華洋監督會同甄別一次或公訂專門洋師
甄別並由華監督酌量調考華文論說其學

生於閒暇時兼習史鑑等有用之書以期明體達用所有考冊由兩監督彙送船政大臣轉咨通商大臣備核其駐洋之期以抵英法都城日起計滿三年為限未及三年之前四個月由兩監督考驗學成者送回供差其中若有數人將成未成須續習一年或半年者屆時會同稟候裁奪總以製造者能放手造作新式輪機及全船應需之物駕駛者能管駕鐵甲兵船回華調度布陣絲毫不藉洋人并有專門洋師考取給予確據者方為成效

如一切辦無成效將監督議處

一製造駕駛兩項學生之內或此外另有學生願學礦務化學及交涉公法等事者由兩監督會商挑選就其才質所近分別安插學習支給教習脩金仍由兩監督隨時抽查功課令將逐日所習詳記送核亦以三年為期學成後公訂專門洋師考驗確實給有的據送回供差

一兩監督及各項生徒自出洋以迄回華凡一切肄業功課游歷見聞以及日用晉接之事

均須詳註日記或用藥水印出副本或設循環簿遞次互換總以每半年彙送船政大臣查核將簿中所記由船政抄咨南北洋大臣覆核或別國有便益新樣之船身輪機及一切軍火水陸機器由監督隨時探明覓取圖說分別繪譯務令在洋生徒考究精確實能仿效一面將圖說彙送船政衙門察核所需各費作正開銷

一各項生徒如遇所訂教習不能認真指授或別有不便之處應隨時訴明華監督會同洋

監督察看確實妥為安置若該生徒無故荒廢不求進益有名無實及有他項嗜好者均由兩監督會商分別留遣嚴究其員生每月家信二次信資及醫藥等費作正開銷或延洋醫或延駐洋欽使之官醫或應另請派撥醫生均於到洋後酌定萬一因攻苦積勞致有不測之事則運回等費作正開銷並給新費一年半仍酌量情節稟請附奏以示優卹如有聞訃丁憂者學生在洋守制二十七日期另加卹賞飭該家屬具領

一此次選派生徒應由監督溯查考蹟詳加驗看如有不應出洋濫收帶往不能在官學官廠造就以致剔回者其回費由監督自給倘生徒赴洋後有藉詞挾制情事因而剔回者即將挾制情形稟請抵華後查明懲究如答不在監督者仍開報回費實係因病遣回者不在此例

一兩監督和衷會辦當互相覺察萬一華監督有敷衍塞責等情弊而洋監督不行舉發或洋監督有敷衍塞責等情弊而華監督不行

舉發者咎各相等查有扶同確據即分別照會咨行隨時撤換不必俟三年期滿如果事實實際生徒多優異者將兩監督專摺

奏請獎敘

一此次所議章程總以三年學有成效為限若三年後或從此停止或另開局面均由船政大臣通商大臣會商主裁外人不得干預

謹將出洋監督新費及生徒經費並分三批匯
付銀數開列清單恭呈

御覽

計開

一華洋員新費項下華監督一員並繙譯一員
共薪水每年七千六百兩華員雜費每年三
千兩洋監督一員薪水每年七千二百兩洋
幫辦兼文案一員每年二千四百兩華文案
以學生陳季同兼辦每年一千二百兩洋員
並華文案房飯雜費每年四千八百兩
華文案並

習交涉公法所需教習修
金由華監督另給造報
以上各項俱按照

船政向例支發七一七洋平銀其生徒薪水

仍由船政照給該家屬支領
該員等起程以
至法國先約支

兩月薪水俟按日數
造報回華時仿此

一製造學生經費項下每名每年房租並學堂

脩膳費約銀一百二十磅每名行裝費五十

磅於起程時先發二十磅到洋時我發三十

磅又第二第三年每名年需游歷費六十磅

每名年需剃頭洗衣添購書籍紙筆零用等

雜費四十磅以上各項須隨時按英磅作價

不能預定銀兩其游費雜費實支實報不敷者補給如有贏餘涓滴歸公另延教習兼教所添修金每年約以八百磅為限此款核實支發以原收單粘報

一駕駛學生經費項下每名行裝費及每年房租脩膳費游費雜費並同前條惟陸續上兵船時每名應給兵官衣資並海圖器具等費共銀一百五十磅既上兵船之後每名每年應增飯食費二十四磅約以二年為限其未上兵船時另延教習兼教所添脩金每年約

以四百磅為限亦核實支發以原收單粘報

一路費項下若搭西國公司船則華洋監督及

隨員繙譯文案五員坐上等船位除洋文案一員來回

費前已領過每次約五百三十元生徒坐二等艙

每次約四百元此項船價及渡船火車衣箱

稅等費摺節支報如有不敷俟挪用後稟請

補領所帶隨役不准開支公項其往費於起

程時具領其回費於第二批內領二分之一

第三批內領二分之一若派船政官翰船送

往則此項路費概不開支魏瀚陳兆翱二名行裝回費前已具領

一撥匯日期於華洋監督生徒起程時先撥第一
一年薪費及行裝費往費學生之上兵船衣
食費均由華洋監督出具鈐領帶往支發及
起程八個月再由船政匯付第二年薪費一
批及回費二分之一以後十二個月又匯付
第三年薪費一批及回費二分之一寄交兩
監督收存備用

又分三批匯付銀數

第一年

華洋員薪費每年共七十七洋平銀二萬六千

二百兩兩監督及繙譯華文案共四員起程以
至法國先約支兩月薪水計銀二千六百六十
六兩不另支雜費俟到洋後扣足在路日數計
算將餘銀歸公

隨員馬建忠並製造學生十四名藝徒四名共
十九名每名房修膳等費年應英銀一百二十
磅雜費四十磅行裝費十七名每名五十磅共
三千八百九十磅內隨員薪水仍由天津發給
學生魏瀚陳兆翱二名已領行裝
製造生徒另延教習年約脩金八百磅

駕駛學生十二名每名年應房修膳等費英銀
一百二十磅行裝費五十磅雜費年應四十磅
共二千五百二十磅

駕駛學生另延教習年約脩金四百磅

駕駛學生十二名上兵船衣具圖書費每名一
百五十磅上兵船後每名每年增飯食銀二十
四磅全年統共二千零八十八磅

以上五款共英銀九千六百九十八磅以每
磅五元作七一七洋平算合銀三萬四千七
百六十七兩三錢三分

往費監督等五員每員五百三十元共一萬三

生徒二十八名每名四百元

千八百五十元七一七合銀九千九百三十兩

四錢五分

以上約計第一年總共領銀七萬三千五百

六十三兩七錢八分

第二年

華洋員薪費每年共七一七洋平銀二萬六千

二百兩

隨員並製造學生房修膳并雜費年共三千零

四十磅

製造生徒另延教習年約脩金八百磅

隨員並製造生徒共十九名每名游厯費六十磅共一千一百四十磅

駕駛學生十二名房修膳並雜費年共一千九百二十磅

駕駛學生另延教習年約脩金四百磅

駕駛學生十二名每名年增飯食費二十四磅共二百八十八磅

駕駛學生一十名每名年應游厯費六十磅共六百磅

以上七款共英銀八千一百八十八磅合銀
二萬九千三百五十三兩九錢八分

回費二分之一應六千九百二十五元合銀四
千九百六十五兩二錢二分五釐

以上約計第二年總共應領銀六萬五百一
十九兩二錢五釐

第三年

就第二年數內除去駕駛學生另延教習脩金
四百磅駕駛學生增飯食項下二百八十八磅
駕駛學生游歷項下六百磅共應除去英銀一千

二百八十八磅合銀四千六百一十七兩四錢
八分

兩監督等四員法國起程至回閩先約支兩月
薪水計銀二千六百六十六兩不另支雜費俟
回閩後扣足在路日數計算將餘銀歸公

以上約計第三年總共應領銀五萬八千五
百六十七兩七錢二分五釐

以上三年統共七一七洋半銀一十九萬二
千六百五十兩七錢一分外尚有第一年酌
帶學生出外量繪游歷費及三年內華文案

並隨員學習交涉公法應支脩金等費未算
在內

籌議臺灣事宜摺光緒三年正月十六日
奏為遵

旨籌議臺灣事宜仰祈

聖鑒事竊臣前奉光緒二年十一月十九日

上諭丁日昌奏臺灣事宜應統籌全局並省臺勢難
兼顧及舉辦礦務墾務各摺片著該督等籌商議
奏等因欽此查臺灣情形沈葆楨曾躬親其事見
聞最熟既承

諭旨垂詢諒必有擘畫盡善之策臣遙為籌度琉球
距臺北千餘里現日本分兵踞琉球難保不漸

思吞噬日斯巴尼亞所屬之小呂宋距臺南亦
僅千數百里現日國聲稱調兵船來華難保不
逕圖窺伺幸有丁日昌赴臺密速布置欽奉上
年十二月二十二日

密諭已調孫開華方耀所部各營陸續赴台臣又商
催吳贊誠將赫德代購之龍驤虎威兩砲船由
閩駛往協防藉可虛張聲勢丁日昌所擬辦法
以靜待動以柔克剛萬一遇有外侮當能操縱
合宜不至遽有戰事此目前之可勿深慮也若
臺灣經久事宜應以舉辦礦務墾務為興利之

大端鷄籠煤礦開採已有端緒硫磺煤油樟腦
茶鐵諸利亦應逐漸招商開拓或借官本或集
公司該撫所稱十年後成本可還二十年後庫
儲可裕殆非虛語招墾人多則經費必多似須
量力經營不設限制江海各關協撥緊餉皆屬
入不敷出擬請

勅部於各關解部四成及所存招商局稅項酌量借
助若干由丁日昌於興利收回成本特陸續解
還部庫歸款至鐵路電線二者相為表裏無事
時運貨便商有事時調兵通信功用最大東西

洋各國富強之基胥賴此以充拓丁日昌到台後迭次函稱該處路遠口多防不勝防非辦鐵路電線不能通血脈而制要害亦無以息各國之垂涎洵篤論也惟鐵路費用過鉅似須煤鐵開採有效就地取料工力較省陸路電線則移省廈已成之器為之亦尚易為至購鐵甲船練水雷軍不獨台防當辦南北洋海防尤為急務臣因海防奉撥額款報解無多尚不敢遽行定購去年議訂美國黎約翰新式魚雷五十具並傳授製法用法共索價五十萬兩擬招令來津

面試如果精利無敵當酌予收買分給鐵甲船則須道員李鳳苞帶閩廠學生至英國後詳細查勘議辦其價過昂不得不格外慎重也丁日昌辦事認真不避勞怨惟近日肝病頗劇求效過速若欲諸務同時並舉斷斷無此財力若分緩急先後擇要以圖數年當有起色所請專派重臣督辦一節似不如責成該撫一手經理俟辦有成效再議督撫輪駐近閩邸鈔袁保恆請改福建巡撫為台灣巡撫雖事有專屬而台地兵事餉源實與省城呼應一氣分而為二則緩

急難恃台防必將坐困亦非計之得者愚昧之
見是否有當理合恭摺由驛密陳伏乞

皇太后

皇上聖鑒采擇施行謹

奏

創辦克鹿卜砲車馬乾片

光緒三年二月二十四日

再海防銘盛各營及親軍砲隊自同治十年以

後陸續籌款添購德國克鹿卜後門四磅鋼砲

一百十四尊僱用德國教習選派砲勇照該國

操砲章程認真操演此項砲位取準及遠精利

無匹在西洋各國最為著名利器每砲一尊及

前車零件子藥箱應用拉馬六匹砲目一名騎

馬一匹共馬七匹行軍時砲勇馬夫皆須乘坐

前箱後架及拉砲鞍馬之上平日操練進退旋

轉必賴人馬相習馬匹尤必調良方能隨機應

變

變電掣風馳現當籌辦海防各砲前車均已購製齊備分發各營兵勇砲法亦漸操習精進當於光緒二年六月間

奏請飭派提督唐立業出口購到新馬三百匹先行按照各軍領砲多寡均勻攤派暫資操演計分給盛軍拉砲馬七十匹銘軍二十七匹親兵前營一百三十三匹護衛營五十六匹樂字營十四匹按每馬七匹量給馬夫兩名共計拉砲馬三百匹新募馬夫八十六名其夫馬口糧喂養仍核照淮軍馬隊向章每夫匹均日給銀一

錢從上年十月初一各營領齊馬匹之日起支
據淮軍糧台直隸練餉局司道會詳請

奏前來臣查德國營制以砲六尊為一小營每砲
出征有正車副車正車用馬六匹副車用馬六
匹連砲目坐騎每砲共須馬十三匹此外尚有
餘馬預備隨時補換每一小營用木鐵兩匠礮
鑪器具車一輛伙食車一輛行李車一兩及營
官號令坐騎之馬共計用馬六十二匹馬夫五
十六名現操砲隊既仿該國營制應需夫馬本
難刪減惟餉項支絀不能不酌量變通以歸撙

節其行李伙食兩車現無戰事擬暫裁去營官
號令坐騎及備換之馬亦擬緩給其副車及礮
鑪器具車為行陣必不可省之件就現有礮位
計算副車應用馬六百八十四匹礮鑪車應用
馬一百十四匹擬俟車輛造齊隨時酌核添備
目前每礮一尊僅止用馬七匹實已無可再省
此次唐立業購到馬三百匹按礮一百十四尊
分配每礮七匹計尚少馬四百九十八匹應即
續行采購俾資訓練而成勁旅至各營礮勇專
習技藝隨礮器具繁多又須責成經理勢難兼

顧槽牧德國用夫甚多現擬砲目騎馬一匹暫
令自行喂養計每馬三匹給夫一名係屬著實
核減以上各節均仿照德國營制參酌准軍向
章量加變通於講求利器之中仍寓撙節餉需
之意現在創辦伊始應需馬乾夫糧部臣無案
可稽相應請

旨勅部立案作正開銷以重軍儲而昭核實理合附
片具陳伏乞

聖鑒訓示謹

奏

表五

PTA

議升祔典禮摺光緒三年七月初一日

奏為遵

旨覆議

升祔典禮恭摺仰祈

聖鑒事竊臣承准軍機大臣字寄六月十四日欽奉
慈安端裕康慶昭和莊敬皇太后

慈禧端佑康頤昭豫莊誠皇太后懿旨本日據禮親王
世鐸等奏遵議穆宗毅皇帝孝哲毅皇后神牌升祔
位次一摺又據醇親王奕譞詹事府少詹事文治鴻
臚寺卿徐樹銘內閣侍讀學士鍾佩賢鴻臚寺少卿

文碩國子監司業寶廷另行陳奏各摺片已明降諭旨令惇親王奕諒恭親王奕訢醇親王奕讓御前大臣軍機大臣大學士侍郎翁同龢夏同善禮部太常寺將王大臣等所奏各摺片詳細閱看再行妥議具奏矣

廟制關係鉅典必須考核精詳方足以昭慎重著再派李鴻章悉心妥議具奏禮親王世鐸等摺一件醇親王奕讓等摺片九件並侍郎袁保恆等說帖五件均著抄給閱看將此諭令知之欽此仰見

皇太后慎重鉅典聿求厥中之至意臣查禮親王等議

增龕座志在斟酌時宜諸臣請改廟制志在考求古禮要皆出於尊崇

祖宗之忱未易折衷定論以臣所聞禮文殘闕古制難詳七廟九廟之文漢世已無定說都宮別殿與同堂異室昔人亦互有是非即朱子宗廟圖議馬端臨邱濬等皆病其過拘臣考周官匠人營國世室明堂皆止五室鄭注五室並在一堂據此則朱子所圖世室親廟以次而南似亦未必盡合古制至於特建

寢殿增修方殿等說更為古制所無禮親王等奏稱侍

講張佩綸請建世室事涉更張應毋庸議等因
宗廟事重未便輕議改作該親王等所奏不為無見我

朝

廟制定於

國初

祖宗神靈協會一室已二百餘年一旦遷改

神明必有不安

太廟重垣周二百九十一丈殿陛庭墀各有定式皆一

成而不變今欲就增數室位置必難得宜又

升祔吉期理不宜誤戴記所稱不忍一日未有所歸者

也準古酌今改廟實有難行禮緣人情可以義起因時立制自以仿照

奉先殿成案增修龕座為宜議者或以簡畧為嫌臣考古禮祔廟迭遷亦止改塗易檐並不大更舊廟今之龕座畧如晉宋以來之坎室晉太常華恆建議廟室以容主為限無拘常數厥後王導溫嶠等往復商榷議增坎室宋增八室蔡襄為圖此皆達禮君子度時之宜以成一代之典彼豈未聞世室親廟之說亦謂禮樂不相沿襲事異殷周禮從而變也今之增龕實其比例又謂

奉先殿乃古原廟之制與

太廟事體不同查會典所載雍正十一年奏准

奉先殿

神牌供奉與

太廟理應畫一是

太廟如

奉先殿制久有成憲可循不得謂

奉先殿可以增龕獨不可仿行於

太廟也仰維

列聖家法皆

躬行節儉以先天下今日援案增龕之議事屬權宜意
從儉樸未必不當於

列聖降鑒之心廷議既已允諧似應無煩疑慮至祧遷
之禮雖古之常制而藏主之室則禮無明文鄭
康成禮經大師其言周制祧主藏於太廟及文
武世室是已祧之主與不遷之祖同處一廟故
廟亦名祧晉代之制藏於西儲夾室當時已疑
其非禮後世竟沿為故事儒家每謂祧於夾室
為古制殆臆度之辭廟既與古不同祧亦未宜
輕議惟

太廟規制有定

國家統緒無窮醇親王議請

明降諭旨曉示天下自今以往親盡則祧並請以
後殿東西二梢間永藏祧主此則導

皇上以大讓酌

廟制以從宜禮貴因時讓為美德非天子不議禮應否
允行自應一秉

聖裁非臣下所敢妄擬矣所有微臣遵

旨敬謹詳議緣由是否有當恭摺由驛覆陳伏乞

皇太后

皇上聖鑒訓示謹

奏

臣等

謹

借撥晉賑摺 光緒三年八月初八日

奏為遵

旨酌量借撥晉省賑款恭摺覆陳仰祈

聖鑒事竊臣欽奉光緒三年七月初四日

寄諭洗馬溫忠翰奏山西各府州縣連年亢旱賑恤

饑民需款甚鉅前經曾國荃奏准截留京餉二十

萬兩誠恐不敷分撥除本省勸捐助賑外不得不

預籌協濟查江浙釐金現撥南北洋海防經費請

將此項借撥銀一二十萬兩以應急需俟晉省捐

款集有成數再行撥還等語晉省被災較重疊據

該撫奏報情形賑撫勢難稍緩溫忠翰所奏請撥海防經費接濟目前自係為移緩就急起見即著李鴻章酌量借撥咨照曾國荃派員領解回晉核實散放俟山西庫款稍裕即行撥還等因欽此伏查江浙釐金項下奉撥海防經費兩年以來江蘇分釐未解浙江亦未按額解足統計庫存無多且此係海防專餉總理衙門與戶部原奏未可挪作他用是以上年直境旱荒賑款不敷僅就司道各庫竭力羅掘未敢絲毫借動現須訂購外洋船炮子彈水雷等項約計購價頗巨若

一借撥深恐有誤急需勢難兼顧惟晉省旱災較重賑撫用繁截留京餉既慮不敷捐款尚未能速集

諭旨飭臣酌量借撥敢不設法另籌以顧大局當與曾國荃往復咨商議定借撥銀十萬兩即由晉委員來領查天津有解存練餉制錢一款前經奏明發交江浙典商分領生息原議如有需用隨時檄提正可移緩就急臣已飭令江浙兩省典商各提原領制錢七萬五千串共合十五萬串剋期解津即照時價核實易銀十萬兩以為

借撥晉省賑款如易銀尚不足數即於練餉項下提補惟該典商備錢解津有需時日先飭司道設法暫行挪墊以便委員迅速領回應用仍俟晉省庫款稍裕照數撥還練餉原款如此一轉移間鄰疆賑需藉資接濟而海防購辦各項亦不至停待似屬兩有裨益除俟易銀竣事即將動用錢數咨部存案外所有酌量借撥晉省賑款緣由理合恭摺由驛覆陳伏乞

皇太后

皇上聖鑒訓示謹 奏

籌撥晉豫賑款摺光緒三年八月二十三日

奏為遵

旨籌撥晉豫賑款恭摺覆陳仰祈

聖鑒事竊臣欽奉光緒三年八月二十一日

寄諭夏同善奏晉豫二省被灾最重請旨加撥賑帑

並飭李鴻章採買米糧接濟晉省各摺片本年山

西河南亢旱成灾而山西為尤甚飢民嗷嗷待哺

道殣相望披覽所奏情形實深矜憫前經降旨准

該二省截留京餉備賑既准晉省開捐惟被灾復

廣聚之為巨款散之即屬畸零開捐集資亦恐緩

不濟事該侍郎請於部存關稅項下撥銀四十萬
兩天津海防經費項下撥銀三十萬兩以七成給
晉三成給豫著戶部李鴻章迅速籌議具奏再降
諭旨等因欽此仰見我

皇太后

皇上軫念災區

恩施稠疊欽感同深惟晉豫二省上年本已歉收今
歲又皆亢旱晉省災重且廣飢民嗷嗷待哺道
殍相望情形誠有如夏同善及各撫臣所陳者
臣近接鄰疆屢有所聞莫名焦慮而直隸被旱

地面亦復不少正須酌籌賑撫連年灾歉公私
交窘極費經營實已自顧不暇前奉

諭旨借撥晉省賑款業已於天津練餉制錢項下籌
撥銀十萬兩奏蒙

俞允當飭司道設法挪墊於八月初一日發交該省
委員如數領回在案其時海防經費擬訂購外
洋軍火一經購成即須付價勢難先作他用臨
時無以應急失信洋人今幸上年原訂美國黎
氏魚雷該洋人先行運到一具因其價值太貴
設法退回尚可勻出經費暫撥賑款曾國荃李

慶翱及侍郎袁保恆等亦均來函告急臣惟賑濟灾黎非他用可比擬請即於天津海防經費預下撥給銀二十萬兩以七成給晉合銀十四萬兩三成給豫合六萬兩連前撥晉省練餉銀十萬兩已足三十萬兩之數如蒙

特恩撥給則前撥十萬兩似可無庸籌還所有此次給豫之款由該省委員領解給晉之款即作為購運賑糧之需以上副

朝廷子惠元元至意理合恭摺由驛覆陳伏乞

皇太后

卷三

五十四

籌辦晉賑片

再夏同善原片內稱山西購糧不易請將所撥海防項下賑濟銀兩由臣採運米糧等語奉

上諭應如何購辦及由何路轉運飭臣一併速議奏明辦理等因欽此伏查救荒之策首在籌糧而購運事宜尤須熟計直隸亦被旱災民食缺乏前經奏明籌款派員赴奉天採購雜糧由海運津以資本省糶賑並因晉省災重糧少價昂飭據津海關道黎兆棠輪船局道員朱其昂由津招商備糧二千石因直境各河皆涸船運交河縣

泊頭鎮換車至獲鹿縣改為騾馱赴山西榆次
縣平糶先為試辦惟運道過遠舟車數易自獲
鹿入晉山路崎嶇萬分行程既遲運費尤巨此
時奉天陳糧將盡新糧尚未登場本屆封河較
早恐難多購多運晉省災區甚廣為日方長冬
賑固須急籌春撫亦須接濟倘難一起購運尚
可陸續籌辦前准曾國荃咨請派員在津捐賑
經臣檄委遇缺題奏臬司丁壽昌與黎兆棠等
廣勸各商量力捐助昨已據道員胡光墉稟報
捐助山西賑銀一萬五千兩丁壽昌黎兆棠素

顧大局皆以晉中災因為急所有此次奉撥賑
銀購運晉糧各事宜應令該司道體察情形趕
速籌議妥便之法由臣隨時咨商曾國荃設法
迎提總期多運一石之糧俾晉民多得一日之
食理合附片覆陳伏乞

聖鑒謹

奏

海防經費免再抽撥片

再海防經費一款總理衙門與戶部原奏未可
挪作他用原以海防關係重要經費籌畫艱難
合之則可逐漸經營分之則斷不能集事恭查
議辦海防之始

穆宗毅皇帝有亟應實力講求同心籌辦堅苦貞定歷
久不懈以紓目前當務之急以裕國家久遠之圖之
諭光緒元年四月間定議我

皇上又有若僅空言了事因循廢弛何時見諸施行
亟宜未雨綢繆以為自強之

諭臣自奉

命督辦以來深懼智慮短淺致誤事機尤恐款不應
手終成畫餅一切出納必慎之又慎既不敢稍
涉鋪張糜費亦未嘗以他用挪動絲毫然奉撥
額餉每歲號稱四百萬兩三年以來實解不過
二百萬是每年僅得數十萬兩固已有名無實
各省釐金或分毫未解或解不及半各海關四
成洋稅開銷本多又撥去半分歸還西征軍餉
原借洋款臣深知各省入不敷出未便過事催
迫而餉無所措防務迄無就緒焦灼莫名原議

先就北洋創設水師一軍必須購置船砲等項其鐵甲船一項實為軍中利用不可或少迭經商屬出使大臣及出洋各員訪察船式價目現在丁日昌又議請及時購辦若一經購成每隻價需百萬內外此外又有已經訂定之英國馬梯呢後門兵槍德國克羅卜後門鋼砲及赫德續購船砲藥彈統計需價亦巨貨到必應付銀現在積存經費僅止一百數十萬兩近又奉部議分半解閩以後各省關續解必更無幾以來源待盡之款而辦此重大軍需如湯沃雪奚從

措手茲原訂美國水雷因價太貴設法退回藉
稍勻撥晉豫急需以仰體

朝廷軫念災區至意惟是海防為軍國大計洋務之
變故難言無事時以為此項可緩漠然置之迨
有事時則已措布不及微臣近依

畿輔籌備緩急萬不可少合無仰懇

聖恩敕下總理衙門戶部查照嗣後此項經費仍遵
原奏專為海防要用免再抽分他撥仍隨時由
部切實行催各省關照數劃解毋任短缺貽誤
斯為大局之幸理合附片具陳伏乞

聖鑒訓示謹

奏

奏

奏

駐洋幼童勻撥經費摺 光緒三年九月十九日
奏為駐洋肄業幼童經費不敷請於南北洋海防
項下分年勻撥以期造就人才恭摺仰祈

聖鑒事竊臣鴻章前與原任大學士兩江督臣曾國
藩奏請挑選幼童赴美國肄業以求洋人擅長
之技而為中國自強之圖當經總理衙門核覆
奏准自同治十一年起至光緒元年止每年挑
選幼童三十名共合一百二十名分作四批按
年出洋肄業在案原議每批幼童駐洋十五年
每名每年束脩膏房租衣食等項銀四百兩

連委員繙譯教習薪水及其餘一切用費通計首尾二十年需銀一百二十萬兩在江海關六成洋稅項下按年匯寄應用有餘歸公不足補給上年原帶幼童出洋之太常寺卿陳蘭彬回華面稱幼童駐洋十五年通計每名每年銀四百兩殊不敷用接帶委員區諤良原派委員候補道容閔自洋續稟亦以為言臣鴻章飭令該委員等通盤籌算核實具報旋據區諤良容閔籌算稟復懇請添撥經臣葆楨咨請總理衙門核示接准覆稱此項經費應於何關添撥由臣

等斟酌奏明辦理等因查區諤良等節次來稟
美國稅增物貴束脩膏火屋租衣食各費倍於
從前幼童初到美時或入小書院或附人學館
用費尚省迨三四年後漸次考入中大書院及
技藝院軍政院船政院每院又各有班次等第
逐年循序而進學有淺深館有大小館與年而
俱異費亦與年而俱增計每批每名至第五年
約須加銀二百兩第七年以後約須加銀四百
兩等語察核所稟係因南北花旗戰爭後元氣
未復稅項頻加諸物昂貴一切用費增多本屬

實情原議經費係就以前華人在彼情形約畧
科算亦未能細考書院大小班次等第蓋遠隔
重洋事屬創始實難遙度懸定也此舉為造就
人才漸圖自強至計關係甚大據報頭二批學
生一二年間已有可進大書院之童即應專心
研求以裨實用斷無惜費中止之理惟庫款支
絀籌畫艱難不得不格外節省臣等再三咨詢
酌中核減每批第一年至第六年尚在中小書
院應仍照原奏每年每名銀四百兩由該員等
截長補短通融濟用第七八兩年每名每年應

添給銀二百兩第九十年每年應添給銀三百兩第十一年至第十五年照奏定章程學成游歷用費較廣每名每年應添給銀四百兩現有事故撤回幼童九名騰出原撥經費及減去繙譯每年薪水銀六百兩均應撥抵統計除原撥經費一百二十萬兩外先後九年約共應添撥銀二十八萬九千八百兩係分批按年乘除推算其間數目參差不一有每年應添撥一千二百兩者有每年應添撥四萬二百兩者應令江海關道俟定年分批數照章核明匯寄

仍飭該委員等摺節開支分晰造報如續有事
故撤回幼童即報明將原撥添撥經費隨時截
止查江海關六成洋稅解支不敷原撥經費已
巨勢難再令籌添此外各關均甚竭蹶無可指
撥因思幼童出洋肄習各項技藝原為洋務海
防備儲人材他日學成回華可資器使此項添
撥銀二十八萬九千餘兩自應於江海關四成
洋稅內之二成奉提南北洋海防經費內就近
按年勻撥分批搭匯在該關為有著之款而海
防亦分攤無多庶出洋幼童學業可成不至以

經費不敷淺嘗輒止且等往復咨商意見相同
除分咨總理各國事務衙門戶部暨福建督撫
臣知照外謹合詞繕摺具陳伏乞

皇太后

皇上聖鑒訓示謹

奏

籌議京城晉省運糶摺光緒三年九月二十一

奏為遵

旨酌籌京城晉省運糶事宜分別辦理恭摺仰祈

聖鑒事竊臣欽奉光緒三年九月十七日

寄諭翰林院編修何金壽奏請早籌鉅款購糧平糶

一摺本年山西各省被災甚重直隸屬境亦大半

災荒飢民來京者不少粒食維艱大為可慮何金

壽所陳儲糧平糶之法自為未雨綢繆惟需款甚

多斷非一時所能猝集該編修請飭籌借銀一百

萬兩分路購糧並各處設立糶運平糶等局是否

能行著李鴻章酌度情形妥速籌畫奏明辦理等
因欽此遵查本年直隸山西河南等省亢旱日
久其受災情形則以山西為最糧缺價昂亦惟
山西為甚而直隸近依

畿輔京城根本所關荒年民食維艱必須設法籌
備何金壽思患預防請籌款購糧平糶實為救
荒至計自來水旱災傷無不以平糶為先務是
以臣於八月初間即奏明籌款委員前赴奉天
采買惟該編修請由臣借撥庫款二三十萬再
借洋款數十萬共湊銀一百萬兩誠如

聖諭斷非一時所能猝集前經飭據津省司道湊撥銀十一萬兩今已另摺請提練餉錢約合銀十萬兩共二十一萬兩均為直屬購糧之需其已購運晉糧及現議購運京糧之款不在其內籌措實已不易若洋款商借甚難利息尤重自應無庸置議其擬由臣派員分赴上海奉天東昌熱河收買米糧於天津設立糶運總局於晉之太原平陽豫之開封懷慶各設平糶局派員經理並派員發運京城設局平糶殊覺局面過寬財力人力皆有未逮而事理亦有未盡協者東

昌一帶同是旱歉無糧可買熱河陸運較遠此時灤河已難行船該處現在采辦駐防等兵糧亦未可大批購運致妨沿邊民食應仍辦運奉省雜糧南省大米為便直屬糶賑尤以奉糧為宜至晉豫兩省應否一併由直運糧平糶則必體察情形核計糧價運費乃有把握臣前詢河南來津委員知該省雜糧時價小米市斗每石一百九十斤買價制錢六千三四百文約合銀四兩二錢零按官斗每石一百四十餘斤約合銀三兩二錢零高粱市斗每石一百八十斤買

價制錢四千四百文約合銀三兩按官斗每石一百三十餘斤約合銀二兩二錢零奉省小米以市斗合成官斗每石買價約銀二兩四錢高粱合官斗每石約銀一兩四錢是豫省時價每官石小米高粱均僅貴奉省價銀八錢零若由直購買分處設局運糶須加奉省海運至津河運至衛輝陸運至懷慶長途舟車之費采買運糶各處員役薪工之費水陸起卸及沿途護送之費統計每石約及銀一兩是已增於該省時價勢難再行減價平糶聞該省道口以下河

水淺不盈尺糧艘難行則陸運又不止二百餘里糜費更添殊不合算若由海運至山東利津口入大清河以達開封亦覺非便大清河即黃河海船並不能入民船逆流上駛又無緯路挽運極難淤灘甚多動虞擱淺臣前在山東勦捻曾由大清河運解軍火深知其難查豫省歸德陳州一帶歲收中稔鄰近之濟甯曹州潁州壽州等處亦俱有秋濟曹有黃河可通潁壽有淮河沙河可通就此數處購糧水陸運路較為便速省一分費用即可輕一分糶本庶貧民得霑

實惠臣前於轉運江北漕米摺內已大畧陳明
且撥給豫省賑款銀十二萬兩本係奉

旨由直代購賑糧李慶翱前已派員來津領去銀六
萬兩項又咨請將下餘銀兩一併給領可知該
省有糧可購無庸直隸代為經理矣山西災區
既廣毘連各省又皆歉收現准曾國荃函稱小
米市斗每石二百九十斤價銀十四兩六錢按
官斗每石合銀七兩三錢高粱市斗每石二百
四十斤價銀七兩三錢按官斗每石合銀四兩
一錢零是每官石小米較豫省貴至四兩零高

梁貴至一兩九錢而較奉省買價則小米貴至四兩九錢高粱貴至二兩七錢零雖由津購辦運路險遠需費甚鉅但該省舍此無可他求自應協力籌助業經飭據招商局道員朱其昂等節次籌款采辦米糧一萬八千石陸續船運一由清河至保定府一由運河至交河縣泊頭鎮均易車陸行至獲鹿縣由晉省派員在獲鹿設局接運至太原等處平糶現已辦有成效其該省平陽絳解蒲州等處距省西五六百里至千餘里中隔韓侯嶺甚形險阻該數屬產糧本少

向藉他處接濟今四面旱荒民食更缺糧價益
昂待糴尤急奏調來津之翰林院編修吳大澂
已勸捐集資購糧七十石即由衛河出豫之道
口登陸至清化鎮入山西澤州轉達平陽一帶
察看設局平糴仍招勸南中紳商續籌運濟吳
大澂實心利濟不憚煩勞曾任陝西學政平陽
一帶情形較熟必能有裨災區此直省已為山
西兩路籌辦運糴之大畧情形也京城為
輦輟重地首應足食現值畿南災歉糧少來路兵
民糴食維艱自應力籌兼顧臣商飭輪船招商

局道員朱其昂唐廷樞籌借資本赴南省趕緊
購買大米於封河前運津即由該員等於通州
設轉運局於京城相地設平糶局妥為試辦查
照市價酌量減值平糶俾奸商囤戶不得居奇
官弁兵民自行赴局糶買來春開河仍源源接
運以固根本現計封河期近深恐趕辦無多但
冀有米至京平糶使市價不過騰貴俟明年秋
成後察看情形再議截止此係市面公平交易
之事應責令該員等督飭司事妥為經理似無
須請派京員以免紛擾除將直屬糶撫事宜另

摺陳奏外所有酌籌京城外省平糶分別辦理
緣由理合恭摺由驛覆陳伏乞

皇太后

皇上聖鑒訓示謹

奏

整頓招商局事宜摺光緒三年十一月二十五日

奏為遵

旨籌畫整頓輪船招商局事宜並酌議變通辦法恭
摺覆陳仰祈

聖鑒事竊臣等承准軍機大臣字寄九月十八日奉
上諭御史董雋翰奏輪船招商局關係緊要急須整
頓一摺據稱該局每月虧銀五六萬兩因置船過
多載貨之資不敷經費用人太濫耗費日增等語
輪船招商原以收中國之利權必須有利無弊方
可以期久遠著李鴻章沈葆楨通盤籌畫於該局

經費權衡出入認真整頓毋得稍有虛糜嚴諭該局不得以辦公為名位置私人濫行收錄並飭令該商總和衷辦事勿騫虛名而鮮實濟等因欽此並將董雋翰原摺抄給臣等閱看適該局商總道員朱其昂唐廷樞等在津籌辦直晉賑糶糧石臣鴻章面加考究仍分飭津海關道黎兆棠署江海關道劉瑞芬密為查訪妥籌整頓之策茲據該道等分晰查明擬議章程前來臣等覆加察核如原奏置船過多一節查招商局開辦五年已自置輪船十二號迨收買旗昌洋行又

添大小輪船十八號旗昌船向走長江為多若無外人傾擠江面生意尚旺船隻不至間擱乃英商太古將裝貨噸銀大減一意傾跌局船攬載價亦隨減不敷船用以致間有停擱實迫於事勢之無可如何擬令該局逐加挑剔將旗昌輪船年久朽敝者或拆料存儲以備配修他船或量為變價歸還局本籍省停船看守之費惟勿任中外流氓售去減價相擠其現行各船內有附局帶管者歲收馬頭費無幾徒分局船攬載之貨除永甯洞庭二船已據報由局收買歸

入商股外其餘三船應全行辭去無庸帶管又
原奏用人太濫一節查該局專講貿易所用必
其所習與官場情形隔絕應由該商總等自行
選派以一事權臣等及各關道向無薦人之事
每遇載運漕糧時各省容有轉薦員紳臣屢飭
朱其昂等不可礙於情面濫行收錄現在各口
岸總分各局共二十七處需人必多在事皆各
有職守並無隔省官員挂名應支領薪水之
事又原奏該局每月須賠銀五六萬兩等語查
該局先後置買船棧等項計價銀四百二十餘

萬兩其中實本僅分領各省官帑一百九十萬有奇商股七十三萬零共銀二百六十餘萬兩尚短一百六十萬兩係以浮存挪借抵用計息不貲遂至左支右絀此由局本不足之故加以太古洋行跌價傾軋入不敷出然每年結算官利尚敷行勻給其暗中虧耗者只有輪船置價一項未曾按年折除並不得謂每月虧賠也又原奏各項費用嚴禁濫支隨時駁飭等語查該局進項以攬載水腳為大宗另有運漕耗米及帶貨二成免稅辦米盈餘應令此後如能將耗

米照章收足帶貨免稅按照稅則核計除貼還
貨主外尚餘幾成均歸入局中專款列收不得
併入水腳開銷其采辦漕米無論盈虧悉歸公
局一切巨細進款全登公帳記載分明不准遺
漏含混至出款約有三端一為船用凡在船人
役辛工等項每船月定額數修理工料行船用
物須有限制均在所收水腳內開支一為局用
總分各局司事人等辛資雜費須分別定額均
在所提每兩五分公費內開支倘有不敷不准
於公帳撥補仍將收支各數按年詳細開報一

為棧房船廠之用應在棧租內開支不敷再由局費提補外如購買船煤置備物業皆應搏節攬載客貨水腳向章每百兩給回用銀五兩不准濫加務歸一律即借用錢莊銀亦不可多糜重息以上出入各款均責成局員權衡緩急督同司事悉心經理勿任用人稍有浪費其帳目除局員商總隨時互相查核外並飭江海津海兩關道於每年結帳時就近分赴滬津各局認真清查如有隱冒據實稟請參賠以昭核實而免浮議凡此整頓之法已備極周詳惟念招商

局之設原以分洋商利權於

國家元氣中外大局實相維繫賴商為承辦尤賴
官為維持英商力與傾擠商股遂多觀望誠恐
虧耗既巨難以久支貽笑外人且墮其把持專
利之計臣等再四籌維祇得就現有之款為變
通之策前經各省借撥官帑倡率濟急取息僅
七八釐較商股一分利息尚少原議俟商股充
盈即行歸款現在商本未充生意淡薄官帑又
未便久稽該關道等與局員籌議擬請自光緒
三年起將直隸江蘇浙江江西湖北東海關等

歷年撥存該局官帑銀一百九十萬八千兩均予緩息三年俟光緒六年起緩利按本勻分五期每年繳還一期以紓商力每期計應繳官本銀三十八萬一千六百兩由商局預為籌定按原撥平色銀數先分赴各省關局具結存案屆時照繳無論如何為難不得再求展緩統計八年官本全清其緩收息款以後或作官股或陸續帶繳屆期察看情形再議至官商應甘苦與共前雖議定商股按年給息一分今官利既緩嗣後擬將每年應付一分息銀以一半給各商

收領一半存局作為續招股本亦按年計息以五釐給商五釐存局彌補缺本俟八年後局本補足息即全給衆商當尚樂從隨時招添新股一律辦理惟現計局本至一百六十萬之多船舊並未折算僅將官帑緩息八年商息留半抵本恐尚不敷補缺擬自光緒三年七月起按年截數其有盈餘銀兩暫緩派分全數留局作為公股照章一分起息其息全留作本俟八年期滿統計此項股本積息若干除酌提換購新船外再分派衆商均霑庶子母相權生生不已局

務亦維持於不敝所有保險局存本及新收局
船保險銀兩應併歸招商局統算無須作為浮
存照市付息亦無庸另提九五局用別立一局
以免盈絀懸殊如此分別秉公調劑冀得上不
虧

國下不病商根本既固久遠可期華商應聞風而
踴躍洋商或輸誠以議和臣等仍隨時嚴飭該
局員商總等恪遵

聖訓和衷辦事勿驚虛名而鮮實濟勿圖小利而誤
大局勿畏人言而思縮手勿執己見而昧機宜

惟以救濟時艱毋負委任為念自當日有起色
矣臣等往返函商意見相同除咨總理各國事
務衙門外謹合詞繕摺由驛四百里覆陳伏乞

皇太后

皇上聖鑒訓示再此摺係臣鴻章主稿合併聲明謹
奏

海運官物統歸商局片

光緒三年十一月二十五日

再臣等欽奉

寄諭董雋翰奏稱沿江沿海各口岸中國官商應需輪船運載貨物能否統歸該局攬載各省漕糧能否再予加成歸該局輪船載運並著該大臣等體察情形妥籌辦理等因欽此伏查輪船載多駛速以中國官商貨物交中國輪船承運本屬名正言順近來雲南解京銅筋四川辦運燈木江浙采辦官物直晉購運賑糧凡由海運者均歸招商局裝載華商貨物向准華船攬運固未便顯

設屬禁令其寄歸局船而商局分運商貨亦尚
不少應請嗣後沿江沿海各省遇有海運官物
應需輪船裝運者統歸局船照章承運若須在
不通商地方起卸由局移請海關繕給專照以
便關卡查驗而免洋商影射至承運各省漕糧
為商局命脈所係現在局船攬載商貨為洋船
擠跌動輒虧賠非多運漕糧以羨餘補不足萬
難持久查近年浙漕分撥較多蘇漕分撥較少
昨蒙

恩准江安漕糧明歲改由海運交招商局承運實為

公私兩益應請

旨勅下江蘇浙江督撫臣轉飭糧道嗣後蘇浙海運漕米須分四五成撥給招商局輪船承運不得短少餘歸沙船裝載以示體恤此外江西湖北采買漕米仍照案歸局船運津但祝年穀順成漕運有加

天庾既易充盈商局亦需微利無虞洋商擠軋保全實多理合附片覆陳伏乞

聖鑒訓示謹

奏

五
十
五

五
十
五

海防機局款難分撥摺 光緒四年三月十三日
奏為北洋海防經費天津機器局專款難再分撥
鄰賑京餉恭摺仰祈

聖鑒事竊 臣 欽奉光緒四年二月二十八三月初二
初三等日

寄諭庶子黃體芳奏請將海防經費製造機器之釐
稅酌留數萬其餘暫停一年以充京餉編修吳觀
禮奏請將海防經費查明實存若干移作賑需給
事中李宏謨奏請將各省協解輪船機器各局用
款暫提十分之五分解晉豫辦賑是否可行著酌

度妥籌等因欽此臣查黃體芳等所奏各節因為移緩就急起見然通盤籌畫其勢有不能偏廢者海防經費原議各省關每年額撥銀四百萬兩南洋現無存款其解歸北洋者自光緒元年七月起至四年二月底止將屆三年所收之數遠不及一年額撥之數除陸續支放海防本款銀八十萬餘兩去秋以來奉

旨撥給晉豫賑銀二十萬兩借給晉省賑銀十萬兩代購豫省賑糧借撥銀十二萬兩直省採買賑糧借撥銀十五萬兩招商局借撥京城平糶資

本銀六萬兩現又迭奉

諭旨擬遵撥河間開井工費銀四萬兩添購京糶雜糧資本銀數萬兩計各省賑務共已撥借銀七十餘萬兩雖借款或議由練餉制錢提還或議分年解繳但既挪動即少實存此項經費總理衙門與戶部

奏定章程專為辨防之需不准挪作他用原因海防關係重大經費籌畫艱難合之則可逐漸經營分之則斷不能集事是以

穆宗毅皇帝有亟應堅苦貞定歷久不懈以裕國家久

遠之圖之

諭我

皇上復有亟宜未雨綢繆以為自強及此項經費仍遵原奏專為海防要用毋得抽分他撥之

諭非不知和議已成我力可以稍息誠以洋務變故難言若無事時以為可緩一旦有事則已措手不及故

訓誡諄諄以防務為重而期其必成也今以賑需緊急先後撥借銀至七十餘萬兩不為不多分濟晉豫至四十餘萬兩不為不力現僅存銀一百四

十餘萬兩雖不足以辦防而事關軍國至計備儲緩急實不可少且即以直省灾荒而論自上年四月至今迄無透雨東作難施流亡載道前者尚可擇人而撫今則次貧亦成極貧前者尚有司道庫款可提今則羅掘罄盡去冬及本年上半年上忙丁糧迭請蠲緩收數無幾以之供應

陵工俸餉旂綠各營兵餉及一切年例支款不敷甚鉅而灾重之河間一府約有戶口二百餘萬此外各屬尚復不少春賑雖竭力籌辦倘夏秋仍應接濟需款奚止百萬直省為

畿輔重地值此旱荒多事豈能毫無所備臣深知
部庫未充迭蒙

恩撥晉豫賑款而直省未敢籲請東南各省皆有應
解京協餉及捐借晉豫賑款直省亦未敢求助
但恃海防經費稍有積存可備意外急需若於
已撥晉豫賑款外再議分撥不但無大裨補於
晉豫而先使

畿輔根本之地空諸所有設遇事變何以支持臣
久在軍營每見時會艱難糧台存餉數百萬吐
嗟立盡今此區區存款必欲全數借撥者似由

更事太少慮患未深殊非老成謀

國之道亦顯與厯次

諭旨相違此海防經費不能再撥之實情也天津自同治五年奏設機器局僱匠購器製造軍火所需經費惟指津海東海兩關四成洋稅為專款今欲停減製造其難約有數端該局造成洋火藥銅帽拉火後門鎗砲子彈等項除本省淮練各營及調防他省各軍濟用外如熱河察哈爾奉天吉林黑龍江等省征防各軍皆取給於此江南防軍並須歲撥火藥二三十萬磅銅帽千餘

萬顆所造恆不敷所用前將本省各營鎗砲操
法分別忙月閒月定額給領以期節省子藥今
已無可再減其外省尚以領數為不足屢次請
益或預期咨領亦屬無從減裁若停造一年憑
何供應若減造五成斷不敷用况北省伏莽甚
多匪徒乘飢思逞時需分投防剿設軍火無措
必致貽誤大局其難一該局所僱華匠皆自香
港等洋廠募來幾經督率殫求西法始能集事
若減停製造量予半價在彼不足自贍勢仍散
歸洋廠其學徒亦選練多年手藝已熟一旦遣

散必就他圖前功盡棄將來再募又費經營洋匠則有合同年限不論工作有無仍須照給薪費况製造之理百人所造者視五十人成數多三四倍即如製藥一項初設一碾廠用三四十人迨添四碾廠通工祇用七八十人而出藥已多數倍倘工作僅留其半所出軍火不過現在十之三四尤不合算其難二該局承辦之事不僅製造軍火如駐巡北洋之鎮海操江輪船需煤需料修船修器皆由該局承應運直晉賑糧之福建江南輪船運江浙漕糧之商局輪船一

有損壞亦由該局撥工撥料星夜修辦此外如
挖河機器船等類應隨時整理者不少若停辦
一年各項皆將坐廢若減去五成顧此必致失
彼其難三且津海東海兩關四成洋稅近年收
數短絀連招商局輪船四成稅銀併計歲不過
十五六萬而應撥各路軍火增多局用日形竭
蹙海關六十九結以前四成稅早經告罄現計
定購外洋料物應付價銀三萬數千兩及其餘
逐月用款尚多懸欠暫由海防項下通融勻借
是以寅食卯糧無可提取此製造難以停減及

經費不能分撥之實情也至修築砲台購買船
械等項本因經費支絀未及多辦不過擇要略
事經營實無稍涉鋪張糜費之處臣仍當督飭
局員事事核實搏節以昭慎重除滬局製造能
否停減由沈葆楨等奏辦外所有北洋海防經
費天津機器局專款難再分撥緣由理合據實
恭摺覆陳伏乞

皇太后

皇上聖鑒訓示謹

奏

查覆滹沱河工難辦摺 光緒四年四月初八日
奏為滹沱河工程艱鉅鹽務無款可籌勢難興辦
恭摺仰祈

聖鑒事竊 臣 欽奉光緒四年二月初八日

寄諭御史劉恩溥奏請籌濟直隸河道以工代賑暨
鹽勛加價提作商捐以治河道及由運庫墊款興
工各摺片所稱修理河道宜先治滹沱河請闢治
河以分水壑塞改道以復故瀆治子牙河黑龍港
河以疏下游既可以工代賑亦免頻年水患新准
鹽商二文加價提作商捐歸公辦賑於水利鹽務

工賑均有裨益加價如何捐繳令各商平議款項
未能遽集先由運庫墊發興工是否可行著李鴻
章酌度情形奏明辦理等因欽此伏查直隸通省
七十餘河大者有五滹沱河居其一源出山西
繁峙縣入直隸平山縣境會冶河經藁城等縣
下會滏陽河至獻縣子牙河達津入海其至平
山以下正當出山之後迅流急湍挾沙壅泥易
淤善徙向無隄防修守藁城東鹿深冀一帶南
北縱橫皆其故道然總以滏陽為達海之路同
治七年由藁城改道北徙遂不與滏陽相通因

漫及沿河藁城晉州無極深澤安平饒陽獻縣
 肅甯河間任邱雄縣保定等處地面祁州博野
 蠡縣高陽東鹿深州亦有毘連之區而下游文
 安大城水無出路被淹尤甚滏陽河舟楫艱阻
 鹽貨難行臣迭經詳查委勘擬闢治河復故瀆
 以澹沈災而工程殊無把握按漢書地理志上
 艾縣注綿蔓水東至蒲吾入虜池綿蔓即治水
 蒲吾即平山虜池即滹沱是治水本有入滹沱
 之路非元初鑿而始合又元史河渠志至元三
 十年正定路請闢治河越三年為元貞元年興

工越十四年為至大元年治河口淤塞復入滹
沱嗣後旋關旋淤我

朝雍正三年怡賢親王雖有塞治不使入滹之奏
並未施工是元代即已仍舊會流非近時始合
為一凡治水必以地勢高下順逆為衡據勘舊
治河底高於現行之河水面數丈低昂相去懸
遠勢難逆挽而行而治河口至入滹沱十里之
間則上高於下數丈水性就下自然奔入滹沱
恐非壩工所能抵禦且舊治河須會汶河入甯
晉泊今泊已淤墊亦不能容巨水其河身二百

里間之淺隘更無論矣此闢冶河之難也藁城
滹沱河據勘前年盛漲之際走溜河槽寬至七
百二十丈深至一丈一尺五寸而同治七年以
前故道現在至寬不過三十五丈窄者僅二丈
至深不過七尺淺者僅一尺其間淤成平地者
不少河頭高於現行河底一丈一尺有奇通工
二百里無從挖起曾國藩前有挽復咸豐元年
以前邵村故道之議里數不甚相懸間有寬深
之處當時委員僅擬挑河寬十餘丈至二十丈
深數尺至一丈連壩工已估需銀二十餘萬兩

旋以無款中止此時非再加寬深不能掣引大溜而博訪衆論謂該河剝悍激烈遷徙靡定自來不受約束隄防愈堅衝決愈甚其下又有伏流往往水尚未至土已迸裂立壩於伏流之上勢難久峙挑築亦屬徒勞此復故瀆之難也舍此二者別無善全之策况直省向係缺額加以連年灾歉庫儲空虛商民交困實無財力議興大工近歲量就賑款勻撥以工代撫僅於河獻文大等處開挖引河修築堤埝俾出路稍暢旁引民田略可攔護並酌修子牙河隄議疏黑龍

港以為逐漸經營之計直隸河務廢弛已久五大河中之永定河大清河北運河南運河率多淤淺坍塌皆關民生利害又不能不並顧兼籌隨時設法補救且奉撥賑款本以分給災區其應賑者非盡沿河之民勢不能趨集一隅皆令供此一役也今劉恩溥擬提蘆鹽加價二文以充漕沱工費若果易於攤繳能集巨款正可設法圖維冀紓水患其請勻引酌劑嚴申融銷代銷等禁於鹽務情形尚多隔膜查豫省蘆岸加價係彌補榮工經費按年解部無可再提直岸

所加之二文本因商累過深暫資體恤蓋自道光年間清查以後前商虧空課帑數千百萬皆責現商捐攤交款加重連年災歉灘鹽歉收諸物昂貴成本倍增上年直豫大旱河運不通硝鹽徧地窮民死亡相繼銷數大減有僅銷額引一二成者甚有停秤者直屬近年出庫引止二十餘萬道其領引未運及運而未銷者亦在其內若今年春運直豫各岸現僅過關鹽一萬七千餘包原奏謂歲銷六十五萬引但就應領額數而言尚未知實領實銷之數且實銷之鹽亦

有不盡能加價者一則百姓貪賤食私官鹽貴則銷愈滯一則累商鹽至引岸諸債蝟集往往減價求售故商民尚不至因加價結怨也康熙年間長蘆額引九十餘萬道每包鹽重二百五十觔納課銀四錢有奇然雍正二年巡鹽御史莽鵠立奏言每屆奏銷已有積存未領引二三十萬道嗣後鹽與課逐漸增加至道光時每包鹽重至五百數十斤課帑至一兩以上其雜攤各款尚不在內今雖減至六十餘萬道實則中稔之年只能銷至四十餘萬道引滯則課須包

賠是以愈久愈疲殷商家寥寥又值奇荒之歲運
售尤艱無論殷商累商皆須虧本臣與運司通
盤籌酌尚須量議調劑實難再提加價運庫因
湊解上年京協各餉羅掘一空更無從籌墊工
費至融銷代銷載在鹽法志及奏定章程本無
例所不禁緣各處鹽引皆有定額不准互相增
減其銷滯者祇許暫將引目勻給暢岸之商領
運銷賣津貼運商銀三四五錢不等課帑均歸
運商完納是為代銷若鹽已築成勻給暢岸之
商銷賣原商可得成本以完課帑是謂融銷融

代者乃不得已酌劑之法必由運司查核明確
詳請立案並非任商自為若統計各岸銷數先
由官為勻濟微特孰暢孰滯應以年歲豐歉為
憑不能先時預定近且十岸九滯直豫額引出
庫者不及四十萬道則下餘之二十餘萬道又
從何處濟銷惟期此後暘雨應時人民復業銷
數漸暢商力漸紓仍隨時督飭運司察酌籌維
嚴查私相融代借名侵灌及夾帶攬和等弊以
期保全課本所有查明滹沱河工程艱鉅鹽務
無款可籌勢難興辦各緣由理合恭摺覆陳伏

乞

皇太后

皇上聖鑒訓示謹

奏

外國捐賑請嘉獎片光緒四年五月十六日

再臣鈔奉光緒四年四月初六日

寄諭巫來由國王捐銀千圓該國向無與中國交涉
事件應如何辦理之處著斟酌妥辦香港駐埠之
英國總督燕軒尼士的翰捐賑銀五千圓亦屬好
義應否酬答並著該督等酌度具奏等因又奉四

月二十四日

寄諭前據總理衙門王大臣面奏日本入捐助山西
賑糧當以轉運艱難力為勸阻嗣據李鴻章函致
該衙門米已運至天津等情外國捐銀米助賑名

為善舉實則流弊滋多茲據瞿鴻禨奏英人攜銀
前往晉豫散賑即著曾國荃涂宗瀛婉為開導設
法勸阻至販賣婦女出洋本干例禁著督飭地方
官實力稽查嚴行禁止倘有奸民漁利轉販即查
拏照例懲辦等因欽此伏查自同治十年天津水
災之後外國官商間有助賑助銀為數尚不甚
多光緒元年山東青州等屬旱災各口流寓洋
人捐集銀數萬兩由英國教士李提摩太帶往
散賑辦理頗協輿情上年晉豫災旱迭據駐津
英領事佛禮賜函報西國人已集有銀五萬餘

兩助賑晉省飢民仍請李提摩太前往會同該
地方官紳查戶散放業據三次解送銀四萬兩
因係善舉未便勸阻節經臣分咨總理衙門及
山西撫臣在案嗣准曾國荃函稱該教士等在
晉查放尚屬妥協日本使臣森有禮過津談及
該國商民捐助晉省賑糧臣告以山西道遠費
重轉運維艱不如就近搭放津郡粥廠飢民該
使亦以為然旋據日本善士竹添進一運到大
米四千五百四十餘石小麥一千七百餘石又
大錢一千串當交粥廠各委員妥為經理搭放

臣並面屬森有禮回國便為道謝矣臣訪聞西
洋通商有約各國遇有水旱灾荒互相捐助賑
濟乃交際之常情尚有古人患難相恤之誼現
因北省奇灾各國官商捐銀捐米助賑無非感
慕

聖主懷柔之德樂効輸將並無他意似亦無甚流弊
據津海關稅務司德瑾琳面稱西國遇有此等
美舉該國王及外務衙門必向捐賑之國使行
文稱謝無須另議酬答項招商局道員唐廷樞
等稟稱接據新加坡領事胡璇澤函稱駐新加

坡之英總督亦捐洋銀五千圓又巫來由國王所捐洋銀可否請給樂善好施匾額等情臣查香港新加坡之英國提督各捐巨款應由臣與丁日昌分函致謝巫來由國王雖向無交涉既經捐銀助賑可否由臣繕給樂善好施匾額傳旨飭寄祇領伏候

命下遵行英國倫敦商民迭捐巨貲除已由駐英使臣郭嵩燾致謝外可否

敕下總理衙門王大臣函致該國駐京使臣傳旨嘉獎以慰遠人慕化之誠至瞿鴻禨稱該國收

買流民婦女臣督同署津海關道丁壽昌密確
查察實無其事天津各粥廠流民七萬餘人婦
女居其大半容有中國奸民轉販者隨時訪拏
嚴懲此風近已稍息並未聞洋船販帶婦女遠
出之事所有各國捐助銀米酌量酬答並查拏
轉販流民婦女各緣由理合附片詳細復陳伏
乞

聖鑒訓示謹

奏

購製軍火畫一辦法摺 光緒四年七月初二日
奏為購製外洋軍火遵議畫一辦法並議報銷口
令各事宜恭摺覆陳仰祈

聖鑒事竊臣等承准軍機大臣字寄光緒四年二月
十四日奉

上諭總理各國事務衙門奏購製外洋軍火請飭妥
議畫一辦法一摺外洋鎗砲名目甚多必須擇其
最精之品一律核實購辦現在各省所購多不一
律即一省亦不一律無論良楛雜收未必皆為利
器而各省不能通用設遇有事誠恐受累且委員

每視為利藪以劣充良不復認真挑選虛耗鉅款
著專派精明廉正之員總司其事凡各省委購軍
火責成該專派委員核定倘有不堪施用及浮冒
開銷等弊即將該員與承辦之員分別勒追治罪
其應如何遴員並各省如何統歸一律著李鴻章
沈葆楨會商妥議奏明辦理至上海天津設立機
器局應否於兩局內遴派得力專員統令隨時酌
核畫一辦理著該大臣等一併妥議籌辦該局用
款奏銷嗣後並著將每年每款需費若干逐細登
明每年成造各件暨撥用存留各數目亦即按件

造報以昭核實另片奏洋鎗隊口號改用中國語
言著該大臣等選派精通洋語之人將教練口號
全用中國語言文字譯成一書其教法為語言所
不能傳者並繪圖輔之頒發各軍營俾將弁等隨
時觀聽人皆通曉期於防務有裨等因欽此仰見
朝廷慎重海防實事求是至意欽悚莫名臣等公同
籌議竊謂鎗砲為制敵利器必須精良畫一各
省各營皆能通用庶免臨事窒礙從前軍務孔
亟利在應急隨購隨用無暇通籌迨同治四年
間始設機器局仿造外洋軍火近年直隸江南

籌辦海防所用鎗砲又定造於外國著名之廠
寬以時日俾期堅精茲奉

諭旨飭籌畫一辦法臣等謹將外洋鎗砲製造之法
施用之宜先陳其略查砲位一項德國全用後
膛英國全用前膛俄法則小砲多後膛大砲多
前膛美國仍用老式滑膛其中著名商廠德曰
克鹿卜專造後膛全鋼之砲英曰阿勿士莊專
造前膛熟鐵包鋼之砲又有瓦瓦司廠兼造前
膛後膛以鋼包鋼之砲論攻堅致遠前膛不若
後膛論穩固經久後膛不若前膛故行仗小砲

宜用後膛取其輕而及遠輪船砲台所用大砲
究以前膛為宜此洋砲之大略也洋鎗一項自
有後門鎗式而前門之鎗洋人幾不過問其最
著名者英曰馬梯尼美曰林明敦德曰茅塞法
曰沙賽卜近有沙布一種亦出美國皆屬後門
並為各國推重究之命中致遠後門雖倍勝於
前門而前門子藥可以取辦臨時事易工省後
門鎗子必須造以機器工費既鉅猝辦尤難子
藥不繼即成棄物現就大勢而論海防若有戰
事非後門最精之鎗弗能制勝若平時操練除

後門鎗隊演習有年應仍其舊此外暫宜操以前門俾習手法而期節省此洋鎗之大略也目下中國力圖自強軍火利器貴一貴精洵為確切不易之論上海一隅洋商匯萃日趨巧猾往往式樣雜出以劣充良各省采辦人員或受其欺或中其餌均所難保茲欲遴派精明廉正之員專任稽查採購未始非執簡馭繁之一策惟專派之員身居中土於外洋造法之新陳時價之長落未必纖悉週知近日洋商每有逕赴各省議價攬購者更屬無從節制委員權力有限

辦理慮難經久伏查上年候選道李鳳苞帶領
福州船政學徒赴英法兩國練習臣鴻章曾令
其訪求新出最精洋鎗擬與閩省酌量合購去
冬接該道函稱法國水師於今春比試各國後
門鎗式俟比試後擇最精者寄回察看茲擬併
飭該道親歷各廠確查前後膛大小砲之最精
者擇尤開報並將圖樣價單寄閱俟核明定式
隨時分咨總理衙門暨各省遇有購用即令該
道照式在洋議購匯款定造一手經理上海地
方祇須派員設局專司匯寄價銀驗收轉運等

事如閩粵兩省無庸取道上海者即自行匯價
驗收李鳳苞精細廉正近於軍械一道刻意講
求其不時分赴各國照料學徒以之兼辦軍火
勢固甚便他日該道回華另飭別員接辦與從
前無人出洋限於耳目者難易懸殊倘或辦理
貽誤自可執法從事此議購軍火之畫一辦法
也獨是軍火固貴一律而目前所有者如何酌
劑異日續添者如何儲積尤須全局通籌始足
備緩急而圖久遠即以直隸江南計之除外洋
老式鎗砲外近年所購新式前膛後膛大小洋

砲不下四百五六十尊所購所製之新式後門
洋鎗不下二萬數千桿此皆得用利器為向來
各省軍營所未有費款數百萬用心十餘年始
能積有成數前項砲位業經分撥砲台輪船及
海防各營果能加意珍惜自堪久而不敝前項
鎗枝各營領操者十之七積存備撥者十之三
現擬已發之前後門洋鎗照舊留營操演將來
續購畫一新鎗祇可存俟臨事應用惟子彈一
項實鎗砲之命脈無子彈則鎗砲虛設後門子
彈工繁費鉅遇有戰事十年之蓄尚恐不敷數

月之需現查津滬兩機器局所製子彈數非不多而以之應操則有餘以之備戰則尚少亟應及時設法添製以防未然兩局製造之事向來互相考較亦互相撥用聲息素通以後每成軍火祇宜抽送臣等查驗嚴定等差力求精進似無庸另派專員監察致涉紛擾此外江甯機器局係臣鴻章勦捻時添設亦與津滬兩局通力合作其山東湖南四川等省現既設局所製之器並應彼此互證以泯各師各式之偏以聯各省各軍之氣嗣後考定西洋最精鎗砲陸續酌

購必須兼購造子機器豫籌造子經費其前項
已有之新式鎗砲多年積累費款極鉅大約將
來續購者亦不出南北洋現有各種之內自宜
照舊兼用庶幾緩急足恃此議製軍火及豫籌
全局之辦法也至機器局歲銷用款一節津局
向製火藥銅帽水雷士乃得後門鎗及後門鎗
子前膛後膛砲子滬局向製輪船火藥前膛洋
砲後門洋鎗及後門鎗子前膛後膛砲子近因
養船經費歲耗二成洋稅之半暫議停造輪船
增造熟鐵包鋼大砲此兩局者目下製器甚繁

而子藥為軍火大宗尤須全力辦理蓋就現有之鎗砲籌應用之子彈核之外洋購價已需數百萬金鉅款固難驟籌亦斷無仰給外人之理祇得就已設之局額領之款分年趕造免致另行請撥貽誤要需兩局向領洋稅銀兩皆擇妥員經理毫無虛糜實用實銷開單奏報仍分別軍火船隻機器等門逐項開列茲若將每年每款需費若干逐細造冊報部有同一工料而先後時價不同有製一器件而彼此精粗互異或先後成毀幾經更易工費多少不等徒啟吏胥

挑較需索之端他日非勉強牽湊分灑勻攤變成例價不止名似核實轉滋流弊似不若慎選精細廉正者總司局務由臣等隨時切實考較仍照舊開單奏銷以歸簡易其每年成造若干撥用若干存留若干自可按件詳晰聲明至鎗砲隊口令一節前門鎗砲與後門鎗砲陣式口令大致相同而鎗砲用法彼此互異其前門鎗砲口令陣法已經前江蘇撫臣丁日昌於同治十年用漢文譯刻成書有圖有說上海機器局譯刻克鹿卜後膛砲法天津軍械所譯刻克鹿

卜小砲簡本操法均已印發各營令將弁兵勇
日事講習其已譯未刻之德國砲隊馬標法及
續譯各書應飭令各營各局人員隨時擇要妥
細辦理俾將弁人等於外洋兵法用器一律通
曉以昭慎密而利軍行以上各節臣等往返函
商意見相同謹合詞恭摺由驛覆陳伏乞

皇太后

皇上聖鑒訓示謹

奏

淮軍裁勇就餉摺光緒四年八月初六日

奏為留防淮勇軍需日形短絀通盤籌畫迭飭各
軍酌裁勇數以就餉項而顧防務恭摺具陳仰
祈

聖鑒事竊於本年五月內准兵部咨會同戶部議奏
各省留防勇丁均應酌量裁減請

旨飭下各該省督撫通盤籌畫悉心稽核總期省一
分軍餉即紓一分民力統限於文到一月內迅
將所有防勇陸續裁汰以半年為限統裁十成
之一將來報銷時戶部即照此次所定限期減

成核算其裁存勇數若干月需餉銀若干均令於此次裁定後分晰專摺奏明以備查核至此後應如何續裁之處仍令隨時相機辦理等因具奏奉

旨依議欽此臣查直隸提鎮各標練軍本係經制之兵抽練成隊或分防要地或調駐庫倫奉天各處實屬無從裁減自可無庸置議其留防淮軍水陸馬步勇丁截至上年十月底止實存七十八營十二哨有零分紮直隸山東江蘇等省籌辦海防江防各營月餉專恃蘇滬釐金淮南鹽

釐及江海江漢兩關洋稅為大宗川鄂浙江等省協餉次之前因餉源枯竭各處額撥餉款未能按月照解已於未准部文之先自上年十一月及本年三月兩次通飭洋鎗步隊各營每棚抽裁正勇二成計共裁減五千二百餘名已不止如部議統裁十成之一正在具奏間接准部咨臣復悉心稽核本年各處額撥月餉較前尤為短絀刻已八月中旬蘇滬釐金四月分額餉尚未解清各局鹽釐分解無幾各關六成洋稅又懸而無着在各該省竭蹶輸將而收數日少

撥款日增加以晉豫旱荒協撥賑需及改撥京
餉迫不容緩遂致額撥淮餉遷延套搭積欠愈
多淮軍分防南北數省擇要扼紮兵分則力單
餉絀則用匱實有支持不下之勢臣治軍幾三
十年兵餉兼籌困苦艱難久經身親其境非不
欲裁營節餉早圖歸宿無如中原軍務雖清海
防關係重大未可過於空虛緩急無備諒在
聖明洞鑒之中部臣內外兼籌亦應計慮及此現臣
所部除馬隊水師各營人數本少及駐紮上海
吳淞之武毅右軍五營專守海口砲台均難裁

減外即勇數稍多者如盛軍鎗砲步隊十六營
駐紮津郡新城附近扼守北洋門戶拱衛

畿疆兼於海灘荒地試辦屯墾武毅慶字兩軍洋
鎗步隊二十一營分紮江蘇之江陰靖江江甯
浦口等處護守沿江南北兩岸砲台銘軍鎗砲
步隊十四營駐紮山東張秋鎮為南北洋海防
策應之師以上各營若僅操練巡防彈壓地方
未見其少設遇有事之秋仍屬不敷分布且自
籌辦海防以來臣飭各軍換用後門鎗添練砲
隊仿照泰西陣式操法精益求精各將領目擊

時難尚能堅苦經營歷久不懈原期未雨綢繆
力圖自強之計亦未便遽議裁汰惟刻下餉源
異常支絀無論如何撙節實屬不敷周轉若不
通盤籌畫量入為出誠恐將士枵腹荷戈因飢
譁潰為患更甚又不得不權衡輕重酌籌變通
辦法今擬於盛軍鎗隊內酌裁五營銘軍鎗隊
內酌裁四營武毅軍鎗隊內酌裁三營慶軍鎗
隊內酌裁二營共裁十四營從本年九月分起
籌給欠餉分飭各統將陸續資遣合之先裁二
成正勇共計減去一萬一千八百餘人每年約

省餉銀六十餘萬兩至現留淮勇二萬八千九百餘名兼顧南北數省防務地段太廣兵力極單以目下情形計之似難續議遣撤然每月仍需餉銀二十餘萬兩江蘇湖北川浙等省額撥淮軍的餉必須查照上年撥解之數按月源源解濟不得再有絲毫遞減短缺庶可拯飢軍而維大局所有淮勇軍需短絀現籌裁兵就餉緣由謹繕摺具陳伏乞

皇太后

皇上聖鑒訓示謹

奏

李鳳苞兼管學生采辦等事片

再准總理各國事務衙門咨稱欽奉

上諭候選道李鳳苞著賞加二品頂戴署理德國欽
差大臣等因欽此竊查道員李鳳苞經臣等於光
緒二年十一月奏派監督帶領閩廠生徒赴英
法兩國學習水師製造駕駛之法並令兼查前
赴德國學藝武弁本年七月間又經臣等奏派
李鳳苞就近在外洋采辦軍火原因李鳳苞練
達勤能才大心細不致貽誤該員出洋兩年以
來周歷英法德三國逐事留意考究迭次函報

經辦學生習藝諸務甚有條理現既奉

命署理出使德國大臣計必迅赴伯靈都城接任所
有臣前派往德國學藝之武弁七人業由李鳳
苞察看將不甚得力之卞長勝朱耀彩於本年
三月撤回現在該國軍營僅有五人均距德京
切近自應仍由李鳳苞督查功課其閩廠派赴
英法學生係責成李鳳苞會同洋監督日意格
經理目下布置就緒學藝亦有進益實難遽易
生手聞由德往英法輪車輪船不過一日夜可
到李鳳苞情形既熟但派得力幫辦一二人分

駐照料遇有要事仍可抽暇親往商辦來回不
過數日似於使事無礙至該員署理公使應自
接任之日起照章支領公使薪俸其監督學生
新費自無庸由閩另支嗣後所用幫辦薪水及
來往查察雜費仍准酌量核實開支由該大臣
隨時移會船政大臣查核至採購外洋軍火一
節駐洋使臣本應與聞其事李鳳苞曾在各處
實力探討頗知奧妙德國軍器甚精臣等近年
購用不少自無難就近察訪即英法各工廠聲
息易通亦可隨時考較妥商辦理將來曾紀澤

出使英法該大臣於軍事素有閱歷閩廠學生
及採購軍火各事更應互相考察遇事商籌以
助李鳳苞之不逮所有擬令李鳳苞暫行兼管
學生采辦各緣由除分咨查照外謹會同南洋
通商大臣兩江督臣沈葆楨閩浙督臣何璟船
政大臣署福建撫臣吳贊誠合詞附片具陳伏
乞

聖鑒訓示謹

奏

韓超請 宣付史館摺

奏為已故在籍大員功績卓著懇

恩宣付史館立傳恭摺仰祈

聖鑒事竊照前署貴州撫臣韓超於光緒四年四月初二日在昌黎縣原籍病故據伊孫生員韓方炳繕具遺摺到臣求為代遞伏查韓超於道光二十二年由副貢生就職州判揀發赴黔積功擢至道員咸豐十一年十一月奉

旨賞給二品頂戴署理貴州巡撫其初為原任湖北撫臣胡林翼所知謂其沈勇慷慨雄心遠略可為

名將可為良吏嘗從胡林翼擊粵賊於懷遠平
烏沙苗於九萬寨擒獨山土匪楊元保所向有
功桐梓賊楊瀉之圍遵義也滇黔兵壓城下者
數十營久未得間韓超馳至冒雨疾戰立解城
圍進攻雷台山賊巢破之楊瀉潰走晝夜窮追
卒殲之於苟章司厥功甚偉黔中自咸豐六年
後上下游州縣大半淪陷思州以北及石阡銅
仁思南諸郡為教匪鎮遠以南及黎平都勻諸
郡為苗匪韓超以孤軍擋拄其間使賊不得合
併遏其由撫下沉之路遮蔽湖南不至如粵匪

之蔓延為害則又超之功也韓超賦性剛直忍
苦習勞在官在軍儉約刻厲有非尋常將吏所
能堪者在黔近二十年大小六百餘戰往往當
賊衆數十萬糧盡援絕之時左右死傷略盡而
喋血鏖鬪卒以復振胡林翼疏請假以事權前
湖南撫臣駱秉章亦言其廉樸耐苦能得民苗
之心為之籌濟月餉其在署巡撫任內適值餉
源匱絀兵士飢疲馭悍將任良吏擊走粵逆石
達開大股攻克尚大坪玉華山兩賊巢肅清大
定安順遵義思南銅仁諸郡其勞苦功高黔中

人士至今稱道弗衰查黔省被兵最久自胡林翼首倡練勇擊賊稍能自立及其奉調赴楚黔事益艱而尚能支撐十餘年俟粵逆蕩平移師援勦以至底定者皆文武諸臣力戰之功如提督孝順趙德光按察使福興及韓超其最著者而超在事尤久茲以老病歿於牖下合無仰懇天恩准將前署貴州撫臣韓超生平戰蹟宣付史館立傳以彰蓋績出自

逾格恩施除將韓超遺摺附遞外理合恭摺具

奏伏乞

皇太后

皇上聖鑒訓示謹

奏

密勸朝鮮通商西國摺光緒五年七月二十八日

奏為遵

旨繕函密勸朝鮮與泰西各國立約通商鈔稿進呈

恭摺仰祈

聖鑒事竊臣承准軍機大臣密寄七月初四日奉

上諭總理各國事務衙門奏泰西各國欲與朝鮮通
商事關大局縷晰密陳等語日本朝鮮積不相能
將來日本恃其詐力逞志朝鮮西洋各國羣起而
謀其後皆在意計之中各國既欲與朝鮮通商倘
藉此通好修約庶幾可以息事俾無意外之虞惟

該國政教禁令亦難強以所不欲朝廷不便以此
意明示朝鮮而顧念藩封又不能置之不問據該
衙門奏李鴻章與朝鮮使臣李裕元曾經通信畧
及交鄰之意自可乘機婉為開導在該督必不肯
輕與藩服使臣往來通問而大局所關亦當權衡
輕重著李鴻章查照本年五月間丁日昌所陳各
節作為該督之意轉致朝鮮俾得未雨綢繆潛弭
外患等因欽此仰見

聖謨廣運眷念東藩指示機宜無微不至欽佩莫名
伏惟朝鮮孤峙海隅向不願與遠人交接英法

美諸國屢為所拒前歲日本脅以兵威始與立約通商猜疑未泯積有違言日本知其孤立無援倘一旦伺隙思逞俄人亦將隱啟雄圖英德法美諸國復羣起而議其後非惟朝鮮之大患抑亦中國之隱憂本年五月間前福建撫臣丁日昌所陳各節為朝鮮計實為中國計惟朝鮮地僻俗儉囿於風氣彼於近日海外情形茫乎未有所聞見日本最與相近交涉數年尚多隔闕若驟語以遠交之利恐彼國君臣成見未融勢難相強此臣所以久欲設法而不能不躊躇

審顧者也至朝鮮原任太師李裕元自光緒元
年秋奉使來京是冬十二月間事竣回國道出
永平囑該知府游智開轉寄一函道其仰慕臣
以古者鄰國相交其卿大夫不廢贈答之禮矧
朝鮮久列藩服誼同一家現值時事多艱臣職
在通商既不能不廣示牢籠稍通遐邇之氣復
不能不代為籌畫俾免杌隉之虞因於復書畧
著外交微旨嗣後間歲每一通函於備禦俄人
應付日本之方常為道及本年春間李裕元來
書頗陳日本非禮侵侮臣尚未及裁答適蒙

聖慈垂訓頃已專泐覆函作為微臣之意反覆開導
加封遞至

盛京將軍衙門請兼署將軍臣歧元妥速轉遞查
李裕元現雖致任據稱係其國王之叔久任元
輔尚得主持大政亦頗曉暢時務如能因此廣
諮博議未雨綢繆庶於大局有裨惟泰西各國
立約如傳教內地及販運鴉片煙入境為該國
上下所深惡恐其因此疑畏是以書中豫為剖
晰俾毋過慮將來朝鮮若果定議事務正多該
國於約章利病素未深究立約之時或不能不

代為參酌朝鮮臣民未諳洋情驟與西人雜處
欲其措注悉協永無瑕衅亦尚難保仍應由中
國隨時隨事妥為調處庶幾柔遠綏邊較有實
際除俟接李裕元覆書再行陳奏外謹將此次
來往函稿鈔呈

御覽所有遵

旨繕函密勸朝鮮與泰西各國立約通商緣由恭摺
由驛密陳伏乞

皇太后

皇上聖鑒訓示謹 奏

籌議交收伊犁事宜摺光緒五年十月初五日
奏為遵

旨籌議交收伊犁事宜恭摺密陳仰祈

聖鑒事竊臣承准軍機大臣密寄八月二十三日奉
上諭總理各國事務衙門奏籌辦交收伊犁事宜請
飭疆臣覆議一摺據稱連接崇厚電報內稱約章
皆定議畫押並將現議條約十八款摘要知照償
費一節尚不過多通商則事多轉輾分界則弊難
枚舉亟宜籌畫布置迅圖補救各等語崇厚出使
俄國固以索還伊犁為重而界務商務關係國家

大局者自應熟思審處計出萬全且疊經總理衙門電致崇厚若照來函有礙大局節畧內並言所損已多斷不可行該大臣尤應遵照辦理設法辯論乃竟任其要求輕率定議殊不可解現在俄約既經議定其第七款中國接收伊犁後激爾果斯河西及伊犁山南之帖克斯河歸俄屬第八款塔城界址擬稍改是照同治三年議定之界又於西境南境劃去地段不少從此伊犁勢成孤立控守彌難况山南劃去之地內有通南八城要路兩條關係回疆全局至第十款於舊約喀什噶爾庫倫

設領事官外增出嘉峪關烏里雅蘇台科布多哈密吐魯番烏魯木齊古城七處亦酌設領事第十四款俄商運俄貨走張家口嘉峪關赴天津漢口過通州西安漢中運土貨回國同路不特口岸過多並與華商生計亦有妨碍允行則實受其害先允後翻則曲仍在我自應設法挽回以維全局著左宗棠金順錫綸將界務商務各款悉心酌覆李鴻章沈葆楨素願大局除商務各條詳加籌畫外其界務如何辦理始臻周妥分別詳細密陳等因欽此仰見

聖謨廣運思患豫防至周且密欽佩莫名伏查俄人
踞守伊犁將近十年每歲收其商農之利數十
萬金其平時注意開疆拓土得尺得寸不稍退
讓即迫於公論礙於成約不能不返我故地然
彼國上下深謀視為奇貨藉肆要挾不饜其慾
壑不止俄人陰鷲狡詐雖英德等國皆視為勁
敵而憚與共事我出使大臣宜沈毅堅忍置得
失榮辱於度外又必統籌全局相機應付以全
力與之磋磨乃不至墮其術中中國士大夫風
氣向以出使為畏途平時講習俄事者尤少而

此事一出一入關係極鉅往者微臣籌及西事
每不免鯁鯁過慮者誠恐恢復故疆則有名而
無實變通商務或受損於無窮也議者初慮俄
人浮開兵費俾我力不能償為久假不歸之計
今核計償銀二百八十餘萬兩尚不甚多俄人
之善於操縱而隱肆要求者在此崇厚之受其
牢籠而不免遷就者亦在此不知償費一層中
國即多出數百萬金雖竭蹶於一時不至貽患
於事後若界務商務則幾微不慎後悔難追在
崇厚或因使俄之役以索還伊犁為重既急欲

得地以報

命而他務之利病遂不遑深計誠未免失之輕率謹將議定約章詳加考核除其中不甚關輕重者無庸置議外其第四款俄人在伊犁准照舊管業第十款於喀庫二城設領事外准添設嘉峪關等七處領事官第十二款俄國在蒙古天山南北路貿易均不納稅第十三款設領事處及張家口准設棧第十四款俄商運俄貨走張家口嘉峪關赴天津漢口過通州西安漢中運土貨回國同路凡此俄商所沾之利不如是不足

慊其意而伊犁亦不肯還然彼此民人雜處則
界限仍不分明添設口岸太多則辦理易生枝
節其餘奪華商之生計侵官茶之引地在彼獲
益不少在我耗損已多至分界之事第八款塔
城界址稍改現尚未知其詳第七款中國接收
伊犁後陔爾果斯河西及伊犁山南之帖克斯
河歸俄屬就總理衙門寄到分界圖說核之伊
犁西界割去一條長數百里其患猶淺南界割
去一條亦數百里跨踞天山之脊隔我南八城
往來要路細揣俄人用意一則哈薩克布魯特

游牧諸部新附俄邦今復遮其四境絕彼向化之塗一則扼我咽喉使新疆南北聲氣中梗心殊叵測夫中國所以收伊犁者以其居高臨下足以控制南八城談形勢者謂欲守回疆必先守伊犁也今三面臨敵將成孤注自守方不易圖豈足控制南路想左宗棠等礙難遵辦是界務與商務相較界務尤重矣總理衙門原奏謂收回伊犁尚不如不收回之為愈洵為洞見底蘊查同治八年英國新約以彼國未經批准至今不行同治葡萄牙使臣來津訂約以爭論澳

門設官一事迄未互換現修俄約既有

批准後通行之語又有西國成例可援原可置之不行且與萬國公法所論亦有相符之處第此次崇厚出使係奉

旨給與全權便宜行事字樣不可謂無立約定議之權若先允後翻其曲在我自古交鄰之道先論曲直曲在我而侮必自招用兵之道亦論曲直曲在我而師必不壯今日中外交涉尤不可不自處於有直無曲之地我既失伊犁而復居不直之名為各國所訕笑則所失更多且彼仍必

以分界修約為詞時相促迫迫不已必啟兵端而西北各軍與俄人逼處積不相能約既不換則隨時隨事易生猜疑亦難保不漸開邊釁中俄接壤之處約萬餘里迨兵衅一開其所要求恐僅照現議而不可得者況防不勝防日本探聽伊犁消息以為誣伸進止若聞俄事不諧或將伺隙而動即英德各國修約恐亦因而生心是崇厚所定俄約行之雖有後患若不允行後患更亟中國必自度果能始終堅持不至受人擠逼且必自度邊備完固軍餉充裕足資控

禦乃可毅然為之否則躊躇審顧祇能隨宜設
法徐圖補救並宜稍示含容免使他國聞之長
其效尤之計竊思崇厚電音簡畧其定約時如
何辨議尚未盡知若使當日明告俄人各事必
候

批准後方能舉辦或另有活動之語或別有轉圜之
法約計該大臣冬月可以回京應由總理衙門
王大臣密與詳詢體察情勢俟換約時能否將
界務商務酌議更改如改得一分亦獲一分之
利倘實無可改易無可延宕嗣後界務應如何

布置諒左宗棠等必就近酌度妥辦至商務補救之方大要有二一曰立法一曰用人查泰西各國彼此商民皆可隨地貿易居住耦俱無猜由其用法之善中俄舊約原許俄商順便往蒙古各處貿易今既擴充甚多宜審各處民情地勢俾當事者督同地方官妥議章程由總理衙門核定畫一暫為試辦以便籌商經久之道其張家口嘉峪關為東西兩路入內地扼要之處尤宜嚴密稽查凡沿途抽換私賣逃稅等弊分別照約罰辦勿稍含混如果沿途不得銷售包

攬則於無限制之中稍有限制此立法之要也
惟是人存政舉徒法不能治民將來陸路通商
益廣交涉益繁更制必益多其安肅道及張家
口監督兩缺宜與海關道員並重新疆各城如
郡縣暫難改設或擇要添設道員遴選洋務人
才設法調劑以期辦理妥洽至各路將軍大臣
持節臨邊責任艱鉅必得熟諳時務威惠交孚
乃有裨益似應不拘資格滿漢文武並用以重
邊防而資整理此用人之要也以上兩端或稍
可補救於萬一是否有當謹候

聖裁所有遵

旨籌議交收伊犁事宜恭摺由驛密

奏伏乞

皇太后

皇上聖鑒訓示謹

奏

驗收續購船砲摺光緒五年十月十六日

奏為續購英國砲船四隻到津經臣親往驗收恭摺具陳仰祈

聖鑒事竊光緒元年三月內經總理各國事務衙門遣令總稅務司赫德來津與臣議訂英國阿摩士莊廠二十六噸半砲之船三十八噸砲之船各二隻專備海防要用該四船先後來華名曰飛霆掣電龍驤虎威遴選福建船政局學習駕駛之員飭派管帶臣迭經親加演試大砲準頭較遠輪機精緻足以守護海口制禦鐵甲兩江

督臣沈葆楨曾經函商分撥臣方以船少未能
分派為慮接准總理衙門來函亦謂此項船隻
無論各海口難資分布即咽喉要區根本重地
尚恐不敷必須及時添置其時赫德假旋當飭
津海關稅務司德璀琳由電報轉致赫德與駐
英稅務司金登幹等就近確詢英廠船砲價目
有無低昂俟其回信若何再行訂購業於四年
六月十七日附片

奏明在案旋據德璀琳面呈金登幹電信內稱已
與阿摩士莊議照原購三十八噸砲之船每隻

船砲機器傢具藥彈一切在內價銀三萬二千五百磅四隻共需銀十三萬英磅合中國關平銀約四十五萬兩等語臣札飭總稅務司轉飭金登幹查照從前辦法與該廠先立詳細合同所有此項船價銀四十五萬又由英來華沿途所需經費及購備藥彈等銀十六萬兩即由各省解到海防經費項下分起照數撥給上年八月十二月內送據護理總稅務司裴式楷等呈送詳細合同並聲明造船限期過促請展限兩月俟本年五月間由英起程臣又切屬總稅務

司轉致該商務須詳細監造勿稍草率俟工竣
開駛來華限於九十月間到津聽臣驗收一面
飭據福建船政提調道員吳仲翔呈報委派由
英學藝回華之都司劉步蟾等四員一同北上
以備分派管駕並准南洋大臣沈葆楨酌擬船
名咨會前來伏查此項砲船四隻已據總稅務
司赫德飭派江海關稅務司赫政先期馳往廣
東迎護駛抵天津海口臣即於十月初六日親
往大沽督同津海關道鄭藻如道員許鈐身暨
稅務司德璀琳赫政等逐細勘驗輪機砲位器

具船式均尚精堅靈捷駛出洋面演試大砲藥力加多亦有準頭與前購三十八噸砲船大致相同各船演試後赫德亦自京馳至商催派員接收管帶以便洋員交卸回國惟船政局派出都司劉步蟾等尚未到津現將屆守凍之期洋員未能久待應即權宜辦理飭令飛霆等四船管帶官鄧世昌等暫行兼管接收事宜並留原來洋弁三人協同照管操練該四船係接前購四船編為五六七八等號仍照沈葆楨所擬船名曰鎮北鎮東鎮南鎮西以資號召俟船政派

出各員到津募齊弁勇水手駕駛得人始可酌
量分撥除咨行南洋大臣福建船政局飭催劉
步蟾等迅速赴津接管再行奏明調撥外所有
驗收英國續購砲船緣由理合恭摺具

奏伏乞

皇太后

皇上聖鑒謹

奏

籌議購船選將摺

奏為疊奉

寄諭先將海防購船選將各節切實籌議密摺覆陳

仰祈

聖鑒事竊臣欽奉光緒五年九月三十日

密諭前據恭親王等面奏迭經總理衙門函商南北
洋大臣豫籌海防事宜尚未定議此事關係極重
斷不宜再事遷延著李鴻章沈葆楨即將海防事
宜並王先謙所陳備船械一條切實籌議先行具奏
期於事在必行等因欽此又奉十月二十四日

密諭丁日昌遵議覆奏各摺片現議整頓輪船水師
自非擇將帥精器械不可西人熟習輪船操練若
能延致才技精通者為教練當可日有起色應如
何設法訪訂之處著李鴻章沈葆楨與出使各國
大臣函商辦理至學堂練船出洋諸舉皆為豫儲
將才尤當擴充精選以備異日之用鐵甲蚊子等
船為海防所不可少鐵甲船所費過鉅一時尚難
籌辦蚊子船現已先後購到八號著即督飭管帶
之員認真演練毋得有名無實以後如何陸續添
購並購船及續延教練西人可否令赫德及出使

大臣分辦之處著李鴻章沈葆楨一併籌商妥辦
等因欽此並先後抄錄原摺給閱前來仰見

聖主綢繆未雨指示周詳曷勝欽服伏查自光緒元
年四月間奉

旨籌辦海防其時海口一無豫備赤地新立只能擇
要為之督飭各營於大沽北塘新城各處仿照
洋式修築砲台營壘並與總理衙門函商令總
稅務司赫德在英廠先後訂購大砲蚊子船八
隻水陸相依稍壯聲勢徒以戶部指撥海防經
費各省關未能照數報解又歷經抵撥西征軍

餉分提晉豫賑款餉力以抽分而愈薄船械雖
欲備而難齊夫軍事未有不能戰而能守者况
南北洋濱海數千里口岸叢雜勢不能處處設
防非購置鐵甲等船練成數軍決勝海上不足
臻以戰為守之妙查西洋兵船利於海面攻取
者約有三種一鐵甲船形式大小不等鐵甲厚
薄不等船首衝鋒有無不等一快船或配鐵木
或配鋼壳專取行駛快速能擊敵船而為敵船
所不及一水雷船喫水雖淺或帶在大船上或
隱於大船後衝擊最宜至於木壳輪船如閩滬

各廠所製者皆西洋舊式只可作無事時巡防
有事時載兵運糧之用實不宜於洋面交仗蛟
子船則為守港利器如赫德所購者礮位較大
在淺水處亦能轟擊壞鐵甲也中國即不為窮兵
海外之計但期戰守可恃藩籬可固亦必有鐵
甲船數隻游奕大洋始足以遮護南北各口而
建威銷萌為

國家立不拔之基乃議之五六年而迄無成者一
由經費太絀一由議論不齊一由將才太少然
欲求自強仍非破除成見定購鐵甲不可臣先

因北洋經費尚有存款百萬欲購一鐵甲船暫行試練俟駕駛得人操演既熟集有巨款再行續購推廣分布曾緘囑駐德使臣李鳳苞在英法各廠訪求新式旋接總理衙門公函以專顧一口為疑而李鳳苞八月間來信亦謂近日各國議停造鐵甲如可緩辦尤為合算且既有鐵甲應同時並舉四事一為砲台護庇一為船隲修理其尤要者一為快船若鐵甲無快船輔佐則孤注而已一為水雷有行雷可以出奇有伏雷可以堵守而後鐵甲不為快船所困等語自

係在洋博訪羣議斟酌時勢以立言適新購蚊
船到津赫德自京來晤臣與密商辦法該總稅
司亦以先購快船再辦鐵甲為是遂賞呈英廠
寄來新式快船兼碰船圖式再三考究令其譯
出節畧內稱船長二百英尺寬三十英尺喫水
十五英尺每半時行十五海里新式機器首尾
各置二十五噸大砲一尊左右各新砲數尊並
帶水雷小輪船一隻船頭水線下暗設堅固衝
鋒可碰敵船若訂兩隻需銀六十五萬兩後年
夏間工成來華據云可保追趕碰壞極好之鐵

甲船臣復諮詢駐津之法國水師兵官近來西洋鐵木船新式頭多設衝鋒以備戰時添一碰船之力此項快船既載大砲又有衝鋒行駛果如此迅速實屬合用蓋鐵甲船及平常兵船每半時僅行十一二海里此則十五海里進退自裕如矣臣函商總理衙門謂宜籌款及時購辦因屬赫德先由電報轉飭駐英稅務司金登幹與該廠訂辦趕速動工其價銀分三期兌付約於光緒七年春夏到華一面劄飭總稅務司備案應俟此二船到後再行酌商分撥惟是快船

兼碰船稍可出洋操巡應敵究嫌氣力尚單如
果各省關儘力解濟南北洋經費畧有積存必
再添購鐵甲船配以快船及現有木船蚊船方
可成全軍而厚兵勢雖未可一蹴幾實未可一
朝忘臣仍密商李鳳苞等悉心採訪如各國鐵
甲並未罷議當擇其與中國海面相宜者酌量
訂購隨時奏明請

旨辦理至現在購到蚊船八隻來春弁勇配齊擬飭
調龍驤虎威飛霆掣電四船赴南洋歸沈葆楨
調遣即留鎮北鎮南鎮東鎮西四船在津沽由

臣督飭道員許鈴身提督丁汝昌會督管帶各員認真操練並令時常出洋赴東奉交界之大連灣及沿海口岸駐泊梭巡以壯聲威丁日昌摺內所陳延請洋宮教練一節確有見地現統帶蚊船來華之英國副將名郎者係赫德等向其水師兵部借用英提督古德及出使大臣曾紀澤皆稱其能臣接晤數次調閱操演尚為勤幹明練商留效用該員云須回英乞假准行乃可復來臣又函商曾紀澤與其兵部議訂赫德則謂郎副將如不復至伊可另薦妥人現管帶

鎮北之都司劉步蟾在英國學堂兵船肄習五年深知機要其材器頗堪造就若再得精嫻理法之西人與為切磋可備將來統帶快船鐵甲之選目下帶船將才固少即管輪機管砲之弁駕船之水手皆須逐漸陶鎔西國以學堂練船為根基故人才輩出明年臣擬另設練船一隻遴派幹員選募北省丁壯素習風濤者上船練習庶異日快船至而弁勇不必盡資於閩亦因地制宜之方福建船政本有仿造快船之說與其多造而船不得用不若少造而船必求精若

仍照舊式恐無實濟其學堂練船規模頗合西
法應請

敕下船政大臣設法整頓籌辦逐年圖功又蚊子船
防守海岸最為得力赫德所購尤各國罕有之
新式價目稍昂而功用自別中國各局目前實
不能仿造臣愚以為廣東台灣海口至少須各
有二隻浙江甯波山東煙台海口至少須各有
一隻平時與南北洋現有蚊船互調會操有事
則各防各口藉杜窺伺每隻約需銀十五萬兩
在各該省力所能辦兩廣督臣奏稱擬先購置

一二自必籌有的款臣面詢升任江甯藩司前署福建藩司盧士杰據稱閩省藩運各庫尚積存數十萬又詢前任浙江藩司任道鎔謂浙力十餘萬尚可籌湊山東各庫另存銀百餘萬則遠近皆知擬請

教下各該督撫臣先其所急迅速照議籌辦不准藉詞諉延並截留海防協款徑請總理衙門轉飭赫德剋期定購明年秋冬即可來華其隸南洋者由沈葆楨會商調度隸北洋者由臣會商調度庶衆擎易舉聲勢相聯必於海防全局有裨

除王先謙丁日昌摺內所陳各條容再詳晰籌
議具陳各緣由謹繕摺由驛密陳是否有當伏
乞

皇太后

皇上聖鑒訓示施行謹

奏

請催海防經費片

再臣遵

旨籌備海防現議定購快船兼碰船約期兌價並擬添購鐵甲船及採辦鎗砲水雷船各件雇用洋官教練及蚊船弁勇口糧一切需費浩繁全指各省關奉撥釐金洋稅應用查戶部原撥南北洋海防經費每年額款銀四百萬兩自光緒元年七月起至三年六月止統解北洋自三年七月起分解南北洋各半內除江蘇廣東福建三省釐金每年合撥一百萬兩絲毫未解均經各

該省自行留用外其浙江江西湖北三省釐金
每年亦合撥一百萬兩元二兩年報解雖未盡
如數尚形踴躍三年以後報解更稀約計該省
各欠解銀五六十萬不等在

朝廷屢飭籌辦海防此事關係重大臣等何敢玩視
而餉不應手斷難為無米之炊目下

萬年吉地及

惠陵工程告歲緊要撥款稍減各省財力稍紓應請

旨嚴催浙江江西湖北督撫臣將奉撥釐金額款趕
緊設法如數大批籌解以應急需至各海關撥

定四成洋稅歷經底撥西征軍餉其分解南北
海防已不及半若再有意延欠必至貽誤事機
並請

勅下閩海粵海江海浙海關各監督按結如數迅速
分解倘再稍有擱延即由臣等指名嚴叅理合
會同南洋大臣兩江督臣沈葆楨附片陳請伏
乞

聖鑒訓示謹

奏

表三

三二

1302

武弁回華教練摺 光緒五年十月二十八日

奏為派往德國軍營學習兵法技藝武弁期滿陸續回華現籌分撥親軍哨隊教練恭摺具陳仰祈

聖鑒事竊光緒二年三月間教練砲隊德國人李勳協期滿回國經臣在於海防各營內遴選年少壯之游擊卞長勝等七弁商令李勳協帶赴該國武學院講習陸軍技藝俟學成回華再分撥各營教練以期漸開風氣當經議定章程三年為期籌撥經費飭令由津起行附片具

奏奉

旨著照所請該衙門知道欽此旋以下長勝等赴德
學藝未派監督通道員李鳳苞監督福建船政
局學生赴英法學習駕駛製造各事復經飭令
李鳳苞按三箇月一次由輪車馳赴德國兼查
卞長勝等功課並請總理衙門照會德國駐京
公使知照於二年十一月選派閩廠學生出洋
學習摺內

奏明在案計自卞長勝等奉派赴德即由駐京德
國使臣巴蘭德之兄予告提督巴蘭德商明該

國兵部派入斯邦道第四營交哨官德羅他妥
為安插增給經費延師指授旋因卞長勝王得
勝朱耀彩三弁氣體稍弱改派博洪廠習藝三
年春調赴維廉士哈芬海口學習水師復調溪
耳海口四年春因卞長勝朱耀采性情較浮學
業未能精進先調回華楊德明查連標袁雨春
劉芳圃四弁仍在斯邦道步隊營內歷經巴蘭
德及德羅他妥為照料視同子弟每歲由該軍
總統帶赴王宮宴會第一年先習練手足及演
槍各法兼習德語第二年隨看林操所演迎敵

設伏及繪地圖排演各法第三年習演帶排隨
同林操兼習文書上年十月另延哨官西鐸教
授布陣各法該弁等漸有會心今春三年期滿
經臣緘商駐德使臣李鳳苞暫展限期令該弁
等詳考一哨調度各法以窺步隊之窾要自夏
徂秋該弁等晝則隨操晚則聽講凡槍隊理法
皆能領悟六七月間又各備馬匹隨同砲隊大
操以觀配搭步隊相濟為用之妙大操既畢新
兵換防無藝可學除王得勝一弁仍留栢林都
城延師專教楊德明一弁攻苦成疾暫在斯邦

道就醫外其查連標袁雨春劉芳園三弁由李鳳苞咨送回華據稱德國陸軍甲於天下而步隊尤精於馬砲各隊其得力全在每日林操熟演料敵應變之法每年夏秋大操熟演露宿野戰攻守之法其法備於一哨擴而充之可營可軍該弁等隨閱林操大操耳濡目染最為親切惟德國兵官向例選世家子弟聰穎者入武學院讀書三五年考取中式入學學習或步或馬或砲仍不能兼今查連標等洋文既未童習強記力學三年有餘雖未能遽臻彼中兵官之詣

而較之教練洋員固已有過無不及該弁等向
習步隊頗已完備彼國每以泛濫為戒自應咨
送回華以免閒曠等語臣復面加考驗該三弁
所習步隊技藝紀律尚為嫻熟出洋肄業日久
艱苦備嘗學有心得據李鳳苞咨稱該弁等在
洋均各謹守禮法見重於外人營哨教習均具
考語信憑是其材器頗堪造就擬懇

天恩將藍翎守備銜儘先千總袁雨春留於直隸以
守備儘先補用並

賞換花翎軍功查連標劉芳圃二弁均

賞給五品藍翎留於直隸以千總儘先補用以示優
獎而資傳習臣維中西用兵之法大畧相同惟
中國選將必臨敵而後得西國選將以學堂為
根基中國軍械不求甚精操練不必甚嚴西國
則一以精嚴為主取彼之長救我之短不妨參
稽互證期有進益現擬於親軍營內先行挑選
哨隊仿照德國一哨之制交該弁等依法教練
並令新募德國兵官漢納根隨時察看督率講
究日後將學成者分派各營充當教練漸次擴
充成效必多於海防不無裨益除咨明總理衙

門外所有派往德國學習兵法技藝武弁期滿
陸續回華緣由理合恭摺具

奏伏乞

皇太后

皇上聖鑒訓示謹

奏

德國兵官請給寶星片

再臣迭准李鳳苞咨稱查連標等赴德肄業先
經駐京德國使臣巴蘭德之兄予告提督巴蘭
德轉託斯邦道提督及營哨教習現在期滿學
成回華接准該提督巴蘭德函稱斯邦道教隊
出力之步隊親軍第一營三等提督官波蘭撒
爾第四營頭等總兵官薩呢則第四營內頭哨
二等總兵哈克威擬懇邀請

奏獎由駐京使臣巴蘭德轉遞前來臣查光緒三
年十月及本年八月德國兵官德羅他與提督

巴蘭德或教練盡心或照料周妥經臣先後奏
奉

俞旨賞給寶星欽遵各在案今該兵官等三員教隊
出力事同一律既據巴蘭德函懇給獎自應由
臣飭局仿造二等金寶星一面發給該提督官
波蘭撒爾並造三等金寶星二面分給總兵官
薩呢則哈克威配帶均交駐津德國領事傳
旨賞給以酬勞勩除咨請總理衙門照會巴蘭德知
照外附片陳明伏乞

聖鑒訓示謹 奏

軍機大臣 密寄光緒五年十一月初一日奉到

大學士直隸總督一等肅毅伯李 兩江總督

沈 湖廣總督李 閩浙總督兼署福建巡撫

何 兩廣總督劉 山東巡撫周 江蘇巡撫

吳 江西巡撫李 浙江巡撫譚 福建巡撫

勒 湖北巡撫潘 廣東巡撫裕 三品卿銜

督辦船政事宜黎 傳諭粵海關監督俊啟

光緒五年十月二十九日奉

上諭李鴻章奏遵議海防購船選將各節並請催解

經費各摺片覽奏均悉海防辦理有年迄未就緒

亟應通力合作趕緊籌辦以圖自強李鴻章所陳
必購置鐵甲等船練成數軍決勝海上能戰而後
能守自是要論該督擬先購快船再辦鐵甲現今
總稅務司轉飭駐英稅司訂辦快船二隻期於光
緒七年到華現在購到蚊船八隻來春弁勇配齊
分赴南北洋調遣其廣東台灣浙江甯波山東煙
台各海口均須酌備蚊船與南北洋互調會操藉
杜窺伺均著照所議辦理各該督撫當仰體朝廷
宵旰焦勞之意共矢公忠先其所急迅速籌辦不
得藉詞推延所有帶船將才及購船事宜即著李

鴻章認真講求務使人才輩出器械精良以期得力至福建船政局製造各船必精益求精不可蹈常習故如李鴻章此次定購之快船將來如能仿造始有裨於實用著該管大臣實力整頓逐漸圖功惟籌備海防經費宜裕除福建業經該省奏請截留外其餘各該省應解南北洋海防經費著各該督撫趕緊設法籌解大批餉項各監督按結如數迅速分解以應急需倘再稍有擱延即由李鴻章等指名嚴叅將此由五百里密諭李鴻章沈葆楨李瀚章何璟劉坤一周恆祺吳元炳李文敏譚

鍾麟勒方錡潘霽裕寬黎兆棠並傳諭倭啟知之

欽此

軍機大臣 密寄

光緒五年十一月十四日到奉

大學士直隸總督一等肅毅伯李 閩浙總督

兼署福建巡撫何 兩廣總督劉 兼署兩廣

總督廣東巡撫裕 山東巡撫周 浙江巡撫

譚 福建巡撫勒 光緒五年十一月十三日

奉

上諭前據李鴻章奏籌議海防廣東台灣浙江甯波
山東煙台各海口均須酌備船隻當經諭令各該
督撫迅速籌辦茲據總理各國事務衙門奏應購
船隻該衙門既不熟悉若由各省自行定購不如

經由李鴻章一手經理較為周妥等語前次所購蚊子船及現在議購兼碰快船均係李鴻章訂辦該督前奏此項船隻於海防最為得力必當講求有素各省需用之船自宜統由李鴻章酌量代訂其所需購船經費即著何璟劉坤一裕寬周恆祺譚鍾麟勒方錡分別籌解李鴻章備用將來各船購到時並由該督驗收分布各海口以資調遣將此由四百里各密諭知之欽此

議覆中外洋務條陳摺光緒五年十一月二十
六日

奏為疊奉

寄諭分別籌議恭摺密陳仰祈

聖鑒事竊臣欽奉光緒五年六月初七日

上諭都察院奏代遞貴州候補道羅應旒敬呈管見
一摺所有整學校以新吏治練兵民之武技以自
強精機汽之器械以利用參西國之例以謀遠握
朝野之利權以儲費各條有無可採著李鴻章沈
葆楨體察情形悉心妥籌具奏等因欽此又奉九

月三十日

密諭翰林院侍讀王先謙奏條陳洋務事宜一摺所
奏審敵情振士氣籌經費備船械各節不無可採
著李鴻章沈葆楨即將海防事宜並該侍讀所陳
備船械一條切實籌議先行具奏王先謙所稱任
將擇使二事亦為儲才起見李鴻章等如有所知
著隨時密行陳奏以備錄用此外各條是否可行
並著分別妥議具奏等因又奉十月二十四日
密諭丁日昌遵議覆奏各摺片不無可采現議整頓
輪船水師自非擇將帥精器械不可西人熟習輪
船操練應如何設法訪訂之處著李鴻章沈葆楨

與出使各國大臣函商辦理至學堂練船出洋諸
舉皆為豫儲將才之計尤當擴充精選以備異日
之用丁日昌片內所奏各節除減額兵停武科二
事均無庸議外所稱擴充礦務裁撤水師及凡非
極要處所祇須防以水雷暫可停造砲台並裁太
腹地勇營著李鴻章沈葆楨妥議具奏至所奏稍
寬釐稅以杜洋票一節於餉項有無裨益著一併
籌議具奏等因欽此並先後鈔錄原摺給閱前來

仰見

聖主虛衷聽納博訪周諮曷勝欽服臣於十月二十

七日業將海防購船選將各節切實籌議密摺
覆陳此與丁日昌之所謂擇將帥精器械王先
謙之所謂振士氣備船械大致尚不甚歧異現
可無庸贅論伏思近來時事多艱

朝廷深思遠慮廣開言路內外臣工得以抒其蘊蓄
暢所欲言嘉謨異策原可輻輳並進惟是言者
之精粗淺深既有不同即所言甚當或碍於成
例或阻於浮言或絀於經費或乏於人材往往
難見諸施行而凡一事之利弊又非確有見聞
難遽懸斷其事之關涉他省者尤非南北洋大

臣權力所能及耳目所能周往返行查迹近推
宕茲臣謹將確鑿可行者籌定一二其於事理
稍疏與格於時勢暫宜緩行者不復置議以附
實事求是之義即如礦務一節丁日昌王先謙
羅應旒皆言之今直隸之開平湖北之當陽安
徽之貴池台灣之雞籠均已試辦冀有數處稍
著成效即可逐漸擴充洋藥酌加稅釐與機器
製造輪船招商各節王先謙羅應旒皆言之除
洋藥釐稅並徵應由總理衙門與英使威妥瑪
商辦外其織造機器已創辦於蘭州輪船攬載

已設局於津滬各埠招商借款目下辦法原不出此若辦理日有起色商情自更踴躍官本亦較易籌要之此數端者仰賴

朝廷主持於上臣等乃得審度機宜妥為經營既須臨事變通尚難豫設成法又望各省大吏意見相同呼應無甚隔閡各處輿情歷練既久賢才因之奮興則風氣漸開富强之基可立矣至羅應旒之條議如兼課西學以資實用鼓勵巧工以新製造獎勵巨商以握利權均可節取而酌行之將來遇有此等事件應由臣等隨時請

旨核辦王先謙之條議以日本併吞琉球藐視中國
意在整軍經武大張撻伐警彼強鄰斯事關係
較重必深籌乎彼此進退之機宜熟審乎本末
輕重之分數日本國小財匱其勢原遜於泰西
諸國惟該國近來取法西人於練兵製器各務
刻意講求頗有振興之象中國水師尚未齊備
餉需亦未充足若彼不再肆鴟張似仍以按約
理論為穩著但倭人性情桀驁設令狡焉思逞
亦不可無以待之中國自強之圖誠難一日稍
緩矣他如墾闢荒田嚴汰冗員整頓釐權皆各

省應辦之政擇使一事亦係要務俟有所知隨時密陳以備錄用至丁日昌之條議洞晰中外情勢多聞歷有得之言與空談無實者不同所議購船及延西人教練一節山東浙江及閩粵各省均須暫備蚊船奉

旨飭臣代為經理俟各該省籌款解到或仍交赫德承辦以資熟手若購辦鐵甲船經費果能湊齊應函商出使大臣李鳳苞等設法訪購其續延教練西人亦請曾紀澤李鳳苞等就近物色必須專門名家才能出眾而又恪聽調度者始敢

決計延訂赫德如有所知苟係上品亦可招用
但中西教法不同上等人材肯來中國者頗少
祇能懸其格尚難遽得其人也海口非極要處
所防以水雷即可停造砲台既節糜費又示敵
以不測甚為合算惟水雷事理頗奧各省真能
講求者頗少釐稅宜稍崇寬大以廣招徠是在
多選廉平之員專司權務必於餉項有裨至腹
地勇營及沿海紅單艇船之類原可酌量裁撤
惟各省地勢遼濶伏莽尚多非有得力防營不
足以資控制艇船弁兵額餉較輪船勇餉為儉

間能捕盜於淺水之處以輔輪船所不逮恐亦未可盡裁應請

敕下各省督撫參酌時宜認真淘汰凡艤船之窳敗無用者勇營之虛弱不得力者量加裁撤既昭核實又不至偏廢斯為近之抑臣更有請者邇來各國環伺外侮交加未雨綢繆正在今日閱丁日昌之議令人憂危之意悚然而生倘蒙

聖主堅持定見激勵人材勿為浮議所搖勿為常例所格內外臣工同心戮力以圖自治自強之要則敵國外患未必非中國振興之資是在一轉

移間而已所有疊奉

寄諭分別籌議緣由恭摺由驛密陳伏乞

皇太后

皇上聖鑒訓示謹

奏

李肅毅伯奏議

及門章汝洪鈞編輯

卷六

議購鐵甲船摺

覆奏防兵情形片

密籌防務摺

請撥海防經費摺

請獎英法官廠摺

商局官帑分年抵還摺

覆陳招商局務片

遵籌吉林防務摺

定造鐵甲船摺

撥補出洋肄業經費摺

請催海防經費摺

巴西議約竣事摺

巴西議約照會照覆稿

請設南北洋電報片

覆奏言路條陳摺

妥籌鮑軍事宜片

妥籌朝鮮武備摺

朝臣李裕元來函并禮單一件

妥籌朝鮮造器練兵摺

接見朝臣卞元圭筆談問答

代朝鮮擬製器練兵各條

擬議朝鮮來學章程片

朝臣卞元圭與關道等擬議該國員弁來學製造

操練章程

朝鮮通商西國片

妥籌球案摺

派丁汝昌赴英收船片

安議鐵路事宜摺

議覆張家驥爭止鐵路片

議覆梅啟照條陳摺

議覆陳本植條陳片

議購鐵甲船摺 光緒六年二月十九日

奏為籌辦海防通融挪款先購鐵甲船二隻以壯聲威而備戰守並預籌交收調撥事宜恭摺仰

祈

聖鑒事竊臣疊奉

寄諭籌議海防購船並代福建等省定購蚊船碰船兼快船以備分布各口等因欽遵在案臣於上年十月覆陳海防摺內聲明南北洋口岸叢雜不能處處設防必購置鐵甲等船練成數軍決勝海上乃能以戰為守擬擇其與中國海面相

宜者酌量訂購荷蒙

俞旨許為要論總理衙門籌議南洋海防經費摺內
稱土耳其所定八角台鐵甲船兩隻已發電信
詢出使大臣李鳳苞查明如未出售而價不甚
昂自應購備臣亦函屬李鳳苞隨時探問旋據
函稱遵由巴黎致書英海部詢以實價若干先
因俄人欲購以禦英故英人急購之今或肯轉
售等語又接李鳳苞十二月二十四日電報八
角兩鐵甲英肯轉售兩船實價共英銀五十四
萬三千三百八十磅合中國銀兩核計約二百

餘萬兩之譜頃又接李鳳苞同日函稱該鐵甲船一名柏爾來一名奧利恩英海部尚書諄屬當趁中國未開鄰衅之前成議其價分毫不能再讓等語臣前詢之出洋學生劉步蟾等據稱在英時曾上該船閱過甚為堅固合式夫中國購辦鐵甲船之舉中外倡議已閱七年沈葆楨丁日昌等斷斷持論以為必不可緩臣深韙其說祇以經費支絀迄未就緒近來日本有鐵甲三艘遽敢藐視中國耀武海濱至有台灣之役琉球之廢彼既挾所有以相陵侮我亦當覓所

無以求自強前李鳳苞來函謂無鐵甲以為坐鎮無快船以為迎敵專恃蚊船一擊不中束手受困是直孤注而已洋監督日意格條議亦謂能與鐵甲船敵者惟鐵甲船與巡海快船敵者快船故鄰有鐵甲我不可無若僅恃數號蚊船東洋鐵甲往來駛擾無可馳援必至誤事等語日意格由法國水師出身現帶藝徒在洋學習製駛聞見既確多聞歷有得之言西洋均屬島國海口水深不似中國各口之淺其大號鐵甲喫水至二十六七尺購價至二百餘萬者中國

無所用之且船既笨重能來中國者亦少土耳其八角台船喫水十九尺九寸用之中國海面抵禦日本及西洋來華之鐵甲最為相宜且甲厚樣新似出日本鐵甲之上日本聞我有利器當亦稍戢狡謀向來洋廠訂造鐵甲須三年後方能下水今英國既肯轉售其柏爾來一船俟訂定後匯給現銀即可來華奧利息一船須遲一年後交付值此多事之秋得兩船先後來華稍張聲勢較之定造需三年之久者緩急懸殊尚覺合算臣與總理衙門往復函商意見相同

一面由電信覆知李鳳苞屬其與英海部切實商訂如何分期兌付詳細驗收再行專函商辦惟是此項船價南北洋海防經費以各省關報解甚微積存無幾近又籌購蚊船碰船竭力集款無可再撥若機會一失中國永無購鐵甲之日即永無自強之日殊屬可惜又查蚊船宜用於內洋淺港之處福建海面寬深台灣尤形勢孤懸口岸歧錯即有數號蚊船難敷防守必須得力水軍隨宜策應乃為活著現擬通融辦法福建已先後奏明定購蚊船四隻碰船二隻內

蚊船價銀赫德原定每隻約需銀十五萬兩何
璟奏稱兩船約需費三十餘萬圓新式兼碰快
船赫德原定兩隻需銀六十五萬兩續又申呈
應帶之水船未計其內總理衙門奏稱碰船兩
隻約需銀六十萬兩均係傳聞之誤臣就赫德
原訂文單核計共該約需實價銀一百三十萬
兩似可暫緩購置即此款先買鐵甲一號專
歸台灣防勦福建調撥如有一鐵甲輔以原有
之福勝建勝兩蚊船再擇船政兵輪之堅利者
配之練成一軍料敵所向相機戰守則台防可

固倭患可弭所需款項現有部撥三十萬兩該
省奏明籌備三十餘萬圓約得二十五萬兩又
奉

旨令續籌六十萬兩果能如數解齊足可抵買鐵甲
之用查戶部原撥海防經費福建洋稅釐金兩
宗每年應解南北洋者約四五十萬去歲部議
准其截留原為經營臺防起見後山之役現既
停辦亦可撙節若干現據李鳳苞函報柏爾來
一船交價後即可赴華台防尤為急需自應即
將此船撥歸閩省調用擬請

旨勅下福建將軍督撫臣於稅釐項下籌撥船價合
之原有的款先湊成一百萬兩俟李鳳苞與英
定議即由臣知會剋期匯付以便船價兩交免
致失信於人如此則以該省應解之費籌該省
應辦之防尤為義不容辭南洋擬購之碰快船
二隻應需六十五萬兩茲抵購鐵甲一船所短
約僅三十餘萬兩將來或由出使經費續撥或
由京外設法勻湊尚易為力奧利恩一船據稱
須一年後交卸亦可分期籌匯價銀俟該船到
華臣當與南洋大臣隨時會商調派合之原有

蚊碰及各兵輪船練成一軍無論何處有警不分畛域遣令援應庶幾聲威較壯海防稍有端倪大局不無裨益惟英國磅價隨時低昂合之中國銀兩不能豫定確數計兩船磅價合銀二百萬已有盈無絀將來交收及運送來華需費亦不可豫計必應寬籌窄用臣與李鳳苞深知帑項艱絀事竣核實開報斷不任經手者稍有浮冒並請

勅下閩浙督臣船政大臣豫行選派管駕及輪機生徒舵水等六十人赴英隨同所僱洋員在船歷

練其學習期滿之學生亦可附搭幫帶回華隨時與李鳳苞函商妥辦至鐵甲船到華以後修船須有塢基上海及廣東黃埔船塢喫水二十尺以內之船尚可設法修理而造就人才尤為急務駕駛雖有學生肄習而司軍火司帆纜司機器及管事舵水等人亟宜由練船學堂認真教導挑選源源濟用萬不可以遊手充額即舊有之兵輪船亦宜陸續汰換乃可漸收實效蓋鐵甲船購成後事務正繁措注稍不如法易滋流弊臣既創斯議不敢置身事外福建所購之

船雖專供一省之用將來船到後管駕人員如何遠派教習西人如何延訂及一切布置之方臣當與閩浙督臣船政大臣隨事商辦冀可漸有進境再近年閩廠經費不敷修船養船復耗其半現有快船圖式及出洋學生陳兆翱等精通製法終以款絀未能仿造臣比已函商黎兆棠屬其到任後察酌情形停造尋常木船專造快船此項工竣遞速與購之外洋者相等而與鐵甲船相輔並行為用甚大惟養鐵甲船之費逾於尋常輪船數倍未便責令船政供支查福

建一省額設水陸兵數至六萬餘勇營在外今
既另設輪船水師則原有之外海戰船與各路
綠營之兵分防之勇當可量加裁減如能於通
省中酌去一二成即以其餉供養鐵甲等船之
費綽有餘裕應請

敕下福建督撫臣遵照正月間

諭旨將水陸師營分別酌量裁汰庶節流即以開源
日久不致竭蹶矣所有籌辦海防通融挪款先
購鐵甲兵船並豫籌交收調撥事宜恭摺由驛
密陳伏乞

皇太后

皇上聖鑒訓示謹

奏

覆奏防兵情形片

再欽奉正月二十八日

寄諭有人奏天津防兵難恃請飭認真整頓一摺天津駐紮水陸防軍原以該處為京師門戶必須餉足兵精方足以資捍衛若如所奏該軍營官剋扣兵勇剗掠驕蹇怨詈李鴻章不敢過問等情緩急將何足恃李鴻章身任統帥責無旁貸著將各營將士驕者易之弱者汰之有無剋扣剗掠等弊明查暗訪實力整頓總期一兵得一兵之用不致虛糜餉糈方為不負委任等因欽此臣查津防水陸

各營合計僅及萬人提督周盛傳統盛軍步隊
十一營馬隊五營共八千人駐紮小站馬廠等
處距津百餘里地屬間曠便於屯操營規尚為
整肅其分駐天津城外者只總兵黃金志所帶
淮軍一營練軍三營總兵趙孟坤親兵一營提
督鄭國榜水師一營津郡重地計尚不足三千
人因中外輻輳人煙叢雜不宜多駐兵勇致滋
事端間有革勇游匪冒混生事立即擒獲懲治
不稍寬貸臣駐津十年以來兵民相安貿易日
盛此為確證明查暗訪實無兵勇劫掠騷擾怨

詈之事餉源支絀年甚一年淮軍各營久不能
按月放足而每年支給九關略數口食逐日早
晚點名看操人數既不准少剋扣從何而來此
間自輪船通行過客雲集間有向各營求助川
資者所欲不遂動輒騰謗言者或展轉誤傳摭
拾入

告究無實蹟可指至謂臣不敢過問尤不近情臣
自咸豐三年即出從軍旅與兵事相始終嗣在
蘇浙勦粵逆北路勦捻匪先後統軍十萬衆尚
無騷擾之名亦無驕兵悍將不敢過問之事今

捍衛畿甸憑仗

威稜僅統萬人何至遜懦若此當為

聖明俯鑒至謂緩急難恃有不得不豫為聲明者如遇內地賊匪臣兵力雖單餉力雖薄才力雖甚竭蹶自忖尚可制勝如遇各國憑陵激厲孤軍支持門戶勝負即不可知斷不至聞風潰散貽君父憂臣惟慄遵

聖訓驕者易之弱者汰之實力訓練以期有備無患

迭蒙

諭旨籌備海防邊防尚有應行調撥之處容臣熟思

審處陸續籌議具奏外謹先附片據實覆陳伏

乞

聖鑒謹

奏

三

一

遵 旨密籌防務摺 光緒六年三月初一日

奏為遵

旨詳細籌辦密摺覆陳仰祈

聖鑒事竊臣承准軍機大臣密寄光緒六年正月二十一日奉

上諭一道跪誦再四仰見

宸謨廣運戒備不虞臣謹按切時勢逐條悉心籌畫
上乞

聖裁

上諭天津屏蔽京師關係全局李鴻章籌防有年所

有建築礮臺購備戰船等事粗具規模著將現有兵力認真整頓等因欽此查直境沿海大小各口皆為京師屏蔽而天津乃各國由海道入京正路尤須重兵駐守大沽北塘兩口則又津郡門戶年來建築礮臺粗有頭緒惟兵力尚覺稍單其北塘迤東至山海關袤延五百餘里如沿海之螳頭沽蒲河口金沙嘴秦王島老龍頭等處水勢較深輪船可泊以登岸徑達京城亦須分駐營壘添築礮臺昨令新調直隸提督郭松林前往察勘口岸歧出空虛可慮該提督以提標

練軍僅有馬步隊五營光緒二年調赴奉天防
勦馬步隊各一營又調防熱河朝陽馬隊一營
現止步隊兩營巡防北口實不能兼顧海防從
前直省練軍借調奉天本係暫局今奉天已另
調提督宋慶一軍堪資控扼則前調直津零星
各隊自應撤回况近畿防務視奉省尤為重要
又郭松林向隨臣統師勦賊裁贖馬步七營留
防湖北實為久戰得力之師應請
旨飭下奉天將軍將原調古北口練軍步隊右營馬
隊三哨津防練軍槍隊兩營全數撤回不得藉

詞久留並

飭湖廣督臣湖北撫臣將郭松林舊部現留襄陽之
武毅步隊三營馬隊一營檄調來直所需月餉
軍裝仍照章由鄂源源解濟俟各營到後自北
塘迤東各海口當商同該提督擇要扼紮妥為
布置庶畿防較臻周密

上諭備齊戰艦於煙臺大連灣等處擇要扼紮以固
北洋門戶奉天營口本屬北洋所轄該處與煙臺
海防即責成該督統籌兼顧庶幾呼應較靈又同
日另奉

上諭金州海口關係緊要應如何豫籌防守之處著
李鴻章岐元會籌辦理等因欽此查大連灣一帶
即係金州海口北洋兵船本少現僅鎮北鎮南
鎮東鎮西礮船四隻可為守口利器而不足以
鏖戰大洋必須戰艦備齊乃能於洋面設法扼
截若船隻未齊未可固遼海門戶似
聖主必不為空言之責成微臣亦不敢驚虛名以兼顧
目下煙臺營口僅各有槍隊五百人閩廠輪船
各一隻兵力過形單薄幸奉

旨調宋慶所部往營口等處擇要布扼山東撫臣亦

擬添調勇營紮煙臺後路並訂購蚊船二隻分
布海口臣飭令道員許鈐身提督丁汝昌督率
現有礮船會同新延英國水師兵官哥嘉認真
操練隨時駛巡營口煙臺大連灣等處聊作聲
援明年所購兼碰快船二隻奧利思八角臺鐵
甲船一隻如可陸續到津屆時練成一軍擇要
扼紮庶北洋門戶較為有恃

上諭李鴻章所部淮軍久經戰陣亦宜有威望素著
之宿將統帶在籍提督劉銘傳應否調赴天津著
奏明辦理湖南提督李長樂如其才尚可用亦著

奏調赴津以資倚任等因欽此查湘淮營制任將
為先兵非將所素習則呼應有時不靈向來淮
軍統將戰功以劉銘傳為最亦只自統所募銘
軍並未兼轄別隊而銘軍自陝西調回後劉銘
傳劉盛藻先後假歸經臣分該軍為二一交福
建提督唐定奎統赴江南分防江陰靖江宿遷
一帶一由記名提督劉盛休統帶分駐山東張
秋昨已調該軍北移靜海之唐官屯藉濬河為
名就近調遣劉盛休樸實勇幹深得軍心尚堪
倚任惟劉銘傳智略驍果度越諸將洵屬威望

素著聞其在籍調養傷病尚未甚愈臣已馳函
往商如可剋期赴津藉資襄助當再奏明請

旨辦理至湖南提督李長樂隨臣攻戰多年向為郭
松林部下分統之將才甚可用惟郭松林所部
遣撤大半僅留數營無力添募李長樂現任專
閩若調津而有將無兵轉置閒散自應暫從緩
議

上諭張家口一路亦宜有兵屯紮李鴻章所部淮軍
現紮張秋者人數尚多著該督酌調此軍派得力
將領統率前赴該處分扼要隘等因欽此查外洋

之入中國通商貿易為第一要事俄人以買茶
為性命現僅恰克圖至張家口為運茶要道即
至失和必無用兵此路自絕生意之理况外隔
沙漠數千里漢唐迄明皆以出塞為難軍行食
用諸多不便我不便由此往即彼亦不能由此
來可以揣測而知者况張家口處懸崖絕澗之
內地形狹隘中外輻輳實不宜屯駐多營張皇
耳目前明置重鎮於宣化但分零隊扼守邊牆
亦其形勢然也昨奉

寄諭祥亨等擬於精銳營洋槍隊外由滿蒙官兵揀

選馬隊精壯四百名並令察哈爾八旗挑選精兵一千名分紮巴爾博羅柴吉兩臺仍飭每旗再挑選精兵五百名以備應援就地練兵斯為經久辦法似不宜更調客軍宣化距張家口僅六十里該鎮王可陞久歷戎行謀勇素裕現有練軍馬隊四營足資巡防臣擬令劉盛休暫派健將帶兩三營前往宣化附近擇要屯紮與王可陞練軍聯絡一氣銘軍大隊仍屯靜海如北邊有警兼程往援不過數日事機可無貽誤似屬兵家活著以上各節謹就愚慮所及殫心籌

辨斷不敢徒託空言敷衍從事致負

聖明倚任之重所有一切應辦事宜容再隨時次第
具陳謹先繕摺由驛五百里密奏伏乞

皇太后

皇上聖鑒訓示謹

奏

--	--	--	--	--	--	--	--	--	--	--

1366

1366

請撥海防經費摺 光緒六年三月初一日

奏為北洋海防經費短絀日多請

飭速議籌撥以維大局恭摺仰祈

聖鑒事竊查海防事體重大非有的餉到手不能興
辦一事內地軍需或可布置於臨時補救於事
後海上設防船須預定械須預購人須預練且
鄰釁一開各國軍火均不能購運全在綢繆於
未事之先需餉如此其急而籌餉之方非中外
一心共持定見不克有濟溯自光緒元年戶部
會議奏撥海防經費南北洋各二百萬果能如

數解到及今五年北洋受款不下千萬雖富強未足與鄰相抗然北洋三口水師必有可觀緩急自有把握詎知議撥以後未幾而抽分洋稅一半抵還西征借款矣未幾而另立招商局輪船貨稅名目改解部庫矣又未幾而議准廣東釐金截留本省福建稅釐留抵台費矣在部臣屢改已撥之款若以北洋切近

畿輔防務尤要則議改一款必須議增一款以符初議乃止議抽撥未議添撥至使外省視海防為無足重輕解款日少一日臣於光緒三年八

月間曾將北洋餉需披瀝上陳而報解仍未有起色如廣東江蘇福建三省釐金奉撥以來未解分毫浙海關洋稅自另立招商局稅名目後亦未解分毫其浙江江西湖北三省釐金及各海關四成稅實解北洋者分年勻計每年不過三十餘萬兩視原撥每年二百萬之數尚不及十成之二臣添購利器添練勁旅之志寢饋不忘終因款不應手多成畫餅論者猶謂臣歲糜巨帑不克振作有為豈知戶部所撥之額餉並非臣處所得之實餉雖欲振作而未由今往者

已不可追來者奚容再誤查上年各省關解到
北洋釐稅僅敷購買碰快船一隻之用其他訂
購蚊子船碰快船鐵甲船及緊要軍器均無指
項初猶希冀

萬年吉地

惠陵工程告歲各省財力稍紓解款可以加增近奉籌
撥東北邊防解歸部庫之

諭其中指撥各款有與前撥北洋防費准軍專餉相
同者各省財力止有此數顧此必至失彼矧患
得患失人情之常欠解部餉處分綦重孰是甘

受嚴議而籌解協餉者竊恐奉撥各處挪東補西專顧部餉雖蒙

恩令戶部分飭各省關將北洋防費准軍專餉全數解足倘各省關仍前減少或更甚於前則北洋局面岌岌難支可憂甚大自今以後臣處購買製造訓練養船添募之費有日增無日減非每年有受協的數斷難籌布伏乞

聖明俯念北洋防務屏蔽

京師關係全局北洋經費視內府泉刀尤為緊要特飭戶部總理各國事務衙門迅速會議所有原撥

南北洋經費粵海江海浙海山海閩海等五關
四成洋稅內應行提還光緒二年三月部庫撥
給西征餉銀二百萬兩一款擬請自本年正月
起即行停止仍照原議分協南北洋經費查此
項部庫撥給西征餉二百萬部議從二年七月
初一日起於各海關奉撥南北洋經費內劃提
一半解部歸還俟解清後即由各關統解海防
大臣兌收等因在案今計二年七月海關第六
十四結以後五年八月七十六結以前粵海關
已還過部庫銀六十六萬餘兩江海關已還過

部庫銀四十四萬餘兩山海關除七十六結尚
未詳報外其七十五結以前已還過部庫銀七
萬八千餘兩浙海關閩海兩關咨呈臣處之文報
不齊約略估計閩海關已還過部庫銀十五萬
兩上下浙海關已還過部庫銀八萬兩上下通
計各海關五年八月七十六結以前共已還過
銀一百四十萬餘兩又截至五年年底止各海
關尚可按結提還銀十餘萬兩加以光緒二年
臣於北洋經費內發過滇案卹款銀二十萬兩
原議在粵海等關應還部發西征餉銀二百萬

內扣算是各海關欠解部庫西征發款約計不
過二三十萬兩諒部臣斷不較量錙銖致梗臣
議矧此欠還部庫之二三十萬兩仍可於各省
奉撥西征餉內徐議提還不致日久無著又招
商局歸併洋行輪船所納稅銀即是從前洋船
之稅華洋之別在船不在商似不必另立名目
隱佔四成稅銀地步使外省無所適從擬請自
本年正月起所有各海關征收招商局輪船稅
銀仍照沈葆楨李瀚章原議統按洋稅章程劃
分六成四成分別報解無庸再立五成二四成

八等項瑣屑章程以裕餉源而符初議至閩海關截留南北洋經費理應另指關稅補撥惟關稅可指之處甚少擬暫緩請補免致部臣為難如此改議關稅項下南北洋兩處每處約可添收銀二十餘萬兩加以現收洋稅每處可共得實銀五六十萬兩此洋稅項下酌擬變通悉符光緒元年初議者又查各省釐金奉撥南北洋經費江西湖北各三十萬浙江四十萬湖北解數最優江西次之浙江奉撥之初解至九成近日減至二成臣此次奏改餉章專為實事求是

力戒欺飾以祛有名無實之病與其撥多解少何如實撥實解江西湖北浙江三省釐金若責令悉照原撥之數解足不足則予以嚴議猶恐各該省實有為難之處擬請將江西湖北各原撥三十萬浙江原撥四十萬悉按八成數目實解南北洋分收不得再有絲毫短少其江蘇原撥釐金四十萬廣東福建原撥釐金各三十萬現皆不能報解計南北洋每年每處實少收銀五十萬兩蘇粵閩皆南洋轄境在南洋截本處之餉設本處之防名實尚屬相符北洋每年少

此五十萬協款擬請改撥他省有著的款以上
原撥改撥各款悉請比照京餉章程預定延欠
處分會議奏明辦理務使每年解數實如撥數
俾臣得以就款預籌不致有名無實其淮軍專
餉並令如數籌解仍令各省一面起解一面自
行奏報一有延欠即行懲處庶各省關皆知

朝廷意旨之所向懍然於吏議之無可幸免斯餉
需可以稍裕而防務可以措手萬勿仍前虛應
故事坐失事機則大局幸甚微臣幸甚所有北
洋經費短解日多緣由理合繕摺由驛遞陳伏

乞

皇太后

皇上聖鑒勅下戶部總理衙門速議籌撥施行謹

奏

請獎英法官廠摺光緒六年三月十七日

奏為船政生徒出洋肄業洋員教導出力請

旨分別賞給寶星功牌以示鼓勵恭摺仰祈

聖鑒事竊臣等接准出使德國大臣兼肄業監督李

鳳苞咨開出洋生徒歷經照章將駕駛各生先

送英國格令尼次官學然後商派兵船製造各

生陸續商入法國官學官廠文案繙譯各員亦

送政治律例學院分投肄習瞬屆三年期滿官

學官廠各員盡心指授不分畛域不支薪費似

宜格外獎勵其向支薪水之另延教習幫同指

教均屬出力亦應酌予獎賞。西國崇尚寶星。榮於華衮而能邀他國寶星者尤以為榮。中國在洋之委員生徒既傳習其交涉駕駛製造各事擬請懇

恩酌量等差賞給寶星。頒發功牌。苟有續派生徒則鼓舞之以得其日後真傳。苟無續派生徒則酬報之。以免其終身德色。非但有益於肄業。抑且有益於邦交。今與洋監督日意格往返函商。力加刪汰。酌擇英法官學官。廠督辦總監督馬的奴得式內等共十員。又英法官民各廠學總辦。

監督孟格非埃十三員以上各員調派生徒延訂教導著有勤勞大半不支薪水擬請

旨賞馬的奴得式內等十員頭等金寶星孟格非埃等六員二等金寶星拉飛德等七員三等金寶星此外英法官學教習及另延教習佳臬等八員擬請四品軍功並三錢重鑿金賞牌歐般等十員擬請五品軍功並三錢重鑿金賞牌以資鼓勵而示榮寵等因前來臣等查前此德國兵官教練華弁出力經臣鴻章兩次奏奉

俞旨賞給寶星此次閩廠學生在洋人數尤多事務

尤繁刻下正選派生徒陸續出洋欲策後效必
應酬其前勞在洋人刻意求名不難罄其祕要
在中國所費無幾頗足隱示牢籠謹開具銜名
清單擬懇

天恩給予獎賞如蒙

俞允應由船政局照式製造寄由李鳳苞等分別頒
給除咨請總理衙門知照英法駐京使臣外所
有洋員教導出洋生徒請

旨賞給寶星功牌緣由謹合詞恭摺具陳伏乞

皇太后

皇上聖鑒訓示謹

奏

謹將英法兩國教導肄業生徒尤為出力各員
擬請獎勵開具銜名清單恭呈

御覽

計開

法國海部總理員弁並水手人等水師提督馬
的奴得忒內

法國海部總理水師各廠事務提督銜薩把帖
法國格致院長巴黎地圖局副總辦並礦院總
監督一品銜多布類

法國礦院總稽查二品銜都朋

法國水師一等總監工官學總監督總兵銜舒
有

英國格令官學總監督二品銜好士德

法國政治院總辦二品銜布德米

英國抱士穆德廠收發船表副將銜遜順

法國水師總監工副將卞那美

法國科魯蘇製廠督辦瑞乃德

以上十員擬請

賞頭等金寶星

法國汕薩芒製廠督辦前工部尚書孟格非埃

英國格林官學教習格致舉人藍伯脫

英國格林官學教習格致舉人勞敦

法國馬賽臘孫製廠總辦二品銜勒摩奴

法國馬賽製廠監督三品銜奧賽爾

法國臘孫製廠監督三品銜臘根

以上六員擬請

賞二等金寶星

法國科魯蘇製廠副總辦拉飛德

法國汕薩芒製廠副總辦畢庸

法國地中海廠巴黎副總辦舒愛把士德

法國地中海廠巴黎總稽查芳舒

法國前賽隆官學監督基爾

法國賽隆官學監督三品銜郎格內

法國水師總監工削浦官學副監督三品銜馬

丹美

以上七員擬請

賞三等金寶星

法國水師副監工削浦官學教習參將銜佳臬

法國水師副監工教習多郎學生奧濱

法國水師副監工前教習白海士登藝徒吉士

亥

法國水師副監工教習白海士登藝徒臘依德

法國水師副監工前教習削浦學生布拉

法國水師副監工教習削浦學生比俄

法國律例師前教習肄業隨員福果阿芒

法國算學舉人前教習肄業隨員福果阿貝

以上八員擬請

賞四品軍功並三錢重鑿金賞牌

英國格林官學天文教習歐般

英國海圖教習掌孫

英國製造學士汽機教習義歐

英國學士格林官學格致教習戴柏

英國格致舉人格林官學格致教習爾蘭諾得

英國水師礮學都司蘇哲爾

法國製造監工教習礦學生奧禮武

法國科魯蘇監工前教習藝徒羅甫

法國礦院官學教習基爾德

法國礦院官學教習李余爾

以上十員擬請

賞五品軍功並三錢重鑿金賞牌

商局官帑分年抵還摺光緒六年三月十七日
奏為各省撥存輪船招商局官帑擬於該局運漕
水腳項下分年全數抵還恭摺仰祈

聖鑒事竊直隸江蘇浙江江西湖北東海關等歷年
撥存輪船招商局官帑銀一百九十萬八千兩
原議商股充盈即行歸款嗣因商本未充官帑
又未便久擱經臣等於光緒三年十一月會

奏緩息三年俟光緒六年起緩利按本勻分五期
每年繳還一期銀三十八萬一千六百兩由商
局預為籌定按原撥平色銀數分赴各省關局

具結存案屆時照繳等因奉

旨該衙門知道欽遵在案今屆第一期應還之限據該局商總道員唐廷樞徐潤稟稱該局自光緒二年冬歸併旗昌洋行輪船後至三年六月底結帳計成本銀四百二十九萬餘兩四年六月底結帳計成本銀四百五十七萬餘兩五年六月底結帳計成本銀三百九十八萬餘兩五年七月以後雖太古怡和洋行力與傾擠而局中生意尚能相持此成本可望日輕之情形也又該局光緒三年結帳計存官帑銀一百九十萬

餘兩升作上海規平銀一百九十二萬八千餘
兩商股七十三萬餘兩保險商股三十七萬四
千餘兩欠旗昌洋行六十九萬兩欠華商五十
六萬兩光緒四年結帳計仍存官幣一百九十
二萬八千餘兩商股七十五萬一千餘兩保險
商股四十一萬八千餘兩船險公積九萬六千
餘兩股分存息三萬七千餘兩欠旗昌四十六
萬兩欠華商八十八萬六千餘兩光緒五年結
帳計仍存官幣一百九十二萬八千餘兩商股
八十萬餘兩保險商股五十八萬二千餘兩船

險公積十一萬九千兩欠旗昌二十六萬兩欠
華商二十九萬三千餘兩五年十二月止又拔
還旗昌十萬兩東海關等官帑十二萬六千五
百兩此欠款可望日少之情形也從前請緩三
年後拔還官帑者原因旗昌船價六十九萬不
得不先行拔還以免外人貽笑現在僅欠旗昌
十六萬欠華商亦不過三四十萬氣力已漸展
舒所存官帑原平銀一百九十萬八千兩除撥
還東海關等十二萬六千五百兩尚存一百七
十八萬一千五百兩應照原奏自光緒六年起

勻分五期每年繳還一期銀三十五萬六千三百兩擬將輪船承運漕糧應領水腳自本年為始五年之內全數抵還官帑查海運章程每石向發水腳等項曹平銀五錢六分一釐五毫八絲三忽三微本年奉江蘇行知與沙船一律核減三分嗣後實應發每石銀五錢三分一釐零如果每年運米六十六萬石應領水腳等銀三十五萬餘兩即可照原議五年歸還清結萬一江廣停運浙江撥米不能如數總當儘應收之運腳均抵應還之官帑仍以扣清之年分為止

應請飭各省糧道將此項水腳按年解存上海
道庫行知該局查照各省關局每年應還平色
銀數分別撥還俟官帑抵清後再將運漕水腳
等項歸局自領如此辦理官帑無慮其虛懸商
本亦漸冀填足惟此數年之內凡輪船運漕需
用之費皆需取給於攬儀客貨之中以後生意
雖無一定而其盈虧在商不在官今使官帑先
有著落商力無論如何總當殫心竭慮設法支
持等情真稟前來臣查各省撥存該局官帑銀
一百九十萬八千兩除已還外尚存一百七十

八萬一千五百兩按照原奏自光緒六年起勻分五年拔還每年應還銀三十五萬六千三百兩該道等指定局船承運漕糧應領水腳等項的款即自本年起由各省糧道按年解存上海道庫抵還官帑尚屬急公如果海上別無警變此項自係確有把握計嗣後運漕一石應照章實發水腳等銀五錢三分一釐零若每年運米六十六萬石應得銀三十五萬餘兩足可抵還官帑應即照此定議仍責成該道等隨時認真整頓撙節經營務使以攬載之餘資補運漕之

用費庶幾欠款日少成本日輕可固根基而期
久遠除咨行查照外理合會同署兩江總督江
蘇撫臣吳元炳恭摺具陳伏乞

皇太后

皇上聖鑒謹

奏

復陳招商局務片

再欽奉正月二十八日

上諭有人奏招商局辦理毫無實濟請飭認真整頓
經理一摺設立招商局原所以收利權而裕稅課
若但聽委用各員任意開銷浪費侵蝕深恐私橐
日充公款日虧著李鴻章吳元炳慎擇公正廉潔之
員將歷年出入各款澈底清查實心經理如有糜
費侵漁等情即行據實嚴參毋稍徇隱等因欽此
遵查輪船招商局之設係由各商集股作本按
照貿易規程自行經理已於同治十一年十一

月創辦之初奏明盈虧全歸商認與官無涉誠以商務應由商任之不能由官任之輪船商務牽涉洋務更不便由官任之也與他項設立官局開支公款者迥不相同惟因此舉為收回中國利權起見事體重大有裨

國計民生故須官為扶持並酌借官帑以助商力之不足光緒三年冬曾將該局事宜籌畫整頓復奏並飭江海津海兩關道於每年結帳時就近分赴滬津各局認真清查帳目如有隱冒據實稟請叅賠業經循辦在案數年以來雖有英

商太古怡和洋行極力傾擠而局事尚足相持
官帑漸可拔還生意次第開拓後先承運京倉
漕米各省賑糧不下數百萬石徵兵調餉解送
官物軍械者源源不絕旦夕可至豈得謂於

國事毫無實濟其攬載客貨以及出入款目因會
辦各員多有服官他省不能駐局仍責成素習
商業之道員唐廷樞徐潤總理其事局中股本
亦係該二員經手招集每年結帳後分悉開列
清冊悉聽入本各商閱看稽查若該商總等任
意開銷侵蝕則衆商不待官查必已相率追控

而自開辦至今並無入股商人控告者局外猜疑之言殊難憑信現值運漕攬載喫緊之時若紛紛調簿清查不特市面徒滋搖惑生意難以招徠且洋商嫉忌方深更必乘機傾擠冀遂其把持專利之謀殊於中國商務大局有礙總之商局關係

國課最重而各關各納稅課絲毫無虧所借官帑現據唐廷樞徐潤等稟定由該局運漕水腳分年扣還公款已歸有著其各商股本盈虧應如前奏全歸商認與官無涉只可照案俟每年結

帳時由滬津兩關道就近清查一次以符定章
惟總分各局及碼頭船隻甚多用人甚衆難保
一無糜費臣等仍隨時嚴飭該員唐廷樞徐潤
認真整頓實力經理不得稍任浪費侵蝕違則
嚴行叅辦謹會同署兩江總督江蘇巡撫臣吳
元炳附片復陳伏乞

聖鑒謹

奏

遵籌吉林防務摺光緒六年四月初七日

奏為遵籌吉林選將造船調取軍火各事恭摺覆

陳仰祈

聖鑒事竊臣欽奉光緒六年三月十六日

寄諭銘安奏練兵必先擇將請調直隸通永鎮總兵

唐仁廉及在宣化練軍之郭長雲赴吉差遣等語

該二員現在能否派往若畀以總統吉林官兵之

任是否相宜著李鴻章酌度具奏等因欽此遵查

通永鎮總兵唐仁廉前在提督鮑超軍中勦辦

粵逆素稱驍勇嗣調隨臣勦捻奮往無前自赴

通永鎮任飭統馬步四營駐防北塘海口要地
捍衛近畿正當脩守礮台喫緊之際礙難遽易
生手派赴吉林至儘先副將郭長雲湖南沅州
人向隨將軍多隆阿轉戰有年經宣化鎮總兵
王可陞稟委管帶練軍馬隊左營訓練精勤紀
律嚴整邊防雖關緊要而吉林練兵需人自應
遵

旨派往差遣其現帶馬隊應另委接替該將久當大
敵曉暢戎機能耐勞苦若令募練數營戰守當
可得力俟該處情形熟悉再酌委總統庶幾人

地相宜又奉

諭旨該將軍以三姓一帶擬造船板戰船請飭彭玉麟楊岳斌密薦水師宿將一二人酌帶船匠水勇數十人赴吉舉辦等語從前長江設有長龍舢板等船勦辦內地賊匪至三姓一帶輪船可通舢板戰船是否足資守禦及應如何設立水師以防侵越之處並著李鴻章體察情形妥籌具奏等因欽此臣查水師之設要在察敵情審地勢從前長江為粵逆竄踞賊擄民船以禦我師曾國藩故創造舢板戰船以制敵今各國輪船深入長江

正慮舢板船礮俱小不足制勝只可於內河淺
港輪船不能到之處偶一用之況輪船全恃機
器事理精奧亦非舢板水師員匠所深悉近聞
俄人在混同江口之庫頁島即日本送給之蝦
夷島開礦設廠廣製輪船每由混同江駛入松
花黑龍等江意甚叵測斷非舢板長龍等船所
能制禦此敵情之不宜也吉林黑龍江兩省腹
地如嫩江松花江皆灌輸於混同江而出東海
江岸下游大半為俄人侵占吉林之三姓阿勒
楚喀伯都訥等城濱臨混同江深淺不一俄國

輪船常來窺伺欲守陸路必須先備江防欲伐敵謀必須自固門戶殊非舢板長龍所能為力此地勢之不宜也臣詳審輿圖體察情勢似宜在三姓附近水深溜大之處設廠籌造小輪船如粵東仿造蚊子船等式喫水不過七八尺上可駛行伯都訥省城一帶下可駛巡黑河口轉入黑龍江則操縱咸宜聲勢一振既為陸軍所依賴又防俄船之侵越洵為目前切要之圖惟輪船機器工料繁重創辦之始貴能就地取材隨時變通非熟習西法製造者不能勝任查有

廣東紳士江蘇試用道溫子紹究心格致之學
機器理法洞徹本原在粵局製器多年往往自
出心裁暗合道妙即如劉坤一奏令該員仿辦
蚊船用費甚為節省志趨已迥異庸俗吉林為
根本重地創始需才視粵東防務尤關重要相
應請

旨勅下兩廣督臣張樹聲廣東撫臣裕寬轉飭溫子
紹酌帶造船得力工匠並將粵海關監督俊啟
上年代購神機營設廠之機器選擇合用者由
海道運至奉天營口再由陸運吉以資創設船

廠之需溫子紹暨隨帶工匠機器赴吉川資均由該督撫臣暨粵海關監督設法籌給俟溫子紹過津臣再諄囑其赴吉後察勘該省煤木油鐵一切料物何者可就地取用何者須在外洋及南省購運開廠之始及常年經費樽節估計約各需若干稟由臣及銘安等核明奏請勅部於東北防餉內撥定專款次第興辦庶於吉黑兩省大局有裨如果溫子紹赴吉創造輪船得用臣與銘安等當籲懇

天恩破格獎擢以鼓勵人才又奉

上諭所請由天津機器局撥給 百觔洋礮二尊三
百觔四尊二百觔四尊馬上洋槍一千二百桿帶
刺步槍二千三百桿洋火藥三萬觔洋銅帽二百
萬顆洋鉛彈子二百萬粒著李鴻章酌量撥給以
資應用等因欽此查槍礮藥彈為練兵所必需天
津機器局專造洋火藥銅帽及各項子彈源源
濟用洋砲洋槍近來新式仿製甚費財力隨時
由滬甯各機器局調取及由西洋訂購儲備無
多茲飭軍械所委員會同機器局籌撥甯局所
製十二磅來福開花銅砲六尊車架箱具俱全

並配炸彈六百顆木信六百六十個銅拉火一千枝恩費爾來福馬槍六百桿恩費爾來福兵槍一千桿大銅帽二百萬粒鉛箭二百萬粒砲藥三千磅槍藥二萬七千磅共計合價銀一萬八千六百四十餘兩咨由銘安派員來津領運暫資應用津局經費支絀前項軍火價值飭行長蘆運司於積欠吉林餉內扣抵籌還以免轉輻所有遵籌吉林設防各事宜謹繕摺由驛覆陳伏乞

皇太后

皇上聖鑒訓示謹

奏

三

丁

定造鐵甲船摺光緒六年六月初六日

奏為前議定購英國鐵甲船二隻現據電報英不肯售擬令訪求新式剋期在洋廠訂造以備戰守恭摺仰乞

聖鑒事竊本年二月間接據出使大臣李鳳苞函稱英國海部允轉售土耳其八角台鐵甲船兩隻諄屬當趁中國未開鄰衅之前成議等語臣當即電覆該大臣迅與定議一面奏請

勅下福建將軍督撫臣先行湊解柏爾來一船價銀
欽奉

寄諭飭遵在案嗣准穆圖善何璟等籌湊規平銀六十萬兩解交江海關道彙同部撥三十萬出使經費提墊二十萬存備撥兌方冀該船早日成交來華應用詎接李鳳苞四月十九日電報英新部臣不肯售鐵甲應否擇善訂造又李鳳苞四月初五日函稱英海部易人舊執政所允二鐵甲均作罷論當此中俄交涉喫緊之時新聞紙議論紛紛英國家礙於公法不能再踐前言應否赴英廠另行訂造之處望酌核示遵各等語臣查中國購辦鐵甲船之議已閱數年祇以

經費支絀迄未就緒近來日本有鐵甲三艘遽敢藐視中土至有台灣之役琉球之廢俄國因伊犁改約一事迭據探報添派兵船多隻來華內有大鐵甲二船噸數甚重被甲甚厚無非挾彼之所有以陵我之所無意殊叵測鐵甲若非利器英人何至忽允忽翻悖弗肯售今欲整備海防力圖自強非有鐵甲船數隻認真練習不足以及控制重洋建成銷萌斷無惜費中止之理臣早慮英或見好俄人不肯轉售已於四月十七日緘屬李鳳苞如所議無成即查照新式在

英廠訂造鐵甲二隻應以何廠何式為宜約幾年造成價分幾次勻付請其迅速酌定電示誠以需用孔亟之器又得籌備有著之款若因循歲月坐失事機豈不可惜現計閩省解存上海及部撥並提出使經費約一百一十萬又總理衙門奏定南洋擬購碰快船之六十五萬合共百七十餘萬以抵訂造兩號鐵甲船價所短不過數十萬俟李鳳苞在洋議定合同起造分次籌匯期限較緩力量稍紓容隨時會商南洋大臣妥籌奏明請

旨辦理抑臣更有請者中國南北洋面將及萬里僅有鐵甲船兩隻分布不敷仍無以振

國威而壯遠勢况現擬訂造之船應分閩省南洋各一隻北洋為

京畿門戶處處空虛無論何國有事敵之全力必注重在北若無鐵甲坐鎮僅恃已購之碰快蚊船數隻實不足自成一隊阻扼大洋則門戶之綢繆未周即根本之動搖可慮以臣愚見北洋應再定造鐵甲船二隻所需經費亟應豫籌湊撥查有淮南北鹽商議捐報効銀一百萬兩分

岸分年按引收解在戶部為課釐外加增之款
非正項可比原為籌防起見與其零星支放仍
無濟於大宗軍需不若湊作整款可有裨於防
海利器又本年三月間經臣奏定各省撥借輪
船招商局官款擬於該局運漕水腳項下分年
扣還計每年應拔還銀三十五萬餘兩在各省
多屬間款其繳還之多少有無無關緊要應請
酌提招商局三屆還款約一百萬零抵作訂造
鐵甲之需分年撥兌於軍國大計裨益非淺目
今時勢艱危極矣議者攘臂言戰每怪海疆防

務有名無實又不肯籌集巨款自來兵事非餉莫辦即如俄兵號稱強盛鐵甲船及後門鎗礮皆所素備然曾紀澤來信今春俄猶在英國銀行借一千五百萬金磅已合銀五千二百餘萬兩又向德奧各國分借巨款是其不惜糜費以與我爭勝而我猶執往日之軍器兵餉以禦強俄得失之數可揣而知且今之餉源更窘於咸同用兵之際臣謬任北洋海防歲撥經費僅解到三四十萬而責以籌顧遼海千餘里洋防雖才力百倍於臣者亦無可為也臣明知訂造鐵

船即令款項湊手亦須三四年乃可來華。但不
及今定辦以後更無可辦之資。能辦之人。而洋
面毫無足恃。目前俄人窺犯固無從鎮扼。即日
後他國憑陵亦將何以抵禦耶。伏求

聖明規畫久遠。力破浮議。

俯允所請。飭下戶部及江浙各督撫。臣照撥兩淮捐
項及招商局按年拔還之款。俾資續造鐵甲為
北洋捍門戶為

京畿固根本。俟奉

旨後。臣即電屬李鳳苞酌擇洋廠一併訂造。嗣後應

辦事宜仍由臣次第妥晰籌議具奏至碰快水雷等船皆所以輔佐鐵甲戰守兼資需款較少。應由南北洋自行籌湊隨時添購不在此數。蓋有鐵甲而各船運用皆靈無鐵甲則各船僅能守口未足以言海戰也。所有英國鐵甲船罷議擬另籌在洋訂造各緣由謹繕摺由驛五百里密陳伏乞

皇太后

皇上聖鑒訓示施行謹

奏

撥補出洋肄業經費摺

奏為閩廠出洋肄業生徒各項經費尚不敷銀二萬三千兩擬請於出使經費項下暫行撥補恭摺仰祈

聖鑒事竊臣接准船政大臣黎兆棠咨稱閩廠出洋肄業生徒原奏三年為限原估酌需經費銀十九萬二千六百五十兩零內閩省稅釐局勻解四分之二閩海關四成洋稅勻解四分之一船政勻撥四分之一並聲明第一年酌帶學生出洋量繪游歷及三年內華文案並隨員學習交

涉公法應支脩金等費未計在內核計三年限
內閩海關稅釐局船政所勻之款業經分年匯
解在案茲准監督兼出使大臣李鳳苞開摺補
領三年限內不敷經費一千磅續留生徒約估
經費一千九百餘磅購置書籍約估四百四十
磅華洋員生徒回國路費三千六百磅約共七
千磅約合庫平銀二萬六千四百兩又奏准分
賞西洋教習寶星金牌約工價銀七百餘兩統
共約銀二萬七千一百餘兩除出洋本款僅存
銀四千一百餘兩外尚不敷銀二萬三千兩既

准李鳳苞咨催補解未便久延而船政支絀異常無力設籌咨請轉總理衙門在於積存出使經費項下照數撥補以濟急需等情前來臣查原估出洋肄業生徒經費本係約略搏節核計其不敷之數自應隨時籌補茲船政費用支絀異常黎兆棠迭次來緘幾於朝不謀夕實屬無可籌措而續留在洋生徒肄習正勤及各員生回華路費奏准

頒賞英法各教習寶星金牌等款皆關緊要刻不容緩既據咨請於出使經費存項內暫行撥補為

數無多且同是出洋用款情理亦順臣因轉咨
總理衙門核覆項准函稱尚可照撥應由臣奏
明辦理等因合無仰懇

天恩俯准暫行照數撥給以濟出洋生徒要需嗣後
續造生徒仍由閩省將軍督撫船政大臣會商
就本款籌解免致顧彼失此除俟奉

旨後再咨行照辦外謹繕摺附驛具陳伏乞

皇太后

皇上聖鑒訓示謹

奏

請催海防經費摺光緒六年六月二十五日

奏為北洋海防經費各省關報解無幾請

旨嚴催以警玩泄而維大局恭摺仰祈

聖鑒事竊維北洋屏蔽

畿輔海防關係重大今日之政務無有切要於此者光緒元年戶部等衙門原撥經費摺內稱各省關倘有推延情事即由南北洋大臣指名奏叅前數年事機尚緩臣惟恐各該處兼顧為難雖解不足數未肯遽予叅劾本年俄事漸形決裂鐵甲兵船陸續東來事機之緊急防務之危

險百倍於前而籌餉又為籌防之本是以於本年三月初一日專摺

奏催經費摺內詳言海防事體繁重非的餉到手不能興辦各省關遶延處分應仿照延誤京餉之例辦理又恐原撥數目各省實有不能解足之處若予嚴議難昭折服請將各省奉撥釐金悉按原撥八折實數解足不足即照延誤京餉例議處嗣准戶部總理各國事務衙門會議具奏准如所請辦理臣方謂各該督撫司道監督誰非臣子誰無天良自此次愷切奏催後必能共

體時艱力籌報解孰意自本年正月至今已屆
半年各關奉撥洋稅惟山海江海兩關尚係隨
徵隨解其粵海浙海兩關自上年十一月二十
日第七十八結以後時逾半年尚未據報起解
實屬不知緩急各省奉撥釐金惟湖北省解到
四萬兩江西省解到二萬兩又已報未到銀一
萬兩年內能否解足原撥八折實數尚未可知
江蘇奉撥釐金前據督臣劉坤一面述情形擬
到任後再為竭力籌措惟浙江一省半年以來
未據報解分文亦無咨稟隻字具覆在該省必

以留支協餉入不敷出為詞試問浙江留支之
用項與浙江協濟之各省視北洋海防孰輕孰
重孰緩孰急該省釐金如半年以來未收分毫
則已但有收項即應先解臣處迺似此漠不相
關置之度外誠不知是何居心今歲北洋已放
之款如碰快船價六十餘萬兩後門槍價二十
數萬兩加以零星購定水雷機器員弁礮船新
水海口電報等項通計已用去百萬兩庫儲告
罄其已訂未放之款更鉅不知何出焦急萬分
若再將延欠協撥省分徇隱不言待至年終始

行糾劾。雖將該管司道從嚴處分於已失之事。機何補。乘此力圖報解。猶可以速補。遲。相應請旨飭下浙江巡撫。嚴飭司道監督。趕緊如數報解。大批以救眉急。釐金必解足八成。關稅必照章提。前勿再因循貽誤。此外湖北江西江蘇等處。應解之釐金。粵海江海等關。應解之洋稅。並請飭下各該督撫監督。嚴飭趕緊報解。力求足額。倘再延欠。即由臣年終核叅查照。延誤京餉例議處。臣為海防緊要起見。謹繕摺由驛五百里。瀝陳伏乞

皇太后

皇上聖鑒訓示施行謹

奏

巴西議約竣事摺 光緒六年八月初三日
奏為遵

旨與巴西使臣議立通商條約現已事竣恭摺仰祈
聖鑒事竊巴西國正使喀拉多副使穆達於六月初
抵津經臣接晤開導該使堅求循例議立通商
條約並未提及招工當將情形奏報請

特派議約全權大臣就近會商妥辦欽奉六月初八
日

上諭已另有旨派李鴻章為全權大臣事關通商立
約該大臣務當悉心籌畫按照各國約章酌議變

通總期周密妥善免致將來窒礙本日簡派全權大臣諭旨一道一併發往如該使索看憑據即著李鴻章恭錄給與閱看俟議約事畢此旨仍繳還軍機處備查等因欽此臣以津海關道鄭藻如熟悉洋情辦事精核候選道馬建忠游學西洋多年於各國交涉事例探討極熟遂督同鄭藻如馬建忠悉心籌酌與該使喀拉多等往復會議查中西互市以來立約十有餘國因利乘便咸慮損我以自肥若不設法維持逐漸收回權利後患殊多此次巴西議約數易其稿幾於筆禿

唇焦嗣以秘魯條約為底本刪去招工各條並
參用別國條約定為十六款該使旋以第七款
間有文義重複請酌刪字句因無甚緊要亦即
允行其關係中國權利者皆力為辯論變通酌
定如第一款兩國入彼此皆可前往僑居句下
添入須由本人自願一語即寓禁阻設法招致
之弊第三款設立領事官必須奉到駐紮之國
批准文憑方得視事如辦事不合可將批准文
憑追回本條西國通例其立法之善有二一則
其人或非平素公正或與我國向不決洽我皆

可以不准一則通商口岸或係新設人情未安
不欲領事驟至我亦可以不准至辦事不合追
回文憑是予奪之權我亦得而操之從前中國
與各國立約因不知西例皆未議及此層是以
各國派來領事我竟不能過問中國派赴各國
領事則須該國准認乃得充當殊於體制有礙
今特於巴西約內添入俟開辦時擬由總理衙
門即將批准文憑咨送南北洋大臣發交各關
道轉給俾示維繫惟變法之初未可過於嚴峻
以後他國換約修約咸知辦理近情而又逼於

公法或可冀其仿行不致相率堅拒第四款游
歷執照一節洋人游歷各處多由領事自填執
照送請關道用印幾若內地往來全憑領事作
主今改為領事照會關道請領印照可稍助地
方官之權第五款遵守專章一節即是德國新
約第一款之義查均霑二字利在洋人害在中
土設法防弊實為要圖前閱日本近與各國議
改約稿於優待別國提明出於甘讓及互相酬
報字樣蓋曰酬報則必彼國有利益予我而後
我國以利益酬之即遇強國從權予以利益彼

強國亦必有益我數事以副酬報之名曰甘讓
則必彼此重在交誼而非屈於勢力果能堅守
此義則凡希冀同需者非先允遵守酬報之專
條我可不准或其酬報之專條不能一體盡遵
我亦可以不准或我所讓與別國之利益非出
甘心則局外雖欲援例同需我仍可以不准也
今參用此義特為聲明嗣後如有優待他國利
益彼此須將互相酬報之專條或互訂之專章
一體遵守方准同需優待他國之利益似較周
妥第六款本擬照德國新約酌用漏報捏報辨

法惟巴約係仿祕魯約本並無通商詳細章程
若僅添漏報捏報一層轉恐掛一漏萬今定為
兩國商人商船凡在此國通商口岸即應遵從
此國與各國原議續議通行商務章程辦理即
有續議字樣不特德國漏報捏報充公議罰之
章巴西理當遵守即後此再有商務新章巴西
亦應照辦似更包括第九第十第十一第十二
等款皆指問案之事查西國案件俱由地方官
訊斷領事不得干預惟中西律法懸殊各國不
能聽地方官審辦於是領事遂有其權此次本

擬參酌西國公法問案專歸地方官而科罪則各照其國律巴西使臣既不肯首先改章致招各國之怨適德國公使巴蘭德過津從旁酌商乃定為被告所屬之官員專司訊斷各照本國律例定罪蓋被告多係華民前因會審掣肘喫虧不少茲由被告所屬之官訊斷當可持平辦理其華民在各口行棧商船傭工者大都恃洋人為護符遇有犯案不聽傳喚雖照會領事飭交而洋人轉為庇匿藐法養奸所關匪細茲於第十款內議明聽中國官員派差逕往拘傳審

理以免庇縱又第十一款內將來另議中西交涉公律巴國亦應照辦一節雖公律驟難定議究為洋務緊要關鍵特倡其說以作權輿以上各節皆臣按照各國約章酌議變通期歸妥善該使喀拉多等初甚狡執徑欲照英法舊約辦理反覆爭辨兩月之久始就範圍今既遵允勢固不能中悔將來各處循照議定條款妥慎辦理凡緊要樞紐勿任略有通融冀可漸收權利至洋藥一項雖非巴西出產惟中土受害滋深今議令該使知會該國外部查酌禁止巴商販

賣先由該使另備照會送臣存案臣亦給予照
覆現將議定條約酌配用中國文巴西文法國
文各四紙校對無訛即於八月初一日在公所
會同畫押鈐印彼此各存正副本二分以便屆
時互換除將存留條約正本又照錄禁販洋藥
來往照會備文封送軍機處代為進呈

御覽原奉全權大臣

諭旨敬謹封固咨繳軍機處備查並將條約副本咨
送總理各國事務衙門查核外所有巴西議約
事竣緣由理合恭摺由驛覆陳伏乞

皇太后

皇上聖鑒訓示謹

奏

謹將巴西國議約案內禁販洋藥及領事批准
文憑交發並無費用來往照會鈔錄恭呈

御覽

巴西國使臣喀拉多穆達原來照會

為照會事本月二十一日日本大臣與鄭關道馬
道台會商約稿除法文另行修飾更正外所有
條約各款業已商定本大臣甚為欣悅其巴民
不得販賣鴉片一語鄭關道馬道台屢奉貴大
臣鈞諭重申前議本大臣惟遵奉國家指意來
華議約使各國商民在中國所得之益亦使巴

民一律均霑惟念巴國商民來華貿易即不販賣鴉片一貨亦無害經營之盛大是以本大臣欲滿貴大臣之所願擬不日咨會本國管理外部大臣禁止巴商不准在中國販賣鴉片但此件另於條約之外附一公牘並聲明兩國領事官所奉到駐紮之國批准之文憑其臨時彼此交發均無費用等語可也即希貴大臣照復以無論日後巴國外部果否允准禁止商民販賣鴉片不得因此一端致阻和款即日定約畫押蓋印仍俟兩國

御筆批准再行更換則貴大臣之所以酬本大臣者
可云厚矣須至照會者

光緒六年七月二十一日即西歷一千八百八
十年八月二十七日

照覆該使臣喀拉多等原稿

為照覆事查此次商定條約各款既蒙貴大臣
允即咨會管理外部大臣禁止巴商不准在中
國通商各口販運鴉片具徵貴大臣存心公正
曷勝欣佩本大臣暫允此事不列條款之內彼
此附一公牘存案即日先將條約畫押蓋印仍
俟兩國

御筆批准再行互換之日公同商酌將禁止巴民販
運鴉片一節另行備文知照至約內兩國領事
官必須奉到駐紮之國批准文憑方能視事此

項文憑臨時彼此交發均無費用合併聲明為
此照覆貴大臣查照須至照覆者

光緒六年七月二十六日

請設南北洋電報片

再用兵之道必以神速為貴是以泰西各國於講求鎗礮之外水路則有快輪船陸路則有火輪車以此用兵飛行絕迹而數萬里海洋欲通軍信則又有電報之法於是和則以玉帛相親戰則以兵戎相見海國如戶庭焉近來俄羅斯日本國均效而行之故由各國以至上海莫不設立電報瞬息之間可以互相問答獨中國文書尚恃驛遞雖日行六百里加緊亦已遲速懸殊查俄國海線可達上海旱線可達恰克國其

消息靈捷極矣即如曾紀澤由俄國電報到上海祇須一日而由上海至京城現係輪船附寄尚須六七日到京如遇海道不通由驛必以十日為期是上海至京僅二千數百里較之俄國至上海數萬里消息反遲十倍倘遇用兵之際彼等外國軍信速於中國利害已判若徑庭且其鐵甲等項兵船在海洋日行千餘里勢必聲東擊西莫可測度全賴軍報神速相機調援是電報實為防務必需之物同治十三年日本窺犯台灣沈葆楨等屢言其利奉

旨飭辦而因循迄無成就臣上年曾於大沽北塘海口礮台試設電報以達天津號令各營項刻響應從前傳遞電信猶用洋字必待繙譯而知今已改用華文較前更便如傳祕密要事另立暗號即經理電線者亦不能知斷無漏泄之慮現自北洋以至南洋調兵饋餉在在俱關緊要亟宜設立電報以通氣脈如安置海線經費過多且易蝕壞如由天津陸路循運河以至江北越長江由鎮江達上海安置旱線即與外國通中國之電線相接需費不過十數萬兩一半年可

以告成約計正線支線橫亘須有三千餘里沿
路分設局棧常年用費頗繁擬由臣先於軍餉
內酌籌墊辦俟辦成後仿照輪船招商章程擇
公正商董招股集貲俾令分年繳還本銀嗣後
即由官督商辦聽其自取信資以充經費並由
臣設立電報學堂僱用洋人教習中國學生自
行經理庶幾權自我操持久不敝如蒙

俞允應請

飭下兩江總督江蘇巡撫山東巡撫漕河總督轉行
經過地方官一體照料保護勿使損壞臣為防

務緊要反覆籌思所請南北洋設立電報實屬
有利無弊用敢附片縷陳伏乞

皇太后

皇上聖鑒訓示謹

奏

覆奏言路條陳摺 光緒六年八月二十七日
奏為迭奉

寄諭彙摺覆陳仰祈

聖鑒事竊七八月以來言路條陳天津軍事仰煩

宸慮飭臣妥籌辦理茲謹分條逐一覆陳七月初二

日御史黃元善奏天津海口嚴加防範一摺臣

查津沽之防本未嘗一日鬆勁洋人來晤者或

稱沿邊沿海空虛甚多或謂各路兵勇不盡得

力臣為大局計不能不心以為危若就津沽論

彼尚未敢恫喝臣亦未稍為所動也御史邵曰

濂請酌派曹克忠倡辦天津團練與庶子張之洞奏沿海宜辦團練大意略同夫民團不能與洋兵搏戰人人知之粵捻之役幾二十年辦團幾徧十八省其能助官軍擊賊者寥寥可數而斂費擾民抗糧拒捕之弊百出不窮至堵禦外夷又與勦辦內匪迥別各國麇聚口岸若無事而自擾之或鹵莽從事為患更甚或謂津民好義尚氣然咸豐庚申大沽之敗未聞民團有與敵為難出死力幫同堵勦者臣與曹克忠商議該提督謂有警之際或可集衆助勢目下敵兵

未動斷不宜稍涉張皇搖惑民心與臣所見相
合又七月十一日張之洞條陳海防事宜一摺
內稱天津重兵不宜全聚海口臣處本係如此
籌辦大沽海口現派副將羅榮光練兵一千八
百人親軍礮隊五百人分守南北岸礮台而助
以記名總兵劉祺直字營勇千人副將史濟源
練兵五百人北塘海口現派通永鎮總兵唐仁
廉統帶練兵一千二百人仁字營勇五百人分
守南北岸礮台而助以參將趙喜義營勇五百
分防煙頭沽至大沽後路以新城為扼要前雲

南撫臣潘鼎新督同提督葉志超練軍馬步四營守之北塘後路以蘆台為扼要直隸提臣李長樂督帶練軍及武毅馬步四營守之提督周盛傳所統盛字馬步十六營令其雙駐小站馬廠一帶距大沽數十里至百餘里提督劉盛休所統銘軍馬步十一營令其暫駐興濟鎮距北塘約二百餘里意在布遠勢蓄威重作為兩路策應游擊之師視敵所向即率行隊縱橫援剿臣自督天津淮練七營居中調度目前分數層扼紮有事時可首尾相應正不必拘定某處為

二敵三敵四敵也又稱大沽營口宜備水師為
奇兵查大沽現有新增蚊船四隻與礮台相依
助自可相機夾擊沿海漁船各有生業未便多
調亦斷不能驅令圍攻敵船又稱提督劉銘傳
總兵張得勝婁雲慶王可陞均請催調赴津查
劉銘傳將略最優臣於春間遵

旨函商該提督北來襄助接據緘覆大病之後肝火
內鬱兩目昏瞽難遽遠行昨復欽奉

諭旨飭催來京臣又備文加函敦勸矣該提督勳望
智略實不在鮑超之下昔年督辦陝西並未遇

賊竟遭讒毀素性耿直不受羈勒未免抑鬱以
去此次如投袂赴

闕惟祈

溫諭慰勉假以事權其才可當一面至張得勝戰陣
頗勇訓練稍疎自無庸令募楚勇聽用婁雲慶
王可陞各有本任職守亦無庸紛紛檄調又七
月二十日沈馬周德潤奏速籌戰守一摺內稱
淮軍將驕卒惰素耽安逸恐虞潰散等語查津
防淮軍無事時督令築城浚河屯田穿渠修整
礮台營壘工作之暇朝夕練習鎗礮講求西洋

撰法其勞苦倍甚於他軍所謂驕惰安逸者何在臣於本年二月十九日已附片奏明斷不至臨敵潰散貽

君父憂不謂積誠未足以感人闇修未足以孚衆惟有恪遵

聖訓明定賞罰認真操練精益求精冀得一當以副責望至稱平原空闊宜掘地作營以避鎗礮查營內空地避礮乃兵家常用之法平原則不相宜若我兵盡藏窩中敵至將掩覆之聚殲之耳安能制敵又八月十七日御史蕭韶奏吉林緊

要請調勁旅一摺內稱琿春東北俄兵湊集淮軍鎗礮較精請抽調四五百人馳赴該省交銘安等調遣並酌調各省勇丁填紮原駐地方等語查吳大澂赴吉時曾商調直隸州知州戴宗騫選擇淮軍熟悉洋操將弁勇丁三百人帶往臣並酌給後門鎗開花礮若干令戴宗騫於七月間啟程比當抵吉就地添募逐漸訓練藉開風氣至臣部淮軍上年遵部議裁減後僅有二萬八千餘人分防天津保定馬步只一萬六千餘人布置要地屏藩京畿固不可再稍抽動其

分防江南一萬餘人駐扼吳淞江陰揚州金陵等處亦皆江海門戶劉坤一奏請臣勿調赴直更不便抽赴吉林至所稱由他處調勇填補除沿海省分勿庸議外湖北自調李長樂之武毅軍劉維楨之忠義營赴直其留防不及十營安徽自調郭寶昌所部赴直留防亦無多人江西防勇本單均難酌撥且內地防軍但取彈壓土匪而已器械不精操練不熟慮未足以當大敵南北海疆關係重要豈可於臨敵之際易將撤兵顧此失彼吉林現有銘安吳大澂添練各隊

加以喜昌新募五千人果能認真訓練精求軍
實或可稍壯聲威臣職司拱衛熟審機宜謹就
一得之愚據實覆陳由驛四百里具奏伏乞

皇太后

皇上聖鑒訓示謹

奏

妥籌鮑軍事宜片

再迭奉

寄諭准鮑超募勇一萬三千八百人由輪船北來於
天津山海關兩處適中之地擇要駐紮著妥籌奏
明辦理等因欽此查鮑超百戰驍將戰守自屬可
靠惟新募之衆器械未精訓練未熟將來到防
後尚祈

聖明隨時訓戒嚴申紀律認真操練庶兵民可冀相
安臨事可得實用至其駐紮處所須早酌定以
便輪船就近停泊登岸臣先飭招商局道員唐

廷樞坐小輪船在直境沿海一帶測量水勢據稱北塘迤東至灤河口約三百里盡屬平灘不但輪船無從近岸即民船亦難停泊惟灤河以東撫甯境內之洋河口向多海船來往輪船亦易泊岸請指定該處停輪卸載等語臣已據稟分咨湖廣督臣李瀚章暨鮑超查照既奉

諭令該軍於天津山海關兩處適中之地擇要駐紮臣查直境瀕海地方惟東路較為空虛距京亦甚密邇前明設防薊州永平為山海關後路重鎮義固有在今昔情事雖異而形勢無甚懸殊

臣愚以鮑超一軍宜屯紮於永平府屬之昌黎灤州樂亭沿海一帶為天津山海關兩處適中前後策應調度似甚靈便該州縣距輪船起岸之洋河口均僅百餘里轉運亦近可省沿途車馬供億之煩合無仰懇

聖恩飛飭鮑超遵照妥辦至該軍餉需軍火雜項每月約須九萬餘兩關係至重直隸固無從代籌各省亦難再指撥欽奉

諭旨著戶部籌給應用並請

勅部預籌接濟仿照吉林各處辦法飭由鮑超自行

派員出具印領按月就近赴部支給事竣即由
該提督自行報銷以專責成而免轉轄理合附
片懇陳伏乞

聖鑒訓示謹

奏

妥籌朝鮮武備摺 光緒六年九月初四日

奏為朝鮮講求武備遵

旨妥籌恭摺密陳仰祈

聖鑒事竊臣承准軍機大臣字寄八月二十九日奉

上諭禮部奏據朝鮮國王咨稱該國講究武備懇為

轉奏請旨俾該國匠工學造器械於天津廠等語

著李鴻章妥籌具其咨內所請簡選解事人員或

於邊外習教一摺並著李鴻章詳審其意一併妥

籌迅奏該國使臣業經該部安置居住俟該督覆

奏到日再降諭旨原咨著鈔給閱看等因欽此仰

見

聖謨廣運眷顧東藩至意欽佩莫名伏查朝鮮僻處
海隅向於外交之道禦侮之方漠不介意日本
窺其孤弱脅以兵威先與立約通商實則隱圖
侵逼去年七月臣密奉

諭旨查照前福建撫臣丁日昌所陳各節致書朝鮮
原任太師李裕元勸以密修武備慎固封守與
英法德美諸邦逐漸立約藉以牽制日本即可
備禦俄羅斯並告以熟悉西國商情軍火利器
不難購辦等語已將原稿鈔呈

御覽是年十月朝鮮貢使入都道出永平據前永平府知府游智開密稟李裕元給伊另函謂該國本意不欲與他國來往牽於衆議不敢主持惟該國輿論擬仿古外國入學之例咨請禮部揀選明幹人員赴津學習練兵製器之法臣謂果有成議未始非該國自強之基曾密屬游智開詳告該使本年二月復由游智開遞到李裕元去冬覆函大致謂泰西之學素所深惡不欲有所沾染又以該國貧瘠不能多容商船為詞已將原函鈔寄總理衙門存案竊思地球諸國惟

朝鮮風氣最晚該國士大夫囿於見聞昧於時勢墨守成法閉拒忠謀雖日即於危弱而不顧此殆有氣運主之非人力所能為者今該國既以講武為請正可因其一線之明迎機善導增彼軍實固我藩籬惟是該國練習此事即使始終勤奮其收效亦在數年之後就目前事勢而論則有迫不及待者自去冬以來中俄和約未定積有違言俄之鐵甲快船兵船二十餘隻陸續東駛並厚集陸軍分布吉林海濱之海參崴摩濶歲一帶豫儲煤糧軍火甚富六月間有美

國水師總兵蕭佛爾赴朝鮮議約被拒旋來津
與臣會晤據稱美國尚無用兵逼勒之意但俄
人已費巨餉遣將調兵勢必不肯中止若不圖
中華恐遂吞併朝鮮八月間法國水師提督瞿
貝賚過談謂探聞俄海部尚書黑沙士幾之意
欲赴琿春攻奪朝鮮海口陸則斷奉吉之右臂
水則扼北洋之襟喉規畫甚為雄遠又謂朝鮮
東界海口形勝為東方之最俄人故欲取之以
與琿春海參崴等處犄角其餘各處探報及新
聞紙所論大致相同蓋俄人所據之海參崴綏

芬河圖們江各境皆與朝鮮東北接壤彼既佔東海口岸為巢穴自必漸圖開拓若吞併朝鮮即拊我東三省之背使中國岌岌不能自安是朝鮮與我國實有唇齒相依之勢不能無休戚相關之情當此兵餉兩絀中國沿海各口尚未能處處周防斷無餘力兼顧藩服似只能就其力所逮者而利導之萬一俄事稍紓俾朝鮮得於數年內力擴新機整軍經武保衛東隅未始非中國之幸也惟該國匠工來津學習機器此中亦有繁難之處查天津初設機器局不過仿

造洋火藥銅帽等項厥後疊次擴充添購機器
火藥多出數倍自造士乃得林明登後膛槍子
克鹿卜格林後門礮子蚊船大礮子之屬光緒
元二年間亦曾自製後門槍因工費甚鉅較購
自外洋者價幾逾倍即經停止各軍所用槍礮
專向西洋定購但源源供給子藥零件今朝鮮
匠工來學即使盡嫻各法聞該國所用土槍僅
與中國絲營之抬鳥槍相等其製造機器及新
式槍礮仍須購自外洋是無其器而不能用也
西洋槍礮其準線口令步伍非操演數年難以

純熟是無其人而不能用也臣愚以為既准該國來習機器將來必須代為購器代籌練兵皆事之連類而及缺一不可者又該國匠工言語不通來局之後應如何設法教導俾獲漸窺門徑擬請

勅下禮部揀派通事人員伴送該國使臣卞元圭到津由臣督同局員與之熟商辦法再行奏明請旨施行至該國王原咨內所稱簡選解事人員或於邊外習教及來學往教等語文義似未甚明晰臣就事理度之今如中國派員往教該國既無

機器匠工又無現成槍礮斷難獲益自應先由該國挑選匠工來廠學習并選聰穎子弟來津分入水雷電報各學堂俾研西法本末兼營較有實際至練兵一事將來或選派熟悉員弁往教或由該國派隊來從我兵操演購器一事或乘中國訂購之便寬為籌備劃付均應隨時酌度情形妥商辦理臣比接李裕元來書頗知戒備不虞以講戎器械為兢兢並致送禮物甚厚想因所圖之事關係頗重意在豫聯情誼從前李裕元以該國邊事與臣通問每附土儀數種

臣援古人贈帶獻衣之義兼仿

盛世薄來厚往之經必為加倍酬答此次禮物較

多未敢擅便謹將原函及禮單鈔呈

御覽應否收受由臣加倍酬答之處伏候

聖裁至朝鮮與西人通商一節實係謀國要圖與練

兵製器相輔而行其李裕元來函俟奉

諭旨後即當裁復臣仍擬不憚苦口善為開導冀其

或有轉機庶免為他國所兼併所有朝鮮講求

武備遵

旨妥籌緣由恭摺由驛密陳是否有當伏乞

皇太后

皇上聖鑒訓示謹

奏

卷八

八

謹將朝鮮國致仕太師李裕元來函並禮單敬
繕清單恭呈

御覽

文華殿大學士肅毅伯俞爵前本年季春

貢使回得承永平游太守書盛傳爵前仁政布於
寰內威名施諸海外莫非尊

主庇民有辭千秋小邦黎庶咸思霑之恩非不欲種
種恭採鈞節山海漠漠界疆有限末由展誠景
仰結轡曷有其極秋涼驟至鈞體度對時萬康
警鐸不動衛戟凝瑞瞻望津雲若拜床下小邦日

本之人稍似講好德源開港商舶來往江戸送
使書契脩謝姑無圭角實賴爵前左右之力實
遵爵前指教之方而忽於春夏間佛國及米國
書本自萊館要其送納小邦以非約條中事措辭
退却蓋他國書之自日本藉送不得施行曾有
交鈐而然也若有意外層節則不得不仰告於
爵前更蒙乙亥冬斥退森有禮之澤此舉國之
所仰望也小邦國王此際憂虞宵旰靡弛文而崇
儒重道武而講戎敕械先選六條之士廣開百
技之門惟我

上國是則亦惟我爵前是倚派定別咨官卞元圭
前往

京都齋文陳白於禮部未知回施之如何而上年
因游太守言已知爵前之微意故敢將咨草先
從永平以為轉達伏維慈惠之念必有周全若
或

准可則下次事無鉅無細專仰爵前稟定而不以卑
鄙隨處戒飭俾有實效奚特一邦之幸亦獲藩
屏之固矣先生依舊在林泉逍遙之間老曠轉甚
無足相問而今於茲事不敢辭為張皇懇衷兼

奉禮單庶或亮收不備謹呈直隸總督伯翁爵
前庚辰七月初九日

禮單

倭繒疋紐十端

曲生綃十端

土綢二十端

上黃細絺布十端

上白細絺布十端

加重生綢五十端

細縑布五十端

大漆篋二百把

芭蕉圓扇一百柄

大圓扇十柄

細簾子五雙

滿花席子十立

色紙二十軸

大搗厚紙三十軸

白楮二百束

上上製山徑清心元一百丸

紅仁參五十觔

白仁參三十觔

大腹魚二百箇

江瑤珠一百貼

柚子清一缸

薑果一缸

計二十二種

妥籌朝鮮造器練兵摺光緒六年九月二十四日

奏為遵

旨詢問朝鮮一切情形妥籌學習製造及練兵購器

事宜恭摺覆陳仰祈

聖鑒事竊臣承准軍機大臣字寄九月初六日奉

上諭李鴻章奏遵籌朝鮮請派匠工學造器械一摺

朝鮮為東北藩服唇齒相依該國現擬講求武備

請派匠工前往天津學造器械自宜俯如所請善

為指引已諭令禮部揀派通事伴送該國齎奏官

卞元圭赴津著李鴻章詢問一切情形再行奏明

辦理李裕元致李鴻章書函並著酌度情形作書
答覆俾知領會等因欽此仰見

聖主撫字藩邦有備無患至意欽佩莫名旋准禮部
導派通事伴送朝鮮齎奏官卞元圭於九月十
六日抵津臣即委令津海關道鄭藻如永定河
道游智開及辦理機器軍械各局候補道許其
光劉含芳候選道王德均等先行會同傳詢一
切該道等連日與之筆談稍知該國大概情勢
復導往機器局製造局軍械所及西沽儲備火
器火藥各庫徧加觀覽俾識端緒臣旋於九月

二十二日傳見卞元圭亦與筆談良久該使臣
頗留心時局非囿於一隅拘執成見者可比玩
其辭旨甚有憂國之志亟欲整練士卒購造利
器以備不虞其忱於外侮迫不及待之情與倚
我聲援切求保護之意時於言外見之茲督同
鄭藻如等就時地之宜與該國力所能逮者酌
擬辦法蓋製器必求用器之人則與練兵相連
練兵而所用之器有非倉卒所能自製者則又
與購器相連今為該國籌畫製造一事當擇易
辦而急需者行之如子彈火藥及修理軍械之

機器必須酌量購備朝鮮王城現兵三萬應分
砲隊馬隊步隊為用器之則砲隊擬購克鹿卜
後膛鋼砲馬隊擬前後膛槍各半步隊以三分
之二用前膛槍其餘間用後膛槍而沿海要隘
之需及水雷電機之學又在該國循次量力而
行至來學往教兩層該國君臣初意重在往教
查朝鮮義州與奉天新設之安東縣僅隔鴨綠
江彼意欲購取機器邀往教師由中國揀派明
幹人員即在安東設局傳習製器操兵之要仍
不時遣人到津通聲氣而便觀摩惟機器購之

西洋非經年不能運到應由該國先選聰穎藝徒來津就現成之器師衆工之巧可以事半功倍俟其粗得門徑然後器匠同歸即教者亦易為力此製器之宜來學而後往教也槍隊砲隊操法不同若先派數員往教恐言語不通即步伐止齊口令手法呼應不靈若先選該國弁兵數十人來津分隸各隊朝夕操演耳濡目染所得較多俟槍砲購到然後隨同所派之員歸國幫教庶可遞相傳授此練兵之宜來學而後往教也該道等將此數端與該使臣往復籌議擬

具節略均甚周妥惟舉辦之遲速購器之多寡
視乎該國經費之優絀非該使臣所能豫定應
俟歸報國王與其大臣妥商定議臣飭局先選
來福前膛槍十桿酌配子藥銅帽各項毛瑟後
膛馬槍十桿連後門子二千個交該使臣攜帶
回國俾該國觀其式樣稍知梗概除已飭卞元
圭回京候

旨外謹將擬具來津學習製器練兵各條鈔呈

御覽擬請

勅下禮部咨照該國王相度便宜自行酌辦李裕元

寄臣書函亦即妥為答覆俾知領會所有遵籌
朝鮮學習製造兼練兵購器事宜恭摺由驛覆
陳是否有當伏乞

皇太后

皇上聖鑒訓示謹

奏

謹將九月二十二日接見朝鮮賚咨官卞元圭
筆談問答照鈔恭呈

御覽

問該國相臣何名

卞答領議政李最應六十六歲今王叔父宗親封
君初為興寅君

問議政亦猶中朝之軍機大臣否其人中外政
務兵事均洞悉否

卞答議政即古之丞相中書令平章事也中外諸
務均得與聞

問與日本通商兩口曾設關否歲增稅項若干
答東萊口已有關德源口方設關未完稅額尚
未一定

問東萊開口已數年何以稅額尚未定聞日本
輪船常至豈能有貨無征

答兩口俱完工程行將一併定稅

問中國初設洋關未知西國通例按貨值百抽
五貴國定額擬值百抽幾

答此在兩國論定廟堂必有成算而陪臣位下
無由預知敢問抽幾庶可得中

告以泰西各國大率入口稅重出口稅輕土貨出口稅輕所以恤吾民生利吾民產也又分別貨之貴賤銷之暢滯酌定等差有每百抽二三十者有每百抽十數者故歲入較多中國初不知此例為西人所蒙進出口概定為值百抽五條約既定至今一成不可易雖販運內地加半稅二五然喫虧實多貴國甫開通商稅額必須加重可以自主否則各國援例而來必有後悔本各出入口稅參酌輕重實維石畫指教敬當據以歸告思所以恤吾民利吾產仰副德意之萬

一
問吾去年七月致李太師密函勸與西國通商
蓋稔知各國見日本開埠必有繼往求索者貴
國主意須早自定若不得已而與各國通商重
加稅則利可在我妥定條約害亦有限不圖貴
國衆議不以為然而各國覬覦終無已時兵力
又恐不能自守為害甚大

○答此國之大事陪臣雖位下人微亦有所聞矣
非不知前秋密函下示備極忠告而特因與彼
有怨未便遽和謹將尊教一一歸告

問所謂與彼有怨想指法美兩國前事而言聞法美尚不欲遽加兵但求通商而已俄界逼近實欲在東海開拓口岸土地目下兵船麇集海參崴土們江一帶與貴國擊柝相聞貴國何以備之又聞貴國民人在俄界貿易工作者甚多彼得藉以偵察虛實貴國官府向與有文書往來否

上答俄之為虞浮於法美小邦之北陲即慶興慶源等地雖蠢逐末之類種種越去為其僱傭則偵探虛實想亦必然之勢也但犯越者為本國

所獲法不容貸故輒一往不返邊民有爭桑之
漸邊臣或有文書開解云非有按例往來

問德源永興海口聞各國豔稱形勢險固為東
海之最俄人有意圖之貴國於該口有礮台兵
船否吾於此甚為焦系請以實告

古海口要害雖有船礮然船皆木板礮皆舊製
庸是憧憧從前小邦之事全仗中堂維持今當
艱危之秋伏願加倍留念仰紓

重宸東顧之憂俯慰福陬北拱之誠無任祈懇願祝
之至

問俄人詭詐異常吾曾詢有此意否答云無之
然各國從旁窺探謂其實有是謀但尚未發動
明春必須謹防若屆時彼之大隊兵船竟向貴
國須早留意

答武經云知彼知己百戰不殆所以寡君憂深
慮遠另加偵探來咨有強隣窺覘之語即謂此
事也苟非中堂視均一室誰肯明教而代籌其
將來耶伏乞連加詢探而亦或有鎮壓排解之
道更願隨機方便保無他患千萬至祝固知早
蒙關垂無待陪臣縷白然情窮勢迫安得不屑

卷六
八二六
噴乎庶可原其心而宥其罪矣

問鄙意永興口既准日本通商俄人遽以兵船
闖入或先禮後兵貴國須派委員與之接應相
機酌允通商議約如何議法權仍在已此即排
解之道若待動兵而後議約喫虧甚矣

答敬當一一歸告而鎮壓之要在乎中堂伏願
特垂終始之惠焉小邦咸鏡道即國祖康獻王
肇基之地也四世仙寢於是乎安且五金之類
於是乎產其民勇而無謀習於騎射堪稱北方
之剛惟是德源元山為陸海咽喉所以小邦多

年靳持究竟萬不獲已而許其開埠矣倘或有
事於此地則咸鏡一道非我之有何則扼其喉
則呼吸豈能通乎握管焦心不知所裁

告以中國陸軍尚可自立水師仿造兵輪船多
隻僅能自護口岸勦辦土寇或與他小邦角勝
若俄水軍強盛目下吾力尚未足與馳逐大洋
其勢未便遠顧東海即未敢云鎮壓貴土永興
一帶也俟數年後鐵甲快船稍備鄙意令其出
巡偶泊貴國海東各口聊作聲援蓋本大臣北
洋轄境與貴國海岸毗連誼若一家本無畛域

現今力量萬難兼營若俄意不測貴國委蛇待
之羈縻勿絕亟圖練兵製器自強之策猶可為
善國也泰西通例公法無無故稱兵奪人土地
者若堅拒固閉彼得有詞不可不熟慮之

本先禮後兵先兵後禮固當商敵為資未可預
料而德源埠頭之役已自春間經始矣今忽添
築砲台多排大砲則日本之人必將藉為口實
若束手坐待尤非禦侮之策伏乞明賜指教俾
有率從千萬祈懇

告以東西各國通商口未有不堅築砲台以自

防護者日本似不能藉口果相詰問答以此係
我國自主萬國通例但須約束弁兵不得滋事
耳

下答謹承明教辭旨鄭重披露無隱忝在下風曷
任感激數年之後轄境巡泊威聲所被想足震
攝而目下憂虞靡所止屈寡君智勇仁明諒有
以善後而陪臣漆室之見自不免憧憧竊有隣
邦滋惑之事琉國為日本侵奪即公法所不許
也天下各國其將公議而興亡繼絕乎
告以日本之於琉球自謂前明中葉即為藩屬

併球後以新聞紙編告各國各國亦輕信之公
法乃泰西所訂東土未必照行但各國通商公
共之口一國不佔佔之則必羣起而爭故去秋
密商貴國酌允各大國通商亦慮俄日之將有
事於朝鮮也

卡答無論鉅細歸候寡君斟酌

問貴國所求派人學習製器練兵各事業令諸
位道台與之妥議數日昨呈略摺大端已甚詳
晰貴官能遵允否

卡答此事係前古所未行素意所不畜乃敢咨請

者仰恃

大朝之於小邦有願必從無願不遂之

德意亦惟我中堂眷比之惠澤如有所教敢不奉遵
告以茲有節略草稿一本望攜回細閱條議具
復或有疑難再與諸道酌商轉稟

咨各條周密精核無庸更議若有事時乞從海
道往來前布告於諸位道員諒蒙鑒燭
告以朝貢信使來往必須恪遵成憲此係破例
之舉若徑從海道自更便捷仍令諸道會商妥
議章程憑票等事呈候具奏請

旨定奪

大卷陪臣前日仰請本自如
此而不必今日明日
隨便裁處惟圖濟事

謹將朝鮮派人來學製器練兵分條擬具清摺
恭呈

御覽

製造一事所包甚廣不可不分別難易緩急中
國船立各廠十有餘年費用餉項約數千萬得
入門徑始知有必須自造者有不必自造者茲
為該國籌畫當擇易辦而急需者行之如槍砲
既購辦矣而子彈須源源接濟若專恃購辦必
有緩急難恃之虞此必自行製造者一也軍械
常有損壞修理必藉機器此必自行製造者二

也蓋行遠必自邇登高必自卑所用機器除造後膛槍子須全分機器此外不必全藉汽機應以人力運動者為宜可擇汽機小者購一二具以運車床刨床鑽床而已軍械之中火藥為最要西藥佳處全在硝磺提淨壓至結實碾工與臼舂之工無異機器碾盤似可省也僅購提硝器具壓水機器皆用人力者則省費約十之六七至於造槍子銅壳非購全副機器不可如購辦各種軍械器具之議既定則擇該國年十五六以至年二十歲者數十人分入兩局學習各

種技藝其選擇之人除畫圖汽機而外應於該國素業銅鐵木各工匠內心思靈巧者選派來學如欲驟然奏效恐亦不能緣製造之學無窮盡也俟期年後略得要領及器具購到則隨之回國自有把握庶不致茫然無從下手矣

一畫圖本諸算學為製器之根源須擇年十五六聰明而有悟心能通文義者四人分隸學習工師之才由此出焉其學無止境

一木樣廠凡製一物必須先做本樣應擇該國木工有心思年二十內外者四人分隸學習

一翻沙廠此種工夫較易學習惟鎔化銅鐵習練眼力分別火色配合料作亦非易事須擇年力精壯有膂力有心思者四人分隸學習

一槍子廠捲銅廠機器繁多應選四人專入東局學習

一機器廠須寬為選派應擇年十五六者四人按照車床隨師教導但車床工夫是以機器製器能知換用車刀分配齒輪便入門徑惟執錘用鑿用鎚以手製器工夫較難修槍工夫亦應學習此四人應分隸兩局學習

一 汽機鍋爐廠須選年二十上下者四人分隸學習汽機煤爐之事

一 熟鐵廠須擇該國素業鐵工者四人分隸學習製造鍋爐該國熟鐵工匠原不乏人有樣自可仿造惟於鍋爐釘鐵工夫未易學習

一 火器廠須擇年十五六者四人分隸學習配合拉火暴藥各料

一 電氣房須擇年二十以內者二人專隸南局學習電引電機電表各種技藝為水雷引電之用蓋電學理極精微機關奧妙最難深造如聰

明過人學之亦可漸入門徑

一製火藥應擇該國向習此藝者三人專隸東局學習不必年輕為其已入門徑自知慎重則進益較易

一製礮水應擇年二十內外聰穎者一人專隸東局學習

以上共計約三十八人分入兩局學習居住之處兩局各有工匠住房無庸賃買

練兵購器兩事該國賁咨官書稱王城現兵三萬馬兵居其一步兵居其九此時既擬練兵應

分砲隊馬隊步隊為用器之則除馬隊三千已
有成額則步隊二萬七千之中應分三千為砲
隊砲可少用而砲兵不可少練也馬兵三千應
備馬槍若全用後膛則經費太鉅不用後膛則
禦侮無資擬以前膛後膛各半後膛用德國毛
瑟槍前膛用英國恩費爾來福槍其餘步隊二
萬四千以四千人分執雜器應以二萬人執槍
即或用一半後膛其經費已恐難措應以三千
桿為後膛槍一萬七千桿為前膛槍費用較省
由漸而入力或能支砲位一項專宜求精與其

購買英法之前膛砲不若專購德國克鹿卜後
膛鋼砲該國沿海要隘無從懸擬若以行仗論
之至少亦須四磅窄輪後膛砲十八尊過山後
膛砲十八尊連子彈價值費用已須六七萬兩
合前後膛槍槍子銅帽各款已約二十餘萬而
沿海要隘之需仍不在此數之內是在將來循
次量力舉行更及水雷電機之學至於練兵似
宜先來學而後往教槍隊砲隊操法各有不同
若先派數員往教不但目前無器可習即步伐
止齊口令手法殊難徧及且言語莫通事事倚

仗通事是則教者之情難以周達而學者之心志亦無所適從必須先選該國精明強壯之弁兵數十人分隸天津槍隊砲隊朝夕專習俟槍砲購到亦將期年而一年之中該弁兵耳聞目見志求心得必能粗有規模然後隨同所派之員帶器同歸分司幫教則教者易教而學者易學矣此練兵一層必須先來學而後往教者也合將約議代購槍砲經費附開於後

擬以三千人為砲兵用克鹿卜四磅後膛砲十八尊連車架每尊約價銀一千五百兩計銀二

萬七千兩每砲配子三百箇共五千四百箇每
箇約價銀一兩計銀五千四百兩用克鹿卜兩
磅過山後膛砲十八尊每尊配子三百箇價與
前相等

擬以三千人為馬兵用後膛馬槍一千五百桿
每桿約價銀六兩計銀九千兩每槍配子五百
粒共七萬五千粒每千粒約價銀二十二兩計
銀一萬六千五百兩用前膛馬槍一千五百桿
每桿約價銀三兩六錢計銀六千五百四十兩
擬以二萬人為洋槍步兵用後膛槍三千桿每

桿約價銀九兩計銀二萬七千兩每槍配子五百粒共一百五十萬粒每千粒約價銀二十二兩計銀三萬三千兩用前膛槍一萬七千桿每桿約價銀三兩計銀五萬一千兩共配用銅帽一千七百萬粒每萬粒約價銀八兩計銀一萬三千六百兩

以上共計銀二十二萬一千四百四十兩

卷六

九十五

擬議朝鮮來學章程片

再臣督同津海關道鄭藻如等詢議朝鮮製器
練兵事宜擬定大概規模已專摺具陳在案據
該使臣卞元圭呈稱朝鮮武備早宜講求所以
遲至今日者實因外藩私購戎器有干例禁迨
時勢既迫始敢籲請猶恐緩不濟急又稱該國
義州距營口僅六百里由營口附輪船直達天
津不過數日或自津門航海東駛可徑泊該國
黃海道之長洲豐川兩府將來領運器械來學
員弁當從海道為便捷等語雖格於定例而軍

需緊要未便過涉拘泥轉阻其嚮化之誠因飭
鄭藻如等與該使臣酌議章程四條於通融中
略示限制查外藩派人來華習武本屬創舉自
應因時變通如選派人員一條令其自備資斧
以免供億之煩仍許借給住房用示綏懷之誼
往來道路一條惟來學之員弁兵匠及領運器
械准其暫從海道此外朝貢及常行公事仍須
恪遵

成憲斟酌於經權之中似尚無甚流弊給發憑票
一條所以備稽查而便約束至從人不必多派

亦不得私帶商販貨物關稅可免短絀公文分
咨一條若循向例朝鮮來文須由禮部轉行然
練兵學藝購器諸物皆屬刻不容緩設事事由
禮部核轉在該部既滋煩瑣兼恐有誤機宜今
令該國分咨禮部及臣衙門以免迂折而昭迅
速仍由臣隨時奏明辦理凡此四端皆已再三
籌度不厭精詳謹將擬議來學章程鈔呈

御覽是否有當伏乞

聖鑒訓示施行謹附片具

奏

表二

117

謹將朝鮮賞咨官卞元圭與津海關道鄭藻如等擬議該國員弁來學製造操練章程錄呈

御覽

一擬派三十八人分入東南兩局學習製造以兩員分管之通事傳語者東局用二人南局用一人又選派精明強壯弁兵四十人分隸親軍槍砲營內學習操練亦以兩員分管之通事傳語者二人以上共以八十七人為額資斧火食等項皆朝鮮國自備惟住房由中國借給一朝鮮國朝貢信使往來所經道路自必永遵

成憲惟此次派人來學係屬破例之舉若得徑從海道更覺便捷且製造操練等事一二年內當可探討門徑為期不至過久擬請酌量變通

奏咨立案暫由海道來往不在朝請常行公事之列除來學之弁兵學徒委員通事從人而外別人別事不得援照辦理至朝鮮國請中國代購軍械機器等件俟購到後由中國咨照朝鮮方可派員從海道前來領運

一委員弁兵學徒通事人等由北洋大臣衙門給發空白憑票交朝鮮國按名填給并造名冊

呈送北洋大臣衙門及禮部備查到中國後遵守中國規矩專心聽教倘或不遵約束由中國官發交派來委員查核辦理至隨從之人數用為止不必多派亦按名給予憑票附列冊末一體遵奉約束不得私帶商販及一切貨物

一凡屬練兵學藝購器軍務公文由朝鮮國王分咨禮部及北洋大臣衙門以歸便捷

朝鮮通商西國片

再朝鮮與西人通商一事係其今日謀國要圖
臣前奏明俟覆李裕元函仍擬善為開導冀有
轉機惟李裕元致仕家居雖尚得與聞朝政而
一切謀議設施究由該國君相主持此次齎奏
官卞元圭來津謁見臣與筆談良久觸類引伸
俾徐悟保邦之大計即臣上年七月致李裕元
一函彼亦知為忠告因與開誠布公迎機善導
剴切而詳示之聞朝鮮與日本通商數年尚未
收稅彼並不知稅額重輕臣告以西洋各國通

例今勿為日本所蒙且知重稅之有裨國計朝鮮與法美有怨慮其見侵臣告以法美志在通商並無用兵強逼之意而俄人則窺伺甚急朝鮮東北海口與俄接界防禦太疎臣告以德源永興口既准日本開埠倘俄人以兵船闖入或先禮後兵應派員相機接應酌允通商議約免致動兵後格外喫虧朝鮮欲在德源埠築台置砲恐為日本藉口臣告以東西各國通商口未有不築砲台以自防護者乃係自主之權凡此皆所以破其惑而使之自強開其意而使之自

悟該使臣以聞所未聞中心悅服一切俟歸報
國王妥為酌度不至如從前之扞格查朝鮮三
面環海其形勢實當東北洋之衝而為

盛京吉林直隸山東數省之屏蔽其民人能耐勞
苦物產亦非甚絀五金煤鐵之礦未經開採倘
為俄人佔踞與吉林黑龍江俄境勢若連雞形
如拊背則我東三省及

京畿重地皆岌岌不能自安關係甚重日本近與
開埠陽為各國先容而陰嗾朝鮮堅拒其意亦
甚叵測茲欲杜俄日之隱謀惟有與泰西各國

一律通商尚可互相牽制孑然常存然聞見以
閱歷而始廣風氣由倡導而漸開該國於製器
練兵既知加意講求商務一端或終有擴充之
望謹照錄臣與卞元圭筆談問答節略恭呈
御覽除密咨總理各國事務衙門知照外謹附片密

陳伏乞

聖鑒謹

奏

妥籌球案摺光緒六年十月初九日

奏為日本議結球案牽涉改約暫宜緩允遵

旨切實妥籌恭摺仰祈

聖鑒事竊臣承准軍機大臣密寄十月初四日奉

上諭前據總理各國事務衙門奏議結琉球一案又

據右庶子陳寶琛奏琉球不宜遽結舊約不宜輕

改當經惇親王等酌議宜照總理衙門所奏辦理

業經允准旋據左庶子張之洞奏日本商務可允

球案宜緩復經惇親王等議以日本與俄深相邀

結又與福建浙江最近今若更動已成之局未必

甘心且恐各國從而構煽卒至仍歸前說或併二島而棄之益為所輕等語自為揆時度勢聯絡邦交起見惟事關中外交涉不可不慎之又慎李鴻章係原議條約之人日本情事素所深悉著該督統籌全局將此事應否照總理衙門原奏辦理並此外有無善全之策切實指陳迅速具奏總理衙門摺片各一件單三件陳寶琛張之洞摺各一件均著抄給閱看等因欽此仰見

聖主審於馭遠虛衷采納不厭精詳曷勝欽服從前中國與英法兩國立約皆先兵戎而後玉帛被

其迫脅兼受朦蔽所定條款吃虧過鉅往往有
出地球公法之外者厥後美德諸國及荷蘭比
利時諸小國相繼來華立約斯時中國於外務
利弊未甚講求率以利益均霑一條列入約內
一國所得諸國安坐而享之一國所求諸國羣
起而助之遂使協以謀我有固結不解之勢同
治十年日本遣使來求立約曾國藩始建議宜
將均霑一條刪去及臣與該使臣伊達宗城往
復商訂並載明兩國商民不准入內地販運貨
物限制稍嚴嗣後該國屢欲翻悔均經駁斥自

是祕魯巴西立約亦稍異於前誠以內治與約章相為表裏苟動為外人所牽制則中國永無自強之日近聞各國駐京公使每有事會商日本獨不得與其尚未聯為一氣未始不因立約之稍異也至內地通商西人以置買絲茶為大宗貨本較富稍顧體面日本密通東隅文字語言略同其人貧窘貪利無恥一開此例勢必紛至沓來與吾民爭利或更包攬商稅為作奸犯科之事明代倭寇之興即由失業商人勾結內地奸民不可不防其漸此議改舊約尚宜酌度

之情形也琉球原部三十六島北部九島中部十一島南部雖有十六島而周迴不及三百里北部中有八島早被日本佔去僅存一島去年日本廢滅琉球經中國疊次理論又有美前統領格蘭忒從中排解始有割島分隸之說臣與總理衙門函商謂中國若分球地不便收管只可還之球人即代為日本計算舍此別無結局之法此時尚未知南島之枯瘠也本年二月間日本人竹添進一來津謁見稱其政府之意擬以北島中島歸日本南島歸中國又添出改約

一節臣以其將球事與約章混作一案顯係有挾而求嚴詞斥之不少假借曾有筆談問答節略兩件鈔寄總理衙門在案旋聞日本公使實戶璣屢在總理衙門催結球案明知中俄之約未定意在乘此機會圖佔便宜臣愚以為琉球初廢之時中國以體統攸關不能不亟與理論今則俄事方殷中國之力暫難兼顧且日人多所要求允之則大受其損拒之則多樹一敵惟有用延宕之一法最為相宜蓋此係彼曲我直之事彼斷不能以中國暫不詰問而轉求尋釁

俟俄事既結再理球案則力專而勢自張近接
總理衙門函述日本所議臣因傳詢在津之琉
球官尚德宏始知中島物產較多南島貧瘠僻
隘不能自立而球王及其世子日本又不肯釋
還遂即函商總理衙門謂此事可緩則緩冀免
後悔此議結球案尚宜酌度之情形也臣接奉
寄諭始知已成之局未便更動而陳寶琛張之洞等
又各有陳奏正籌思善全之策適接出使大臣
何如璋來書並鈔所寄總理衙門兩函力陳利
益均霑及內地通商之弊語多切實復稱詢訪

球王謂如宮古八重山小島另立三子不止五
家不願闔國臣民亦斷斷不服南島地瘠產微
向隸中山政令由其土人自主今欲舉以昇球
而球人反不敢受我之辦法亦窮等語臣思中
國以存琉球宗社為重本非利其土地今得南
島以封球而球人不願勢不能不派員管理既
蹈義始利終之嫌不免為日人分謗且以有用
之兵餉守此甌脫不毛之地勞費正自無窮而
道里遼遠音問隔絕實覺孤危可慮若憚其勞
費而棄之不守適墮日人狡謀且恐西人踞之

經營壑闢扼我太平洋咽喉亦非中國之利是
即使不議改約而任分我以南島猶恐進退兩
難致貽後悔今彼乃議改前約倘能竟釋球王
界以中南兩島復為一國其利害尚足相抵或
可勉強允許如其不然則彼享其利而我受其
害且並失我內地之利臣竊有所不取也謹繹
總理衙門及王大臣之意原慮日本與俄要結
不得不揆時度勢聯絡邦交洵屬老成持重之
見然日本助俄之說多出於香港日報及東人
恫喝之語議者不察遂欲聯日以拒俄或欲暫

許以商務皆於事理未甚切當查陳寶琛摺內
所指日本兵單餉絀債項纍纍黨人爭權自顧
不暇倭人畏俄如虎性又貪狡中國即結以甘
言厚賂一旦中俄有釁彼必背盟而趨利均在
意計之中何如璋節次來函亦屢稱日本外強
中乾內變將作讓之不能助我不讓亦不能難
我洵係確論蓋日本近日之勢僅能以長崎借
俄屯駐兵船購給煤米彼蓋貪俄之利畏俄之
強似非中國力所能禁也豈惟日本一國即英
德諸邦及日斯巴尼亞葡萄牙各國皆將伺俄

人有事調派兵船名為保護商人實未嘗不思
藉機漁利是俄事之能了與否實關全局俄事
了則日本與各國皆戢其戎心俄事未了則日
本與各國將萌其詭計與其多讓於倭而倭不
能助我以拒俄則我既失之於倭而又將失之
於俄何如稍讓於俄而我因得藉俄以懾倭夫
俄與日本強弱之勢相去百倍若論理之曲直
則日本之侮我為尤甚矣而議者之謀若有相
反者此臣之所未喻也至若江蘇之上海浙江
之甯波福建之福州廈門均係各國通商口岸

日本即欲來擾既無此兵力餉力亦必不敢開
罪於西人惟台灣孤懸海外地險產饒久為外
人所窺伺苟經理得宜亦足控蔽東南應請

廟謨加意區畫漸收成效中國自強之圖無論俄事
能否速了均不容一日稍懈誠以洋務愈多而
難辦外侮迭至而不窮不可不因時振作臣前
奏明南北洋須合購鐵甲船四號其數斷難再
減所有請撥淮商捐項一百萬兩僅准戶部議
撥四十萬不敷尚多應請

旨飭令全數撥濟各省關額撥海防經費前經奏明

嚴定處分章程仍未如額籌解倘再延玩尚擬請

旨嚴催水師電報各學堂亦已陸續興辦數年之後
船械齊集水師練成聲威既壯縱不必跨海遠
征而未始無其具日本囂張之氣當為之稍平
即各國輕侮之端或亦可漸弭又總理衙門慮
及日本於內地運貨蓄意已久轉瞬修約屆期
彼必力請均霑之益或祇論修約不提球案恐
并此南島而失之臣愚以為南島得失無關利
害兩國修約須彼此互商斷無一國能獨行其

志者日本必欲得均霑之益倘彼亦有大益於
中國者以相抵未嘗不可允行若有施無報壹
意貪求此又當內外合力堅持勿夫者也臣再
三籌度除管理商民更改稅則兩條尚未訂定
應俟後日酌議外其球案條約及加約曾聲明
由

御筆批准於三個月限內互換竊謂限滿之時准不
准之權仍在

朝廷此時似宜用支展之法專聽俄事消息以分緩
急俟三月限滿倘俄議未成而和局可以豫定

彼來催問換約或與商展限或再交廷議若俄事於三個月限內即已議結擬請

旨明指其不能批准之由宣示該使即如微臣之執奏言路之諫諍與彼之不能釋放球王有乖中國本意皆可正言告之者臣料倭人未必遽敢決裂即欲決裂亦尚無大患

明詔既責臣以統籌全局切實指陳臣不敢因朝廷議准在先曲為迴護亦不敢務為過高之論致礙施行若照以上辦法總理衙門似尚無甚為難之處所有日本議結球案牽涉改約暫宜緩

允遵

旨妥籌緣由恭摺由驛五百里密陳是否有當伏乞

皇太后

皇上聖鑒訓示謹

奏

派丁汝昌赴英收船片光緒六年十一月初九日
再臣於去冬飭總稅務司赫德由英國阿摩士
莊商廠訂造碰快船兩號約明年春夏工成來
華業經奏明在案查前購各蚊礮船係赫德金
登幹由英國催覓水師弁兵包送來華不特需
費較多且沿途風濤沙線情形駕駛要訣以及
洋面如何操練機器如何使用中國弁兵均未
曾親歷周知殊非造就將材之道今購新碰快
船兩號據赫德迭次呈稱船堅砲巨實為西洋
新式利器臣已取名一曰超勇一曰揚威急宜

自派妥員前往英廠考察驗收並選帶弁兵水
手續往管駕添募洋弁數名一同講求所到各
處洋面隨事習練庶回華後駕輕就熟可期得
力臣已派督操北洋礮船記名提督丁汝昌總
教習洋員葛雷森總理兩船事宜督同管駕官
林泰曾章師敦鄧世昌及弁兵舵水人等二百
餘員名於十一月初航海赴滬丁汝昌葛雷森
先於月內搭船赴英料理一切其餘員弁水手
等先往吳淞官輪船操練俟丁汝昌等察看船
成預寄電信到滬即令自行駕駛招商局輪船

出洋馳往英倫升換中國龍旗管帶來華一面
咨會總理衙門暨出使大臣曾紀澤李鳳苞互
相照料並屬赫德轉飭倫敦稅務司金登幹隨
時與丁汝昌等會商籌備一切至出洋員弁兵
丁應需加支薪糧盤費號衣等項飭局於海防
經費項下從優籌發其船隻自英回華沿途燒
煤食用各件由赫德金登幹照案妥備俾免缺
乏將來該員弁等接帶碰快船到後如果沿途
辦理妥協操練熟悉再由臣察核援照出使各
國人員優保之例據實

奏請獎勵以昭激勸所有派撥官弁赴英驗收管
帶新購碰快船回華緣由理合附片具陳伏乞
聖鑒訓示謹

奏

妥議鐵路事宜摺 光緒六年十二月初一日
奏為鐵路為富強要圖亟宜試辦籌款立法尤宜
得人豫為考究遵

旨妥議恭摺仰祈

聖鑒事竊臣承准軍機大臣密寄十一月初二日奉
上諭劉銘傳奏籌造鐵路一摺所請籌款試辦鐵路
先由清江至京一帶興辦與本年李鴻章請設之
電線相為表裏等語所奏係為自強起見著李鴻
章劉坤一按照摺內所奏悉心籌商妥議具奏原
摺著抄給閱看等因欽此仰見

聖主塵念時艱力圖振作周諮博訪不厭精詳曷勝
欽服伏思中國生民之初九州萬國自為風氣
雖數百里之內有隔闕不相通者聖人既作剡
木為舟剡木為楫舟楫之利以濟不通服牛乘
馬引重致遠以利天下自是四千餘年以來東
西南朔同軌同文可謂盛事迄於今日泰西諸
國研精器數創造火輪舟車環地球九萬里無
阻不通又於古聖所制舟車外別出新意以奪
造化之工而便民用適者中國仿造輪船亦頗
漸收其益蓋人心由拙而巧器用由樸而精風

尚由分而合此天地自然之大勢非智力所能
強遏也查火輪之制權與於英之煤礦道光初
年始作鐵軌以約車輪其法漸推漸精用以運
銷煤鐵獲利甚多遂得擴充工商諸務雄長歐
洲既而法美俄德諸大國相繼經營凡佔奪鄰
疆墾闢荒地無不由鐵路以導其先迨戶口多
而貿易盛又必增鐵路以善其後由是歐美兩
洲六通四達為路至數十萬里徵調則旦夕可
達消息則呼吸相通四五十年間各國所以日
臻富強而莫與敵者以其有輪船以通海道復

有鐵路以便陸行也即如日本以區區小國在其境內營造鐵路自謂師西洋長技輒有藐視中國之心俄自歐洲起造鐵路漸近浩罕恰克圖等處又欲由海參崴開路以達琿春中國與俄接壤萬數千里向使早得鐵路數條則就現有兵力儘數調遣如無鐵路則雖增兵增餉實屬防不勝防蓋處今日各國皆有鐵路之時而中國獨無譬猶居中古以後而屏棄舟車其行動輒後於人也必矣竊嘗考鐵路之興大利約有九端江淮以北陸路為多非若南方諸省河

渠貫注而百貨流通故每歲所徵洋稅釐金二
三千萬兩在南省約十之九在北方僅十之一
倘鐵路漸興使之經緯相錯有無得以懋遷則
北民必化惰為勤可致地無遺利民無遺力漸
臻殷阜之象其鐵路扼要之處徵收釐稅必漸
與南方相埒此便於國計者利一也從來兵合
則強兵分則弱中國邊防海防各萬餘里若處
處設備非特無此餉力亦且無此辦法苟有鐵
路以利師行則雖滇黔甘隴之遠不過十日可
達十八省防守之旅皆可為游擊之師將來裁

兵節餉併成勁旅一呼可集聲勢聯絡一兵能抵十兵之用此便於軍政者利二也京師為天下根本獨居中國之北與腹地相隔遠遠控制綦難緩急莫助咸豐庚申之變議者多請遷都率以事體重大未便遽行而外人一有要挾即欲撼都城若鐵路既開萬里之遙如在戶庭百萬之衆剋期徵調四方得拱衛之勢國家有磐石之安則有警時易於救援矣各省仕商絡繹奔赴遠方糧貨轉輸迅速皆願出於其途藏於其市則無事時易於富庶矣不必再議

遷都而外人之覬覦永絕自有萬年不拔之基
此便於京師者利三也。曩歲晉豫存飢山西米
價騰踴每石需銀至四十餘兩設有鐵路可運
核以天津米價與火車運價每石不過七兩左
右以此例之各省遇有水旱偏災移粟輦金捷
於影響可以多保民命且貨物流轉自免居奇
之弊此便於民生者利四也。自江浙漕糧改行
海運議者常欲規復河運以防海道之不測鐵
路若成譬如人之一身血脈貫通即一旦海疆
有事百萬漕糧無虞梗阻其餘如軍米軍火京

餉。協餉莫不應手立至此便於轉運者利五也。輪車之行較驛馬十倍之速從此文書加捷而頒發條教查察事件疾於置郵他如偵敵信捕盜賊皆朝發夕至並可稍裁正路驛站以其費擴充鐵路此便於郵政者利六也。煤鐵諸礦去水遠者以火車運送斯成本輕而銷路暢銷路暢而礦務益興從此煤鐵大開修造鐵路之費可省而軍需利源更取不盡而用不竭此便於礦務者利七也。凡遠水之區洋貨不易入而土貨不易出今輪船所不達之處可以火車達之。

出入之貨愈多則輪船運貨亦與火車相為表裏此便於招商輪船者利八也無論官民兵商往來行役千里而瞬息可到兼程而塗費可輕無寇盜之虞無風波之險此便於行旅者利九也以上各端西洋諸國所以勃焉興起者罔不慎操此術而國計軍謀兩事尤屬富強切要之圖劉銘傳見外患日迫兼憤彼族欺陵亟思振興全局先播風聲俾俄日兩國潛消窺伺之心誠如

聖諭係為自強起見查中國要道南路宜修二條一

由清江經山東一由漢口經河南俱達京師北
路二條宜由京師東通奉天西通甘肅誠得此
四路以為根本則傍路繁要之區雖相去或數
百里而地段較輕需費較省即招商集股亦與
情所樂就從此由幹達枝縱橫交錯不患鐵路
之不振興惟統計四路工費浩繁斷難並舉劉
銘傳擬先造清江至京一路與臣本年擬設之
電線相輔並行庶看守易而遞信彌捷洵兩得
之道蓋先辦一路雖於中國形勢尚偏而不舉
然西洋諸國五十年前亦與中國情形相等惟

其刻意營繕爭先恐後故有今日之氣象劉銘
傳之意蓋欲先創規模以為發軔之端庶將來
逐漸推廣不患無奮興之日也顧或謂鐵路若
開恐轉便敵人來犯之途且洋人久思在中國
興造鐵路此端一起或致彼愈滋煩曠不知各
國之有鐵路皆所以徵兵禦敵而未聞為敵用
何也鐵路在我內地其臨邊處皆有兵扼守彼
豈能憑空而至萬一有非常之警則壞其一段
扣留火車而路亦無用而全路皆廢數十年來
各國無以此為虞者客主順逆之勢然也至洋

人擅在他國造路本為公法條約所不准若慮其逞強爽約則我即不自造鐵路彼獨不能逞強乎況洋人常以代中國興利為詞今我先自興其利且將要路占造庶足關其口而奪之氣使之廢然而返矣或又謂鐵路一開則中國之車夫販豎將無以謀衣食恐小民失其生計必滋事端不知英國初造鐵路時亦有慮奪民生計者未幾而傍路之要鎮以馮車營生者且倍於曩日蓋鐵路祇臨大道而州縣鄉鎮之稍僻者其送客運貨仍賴馬車民夫鐵路之市易既

繁夫車亦因之增衆至若火車盛行則有駕駛
之人有修路之工有巡瞭之丁有上下貨物伺
候旅客之雜役月賦工糈皆足以仰事俯畜其
稍饒於財則可以增設旅店廣買股分坐權子
母故有鐵路一二千里而民之依以謀生者當
不下數十萬人況煤鐵等礦由此大開貧民之
自食其力者更不可數計此皆擴民生計之明
證也或又謂於民間田廬墳墓有礙必多阻撓
不知官道寬廣鐵路所經不過丈餘之地於田
廬墳墓尚不相妨即遇官道稍窄之處亦必買

地優給價值其墳墓當道者不難稍紆折以避
之劉銘傳勦捻數年於中國地勢情形固親歷
稔知者也惟是事端宏大經始之初宜審之又
審俾日後勿滋流弊始足資程式而行久遠臣
嘗博采衆議外洋造路有堅窳久暫之不同其
價亦相去懸殊每里需銀自數千兩至數萬兩
不等清江浦至京最為衝要之衢造路須堅實
耐久所需經費雖未能豫定為數自必不貲現
值帑項支絀之時此宗巨費欲籌之官則挪湊
無從欲籌之商則散渙難集劉銘傳所擬暫借

洋債亦係不得已之辦法從前中國曾借洋債
數次議者恐各省紛紜援例致受洋人盤剝之
累經戶部奏明停止顧借債以興大利與借債
以濟軍餉不同蓋鐵路既開則本息有所取償
而

國家所獲之利又在久遠也惟是借債之法有不
可不慎者三端恐洋人把持而鐵路不能自主
也宜與明立禁約不得干預吾事但使息銀有
著期限無誤一切招工購料與經理鐵路事宜
由我自主借債之人毋得過問不如是則勿借

也又恐洋人之詭謀而鐵路為所佔據也宜仿招商局之例不准洋人附股設立鐵路公司以後可由華商承辦而其政令須官為督理所借之債議定章程由該公司分年抽繳期於本利不至虧短萬一偶有虧短由官著追只准以鐵路為質信不得將鐵路抵交洋人界限既明弊端自絕不如是則勿借也又恐因鐵路之債或妨中國財用也往時所借洋款皆指定關稅歸償近則各關撥款愈繁需用方急宜議明借款與各海關無涉但由

國家指定日後所收鐵路之利陸續分還可遲至
一二十年繳清庶於各項財用無所牽掣不如
是則勿借也凡此數端關係較鉅聞洋人於債
項出納之間向最慎重若盡照所擬辦法或恐
未必肯借彼若肯借方可興辦與其速辦而滋
弊端不如徐議而免後悔又聞各國鐵路無一
不借債以成但恃素有名望之監工踏勘估工
之清單與日後運載之利益足以取信於人中
國南北鐵路行之日久必可多獲盈餘誠設立
公司名目延一精鍊監工細為勘估由總理衙

門暨臣等核明妥立憑單西洋富商或有願為稱貸者至鐵路應試造若干里如何選料募匠如何費省工堅非悉心考究無由握其要領一切度地用人招商借債事務繁蹟非有

特派督辦之大員呼應斷不能靈查劉銘傳年力尚強英氣邁往曾歷艱鉅近見各國環侮亟思轉弱為強頗以此事自任惟造端不易收效較遲倘值外患方殷

朝廷或畀以軍旅之寄自應稍從緩議現既乞假養疴別無所事若蒙

聖主授以督辦鐵路公司之任先令將此中竅要專
精考校從容商權即俄日各國驟聞中國於多
事之秋尚有餘力及此所以示之不測未始非
先聲後實之妙用且以其暇招設公司商借洋
債雖能否借到巨款尚無把握然以劉銘傳之
勛望中外合力維持措注較易於他人其舊部
駐防直蘇兩省不下萬餘人將來講求愈精或
另得造路省便之法或以勇丁幫同修築或招
華商巨股可以設法騰挪當與隨時酌度妥辦
蓋劉銘傳以原議之人始終經理即待其效於

十年以後尤屬責無旁貸倘更有要任目需仍可聞

命即行獨當一面也再中國既造鐵路必須自開煤鐵庶免厚貲漏於外洋山西澤潞一帶煤鐵礦產甚富苦無殷商以巨本經理若鐵路既有開辦之資可於此中騰出十分之一仿用機器洋法開采煤鐵即以所得專供鐵路之用是礦務因鐵路而益旺鐵路因礦務而益修二者又相濟為功矣所有籌辦鐵路力圖自強宜豫為考究設法試行各緣由恭摺由驛覆陳是否有當

伏乞

皇太后

皇上聖鑒訓示謹

奏

11/11/11

11/11/11

議覆張家驥爭止鐵路片

再臣接准軍機大臣密寄十一月二十一日奉
上諭前據劉銘傳奏請籌造鐵路當經諭令李鴻章
等妥議茲據張家驥奏稱開造鐵路約有三弊未
可輕意施行等語著李鴻章悉心妥籌具奏原摺
著抄給閱看等因欽此竊思凡建一事必兼權乎
利害重輕而後無疑畏拘牽之慮凡議一事必
確得之閱歷考校而後無揣摩影響之談臣於
鐵路之利益大端與籌款之難防弊之法既詳
陳之矣至張家驥所稱清江浦為水陸通衢若

造成鐵路商旅輻輳恐洋人從旁覬覦借端要求等語臣謂洋人之要挾與否視我國勢之強弱我苟能自強而使民物殷阜洋人愈不敢肆其要求我不能自強則雖民物蕭條洋人亦必隱圖其狡逞即如越南國政不善經理以致民生凋敝日就貧弱法人乘間侵奪其六省以洋法經營日臻富庶是其明鑒蓋強與富相因而民之貧富又與商埠之旺廢相因若慮遠人之覬覦而先遏斯民繁富之機無論遠人未必就範即使竟絕覬覦揆之謀國庇民之道古今無

此辦法也張家驤又謂開造鐵路恐於田廬墳墓橋梁有礙民間車馬及往來行人恐至擁擠磕碰徒滋搔擾查外洋鐵路有雙單行之別雙行者佔地寬不過一丈二尺單行者佔地七尺今南北官道寬至二三丈及四五丈不等鐵路所佔不及官道之半既須填築加高與官道判若兩途自於官道中行人車馬無所妨礙其十字午貫之路則有建旱橋之法有於兩旁設立柵門瞭望火車將至則閉柵以止行人俟火車既過然後啟柵之法至造路之費地價亦其大

宗如有田廬侵礙官道者當不惜重價以償貧
民輿情自可樂從萬一有民間墳墓及田廬不
願遷售者自無難設法繞避其他跨山越水建
造橋梁外洋自有成法可循未聞其不便於民
也張家驤又謂水陸轉運及往來之人祇有此
數若以鐵路奪輪船之利恐招商局數百萬款
項一旦無著查近水之區運貨利用輪船其行
稍遲而價較廉遠水之地運貨利用火車其行
更速而價較鉅二者固並行不悖即或鐵路初
成之時招商局生意略減然該局既將旗昌原

價繳清復分年拔還官帑成本日輕每歲得漕
項津貼縱令運載稍分於鐵路亦尚可支持周
轉數年之後商貨日多更可與鐵路收相濟之
益且北方地非磽瘠而繁富之象遠遜南方蓋
由運路艱阻而其民於所以殖貨之原亦遂不
肯勤求若一旦覩運銷之便則自耕織以外必
更於藝植之利工作之利一一講求可無曠土
游民之患即如江浙閩鄂等省自通商以後絲
茶之出其地者倍於曩日則謂水陸轉運祇有
此數者似又未盡然也以上張家驥所陳三弊

臣逐細研求尚覺不甚確鑿大抵近來交涉各務實係中國創見之端士大夫見外侮日迫頗有發憤自強之議然欲自強必先理財而議者輒指為言利欲自強必圖振作而議者輒斥為喜事至稍涉洋務則更有鄙夷不屑之見橫互胸中不知外患如此其多時艱如此其棘斷非空談所能有濟我

朝處數千年未有之奇局自應建數千年未有之奇業若事事必拘守成法恐日即於危弱而終無以自強語曰非常之原黎民懼焉及臻厥成

天下晏如也。臣於鐵路一事，深知其利國利民，可大可久。假令

朝廷決計創辦，天下之人見聞習熟，自不至更有疑慮。然臣不敢謂其事之必成者，以集款之非易，而籌借洋款亦難就緒也。果使巨款可集而防弊之法又悉能如臣所擬，則此等大事固當力排浮議，破除積習而為之。若洋債未能多借，商股未能驟集，則雖欲舉辦，一時亦尚無其力。臣因張家驥所慮而遵

旨，妥籌略抒管見如此，謹附片具陳，是否有當，伏乞

聖鑒訓示謹

奏

議覆梅啟照條陳摺光緒六年十二月初六日
奏為海防要圖分別緩急遵

旨妥籌恭摺密陳仰祈

聖鑒事竊臣承准軍機大臣密寄十一月初二日奉
上諭梅啟照奏請整頓水師擬定各條開單呈覽一
摺所稱請飭船政局及江南機器局仿造鐵甲船
預籌購買外洋鐵甲船及鎗礮等件推廣招商局
船赴東西洋各國貿易添設海運總督設立外海
水師提督裁改海疆各種笨船嚴防東洋練習水
戰長江水師添撥中號輪船各節係為自強起見

著李鴻章劉坤一按照摺內所陳悉心籌商妥議
具奏原摺單著抄給閱看等因欽此仰見

聖主整飭海防虛衷博訪至意曷勝欽服從來禦外
之道必能戰而後能守能守而後能和無論用
剛用柔要當豫修武備確有可以自立之基然
後以戰則勝以守則固以和則久自泰西各國
競起爭雄陸兵以德國為最精水師以英國為
最盛至其船堅礮利則無論國之大小莫不精
益求精蓋外洋以戰立國分爭互峙實有不能
不尚武之勢萃千萬人之心思才力以治戰艦

鎗礮逐月異而歲不同日本雖最爾彈丸近亦
思學步西人陵侮中國夫以中國風氣較遲地
廣民衆為各國所環伺即使俄與日本暫弭釁
端而濱海萬餘里必宜練得力水師為建威銷
萌之策揆之時勢固難再緩梅啟照所謂講求
船礮誠思患預防綢繆未雨之至計也查原奏
單內第一第二條請令船政大臣及江南機器
局仿造鐵甲船從前閩滬輪船多係舊式以之
與西洋兵船角勝尚難得力閩廠後來所造揚
武超武兩船則漸漸合用矣然欲仿造鐵甲船

尚恐機器未全工匠未備不若西洋購材製料
取攜較便廠肆既多可以任意選擇惟是中國
製造之法宜漸擴充果使所造行駛之速鋒稜
之利不遜於洋廠雖需費稍多亦可免洋人之
居奇開華匠之風氣擬請

勅下船政大臣詳查該廠仿造鐵甲究須添備機器
若干船長廣及喫水若干丈尺鐵甲厚若干仿
照何項新式每點鐘能行若干里約須造價若
干詳細酌估具覆如能合算即以應購鐵甲之
費附入該廠剋期造辦至滬局製造鎗礮彈藥

各項工器太繁經費支絀已飭停造輪船同治十三年試造小鐵甲船不能出海礙位布置亦不合法雖該局機器略備而無精熟此道之員匠於西洋新式隔閔尚多似可緩議也第三條請俟俄事定妥仍速購鐵甲船臣前奏明南洋與台灣購鐵甲船二號北洋購鐵甲船二號合共四號斷難再少現據李鳳苞電報已在德國船廠訂造鋼面鐵甲一隻彙集各國新式核開價目船礮兩宗約需規平銀一百四十萬兩而添購魚雷電燈及回國運費尚不在內蓋既購

利器須擇其最新之式樣李鳳苞親歷英德各
廠再三悉心考校始行定議自必確有所見惟
臣初次請撥兩船之款僅得福建六十萬出使
經費兩次借撥六十萬部餉三十萬本多短絀
今需價稍昂計兩船不敷已一百數十萬兩至
續請兩船所指淮南鹽捐及招商局官款即使
如數撥濟尚短百萬焦灼莫名臣已函告李鳳
苞商令此後定船如能較前價稍減或此間籌
足款項方可續訂第已定之一隻除先匯英銀
二十萬磅合銀七十七萬五千餘兩外將來分

期續匯只有儘借撥出使經費及部餉三十萬酌量勻湊若續訂一隻所短百萬以外應請

勅下總理衙門戶部迅為籌撥的款以濟要需至南北洋經費短解日多臣於三月六月間兩次奏催請比照京餉章程豫定延欠處分經戶部議覆奉

旨俞允在案惟尚無分別藩司督撫明文各省報解仍不及八成之數今梅啟照擬請將藩司照貽誤京餉例議處督撫於藩司處分上減一等議處實與前次部議相符且邊防海防無分軒輊

陝甘既比例京餉則海防豈可歧視擬請

旨勅下該衙門申明舊例知照各省自此次定章以後倘再有拖欠遲逾均即照例議處惟原撥經費四百萬兩除去福建廣東截留之款即使解足八成合南北洋不過得二百萬餘兩每處僅得百餘萬目前添購後膛鎗礮及水雷電線等項需用繁巨以後船隻到齊歲費實苦不支是欲購大宗船械非隨時另籌不可鐵甲船尤非另籌不可也第四條請招商局船赴東西洋各國夫欲自強必先裕餉欲濬餉源莫如振

興商務商船能往外洋俾外洋損一分之利即
中國益一分之利 微臣創設招商局之初意本
是如此近來該局和衆美富兩船已往舊金山
檀香山等埠明春擬派海琛船運載兵弁赴英
驗收碰快船回華均足為商船出洋之先導然
此事須逐漸擴充非倉卒所能收效至日本自
設輪船公司關稅獨減中國商輪前往權稅加
重故局船因虧耗而裹足所請酌派豐順保大
試行東洋之處應從緩議第五條請添設海運
總督查運河為黃河梗阻每歲止能運十萬石

而百萬石斷不能運誠如梅啟照所言然往時
河運費多弊重以有倉場有漕督上下各衙門
層層鈐制也今海運百萬石招商局與沙船分
運毫無貽誤經費較省流弊尚少若於煙台添
設總督多一衙門即多一重胥吏丁役需索之
繁恐經費漸難搏節弊端仍難淨除如慮海上
有事固非空設一大員所能為力如今其節制
沿海水師則既有南北洋大臣及各省督撫又
有添設外海水師提督又設漕督未免號令紛
歧事權不一應請無庸置議第六條請將海疆

各種笨船一律裁改臣於同治十一年五月十三年十一月兩次奏請將各省紅單拖罟艇船舢板等項分別裁併抵養輪船前福建撫臣丁日昌亦嘗奏稱裁併五十號艇船可養給一號大兵輪船裁併十號闊頭舢板可養給一號根鉢輪船臣於去年十一月議覆丁日昌條陳摺內奏稱艇船兵餉較儉間能捕盜於淺水之處以輔輪船所不逮雖未可盡裁請擇其窳敗無用者量加裁撤今梅啟照請將各種笨船除多槳可行逆風者暫留少半餘皆裁改與臣等前

議大致相同意在騰出餉項化無用為有用實為救時要政擬請

勅下沿海各省督撫悉心酌度力任怨謗認真辦理第七條請嚴防東洋查日本國小民貧虛僞喜事長崎距中國口岸不過三四日程揆諸遠交近攻之義日本狡焉思逞更甚於西洋諸國今之所以謀創水師不遺餘力者大半為制馭日本起見至朝鮮為東三省屏蔽關係尤鉅臣前勸其與西人立約並導以練兵購器無非望其轉弱為強他日如該國有警或須派兵應援或

別有救急之方固當惟力是視也第八條請設立外海水師提督從前丁日昌有設立北洋中洋南洋水師提督之議與前督臣曾國藩所陳沿海七省沿江三省歸併設防之說大旨略同北洋俟鐵甲二船購到海上可自成一軍擬請添設水師提督額缺具體制應照長江水師提督之例節制北洋沿海各鎮按期巡洋會哨以專責成南洋船隻亦尚未齊或如梅啟照所議暫將統領輪船之松江提督改為蘇浙外海水師提督節制蘇浙沿海各鎮擬請

勅下南洋大臣察酌情形隨時妥辦惟閩粵台灣與
松滬相去甚遠勢難兼顧且福建統領輪船之
提督彭楚漢與松江提督李朝斌望均勢敵難
相統攝似應與廣東聯為一氣耳第九條請令
海疆提鎮鍊習水戰大致即是設立外海水師
之說梅啟照謂水能兼陸陸不能兼水敵船可
以到處窺伺我挫則彼乘勢直前彼敗則我望
洋而歎洵屬確論夫水師所以不能不設者以
其化呆著為活著也今募陸勇萬人歲餉約需
百萬兩然僅能專顧一路耳若北洋水師成軍

核計歲餉亦不過百餘萬兩如用以扼守旅順
烟台海面較狹之處島嶼深隱之間出沒不測
即不遽與敵船交仗彼慮我斷其接濟截其歸
路未必無徘徊瞻顧之心是此項水師果能以
全力經營將來可漸拓遼島為藩籬化門戶為
堂奧北洋三省皆在杆衛之中其布勢之遠矣
營十倍陸軍即此以觀而南洋之利用水師亦
可想見然所以議之數年尚無成者以無大宗
經費購辦鐵甲船快船也竊查定制各省綠營
兵數六十餘萬歲餉約二千萬兩邇者直隸河

南兩江閩浙湖北等省皆加餉練兵其餘歲發
兵餉自五六成至七八成不等然自勦辦髮捻
回各逆專倚勇營迨內地肅清各省復不能不
留防勇以資彈壓而綠營則竟無可調用其兵
精則姑循舊章是多一倍餉額也自海上防務
興而築砲台造戰艦購鎗砲練海軍厥費甚鉅
原所以代綠營勇營之用而綠營勇營仍未少
減是又多一倍餉額也中國財用本不甚裕而
有此三倍之餉額所以愈形支絀今海上如有
水軍一枝勝於陸勇數萬人陸勇一枝勝於綠

營數萬人值此多事之秋勇營分防要地尚難裁減如欲實事求是整軍經武惟有稍汰綠營積存餉項以為購造船械創立海軍之經費擬請

勅下各疆臣查明該省綠營兵現存實數除加餉練兵省分及邊要各鎮或難驟減其餘酌度形勢通減二三成汰減之法凡老疾死亡斤革之卒皆空其額不得挑補沿海營兵可挑入水師者亦如之每歲疆吏核明所減兵數與所節餉數咨報戶兵二部戶部即提出此款撥歸南北洋

為籌辦海軍之用如此數年後或有成數可稽
夫今之議者頗謂勇營亦有流弊不如綠營經
制之兵若汰經制之綠營而立經制之海軍一
轉移間可收實用且所減僅二三成而又出之
以漸措辦尚無窒礙裕餉強兵之道舍此似無
他術也第十條請長江水師添撥中號輪船查
前侍郎臣彭玉麟奏請添造十七八丈之中號
輪船十隻為江陰以下海防之用奉

旨勅下兩江福建廣東各省籌辦采使款項應手剋
期趕造則江防聲勢較盛惟需費已近百萬現

在閩滬粵三廠餉項皆形竭蹙能否認定分辦
尚難懸揣梅啟照擬撥長江提督輪船二隻沿
江五鎮每鎮一隻計共七隻已稍減於彭玉麟
所請之數與其無款而中輟不如少造而有成
似宜俟閩粵各廠參酌會商量力分造必令仿
兵船之式而不必豫定船數亦防務之一助也
以上梅啟照所陳十條或亟宜興辦或暫可緩
行或稍俟變通至梅啟照議創水師注意於鐵
甲船所稱遴選武員有智謀而小心者文員有
膽略而耐勞者為之統將自係識時之論或謂

敵本用此中國卽有數號鐵甲豈能制勝不知
西洋各國去中國數萬里其大鐵甲來者不過
數號其餘均係快船兵船之類中國亦須逐漸
添製但能利器與之相敵加以客主勞逸之勢
我自可操勝算至日本地隘財匱近雖倔強東
海之中其力量亦斷不能多購真鐵甲也所有
梅啟照條陳各件謹分別緩急遵
旨妥籌恭摺由驛密陳是否有當伏乞

皇太后

皇上聖鑒訓示謹

奏

中
十
三
十
七

中
十
三
十
七

--	--	--	--	--	--	--	--	--	--	--

1111

1111

議覆陳本植條陳片

再奉十二月初二日

寄諭岐元代奏道員陳本植條陳邊防事宜一摺所稱奉天以朝鮮為屏蔽該國設被吞併則我之藩籬盡撤為患益深宜力籌保衛等語尚為明切惟請將洋稅專供防餉其勢有所難行著李鴻章將該員條陳悉心酌覈擇其可以施行者籌議具奏原摺著抄給閱看等因欽此臣詳閱該道陳本植所陳各路戰守大局頗中竅要其言奉省屏障實藉朝鮮若被吞併則我之藩籬盡撤欲於東

邊中江一帶厚積軍威藉壯彼國聲援兼防鴨
綠江口設狡焉思逞則我中江練卒可出朝鮮
之背據險以邀之吉林勁旅可由海參崴之南
伺間以乘之等語查自本年夏秋俄國調集大
幫兵船東來游駛長崎海參崴一帶形蹤詭秘
各國公使提督多謂俄人將攻奪朝鮮海口以
拊我奉天吉林之背迄今冬月凍封俄海部尚
書來沙弗斯基由海參崴帶船折回長崎途次
遇風傷足寂無動靜若必謂其乘機吞併朝鮮
雖有此謠實無此事且聞朝鮮海口形勝皆在

東面距奉省尚遠俄即有意蠶食必先由通商
入手臣前面諭朝鮮使臣卞元圭以俄船若遽
闖入該國須派委員接待相機酌允議約並漸
與各國立約以牽制之若果照辦一時似不至
被人吞併陳本植請於東邊中江一帶厚積軍
威藉壯聲援如有巨餉可指亦應先事籌維惟
所稱各路集兵須二十餘萬每年需餉千餘萬
未免張皇其詞不獨各關洋稅均有留支撥協
之款無可抽撥此外亦斷不能於奉省年例協
款外另增巨項只可就該省現有兵力認真

頓逐漸經營以自立於不貶之地海參崴一帶
俄軍置守甚嚴吉林兵力寡弱亦未能出境敦
圖致啟邊衅至所稱朝鮮兵單餉匱與其糜巨
帑以餌強鄰何如分犒資而極屬國所費甚微
所益甚大等語朝鮮雖甚貧弱向無乞糴上國
之事將來設有意外警變則我分兵援助前明
及

國初曾有行之者屆時量力度勢妥籌似無所謂
分犒資而極屬國也所有酌覈籌議各節附片
密陳伏乞

聖鑒訓示謹

奏

李肅毅伯奏議

及門章洪鈞編輯

卷七

出洋肄業在事各員奏獎摺

答覆朝鮮所問事宜摺

直境開辦礦務摺

請減出口煤稅片

鐵甲籌款分別續造摺

商局官款請緩撥還片

覆陳直隸河工情形摺

遵議鴉片釐稅事宜摺

創設公司赴英貿易摺

巴西增刪條約摺

巴西使臣喀拉多面遞節略

答覆巴西節略

覆陳奏調各員摺

機器局請獎摺

訂購快船來華摺

出洋駕駛快船來華尤為出力員弁酌擬獎勵

清單

丁汝昌統領海船片

請裁金州艇船片

續選學生出洋摺

密議朝鮮外交摺

朝鮮陪臣金允植投遞密書

朝鮮來學製造摺

朝王來咨兩道

朝鮮國委員學徒通事隨從等名數

出洋肄業在事各員請獎摺光緒七年正月二
奏為前派船政生徒出洋肄業在事華洋各員始
終勤奮擬懇

天恩給獎以示鼓勵恭摺仰祈

聖鑒事竊臣等接准出使德國大臣兼肄業監督李
鳳苞咨開前因福建船政選派駕駛製造生徒
出洋肄業經該大臣偕同洋監督日意格隨員
馬建忠文案陳季同繙譯羅豐祿等於光緒三
年三月內到洋督率肄習三年陸續學成咨送
回華其展限補習四月者扣至六年八月亦二

律完畢分別留洋遣回在案溯查出洋生徒在
船時各限功課不令閒曠既抵英法專延洋師
補教以充根柢一面偕同洋監督面商英法部
臣將在英之駕駛生先派三生登鐵甲船九生
入格令尼次官學績將官學八生調入鐵甲船
學習歷赴地中海大西洋美利堅阿非利加印
度洋等處學習操防排布迎禦之法迨離船後
又專延教習補授電氣槍礮水雷各法俱有船
主憑單給執並照章酌量游歷工廠以廣見識
是駕駛諸生在船學習不止原定章程分班五

六人上鐵甲船已也其在法之製造生先送四
生入削浦官學五生入多郎官廠其餘派入汕
答佃官礦學及科魯蘇民廠分習開採烹鍊鎔
鑄等事旋經商明部臣將汕答佃等處五生入
巴黎官礦學其製造藝徒初派民廠補習工藝
續經分送賽隆及白海士登官藝學該生徒等
各照官學定章經專門洋師按年甄別給執官
憑並酌量游歷英法比德各國新式機器船械
各廠以資考訂凡可傳習各生徒俱已竟功雖
天資不一造就有深淺之殊而按章督課實與

諸官學卒業之洋員無所軒輊其製造者能放手造作新式船機及應需之物駕駛者能管駕鐵甲兵船調度布陣加之歷練應可不藉洋人其製造如魏瀚陳兆翱鄭清濂林怡游開採鎔煉如羅臻祿林慶昇駕駛如劉步蟾林泰曾蔣超英方伯謙薩鎮冰頗為優異其餘加以陶鎔均可成器皆有考取確據委與原定章程辦有成效之語相符苟非在事各員指臂相資未克臻此所有出力各員除正一品銜前船政監督日意格屢稱渥荷

隆恩不敢再邀獎敘及隨員候選道馬建忠業經

奏獎襄辦文案縣丞錢德培不及三年存記勞績
外其文案陳季同繙譯羅豐祿出使德國二等
參贊官徐建寅幫辦監督洋員斯恭塞格洋文
案高氏耶等五員辦理文案繙譯襄助華洋監
督移調生徒料簡妥協及偕同前赴各廠考求
機器製造採煉並查察功課兼習律例公法化
學政治等事均能始終勤奮辦理有成應請照
案
奏獎等因前來 臣等伏查船政生徒派往英法各

國肄業分入官學官廠於製造駕駛各事均有心得該監督等周歷查察調護維持實心實力使諸生學業進益已多而隨員等兼習各學疊經考試取中奔走照料亦著勤勞該生徒等既經學成回華自應照案給獎以示鼓勵此次出力之監督二品頂戴三品卿銜記名海關道李鳳苞擬請

賞戴花翎留閩補用都司陳季同擬請免補本班以遊擊仍留原省補用並

賞加副將銜候選主事羅豐祿擬請以同知不論雙

單月歸部選用並

賞加四品銜候選道徐建寅擬請

賞加三品銜至三品銜一等寶星前福建船政副監

督洋員斯恭塞格擬請

賞給總兵銜洋員高氏耶擬請

賞給三等寶星並加四品軍功俾資觀感而策後效

所有帶領船政生徒出洋肄業在事華洋各員
始終勤奮擬請獎勵緣由謹合詞恭摺具陳伏
乞

白王太后

皇上聖鑒訓示謹

奏

答覆朝鮮所問事宜摺 二月初六日

奏為朝鮮委員來津請示斟酌答覆相機開導恭摺仰祈

聖鑒事竊上年九月間朝鮮齎奏官卞元圭來津奉旨令臣妥籌該國學習製造練兵各事業經詳晰覆陳在案嗣接出使日本大臣何如璋函稱朝鮮外交一事近日廷議漸知變計又准總理衙門函商隨時設法維持調護並奏請嗣後遇有關係洋務緊要之件由臣與該國通遞文函相機開導等因奉

旨依議欽此欽遵密行知照前來適有朝鮮國王委
員李容肅隨今屆貢使來京於正月二十日起
津稟謁據稱專為奉辦武備學習事並齎呈該
國請示節略一本內載有領議政李昰應奏章
頗悔去年六月堅拒美國來使為非計末則歸
重於及今之務莫如懷遠人而安社稷等語又
問他日不得已與各國相交先後早晚之策又
索中國與各國修好立約通商章程稅則帶回
援照是何如璋所稱朝鮮國王與執政大臣決
意外交而未敢遽發固已確有明證臣因其節

略諮商事件繁瑣先令津海關道鄭藻如等傳
詢一切擬議大概旋准李容肅進見與之筆談
良久該國軍額極虛餉力極絀誠慮無以自立
而所據形勢實為我東三省屏蔽關係甚重現
其君相雖幡然變計有聯絡外邦之意國人議
論紛歧尚難遽決自應乘機開誠曉諭冀可破
其成見固我藩籬惟該國於外交情事生疏即
如與日本通商五年尚未設關收稅並不知稅
額重輕設再與西國結約勢必被其欺蒙無益
有損臣因其來牘有披露腹心願一一開誨碩

畫之語出於至誠遂令前在西洋學習交涉事宜之道員馬建忠與鄭藻如等參酌目今時勢及東西洋通例代擬朝鮮與各國通商章程底稿豫為取益防損之計交李容肅齋回俾該國遇事有所據依不至多受蒙蔽又聞該國君相已漸回悟惟原任太師李裕元等不無異議臣於光緒五年七月間曾遵

密諭轉致李裕元詳切開導嗣接覆書尚未敢遽爾信從此次李裕元來書似仍有不欲遠交之意臣復函又加敦勸使不至從中作梗此後無論

何國再派人往朝鮮議約當無堅拒之理但未
便由中國強為驅迫耳至其節略所詢各條內
惟答覆日本國書稱謂一節儻稍涉含混即於
屬邦體例有礙 臣查西洋各國稱帝稱王本非
一律要皆平等相交該國王久受我

朝冊封其有報答日本及他國之書應令仍用
封號國政雖由其自主應不失中國屬邦之名除
將朝鮮寄呈節略及代擬通商約章李裕元來
往函稿鈔送總理衙門查核外謹將酌覆朝鮮
詢問各條照繕清單恭呈

御覽是否有當理合恭摺由驛密陳伏乞

皇太后

皇上聖鑒訓示謹

奏

謹將酌覆朝鮮詢問各條照繕清單恭呈

御覽

第一條

小邦今與日本開港通商然小邦素昧商規恐
被欺壓上下胥願僮邀上國商人來會開港
諸處互相關易情志既孚依賴必大云而又
有黃參贊策略即奏請推廣鳳皇廳貿易令
華商乘船來開港各口通商以防日人壟斷
之句語此論恐未知如何伏候亮教具咨仰
請而措詞主何妥當乎並望訓示

朝鮮向無海道貿易之例現既擬與外國通商則華商前往貿易亦所不禁至於黃參贊策略防日人壟斷之語果能與各國通商日人自無從壟斷將來如願華商前往貿易應由國王將實在情形咨請核

奏辦理

第二條

敢問小邦他日有不得已與各國相交之際自主自強利權在我不為他要挾且不失先後早晚之策

此條已於上年九月二十二日曾與齎奏官卞元圭詳晰言之當必於回國時面陳總宜先事預防自主之權操之在我茲有馬道臺所擬與外洋通商約章節略一冊交付帶回以資采擇

第三條

小邦釜山元山兩港定稅既蒙大人訓示敢不即速議定第伊言非全權委任不可舉擬若值全權之來議值百抽幾當恪遵指津隨機圖之各國修好立約通商章程稅則稅額條

款稅關設官凡例伏想已有印行文字願蒙
賜下各一件謹當帶回援照

釜山元山兩港定稅宜由國王委任妥員予以
議稅全權字據俾與彼國使臣互換觀看以
資取信此乃各國遣使議事之通例也至稅
則值百抽幾不必援中國所定通商稅則為
例緣前者中國於外國情形尚未深知僅為
體卹商民而設進出口各貨皆係值百抽五
若洋貨運入內地再抽二五子口稅其實未
可執一而論上年亦面告齎奏官卞元圭矣

若外洋抽稅皆視貨物之暢滯以定稅則之多寡竟有值百抽三十以至值百抽百者若以各物統扯論之大約不在值百抽十五以下今朝鮮國擬與外洋通商儻各貨暢滯未能預知則值百抽幾亦難預定不若定一試辦統例進口貨估價值百抽十出口貨估價值百抽五至食用等物數滿十件者亦照則抽稅如此試行三五年貨物之暢滯可知即則例之多寡可定然後與外洋各國重定稅則洋人決無不從之理蓋和約與商約有異

在我不肯和約決無開釁之端在我欲修商約斷無與戎之舉不然歐洲瑞士比利時慕爾彈丸介於諸大國之間將商約不修稅則不加而國不足為國矣至中國各口稅關或設監督專管或飭巡道兼管從前初開通商口岸華人罕諳洋文洋語收稅事件僱用洋人司理仍歸監督巡道節制今朝鮮擬與各國通商日本窺知朝鮮未諳西洋語言文字及稅務事宜難保不以管稅一職自薦充當但日本朝鮮僅隔一水往來商貨必多且聞

通商五年尚未收稅喫虧已甚儻僱日人司
理稅務尤恐滋弊祇有暫僱西人之明白稅
務兼通漢文者令其隨同朝鮮所派管關官
員料理收稅較為妥當並一面速選聰穎子
弟從所僱西人學習語言文字稅務事宜學
成之後自無容再用西人矣日本初與各國
通商於暫僱西人料理稅務兼司教習一節
辦理甚妥是以該國現在稅務辭退西人已
能自行管理茲將中國所有通商章程稅則
稅額條款飭津海關道檢交該員帶回以資

考證

第四條

北洋咨式似依禮部咨式書呈而內書北洋督署大臣外書一體繕寫恐未知如何

北洋咨式應與咨禮部相同內外銜稱應書

欽差北洋通商大臣衙門字樣

第五條

伏見禮部咨示中有委員弁兵學徒通事人等由北洋大臣衙門給發空白憑票交該國按名填給之語空白憑票許令此次帶回以為

隨用之地伏望

據關道等面詢稱係先派學藝人來業由該道等詳請給發憑票拾張交該員具領帶回呈收如學藝人分起前來應按每起填用一張交管領之員執持以憑查驗

第六條

學習人徒來往既蒙徑從海道自更便捷之教恐是賃乘汽船吉利涉海當自何處賃船可以無礙亦蒙公文不致盤詰

據關道等面詢稱由朝鮮進鳳凰廳邊門計程

一千一百餘里再到牛莊營口約三百餘里
即從營口或附輪船或附帆船來津較為便
捷應於進邊門時將憑票呈東邊道衙門查
驗於到營口時將憑票呈奉錦山海關道衙
門查驗均候加戳放行若遇有交涉事件仍
由地方官約束訊斷

第七條

小邦船舶本無旗標今將議造而黃參贊有奏
請襲用中國龍旗之論敢問中國船上旗身
畫樣而小邦則用某色某畫是否有當乎

凡西國商船旗式皆係國主之旗因海上往來
俾知為某國船隻今貴國王自用之旗據稱
是畫龍方旗亦與中國龍旗相仿自可以畫
龍旗為國旗即作為船舶旗標應於定用之
先將龍旗尺寸顏色繪具圖式咨明本大臣
衙門以憑核

奏咨行

第八條

卑職未渡鴨綠聞日本使花房義實齎其國書
而來敝朝以為條約中曾有我禮曹與伊外

務省書契往來而已無國書往來之規今何
遽變條約乎以此難之彼云現陞辦理公使
不可持外務書契且各國皆有國書然後益
加親睦力懇不已國王特念鄰誼親臨便殿
召接彼使而受之書辭敬白等句頗恭非慢
至若皇帝字朕字極涉礙眼上下俱為不安
且書中所請駐劄最難應從彼言仁川開港
亦不可輕許廷議仁川開港強許以遷就幾
年駐劄則欲因仁川事彌縫然彼之從否姑
未可知國書不可不答而稱他日帝實所不

願至於自稱又無援照往復之際如何撰措
庶不失國體而免笑於各國乎彼之意望又
在專价修答非徒事力不敷隨請隨行豈不
損弱乎大人既垂厚念視均一室故茲敢騰
上彼之國書與口奏伏乞俯鑑指賜良策使
我東藩得以固圉全安焉

使臣駐京西洋各國皆同蓋既通商必有交涉
事件公使之駐京猶之領事之駐口岸非此
不能遇事互酌以聯兩國之誼以平兩國之
爭實有益而無損也特東西風氣各殊猝議

駐京鮮不意存顧慮中國從前初與西國通
商開口時情形亦然揣度事勢既經立約通
商斷難始終拒絕與其勉從於後日似不如
慨允於目前況日本使臣駐京一節查光緒
二年貴國與日本立約業於第二款載明現
彼據約而求儻不允許即為背約其曲在己
未免授人以隙至仁川一港係由海道達王
京必由之路如已允開即踐守前諾似亦無
礙至所云自稱又無援照往復之際如何撰
措庶不失國體而免笑於各國等語茲日本

遣使齎奉國書將來貴國答以國書乃兩國
禮尚往來之義答書如何措詞想貴國自有
討論而潤色之者至於國書內所稱名號歷
查西洋各國書籍內所載聘問國書譯其稱
謂本非一律如德意志俄羅斯奧斯馬加等
國主皆自稱為帝意大利日斯巴尼亞瑞典
等國主皆自稱為王間有譯漢文為君主及
君王者英吉利國主男則稱王女則稱后迨
前六年始加印度皇后之號如稱王之國致
書於外洋稱帝之國彼此亦各從其本稱未

嘗以稱帝為尊稱王為小也貴國久受

中朝冊封如有報答日本之書理應仍用

封號將來傳聞各國衡以西洋通例當無笑貴國為

失體者

直境開辦礦務摺 四月二十二日

奏為直境招商購器仿用洋法開辦礦務疏通運道漸有成效恭摺仰祈

聖鑒事竊惟天地自然之利乃生民日用之資泰西各國以礦學為本圖遂能爭雄競勝英之立國在海中三島物產非甚豐盈而歲出煤鐵甚旺富强遂甲天下中國金銀煤鐵各礦勝於西洋諸國祇以風氣未開菁華閤而不發利源之涸日甚一日復歲出鉅款購用他國煤鐵實為漏卮之一大宗從前江西之樂平及山西湖南等

省皆以上法開採煤鐵等礦工力較繁而所得較微無裨大局近來如台灣之基隆湖北之荆門安徽之池州經營煤礦漸用洋法然或因創辦伊始或因經費未敷尚難驟得大效臣於光緒元年四月間欽奉

寄諭著照所請先在磁州試辦派員妥為經理等因欽此仰見

朝廷恢拓遠圖至意旋經屢次委員往查磁州煤鐵運道艱遠又訂購英商鎔鐵機器不全未能成交因而中止旋聞灤州所屬之開平鎮煤鐵礦

產頗旺 臣飭招商局員候選道唐廷樞馳往察
勘攜回煤塊鐵石分寄英國化學師鎔化試驗
成色雖高低不齊可與該國上中等礦產相仿
採辦稍有把握三年八月 臣檄派前任天津道
丁壽昌津海關道黎兆棠會同唐廷樞熟籌妥
辦旋據酌擬設局招商章程十二條批令刊刻
施行迨丁壽昌黎兆棠先後離津現任津海關
道鄭藻如復會辦局務查初定章程擬招商股
銀八十萬兩開採煤鐵並建生熟鐵爐機廠就
近鎔化繼因招股驟難足額鎔鐵爐廠成本過

鉅非精於鐵工者不能位置合宜遂先專力煤
礦採煤既有成效則鍊鐵必可續籌也唐廷樞
奉檄設局後勘得灤州所屬距開平西南十八
里之唐山山南舊煤穴甚多土人開井百餘口
只取浮面之煤因無法取水而止光緒四年鑽
地探試深六十丈得有高煙煤六層第一層厚
十八寸第二層二尺第三層七尺第四層三尺
第五層六尺第六層八尺其第六層之下尚有
一二層但計所得之煤已足供六十年之用因
是不復深探旋於五年購辦機器按西法開二

井一提煤一貫風抽水其提煤井開深六十丈
貫風抽水井開三十丈地下開橫徑三道一在
提煤井二十丈開洞門作旋風之用一在三十
丈一在五十六丈兩道係取煤之用所有地下
橫徑直道均與兩井相通其第一條橫徑南開
四丈得見第一層煤質略鬆煤層過薄豫備不
用北開八丈得見第二第三層煤兩層相隔只
有一尺其質堅色亮然燒耐久性烈而蒸氣易
騰燒燼之灰亦少就目下二十丈深之煤論之
可與東洋頭號煙煤相較將來愈深愈美尤勝

東洋惟煤產出海銷路較廣由唐山至天津必
經蘆台陸路轉運維艱若夏秋水漲發節節
阻滯車馬亦不足供用因於六年九月議定興
修水利由蘆台鎮東起至胥各莊止挑河一道
約計七十里為運煤之路又由河頭接築馬路
十五里直抵礦所共需銀十數萬兩統歸礦局
籌捐非但他日運送煤鐵諸臻便利抑且窪地
水有所歸無虞積滂而本地所出鹽貨可以暢
銷是一舉而商旅農民皆受其益所佔地畝均
照民價購買本年二月興工挑挖五六月可一

律告嚴從此中國兵商輪船及機器製造各局
用煤不致遠購於外洋一旦有事庶不為敵人
所把持亦可免利源之外洩富強之基此為嚆
矢據總辦開平礦務局員唐廷樞將大略情形
具稟前來 臣查唐廷樞熟精洋學於開採機宜
商情市價詳稽博考胸有成竹經理數年規模
粗備當夫籌辦之始 臣因事端宏大難遽就緒
未經具奏今則成效確有可觀轉瞬運煤銷售
實足與輪船招商機器製造各局相為表裏開
煤既旺則煉鐵可以漸圖開平局務振興則他

省人才亦必聞風興起似於大局關係非淺所
有直境招商購器開辦礦務疏通運道緣由理
合恭摺具陳伏乞

皇太后

皇上聖鑒謹

奏

請減出口煤稅片

再據候選道唐廷樞稟稱開辦礦局以來購備機器延訂洋匠工司及買地築路挑河經費約共用銀七十餘萬兩成本既重煤價亦因之而昂若再加現定之稅額即難敵外洋之煤其勢必不能暢銷而關稅亦鮮有實獲與其稅重而少所收不若減輕而多所納中國原定洋貨稅則過輕土貨稅則較重以致華商疲累難與洋商葫頡查西洋各國通例於外來進口貨稅無一不重於本國出口貨稅無一不輕所以徵外

人之利而護本國之商斟酌損益實有至理乃中國初定約時為外人所蒙轉使外洋進口之貨稅輕內地出口之貨稅重不啻抑華商而護洋商此通商後數十年之流弊隱受厥累而不覺者也即以煤餉而論洋煤每噸稅銀五分土煤每担稅銀四分合之一噸實有六錢七分二釐若加復進口半稅已合每噸銀一兩有奇盈絀懸殊至二十倍之多前兩江督臣沈葆楨於臺灣基隆開煤時奏准土煤每噸徵稅一錢較洋煤業已加重嗣湖北用機器開採亦奉

諭旨准照臺灣稅則在案揆從前嚴定土煤稅章之意或恐煤稅減輕則土煤出口日多內地煤價必長故特重其稅以示限制惟是土法採煤只能售於近地若從陸路車運出口脚價太重斷不合算况其所採浮面之煤實不足供輪船製造等用如直隸西山等處煤產專濟五城內外之需並無轉運來津者是其明證似多運出口一節本無可慮今開平煤礦全用西法每日出至五六百噸之多據洋師測量足供六十年採取除運往要口分供各局及中外輪船之用並

可兼顧內地民間日用刻下運道疏通腳價既
省若再將稅則減輕煤之售價必廉可以暢銷
無滯而運售於各局者不致再用洋商昂貴之
煤其有裨於公款不少等情前來 臣復飭津海
關查取歷年洋煤土煤進口數目開具清摺自
同治十年起至光緒六年止洋煤進口計八萬
一千五百餘噸土煤進口僅五千五百餘噸而
出口土煤則天津向所未有蓋由稅則厚薄不
一土煤壅滯難銷遂使厚利為洋商所壟斷若
不變通設法更定章程殊非通籌理財之大計

合無仰懇

天恩俯准開平出口煤飭援照臺灣湖北之例每噸
徵收稅銀一錢以恤華商而敵洋煤庶風氣日
開利源日旺而關稅亦必日有起色矣理合附
片具陳伏乞

聖鑒訓示謹

奏

鐵甲籌款分別續造摺 四月二十九日

奏為訂造鋼面鐵甲第一號船按期匯價辦有端
緒現擬分別續造豫籌要款恭摺仰祈

聖鑒事竊 臣前經迭次奏明 函屬出使德國大臣李
鳳苞訪查各國船廠酌定新式訂造鐵甲船二
隻所需船價計得福建解存上海銀六十萬兩
部餉三十萬兩出使經費兩次借撥六十萬兩
合共一百五十萬兩所短之數擬再陸續籌撥
又以中國洋面將及萬里鐵甲兩隻不敷分布
尚應續造二號請撥准商捐項一百萬兩招商

局分年拔還官款一百萬兩抵作訂造鐵甲之需均奉

旨俞允上年六月十月間准戶部兩次議覆令將淮商捐銀四十萬兩先行撥給應用其餘訂船不敷之數俟酌定船價應分幾次勻付奏報到日再行酌撥總期無誤要需等因奉

旨依議欽此行知遵照各在案臣即電囑李鳳苞悉心考校迅速定議迭據李鳳苞函報在德廠訂造鋼面鐵甲一隻核計初次請撥兩船之款本多短絀今因新式價昂不敷之數更鉅臣於上

年十二月議覆梅啟照海防條陳摺內請

旨飭下總理衙門戶部迅為籌撥的款迄未奉有覆
准明文伏查各國鐵艦之式日出日新與其價
廉而得已舊之船臨事難操全勝不若價昂而
求最新之式先聲已足奪人今核李鳳苞所訂
德國伏耳鏗廠船式為交戰大洋及守護海口
之用兼有水下碰船之鐵角喫水深十九尺每
一點鐘行十四海里半合中國四十六里有奇
中腰水綫處鋼面鐵甲厚十四寸前後至首尾
皆用鐵甲其艙面對角處有兩圓臺亦鋼面鐵

甲厚十二寸約十八個月造成李鳳苞復與參
贊徐建寅彙集各國新式詳稽博訪去短取長
如轉動之靈捷衝碰之猛利浮力之寬裕礮位
之合宜隔堵保護之周密引水導氣之流通下
至一板一釘厚薄疏密無不精益求精蓋在中
國海面所用之鐵艦斷推此種為上等矣又據
李鳳苞函稱如南北洋合購四船約估價目第
一船於光緒六年十一月在德購定勻分四期
付價至光緒八年六月交船付訖該船配克鹿
卜十二寸口徑後膛礮四尊八九寸口徑後膛

礮首尾二尊又分兩期付價加配雷艇電燈連
珠礮魚雷裙網等件及驗工查料僱員駛回保
險及生徒舵水各薪費約共需八百七十萬馬
克即四十三萬英磅以每磅三兩八錢折算合
銀一百六十三萬兩有奇其第二船現方屬英
法廠主赴德面議但英法工貴價必較昂如果
太昂擬仍在德廠續訂以節糜費籌備亦不可
再遲合計第一第二兩船之價需費已在三百
二十六萬兩以外至第三第四兩船將來須赴
英法廠另造其價稍浮惟南北洋各備兩艘數

已至少或可稍為改易萬不可減小其式大約
照式續造兩艘并一切隨件薪費約共需九十
萬英磅合計銀數又在三百四十一萬兩以外
各等語臣查上年六月初五日欽奉

上諭著照所議查照新式訂造鐵甲二隻該督迅即
知照李鳳苞速行定議早日造成不可耽延時日
至北洋空虛應再定造鐵甲二隻俾資分布等因
欽此是前後擬訂鐵艦四隻實屬中國必不可少
之事久在

聖明洞鑒之中惟值此籌款維艱臣再四籌思必須

分年續造以紓餉力現計初次擬造二船僅得
有著之款一百五十萬兩核以李鳳苞所開款
目尚短一百七十六萬餘兩除已定一船業飭
江海關道劉瑞芬於上年九月本年三月兩次
電匯英銀二十六萬磅約合銀九十七萬餘兩
外臣頃又懍遵不可耽延之

諭旨電致李鳳苞囑照現定鋼面鐵甲原式再訂一
船洋廠合同一經議定價銀即須如期分匯未
便失信於人使承辦之員稍有掣肘而上海磅
價時有漲落必先儲備實銀俟磅價稍低或電

匯現銀或豫買磅票分起匯寄乃免喫虧臣擬將淮商捐項四十萬兩挪後就前作此次購船之用其應續繳六十萬兩依項於五月內可以交清擬請

旨勅下戶部全數撥作船價以符原議並請

勅下兩江督臣轉飭兩淮運司委員解交江海關道收存以便隨時匯寄又屢接四川督臣丁寶楨來函每以東北海防為念亦勸速購鐵甲練成外海水師去歲俄約未定聞丁寶楨曾奏請籌餉三十萬兩撥解臣處募勇操練防護

京畿事雖未行而其公忠體國之忱令人敬服今購利器以治水師實於中國自強之機關係尤鉅可否

勅下丁寶楨就川鹽官運局分批籌撥船價銀三十萬兩解交北洋助成盛舉以上二款如蒙

准撥約尚短銀四十六萬餘兩容臣再於北洋海防經費及淮軍額餉內先其所急通籌挪湊隨時補苴如此則初造二船可剋期告成矣至續次擬造二船除將鹽捐百萬兩挪用在內僅有招商局繳款百萬兩臣初擬該局每屆可拔還官

款三十五萬兩則收至第三屆可以足數嗣據
局員唐廷樞等詳報承運本屆各省漕糧應支
水腳等項解還官款共僅銀二十九萬餘兩約
略計算須至第四屆方能收足百萬之數是一
時尚難就緒擬俟二三年後伊犁償款歸清各
省財力稍寬屆時再酌度情形奏明請

旨勅下總理衙門戶部籌撥的款定期續造庶水師
之規模漸擴藉可禦外侮而壯聲援除將李鳳
苞寄到第一號鐵甲合同船式章程鈔咨總理
衙門查核外所有現擬分別續造預籌要款緣

由恭摺由驛馳陳伏乞

皇太后

皇上聖鑒訓示謹

奏

--	--	--	--	--	--	--	--	--	--	--

1. 1. 1.

1. 1. 1.

商局官款請緩撥還片

再欽奉三月十二日

寄諭譚鍾麟奏招商局借撥浙江塘工生息經費銀三十萬兩每年應還銀六萬兩請飭扣還等語著飭招商局於本年承運浙漕腳價項下由浙省糧道扣還本銀六萬兩等因欽此遵查輪船招商局原存各省官本銀一百七十八萬一千五百兩前經奏明於該局承運蘇浙江鄂漕糧應得水腳項下勻分五屆每年撥還一屆銀三十五萬六千三百兩係按該局每年運米六十六萬石

而言現在江西停運本屆只承運蘇浙湖北漕
米五十餘萬石共得水腳曹平銀二十九萬餘
兩按各省原撥官本銀數分攤浙江只應攤還
銀四萬九千餘兩並無六萬兩之多且購辦鐵
甲船需款緊要臣已於上年六月奏請酌提招
商局三屆還款銀一百萬兩零抵作訂造鐵甲
之需奉

旨允准欽遵在案查鐵甲船為南北洋海防要需關
繫軍國大計本應由各省協力籌措因現款難
籌不得不酌提招商局還款應急臣業將現訂

兩號並擬續訂兩號情形價目另摺詳陳計續
訂兩號約需銀三百四十餘萬現僅指招商局
還款一百萬兩其餘二百四十餘萬尚無著落
若再將此款撥還各省則船價更無所出自應
仍遵上年六月

俞旨函提以符原案現計該局運漕水腳每屆既無
三十五萬餘兩約須四屆方能提足百萬所有
浙江塘工現需歲修經費應由該撫臣暫行另
籌濟用俟提足船價百萬後再行扣還各省歸
款俾海防利器稍資購辦而各省借撥局款亦

不至全虛除分咨查照外理合附片覆陳伏乞

聖鑒訓示謹

奏

覆陳直隸河工情形摺 五月二十日

奏為覆陳直隸河道地勢情形節次辦法恭摺仰

祈

聖鑒事竊 臣 欽奉光緒七年二月三十日

寄諭左宗棠奏擬調馬步各營興修水利等語據稱
順天房山直隸正定等處近年地勢迥異從前不
修水利則旱澇相尋民生日蹙治水之法下游宜
令深廣上游宜多開溝洫擬令所帶現紮張家口
各營移治順天直隸上游水利其下游津沽等處
仍由直隸總督經理著李鴻章童華李朝儀將各

該處地勢情形及應如何辦理之處會同籌議具
奏等因欽此並准順天府尹臣咨請主稿會奏前
來伏查近畿水利關繫

國計民生興修無待再計臣蒞直以來迭經察酌
籌辦未敢稍涉漠視惟限於地勢財力河澗又
受病過深有難盡利無害者朔自宋元迄明代
有興作實效鮮聞惟北宋何承矩就雄霸等處
平曠之地築堰為障引水為塘率軍屯墾以禦
戎馬專為設防起見今之東西淀皆其遺址維
時河朔本多曠土堰外即屬敵境聽其旱澇無

闕得失故可專利一隅厥後人民日聚田疇日
闢野無棄地不能如前之佔地曲防故治之之
法亦復不易我

朝康熙雍乾年間屢蒙

聖祖仁皇帝

高宗純皇帝巡行規畫指授機宜迭

命賢王重臣董理其事先後歷時數十年官民用費千
百萬濬築兼施節宣備至始克奏功然旱澇仍
不能免即如雍正四年甫報工竣而五年夏秋
永定等河漫決多口各屬被水者三十餘州縣

其營成之水田又因缺雨難資灌溉未幾而多
改旱田蓋河道本來狹隘既少餘地開寬土性
又極鬆浮往往旋挑旋塌且渾流激湍挾沙壅
泥沙多則易淤土鬆則易潰其上游之山峯陡
峻勢如高屋建瓴水發則萬派奔騰各河頓形
壅漲汎過則來源微弱冬春淺河膠舟迴不如
南方之河深土堅能容多水源遠流長四時不
絕也伏讀乾隆二十七年十一月

高宗純皇帝諭曰從前近畿議修水利營田未嘗不再
三經畫始終未收實濟可見地利不能強同等因欽

此

聖謨燭照洞見本原此往事之可考而知也乾隆以後未興大役道咸以後軍需繁巨更兼顧不遑卽例定歲修之費亦層疊折減於是河務廢弛日甚凡永定大清滹沱北運南運五大河又附麗五大河之六十餘支河原有閘壩隄埝無一不壞減河引河無一不塞其正河身淤墊愈高永定河在雍乾時已漸高仰今視河底竟高於隄外民田數丈昔人譬之於牆上築夾牆行水非一日已而節宣西南路諸水之南泊北泊節宣

西北路諸水之西淀東淀又早被濁流填淤或
竟成民地其河淀下游則僅恃天津三岔口一
綫海河迤邐出口平時既不能暢消秋冬海潮
頂托倒灌自胸膈腸腹以至尾閘節節皆病是
以每遇積淤盛漲橫衝四溢連成一片順保津
河各屬水患特重此同治十年前後之情形也
曾國藩蒞直時首以治河為務而未克興辦大
工臣接任後適值連年大水迭次遊員周歷驗
勘並隨時親自察度詳稽往牘博采羣言求所
以修治五大河東西淀之法蓋五大河為一省

之網東西淀為各河之匯須先從此入手若房山正定一帶尚非急切者五大河中以永定河之害為最深然蘆溝以上東於兩山之間向無工程其病實在蘆溝以下須挑去二百餘里中淤一二丈之積沙方能順軌否則以南隄為北隄而改河使南另築南隄以障之亦可安流弭節而去此二策者勞費皆不可勝計若挑去全河極厚之積沙自來無此辦法亦無出沙堆積之處若改南隄為北隄則固安永清兩縣城近靠南岸須議遷建尤於民情不順其大清北運

南運則須分別挑濬河身加築隄埝修復閘壩
減河始保安瀾統計工程皆極繁巨萬萬無此
財力濇沅趨向無定自來不設隄防同治七年
由藁城北徙以文安大窪為壑其故道之難復
上游之難分下游之難洩曾國藩與臣均詳陳
有案東西淀寬廣百數十里淤泥厚積人力難
施此費鉅工艱不能大辦之情形也考之往事
既如彼揆之今情又如此臣目擊時艱既不敢
籲求巨帑於

君父又不忍坐視顛沛於民生只有逐漸設法量力

補救豈有畏難苟安任其自盈自涸之理頻年
以來修復永定河金門閘及南上北三灰堤以
資分洩裁灣切灘以紓溜勢加築隄段添備麻
袋土車以助搶險大清河則於新雄境內開蘆
僧減河於霸州文安境內接開中亭河勝芳河
以分洩上游盛漲於任邱開趙王減河以分洩
西淀盛漲並將隄埝分別修築今年又於文安
左各莊至台頭挑挖河身二十六里寬十餘丈
深丈餘以暢下游去路滹沱河則於河間及文
安窪酌開引河兩道今年又於獻縣朱家口另

關減河三十餘里均歸子牙河達津以輕河獻
任雄霸保丈大積患北運河則於通州築壩挽
復潮白河歸槽不使橫溢於香河王家務武清
筐兒港修復石壩以減漲水於天津霍家嘴疏
濬引河以通下口今年又於武清寶坻境內挑
挖筐兒港王家務兩減河河身以資暢洩南運
河則於青滄靜海等處修復隄工二百餘里因
東境四女寺哨馬營直境捷地興濟四處減河
久廢遂於靜海之靳官屯另開減河六十餘里
使別途出海不併注於津河又於天津城東永

定大清滹沱北運交會之陳家溝開河百餘里以分洩四大河之水徑達北塘入海庶免海河過於壅滯其無蠡深博高陽一帶則堅築褚龍河隄以防滹沱北越任邱至天津一帶則加築千里隄格定隄使河自河而定自定西沽韓家樹上至東定則用西洋機器船節節挖淺水路已通又於廣平開洺河順德挑澧河趙州濬泇槐午河及此外各屬河道隄壩受害較深者亦隨時酌量疏築並令地方官民於無礙運道官隄之處或擇開溝洫或戽水灌地有泉源者察

看疏濬距河遠者開鑿井眼若河間府屬井工則係專業辦理以上歷年所需工費除勻撥賑款捐項以工代賑外並抽調淮練各軍分助挑辦淮軍統領周盛傳更於津東之興農鎮至大沽創開新河七十里上接南運減河又於減河兩旁各開一渠以便農民引灌其興農鎮以下又開橫河六道節節挖溝引水營成稻田六萬畝且耕且防海疆有此溝河亦可限戎馬之足此臣頻年就賑捐兵力竭蹙經營之情形皆有奏牘可稽者也自來河道必須上下游並治是

以臣於各河上游或修復閘埧酌開減河以資分洩下游或挑濬正河添闢減河以暢去路近年順保津河各屬水患較輕尚不至橫衝四溢連成一片但值廢弛已甚之後官民交窘之時迴與康熙雍乾年間情事不同僅能量力補苴實無從更張大舉若欲使各河一律順軌則必籌定鉅費先將永定河自蘆溝以下二百餘里改河築隄可保數十年無患又將大清河雄縣一帶之淤窄挑寬濬深北運南運河卑薄未補之隄埝淤廢未復之減河分別加修東西淀南

北泊及津東之塌河等淀為節宣諸水之區尤宜設法疏濬使可容受蓄洩並將西淀上游蠡高境內之豬龍河淤窄挑濬寬深再次則酌修各屬支河及畿東之薊運等河務使脈絡貫通經緯畢具悉去胸膈腸腹尾閭之病然後廣開溝洫相濟為用庶水害既除而水利可興不致此旱彼澇此盈彼涸惟統計最要次要各工甚巨即如永定一河若照議興辦土方不知凡幾其一切開壩物料工用器具佔用旗民地等項為費亦復不貲實非數營兵勇所能辦到臣部

淮練各營僅二萬餘人分紮海防邊防及內地
各要隘修築礮臺彈壓地面緝捕盜賊各有專
司只能抽暇就近酌調助役勢難全撤要防停
罷操巡以致顧此失彼今年濬文安之大清河
開獻縣之滹沱減河挑寶坻武清之北運減河
並於高陽修潞龍河隄任邱修千里隄全賴東
南各省官紳集捐協助始克就緒然已竭忠盡
歡此後斷難為繼本省向係缺額入不敷出更
無餘款可籌儻能如康雍年間故事約計現在
應辦工程先行由部按年撥給銀百餘萬兩自

可分投勘議招雇民夫助以兵勇及時擇要辦理次第興作惟部庫拮据外省支絀伊犁償卹等項尚待籌付竊恐一時難集鉅款似仍只能量力籌辦未便尅期奏效左宗棠以所帶各營移治上游正可輔直力之不逮前已咨請飭挑涿州北關外拒馬河淤沙以試其端並經左宗棠不辭勞瘁親履察勘惟本屆伏汛將臨盛漲即至難再別施畚鍤此後應修何處即由左宗棠察酌隨時會商當飭地方印委實力襄助相與有成徵臣忝司守土兼任河工責無旁貸昨已

督飭司道詳確勘議無論上游下游仍當統籌兼顧盡其力所能行以期逐漸補救惟賑捐既已停止本省又無款項可籌將來必不可少之工需只可奏懇由部酌撥以資接濟此現時統籌酌辦之情形也正在具摺間接准部咨以左宗棠前奏水利事宜業經醇親王遵奉

懿旨覆奏蒙派恭親王醇親王會同左宗棠及臣等妥議奏辦等因仰見

朝廷廑念民生慎重水利至意除鈔摺咨呈恭親王醇親王並咨左宗棠酌核仍隨時會籌議辦外

所有臣等原奉

寄諭統籌酌辦緣由合先會同兼管順天府府尹臣
童華署順天府府尹臣張灃卿恭摺由驛覆陳
是否有當伏乞

皇太后

皇上聖鑒訓示遵行謹

奏

遵議鴉片釐稅事宜摺 六月二十二日

奏為遵議洋藥土煙加增內地釐稅事宜恭摺仰

祈

聖鑒事竊 臣 欽奉光緒七年五月初九日

寄諭左宗棠奏禁食鴉片請先增洋藥土煙稅捐一

摺著南北洋大臣福州將軍各省督撫粵海關監

督各就關口地方情形詳細體察將稽查徵收章

程悉心妥議覆奏候旨定奪此事務在必行該大

臣等當熟籌辦法期於大局有裨等因欽此當即

分行北洋各關道一體欽遵籌議在案竊維洋

藥流毒甚深既難驟然禁止只可先加釐稅藉以稍濟餉需而煙價較增吸者或漸減其癮未始非徐禁示罰之意且於同治十三年海防事宜案內業經議及惟釐稅加增太重恐致偷漏愈多亦須統盤籌計查洋藥係由印度先到香港然後分運進中國各口香港為英國屬地中外奸商即於該處私相授受檢閱總稅務司開呈各關華洋貿易總冊同治十二年至光緒四十年所到香港洋藥每年八萬四千餘箱至九萬六千餘箱運銷各口有稅者則止六萬五千餘

箱至七萬一千餘箱光緒五年所到香港洋藥
十萬七千餘箱運銷各口有稅者則止八萬二
千餘箱實計每年香港私銷洋藥二萬數千箱
除分運新嘉坡舊金山各埠外餘皆不經新關
不收稅釐而由沿海各項民船魚艇零星潛運
內地且多不入有關卡之正口各省濱海之區
袤延萬餘里河港紛錯沙岸無垠勢難處處設
卡節節防查其偷入內地之後路徑四通八達
或假冒鑰車官差或附搭眷船行李狡謀詭計
百出不窮即使經過關卡亦不能逐人逐件一

一搜檢致生事端至賣放包庇之弊在所難免
巡丁豈知大義洋藥價值甚昂走私者即偶被
查出但分給時值卡中之一二巡丁得此已足
償數月之辛金未有不縱放者更有豪強之徒
糾合亡命執持兵器包攬闖越結幫興販關卡
巡役單弱往往孰視而無如何自來私鹽最干
例禁巡緝亦較嚴密然販私者無省不有或竟
聚夥數十百人公然馱載到處洒賣拒捕兵役
雖峻法嚴刑無以戢其心志蓋利之所在身命
有所不惜也洋藥拆箱之後包件輕小取攜甚

便隨身可以夾帶非私鹽笨重可比其獲利更厚於私鹽什倍百密一疏則騙釐者得計而報捐者向隅此杜絕偷漏不易之實在情形也凡事清其源則用力少而程功易截其流則需費多而收效寡洋藥偷漏之源實在香港惟難於該處稽徵不得不就各省自立章程以為截流之助臣督飭津海關道鄭藻如查得津關進口洋藥從前每年可銷七千箱近因釐數稍加止有四千箱左右或三千數百箱緣山東河南與直隸毘連地面向皆由津運往今則漸從鎮江

煙台分運天津銷數遂減至洋商運洋藥進口
應先赴新關納稅將貨起存洋行鈔關不再徵
稅凡華商買取者向赴洋藥釐捐局請領聯票
逐箱秤驗照章每百斤完正加釐捐銀二十四
兩地方善捐耗羨等銀八兩零其由津運赴內
地聞崇文門按洋藥每包收稅銀一兩零此外
如通州居庸關張家口固關大名府亦各有稅
釐數目畸零並無大宗茲擬稅釐兩項每箱共
加至一百五十兩除進口稅三十兩仍由洋商
完交外其內地稅釐應合一百二十兩較前增

數甚鉅自應設法嚴防偷漏據鄭藻如詳稱擬由海關另設關棧洋藥進口立即起儲棧內勿再分存洋行以免散而無紀遇有華商購買先赴總口釐局交足捐項方准出棧惟關棧之設固能防弊尤貴便商應令總稅務司妥籌辦法應否知照各國公使俾免掣肘由總理衙門察酌辦理至棧租一切與洋商無涉惟火險須洋商自保所有口岸轉販洋藥之華商字號擬令先領部帖方准開設部帖由關道核給每張令繳費銀五百兩十年一換既須領帖又重其費

庶開設較少稽查較易並令五家聯保一家偷漏四家同罰其餘行戶及舊日號商現未領帖者一概不准私販洋藥土煙犯者全貨充公該商出資領帖利歸獨擅遇有私販自必尋蹤稟拏亦足助局卡之耳目其由沿海各口零星偷進者擬酌設小火輪船二隻專在海面巡緝並飭近海州縣營汛出示曉諭協同稽查儻有私帶洋藥進口被人指報者拏獲後全貨充公以其半賞給指報之人不必再科私運之罪以免挾嫌栽害惟海面攬裝之船隻內地私囤之鋪

戶一經查獲必予重懲州縣營汛如能緝獲私
販洋藥積至一百斤以上者記功一次積功五
次奏請議敘十次准保升階升銜以資鼓勵至
三聯印票係為互相比對而設稅務司專管口
岸之稅不管內地之釐既於總口設釐捐總局
應即由總局刊發三聯票以一聯留局存根一
聯彙送總理衙門一聯給華商為已完內地稅
釐驗據貨到所銷之地將票呈官查收仍申送
總局備核此擬洋藥進口稽查防弊之辦法也
洋藥惟海關有一定稅則其餘內地稅釐各省

輕重不一若照左宗棠所擬加增捐數必須各省議定統歸一律並俟奉

旨後定准日期南北同時開辦勿使有多寡遲早之分庶免一口獨重姦商趨避而餉源立竭至天津所收洋藥釐金向供海防練軍兵輪船薪糧及地方善舉之用本已入不敷出其崇文門通州各處亦藉稅釐以濟公需今統在總口捐交任其分販內地概不重捐則凡向有釐稅之處進款全無必至辦公竭蹶擬此後洋藥進口除海關每百斤收稅銀三十兩外應按總口釐局

所收之數分作十成以六成劃補天津從前收款解交津海關庫仍為軍餉船糧善舉等用其由津分販內地者如係運經本省向有稅釐地方應按該處向來洋藥百斤徵銀若干照數劃出由局按月移解濟用別省稅關釐局不得援請劃解除分別劃交各處及巡緝火輪關棧局用經費外其餘存候指撥或解部充餉此洋藥加徵釐捐須各省統歸一律及就津口收數分劃應用之辦法也天津土煙無多稅釐收數甚少每年不過一二百兩或三四百兩其運銷各

州縣者皆不入津境各路土煙價亦不一茲就天津售價計之最貴者山西所產每百斤值銀三四百餘兩其次山東河南奉天所產每百斤值銀三百兩上下又次四川所產每百斤值銀一百餘兩若就價值之高下遞分稅釐之等差實開滋弊之端今擬不分何處出產統照洋藥內地稅釐之數減成徵收土煙無進口之稅暫按一百二十兩三分減二定為每百斤共徵稅釐銀四十兩此口徵則彼口免彼處徵則此處免完過稅釐之後領有執照無論運往本省何

處均不重徵蓋土煙路路可通人人可帶更屬
防不勝防捐數稍減或偷漏較少且土煙之毒
究比洋藥為輕而民財亦不外耗儻將來洋商
無利可圖洋藥漸不來華再增土煙稅釐益加
厲禁尚未為晚所有稽查防禁事宜應酌照洋
藥辦理惟直隸地方平坦遼闊頭頭是道斷難
編設局卡徒糜不貲之費轉添無事之擾只有
擇要責成地方官如晉豫東奉入直要道即責
成該管道府督同州縣就近認真經理如能緝
獲私販一體記功給獎此土煙擬加稅釐稽查

防禁之辦法也總之加捐易辦偷漏難防洋藥
來自外洋洋人利在多銷必多方以撓我查禁
之法土煙產自各省官役力難徧及必多方以
求其繞越之途臣熟籌辦法但盡其力所能為
未敢謂確有把握至臣所轄山海東海兩關現
尚未據覆到該兩省情形雖未盡同大致無甚
區別如將來南洋各口一律照加該兩口自可
酌照直省章程會商核辦其藥釐內向有解津
之款仍應核數劃解除將津海關道擬設關棧
稽查大概章程咨送總理衙門查核外所有遵

議緣由理合恭摺由驛覆陳伏乞

皇太后

皇上聖鑒訓示謹

奏

創設公司赴英貿易摺六月二十八日

奏為招集華商創設公司專赴西洋貿易以立富強之基恭摺仰祈

聖鑒事竊查光緒六年十月祭酒王先謙奏請令商船出洋片內聲明船政大臣黎兆棠前議創立宏遠公司運貨出洋請咨商舉行湊集商股作速開辦欽奉

寄諭目下情形能否及此將來如何漸次開拓興辦著妥籌具奏等因旋經臣等先後復陳擬暫就招商局現有輪船酌量試辦逐漸推廣並緘屬黎

北棠請其勸諭粵商設法倡導茲准黎北棠咨
據廣東職員梁雲漢劉紹宗梁紹剛等稟稱泰
西以商立國商務之盛衰即國勢強弱所由判
凡有益商務者必竭全力以圖之年來日本步
趨泰西亦四出通商以為利國利民之本中國
地大物博商務為四洲之冠洋人視為利藪紛
至沓來有可以從中國利者鮮不多方要挾實
由彼來而我不往也即有到金山古巴秘魯等
處者亦僅貧民傭工並無殷商前往似未足以
立富強盛業現已招集殷商湊成鉅款名曰肇

興公司擬往英國倫敦貿易以為中國開拓商
務之倡該員梁雲漢在粵東總理劉紹宗梁紹
剛往倫敦管事不領公帑不准洋商附股一切
進出口貨完稅章程請照洋商一律辦理以昭
平允惟事屬創始必須官為維持請由通商大
臣給諭前往並轉咨中國駐英大臣隨時主張
俾得與各國在英商人一體優待等情請奏前
來竊維西洋富強之策商務與船政互相表裏
以兵船之力衛商船必先以商船之稅養兵船
則整頓通商尤為急務通者各國商船爭赴中

國計每歲進出口貨價約銀二萬萬兩以外洋商所逐什一之利已不下數千萬兩以十年計之則數萬萬兩此皆中國之利有往而無來者也故當商務未興之前各國原可閉關自治逮風氣大開既不能拒之使不來惟有自擴利源勸令華商出洋貿易庶土貨可暢銷洋商可少至而中國利權亦可逐漸收回前此招商局輪船嘗駛往新嘉坡小呂宋越南等埠攬載近年和衆美富等船分駛夏威夷國之檀香山美國之舊金山載運客貨究止小試其端尚未厚集

其力英國倫敦為地球內通商第一都會並無
華商前往黎兆棠志在匡時久有創立公司之
議盡心提倡力為其難現既粗定規模自當因
勢利導期於必成惟草創之初能否獲利尚無
把握祇有官商上下合力維持以期漸推漸廣
所有該公司出進口貨物在中國通商各口者
應准照洋商一律辦理其出洋後沿途及抵倫
敦一切貿易章程應得與各國在彼商貨一律
辦理臣等擬即咨商駐英大臣曾紀澤隨時設
法主持保護俾該商等遇事有所稟承並給諭

與該公司仿照泰西通例五年之內只准各處
華商附股不准另行開設字號免致互相傾跌
貽誤大局除俟開辦後各口分處設棧及未盡
事宜隨時酌核咨行查照外所有招集華商創
設公司前往英國倫敦貿易緣由謹會同南洋
通商大臣劉坤一船政大臣黎兆棠合詞恭摺
具陳伏乞

皇太后

皇上聖鑒訓示謹

奏

巴西增刪條約摺 閏七月初八日

奏為巴西使臣商請增刪原訂條約經臣酌量相
機議辦恭摺具

奏仰祈

聖鑒事竊臣於光緒六年六月間遵

旨與巴西國使臣喀拉多穆達議立通商條約已於
上年八月初一日定稿繕本畫押鈐印專摺具
奏並將條約正副本及照會稿分送軍機處及總
理各國事務衙門備查在案臣因從前中國與
各國立約多倉猝定議又未諳西洋通例受損

頗多是以與該使往復駁辦按照各國約章酌量變通冀可收回權利亦乘巴西有求於我先就一國稍倡其端將來各國續來議約即可逐漸設法轉移該使等遵允畫諾喀拉多於去年九月出都穆達齋約回國方謂條約已定計期即可互換詎料本年三月十九日喀拉多自滬至津據稱接伊國電報禁販洋藥已允照辦請即添入條規並酌擬增刪原約各節如第一款與別國民人句請改為與相待最優之國民人字樣第十一款案內華巴民人有未甘服應聽

照會覆訊一節恐兩國民人藉此拖延滋訟案
難了結務求準刪臣以已定之約向不能於未
換以前另議刪改惟彼國既願將禁販洋藥添
入條款似於中國有益該使復聲請原約第三
款領事官不得以商人兼充擬改作商人亦可
兼充第四款游歷印照須照會關道請領擬改
照各國條約仍由領事發給地方官蓋印臣查
當日訂約此二款原為防弊起見斷難允改其
第一款第十一款無關緊要字句未始不可酌
刪喀拉多旋即回滬五月杪該使復派繙譯官

微席葉來謁謂穆達回國後議院查出原約第十款內華人有本身犯案或牽涉被控凡在巴人公館寓所行棧商船者均聽中國官派差徑往拘傳此與各國條約照會領事官交出者顯有區別去冬美國修約在巴國訂約之後美約並無此議巴西礙難獨遵力懇改照布約第三十二款以全巴國體面等語臣思華民在各口行棧商船傭工者每恃洋人為護符遇有犯案不聽傳喚雖行文領事飭交往往庇縱成習由於前此立約未妥一時驟難更改以致流弊甚

多今欲藉巴西議約漸收中國自主之權於約
內聲明派差徑往拘傳具有深意領事允行微
席葉去後喀拉多函託津海關稅務司德瑾琳
屢來懇商均以嚴詞拒絕七月二十日該使自
滬來津面遞辨論第十款節略一紙謂出自該
國朝廷之意若不準改必將該使調回另行派
員來華從新議約情詞甚為迫切臣反覆開導
該使總謂此條不改全約俱作罷論該國絕不
肯互換並引中俄新約改訂為詞如堅執不改
即索一答覆節略回國覆命臣於閏七月初一

日擬具答覆四條節略面交毫未鬆口該使遂於初二日來署辭行勢將決裂臣因思巴西已成之約照西國各約挽回不少今又允將禁販洋藥添入約款洵於大局有裨彼既出於甘讓我亦當略為酬報所議增刪各節尚覺無甚關係惟第十款末節稍重若遽改照各國條約華犯由領事交出何能漸收自主之權若全不通融如滬津等處各國租界早定巴人來必借寓僮華官徑往拿犯巴官雖不敢阻他國領事必出頭阻抗則華巴兩面均有關礙且公館商船

皆有巴西國旗號巴人可以自主亦未便不知
照巴官徑往拏辦况第三款已聲明領事等官
必須奉到中國批準文憑方得視事如領事官
辦事不合可將批準文憑追回此層最為緊要
關鍵儻巴官庇縱華犯尚可照約追回文憑是
操縱仍屬在我似未便因拏犯一事致將前約
所得便利盡行廢棄遂與該使商改由地方官
一面知照領事官一面立即派差協同設法拘
拏不得庇縱指留等語較各國約款文義稍變
蓋由地方官派差仍不失中國自主知照領事

官則巴國體面亦無所礙該使允即照改並將
禁販洋藥照美國新約全文添作第十四款共
成十七款此臣與巴西使臣喀拉多酌議稍改
原約之情形也喀拉多已於初三日回滬據稱
電覆本國俟接回信於三禮拜後來津謄寫約
本另與訂期畫押專用喀拉多一人銜名其前
次已定條約正副本即作為廢紙事關改定條
約於原議微有參差而大致無甚出入亟應先
事具

奏謹照鈔巴西改訂約款分別黏簽貼說並照錄

該使喀拉多面遞節略及臣答覆節略恭呈
御覽除緘商總理衙門外所有巴西使臣商請增刪
原約經臣酌議辦理緣由謹繕摺由驛據實具
陳伏乞

皇太后

皇上聖鑒訓示遵行謹

奏

謹將巴西使臣喀拉多面遞辨論第十款末節
四條節略並答覆該使臣四條節略照繕清單
恭呈

御覽

巴西使臣喀拉多面遞節略

兩國條約載有巴國民人遇有詞訟案件並不
歸中國地方官審辦僅歸其本國官員辦理
故此巴國人民房屋棧房商船等處中國官
役不得強入一事不過係條約上之意推而
論之巴西國家之欲如此者不過欲巴國民

人之在中國者比之凡與中國有和約之國
其看待民人地位不得較輕

又巴國無論何國民人在巴國所沾之利益已
准中國人民一體均沾然中國看待巴國人
民欲有異於看待凡與中國和約之國之人
民未免有辱於巴國此生事之根也不如先
時除去以保將來永遠和睦

又中國與他國公同立定條約其商訂之地無
論或在天津或在中國京都中國之意宜歸
一律然德國及美國近修條約已奉

大清國

大皇帝允准內中並無中國官員憑其差役至該國
民人房屋查拏犯人一款況且美國修約在
巴國定約之後明顯中國所准他國得沾之
利益不准巴國一體均沾則中國未免於公
平有礙矣

又中國欲禁止販運洋藥一事乃緊要大有關
係之事巴國知此事有益於中國立即允許
是巴國大有功於中國也則第十款內所載
凡在巴人公館寓所行棧商船等處者均聽

中國官員派差徑往拘傳審理等語亦可除去矣

答覆巴西節略

一約內訂明巴國民人案件並不歸中國地方官審辦可見中國絕未輕待巴人至第十款載中國民人本身犯案是專指中國人犯中國法者言之中國有自行拘傳審理之權與巴人毫不相涉實無所謂輕待也

一巴人來中國通商中國必視同凡有和約之國人民無異約內第一款已載明與相待最

優之國民人同獲恩施利益至在行棧商船
傳人與否所傳乃係中國之民人無關於巴
國商務如以行棧商船聽中國自傳本國犯
罪之人為有辱巴國則在行棧商船藏匿中
國罪人巴國先自取辱矣巴國肯列此條足
見與中國倍敦友睦何至因此生事

一各國每遇修約之期均係擇要先修不能將
各條一時全改德美兩國近來修約雖未議
及此節日後再遇修約未必不載入約內况
美國此次在總理衙門修約專為華工一事

而來因及洋藥商稅等條其餘尚未全改蓋
議修多年已成之約與創立向來未有之約
情形本自不同即以禁運洋藥而論貴大臣
上年不肯於約內載入此條以為多有窒礙
而美國竟肯首先載列則將謂美國自棄其
利益乎如美國亦謂販賣洋藥係中國所准
他國得沾之利益必欲一體均沾此條恐終
無列入約內之日矣運洋藥為有礙中國民
生之事美國肯列約嚴禁洋商行棧徑行傳
人為有關中國政令之事巴國不肯照行較

之美國之待中國恐亦未可謂公平也
一禁販洋藥一條上年貴大臣未即允定今見
美國列入約內始允照添並非立即允許此
次議定畫押之約本大臣已准通融改易不
少與禁販洋藥一款亦足相抵未便再將第
十條末節刪除

覆陳奏調各員摺 八月初二日

奏為遵

旨覆陳仰祈

聖鑒事竊臣承准軍機大臣字寄光緒七年閏七月
十四日奉

上諭前據御史秦鍾簡奏李鴻章奏調編修章洪鈞
道員金福曾袁保齡跡涉徇私請旨撤回等語著
李鴻章隨時察看如該員等不能得力即行撤回
原摺著抄給閱看等因欽此臣查吏部奏定章程
各省督撫辦理中外交涉事件奏調候補候選

人員應遵

旨准其調往差委等語秦鍾簡原摺乃謂向章京職人員外省督撫不得率行奏調顯與部定章程歷辦成案不符又謂直隸屢請停止分發該省道府正虞擁擠何猶另調候選人員不知請停分發係因地方候補人員過多且指發來省者不必皆賢才也臣奏調章洪鈞等片內聲明臣督辦北洋海防及中外交涉事件頭緒繁多亟須求賢助理是於地方無涉且為求賢起見實與請停分發兩不相妨至秦鍾簡謂章洪鈞與

臣係屬同鄉早與有約相機奏調尤屬謬論孔子曰舉賢才舉爾所知未有不知而舉者同鄉則知之尤真自無避嫌不舉之理咸同軍興以來以同鄉而轉相薦引滅賊立功蔚成

國家中興盛業何可枚舉秦鍾簡豈毫無見聞而獨疑章洪鈞有營謀請託之事章洪鈞籍隸皖南距臣籍六百餘里素無瓜葛同治四年臣於署兩江總督任內考試書院始識拔章洪鈞於諸生中早相器許近年知其留心經世之學識力堅卓志趣不凡故特疏調來津以資贊助章

洪鈞守道自重臣亦因以重其人實非由請託
而來也溯查咸豐初年徵臣即由編修奏調在外
歷練時事始克稍有知識嗣在江蘇巡撫任內
奏調中允馮桂芬編修王凱泰劉秉璋劉綎軍
務奏調中書何慎脩主事倪文蔚從未有議為
褻體者今因海防洋務責任過重徵臣精力日衰
急求賢才為臂指之使且恪遵部章罔敢踰越
而轉貽局外之譏彈未免令任事者寒心矣秦
鍾簡又謂金福曾袁保齡向無聞望並非熟悉
洋務必不可少之員夫論人才須實按其品行

事蹟未可專採虛聲其盜虛聲而鮮實濟者臣
向所不取金福曾久在上海差委上年自行集
捐往晉豫直境散賑廉惠公明窮民多感其德
袁保齡曾隨其父袁甲三軍中諳習戎機久任
內閣熟於掌故考其平日品行事蹟均屬有用
之才臣奏調原片聲明藉資造就亦非謂洋務
必不可少但質地可取將來學習歷練冀備

朝廷異日之用固非別有私意也欽奉

諭旨令臣隨時察看如該員等不能得力自應遵即
撤回若其造就練達堪勝繁劇臣亦未便壅於

上聞致昧以人事

君之義理合據實恭摺覆陳伏祈

皇太后

皇上聖鑒謹

奏

機器局請獎摺 八月初二日

奏為天津機器製造局辦理已逾十年著有成效
謹將尤為出力員弁匠目援案酌請獎敘恭摺
仰祈

聖鑒事竊查同治五年總理各國事務衙門奏令於
天津設局購置外洋機器製造軍火前通商大
臣崇厚甫經初有端緒同治九年臣抵津接任
欽奉

寄諭斟酌開拓務裨實用並以牽涉洋人殊多窒碍總
須內地員匠銳意推求能自運用傳習方為經久之

道等因欽此遵即遵派熟悉機器之大員總理一切
督飭悉心籌度釐定章程精練華工酌裁洋匠
並將主持局務之洋員密妥士撤退頻年添建
大廠十餘座選購新器數百分規模日臻開擴
製造日見精能考課嚴明條理周密工作則絲
髮入穀經費則涓滴歸公緩急所需無不應手
每歲所出軍火除供支本省淮練各軍輪砲各
船外如吉林奉天熱河察哈爾及江南分防水
陸淮軍皆按時撥濟其河南等省需用火藥銅
帽亦向津局取給上年俄事驟起邊海兩防同

時喫緊山海關樂亭牛庄煙台等處均駐多營
吉林亦增勁旅津局為洋軍火總匯屹處海濱
謠傳不一仍不動聲色星夜趨造外以給各軍
月操之用內以備有事攻剿之需各路軍營恃
以無恐洵於大局有裨查天津機器製造向分
兩局一在城東賈家沽名為東局分造洋火藥
銅帽洋鎗砲各式子彈水雷等項一在城南海
光寺名為西局分造軍用西洋器具添配雜項
物件兼造開花子彈等項計東局歷年製成軍
火截至光緒六年底止共洋火藥四百三十七

萬餘磅銅帽二萬三千八百六十萬五千餘顆
前後膛大小炸砲彈三十六萬四千七百餘顆
林明敦中鎗槍五百二十枝林明敦槍格林礮
子八百四十六萬八千餘顆各式拉火九十五
萬餘枝其紙引木引等項製存數目亦鉅除撥
用外現存洋火藥一百餘萬磅他物稱是西局
除造克鹿卜砲彈改造士乃得後門槍及彈子
以及各種砲車器具供給各軍外並製造新式
機器自製電綫電機電引百發百中上年造成
行軍橋船一百三十餘隻百丈之河頃刻布成

平地近又造成一百三十匹實馬力七丈螺輪
船二隻專備海口布置水雷並作小戰船之用
此皆局員匠目銳意研求故能不藉師承自成
利器至水雷為海防必需之物從前發火電氣
機皆購自西洋現於東局仿製電綫電箱撥動
燃放不差累黍又仿製五百磅藥磁雷二十八
枚一千磅藥沈雷三十四枚七百磅至一百五
十磅藥撞雷一百二十二枚轟放皆能應手其
小水雷隨時試演者不在此數另製棉花火藥
以錘水浸漬而成較硝磺力大三倍用棉藥七

兩可轟碎四寸厚鐵板與外國新製者一律其
各項機器局中工匠亦能出手製造不下數萬
餘件前於東局分設電報水雷學堂已將教成
學生派赴大沽北塘海口應用現又接續教練
並就隙地另蓋水師學堂選募生徒為作養輪
船將材之計此十餘年來辦理情形甚著成效
者也 臣查上海機器製造局出力人員曾於同
治七年光緒二年奏保兩次均奉

旨允准有案天津事同一律該員等衝寒冒暑早作夜
思寢饋於刀鋸湯火之側出入於礮鏝毒物之

間性命所關如對強敵實非辦理尋常局務可比事逾十年之久卓著勤勞現往神機營王大臣奏派員弁兵丁來局習學新製朝鮮國亦奏懇派人來津學藝臣密飭該局員匠殫精竭慮盡所知能互相傳習以為自強經久張本事關軍國要政若不懇

恩擇尤量予獎敘實無以鼓勵人才除已有實缺及事故各員均無庸議外謹援滬局成案查其尤為出力者按照部章酌擬升階升銜等項繕具清單恭呈

御覽仰懇

天恩俯准照擬給獎以彰成效而勵將來其應給千
把總等武弁另行咨部注冊理合恭摺具陳伏
乞

皇太后

皇上聖鑒訓示謹

奏

訂購快船來華摺 十月初十日

奏為前在英國訂購巡海快船兼碰船二隻現由
中國員弁駕駛來華臣親赴海外驗收乘往旅
順口巡閱情形並照案將在事出力人員籲請
恩獎恭摺仰祈

聖鑒事竊光緒五年冬間臣與總理衙門緘商籌備
海防訪購英國新式快船當飭總稅務司赫德
在阿摩士莊商廠訂造快船兼碰船兩號一名
超勇一名揚威旋以船工將成向例由赫德全
登幹雇覓英國弁兵包送來華沿途挂用英旗

實非

國體所宜因奏派督操砲船之記名提督丁汝昌
與總教習洋員葛雷森督帶管駕官及弁兵舵
水等二百餘名分起馳往英都俟船成驗收升
換中國龍旗自行駕駛回華迭於五年十月六
年十一月奏奉

俞旨欽遵在案本年八月屢據出使英法大臣曾紀
澤及提督丁汝昌報稱七月初八日該船在英
埠試駛勘驗船砲製造均屬堅利初九日曾紀
澤親引龍旗懸挂升砲如儀英官賀客三十餘

人均各稱慶曾紀澤照會外部轉咨兵部海部
飭行沿途英屬各埠妥為照料以免疏虞旋接
電報該二船於七月二十三日放洋起程經過
大西洋地中海埃及蘇爾士河新嘉坡各處駐
口英員均相關照毫無阻滯八月二十三日行
抵香港准兩廣督臣張樹聲邀往省河驗視該
船遠道而來船底泥苔沾滯亟須脩洗油漆又
在上海進鵠整理一切略有耽延九月二十六
日駛抵大沽攔港沙外因船身喫水過深不得
進口臣恭辦

陵差甫回津署聞信後督同署津海關道周馥水師營
務處道員馮建忠黃瑞蘭編修章洪鈞知府薛
福成提督周盛傳劉盛休總兵唐仁廉等於十
月初一日馳往大沽初二日出口驗收船砲機
器製法均甚精堅與原訂合同相符即於是日
酉初分乘超勇揚威兩船展輪試行大洋亥子
之交東北風狂吼雪雹並集巨浪顛簸坐立不
穩船主謂為北洋近年罕有之颶風坐客多暈
吐而弁兵操作如常濺水已滿艙而機器運動
不息創其船身之堅利與官弁之熟習可知初

三日未初駛抵奉天金州之旅順口初四日風
息浪平臣率隨員登岸察勘該口形勢實居北
洋險要距登州各島一百八十里距煙台二百
五十里皆在對岸洋面至此一東為奉直兩省
海防之關鍵口內四山圍拱沙水橫亘東西兩
灣中泓水深二丈餘計可停泊大兵船三隻小
兵船八隻內有淺灘其口門亦有淺處擬用機
器船逐漸挖濬目前之快船砲船及他日購到
之鐵甲船皆可駐泊為北海第一重捍衛其口
旁黃金山高四十丈可築砲壘以阻敵人來路

臣前委員會同德弁漢納根經營修築鑿石引
泉工程已得大半其餘局廠船塢各項當陸續
籌款興造俟砲壘告竣再酌調陸軍防護是夜
子初起旋西旋逆風而行每點鐘限行十五海
里至初五日巳正初刻即抵大沽計不及六時
駛七百餘里可謂速矣臣即於是晚回津竊查
此項快船洵為出奇新式其妙用有三船小砲
大行速也船小則價不甚昂砲大則能禦鐵甲
行速則易於進退又船首暗設堅固碰撞尖頭
數尺可以碰穿鐵甲惟係新創之法其中難免

毫無疵病要在駕駛得人隨時設法補救整治
耳臣卽飭委丁汝昌統領超勇揚威快船二隻
與本年代山東購到之蚊子砲船鎮中鎮邊二
隻回泊旅順口與總教習葛雷森實力操練隨
時出洋梭巡俾弁兵膽技日臻精熟該員弁等
帶領快船來華閱歷數萬里風濤形勢教練熟
悉保護平穩卓著勛勞實為中國前此未有之
事足以張

國體而壯軍聲所有中外出力人員臣前奏准授
照出使各國優保之例籲請獎勵謹據實開列

清單恭呈

御覽伏乞

天恩俯如所請分別照准以示觀感而勸將來其餘
頭目舵水人等有異常出力應給藍翎千把等
項容即查明咨部備案所有定購快船兼碰船
二隻現由中國員弁駕駛回華臣親往海外驗
收乘赴旅順口巡閱情形並附請獎勵各緣由
理合繕摺由驛詳細馳陳伏祈

皇太后

皇上聖鑒訓示施行謹

奏

奏

奏

謹將出洋駕駛快船來華尤為出力之員弁酌
擬獎勵開列清單恭呈

御覽

記名提督協勇巴圖魯丁汝昌擬請

賞換清字勇號並正一品

封典

總教習四品銜副稅務司英員葛雷森請

賞加二品銜

花翎留閩儘先補用遊擊林泰曾擬請免補遊
擊以叅將仍留原省補用並

賞加勇號

都司銜留閩儘先補用守備鄧世昌擬請免補
守備以都司改留廣東遇缺前
先補用並

賞戴花翎

五品軍功儘先補用把總李和擬請免補千把
以守備儘先補用並

賞戴藍翎

五品軍功藍建樞請以把總留閩儘先補用並

賞戴藍翎

五品軍功留閩儘先外委楊用霖請以千總仍

留原省補用並

賞戴藍翎

五品軍功黎星橋請以把總留廣東儘先補用

六品軍功王齊辰請以把總留閩儘先補用並

賞戴藍翎

藍翎儘先千總陳學書請以守備儘先補用

五品軍功陸保請以把總儘先補用

都司銜江蘇補用守備虞慶堂請補缺後以都

司升用

藍翎儘先把總張邦元請免補千總以守備儘

先補用

六品頂戴記名把總袁培英請以千總留山東
儘先補用並

賞戴藍翎

六品頂戴儘先補用外委何桂福請免補把總
以千總留山東儘先補用並

賞戴藍翎

六品頂戴記名外委廖雲瑞趙增盛均請以千
總儘先補用

北河候補縣丞馬毓藻請免補本班以知縣仍

留直隸歸候補班前先用

監生解茂承請以鹽知事分發省分歸候補班

前先用並

賞戴藍翎

文童馬元愷請以鹽知事分發省分歸候補班

前先用並

賞戴藍翎

附生江永池仲祐均請以主簿分發省分儘先

補用

候選教諭陳錫周請

賞加五品銜

花翎留閩儘先補用游擊劉步蟾請

賞加副將銜

駐英參贊道銜候選員外郎陳遠濟會同丁汝昌籌辦接收船砲與英外部海部交涉各事照料周妥擬請

賞給三品銜

丁汝昌統領海船片

再此次記名提督丁汝昌赴英帶船升旗回華
歐洲諸國始知中國亦有水師羣起而尊敬之
迭據出使大臣曾紀澤李鳳苞函稱該提督在
英隨班謁見君主待以優禮因與各部尚書各
國公使往復周旋並游歷英法德各營壘廠局
各提督總管監督等均殷勤接待討論軍實藉
擴見聞所帶弁兵二百餘人駐英半年訓練約
束和輯商民傳播新聞紙津津樂道洵是尊
國體而固邦交該提督曾在長江水師管帶砲船

嗣隨劉銘傳統帶銘軍轉戰南北功績卓著幹
局英偉忠勇邁倫自五年十月臣奏派該員督
操蚊船與中西各員研究觀摩頗有心得今又
出洋多增歷練臣詳與諮詢於西國船砲製造
運用之妙體會更深頃委以統領北洋水師重
任督同員弁切實講求操練以期漸成勁旅可
收指臂之助目今水師人才尤為難得該提督
久經大敵遠涉重洋謀略機宜均臻妥洽合無
仰懇

天恩另單存記破格擢用遇有水師提督缺出即予

簡放以備折衝禦侮之選謹附片據實密陳是否有
當伏乞

聖鑒謹

奏

請裁金州艇船片

再臣前往旅順口見有水師艇船數隻膠攔沙灘並無帆檣砲位虧朽多年未曾出海詢之旗營協領卽該處兵船隸於金州副都統者也例以旗兵五百駕之僅每歲夏間出洋巡哨一次初因旅順口無工料奏派浙閩兩省每三年各造新船一隻歲送修理舊船油麻料若干所費不貲而此項師船行海笨滯本不堪用旗營弁兵疲弱久廢操演有名無實於義何取旅順瀕臨遼海誠為緊要口岸今臣既派提督丁汝昌

統領快船砲船駐紮該處隨時出海梭巡足壯
聲勢若仍留此廢壞無用之水師不獨將弁所
輕視即輪船內教習洋人見之無不竊笑近來
內外臣工多建議裁撤沿海各種笨船抵養輪
船經費洵為救時要政各該省將軍督撫一味
因循擱置不辦臣目擊旅順口原設師船實屬
虛糜無益應請

旨勅下戶兵二部暨

盛京將軍實事求是立予裁撤其擱置沙灘之廢
船即交丁汝昌體察情形或酌留為練船裝存

軍火之用或量予折變至旅順口巡海防務嗣
後即責成駐泊該處之兵輪船兼顧不至貽誤
所有原定駕船之旗營弁兵仍令照管陸路巡
防較有實際伏乞

宸斷訓示施行謹附片具

奏

續選學生出洋摺

奏為續選閩廠學生出洋肄業以儲人才而擴進境恭摺仰祈

聖鑒事竊臣鴻章於光緒二年十一月會同前南洋大臣沈葆楨等

奏明選派閩廠前後學堂製造學生十四名藝徒四名駕駛學生十二名分赴法國官廠及英國水師學堂鐵甲兵船學習製造駕駛之方及推陳出新練兵制勝之理所需經費由閩省額撥南北洋海防經費內酌提動用旋議定閩省釐

金項下籌銀四分之一閩海關四成洋稅及船政經費項下各籌撥銀四分之一按照章程分年匯解該學生等出洋後均能悉心考究窺見門徑雖所造深淺不同尚不為故步所域多已學成期滿陸續回華其駕駛學生出色者則有劉步蟾林泰曾等製造學生出色者則有魏瀚陳兆翱等經臣等量材器使或派管駕蚊船快船或在船政差遣及派往外洋為鐵甲船監工其餘亦分任要務各效所長惟現值整頓水師研精船械規模日擴事事需才猶覺不敷分布

臣鴻章於光緒五年九月會同沈葆楨

奏明閩局出洋生徒應予蟬聯就學以儲後起之
秀而備不竭之需奉

旨允行在案查船政前後學堂生徒初次選擇三十
人出洋已拔其尤其續入學堂者年資稍淺遴
選較難然育才之要宜使迭出而不窮日新之
功不可一得而自畫臣鴻章與臣兆棠往返咨
商擬定續選前學堂學生八名後學堂學生六
名出洋肄業並擬分撥經費銀十萬兩陸續匯
解出使大臣兼肄業監督李鳳苞收支並請由

出使英法大臣曾紀澤會同督率照料惟查後
學堂學生內有許兆箕等四名先經臣鴻章調
赴天津派充水師學堂教習及威遠練船教練
水手皆有要差礙難遽令出洋現計後學堂學
生僅有二名合之前學堂學生八名共得十名
先行儘數派員送至香港登舟出洋餘俟選擇
得人續派前往所需經費仍應由福州將軍及
福建督撫臣與臣兆棠查照成案分年勻撥接
濟所有續選閩廠學生出洋肄業緣由理合會
同福州將軍臣穆圖善閩浙督臣何璟福建撫

臣岑毓英恭摺馳陳伏乞

皇太后

皇上聖鑒訓示謹

奏

密議朝鮮外交摺十二月初二日

奏為朝鮮陪臣金允植密陳該國王議商外交情形相機開導恭摺密奏仰祈

聖鑒事竊查光緒五年七月初四日奉

上諭總理各國事務衙門奏泰西各國欲與朝鮮通商著李鴻章查照丁日昌所陳各節作為該督之意轉致朝鮮等因欽此當經臣欽遵函致朝鮮前任太師李裕元密勸其與泰西各國立約通商以牽制俄日各情並鈔函具

奏在案本年正月二十五日總理衙門因屢接出

使日本大臣何如璋函述朝鮮近日漸知變計
商與美國立約請由中國代為主持擬變通舊
制嗣後遇有朝鮮關係洋務緊要之件由北洋
大臣及出使日本大臣與該國通遞文函相機
開導等因奏奉

旨依議欽此專函知照前來五月間適有美國水師
總兵蕭孚爾來津面稱該總兵上年乘兵船赴
朝鮮投遞國書欲與結約通好朝鮮堅拒不納
今奉該國密諭求臣為之轉達並出示該外部
原函臣知朝鮮廷議尚未甚洽密屬蕭孚爾留

津緩待機會六月間朝鮮委員副司直李應浚
賁文來津臣即令津海關道鄭藻如繕具節略
力勸朝鮮派員赴津就便與美總兵蕭孚爾商
議俟有頭緒再

奏派大員同往面訂條約各等情交李應浚帶回
已由鄭藻如於七月間在京密致總理衙門王
大臣矣茲朝鮮國王派領選使金允植帶領學
徒來直又別遣去冬使員卞元圭同赴保定謁
見據稱李應浚帶到密函該國王深相契合奈
國中論議不一有難調停總求

大皇帝作主先期宣諭則諸般難便之端自歸妥貼
旋據金允植呈遞密書一件詳布原委並以聯
美之計日俄及本國人所不樂聞擬請

明降詔旨於明春貢使之回踵遣派員協美議約該
國得以憑仗

皇靈隨宜酌辦等語情詞雖甚恭順究於事體非宜
臣與筆談開誠曉譬以向來中國於外交各事
必先由大臣等與各國商定然後請

旨遵行若事未辦而先奉

旨轉予外人以挾持之柄汝國王此論似未深知馭

外情勢鄭藻如前議該國借學生赴津為名派
員協同前來與美總兵商辦尤無痕跡况昨接
何如璋十月杪由日本函稱朝鮮近遣使臣趙
秉鎬李祖淵赴日修改通商章程議立稅則日
本不允業經辭歸欲於明年三四月奉使來津
與美總兵蕭孚爾晤商如能與美國結一善約
日本亦可仿照定議與臣所見相同幸蕭孚爾
經臣留住或者其事易成該陪臣等聞知均尚
領會謂此行不專在學造一事面承國王密諭
深以此事為重專望臣設法方便隨機指教下

元圭擬即由津回國稟商該國王酌辦金允植亦赴津照料學徒靜候本國消息臣維朝鮮久隸外藩寔為東三省屏蔽與琉球孤懸海外者形勢迥殊今日本既侵滅琉球法國又割據越南沿海六省中國已有鞭長莫及之勢我藩屬之最親切者莫如朝鮮日本脅令通商復不允訂稅則抑勒把持計甚陰狡非先與美國訂一妥善之約則朝鮮勢難孤立各國要求終無已時東方安危大局所係中朝即不必顯為主張而休戚相關亦不可不隨事維持多方調護保

茲屬土即以固我藩籬除俟卞元圭回國後該國如何籌派明春臣到津後美總兵如何進止再行察辦具奏外所有朝鮮陪臣金允植密書謹照鈔恭呈

御覽並臣與相機開導各緣由理合繕摺由驛密陳
是否有當伏乞

皇太后

皇上聖鑒訓示謹

奏

--	--	--	--	--	--	--	--	--	--	--

謹將朝鮮陪臣金允植投遞密書照鈔恭呈

御覽

朝鮮國領選使吏曹參議金允植謹再拜上書
於中堂爵前伏以小邦情形惟中堂燭照纖悉
勝於小邦之自知前後代籌時宜提撕警覺無
所不用其極非知明仁深何以至此我寡君深
感中堂之德欽誦靡已此次專差陪臣前赴天
津恭聽指使允植辭朝時承寡君面諭諳復鄭
重使之代達景仰之忱且曰罄陳衷私無有所
隱允植受命以求不敢違安夙夜趲程既到京

城即聞駐節保省遠迤前進敬致國書仰蒙中
堂慰藉備至誨諭拳拳藹其如春頓忘羈旅之
苦然初筵以接嚴畏在心敬勝於情辭不能達
恐負寡君面命之意茲敢書陳所懷仰塵宗覽
伏願垂察焉小邦山川險隘聞見局滯往在羅
麗時疆場不靖頗尚武備自小邦開國以來境
內久安民至老死不聞金鼓或數百年一見兵
革而輒復忘廢現今武庫所存皆數百年前無
用之器仗而國人猶恃而自壯曰何苦費財勞
衆遠學新製夫器仗猶不欲學遠欲交遠人乎

往者法國陰遣教士煽布邪學其為教大抵瀆
倫廢祭惟利是趨小邦立法嚴禁誅夷相續猶
不減息國中士民莫不痛心疾首誓不與此夷
共戴一天伊後西勢日旺氣運大變治兵護商
旁洋天下察其意趣不專在行教一事設為條
約網羅四海入者相與出者孤立互相連合如
七國之時此與往日局面又大不同矣夫有國
有土者惟以保存宗社奠安生民為務春秋二
百四十年之間通聘會盟殆無虛日不第諸夏
衣裳之會即蠻越鱗介之國王帛相踵此豈不

知義理而然哉惟小邦則不然不問時勢可否
惟以守經為正理斥和為清議與其通洋而存
不如絕洋而亡語涉交際輒以邪學目之為世
所棄自丁卯以後日本投書求好朝議以為近
日日本變用洋制通倭即通洋之漸却而不受
及乙亥秋日日本兵船入江華衆論沸騰幾致生
事我寡君靜鎮於上故相臣朴珪壽調停於下
復修舊好立約通商國受和平之福而論者猶
至今咻咻上自朝廷縉紳下至巖穴草茅以及
市井屠販之流所見皆同以為不必交鄰恐納

侮也不必講武恐滋事也閉境自守無如我何
惟我寡君超然遠覽卓然不惑念孤弱之不可
久支也知凡愚之難與慮始也又慮衆論之殆
難力勝也撫循含容默運獨斷交鄰練兵等許
多事務次第籌度將欲舉以措之昨年秋季中
外廣薦人才量加收用今年春設統理衙門分
治機務又令擇文武子弟年少者使習語學兵
技今又選徒遠赴學習製造我寡君之有猷有
為宵旰憂念欲保民社之苦心斷可知矣奈獨
勞於上而無將順之人雖有一二臣同姑無老

成鎮物之望是以寤寐英賢託情遠交乙亥春
相臣李裕元奉使入都得達姓名於榮戟之下
中堂為陳保邦固圉之道賜以手書李相歸獻
寡君寡君一見契悟傾慕不已自後連年書幣
皆出寡君之意然李相亦不無贊襄之事漸見
清議不與陰為自貳之計露出中堂密函播人
耳目私相譏侮傳及於日本往來之人今年有
悖儒投進斥和之疏其中並論李相不當與中
堂往復李相急於自明頓改前見自附清議寡
君赫然發怒即日竄逐於嶺南之巨濟府且念

中堂為我謀忠以德取怨並致日人之憾不勝
慨惋分送朝士游歷於日本語及書函事必令
到底發明無使貽累於中堂朝士之回果奏日
人詳聞其事幾釋初憾寡君猶為之憧憧不安
臨朝屢歎今年八月又有逆臣安驥泳等聚不
逞怨國之徒托言伐倭實謀犯闕事發鞠治渠
魁雖已就戮餘黨迄未盡覈以致領選之行派
定已久而國內多故不能即程遂致奄迫深冬
者也竊伏念小邦處環海之中尚孑然特立於
萬國之外久為衆手所指觀其成敗而北俄東

日形勢相逼燕雀之處堂猶未足以喻其急也
從前每有緩急悉仰

上國若今日則駭機一發水陸電迅四面受敵所
謂雖鞭之長不及馬腹所以中堂屢示警告丁
甯反覆使之先事周旋莫或舒東顧之憂者也
雖然小邦積弱之餘急難自振縱云通商練兵
非可時月見效為今之道惟有擇邦善交講信
修睦從以彌縫疎失以備陰雨庶幾為目下之
急務而泰西諸國中久聞美邦國富兵強心公
性和國富則少貪兵強則可恃心公則處事平

性和則執禮恭且聞近日頗豔慕華風購買書籍周孔之道未必無西被之理先通美國公平立約俾嗣後來款者一遵成式無害我自主之權此又急務之所當先者也凡此數畫皆不出於中堂之成算辛勤牖迷若恫在己使小邦之人幸得一二開悟者寔中堂之賜也雖然邦人之最惡者洋人也我寡君重違民情姑未嘗顯言通洋若美船一朝來泊則美亦洋也國內橫議必將歸咎於寡君迎接之際事事掣碍反有起釁之慮觀於安驥泳之事可知矣欲倚中堂

之重以鎮服羣情則中堂威著四裔誰不敬慕
獨小邦愚俗不知畏憚觀於李相之事亦可知
矣今此小邦聯美之計環瀛各國不應不心許
而惟日俄及本國人所不欲樂聞者也日俄若
知其機則必伎害沮撓事未可知國人若知其
機則必譁然蠢動功難順就此事宜速不宜遲
宜密不宜疎宜事體重大彈壓國人之心宜名
正言順以消狡鄰之謀惟有我

皇上明降詔旨先期曉諭於明春年貢使之回踵遣
派員協美議約則寡君得以憑仗

皇靈隨宜酌辦保合東洋永固藩屏庶其在此惟願
中堂默運元機與神為謀俾事成之後渾然無
形跡之可尋如泰山喬嶽不見運動而功利及
人使小邦愚民獲福而不自知豈非盛德之事
乎嗣後凡干事務更煩指教克圖有終亦惟中
堂之惠我寡君深有望焉 允植 受命專來不敢
不盡其所蘊言所難言張皇冒瀆死罪死罪拙
手自書辭冗筆荒伏望鑒察尤增惶恐領選使
吏曹參議金允植謹白

光緒七年十一月二十九日到

--	--	--	--	--	--	--	--	--	--	--

1800

朝鮮來學製造摺十二月初二日

奏為朝鮮委員率領匠徒來津學習製器現已分派各局妥辦情形恭摺仰祈

聖鑒事竊朝鮮懇請派人來津學習製造及練兵購器事宜前經臣督同委管軍械製造各員妥議節略章程於上年九月具奏請

旨飭由該國相度便宜自行酌辦本年三月該國王擬派陪臣趙龍鎬帶匠徒赴津先令副司直李應浚齎咨來謁旋據李應浚呈稱趙龍鎬病故該國復有事耽誤九月間始據改派陪臣吏曹

參議金允植等率領學徒人等共六十九員名
先行學習製器因值海道封凍仍從旱路入關
業由禮部奏明在案十一月二十八日據朝鮮
陪臣金允植等來保定稟到賚呈該國王咨臣
文件頗能洞悉時艱講求武備以圖自強之計
經臣傳見金允植卞元圭等詳詢一切令將帶
來隨員匠徒同赴天津分派機器製造兩局查
照前次議定章程條規認真學習並飭各局委
員督飭工匠盡心教導以期技藝速成俾得回
國轉相傳授仍由金允植等約束各匠徒務須

恪遵局規講求製造不得出外滋事及稍有懶
惰荒誤除咨總理衙門禮部查照並咨覆該國
王知照外謹照錄朝鮮國王兩次來咨清單恭
呈

御覽伏乞

皇太后

皇上聖鑒謹

奏

謹將朝鮮國王兩次來咨照鈔恭呈

御覽

朝鮮國王為咨報事光緒六年十一月初一日
承准貴咨官行副司直卞元圭回自

京師齎到禮部咨照得傳宣

聖旨製器練兵

曲紆籌策竊伏念弊邦僻處鯨域厚沐

鴻造每荷

覆幬之仁偏被

陶甄之德今茲津廠利器即係武庫秘藏

特令選士而來學繼

紆派員而往教當職與一國臣庶北望攢頌已於節

价之行畧伸叩

謝之忱而學造一款不容少緩現差陪臣吏曹參

議趙龍鎬領率匠工送赴天津外專差司譯院

副司直李應浚齎咨前往探察海道轉詣天津

預講奠接之方為此先行咨報煩乞貴衙門照

詳轉

奏施行須至咨者

光緒七年三月初二十九日發

朝鮮國王為派遣匠工赴廠學造事上年冬賚
咨官卞元圭之回自

京師傳宣

皇旨

頒降節略章程等件許令酌辦微私孚達

隆渥誕敷北望攢頌隕越于下竊念弊邦至誠事

大厚蒙

字小亦惟中堂大人推廣

聖朝均視之

德善諒友邦同仇之義先事而慮當務之勉雖使弊

邦自為之謀無以及此寤寐銜戢思有以舉而行之而就事審勢又不容不執其要而先其急顧今所患戎備之疎由於器械之不利而器械之不利職由工技之無學也故現在之兵無器可習已購之器有壞輒棄是以舉國之論咸謂選工學造為今務之最要而宜先者也用是專差陪臣吏曹叅議金允植率領匠員前赴貴衙門恭聽指揮煩乞轉

達

天陛劃賜施行區區幸甚一行人員數目另具別錄

外為此合行移咨請照驗轉
奏施行須至咨者

光緒七年九月二十六日發

朝鮮國委員學徒通事隨從等名數

領選使金允植

從事官尹泰駿

官弁白樂倫

譯官崔性學

醫員柳鍾翕

伴倘朴泳鈺

尹泰駟

學徒高永喆

朴台榮

尚 濬

李熙民

李昌烈

趙漢根

李苾善

秦尚彥

高永鎰

金光鍊

金台善

趙台源

安昱相

安浚

李章煥

李南秀

李瓊

崔圭漢

金聲

鄭在圭

金元永

韓得俊

黃貴成

金興龍

金泰賢

河致淡

金聖元

張榮煥

崔同順

朴奎性

皮三成

洪萬吉

宋景和

安應龍

崔志亨

金成孫

朴永祚

全德鴻

通事鄭麟興

210

211

李文熙

崔志華

隨從順得

仁錫

學甫

長孫

善基

萬吉

根成

龍成

興福

在青

公祿

千萬

壽鳳

學祚

貞哲

同伊

仁石

石伊

漢傑

別遺堂上卞元圭

堂下李根培

李肅毅伯奏議

及門
吳章洪汝綸
編輯

卷八

查覆盛慶兩軍摺

籌辦朝美議約摺

試辦織布局摺

懇請終制摺

再懇終制摺

官軍平定朝鮮摺

會問李是應摺

議覆鄧承脩駐軍煙臺摺

創辦電線報銷摺

議覆張佩綸靖藩服摺

議覆張佩綸條陳六事摺

代朝鮮聘西士片

朝鮮國王來咨

奏明答覆朝王三事摺

照抄朝鮮國王來咨並咨覆朝鮮國王文各三

道

查覆馬建忠參案摺

商局接辦電線摺

朝鮮會勘邊界摺

妥議朝鮮通商章程摺

擬定中國朝鮮商民水陸貿易章程

華商公議接辦蘇浙閩粵陸路電線章程

查覆盛慶兩軍摺 光緒八年正月二十六日
奏為遵

旨確切查明據實覆陳仰祈

聖鑒事竊 臣欽奉光緒七年十二月二十四日

寄諭有人奏淮軍統將周盛傳周盛波帶所部盛字

營剋扣乾沒米鹽等物悉由該統領轉販分派各

營領受勇丁含怒蓄怨羣思得而甘心又吳長慶

唐定奎等軍刻待勇丁分駐江南一帶鼓譟時聞

上年吳長慶所部調駐山東行至清江一聞而散

等語究竟有無其事著李鴻章按照所參各節確

切查明據實具奏不在迴護掩飾原片著抄給閱
看等因欽此 臣伏查淮軍盛字營係同治元年臣
於蘇撫任內在滬募練成營諗知周盛波周
盛傳兄弟於咸豐年間在合肥西鄉團練鄉勇
屢擊敗大股髮捻素稱敢戰因檄令該員等統
帶協勦蘇浙各郡縣粵逆嗣復調勦東豫鄂皖
直五省捻匪以次蕩平實盛軍之力居多同治
七年賊平後周盛波乞歸養母該軍遂交周盛
傳統領周盛波久不在營而言者猶撫及之則
其餘之毫無影響概可知已周盛傳所部自同

治九年由陝西隨臣移直布置海防歷年築新城造砲台操練各種後膛鎗砲精益求精威軍利器足與西洋相埒遂為各省防軍之冠又以其暇督勇挑挖南運減河至海口百數十里添闢溝渠百數十道屯田數萬頃使津東斥鹵不毛之地可治稻田於地方民生水利大有裨益尚不僅防務得力已也儻該營有剋扣乾沒之事勇丁有含怒蓄怨之情豈能踴躍赴功若此至原片稱米鹽蔬菜煙紙等物悉由該統領轉販分派貴逾時價或假小物責革乾沒其餉等

語查淮軍定章各營食米向由統領派員赴他處采辦運營俾臨敵行軍不至乏食盛軍米糧須赴南省購運前經奏明有案即連運脚核計扣銀並無貴逾時價之說鹽蔬煙紙等物均係弁勇自購實無由統領轉販分派者勇丁犯規責革必補給應得之餉從未有以營官乾沒控訴者至原片稱周盛傳謁見時形跋扈臣為優容羈縻等語查周盛傳老於軍事性情蘊直講求洋人練兵製器格物之法每與臣言輒憤時嫉俗侃侃不撓臣亦諒其無他隨事勸誡該提

督素守禮法絕無違悖教令之時近因其母年
屆九旬屢次懇解兵柄回籍侍養臣以津防至
重良將難得曲意慰留若以此為優容羈縻則
是公心而無私意也至原片稱吳長慶所部上
年調駐山東行至清江一闕而散唐定奎刻待
勇丁鼓譟時聞等語查吳長慶素得兵心前年
調往山東勇丁間有久役思歸准假另補本係
軍營常事並無行至清河一闕而散之說唐定
奎馭軍仁厚所部前經沈葆楨由臺灣調駐江
陰一帶分守沿江砲台並無刻待勇丁鼓譟之

事如有其事歷任江蘇督撫臣豈能徇隱姑容
凡為是言者大都湘楚嫉忌之流造謠傾軋遂
至傳聞失實臣受

國厚恩忝膺重任選將練兵是其專責惟有督飭
在防各將領嚴明約束固結軍心實事求是力
圖自強之策以備干城之用如查有肥私剝下
情弊必即嚴叅重懲斷不敢稍有迴護掩飾致
誤事機所有遵

旨查明緣由理合據實詳晰覆

奏伏乞

皇太后

皇上聖鑒謹

奏

籌辦朝美議約摺三月初六日

奏為遵

旨籌辦朝鮮與美國議約事宜現經商定約稿並擬請

旨派員前往會辦恭摺馳陳仰祈

聖鑒事竊查美國欲與朝鮮結約通好經臣勸令朝

鮮派員赴津與美總兵蕭孚爾商議適朝鮮國

王派陪臣金允植為領選使帶學生來津就便

籌議外交臣於光緒七年十二月初二日奏奉

上諭朝鮮久隸藩屬自應隨事維持調護即以固我

邊陲該國如與美國訂約則他國不至肆意要求
於大局實有關係仍著李鴻章隨時相機開導妥
為籌辦等因欽此仰見

聖謨廣運綏撫屬邦莫名欽服 臣於歲杪即聞美國
派定水師總兵薛斐爾即蕭孚爾為朝鮮議約
全權大臣催令今春乘兵船東駛朝鮮陪臣全
允植亦來保定謁見謂續奉該國王密諭求臣
代為主持速與美使商議並寄呈該國機務大
臣擬具約稿屬為鑒定當即密飭津海關道周
馥設法婉留薛使俟 臣會商 臣二月初抵津薛

使訂期謁晤先將伊所擬約稿由周馥譯呈其
意欲以日本條約為藍本臣將兩稿比較所差
甚遠且於中國屬邦一節均未提及將來各國
效尤久之將不知朝鮮為我屬土而萬國公法
凡附庸小國不得自主者又未便與各大邦立
約是彼此均有為難之處臣屬周馥諷示薛使
謂約內須提明中國屬邦政治仍得自主字樣
臣亦與金允植等議及該陪臣翕服無異詞因
與酌量刪增約稿將各項應防之流弊應獲之
權利一一包括在內令周馥及道員馬建忠密

交薛使閱訂該使於各款頗有增改大致尚無甚出入惟於第一款聲明朝鮮為中國屬邦堅不允從意甚決絕適美國署使何天爵在京與總理衙門議添認明屬邦一節經總署王大臣將何天爵擬改第一款照錄專函知會前來何天爵旋於二月二十五日來謁乃謂薛斐爾堅執原議慮於兩國平行體統有碍且他日國會紳員亦必議駁是以該署使在京擬改第一款未能增入臣謂既經議定豈可復行翻悔該署使力稱此事本國專派薛斐爾主政伊僅可商

辦臣以該兩人既未敢擅允令先電請本國核示該署使允為發電請示至今尚無回報二十七日三月初一日薛斐爾復偕何天爵來署商訂此外各款有臣處續增而該使酌改者有該使續增而臣處酌改者較原本似更周密於一切取益防損之道再三斟酌總期於朝鮮商政有裨將來不致為他國肆意要求以冀仰副

朝廷軫念屬藩維持調護之至意此事與薛斐爾何天爵晤商四五次辯論二十餘日始有成議所訂約稿擬暫空第一款俟美國回信再議去留

臣於稿本紙尾鈐一圖章並邀薛斐爾簽字畫押為據先交朝鮮陪臣李應浚賫回國以為該國另派大員與薛使商辦之依據並傳見金允植諭知現辦情形告以美國若不肯將第一款添入須於定約後另行設法聲明以符初議此臣迭次與薛斐爾等議辦朝鮮立約之實在情形也朝鮮今春續派陪臣魚允中等尚未到津薛斐爾已赴煙台與該國水師提督會商約於三月二十日開駛東行諄請臣處派員偕往而朝鮮屢次來員亦懇派員同美使前去頃又

接朝鮮國王之叔父總理機務李最應來書內
言美使東來惟臣處是仰是依等語臣反覆籌
維該兩國約稿既經議有頭緒若不派員同往
恐主客之間形迹隔閼易生疑衅或再有他人
從旁唆聳約事無成而日俄強鄰轉得遂其離
間侵陵之詭計亦東方大局之憂關繫實非淺
鮮查有二品銜候選道馬建忠精明幹練於交
涉公法研究素深此次臣與薛斐爾議約該員
皆在座詳悉巔末堪以派往會同朝鮮國王所
派議約大員相機妥辦應即請

旨特派前往襄助由臣咨明朝鮮國王知照再薛斐爾乘坐該國兵船前赴朝鮮臣處北洋水師兵輪船本擬於春夏之交飭赴東洋等處游歷藉以測量沙線練習風濤擬即派統領北洋水師記名提督丁汝昌於三月望後與馬建忠會於煙台酌帶兵船偕同薛斐爾東駛以壯聲勢而杜要挾除將議定約稿暨臣與朝鮮總理機務丞相李最應來往函件及與金允植筆談底稿照鈔清摺恭呈

御覽外所有臣遵

旨籌辦朝鮮與美國議約事宜並請

旨派員前往會同商辦各緣由理合恭摺由驛五百

里密陳伏乞

皇太后

皇上聖鑒訓示遵行謹

奏

--	--	--	--	--	--	--	--	--	--	--

試辦織布局摺

奏為招商在上海試辦機器織布局以擴利源而
敵洋產恭摺仰祈

聖鑒事竊查光緒四年十月二十四日奉

上諭御史曹秉哲奏請仿用西法開採以利器用一
摺據稱近來各省開設機器等局需用煤鐵甚多
請由內地仿照西法用機器開採轉運鼓鑄製造
既省買價並濬財源等語所稱招徠殷商聽其開
辦酌量徵收釐稅是否可行著李鴻章體察情形
斟酌妥善奏明辦理原摺著抄給閱看等因欽此

臣查該御史原奏內稱方今之務以海防為最要泰西各國凡織布疋製軍械造戰艦皆用機器故日臻富強又謂中國若用機器開採轉運鼓鑄製造其價比來自外洋為賤更可宏拓遠謨等語所論均屬切要臣維古今國勢必先富而後能強尤必富在民生而國本乃可益固溯自各國通商以來進口洋貨日增月盛核計近年銷數價值已至七千九百餘萬兩之多出口土貨年減一年往往不能相敵推原其故由於各國製造均用機器較中國土貨成於人工者

省費倍徙售價既廉行銷愈廣自非逐漸設法仿造自為運銷不足以分其利權蓋土貨多銷一分即洋貨少銷一分庶漏卮可期漸塞查進口洋貨以洋布為大宗近年各口銷數至二千二三百萬餘兩洋布為日用所必需其價又較土布為廉民間爭相購用而中國銀錢耗入外洋者寔已不少臣擬遴派紳商在上海購買機器設局仿造布疋冀稍分洋商之利迭經飭辦均以經費不充稅釐太重相率觀望久無成議復飭據三品銜候選道鄭官應三品銜江蘇補

用道龔壽圖會同編修戴恆安細籌擬據稟估
需成本銀四十萬兩分招商股足數議有合同
條規尚屬周妥當經批准先在上海設局試辦
派龔壽圖專辦官務鄭官應專辦商務又添派
郎中蔡鴻儀主事經元善道員李培松會同籌
辦該道等延聘美國織布工師丹科到滬據稱
中國棉花抽絲不長恐織不如式必須就花性
改製織機已與訂立合同令其攜帶華花赴英
美各廠試織酌購機器本年夏秋之交即可回
華開辦查泰西通例凡新創一業為本國未有

者例得界以若干年限該局用機器織布事屬
勦舉自應酌定十年以內祇准華商附股搭辦
不准另行設局其應完稅釐一節該局甫經倡
辦銷路能否暢旺尚難預計自應酌輕成本俾
得踴躍試行免為洋商排擠擬俟布足織成後
如在上海本地零星銷售應照中西通例免完
稅釐如由上海運運內地及分運通商他口轉
入內地應照洋布花色均在上海新關完一正
稅概免內地沿途稅釐以示體恤如日後運出
外洋行銷應令在新關完一出口正稅若十年

後銷路果能漸暢洋布果可少來再行察酌另
議此係中國自主之事自可特定專章無虞洋
商藉口除未盡事宜再由南北洋大臣隨時督
飭辦理外所有上海招商試辦機器織布以敵
洋產緣由理合恭摺具陳伏乞

皇太后

皇上聖鑒謹

奏

懇請終制摺 三月十二日

奏為恭謝

天恩 滙陳下情 仍籲請開缺終制 恭摺仰祈

聖鑒事 竊 臣接准兵部火票 遞到光緒八年三月初

九日內閣奉

上諭大學士直隸總督李鴻章現丁母憂本應聽其
終制以遂孝思惟念李鴻章久任畿疆籌辦一切
事宜甚為繁鉅該督悉心經畫諸臻妥協深資倚
任且駐防直隸各營皆其舊部歷年督率訓練用
成勁旅近復添練北洋水師規模創始未可遽易

生手各國通商事務該督經理有年情形尤為熟悉朝廷再四思維不得不權宜辦理李鴻章著以大學士署理直隸總督俟穿孝百日後即行回任際此時勢多艱該督當以國事為重勉抑哀思力圖報稱即以慰伊母教忠之志有厚望焉欽此仰見

皇太后

皇上深仁渥澤既俯鑒臣子之隱曲示矜憐復不棄駑下之材優加器使凡屬旁觀猶為感泣矧在身受能無奮興惟微臣下情有不得不瀝陳於

聖主之前者 臣承乏

畿疆十有二年過多功寡歷荷

聖慈格外保全不加譴責 臣亦勉竭庸愚但有馳驅
感激之心從無瞻顧畏難之念自聞 臣母病棘
神思昏瞶方

賞假而遠道未歸忽聞訃而終天抱恨在 臣心有一
息難安之疚在

國家為絲毫無補之人忠孝大閑進退失據我
朝奪情之案屢見彈章咸豐初年曾國藩勦賊江
右適遭父憂其時軍務正急律以金革無避之

義宜可墨經從戎然猶抗疏再三堅請終制近
年李鴻藻丁母憂奏請終喪亦蒙

聖恩俞允直隸現甚平靜並無軍事署督臣張樹聲
於地方情形素所熟悉淮軍將弁皆有布衣昆
弟之歡但使江蘇各省額餉照常籌解必能聯
絡拊循為海口屹然重鎮北洋中外交涉事宜
頭緒雖多頻年宣布

皇仁諸臻帖服只須隨事謹守約章操縱得宜可無
齟齬之慮至於越南垂危琉球未復此則仰勞

廟算隱繫

天心尤賴總理衙門與出使諸臣迎機善導亦非臣之
輕材繇力所克策其萬全者也臣母死生契濶
相見無期臣即廬墓三年已無解於不孝無涯
之隱痛若復以僂然衰經之身強起視事不獨

上累

聖朝孝治之隆下滋名教罪人之議且台輔崇班封
疆重任而以痛心疾首負罪不祥之人濫廁其
間雖蒙

聖主信任不疑豈豈能無愧於心伏懇

皇太后

皇上矜鑒愚誠收回

成命俯准開缺終制俾秋霜春露稍展歲時愴慕之
忱即枕塊寢苦仍在

天地幘幪之內臣年甫六十居廬之日有限報

國之日無窮縷縷哀悃號泣上訴不勝迫切待

命之至所有微臣籲懇開缺終制緣由謹繕摺具陳伏

乞

皇太后

皇上聖鑒訓示謹

奏

再懇終制摺 三月二十二日

奏為瀆陳愚悃仍懇開缺終制仰祈

聖鑒事竊臣恭閱邸抄光緒八年三月十四日內閣
奉

上諭李鴻章奏瀝陳下情仍懇開缺終制一摺情詞
懇切覽奏良用惻然朝廷以孝治天下本不忍重
違所請強人子以所難惟念李鴻章久任畿疆值
此時勢艱難一切措置機宜動關全局寔是非尋常
疆事可比雍正乾隆年間大臣如孫嘉淦朱軾嵇
曾筠蔣炳于敏中等皆奉

特旨任守制近今如曾國藩胡林翼亦皆奪情起用
李鴻章惟當仰體朝廷不得已之苦衷勉抑哀思
仍遵前旨俟守孝百日後即回署任毋得再行固
辭欽此仰見

皇太后

皇上宵旰憂勤塵念全局凡此從權之舉皆非得已
之為

聖訓周詳嘉矜備至雖在犬馬猶有戀

主之忱臣獨何心敢申前請惟以臣之愚處臣之地
艱難竭蹶未敢仰希先代諸臣於萬一在

聖主固厚以相勸而微臣卒難援以自寬溯查雍正乾隆年間大臣如孫嘉淦朱軾嵇曾筠蔣炳于敏中等綜其治績各有專長近今如曾國藩胡林翼亦皆身在行間故凡奪情起用者非為

國家必不可少之人即屬事勢無可如何之會方

今賴

聖主威德四彝賓服九塞清塵固尚晏然無事也而臣待罪畿疆略無寸效可比前賢數年以來調停於中外交誼之幾經營於兵餉兩絀之際雖君父之慈宥過匿瑕而不能弭夫讒忌之口雖

廟堂之上計從言聽而不能望之僚案之間積誠既
不足動人省愆宜莫如用晦茲以縲絰之身例
應終喪可已而不已值此時勢臣自揣才力實
不能有異夫人為其事而無其功固無解於妨
賢誤國之譏評更難免於貪位忘親之咎責若
至指摘交加既負

朝廷知人之明尤失臣母教忠之意則臣之獲罪更
大再四籌思臣之進退實為狼狽與其含詬貽
羞於日後曷若憑誠控辭於事先惟有籲懇

天恩俯加原諒收回

成命准開大學士署直隸總督之缺俾得在籍終制
稍安愚拙之分曲全母子之情感戴

皇仁曷有既極再昨接署督臣張樹聲電信准於三
月二十三日起程由輪船北上計四月初必可
到津臣一俟交卸清楚即航海入江奔喪回籍
合併聲明所有微臣瀆陳愚悃籲懇開缺終制緣
由謹繕摺具陳伏乞

皇太后

皇上聖鑒訓示施行臣無任冒死泣血懇求祈望之
至謹

奏

奏

奏

官軍平定朝鮮摺七月二十八日

奏為官軍捕治朝鮮亂黨大勢粗定朝鮮派員抵
津妥商善後事宜恭摺仰祈

聖鑒事竊臣承准軍機大臣字寄七月二十三日奉
上諭張樹聲奏吳長慶等統領官軍馳至朝鮮國都
將李昰應獲致現已解送到津著暫行妥為安置
俟李鴻章到津後會同張樹聲向李昰應究出該
國變亂緣由及著名亂黨詳細具奏候旨遵行吳
長慶現派隊伍圍攻枉尋利泰兩村著飭令該提
督穩慎進攻將亂黨渠首迅速捕除一面妥籌防

一十九
範鎮定人心以安反側吳長慶所統各營不敷分
布現已添調黃金志帶隊前往將來應否添調重
兵著李鴻章等隨時體察情形酌量辦理等因欽
此仰見

聖謨廣遠綏靖藩邦至意曷勝欽佩臣於煙台行次
接據提督丁汝昌道員馬建忠十六十八日稟
報自獲送李昞應登舟後馬建忠隨請朝鮮國
王由其政府將願修舊好之意函達日本使臣
花房義質即派全權大臣李裕元副官金宏集
馳赴仁川港會議其亂黨之聚居在尋利泰二

里者約數千人世隸兵籍跋扈難制與李昱應
勾結一氣迭為變亂今李昱應雖已就拘而其
長子載冕以大將新握兵柄仍恐該黨奉以為
亂爰於十五日傍晚先將李載冕誘拘南別宮
以水兵數十人守之是夜吳長慶調派副將張
光前何乘鰲總兵吳兆有率領親兵慶字三營
往捕在尋里亂黨窮搜巢穴短兵巷戰直至天
明生擒一百五十餘人其餘悉由屋後竄去我
軍帶傷者僅二人其利泰里亂黨吳長慶親往
掩執以地近營址已先期間風遠颺僅獲二十

餘人是役共獲一百七十餘人當經訊明戮其魁首罪狀較著者十人其餘概交朝鮮酌予釋放俾脅從者知為法所不誅藉以潛消反側此次

天威震驚羣凶奔竄老巢既覆則散處四方者不難隨時續捕而李載冕不安於位亦即於是日請釋兵柄此朝鮮亂黨已被勦散國勢粗定之大概情形也至日本於中國勘辦朝鮮內亂始終未敢攙越尚屬恪遵公法惟與朝鮮議約以焚館逐使為言藉端要挾多開條款朝鮮既自行

派員赴距京八十里之仁川議事馬建忠因朝
日為多年有約之國其交涉之案未便由中國
顯與主持但將其可許不可許各條預為指示
又適在王京與吳長慶謀靖內亂不遑他顧而
朝鮮大臣李裕元等已於十七日與日本定議
簽押核計約款八條尚屬無甚流弊惟填補日
本各費至五十萬圓為數較多該國王以外患
內憂事機危迫特命其臣迅速了事冀消鄰釁
遂有不能不甘讓之勢猶幸中國水陸各軍聲
勢較盛日本隱有所憚未遽將割地開礦及陸

路通商各事強朝鮮以必從此朝日和約既定
暫弭釁端之大略情形也臣抵津後晤商張樹
聲以朝鮮事大致就緒續撥黃金志三營自可
暫緩前往稍省煩費惟李是應已起解赴京旋
奉暫行安置之

旨經張樹聲派員追令折回俟其到津臣當會同張
樹聲詳細究問再行

奏明辦理刻下朝鮮王鑒於積弱力圖振作已派
全權大臣趙甯夏副官金宏集從事李祖淵等
隨同馬建忠丁汝昌於二十五日抵津謁商一

切查朝鮮善後各事關係重要頭緒尚繁容臣
與之悉心商度次第酌辦日本兵船陸軍未撤
之先我軍應暫留坐鎮俾朝鮮有隱然可恃之
資現仍留吳長慶統率各營續捕亂黨並令丁
汝昌馳回會商相機妥辦除將丁汝昌等稟單
二件馬建忠所錄筆談及朝日約款鈔送總理
衙門備查外所有官軍捕治朝鮮亂黨及該國
派員抵津緣由理合會同署直隸督臣張樹聲
合詞恭摺由驛具陳伏乞

皇太后

皇上聖鑒訓示謹

奏

會問李是應摺 八月初十日

奏為遵

旨會同究問朝鮮亂首李是應情形恭摺詳細覆陳

仰祈

聖鑒事竊 臣等節次欽奉

諭旨著會同向李是應究出該國變亂緣由及著名

亂黨詳細具奏候旨遵行等因欽此 臣等連日遵

旨會同傳見李是應究問該國變亂緣由及著名亂

黨語多狡展堅不吐實當將究問及擬議處置

各情先行函達總理各國事務衙門一面復飭

津海關道周馥候選道袁保齡馬建忠等再行
詳細根究去後茲據該道等稟稱公同傳詢李
是應反覆詰問據稱是應癸酉以前輔政十年
各營軍兵按月放餉自閔謙鎬執掌財賦近者
軍米十餘朔不發六月初間頒下一朔米劣斗
小軍兵不受閔謙鎬不思安撫捉囚濫殺諸軍
憤鬧是應聞亂入城挺身曉諭亂軍因殺國相
宰臣等三四人詰以伊兄李最應既不管理餉又
不管兵何以被殺則謂李最應執政數年自失
人心當日恐喝軍民以致遇害詰以汝既能定

亂當知亂首何人持械先入王宮是何隊兵卒
環訴於汝係何姓名則謂初九日軍兵來訴於
家幾千百人不知其首圍逼王宮五營咸動不
知孰先孰後詰以初九以後汝總持庶務罷機
務衙門改武衛營制何以未聞捕治亂黨則謂
庶務因國王之託亂黨姓名百方開導絕不供
指查朝鮮領選使金允植致周馥書云李昰應
素日結黨蓄謀圖奪政柄甲戌以來形迹屢著
昨年逆魁李載先卽昰應之子諸囚供案屢發
昰應陰謀國王置不欲聞止誅餘黨此次亂起

之源由於是應激變乃自稱國太公總攬國權
朝鮮侍讀魚允中致周馥書亦言國政現歸是
應亂魁即是此人金允植又曾與周馥筆談言
李是應秉政十年毒虐生民國王年長無意反
政舉國不遑閔妃崇用親屬以分其權自是憤
毒日增馬建忠與朝鮮吏曹判書趙甯夏筆談
據云今王入承國統後李是應總理國事國王
欲親事務相持許久國政始出於王王妃亦多
與聞至閔謙鎬分給軍餉之日米不滿斛軍士
與胥役詰鬪謙鎬挈囚軍五人欲置於法軍人

奔訴於是應是應以言激之致變初九日殺閔
謙鎬金輔鉉是應入闕曉諭諸軍即總庶務各
等語李是應所言如彼朝鮮諸臣所述如此參
稽實證此次之變發於亂軍而成於是應昭昭
在人耳目稟請鑒核等情前來臣等覆加察核
該道等所稟李是應之言與臣等傳問時所對
略同至朝鮮諸臣所述並接廣東水師提督吳
長慶來函證以該國事後輿論均無異辭此次
變亂緣由雖因軍卒索餉而起惟李是應乃國
王之本生父昔當國王冲年專權虐民勉强歸

政非其本懷近來怨望益深上年即有盜火王
宮及其子李載先謀逆情事此次亂軍赴伊家
申訴如果正言開導何至遽興大難朝鮮臣庶
皆謂是應激之使變實非無因即謂此無左證
而亂軍圍擊宮禁王妃與難大臣被害兇焰已
不可嚮邇李是應既能定亂於事後獨不能遏
亂於方萌五尺之童亦知其心叵測况乘危竊
柄一月有餘擅作威福樹置私人顧於作亂犯
上之徒未嘗一加捕治春秋之義入不討賊其
意何居迨臣等傳

旨詰責猶嘒嘒歸罪於被殺之宰執絕不思軍卒非
可殺宰執之人雖亂黨姓名始終不肯供指而
衆論確鑿遁辭知窮黨惡首禍之情人臣無將
之義片言可折百喙難逃設非

朝廷命將出師赴機迅速則該國宗社骨肉之變將
有不忍言者惟現據趙甯夏等來津面陳該國

王欲籲求

天恩曲予寬宥若必執法嚴懲在李是應固罪無可
辭而該國王亦情難自處第李是應積威震主
黨羽繁多業與國王王妃及在朝諸臣等久成

嫌衅儻再釋回本國奸黨構煽怨毒相尋重植
亂萌必為後患屆時頻煩

天討寬典轉不可屢遷况茲貧弱小邦變故亦豈堪
再遇是是應不歸猶可保其家安其國全其父
子是應一歸則父子終傷必至害於家凶於國
而後已也伏查朝鮮史略元代高麗王累世皆
以父子構衅延祐年間高麗王諫既為上王傳
位於其子燾交播讒隙元年流諫於吐蕃安置
王父俱有前事又至元年間燾子忠惠王名禎
亦經元帝流於揭陽縣其時高麗國內晏然徒

以宵小浸潤遠竄窮荒今李是應無蒙業垂統
之尊有幾危社稷之罪較諛禎等情節尤重惟
處人家國父子之間不能不為兼籌並顧儻蒙
聖朝寬大

特頒明詔但責其僭稱國太公自行專政既不能於
軍人往訴時曉諭禁斥又不能於入總庶務後
討捕亂黨實屬謬妄格外

加恩勅下臣等將李是應安置近京之保定省城永
遠不准復回本國優給廩餼譏其出入嚴其防
閑仍往該國王歲時派員省問以慰其私於以

弭該國禍亂之端亦即以維該國王倫紀之變
則

聖主義問仁聲洋溢於海外矣謹陳愚淺以備萬一
之慮是否有當伏候

採擇施行除將究問李是應節略及金允植等函件
咨送軍機處查核外所有臣等遵

旨會同究問李是應詳細情形謹合詞繕摺由驛馳
奏伏乞

皇太后

皇上聖鑒訓示謹

奏

議覆鄧承脩駐軍煙臺摺

八月十六日

李鴻章跪
張樹聲

奏為懾服鄰邦先圖自強酌籌緩急機宜遵

旨覆陳仰祈

聖鑒事竊臣等承准軍機大臣字寄八月初三日奉
上諭給事中鄧承脩奏朝鮮亂黨已平球案未結宜
乘此聲威特派知兵大臣駐紮煙臺相機調度厚
集南北洋戰艦分撥出洋梭巡為扼吭拊背之謀
其駐朝鮮水陸各軍暫緩撤回以為犄角責日本
以擅滅琉球肆行要挾之罪日人必有所憚球案
易於轉圜等語所奏不為無見著李鴻章張樹聲

酌度情形妥籌具奏等因欽此仰見

聖主恢擴遠謨周諮博訪至意曷任欽佩竊惟跨海
遠征之舉莫切於水師而整練水師之要莫先
於戰艦中國閩滬各廠自造之輪船與在洋廠
訂購之輪船除商輪僅供轉運外如北洋之鎮
東等六船南洋之龍驤等四船福建之福勝建
勝廣東之海鏡清海東雄俱係蚊船式樣專備
扼守海口難以決戰大洋此外北洋之船凡七
分駐旅順天津者曰揚威曰超勇曰威遠曰操
江曰鎮海駐煙臺者曰泰安駐牛莊者曰湄雲

南洋之船凡十五駐江甯者曰靖遠曰澄慶曰
登瀛洲駐吳淞者曰測海曰威靖曰馭遠駐浙
江者曰元凱曰超武分駐福建之台灣廈門各
口者曰伏波曰振威曰藝新曰福星曰揚武近
因越南多事由船政派赴廉瓊洋面巡防者曰
濟安曰飛雲合計兵輪二十二號其中有馬力
僅一百匹內外未可充戰船者如泰安操江湄
雲等船祇可轉運糧械馭遠則已朽敗須加修
理惟北洋之超勇揚威兩快船南洋之超武揚
武澄慶等船較為得力此中國戰艦之大略也

自本年六月朝鮮亂黨滋事日本興兵報怨臣
樹聲遵

旨迅派揚威超勇威遠三船東渡復調澄慶威靖登
瀛洲與泰安等船陸續前往今朝鮮雖事局稍
定一時尚難撤回鄧承脩之意欲請

特派知兵大臣進駐煙臺相機調度厚集戰艦更番
出巡自為整軍經武警服強鄰起見然既思厚
集其力則必有得力戰艦十餘號乃足壯聲勢
而敷調撥近日南洋僅有測海馭遠靖遠三船
臣鴻章前過江甯晤左宗棠面稱長江要口乏

船分布礙難再調自係實情北洋天津等處僅有操江鎮海兩艘往來探送文報煙臺則無駐守之船均甚空虛今中國所有戰艦惟閩浙兩省七號之中或尚可抽調一二然彼所駐皆屬要地實虞顧此失彼且所謂知兵大臣者無素練之水師無經事之將領以為之用船少力孤情見勢絀不能服遠轉恐損威萬一日本窺我虛實悉簡精銳轉向他口蹈間抵瑕為先發制人之舉尤宜豫籌所以應之此臣等所不能不躊躇審顧者也查日本兵船在二十艘以外而

堅利可用者約十餘艘其中扶桑一艦號稱鐵
田比叡金剛兩艦號半鐵甲東艦一船號次等
鐵甲雖非上品究勝木質以彼所有與中國繫
長較短不甚相讓況華船分隸數省畛域各判
號令不一似不若日本兵船統歸海軍卿節制
可以呼應一氣萬一中東有事勝負之數尚難
逆料是欲制服日本則於南北洋兵船整齊訓
練之法聯合布置之方尤必宜豫為之計也自
古兩國相持或乘藉勝勢專以虛聲相恫喝或
隱修實政轉恐密議之彰聞務虛者聲揚而實

不副終有自絀之時務實者實至而聲自遠必有可期之效從前日本初行西法一得自矜輒敢藐視中國台灣一役劫索恤款後更廢滅琉球中國方以船械未齊水師未練姑稍含忍以待其敝然比年以來臣鴻章與內外諸臣熟商禦侮之要力整武備雖限於財力格於浮議而購船製械選將練兵隨時設法猶具規模復創設電線以通聲息茲值朝鮮有釁臣樹聲欽承廟謨調派水陸雄師馳電邁既藉電報之力事事得占先著遂能綏靖藩服日本見中國赴機迅

速不似曩時之持重亦稍戢其狡逞之謀與朝
鮮議約尋盟言歸於好雖所索償款略多然日
人初意實尚不止此其所以知難而退者未嘗
不隱有所憚至彼國議論洶洶羣疑滿腹恐中
國乘機責問球案聞初議募借洋債二千萬圓
添購船艦此事尚未舉行敵情豈云無備中國
地大物博但能合力以圖之持久以困之不患
不操勝算若竟欲於此時揚兵域外彼或鋌而
走險以全力結納西人多借洋債廣購船砲與
我爭一旦之命猶非策之上者固不如修其實

而隱其聲之為愈也 臣等再四籌商德廠所造
之定遠鐵甲船今冬可以來華第二號鐵甲船
亦儘明年可到容俟二艦到後選將募兵精心
教練而新式快船所以輔護鐵艦者尤不可少
或在洋廠訂購或在閩廠仿造必須酌籌鉅款
陸續添備鐵甲船如有餘力亦宜添製此則全
賴

聖明主持於上樞 臣部 臣疆 臣合謀於下庶水師乃
有成局海外乃可用兵軍實益蒐戍聲自播僮
能不戰屈人使彼帖然就範固為最善若猶囂

張不靖則聲罪致討諸路並進較有實際前歲
突戶璣回國顯肆要求中國聽其自去彼終未
敢決裂今又遣榷本武揚前來駐京或可相機
議辦其球案未結以前進止遲速權自我操似
可毋庸汲汲也 臣鴻章此次奉

命出山持喪僅逾百日隱疚實多儻以進圖東瀛為
名移駐煙臺果能於事有濟亟願効此馳驅惟
煙臺本是北洋轄境距津沽海程僅一日餘若
論控馭海防調度兵艦則駐津駐煙固無二致
即欲震懾日本而彼亦深知我之虛實煙臺無

砲台無陸軍又無兵船先無自立之根本轉恐無以制人 臣積年措注所有支應局水師學堂及廠鵠局所准軍大隊全在天津若挈以俱行則煩費既多挪動不易若獨自前往將何所憑藉以張聲威何從分撥以資調度况自津至滬達閩粵電報迅捷軍情頃刻可通煙臺則水陸電線俱無南北各省即有可商調之事旬日不得回信呼應尤覺不靈 臣等愚見欲圖自強之實事當以添備戰艦為要不以移駐煙臺為亟中國戰艦足用統馭得人則日本自服球案亦

易結矣至吳長慶所部陸軍遵

旨暫留朝鮮彈壓亂黨免致再有蠢動丁汝昌帶往
各兵船仍留朝鮮南陽海口與相依護聞日本
陸軍分布王京內外兵船五號留駐仁川港者
亦均未撤退在日人方謂朝鮮後患之須防而
我軍亦為朝鮮善後之久計互相牽制即以潛
消敵謀容臣等隨時相度情形奏明辦理所有
懾服鄰邦先圖自強遵

旨酌籌緩急機宜謹合詞恭摺由驛具陳是否有當
伏乞

皇太后

皇上聖鑒訓示謹

奏

卷八

三十三

創辦電線報銷摺 八月十六日

奏為創辦南北洋電報循照奏案官督商辦核明
收支經費截數報銷繕單恭摺仰祈

聖鑒事竊臣於光緒六年八月十四日奏奉

上諭李鴻章奏南北洋請設電報等語現在籌辦防
務南北洋必須消息靈通以期無誤事機該大臣
請於陸路由天津循運河以至江北越長江由鎮
江達上海安置電線係為因時制宜起見即著妥
速籌辦餘均照所議辦理等因欽此遵即遴派妥
員於六年九月在天津設立電報學堂一面由

丹國招雇洋人來華教習電學打報工作等事
購備各項機器料物採辦木植察看由津至滬
設線地道沿途應立巡電汎房分投料理於天
津設立電報總局並於紫竹林大沽口濟甯清
江鎮江蘇州上海七處各設分局自七年三月
開辦起至是年十月工竣止安設電線經費共
用湘平銀十七萬八千七百有奇此項應照
原奏招集商股認繳當飭道員盛宣懷等督同
衆商籌議據稟稱初創電線縣互三省地段甚
長非官為保護不可電報原為軍務洋務緩急

備用自北至南所經之地絕少商賈碼頭其絲
茶薈萃之區尚無枝線可通線短報稀取資有
限非官為津貼不可遵即試招商股自八年三
月初一日起改歸官督商辦除由商於八年三
月六月按期繳還官本銀六萬兩外五年後分
年續繳銀二萬兩按年繳五千兩免其計息其
餘不敷銀兩以軍機處總理衙門各省督撫出
使各國大臣如寄洋務軍務電報於信紙上蓋
印驗明轉發是謂頭等官報應收信資另冊存
記陸續劃抵按年核明彙報俟此項抵繳完畢

別無應還官款則前項官報亦不領資以盡商人報効之忱其各局常年經費即以所收尋常官商信資抵支無論不敷多少不得再請津貼其由津至滬沿途各汛弁兵馬乾口糧修理汛房每年約支湘平銀一萬一千兩自八年三月起仍請由淮軍協餉內開支俟五年後電報局儻能立脚此項亦歸電局自行籌給至各局雇用洋匠為教習學生造就人才起見此項第一年薪水川資由官給發期滿後或撤或留由電局酌定應給薪水回國川資均歸商本支發各

局現用學生由電報學堂陸續調取後即由電局接發薪水其七年十一月起至八年二月底止官辦所收報資應繳還歸款又據道員朱格仁稟稱電報學堂現存學生三十二名以後陸續派出不再招添新生裁減教習則經費漸可節省經臣先後批飭照辦並據淮軍報銷局司道將截至光緒八年三月初一日歸官督商辦以前收支各款查明舊管無項新收淮軍餉內提撥湘折庫平銀十九萬二千九百九十四兩有奇開除安置電線工料並各局汛及電報學

堂中外委員教習司事匠役人等薪糧辛工公
費津貼馬乾口糧正雜各款除商認先還官本
暨八年二月底以前報資繳歸扣抵外計共支
銷庫平銀十四萬八千九百五十五兩有奇實
存庫平銀四萬四千三十八兩有奇接支光緒
八年三月起各局洋人教習辛工等用歸於以
後舊管項下滾接開報等情詳請核奏前來臣
查中國創辦電報南北洋消息往來瞬息互答
實於軍務洋務大有裨助即如此次朝鮮內訌
臣等往返籌商調派水陸兵勇赴機迅速刻期

戡定得力於電報者居多現在改歸官督商辦
自應截數奏報以清款目查該局開支各款由
臣隨時督飭力求樽節均係實用實銷並無絲
毫浮冒惟購買電線機器工料雇用洋人教習
事事皆與外洋交涉絕無例案可循自應據實

開單

奏報仰懇

天恩准其作正開銷免再造冊送部以省文牘而節
浮費除另繕清單恭呈

御覽外所有查明創辦電報支銷經費緣由理合恭

摺具

奏伏乞

皇太后

皇上聖鑒敕部知照謹

奏

議覆張佩綸靖藩服摺八月二十二日

奏為自強要圖宜先練水師再圖東征遵

旨妥籌覆陳仰祈

聖鑒事竊臣承准軍機大臣密寄八月十六日奉

上諭翰林院侍讀張佩綸奏請密定東征之策以靖

藩服一摺據稱日本貧寡傾危琉球之地久踞不

歸朝鮮禍起蕭牆殃及賓館彼狃於琉球故智劫

盟索費貪恠無厭今日之事宜因二國為名令南

北洋大臣簡練水師廣造戰船臺灣山東兩處宜

治兵蓄艦為南北洋犄角沿海各督撫迅練水陸

各軍以備進規日本等語所奏頗為切要著李鴻章先行通盤籌畫迅速覆奏等因欽此仰見

聖主研求至計不厭精詳曷任欽佩臣昨於覆奏鄧承脩請派知兵大臣駐紮煙臺摺內曾聲明跨海遠征之舉以整練水師添備戰艦為要戰艦足用統馭得人則日本自服球案亦易結等語今張佩綸請密定東征之策亦謂不必遽伐日本南北洋當簡練水師廣造戰船以厚其勢台灣山東治兵蓄艦以備犄角與臣愚計大致不謀而合惟中國力籌整頓既欲待時而動則朝

鮮與日本所立之約究因毀使館殺日人而起
目前可勿駁正緣朝日昔年立約中國並未與
議彼雖未明認朝鮮為我屬國而天下萬國固
皆知我屬矣似不如專論球案以為歸曲之地
轉覺理直而勢順也至日本國債之繁帑藏之
匱薩長二黨之爭權水陸軍勢之不盛原係實
情但彼自變法以來壹意媚事西人無非欲竊
其緒餘以為自雄之術今年遣參議伊藤博文
赴歐洲攷究民政復遣有棲川親王赴俄又分
遣使聘意大里駐奧斯馬加冠蓋聯翩相望於

道其注意在樹交植黨西人亦樂其傾心親附
每遇中東交涉事件往往意存袒護該國洋債
既多設有危急西人為自保財利起見或且隱
助而護持之然天下事但論理勢今論理則我
直彼曲論勢則我大彼小中國若果精修武備
力圖自強彼西洋各國方有所憚而不敢發而
況在日本所慮者彼若豫知我有東征之計君
臣上下戮力齊心聯絡西人講求軍政廣借洋
債多購船砲與我爭一旦之命究非上策夫未
有謀人之具而先露謀人之形者兵家所忌此

臣前

奏所以有修其實而隱其聲之說也自昔多事之秋凡膺大任籌大計者祇能殫其心力盡人事所當為而成敗利鈍尚難逆睹以諸葛亮之才略而兵頓於關中以韓琦范仲淹之經綸而勢絀於西夏迨我

高宗武功赫濯震懾八荒然忠勤如傅恆岳鍾琪而不能必滅金川智勇如阿桂阿里衮而不能驟服緬甸彼當天下全盛之時

聖明主持於上萃各省之物力挾千萬之鉅餉薦一人

無不用陳一事無不行猶且遷延歲月相機了局者時與地有所限也日本步趨西法雖僅得形似而所有船砲略足與我相敵若必跨海數千里與決勝負制其死命臣未敢謂確有把握第東征之事不可有東征之志不可無中國添練水師實不容一日稍緩

諭旨殷殷以通盤籌畫責臣竊謂此事規模較鉅必合樞臣部臣疆臣同心合謀經營數年方有成效從前勦辦粵捻各匪有封疆之責者以一省之力勦一省之賊

朝廷責成既專一切兵權餉權與用人之權舉以畀
之故能事半功倍今則時勢漸平文法漸密議
論漸繁用人必循資格需餉必請籌撥事事須
樞臣部臣隱為維持况風氣初開必聚天下之
賢才則不可無鼓舞之具局勢過渙必聯各省
之心志則不可無畫一之規儻蒙

聖明毅然裁決則中外諸臣乃有所受成似非微臣一
人所敢定議也張佩綸謂中國措置洋務患在
謀不定而任不專詢像確論治軍造船之說既
已詢謀僉同惟是購器專視乎財力練兵莫急

乎餉源昔年戶部指撥南北洋海防經費每歲共四百萬兩設令各省關措解無缺則七八年來水師早已練成鐵艦尚可多購無如指撥之時非盡有著之款各省釐金入不敷解均形竭蹶閩粵等省復將釐金截留雖經臣迭次

奏請嚴催統計各省關所解南北洋經費約僅及原撥四分之一歲款不敷豈能購備大宗船械今欲將此事切實籌辦可否請

旨敕下總理衙門戶部將南北洋每年所收防費核計實數並閩省所留台防經費由南洋劃抵外

再撥的實之歲款務足原撥四百萬兩之數如此則五年之後南北洋水師兩枝當可有成至台灣為日本要衝山東為遼海門戶兩省疆吏誠不可無熟悉兵事者妥為區畫與相犄角此又在

朝廷之發縱指示矣臣前

奏懾服鄰邦緩急機宜一疏業已詳陳梗概所有自強要圖宜先練水師再圖東征緣由遵

旨迅速妥籌恭摺由驛密陳是否有當伏乞

皇太后

皇上聖鑒訓示謹

奏

議覆張佩綸條陳六事摺十月初五日
奏為欽奉

寄諭悉心妥議恭摺覆陳仰祈

聖鑒事竊臣承准軍機大臣字寄九月十九日奉

上諭張佩綸奏星象主兵請講武以靖藩服一摺據
稱朝鮮亂作於內敵逼於外吳長慶一軍暫留鎮
撫殆權宜之策非經久之圖條陳六事請飭籌辦
等語朝鮮密邇陪都實為東北屏蔽該國情形積
弱現在變亂甫平鄰邦窺伺自應力為護持以昭
字小之義兼為固圉之謀第其間籌辦機宜措置

必須審慎張佩綸所陳理商政預兵權救倭約購
師船奉天增兵永興籌備各條著李鴻章悉心酌
度妥議具奏等因欽此仰見

聖慮周詳集思廣益至意欽悚莫名伏查朝鮮積弱
不振強宗煽亂經我

國家視同內服命將出師擒其首惡李是應安置
保定羣情震懾於是天下萬國皆知朝鮮為我
屬邦大義益明又有吳長慶一軍暫留鎮撫數
月以來水陸將領及朝鮮陪臣自該國來津者
臣詳加諮訪僉稱朝野晏然人心大定日本留

護使館之隊為數無幾亦與民相安該國王力
圖振作臣遵

旨籌商善後各務漸有端緒張佩綸所陳六事有已
經辦定者有欲籌而未及辦者謹悉心酌度分
條覆陳如左

一理商政

原奏當

簡派大員為朝鮮通商大臣理其外交之政而國治
之得失國勢之安傾亦得隨時奏聞豫謀措置
等語查光緒六年十一月駐日使臣何如璋致

書總理衙門內有主持朝鮮外交議一篇以中國能於朝鮮設駐紮辦事大臣凡內地政治外國條約皆由其主持為上策又稱時方多事鞭長莫及此策未能遽行其次則請遣員前往朝鮮代為主持結約當經總理衙門函商於臣臣謂此事若密為維持保護尚覺進退綽如儻然代謀在朝鮮未必盡聽吾言而各國或將惟我是問他日勢成騎虎深恐彈丸未易脫手原係審時度勢之論該衙門曾於七年正月請旨派臣勸諭朝鮮與西國通商摺內聲明在案本年

春間臣與美國使臣商辦朝鮮約稿奏派道員
馬建忠提督丁汝昌前往襄助令朝鮮另具照
會聲明該國為中華屬國顯寓主持調護之義
嗣英德踵往議約朝鮮國王即屬馬建忠轉稟
臣處選派熟悉商務公法之員幫同辦理交涉
事件該國內亂平後復遣陪臣趙甯夏等來議
善後亦諄諄以此相屬臣慮其君臣不諳外交
或致措注失宜允俟國王咨到酌辦頃趙甯夏
航海復來接有朝鮮國王咨文一件謹照鈔恭
呈

御覽其云代聘賢明練達之士蓋欲臣薦員往助仍
隱由該國王調度權可自彼操也若如張佩綸
所陳

簡派大員為朝鮮通商大臣理其外交並預其內政
職似監國向來

勅使有一定體制通商大臣當與該國王平行辦事
分際既難妥洽以後各國與朝鮮交涉事件必
惟中國是問竊恐

朝廷與總署不勝其煩矣惟是泰西通例凡屬國
政治不得自主故與人結約多由其統轄之國

主政即半主之國可自立約亦只能議辦通商而修好無與焉今朝鮮與日本立約已越七年當時約款竟認朝鮮為自主之國在朝鮮昧於公例豈足深責而咨報禮部轉奏並未一加駁斥本年美英德三國訂約始申明中國屬邦字樣日本方嘖有煩言各國尚不免疑議將來換約時恐有饒舌黨

欽派大臣駐紮該國理其外交之政必將日本及美英各約畫一辦理殊非易事若不畫一亦非政體此目前之難也朝鮮為東三省屏蔽朝鮮危

亡則中國之勢更急乘此無事派大臣往駐以主持通商為名藉與該國政府會商整理一切保朝鮮即以固吾圉亦與泰西屬國之例相符第其國內政治中朝向不過問一旦陰掣其權而風土異宜人才荏弱措施張弛未必盡如我意若其陽奉陰違或被他人挑唆生隙

朝廷又將何以處之此日後之難也臣反覆籌維未敢遽決此策應請

勅下軍機大臣會同總理衙門通盤籌畫定議覆奏至張佩綸請薦曾充專使熟悉洋情者以充其

選何如璋上年曾發此議若派專使宜無如該員之熟悉情形矣

一預兵權

原奏亂黨殺大臣並殺倭人嗣後當由中國選派教習代購洋鎗為之簡練犄角等語查趙甯夏等八月初面呈該國王請示善後六條內有整軍制一條即求中國為之設法經臣鈔送總理衙門在案嗣趙甯夏等商懇延請教師借給洋鎗炸礮又經臣轉飭吳長慶揀派精熟洋操員弁就近教練並籌撥銅炸礮十尊英來福兵

鎗一千桿配齊藥彈分批解送吳長慶轉交該國王驗收應用業於九月二十九日附片奏明在案與張佩綸所擬辦法正同

一救倭約

原奏倭約莫貪於索費尤莫狡於駐兵聞告貸北洋安知非借中帑以款東兵應無庸籌借倭兵屯劄王城尤多隱患應由吳長慶密謀箝制等語查前據趙甯夏等面稱國無一月之儲欲借債以救急五月間馬建忠往朝鮮為英德議約即稟聞該國財用窘乏日本有借銀五十萬

之說該君臣恐受挾制未允嗣花房義質又有
代籌開礦扣還償款之議亦力持不可轉瞬設
關僱員及一切創舉經費實無所措該國急而
求我自係萬不得已臣仰體

皇上字小之仁未便推諉致受日人籠絡轉生疑貳
因勸諭招商局員唐廷樞於華商湊股籌借銀
五十萬兩議明所息八釐分年由該國關稅礦
利攤還當經據稟分咨總理衙門禮部在案各
國借債本係常事即中國亦屢向洋商認利借
銀臣既為朝鮮籌議善後勸令華商借銀並非

出自官帑似亦情理所宜况隱杜該國轉求日本之漸唐廷樞與趙甯夏等已會訂合同章程斷無失信中止之理今張佩綸疑為借中帑以款東兵殊屬誤會臣前詢趙甯夏等日本償款該國另有指項茲復與筆談詰問據稱該國向有贈給釜山日本人之費近因通商停給算得一年日本館所贈給者可抵分年償款日後商局借項用於何處仍隨時報查所言尚切實可信謹將十月初二日筆談節略照鈔呈

覽至倭約索費五十萬元原訂五年分繳適朝鮮派

使赴日本臣即電商出使大臣黎庶昌勸令朝
使向日本外務省商減兵費旋據黎庶昌九月
十六電報日本不允減款只改為十年分繳是
每年僅繳五萬元朝鮮雖貧瘠尚不至為難此
即所以救倭約之索費也倭兵進劄王城原約
一年為期吳長慶既平內亂本可剋期撤回臣
因倭兵未撤遵

旨飭吳長慶督軍暫駐實密謀箝制之法現倭兵駐
王城僅二百餘人決不至有他患擬俟明年春
間再令吳長慶撤回三營仍留三營俾資翼衛

俟倭兵一年期滿撤盡慶軍乃酌量抽撤此即所以救倭約之駐兵也

一購師船

原奏陸軍護王都不如水軍護海口應

飭部臣迅撥巨款先造快船兩三艘由北洋選派將領駐守仁川較為活著等語洵為至當不易之論臣於本年八月覆奏添練水師摺內聲明海防經費各省籌解僅及四分之一請

飭戶部總理衙門再撥的款務足原撥四百萬之數尚未知部臣如何籌議今擬巡護朝鮮即以固

我門戶必須先造快船二隻查總稅務司赫德送呈英廠新式大快船圖說每隻約價銀六十五萬兩李鳳苞在德國訪查新式價值不相上下昨函詢船政大臣黎兆棠據稱該廠仿造快船每隻連礮位約需銀四十萬兩雖不及英德各式之精利迅速而工料價值較減擬請

勅下黎兆棠趕籌定造快船二艘刻期竣工專備北洋派防朝鮮之用並懇

飭部於海防經費外迅撥有著之款八十萬兩限一年內分批解交如解不足數准臣檄飭江海關

道由現存出使經費項下挪撥隨時咨明戶部
總理衙門知照

一防奉天

原奏朝鮮日益多事遼防亦宜豫籌請

飭盛京將軍抽練旗丁歸宋慶統之與所部常滿萬人以備緩急等語自唐迄明有事朝鮮皆由遼瀋進兵從無海道濟師之事緣中國自古舟師笨滯越國爭戰鮮獲利者今日東西洋輪船盛興一日千里而朝鮮形勢三面濱海更於水師為宜輪船由煙台至朝鮮漢江口一日夜可到

由津沽亦不過三日若由遼瀋陸路至朝鮮王
城須二十餘日往來不及事故欲防護朝鮮
必以添練兵船為要此時勢之宜變通者然遼
防為根本至計朝鮮後路抽練旗丁自屬要圖
應請

勅盛京將軍選將簡器認真操練貴精而不貴多宋
慶所部現調赴金州旅順口設防與兵船相依
護距瀋已遠未便兼統旗營應由該將軍另選
明幹樸勤之員庶收實效

一爭永興

原奏朝鮮之永興灣嚴寒不冰俄人欲得其地
駐船應會同吳大澂妥籌力爭要害等語查朝
鮮東北之永興灣形勢險固可作船塢西人嘗
豔稱之上年中俄議約俄人調集兵艦駐海復
歲英德各國皆疑俄欲攻奪永興而駐津俄國
領事今升署公使之韋貝每向臣密言俄廷絕
無此意本年英美德與朝鮮議約俄使先向總
理衙門探詢朝鮮與俄定界通商經朝鮮辨阻
迄今尚未再議似其本志非即欲進據永興者
永興近接元山通商口岸將來各國貿易互通

俄人亦難獨圖佔奪至該處距吳大澂駐兵之甯古塔三姓琿春等處千餘里而遙中隔俄境水陸異宜山川間阻吳大澂兵力餉力斷難兼營似只可從緩籌議俟朝鮮整頓軍制力能自顧北洋鐵艦快船購練齊備再隨時酌撥分往梭巡以壯聲援

以上六事皆臣近日籌畫所及但辦理自有次第理合據實由驛具陳是否有當伏乞

皇太后

皇上聖鑒訓示謹

奏

代朝鮮聘西士片

再朝鮮陪臣趙甯夏等八月初面呈該國王請
示善後六條內有擴商務一條云舉國上下全
昧商務關係之何如現今築埠頭建稅關月期
已屆而事變後措辦無方當雇請其人而司其
權然後可不失自主等語頃趙甯夏復賫該國
王咨文來津內稱各國換約在前一切交涉商
辦事件茫然不知下手煩請酌量小邦應行時
宜代聘賢明練達之士東來隨事指導臣已於
正摺內陳明巔末並鈔咨呈

覽在案查該國與日本定約通商七年尚未設關徵
稅將來美德英各國踵來換約交涉機宜必須
得人導助查有前駐津德國領事穆麟德和平
忠實曾在中國海關襄事五年諳練稽徵事宜
熟悉漢文漢語因與該國使臣巴蘭德不合辭
官就幕屢求津海關道周馥等願為朝鮮効用
趙甯夏等來津日久頗相投契茲擬為朝鮮代
聘前往襄助關務由趙甯夏與之妥立合同自
當恪遵該國節制不至掣肘惟須有華員伴往
聯絡商辦查有候選中書馬建常係道員馬建

忠之胞兄向曾游學歐洲諳習公法洋情明練
耿直前經出使日本大臣黎庶昌調充理事適
暫假來津臣因馬建忠為朝鮮君臣所信服亦
薦令同趙甯夏前往隨事襄籌妥辦可資得力
除由臣咨覆朝鮮國王並分咨總理衙門出使
日本大臣知照外理合附片具陳伏乞

聖鑒謹

奏

謹將朝鮮國王來咨照鈔恭呈

御覽

朝鮮國王為咨會事照得小邦締修外交救定
內難實賴我

中朝綏靖至恩暨貴大臣經畫遠謨前後襄辦靡不
用極欽頌銜結舉國同情竊小邦向不諳外務
而各國換約在前一切交涉商辦事件茫然不
知下手煩請貴大臣酌量小邦應行時宜代聘
賢明練達之士迨茲東來隨事指導俾得藉手
曠迷克徼終始之惠千萬幸甚為此合行移咨

請煩照驗施行須至咨者

光緒八年九月初二日到發

奏明答覆朝王三事摺 十月初十日

奏為接准朝鮮國王咨文三道酌量答覆恭摺仰

祈

聖鑒事竊十月初八日朝鮮派來陪臣副護軍李載
德金夷準等賫呈該國王來咨派往保定省問
李是應並懇轉奏乞

恩釋還等情 臣飭李載德等馳赴保定並咨署督臣
張樹聲飭屬妥為照料准其省問至所懇轉奏
天陛亟降許還之澤顯與迭奉

諭旨不符 臣面屬李載德等嗣後該國王務慎遵前

旨毋庸再行瀆請並於咨覆文內聲明未敢冒昧代
奏以絕覬覦臣又密詢另起陪臣趙甯夏金允植
等僉謂該國王私情不能不代李是應乞

恩而其國中臣民則頗懼李是應釋還轉生內患也
又同日領選使吏曹叅判金允植賈呈該國王
咨文二件一因前派生徒在天津機器製造各
局學習先後邁病東還所餘無幾請准撤回另
購小器設局國中自行製造臣查該學徒遠役
思歸若強令久留不能專心更少進益應聽其
便將來代購小機器酌派工匠往該國教導業

飭金允植隨時與局員妥商稟辦一係報明吳長慶派員教習該國兵隊已兩起挑選一千人臣分別酌量咨覆並勸令該國王及時簡器練軍以圖自強仰副

朝廷綏靖藩服至意謹抄錄朝鮮國王咨文並臣咨覆文各三道恭呈

御覽除分咨總理衙門禮部知照外理合繕摺具陳
伏乞

皇太后

皇上聖鑒謹

奏

謹照抄朝鮮國王來咨並臣咨覆文各三道恭
呈

御覽

朝鮮國王來咨

為咨請事項馳專价憑情陳暴冀蒙本生父

賜還之音瞻望

皇慈日夕泣祝即於使回伏奉

旨諭日月遺照霜雪暴嚴隕越於下益自震灼顧念
本生父七耄衰邁素抱癘疾天時漸寒風土殊
宜萬里孤寄有誰救恤焦迫鬱轉靡遑寢食擬

申具情實鳴恭冀幸而悚迫

嚴威不敢徑情茲遣陪臣副護軍李載德前往保定
府省問起居先此咨懇伏乞中堂大人曲諒至
情轉

奏

天陛特推孝治之政

亟降許還之澤俾此骨肉聚保永戴

恩造不勝血懇之至為此合行移咨請照驗轉

奏施行須至咨者

光緒八年九月二十七日發十月初八日到

覆朝鮮國王咨文

為咨覆事陪臣副護軍李載德等賫到貴國王
咨稱使回伏奉

旨諭益自震灼顧念本生父七耄衰邁素抱癘疾天
時漸寒風土殊宜萬里孤寄有誰救恤擬申具
情實鳴暴莫幸而怵迫

嚴威不敢徑情茲遣李載德前往保定府省問起居
先此咨懇轉奏

天陛亟降許還之澤俾骨肉聚保等因准此查光緒
八年八月十二十六等日迭奉

上諭特沛恩施姑從寬減李是應著免其治罪安置
直隸保定府永遠不准回國仍著直隸總督優給
廩餼准其歲時派員省問以慰該國王思慕之情
嗣後不得再行瀆請等因欽此仰見

大皇帝酌法準情仁至義盡薄海臣民莫不同聲欽
頌本署大臣會同署直隸總督部堂張遵即派
員將李是應送往保定省城舊清河道署中妥
為安置按日優給廩餼煤米薪菜等項兩月已
來據報李是應在彼起居順適供給無缺雖年
已六十有三精神強健無甚疾病尚屬調護得

宜亦可稍慰貴國王之孝思而曲示體恤矣昨
准禮部咨李應浚賫到咨文轉奏一摺十月初
三日奉

上諭著傳知該國王仍遵前奉諭旨恪守藩封務以
宗社為重嗣後毋得再行陳請等因欽此業由禮
部轉行貴國王欽遵在案茲准前因當飭令李
載德金奭準等馳往保定府省問此原係遵
旨辦理之事至所懇轉奏

天陛亟降許還之澤顯與迭奉毋得再行瀆請之
諭旨不符本署大臣實未敢冒昧代表奏貴國王當念

保守宗社振興國事為重不得復顧一己之私情致礙大局也為此合行咨復貴國王查照須至咨者

朝鮮國王來咨

為咨會事照得本年七月初二日領選使吏曹參判金允植奉署理北洋大臣張札飭隨軍東還緣彼時小邦有亂軍之變該陪臣倉猝回國生徒學習等事均屬未清現蒙

天朝洪恩亂逆斯平該陪臣理應再赴天津照料學徒習業竊查學徒等自春以來不服水土遘病

東還者前後相踵現今所餘無幾繼自聞變以後各念室家用志不專難望成效似宜從近撤還另購小器設局於國中使之溫理舊業為製造之基茲復遣領選使金允植稟商一切事宜撤還學徒煩請貴大臣將此事由轉

奏

天陸特賜

允準不勝幸甚為此合行移咨請照驗轉奏施行須至咨者

光緒八年九月二十七日發十月初八日到

覆朝鮮國王咨文

為咨覆事准貴國王咨稱領選使吏曹叅判金允植回國後學徒等不服水土遘病東還者相踵現所餘無幾聞變以後各念家室用志不專難望成效似宜撤還另購小器設局國中溫理舊業為製造之基煩請轉奏

天陸特賜

允準等因准此查光緒七年十一月間金允植率領員匠生徒等來津學習製器業經本大臣奏明飭赴機器製造兩局查照議定章程認真教導

該學徒自春徂秋多因不服水土遘病東歸現
已所餘無幾擬准金允植全數帶回以示體恤
惟貴國戎備之疏由於器械不利工技無學必
須另購小機器設局國中遴派妥員嚴勤督率
講求製造庶軍中所用洋鎗炸礮等利器可隨
時修整添備以期進益本署大臣已飭天津機
器製造局潘道王道等與金允植妥商隨宜代
為購辦庶盡友誼除恭摺據情代

奏並分咨

欽命總理各國事務衙門外為此合行咨覆貴國王
禮

查照辦理須至咨者

朝鮮國王來咨

為咨會事照得敝邦向來僻居無事戎備積弛
現與各國相通港口多事講究陰雨不容少緩
茲值大兵來駐師受有資已飭所司選集民丁
咨請吳軍門派員教習往本年九月二十三日
吳軍門回咨據稱派慶字軍營務處袁世凱挑
選一營五百人名為新建親軍督同王總兵得
功認真訓練並續派朱提督先民督同何總兵
增珠添選一營五百人以便訓練等因現方課

日督習從此敝邦軍制庶有日新之效實賴貴
大臣仰體

皇慈塵念藩服之至意實深感佩茲將選兵訓練事
由先行咨送請貴大臣查照須至咨者

光緒八年九月二十七日發十月初八日到

覆朝鮮國王咨文

為咨覆事准貴國王咨稱大兵來駐師受有資
已飭所司選集民丁咨請吳軍門派員教習先
後挑選一千人認真訓練現方課日督習敝邦
軍制庶有日新之效等因准此具見貴國王洞

悉時艱講求戎備以為自強之計欣佩莫名吳
軍門久經大敵謀勇兼裕所部將弁多熟諳鎗
礮操法戰守得力之員茲既遠派督操必能盡
心代謀本署大臣仰體

聖朝塵念藩服至意甚盼貴國軍政日有起色及時
整頓保邦禦侮之道胥基諸此為此合行咨覆
貴國王查照須至咨者

查覆馬建忠參案摺

臣李鴻章
臣張樹聲跪

奏為遵

旨確切查明據實覆陳仰祈

聖鑒事竊臣等承准軍機大臣字寄九月十九日奉
上諭有人奏日本與朝鮮定約如兵費五十萬元及
兵駐王城兩條所關甚大聞道員馬建忠實主其
事且言賠償兵費朝鮮無資可由中國商局代借
又恐李鴻章等察出乃屬朝鮮使臣彌縫其失筆
談中謂此約非建忠主謀正其欲蓋彌彰吳長慶
亦歸罪該道謂其擅預倭約任性妄為等語此次

朝鮮與日本定約究竟馬建忠曾否預聞其事著
李鴻章張樹聲確切訪查據實覆奏毋稍徇隱原
片著抄給閱看等因欽此伏讀原片稱中國方計
擒李是應並誅亂黨何以兵在其郊於該國定
約大事轉不預聞該國君臣當是應見擒倉皇
失措之際又何以能從容遣使秘密定盟絕不
關白我軍皆非情理所有等語查朝鮮內亂初
起中國派兵援護臣樹聲於六月二十九日接
出使日本大臣黎庶昌電報該外部來文言朝
鮮立約待以自主須據約照辦使館國各自護

如派兵護持恐滋葛藤即經函達總理衙門旋
在七月初一日覆函云日既不願中國代護使
館我軍即專為朝鮮定亂又彼既不願中國為
之保護則逐使一節先可置之不問惟中國為
屬邦定亂自非彼應與聞等語當經抄致吳長
慶馬建忠等遵照妥辦是日日本與朝鮮如何議
約彼既認朝鮮為自主中國本難過問即使與
聞其事日本必不遵允皆在情理之中無足怪
者又原片稱馬建忠聽兩國私款竊和事先絕
無聞見事後復不爭持形同聾瞽等語查七月

十四日倭約未議之先朝鮮國王派戶曹尚書
金炳始副官金宏集兩次赴馬建忠處訪問日
本所索七條該道筆談業將約款分別可許不
可許明晰相告內如兵費與卹銀統算不可過
十萬元又京內屯置大隊萬不可許若該使為
保身之計隨帶弁兵在館亦不宜列入款內經
臣等據其節略抄送總理衙門在案是事先非
絕無聞見但金宏集等為勢所逼未能照馬建
忠所言固無如何至彼既以全權畫押定議而
歸事後更無從爭持矣又原片稱朝鮮之約馬

建忠不但預其謀並且主其事其始謂當由中國償費謝罪繼謂賠償兵費乃中外交涉正辦朝鮮無資可由商局代借等語查七月初三日我軍未到之先馬建忠在仁川與日本領事竹添進一議及此事曾歷舉中國滇案及西國故事雖有兵事亦多不認兵費此件筆談經臣樹聲錄送總理衙門在案迨金炳始等十四日詢商馬建忠初以兵費不可償旋因金宏集固請則謂與卹銀統算不過十萬元足矣尚屬相時立論至十六日金宏集在仁川自與花房義質

定議後致書馬建忠有賠款太濫不免為辱命
之歸慚憤欲死等語又經臣鴻章抄送總理衙
門在案此可為馬建忠並未預其謀主其事之
鐵據茲檢出七月十六日亥刻金宏集手書原
稿咨送軍機處備核至朝鮮借招商局之款另
作別用臣鴻章已於十月初五日覆陳朝鮮六
事摺內詳確陳明矣又原片稱該道屬朝鮮使
臣彌縫其失筆談中謂此約並非建忠主謀正
其欲蓋彌彰等語查七月二十六日臣等傳見
朝鮮大臣趙甯夏金宏集詰責賠款之濫金宏

集俯首謝罪並稱馬道在京相距近百里難以
從中排解原係實情何須轉屬朝鮮代為彌縫
也又原片稱吳長慶到津亦歸罪該道擅預倭
約任性妄為等語查吳長慶八月間來津商籌
軍事臣等迭次面詢當日情形實無歸咎馬建
忠擅預倭約之說茲奉

寄諭因情節重大特再專輪往朝鮮函牘密詢吳長
慶令其據實登覆頃據吳長慶咨呈該軍於七
月十三日進紮王城與馬建忠商擒李昱應十
五夜圍剿枉尋里利泰院十六日邀同馬建忠

訊辦所獲亂黨其時日兵退至仁川相隔八十餘里何得有干預情事花房所索五十萬元係朝鮮全權大臣等受其恫喝已允在先未便因我軍定亂代翻前議致生事端十九日馬建忠起程回津論及賠款太多曾貽書花房勸其自行裁減是其未預斯約顯然易見茲復邀金宏集來營再三細訊據稱當日實因倭使恫喝倉猝徑許馬建忠事後始得聞知毫無干預各等語是吳長慶並無歸罪馬建忠之處確有明證矣又原片稱前明關白封貢之役因沈惟敬詭

詐百端致起倭人悖慢馬建忠為天主教民與
沈惟敬同一市井無藉恐蹈覆轍等語查明萬
厯間沈惟敬給倭以致敗軍債事今馬建忠因
未奉有預議倭約明文只能從旁勸朝鮮誠倭
人以減賠款力所不及心固可原絕非沈惟敬
詭詐債事可比至該道幼習儒書屢試不售嗣
游學泰西兼習法文本非教民亦非市井本年
美英德各國與朝鮮議約實賴其前往贊助聲
明中國屬邦字樣俾大義復昭於天壤此次擒
致李是應並籌辦善後事宜機敏異常才能應

變即西人亦敬重之夫洋務人才難得論人者
不免苛求用人者當知護惜臣等何敢空言誣
罔致令任事者裹足寒心哉所有確切訪查各
緣由謹合詞繕摺據實覆陳伏乞

皇太后

皇上聖鑒謹

奏

商局接辦電線摺十一月十六日

奏為津滬電報辦有成效擬請招商接辦由滬至
浙閩粵各省沿海陸線以杜外人狡謀而收中
國自有之權利恭摺仰祈

聖鑒事竊臣於光緒六年八月奏請由天津陸路循
運河至鎮江上海設立陸線電報籌款墊辦俟
辦成後擇公正商董招股集貲接辦並設電報
學堂教習生徒自行經理是年八月十四日奉
上諭現在籌辦防務南北洋必須消息靈通以期無
誤事機該大臣請於陸路由天津至江北鎮江達

上海安置電線係為因時制宜起見即著妥速籌辦並著江蘇山東各督撫飭令地方官一體照料保護勿任損壞餘均照所議辦理等因欽此仰見朝廷主持要政裨益軍謀之至意欽服莫名當經督飭前津海關道鄭藻如候補道盛宣懷劉含芳等妥議章程與丹國大北電報公司商立合同代為購料僱人查勘設線道路以資熟手指導自七年五月初興工至十月底工竣南北中外消息瞬息可通仍照奏案招商集股自八年三月初起歸商接辦由官督查臣仍籌貼每年沿

途弁兵巡費一萬一千兩以示體恤五年後如
電資有餘再行截止夏間朝鮮內變急調南北
水陸各營實賴電報靈捷其赴機之速為從來
所未有即總理衙門與 臣等密商出洋各使臣
及南省要務莫不旋至立應成效已灼然共見
矣十月間英法美德各使請在上海設立萬國
電報公司擬添由滬至香港各口海線英國署
使臣格維訥並援同治九年總理衙門已允成
案請由英商添設自上海至甯波温州福州厦
門汕頭各口海線其勢幾難禁遏 臣與總理衙

門往返函商惟有歡集華商先行接辦由滬至
粵沿海各口陸線以杜外人覬覦之漸而保中
國自主之權使彼族無利可圖或者徘徊中止
且沿海各省與京外籌商軍國要事調兵催餉
均得一氣靈通於洋務海防實有裨助而商民
之轉輸貿易者亦藉電報速達利益更廣因飭
津滬電報局委員盛宣懷等傳集衆商妥晰會
議項據盛宣懷會同商董候選道鄭官應候選
主事經元善國子監學正銜謝家福副將王榮
和等聯銜馳稟擬請自蘇州浙江福建通商各

海口以達廣東與現在粵省所辦陸線相接計將六千里照津滬陸線成本工費核算約需銀四十餘萬兩沿途分設局棧常年用費亦倍於津滬現有大北公司海線直達香港或將來英商再添水線勢必互相跌價傾擠籌辦實屬不易惟欲收我中國自有之權利必當竭力籌維勸集鉅資次第開辦以盡報效之忱公議章程十條呈請察核並請援案奏明請

旨勅下蘇浙閩粵各督撫轉行經過地方官一體照料保護等情前來臣查核所議章程尚屬周妥

謹照抄恭呈

御覽當此外人窺伺之際必須激厲華商羣策羣力
共圖抵制雖浙閩粵各省道里較遠民情不一
而同治十三年沈葆楨奏請在閩境興辦電線
速通軍報業奉

旨准因循未就署兩廣督臣曾國荃等現因英商議設
水線至省飭粵商興造陸線以拒敵謀業有成
局可知風氣漸開南中官民皆知電報為有益
軍國商旅之事况自津達滬二千數百里陸線
成後沿途毫無擾累各省必有風聞擬請

勅下江蘇浙江福建廣東各督撫 臣轉飭經過各地
方官妥為勸諭隨事照料保護勿使稍有阻撓
損壞以期事在必成庶免華商裹足外人貽笑
而各國添設海線之謀當漸消阻實與交涉大
局有裨除抄錄章程分咨總理衙門南洋大臣
及各督撫查照外所有援案招集華商接辦沿
海陸線緣由是否有當伏乞

皇太后

皇上聖鑒訓示謹

奏

朝鮮會勘邊界摺十一月初八日

奏為朝鮮國王咨請派員會勘邊界事宜恭摺具

陳請

旨飭遵事竊臣前欽遵

諭旨督同津海關道周馥等與朝鮮陪臣魚允中等
會議朝鮮水陸通商章程內第五款聲明鴨綠
江對岸柵門與義州二處又圖們江對岸琿春
與會甯二處聽邊民隨時往來交易仍於開市
處設立關卡稽查匪類徵收稅課從前館宇餽
廩芻糧迎送等費悉予罷除至邊民錢財罪犯

等案由地方官按照定律辦理一切詳細章程
應俟北洋大臣與朝鮮國王派員至該處踏勘
會商稟請奏定等因經臣奏交總理各國事務
衙門會同禮部議覆具奏奉

旨依議欽此轉行知照在案旋據魚允中面稟擬告
於本邦明春往鴨綠圖們二江一帶察看情形
會同該地方官勘商酌行再到津稟定等語即
經臣分咨

盛京吉林將軍奉天府尹暨太僕寺卿吳大澂等
各先行就近派員會同朝鮮官體察情形勘商

妥議再訂詳細章程原因邊民互市雖經奏准
變通而歷來法制禁令有須互相參酌之處非
其本省派員勘商恐難操縱合宜昨奉十一月
十四日

寄諭崇綺松林奏朝鮮貿易宜嚴定限制嗣後有關
奉省事宜與該國王如何會商應咨照將軍府尹
公同斟酌再行定議飭即妥議會奏等因欽此正
與臣處所籌辦法大略相同其摺片內條陳各
節業經臣欽遵分別妥議准駁咨請總理衙門
禮部會核覆奏矣現據朝鮮國王咨稱擬派副

護軍魚允中於明年二月初旬前往義州四月
下旬轉往會甯慶源等處踏勘商定望垣飭派
官員屆期會勘以便酌行等語謹照抄該國王
來咨一件恭呈

御覽竊維奉吉地方交涉情形及

列朝法制禁令隔省人員人地生疏恐其未能洞悉此
次與朝鮮定章變通互市實為體恤屬藩禁革
積弊起見而嚴杜侵越豫防後患之處亦當熟
慮深籌自應由該將軍府尹大臣等揀派廉正
明練大員屆期會同朝鮮陪臣魚允中踏勘妥

商各就地方情形擬議詳細章程稟由該將軍
府尹大臣公同斟酌咨商臣處詳慎覆核定議
再行具奏請

旨遵辦合無仰懇

飭下

盛京吉林將軍奉天府尹督辦甯古塔等處事宜
大僕寺卿吳大澂查照妥辦除由臣分咨知照
並咨覆朝鮮國王外理合繕摺由驛具陳伏乞

皇太后

皇上聖鑒訓示謹

奏

子

妥議朝鮮通商章程摺

奏為遵

旨妥議朝鮮水陸通商章程以維藩服而擴利權恭摺仰祈

聖鑒事竊臣前接署北洋大臣張樹聲函稱承准軍機大臣字寄四月二十九日奉

上諭禮部奏接准朝鮮國王咨文請飭會議一摺據稱該國請於已開口岸互相關一切均有定制惟商民貨物不在藩封典禮所關一切均有定制惟商民貨物不在各處私相交易現在各國既已通商自應量予

變通准其一體互相貿易應如何詳定章程之處
著張樹聲函商李鴻章妥議具奏此後該國貿易
事宜應由總理各國事務衙門覈辦其朝貢陳奏
等事仍照向例由禮部辦理等因欽此仰見

聖謨廣遠因時制宜曷任欽佩查朝鮮國王前遣問
議官魚允中李祖淵等於四月初一日賫文到
津所請與咨禮部大略相同維時臣將起程回
籍未及轉

奏旋經禮部奏蒙

俞旨該問議官魚允中等由京赴津聽候覈辦適值

朝鮮有事前署北洋大臣張樹聲以派軍赴援
檄令隨營照料事竣復與朝鮮全權大臣趙甯
夏副官金宏集等偕來商辦善後事宜竊惟富
強之要以整頓商務為一大端朝鮮僻在東隅
貧弱已久臣等前為代籌與英美德各國陸續
議約開埠通商無非欲使日臻富盛隱以備俄
而抗日導其風氣即所以鞏我藩籬惟中國地
大物博與朝鮮尤為密邇華貨之可銷於朝鮮
者固屬不少即該國參布皮紙亦為華人日用
所需若仍拘守舊章不開海禁則兩國物產有

無不能相通徒使東西洋商船獲倍收轉運之
利殊屬非計至內地漁船往往在朝鮮元山鎮
等處違禁逞兇臣於光緒六年七月在直督任
內曾奉

寄諭飭沿海州縣編查嚴禁本年正月又有漁船數
百隻前往騷擾情事推原甚故蓋由山東漁戶
因海濱之魚為輪船驚至對岸每年私至朝鮮
黃海道大小青島捕魚者以千計既為小民衣
食所資雖設為厲禁而勢難盡行似不如稍寬
其禁由地方官查察收稅轉可束之於法令之

中從前兩國邊民如越界漁獵伐木挖礦之案層見疊出雖從嚴懲辦而未能禁絕此舊法之宜稍變通者也又如朝鮮之咸鏡道會甯慶源等處由吉林甯古塔庫爾喀人等每年委員前往市易人馬芻糧供億煩費彼國官吏辦理不善民不堪命逃入俄境殆將萬人去冬魚允中力陳其弊請罷斯例以便彼國招還流民且豫防俄人陸路通商之新臣嘗以此事函詢督辦甯古塔等處防務吳大澂據覆稱互市所換貨物以耕牛為大宗而朝鮮牛種不如吉林本地

所產此外亦非必不可少之貨如停互市似於
吉林地方毫無所損或近邊百里內准民間自
相貿易在外藩可省浮費而商貨仍得通行等
語自係經久無弊之法又奉天鳳凰城等處每
年春秋往朝鮮義州市易流弊亦多茲既擬開
海禁則此兩路互市自應另訂妥章此又舊法
之宜稍變通者也臣比已督飭津海關道周馥
候選道馬建忠與趙甯夏魚允中等再四酌議
擬定中國朝鮮商民水陸貿易章程八條旋據
魚允中開送節略有欲修改句語經臣詳加斟

酌略為改易章程之首聲明此次所訂係中國
優待屬邦之意不在各與國一體均霑之列藉
此正名定分明與兩國互訂之約章不同俾他
國不得援以為例第一條由北洋大臣札派商
務委員前往駐紮朝鮮亦派大員駐津照料商
務自與尋常

勅使貢使有別第二條朝鮮商民在中國各口財產
罪犯等案悉由地方官審斷仍遵會典舊制與
各國約章辦法稍異第三條朝鮮平安黃海道
與山東奉天等省濱海地方聽兩國漁船往來

捕魚不得私以貨物貿易違者船貨入官如有
犯法等事由地方官拏交就近商務委員懲辦
魚稅俟兩年後酌定予以便利東以科條冀化
其前此兇頑之習第四條准兩國商民入內地
採辦土貨仍照納沿途釐稅較與日本相待為
優第五條訂於鴨綠江對岸柵門與義州二處
又圖們江對岸琿春與會甯二處聽邊民往來
交易設卡徵稅從前館宇餼廩芻糧等費悉予
罷除所以體恤藩邦休養民力而商貨更可流
通稅項亦稍裨益第六條申明嚴禁之物紅藥

一項照例准售應酌定稅則第七條派招商局
輪船每月定期往返一次由朝鮮政府協貼船
費若干既省驛道往來之煩費並可昭迅捷而
聯聲息第八條豫計增損之處隨時商辦以上
各端或變通舊章而稍祛積弊或參酌時勢而
務順輿情現已籌商妥洽趙甯夏魚允中等均
翕服無異詞至於典禮攸關之事自未便輕議
更張謹將章程擬稿鈔呈

御覽請

勅下總理各國事務衙門迅速核覆俟奉

旨准後即可頒行欽遵辦理庶與他國互訂條約須
由兩國批准者體制有殊除將津海關道周馥
與魚允中李祖淵問答節略魚允中駁議節略
周馥馬建忠覆魚允中節略鈔送總理衙門備
查外所有擬議朝鮮通商章程以維藩服而擴
利權緣由理合恭摺由驛具陳伏乞

皇太后

皇上聖鑒訓示謹

奏

謹將擬定中國朝鮮商民水陸貿易章程照繕
清單恭呈

御覽

朝鮮久列藩封典禮所關一切均有定制毋庸
更議惟現在各國既由水路通商自宜亟開海
禁令兩國商民一體互相貿易共霑利益其邊
界互市之例亦因時量為變通惟此次所訂水
陸貿易章程係中國優待屬邦之意不在各與
國一體均霑之列茲定各條如左

一嗣後由北洋大臣札派商務委員前往駐紮朝

鮮已開口岸專為照料本國商民該員與朝鮮
官員往來均屬平行優待如禮如遇有重大事
件未便與朝鮮官員擅自定議則詳請北洋大
臣咨照朝鮮國王轉札其政府籌辦朝鮮國王
亦遣派大臣駐紮天津並分派他員至中國已
開口岸充當商務委員該員與道府州縣等地
方官往來亦以平行相待如遇有疑難事件聽
其由駐津大員詳請^北洋大臣定奪兩國商務
委員應用經費均歸自備不得私索供億若此
等官員執意任性辦事不合則由北洋大臣與

朝鮮國王彼此知會立即撤回

一中國商民在朝鮮口岸如自行控告應歸中國
商務委員審斷此外財產罪犯等案如朝鮮人
民為原告中國人民為被告則應由中國商務
委員追拏審斷如中國人民為原告朝鮮人民
為被告則應由朝鮮官員將被告罪犯交出會
同中國商務委員按律審斷至朝鮮商民在中
國已開口岸所有一切財產罪犯等案無論被
告原告為何國人民悉由中國地方官按律審
斷並知照朝鮮委員備案如所斷案件朝鮮人

民未服許由該國商務委員稟請大憲復訊以昭平允凡朝鮮人民在其本國至中國商務委員處或在中國至各地方官處控告中國人民各色衙役人等不得私索絲毫規費違者查出將該管官從嚴懲辦若兩國人民或在本國或在彼此通商口岸有犯本國律禁私逃在彼此地界者各地方官一經彼此商務委員知照即設法拿交就近商務委員押歸本國懲辦惟於途中止可拘禁不得凌虐

一兩國商船聽其駛入彼此通商口岸交易所有

卸載貨物與一切海關納稅則例悉照兩國已
定章程辦理儻在彼此海濱遭風擱淺可隨處
收泊購買食物修理船隻一切經費均歸船主
自備地方官第妥為照料如船隻破壞地方官
當設法救護將船內客商水手人等送交就近
口岸彼此商務委員轉送回國可省前此互相
護送之費若兩國商船於遭風觸損需修外潛
往未開口岸貿易者查拏船貨入官惟朝鮮平
安黃海道與山東奉天等省濱海地方聽兩國
漁船往來捕魚並就岸購買食物甜水不得私

以貨物貿易違者船貨入官其於所在地方有犯法等事即由該地方官拏交就近商務委員

按第二條懲辦至彼此漁船應征魚稅俟遵行

兩年後再行會議酌定

查山東漁戶因海濱之魚為輪船驚至對岸每

年私至朝鮮黃海道大小青島捕魚者歲以千計

一兩國商民前往彼此已開口岸貿易如安分守

法准其租地賃房建屋所有土產與非干例禁

之貨均許交易除進出貨物應納貨稅船鈔悉

照彼此海關通行章程完納外其有欲將土貨

由此口運往彼口者於已納出口稅外仍於進

口時驗單完納出口稅之半朝鮮商民除在北
京例准交易與中國商民往入朝鮮楊花津漢
城開設行棧外不往將各色貨物運入內地坐
肆售賣如兩國商民欲入內地採辦土貨應稟
請彼此商務委員與地方官會銜給予執照填
明採辦處所車馬船隻聽該商自雇仍照納沿
途應完釐稅如有彼此入內地游歷者應稟請
商務委員與地方官會銜給予執照然後前往
其於沿途地方有犯法等事統由地方官押交
就近通商口岸照第二條懲辦途中止可拘禁

不得凌虐

一向來兩國邊界如義州會甯慶源等處例有互市統由官員主持每多窒碍茲定於鴨綠江對岸柵門與義州二處又圖們江對岸琿春與會甯二處聽邊民隨時往來交易兩國第於彼此開市之處設立關卡稽查匪類征收稅課其所征税則無論出入口貨除紅蔘外概行值百抽五從前館宇餼廩芻糧迎送等費悉予罷除至邊民錢財罪犯等案仍由彼此地方官按照定律辦理其一切詳細章程應俟北洋大臣與朝

鮮國王派員至該處踏勘會商稟請

奏定

一兩國商民無論在何處口岸與邊界地方均不准將洋藥土藥與製成軍器販運售賣違者查出分別嚴加處治至紅蔘一項例准朝鮮商民帶入中國地界應納稅則按價值百抽十五其有中國商民將紅蔘私運出朝鮮地界未經政府特允者查出將貨入官

一兩國驛道向由柵門陸路往來所有供億極為煩費現在海禁已開自應就便聽由海道來往

惟朝鮮現無兵商輪船可由朝鮮國王商請北
洋大臣暫派商局輪船每月定期往返一次由
朝鮮政府協貼船費若干此外中國兵船往朝
鮮海濱游奕並駛泊各處港口以資捍衛地方
官所有供應一切豁除至購辦糧物經費均由
兵船自備該兵船自管駕官以下與朝鮮地方
官俱屬平行優禮相待水手上岸由兵船官員
嚴加約束不得稍有騷擾滋事

一此次所定貿易章程姑從簡約兩國官民均須
就已載者一體恪遵以後有須增損之處應隨

時由北洋大臣與朝鮮國王咨商妥善請

旨定奪施行

謹將華商公議接辦蘇浙閩粵陸路電綫章程
十條照繕清單恭呈

御覽

一道里宜先約計也查自江蘇省蘇州府經浙
江之湖州嘉興杭州紹興甯波台州温州等
府福建之福甯福州興化泉州漳州等府廣
東之潮州惠州二府以達廣東省城廣州府
約共五千六百五十里內自温州以達廣州
似可按沿海州縣驛站設線杭嘉湖三府絲
商碼頭必得繞由經過以順商情甯波至温

州沿海山路荒僻應繞道嚴州衢州或繞金華處州俟奉奏准即當請派專員督率洋總管分路查看繪圖計里屆時再請咨行查照一經費宜先酌定也查津滬電線三千里計動支經費十八萬兩現計自蘇至粵道里加倍約須費四十萬兩應設分局分棧恐尚不止加倍經費必須現籌查電局收支款目皆係洋款現擬併連津滬電線通集華商股本英洋八十萬元即以一百元為一股由局刊發股票即執惟招股必宜先儘舊商如舊商無

力再聽新商入股

一巡費宜請津貼也津滬巡線經費每年一萬餘兩係奉批准五年之內由軍餉開支現在浙閩粵三省巡費每年約須湘平銀二萬兩應請奏准由官津貼發局轉給以重巡護而紓商力

一學生宜請添習也津滬電局管報學生皆由天津學堂隨時撥往擬請現有學生趕緊教習外再招諸習英文學生四五十名一體教習約於來年年底即可撥局派用至測量學

生前於出洋學生二十名內挑出八名交洋
總管教習有效應請再選八名發局教習以
備各分局總管報房之選

一查路宜選能員也津滬設綫係分南北兩路
派員會同各省文武地方官按電綫所經之
地計里分段先將巡兵逐段派定並曉諭民
人一體知曉庶設綫到境不致阻礙耽延此
次仍應稟請選派能員分赴各省會同地方
官查照辦理

一監工宜派大員也查津滬設綫南北兩路均

有大員一人監工此次仍應稟請選派大員督率洋匠人等分投辦理並請咨浙閩粵三省各派妥員會同照料以免貽誤

一開工宜資熟手也前次南路工程所調銘軍二百名勤捷過於民夫此次開工擬請仍調從前銘軍熟手二百名赴工由局酌發賞項以收事半功倍之效

一巡守宜立勸懲也查津滬電綫沿途設立巡電房責成緣營汛兵看守各汛弁兵由局各給馬乾口糧另分大段按巡均有專責此次

設線自應援案咨請督飭巡護遇有貽誤損壞由局隨時稟請核辦

一官報宜仍登記也軍機處總理衙門各督撫將軍出使各國大臣來往洋務軍務電報仍照章列作頭等信資另冊存記按年彙報以抵官貼巡費俟扣畢別無應還官項則前項官報毋庸給資以盡報效之忱其代轉洋商公司電報仍給信資轉發不在扣除之列

一材料宜請免稅也電杆應用木料甚多須各就近處採辦應請援案免納稅釐至於電線

軍
電器進口各口擬准隨時咨請關道給發免

照鈔朝鮮國王來咨一件恭呈

御覽

朝鮮國王為咨會事照得敝邦義州會甯慶源等處與

上國邊界人民互市向來統由官員主持諸多窒礙幸賴貴大臣曲軫流來之弊妥籌經久之圖因時制宜酌予變通定於兩國邊界柵門輝春與義州會甯慶源等處聽民隨時往來交易將從前慣例概行豁除列入水陸貿易章程第五款內聲明請

旨定議遵照辦理在案此莫非貴大臣仰體

皇仁永綏藩服至意謹與一國臣庶攢手感頌不任
銜結其詳細章程須派員至該處會商酌行茲
擬派副護軍魚允中於明年二月初旬前往義
州四月下旬轉往會甯甯慶源等處踏勘商定望
煩貴大臣飭派官員屆期會勘以便酌行除定
期派員外相應備文咨明請貴大臣查照酌覆
須至咨者

光緒八年十月十七日發十二月初六日到

照抄朝鮮國王咨文二件恭呈

御覽

朝鮮國王為咨覆事照得本邦於本年春間咨請於已開口岸互相交易一摺時值貴大臣奉諱回籍未及覈辦旋由禮部據分咨

奏蒙

俞允應詳定章程之處著貴衙門妥議至秋間貴大臣勉膺

諭旨復起視務督海關道台與問議官魚允中等酌商擬定兩國商民水陸貿易章程八條覆

奏經總理各國事務衙門會議奉

旨依議仍於九月二十六日魚允中回承准貴大臣
咨行並鈔錄總理各國事務衙門覆

奏摺及兩國商民水陸貿易章程欽遵查照等因
准此竊本邦久列藩封一切典禮均有定制向
賴貴大臣代籌已與各國立約通商而獨

上國與本邦商民尚拘例禁不能共霑利益殊非
中外一視之義所有前此瀆請迺蒙

皇上廣推洪慈亦惟貴大臣亟恢遠圖因時變通務
存體恤所訂章程八條悉屬公允喜出望外並

於章程之首聲明中國優待屬邦不在各與國
均霑之列等語俾小邦感奮自強用答我

大朝懷柔之至意此誠數百年來初有之

特典當職謹與一國臣庶北望攢頌擬俟前頭使行
奉

表叩

謝恭伸感激之私除先通稱

謝外合行咨覆請貴大臣查照辦理須至咨者

光緒八年十月十七日發十二月初六日到

朝鮮國王為咨覆事照得貴大臣為念敵邦軍

變以來器械散失練選時急飭撥天津軍械所
十二磅銅開花砲十尊英來福兵鎗一千桿配
齊炸彈木信門火銅帽洋藥各項運由提督吳
軍門派員交付茲遵計開驗收仰惟貴大臣克
體

皇朝覆幬之仁而軫屬邦急難之誼攢手感頌曷任
銜結現今新團勇丁率循吳軍門指授練習次
第整頓俾此無兵而有兵無械而有械用為保
邦制治之本思自奮發俟有成效嗣後情形隨
當無隱冀紆遠籌以惠終始為此合行咨覆請

照驗施行須至咨者

光緒八年十月十七日發十二月初六日到

李肅毅伯奏議

及門吳章洪汝編輯

卷九

查覆李鳳苞被參各款摺

瀆懇賞假葬母摺

續造鋼甲快船摺

旅順籌防費難預估片

法越肇釁片

軍機大臣 字寄一件

軍機大臣 密寄三件

懇辭兼署直督摺

展接津通電線摺

再辭直督摺

輪船新糧不憑馬力片

各營加夫仍請給半摺

妥籌邊計摺

妥籌前敵軍事片

妥籌北洋防務摺

酌議礮臺地雷團練事宜片

借款購備槍礮摺

法越交涉議定法約摺

添設山海關電線摺

力籌戰備摺

覆陳使命約文情形片

覆陳商局輪船暫售美國摺

遵呈海防圖說摺

尖底舢板勢難制勝摺

派船援閩擬用洋將摺

輪船聯絡德國水師片

水師學堂請獎摺

覆陳海岸不能過敵摺

海防經費報銷摺

查覆李鳳苞被參各款摺 光緒九年正月二十日
奏為遵

旨訪查據實覆陳仰祈

聖鑒事竊 臣承准軍機大臣字寄光緒八年十二月
十六日奉

上諭有人奏出使德國之李鳳苞係負販小夫略通
西語鑽營保薦出使以來不遵定制私帶武弁並
有挾妓出游恣情詭達情事等語使臣職任關繫
緊要所參李鳳苞各節是否屬實著李鴻章訪查
明確據實具奏原片著抄給閱看等因欽此伏查

李鳳苞係江蘇崇明縣人由附生調往上海機器局測繪西洋各國輿圖講求洋務有年嗣丁日昌督辦船政委赴閩廠總監工旋派學生出洋習藝又經臣會同福建督撫船政大臣奏委該員管帶前往英法督率料理光緒元年總理衙門奏保出使人員即有李鳳苞在內三年郭嵩燾在英法使臣任內奏稱李鳳苞勤慎耐勞堪勝出使德國等語是李鳳苞以諸生襄辦局務留心經世之學既非出身微賤負販小夫可比其才堪出使經內外大臣詢事考言秉公保

薦亦非由鑽營而來至原奏所稱裝學外夷不
遵定制及挾妓出游恣情佻達各節臣密詢前
在德國學藝之都司王得勝等現充臣處水師
營務處前在德國使館繙譯之知州羅豐祿僉
稱李鳳苞謹守禮法德國外部兵部海部皆引
重之並無夷裝挾妓佻達等情事又原奏私帶
武弁一節臣等前奏派李鳳苞監督出洋生徒
內多水師武弁接任出使後復奏請購辦鐵艦
軍火隨時派弁往從學習所辦皆係要公更非
違例私帶竊以華洋相隔雖遠中西消息易通

如果李鳳苞在德有背本辱

命情事各國新聞紙必早傳播中國員弁自外洋回者當共見聞臣留心訪查均無影響該大臣駐德四年以來書問時通於泰西各邦船砲機器軍政新法探討入微心精力果一時罕有其匹即於各國交涉事宜亦能不激不隨洞中肯綮實無貽誤之處原叅各節自由傳聞之譌應請無庸置議至原片內稱向例

冊封藩屬必簡文學侍從之臣嗣後遣使當慎選科目中人等語夫科目人才輩出不盡嫻習於折

衝

冊封典禮至隆並無辨論之公事若出使東西洋各國關係甚重情形迥異所有主客強弱之形勢剛柔操縱之機宜必須歷練稍深權衡得當庶足維

國體而固邦交似不必專於文學科目中求之致有偏而不舉之患管窺一得未知有當

高深否所有訪查明確緣由謹繕摺由驛據實覆

奏伏乞

皇太后

皇上聖鑒謹

奏

瀆懇賞假葬母摺 正月二十六日

奏為臣母葬期已近瀆懇

天恩

賞假回籍以妥大事恭摺仰祈

聖鑒事竊臣於上年十二月十七日滙陳下情請假
營葬一摺欽奉

上諭披覽所奏情詞懇切良用惻然本應俯如所請
寬予假期惟北洋事務關係緊要李鴻章措置得
宜朝廷方資倚畀所有請假營葬之處俟來年正
二月間再降諭旨等因欽此仰蒙

訓勉周詳

嘉矜備至既

塵念畿防之要復曲憐臣下之私自愧驚庸渥邀
恩眷跪聆之下感泣難名入春以來靜候

俞旨本不敢以哀痛迫切之情屢瀆

天聽惟時序如流河冰已解屈指啟寔之期不過一
月有餘而自津及皖計程遙遠雖輪船便捷亦
須十餘日始抵臣鄉且一切附棺之需非先事
摒擋逐加檢點即禮儀粗具而造次襄事終覺
不慊於心記曰孝子將祭慮事不可以不豫一

祀事尚從容籌備况於先人體魄所藏而忍有
苟簡疏略之思乎此臣月餘來晷念松楸神爽
飛越昕夕引領以冀

恩詔之至而軍書填委公私交迫於中輒忽忽如有
所失也方今仰賴

聖主威福防務綏平中外交涉事宜未甚喫緊用敢
再申前請仰懇

天恩

賞假數月俾得趕緊回籍稍遂負土之私感荷
矜全實無既極署督臣張樹聲現將假滿並請

飭令迅即來津仍舊兼署通商篆務以便微臣剋期就

道所有臣母葬期已近瀆求

賞假緣由理合繕摺滙陳伏乞

皇太后

皇上聖鑒訓示施行謹

奏

續造鋼甲快船摺 二月初九日

奏為訂造鋼面鐵甲船兩號計期竣工現擬續造
穹面鋼甲快船一隻以備出海輔佐鐵艦之用
恭摺具陳仰祈

聖鑒事竊臣於光緒七年四月奏請籌款計造鋼面
鐵甲船二號經戶部議准撥款濟用聲明續造
鐵艦二隻俟二三年後各省財力稍寬再酌度
情形奏辦等因奉

旨依議欽此欽遵行知在案臣與出使德國大臣李
鳳苞往返電函商令訪查新式在德國伏耳鏗

廠妥訂合同剋期次第開造並由臣擬第一號鐵艦名曰定遠第二號鐵艦名曰鎮遠檄飭江海關道分批匯撥價銀前據李鳳苞函稱定遠於本年正月工竣驗收約三月間開駛來華鎮遠則須本年十月工竣必賴該大臣就近隨時督催一手經理其原擬續造鐵艦二隻一時既無此巨款而中國洋面遼闊計定遠鎮遠兩船到後仍屬不敷分布適總稅務司赫德覓呈新式加大碰快船圖說每隻索價六十餘萬兩據稱可禦鐵甲臣復鈔寄李鳳苞在洋悉心考較

旋准函稱備詢各國海部僉謂隨鐵艦出洋之
船必須能受風浪能禦敵砲赫德所擬加大碰
快船一遇風浪則砲難取準偶受小砲即船已
洞穿徒欲擊敵而不能防敵擊終不足恃今查
英法德所造皆用二三寸厚鐵甲名曰穹面鋼
甲快船可在大洋禦敵交鋒為最新之式定購
一隻連克鹿卜後膛大砲三尊約價三百十一
萬七千馬克合中國銀約共六十二萬餘兩配
用魚雷筒及連珠小砲不在其內其價與赫德
所呈加大碰快船相等而得力更多應否訂購

等語 臣思鐵船來華必有精利快船輔佐巡洋
或作先鋒或為後應以厚集其聲勢茲李鳳苞
探詢新式穹面鋼甲快船喫水十五尺八寸實
馬力二千八百匹壓水力二千三百噸每點鐘
駛行十五海里約合中國五十里其機艙等鋼
面約厚三寸半砲臺周圍則有厚十寸之鋼面
甲足可與鐵艦相輔而行實為海上戰巡利器
當即電屬該大臣照式訂購一隻妥議合同及
詳細程式昨據電覆已與伏耳鏗廠定議限十
四月工竣計光緒十年春夏間可與第二號鎮

遠鐵艦先後開駛來華所需船砲價銀分期陸續匯付擬於北洋海防經費存項及招商局按年撥還官本內酌量勻奏如有不足容臣再行請

旨飭撥接濟庶水師之規模漸擴藉可禦外侮而壯聲威至臣前奏請船政定造快船二隻專為巡護朝鮮口岸之用業經戶部議覆指撥各省關銀八十萬兩並查明出使經費項下現存若干酌提挪用臣已札行江海關道查議具覆應俟覆到再行核辦惟前據船政大臣黎兆棠函稱

南洋屬造快船五號 臣處擬造快船二號必先
籌款開拓廠地添設機鑪廣集工料否則緩不
濟急約計拓廠添機既需歲月即此七船分起
訂製亦非八九年不能蒞功况黎北棠現已假
歸尤慮無人督籌難以尅期集事查船政所造
快船式樣不及穹面鋼甲之精堅將來或就部
撥各款在洋廠續製抑仍在船政訂造之處並
由 臣隨時察酌情形續行奏辦合併聲明所有
籌購穹面鋼甲快船以備輔佐鐵艦各緣由謹
繕摺由驛具陳伏乞

皇太后

皇上聖鑒訓示謹

奏

八

三

--	--	--	--	--	--	--	--	--	--

旅順籌防費難預估片 二月初九日

再據天津海防支應局詳稱現奉戶部議奏軍需報銷章程內請

飭南北洋大臣總計常年經費若干如有添購經費雖不能限以定數亦當立有範圍事前奏明報部立案事後方准核銷等因查海防與尋常防務不同海防各事情形又各不相同北洋現辦防務以旅順工程最為繁鉅旅順島在奉天金州海口距山東登州煙台對岸二百餘里洋面至此一東東接太平洋西扼渤海咽喉為奉直

兩省第一重門戶即為北洋最要關鍵北洋創
練水師兵船漸增指日鐵艦來華更應擇定要
隘以為停泊歸宿之處庶出可截剿敵船退可
扼險自守旅順口有黃金雞冠等山為之屏蔽
內有東西兩澳四山圍拱沙水橫亘形勢天然
惟外口淺狹內澳淤平必須挖濬淺灘展寬口
門方能多泊兵船必須建大船塢方能修理鐵
艦快船必須添造庫廠儲備一切方能接濟水
陸糧餉軍火尤必須分築砲台控制洋面護衛
鵠澳使舟師與陸師相為依賴其餘應辦各工

指不勝屈據洋員之精於兵事者僉稱西國遇有此等天險可為水師窟穴必以全力注之所費恆至數百萬即數千萬金亦所不惜北洋歲收經費有限除去購船養船置器習藝等費所餘無幾祇可就現有財力逐段竭蹶經營前派洋員漢納根協同局員創建該口黃金山頂砲臺一座仿照德國新式堅大玲瓏實為各路砲臺未有之式現甫就竣計用銀十二萬餘兩又築壩開井修路建屋等工截至光緒八年年底止用銀四萬餘兩尚未完竣其餘各工正在次

第籌畫興辦誠以旅順工程關係最重經始甚難開山濬海工大費鉅購料運器於西洋派員雇夫於直省與內地工程做法迥異既不敢鹵莽尅期求速亦不便預先約略虛估祇就北洋現收經費陸續勻撥並未請另撥鉅款其有工作可借勇力者藉以節省總期較洋人用費力求撙節然斷不能限以定數詳請奏咨立案前來查光緒七年十月內臣於驗收快砲船巡洋之便曾將旅順口籌防緣由奏明至建築黃金山砲臺亦由支應局於光緒六年北洋經費報

銷案內開報各在案旅順籌防實為北洋必不
可緩之工經臣飭派候補道袁保齡駐工督率
擬將挑挖澳身疏濬海口建築船塢蓋造庫房
添建砲臺各工逐漸舉辦此即其大概範圍也
該處工程仿照西法多與洋人交涉絕無例案
可循洵難預為估定致有窒礙應由臣督飭承
辦各員隨時隨事核實勘辦不准絲毫浮冒除
俟水師規模粗具飭將動用各款彙案詳細據
實冊報外理合附片陳明伏乞

聖鑒敕部知照謹

秦

子

法越肇釁片 二月十六日

再上年十月間疊准總理各國事務衙門函稱
法國使臣寶海商辦越南交涉之事將過津與
臣晤談旋據該使臣到津會商擬具越南分界
通商三條屬為轉寄總理衙門核酌經該衙門
復以應辦事宜總以異日兩國各派大臣會議
為定並應由越南國王遣派大員隨同妥商嗣
寶海抵上海復接該國外外部回電內稱來議似
可往行擬於今春請派員會議臣以此事若果
會議必須有越南官員在旁以備商詢因思招

商輪船局道員唐廷庚在越運糧與該國君臣
素頗熟識即電屬署兩廣督臣曾國荃轉飭唐
廷庚商同越南派明幹大官一二人於春間航
海來華備問當經函達總理衙門在案二月初
九日准曾國荃函稱已派唐廷庚及鹽大使馬
復賁護送越南陪臣范慎遜阮述附輪船來津
據唐廷庚等面稟該陪臣沿途積受風寒染患
疔瘡未能進見並轉呈越南國王咨文密函前
來臣飭津海關道周馥為之妥備館舍廩餼撥
醫調治今該陪臣等病甫就愈臣即同署督臣

張樹聲傳詢一切目下疊接上海電報法國外
部易人頓翻前議並有將該使寶海撤任回國
之信是會議越事無期而越員既經來津亦可
藉以查詢該國情實臣已密商張樹聲隨時相
機因應並將越南國王咨函抄送總理衙門查
核外理合附片具陳伏乞

聖鑒謹

奏

軍機大臣 字寄 三月二十日奉到

前大學士署辦理北洋通商事務大臣一等肅毅伯李 光緒九年三月十五日奉

上諭前因李鴻章奏請回籍葬親當經賞假兩月現在北洋事務緊要李鴻章營葬事畢著不必拘定假滿即回署任該大臣公忠體國定能仰副朝廷倚任之意不至稍涉稽遲也將此由五百里諭令知之欽此遵

旨寄信前來

軍機大臣 密寄 三月三十日奉到

前大學士署辦理北洋通商事務大臣一等肅毅伯李 光緒九年三月二十五日奉

上諭前有旨諭令李鴻章即回北洋大臣署任現聞法人在越勢更披猖越南孱弱之邦蠶食不已難以圖存該國列在藩封不能不為保護且滇粵各省壤地相接倘藩籬一撤後患何可勝言疊經諭令曾國荃等妥籌備禦惟此事操縱緩急必須相機因應亟須有威望素著通達事變之大臣前往籌辦乃可振軍威而顧大局三省防軍進止亦得

有所稟承著派李鴻章迅速前往廣東督辦越南
事宜所有廣東廣西雲南防軍均歸節制應調何
路兵勇前往著該大臣妥籌具奏金革勿避古有
明訓李鴻章公忠體國定能仰副朝廷倚任之重
星馳前往相度機宜妥為籌辦著將起程日期及
籌辦情形迅即奏聞以紓廑系將此由六百里密
諭知之欽此遵

旨寄信前來

軍機大臣 密寄 四月十一日奉到

前大學士署辦理北洋通商事務大臣一等肅毅伯李 光緒九年四月初七日奉

上諭李鴻章奏豫籌越南邊防事宜各摺片前因越南情形緊急迫諭令李鴻章前往廣東籌辦茲據陳奏各情所籌亦甚周密事機旦夕變遷惟在隨時權衡辦理該大臣現由金陵前赴上海即著暫在上海駐紮統籌全局將兵事餉事豫為布置審度機宜再定進止著將籌辦情形隨時奏聞其緊要事件並著由電信寄知總理各國事務衙門轉奏

以期迅速原摺片留中將此由六百里密諭知之
欽此遵

旨寄信前來

軍機大臣 密寄 四月二十七日奉到

前大學士署辦理北洋通商事務大臣一等肅毅伯李 光緒九年四月十八日奉

上諭前據李鴻章奏豫籌越南邊防事宜擬赴上海暫駐當諭令統籌全局將兵事餉事豫為布置並將籌辦情形隨時奏聞法越交涉一事現無定局必須在我者兵力足恃辦理較為有益刻下滇粵防營兵力甚單自應添撥勁旅以資備禦提督劉銘傳係李鴻章舊部宿將聲望夙著如今其調募數營統帶前赴粵西作為後路援軍於事能否有

濟著李鴻章悉心酌度據實覆陳並即遵前旨統
籌全局迅速具奏將此由五百里密諭知之欽此
遵

旨寄信前來

懇辭兼署直督摺 六月十四日

奏為 懇陳下情 籲懇收回

成命 恭摺 仰祈

聖鑒事 竊 臣 恭閱 邸鈔 光緒九年六月初十日內閣
奉

上諭 李鴻章著署理直隸總督兼署辦理北洋通商
事務大臣等因 欽此 仰見

皇太后

皇上 塵念時艱 權宜措置 倚畀愈重 責任彌專 感涕
之餘 倍增惶悚 伏念 臣 自去春驟嬰大故 已迭

次瀆陳愚悃籲請終制荷蒙

聖慈曲加慰留私衷耿耿慚負重疾客秋今夏臣在籍居喪營葬皆因藩邦多事奉

詔敦促不得不援金革毋避之義亟起從戎復以北洋海防事端繁鉅臣係創辦之人遵

旨仍回署任誠以專辦通商近乎差事尚與實職不同整理防務漸有端倪亦為全局所繫微臣受

恩深重值此時變方殷不敢不勉抑私情稍分

宵旰憂勤於萬一今奉

明諭署理督篆既有地方之權寔非軍旅可比臣聞

命戰慄罔知所措竊查古之名臣前明如李賢張居
正我

朝如李光地其高勳碩德一時景慕皆以奪情起
復致留闕憾或為言路所劾或為史冊所譏咸
豐年間曾國藩胡林翼皆值寇釁方熾墨經從
軍維時曾國藩不任封圻尚且抗疏堅求終制
胡林翼雖署巡撫然奏明出省勦賊以軍事為
己任吏事則由督臣官文代為經理如臣駑下
固不敢仰望昔賢而於親喪自盡之忱夙夜展
轉末由自解甫營窀穸遽隔松楸追念劬勞抱

憾何極今若以負罪之身復權重任下滋微臣貪
位忘親之咎上累

聖朝孝治天下之隆既於名教有妨即使勉強從事
而漸疚百端神思昏聩措施失宜貽誤更多
亦於大局無益現在北洋創設水師整練陸軍
辦理交涉與夫購船選械築臺建塢皆臣分內
應籌之事臣當就精力財力所及竭蹶經營至
直隸地方政務年餘以來署督臣張樹聲凡有
要事商榷苟有所見必為指陳臣雖總理商政
猶可備諮訪於同僚臣若兼轄地方更難專心

力於防務轉瞬明年六月即為微臣釋服之期屈指光陰為時甚暫倘蒙

朝廷隨宜處置不過一轉移間而吏治海防兩有裨益相應籲求

聖主鑒臣愚忱紓臣隱疾收回

成命以立千古忠孝之闡俾臣稍免越禮之謗其為感幸曷可名言所有滙陳下情緣由恭摺具

奏伏乞

皇太后

皇上聖鑒訓示施行臣無任激切屏營待

奏

命之至謹

奏

三

展接津通電綫摺 六月十四日

奏為天津至通州陸路接設電綫以捷音信而裨
時局恭摺仰祈

聖鑒事竊臣昨在上海接准總理各國事務衙門函
商展電綫近京師一節應斟酌妥善辦理並錄
示出使大臣曾紀澤電信謂可壯聲威以保和
局靈呼應以利戰事等因臣查前年創設津滬
陸路電綫去冬擬請推廣浙閩粵等省陸綫均
奉

俞旨遵行在案此事始則稍籌官款繼則專歸商辦

兩年以來妥慎經營官民無不稱便而沿海各省緊要官報軍報尤收便捷之益即如朝鮮定變越南告警皆能瞬息傳遞應機籌措此外則英俄德法美日本各國出使大臣所有購船製械偵探敵情商辦交涉各事莫不朝發夕至雖遠隔萬里之外而近若戶庭指揮一室之中而捷於影響蓋電綫之在外洋與輪船鐵路相輔並行其功用亦復相等其成本則減於輪船鐵路不啻倍蓰尤覺費省而效鉅故西洋各國凡電綫之經緯相錯枝幹相承幾於無地不有即

如法人有事越南近又添設海綫由西貢至海防河內等處直通香港約費五十萬元誠以傳遞軍報非此不能靈捷也况

神京為中外所歸嚮發號施令需用倍切臣於創辦電綫之初頗慮士大夫見聞未熟或滋口舌是以暫從天津設起漸開風氣其於軍國要務裨益實多今總理衙門與出使大臣曾紀澤皆以近京展電為善策既已詢謀僉同臣與總辦津滬浙閩粵電報局候補道盛宣懷酌商擬暫設至通州因電商署督臣張樹聲遴派委員並

飭補用道朱格仁選派匠徒前往測量道里核
計桿數以便興工茲據盛宣懷朱格仁稟稱委
員直隸州葉金綬等帶同洋匠學生工頭循津
通一路裁灣取直量至通州北關為止所有墳
塋樹林民房均經讓出沿途輿情毫無驚擾約
計綫路一百八十餘里應須木桿一千七百餘
根俟物料器具由滬運到即日開工設局遞信
擬設往來雙綫以資周轉繪圖貼說前來 臣查
此次接辦通州電綫工程剋期歲事將來外洋
及各省與總理衙門電報到通局後即封交通

州專馬馳遞勿得片刻稽遲並令通永道薛福
辰督飭妥辦仍隨時察商逐漸接展至京以速
音信而便調度至津滬浙閩粵設綫所需巡電
弁兵准由官款撥給津貼銀兩自應循案辦理
除咨明總理衙門戶部外所有由津至通接設
陸路電綫緣由謹會同署理直隸總督臣張樹
聲恭摺具

奏伏乞

皇太后

皇上聖鑒訓示謹

奏

奏

奏

再辭直督摺 六月二十一日

奏為再陳下情籲懇

天恩仍准收回

成命恭摺仰祈

聖鑒事竊臣恭閱邸鈔六月十七日奉

上諭李鴻章奏懇陳下情籲懇收回成命一摺情詞懇切出於至誠本應俯如所請惟畿輔重地一切吏治民生防軍水利均關緊要李鴻章在任有年辦理周妥是以特降諭旨令其署理直隸總督兼署辦理北洋通商事務大臣以一事權際此時事

多艱朝廷倚任需人該署督惟當仰體宵旰焦勞
之意移孝作忠勉圖報稱即著仍遵前旨毋得固
辭欽此仰見

皇太后

皇上策勵篤庸優加倚任權宜處置訓勉周詳臣雖
至愚極陋敢不仰體

聖懷力圖報稱惟區區隱衷有不得不再泣陳於

聖主之前者臣自壯歲馳驅戎馬不遑將母同治九

年調任直隸總督睽隔庭闈十有三載去春蒙
恩賞假省親未及交卸忽接噩耗音容永訣抱憾終

天既而臣奔喪營葬兩次回籍方擬續求展假
皆以藩邦多事疊奉

詔旨敦促就道復因北洋海防關係全局不得不遵
旨仍回署任遭逢時變事機不諧違禮忘親負罪茲
甚然猶有為之說者以通商近乎差事海防無
異軍營尚可素服視事且援金革毋避之義以
自解今若復履總督署任則儼居高位顯背禮
經不有其親即不可以為子輟轉思維益增悚
懼昔曾國藩丁憂疏請開兵部侍郎署缺謂自
度不祥之身覲顏充位決非宏濟時艱挽回大

局氣象微臣今日亦同此意伏讀去年三月二十

四日

諭旨殷殷以曲鑒微忱俾得忠孝兩全為勛

天語煌煌仁至義盡私衷感激涕泗交頤竊冀

聖主推孝治之意始終矜全俾臣稍盡一日之心即

稍寬一日之疚則

思深博載圖報豈有窮期溯查微臣從前承乏畿疆緣

商務防務關係較重駐津日多駐省日少臣之

精神既難徧及於一切察吏卹民治河諸政祇

能分任司道臣不過綜其大綱去秋署任北洋

以來署督臣張樹聲凡有要事就商必為據實指陳即闔省司道皆舊時僚佐雖非臣所應轄之事固無不一氣貫通就目下情形而論臣雖專任通商於防務並無掣肘於地方亦易呼應尚不患事權之不一況臣年逾六旬精力就衰又值銜憂茹痛神明惛瞶現籌洋務海防已覺力小任重若再兼督篆深恐竭蹶貽誤咎愆叢集反覆自忖心實難安敢再披瀝愚誠仰求聖明鑒察量予變通或留張樹聲仍督直隸暫緩赴

粵或另

簡賢員迅速接任臣查曾國荃近來籌備邊防頗思竭力布置即其舊勳宿望坐鎮巖疆似可收無形之益倘若張樹聲必須赴粵則疆臣中和平穩練整頓吏治素為

朝廷所深知者尚非無人此等舉措較大原非外臣所敢妄參末議惟以中懷迫切名教攸關不能不冒昧瀆陳相應籲懇

天恩仍准收回微臣署理直隸總督之

命俾稍紓隱微之憾則後此報

國之日方長感戴

皇仁曷其有極所有再陳下情緣由恭摺具

奏伏乞

皇太后

皇上聖鑒訓示施行臣無任懃血祈求悚惕待

命之至謹

奏

輪船薪糧不憑馬力片

再前准兵部咨行軍需報銷章程內開閩廠二百五十匹一百五十匹八十匹馬力各輪船已據前船政大臣沈葆楨奏定支銷薪糧章程惟僅定三項馬力支數其二千四百匹或數百匹數十匹數匹馬力輪船均未議定支數每匹計餉重若干亦未聲敘應令各該大臣核議定章奏明辦理馬力必照實開報不得有虛馬力名目等因臣查西洋馬力之說亦如中國權度之意物必權度而後知輕重長短惟機器不能用

權度必以重畧程三者為準重者機力能勝之
勛兩畧者機力運行之時刻程者機力推移之
道里以此三者較試合計乃可得其力之強弱
名之曰馬力每匹約合中國一百五十勛惟各
國各廠製造船式機器情形不同有機大而船
小者有船大而機小者即一廠中同式之機器
其馬力亦不盡一律考詢西國水師兵官及出
洋學生僉稱西例實無以馬力多少定兵弁薪
糧之數應以船隻之大小噸載之輕重及機器
炮位桅帆器械之繁簡通盤核計分別勞逸以

定員弁兵勇名數餉數方昭平允北洋前購超
勇揚威兩快船其馬力皆二千四百匹經臣核
定每船僅月支銀二千六百餘兩至二千八百
餘兩較閩廠二百五十匹馬力之船月支銀三
千二百餘兩者尚減數百兩即閩廠威遠一船
其馬力八百四十匹而僅照一百五十匹馬力
支給薪糧若必以馬力之多寡定薪糧之增減
殊非定評更不可將未來之船懸擬支款章程
致多窒礙嗣後增製兵輪船仍應察看船隻之
大小噸載之輕重及機器砲位桅帆器械之繁

簡隨時酌定人數薪糧以期核實節省至欲得實在馬力數目必須將船滿載燒足頂好煙煤於平風靜浪中往來行駛用西洋試機儀器逐細驗算前以各船操巡緊要而馬力又無關薪糧出入未即較試上年局員造送薪糧清冊因未深悉情形間有以未經試足馬力之數開報者今飭水師統領天津鎮總兵丁汝昌督同洋員陸續如法驗算計前購英廠超勇揚威兩快船實在馬力各二千四百匹鎮北鎮南鎮東鎮西四砲船實在馬力各三百五十匹鎮中鎮邊

兩砲船實在馬力各四百匹核與總稅務司赫德前開清單相符閩廠調來威遠船現作練船該廠原報馬力七百五十匹今較試實有八百四十匹應即照此註冊備查其各船人數餉數早經核定並於上年四月本年二月先後造冊分咨戶兵部有案應請仍照前定之式無庸更議將來如有應行變通之處隨時核辦此外康濟鎮海等船或值差操或須修理俟遇便較試再行咨部註冊所有北洋各船試準馬力數目及薪糧不宜按馬力核定緣由理合附片具陳

伏乞

聖鑒勅部知照謹

奏

各營加夫仍請給半摺 十月十六日

奏為調派各路巡防及海防河防練軍各營加夫
前請按照原定營制酌給一半已屬節省仍請
照辦以恤兵艱恭摺仰祈

聖鑒事竊本年六月前署督臣張樹聲與臣會奏練
軍加夫請照營制酌給一半奉

旨允准兵部以與成案不符於九月間奏駁當經轉
行練餉局司道核辦去後茲據該司道詳稱查
閱兵部奏稱練軍開辦十五年如有應行增減
何以從未議及難保非該局員藉報銷新章有

咨部立案之語遂創為變通之說雖以核寔節省為詞而詳加核算反屬浮冒歷屆銷案並無夏防名目即冬防原冊亦僅自十月至次年正月止今則謂至三月止騰展兩月亦與向章不符等語該司道查直隸練軍營制係故大學士直隸督臣曾國藩遵

旨詳慎籌定加夫即在其內經戶兵工三部逐條核覆謂皆確有見地於同治九年八月奏准遵行計自議定營制至本年九月甫及十三年同治九年新挑各軍練習拔營挖濠請銷移營加夫銀

兩於是年四月十六八月初七等日經曾國藩
奏咨准銷有案係照營制全數支發是為加夫
之始冬防亦始於是年初則除淮軍及直字等
營外調派冬防練軍六七營十一二營繼因地
方緊要且直字等營移屯海口原有汛地空虛
調派練軍十六七八九營不等初擬冬防自十
月初出防至正月底撤回然同治九年保定左
營已於九月初派赴景州一帶巡緝光緒元二
年並六年因各軍有河工之役於正月底撤防
後即拔赴河工而撲捷營馬隊甫於二年正月

杪撤內邱等處之防二月初又調赴深冀一路
巡緝保定後營亦調赴天津派辦工程至五月
均未回營光緒三四五年均於二月底撤防銷
冊俱在可以覆按寔無騰展兩月之事至夏防
之派練軍光緒二年於閏五月二十日派出至
九月二十日回營三年於五月二十一日派出
至九月初一日回營五年於六月初一日派出
至九月初一日回營亦均有銷冊可考並非無
此名目且冬防雖報二月底撤回如無調派工
作有酌留緩撤者並有復派出巡者夏防雖報

九月間回營有因接辦冬防未撤者蓋直境幅
頓遼闊積年兵燹災歉之區民窮多盜非藉馬
步練軍四出巡哨嚴緝兜捕不足以靖地方即
如本年三月哨隊甫經撤回盜匪即乘間竊發
保定西南一帶搶劫頻聞當派隊分投緝捕獲
犯多名復將夏防分路調派各境亦即靜謐經
張樹聲奏明有案若海防尤當今急務黃防係
數省民命該弁兵或列戍海疆加築臺壘或分
守河隄力任修搶均關大局此必須隨時察看
調派之實情本無所謂向章也祇以加夫暫未

全給無關餉項造銷不復將出防營數日期於
銷案備申其說至以前之每年僅給一月加夫
本係試行酌辦並非定章但聞有由營哨官出
資添雇者有由兵丁攤費添雇者體察情形既
責以曉夜梭巡或胼胝工作兵力已形勞瘁又
任攤賠夫價不獨苦累殊甚實慮流弊滋多是
以前請按其離營月日照原定營制酌給一半
若回坐營仍即停給既按營制減半自己搏節
而無浮冒此係準情酌理因時制宜亦無須藉
報銷新章為詞且戶兵工三部會議練軍營制

摺內聲明此後如有應行變通之處仍由督臣隨時斟酌損益奏明辦理所謂隨時斟酌者自無一定年限所謂變通損益者即如以前試行酌給一月現擬照原定營制酌給一半是變通之說初非創造亦非有違定章也又兵部奏稱原奏既謂加夫斷不可少又謂必有加夫以資貼補其河防津貼犒賞稱為折給鉞鋤等費與加夫毫無干涉是借加夫為名而避加夫之實等語該司道檢查案牘曾國藩於整頓練軍時曾將昔年練兵行路須用官車紮營須用民夫

地方不堪其擾而既拔營行動即須添募長夫
一再陳奏定此加夫營制以除積弊是以本年
六月原奏以既杜擾民並節兵力為斷不可少
之需又戶兵部會議營制內開以夫價雇備車
輜亦聽酌辦可見或夫或車本非一定要皆為
行營較坐營耗費而設是以原奏以必有加夫
稍資貼補正與斷不可少之說相符若派辦河
工則應量予津貼犒賞蓋軍士既任力作不開
工價而斂鋤夯碓筐担繩索土車水戽等件皆
為工次必需非弁兵分所應備力所能辦若逐

件置給為費不資又恐以官物不加護惜是以折給銀兩令其自辦其添雇礮夫等項亦在其內如有餘資作為犒賞即如光緒二年東明新隄大工之役派淮軍十四營練軍六營晝夜趨辦喘汗勞苦肩傷踵裂計加土至四十六萬餘方之多節省工費十萬餘兩乃撥給銀一萬六千餘兩以為二十營津貼犒賞除置買器具添雇礮夫等項外每兵僅得賞銀數錢如遇工程艱難鋤鋤屢壞所給銀兩不敷應用尚須自行彌補公中不復過問此實簡省辦法與行營加

夫以供搬運糧料資裝等項勞役者判然兩事
毫不干涉並無借名避實虛糜帑項浮冒侵漁
情事該司道遵照三部會議章程隨時變通理
應詳陳原委非敢有意瀆請也所有出防庫倫
及口外朝陽圍場多倫等處練軍加夫本係全
給今奉部行循舊照支外其內地各路巡防及
海防河防各營加夫已於六月間奏奉

諭旨准照營制減半支給當即恭錄通行各營欽遵
分別補發詳報在案茲復行令只給一月既不
足昭大信亦無以示體恤夫營制猶例也譬之

議案必引本例以繩之例無明文始援成案今
既有原定營制可循似未便就權宜減支之數
為斷恤兵與節餉兩端均關緊要不敢不通盤
籌顧如保定練軍之調東明黃防大沽海防古
北口正定練軍之調蘆台山海關海防照章本
應加月餉而體察兵力去營籍雖遠尚可自給
現在暫未照加若應有之加夫既請往照營制
減半仍再靳而不與恐無以帖服軍心該司道
恭查我

朝恤兵之政

列聖垂訓周詳伏讀康熙五十五年

上諭國家綏靖邊圉剪除賊寇必須士馬飽騰方克立
奏膚功恤兵之道宜急講也朕臨御五十餘年無時
不以愛養士卒為念內而八旂禁旅外而各省旂綠
丁視同一體或代還私債或遣官犒賞或嚴禁扣減
所以體恤之者惟恐不至等因又乾隆三十七年有
以餘丁長夫事宜酌議奏請者

諭曰每兵百名定給長夫二十名固為慎重錢糧起見
但官兵現在隨營出力已議給長夫三十名今又忽
復裁減非所以體恤士衆等因又乾隆五十六年部

議中途撤回屯土弁兵支給俸賞行裝銀兩准銷七分刪減三分按名追繳川督覆奏請將應追三成銀兩免其扣還

諭曰鄂輝不拘泥部駁懇請免追所奏甚是等因仰見列聖塵念兵艱權衡至當煌煌

訓諭敢不欽遵此項加夫實為營制經久之規軍行斷不可少之項應請將內地各路巡防及海防河防各營仍自本年正月起暫行酌給一半已給者免其追扣再練軍營制步隊並無馬夫又馬步各練軍現無調赴奉天者兵部所奏步隊有

馬伙夫七十名及出防奉天等處似皆筆誤應請更正等情具詳前來臣查直隸練軍原定營制加夫一項無論本省外省或勦或防以及往來巡哨凡非坐營皆應按離營月日全給夫價或雇夫或備車聽其自便原為利軍行杜騷擾起見早經戶兵等部議准並欽奉

諭旨允行從前不論離營月日多寡每年只給一月夫價原係權宜試辦並非定章惟近年冬夏巡防加嚴海防河防尤關緊要兵力勞瘁屢由營哨官及兵丁攤賠夫價甚形苦累恐啟尅扣之端

是以於本年六月奏請按其離營月日酌給一半原係循照隨時變通損益之部議辦理已奉旨著照所請該部知道欽遵在案今兵部議駁只給一月因為節餉起見臣治軍年久深知籌餉艱難曷敢稍任糜費各軍將領往往以巡防勞苦另請體恤無不從嚴駁飭即海防河防練軍照章加餉亦未准行惟此加夫一項為練軍斷不可少之需寔不宜過於剋減轉致惜小誤大所請酌給一半雖較前發一月加增而較同治九年各部議准原定營制確已節省一半更與分

外添出者不同皆係寔用寔銷決無絲毫假冒
相應仰懇

天恩仍准臣欽遵前奉六月

俞旨辦理庶期整軍安民經久無弊理合恭摺詳晰

具

奏伏乞

皇太后

皇上聖鑒訓示謹

奏

妥籌邊計摺十一月二十八日

奏為遵

旨妥籌邊計仰祈

聖鑒事本月二十六日張佩綸到津傳

旨商辦法越事宜臣惟中外交涉每舉一事動關全

是以謀畫之始斷不可輕於言戰而敗挫之

後又不宜輕於言和劉永福以新集之軍隔河

而守山西本是危道殺傷相當棄城走險疆場

勝負彼此何常此亦未足介意即敵或逕犯北

甯三面受兵勢頗難守然我兵終無遽罷之理

也竊謂關外進止機宜應請

旨悉以委之岑毓英進退戰守惟利是視不為遙制
就不甚愛惜之越地以練我兵以撓敵志越亂
未已黑旂尚存法亦尚存顧忌久之彼氣衰餉
耗自願轉圜斯得理處之法豈可望風震懾倉
卒撤防使法窺我內怯要挾多端增環海各國
狎侮之漸哉夫南宋以後士大夫不甚知兵無
事則矜憤言戰一敗則恒懦言和浮議喧囂終
至覆滅若漢唐以前則英君智將和無定形戰
無定勢卒之虛僞務名者恒敗而堅忍多略者

恆勝足知制敵之奇終在鎮定伏願

朝廷決計堅持增軍繕備內外上下力肩危局以
濟艱難不以一隅之失撤重防不以一將之疏
撓定見不以一前一卻定疆吏之功罪不以一
勝一敗卜廟算之是非與敵久持以待機會斯
則籌邊制勝之要道矣至津防為

京師門戶尤系

聖心臣練軍簡器十餘年於茲徒以經費太絀不能
盡行其志然臨敵因應尚不至以孤注貽

君父憂伏祈

聖躬頤神加餐毋以法船到津挾和為慮臣事
君治軍惟矢一誠輸寫愚忱語多越局無任悚惶之
至謹繕摺由驛密陳伏祈

皇太后

皇上聖鑒謹

奏

妥籌前敵軍事片

再前敵各軍事權散漫兵家所忌岑毓英現已
行邊應請

旨將黃桂蘭趙沃劉永福各軍均歸該督節制北甯
如能扼守因糧於越稍省飛輓之勞否則糧餉
軍火均當節節轉運以便久持唐炯承

命回省徐延旭亦即

飭令在關內外擇要屯紮經理轉運事宜俾各軍資
糧無缺撫臣久駐邊境後路須有知兵大員贊
助臣匡扶新授浙江臬司李秉衡廉公有威可否

請

旨與國英對調俾偕張夢元整飭吏治簡練軍資以
免撫臣回顧邊軍與臣處音問曠絕張佩綸到
津言及桂軍器械缺乏尤為焦慮現擬由臣軍
勻撥兩磅後膛過山礮十尊子彈三千顆林明
敦後膛槍一千枝子彈一百六十萬顆士乃得
後膛槍三千枝子彈九十萬顆吳大澂軍勻撥
呔啫士得後膛槍五百枝子藥二十萬顆由津
滬陸續運至粵東遞至關外供用並請
旨飭下南洋大臣協濟後膛槍礮子藥若干迅解邊

軍嗣後所有前敵滇桂各營軍械即請責成張
樹聲實力經理轉運分撥臣仍當詳切函告岑
毓英等講求練軍簡器之法師其所長以期虞
備嚴密張佩綸擬初一日起程回京其未盡事
宜已商由該副都御史到京面奏所有臣妥籌
布置酌撥軍火情形謹附片縷陳伏乞

聖鑒謹

奏

妥籌北洋防務摺 十二月初七日

奏為遵

旨妥籌北洋防務添募勇營恭摺覆陳仰祈

聖鑒事竊 臣 欽奉十月二十一日

寄諭北洋沿海各口地段甚長應如何扼要布置宋慶一軍素稱得力究以駐紮何處為宜著詳籌調度等因欽此又奉十月二十六日

寄諭據御史丁振鐸奏請飭宋慶增募勇營扼守關外及旅順礮臺並令曹克忠招募津郡民勇自為一軍等語所陳尚為切要著酌議具奏等因欽此

又奉十一月十八日

寄諭總理各國事務衙門奏海防緊要宜誌近患而
豫遠謀山東要隘以煙臺為最著李鴻章遴選得
力將領如曹克忠郭寶昌等酌帶數營扼紮煙臺
與沽塘旅順相犄角陳士杰當就本省現有各營
嚴密布置等因欽此仰見

聖謨廣運思患豫防曷勝欽服竊維法人攻據越之
山西銳氣正盛所欲甚奢難保不分兵來華要
挾恫喝北洋切近

畿輔尤宜嚴密籌防臣處兵力本單只能專顧大

沽北塘蘆臺山海關各要隘已於八月間陳
奏在案沿海各口地段甚長勢不能處處設備致
耗餉項現與吳大澂籌議京東一路空虛春融
即將所部馬步礮隊各營移紮灤州樂亭昌黎
等處足資犄角至宋慶一軍從前隨剿捻逆戡
定西陲共二十餘營素稱得力嗣後逐漸裁減
光緒五年調赴奉天僅有步隊八營馬隊一營
上年因旅順口興築礮臺創設北洋水師口岸
不可無勁旅屯紮依護又調該提督親統步隊
六營駐扼旅順僅分兩營駐營口均形單薄而

旅順營口兩處皆係奉天沿海扼要未可偏廢
宋慶謀勇兼裕堪資倚任惟相距較遠至少必
須添募四營庶臨事相機策應稍有把握查該
軍月餉向由河南籌解豫省於七年五月因庫
儲支絀奏准由戶部邊防經費月撥銀一萬兩
茲擬飭該提督仍照毅軍餉章趕緊添募尅日
選練成軍約計四營餉銀並津貼及軍火運費
等項每月約需銀一萬二千兩至山東之煙臺
口為南北通津洋船北來須在彼停泊接濟煤
糧其要地久為洋商所佔礮臺未能修築倉猝

難遽興工僅有東勇振字三營駐紮煙臺後路
之岡崱撫臣陳士杰奏稱再於內地抽撥兩營
前往同紮似可稍助聲援其威海一口東西兩
峽對峙水深岸闊最宜操練舟師現飭丁汝昌
統帶蚊快各船與所延英將琅維理常往操巡
道員劉含芳帶領魚雷學生與所延德將哈孫
常住操習甫經建設廠隄碼頭囤儲煤械尚未
及修築礮壘將來亦須添駐陸軍逐漸經營水
陸相依方可立足曹克忠久著戰功饒有智略
擬如總理衙門原奏令其選募六營照淮軍營

制精勤訓練俟開河後察度機宜調赴煙臺威海一帶擇要扼紮與旅順水陸互為聲援雖不能控制海洋當可設險出奇杜其登岸該六營餉項軍裝等費每月約需銀二萬兩直隸灾後之餘度支奇窘北洋經費及淮軍額餉因各省辦防解數大減現有水陸各軍方虞口食莫繼更何能分給新營此臣所以遲回審慎不敢輕言添募也惟欽奉

諭旨一再飭催事不可緩以上兩軍月共需銀三萬二千兩仰懇

天恩勅下戶部於東北邊防經費項下照數撥給如
本款不敷即於庫儲四成洋稅內通融勻濟自
本年十二月分起由臣按三個月出具文領派
員赴部領回分別照章支放宋慶所部仍咨由
河南彙案造銷曹克忠所部即彙入淮軍造銷
以歸劃一所有妥籌布置添募勇營緣由謹繕
摺由驛覆陳伏乞

皇太后

皇上聖鑒訓示施行謹

奏

酌議礮臺地雷團練事宜片

再欽奉十月二十六日

密諭有議及防務者謂礮石礮臺易被轟破必須護以厚土使礮子陷入不炸至開花彈從空而下藥庫兵房往往被燬尤當設法豫防並講求清野之法彼族船堅礮利海上難與角勝宜於陸路嚴密扼守將沿海要處分設陷阱地雷並設伏兵彼如登岸前後截擊自可得手又津郡辦理團練易於成軍但須嚴加約束勿任恃衆橫行妄挑外衅以上各條著該大臣一併詳加審度酌議具奏等因

欽此又蒙

飭鈔閱工部主事余思詒奏請舉辦鄉團一摺仰見訓示周詳機宜悉協欽感莫名竊查大沽北塘山海關各海口所築礮臺均係石灰和沙土築成旅順口黃金山頂礮臺仿照德國新式內砌條石外築厚土皆欲使礮子陷入難炸即有炸開亦不致全行坍塌至開花彈從空而下者惟田雞礮有之船離牆近可用此礮遠則巨礮橫射不盡從空下墜也檢閱美國海防新論所稱敵軍環攻礮臺時藥庫兵房多被炸燬臣豫飭各營

藥庫須靠礮臺隱曲處以三合土厚築之兵房
緊靠營牆安設皆為防避礮路起見屆時或牆
臺偶被轟塌尚可多用土囊濕絮設法補救又
沿海要處分設陷阱地雷一節臣擬密飭沿海
各營凡營外周圍數十丈及要道橋口多栽梅
花椿陷坑密置地雷暗設電綫以備轟發但地
雷裝藥過多久埋土中易透潮濕應豫備器具
臨事添設方昭慎密又堅壁清野辦理團練一
節為自來用兵不易之法而利弊往往互見蓋
團練先須斂費值此民窮財匱既慮派捐擾累

無事或恃衆橫行有警則相率潰散粵匪之役
各省辦團未收實效可為前鑒至講求清野之
法若遇敵兵臨境自應通飭沿海居民挾其資
糧豫行遷避嚴禁漁船奸匪暗行接濟若早飭
辦似涉張皇轉滋謠惑所有審度酌議各情附
片據實密陳伏乞

聖鑒謹

奏

借款購備槍礮摺光緒十年正月二十日

奏為籌購西洋火器暫由出使經費項下借款墊
價恭摺仰祈

聖鑒事竊維中法相持迄無定局越南山西之戰滇
軍與劉永福所部憑城固守殺傷相當卒致退
舍非鏖戰之不力實器械之未精西人製造後
膛槍礮日新月異其速率之猛準頭之遠幾於
無堅不摧天地肅殺之氣與人世機巧之心相
尋無已而彼得以其時出奇角勝我仍因陋就
簡狃於制梃撻兵之常談而不思變計得失利

鈍之懸殊不待煩言而決矣臣忝領北洋無日不以選械詰戎為事每與西將及出使諸臣周諮博訪一名一物必參攷衆說而切究之積有歲月粗識端倪蓋簡器於數萬里重洋之外非熟悉其名目之新舊機括之堅窳則所得皆他人唾餘徒糜費而無濟於實用近年購置新式後膛槍礮皆令駐德大臣李鳳苞及德商斯米德訂造頗能精堅適用天津淮練各營均一例更換仿照西法操練步伍取準精益求精而滇粵閩浙防軍既少命中致遠之器即如何操法

如何用法似亦未甚講求去冬因桂軍器械缺

乏會由臣督勻撥後應儲藏運往粵東以資關

外應用惟沿邊沿海處處設防斷非北洋一隅

之力所能長此接濟總理衙門與臣函商以爲

多增無益之軍不如多置有用之器屬與洋商

定期訂購以備漢粵閩浙等省要需所需價值

即於出使經費項下暫行挪付將來何處需用

儲藏即由何處按價撥還該局通變權宜之至

計臣即督飭軍械委員與斯米德酌訂合同分

投得美奧各廠定購克鹿卜後膛過山鋼礮一

百二尊哈乞開司六響後膛快鎗五千桿毛瑟

後膛步鎗五千桿應配子彈佩帶架具零件俱

全分別限期運解來津約其價銀四十餘萬兩

隨飭江海關道於出使經費項下分起借付查

過山礮於南方行戰最宜哈乞開司毛瑟等鎗

爲德美各國著名精器俟購運將到 臣 即咨商

滇粵閩浙各督撫 臣 先定分撥之數並令按照

原價款領器以清借項仍俟選款有著再行訂

購則要款既不至虛懸而利器亦陸續增備洵

屬一舉兩得惟後膛鎗礮機件靈巧操作尤極

稱詳各省得此有用之器果能嚴督將士細心

練習於以折衝制勝庶幾稍有把握耳除將價

目細數分咨總理衙門戶兵二部查照外所有


借用出使經費購備西洋火器緣由理合繕摺

具陳伏乞

皇太后

皇上聖鑒謹

奏



法越交涉議定法約摺 四月十九日

奏為遵

旨籌辦法越交涉與法人講解議定簡明條約畫押
竣事恭摺仰祈

聖鑒事竊臣欽奉光緒十年四月初十日

上諭目前最要者約有數端越南世修職貢為我藩
屬斷不能因與法人立約致更成憲必與之切實
辨明通商一節若在越南地面互市尚無不可如
欲深入雲南內地處處通行將來流弊必多亟應
預為杜絕劉永福黑旂一軍屢挫法兵為彼所深

恨蓄志驅除自在意中豈可遂其所欲此次法人
侵佔越南衅自彼開我無失和之意若再索償兵
費不特情理所必無亦與各國公法顯背以上各
節均與大局極有關繫李鴻章膺此重任宜如何
竭力圖維預籌辨論等因欽此仰蒙

聖明指授機宜

訓誠精切感悚莫名又欽奉四月十四日

諭旨鈔示廷臣議覆各摺令臣迅速覆奏等因法國
水師總兵福祿諾到津於十二日來見所有辨
論各節及與商訂簡明條款臣因繕摺覆陳不

及先詳細函致總理各國事務衙門請其恭代
進呈

御覽十五夜接准該衙門電稱奉

旨詳加披閱均尚無傷國體事可允行該大臣即照
所擬辦理嗣後詳細條目務當悉心籌畫毋滋流
弊欽此先是福祿諾與臣議訂條款即電請外部
示遵十五日午刻該總兵接其外部大臣費理
是日辰時覆電云奉國旨予汝全權無須提督
利士比來津汝即與李大臣押定等語彼以條
款已就無可改易疊催畫押定議適臣亦欽奉

電

旨准照所擬辦理復將原議五條逐加討論酌改前後款式並按照洋文約款內字句有畧宜增損之處與福祿諾詳確覈定繕寫成帙遂於十七日申時齊集臣行館校對中法文義無訛公同畫押蓋印各執一本為據謹將約本封送軍機處備查仍照錄清摺恭呈

鑒核竊維法越之事自光緒七年以後曾紀澤與法外部沙美拉古費理等總理衙門暨臣與法使寶海脫利古等往復辨論案卷盈帙均無成議

愈變愈壞迨山西北甯失陷法釁大張越南臣
民望風降順事勢已無可為和局幾不能保茲
幸

聖朝德威遠被由法人自請講解其始願望未嘗不
奢要求未嘗不力經臣反覆辨折迎機勸導彼
亦漸就範圍如

諭旨所云職貢一節今約內第四款法國約明現與
越南議改條約決不插入傷碍中國威望體面
字樣並將以前與越南所立各約關涉東京者
盡行銷廢蓋因臣指明法越甲戌約內不論何

國皆無統屬去年新約有

大清國不得預及南國之政等語顯與中國屬藩
體制有碍必須刪改據福祿諾面稱已電告外
部令現住越南改約之巴德諾照議刪除彼雖
不明認為我屬邦但無此等違悖語意越王豈
敢藉詞背畔耶又

諭旨所云通商一節今約內第三款許以毗連北圻
邊界法越與內地貨物聽憑運銷並約明日後
另遣使臣議定詳細商約稅則其云北圻邊界
必不往深入雲南內地明矣查向來紅江上游

中外商人運銷貨物出入滇境往來不絕本未
苛禁將來互市自可在北圻邊界擇要設關收
稅妥立章程似覺無甚流弊又

諭旨所云兵費宜拒一節該國上下處心積慮本欲
訛索兵費六百萬磅即各國新報私議皆為是
言臣預屬稅務司德瑾琳道員馬建忠等多方
開導復當面嚴詞厲色力與駁斥今約內載明
情願不向中國索償尚屬恭順得體足以風示
各國中國許以北圻邊界運銷貨物為有益法
國商務俾該外部得有詞以謝議紳亦為中法

和好互讓之據至劉永福黑旂一軍從前乘法
兵單寡之時屢殪法將法人恨之切齒必欲報
復上年曾紀澤迭與該外部商論由中國設法
解散約束而法廷添兵攻取意不稍回去冬克
山西黑旂精銳傷亡甚多已受大創今春劉永
福募四千人援北甯亦不戰而潰其禦大敵何
怯也華人專採虛聲僉欲倚以制法法人固深
知其無能為役此次福祿諾絕未提及我自不
便深論將來該國另派使臣若議及此當由岑
毓英潘鼎新酌定安置之法惟目下和議已成

法人必無翻覆法兵必漸減撤滇桂邊防各軍亦宜及早切實整練凡不得力之勇營應逐漸裁遣汰無用而留有用聞劉永福所部冗雜騷擾與越民為仇實為邊境後患擬請

旨密飭雲南廣西督撫臣嚴明約束酌加減汰豫籌安置妥策俾無生事滋擾則保全者多矣據福祿諾云此約專欲消釋中法將開之衅端為救急止兵起見其餘詳細節目應俟該國片派大臣前來會商該外部初次電覆此約應由議院批准本日續電又云押定條款無須議院覆核

福祿諾均經呈閱是兩國既皆定議以後商界
事宜儘可從容籌度此皆由

皇太后

皇上宵旰焦勞懷柔大度於以感召遠人効忠孚信
前後在事諸王大臣等和衷匡弼贊襄大計得
以定艱危於俄頃使數年來法越軼葛不定之
議得一結束之方從此保境息民練兵簡器徐
圖自強天下幸甚管躬親是役懍懍焉若朽索
之馭六馬送經局外責望

聖諭提撕惟以不克稱塞

明詔是懼今雖妥速成議非初料所能及其有思慮所不到力量所不及之處尚祈

曲鑒愚誠勿為浮議所惑庶法越之事由此而定中外邦交從此益固矣所有遵

旨講解議定簡明條約畫押竣事各緣由謹繕摺由驛六百里馳

奏仰慰

聖懷伏乞

皇太后

皇上聖鑒訓示施行謹

奏

力籌戰備摺

奏為遵

旨力籌戰備詳陳防務情形仰祈

聖鑒事竊准軍機大臣密寄閏五月初九日奉

上諭天津至山海關一帶沿海地段綿長備豫當已

嚴密礮臺共若干處著查明詳確情形並將防軍

分紮地方某處兵勇若干何人統領山海關防兵

是否足敷扼守一併迅速詳晰具奏法人將以兵

艦北來意圖要挾北洋防務關係極重李鴻章身

膺重任務當力籌戰備與吳大澂會商辦理總期

毫無罅隙用紆朝廷屢念之殷等因欽此仰見
聖明思患豫防綢繆牖戶

指示詳切感悚莫名伏查天津至山海關一帶沿海
地段綿長港汊紛歧斷無處處設防之理惟當
於敵舟可以深入登岸處所扼要守險以杜竄
越守口之營兵數不必甚多但以堅守礮臺為
主並分布水雷旱雷制其衝突其後路接應之
師須有大隊以備遊擊庶臨事聲援稍壯而前
敵軍心益固 臣歷年布置防務率本此意以為
設施直境敵舟可以深入者曰大沽口北塘口

為最要大沽口南岸大礮臺四座周圍小礮臺四十座記名提督大沽協副將羅榮光統標協練兵一千八百人守之親軍礮隊一營為接應北岸大礮臺二座平礮臺六座記名總兵劉祺統直字兩營守之副將史濟源帶保定練軍一營為接應另有水雷營專管布設水雷電綫等事並令提督丁汝昌調派鎮中鎮東鎮西鎮北四礮船收入海口與礮臺相依護又令前敵營務處記名提督吳殿元駐沽聯絡將領妥籌戰守月前商飭提督周盛傳督所部挑築長牆重

濠十八里由該營直達大沽以便有警星連馳
援北塘口南岸礮臺二座平臺七座北岸礮臺
一座平臺三座署廣西提督唐仁廉統仁字義
勝各一營通永練軍三營分駐扼守另募專管
水雷哨隊並調鎮南鎮邊兩礮船收入海口與
礮臺相依護直隸提督李長樂統武毅馬步四
營提標練軍馬步二營駐蘆台為後應由北塘
東北至灤州樂亭昌黎一帶曰清河口曰老米
溝曰甜水溝曰蒲河口皆有淤沙數十里攔港
潮長不過數尺潮涸僅通民舟輪船斷不得近

吳大澂分撥所部親軍礮隊一營步隊一營駐樂亭之黑坨副將劉超佩統鞏字三營駐樂亭甘草地一帶往來巡哨以防敵乘小舟登岸昌黎之東曰洋河口水勢較深輪舟可泊十餘里外吳大澂派候補直隸州戴宗騫統綏字馬步四營分駐扼守又東則山海關最為險要臣先已派正定鎮總兵葉志超統正定練軍馬步四營在甯海城老龍頭堅築礮臺惟該處老水貼岸兵輪可泊近處處慮難受巨礮叢擊兵力尤單前派前甘肅提督曹克忠馳往察勘必須添隊

合紮該提督願告奮勇統帶津勝六營前往分屯關內外威遠城崔家臺大灣馬家店青石溝等處與葉志超互相犄角應援該提鎮老於戎事訓練調度均甚周詳緩急尚有可恃至大沽後路所築新城則有大名鎮總兵徐道奎統大名練軍二營礮隊兩哨與葛沽營守備張曙德練兵一營駐守北塘後路之軍糧城則有記名總兵徐邦道馬隊二營扼守天津則有記名總兵黃金志統護衛一營練軍四營三哨都司王得勝帶親兵礮隊一營由臣居中控制而其專

備各路援剿者則有湖南提督周盛傳統盛軍
槍隊十一營馬隊五營分駐小站馬廠一帶記
名提督劉盛休統銘軍槍隊十營馬隊一營駐
紮興濟鎮總視海口何處警急即調赴馳援專
為游擊之師此沿海各處分紮地方及兵勇營
數布置防務之詳細情形也各軍所用槍礮多
係後膛新式平日督飭將弁認真操練打靶布
陣原備有事時戰守之用此次法人以兵艦倉
猝北來意圖要挾度不過游奕海上虛張聲勢
其大船喫水深者不能進大沽北塘各口若欲

登岸深入內地決非兩三萬步隊不能得手該國遠在數萬里外調兵須上下集議必數月乃能來華現在越南境內法兵及土兵聞只一萬數千人勢不能全數移調即使聯舩而至水陸並進臣等兵力雖非甚厚但冀餉需無缺當可設法鏖戰為

京畿捍衛要衝臣惟隨時察酌機宜嚴申紀律明定賞罰俾將士咸知奮勉共伸同仇敵愾之忱以稍紓

宸廑於萬一所有力籌戰備各情形謹會同會辦北

洋事宜通政使司通政使臣吳大澂繕摺由驛
五百里覆陳伏乞

皇太后

皇上聖鑒訓示謹

奏

添設山海關電線摺

奏為籌款添設津沽北塘至山海關電線以速軍報而重防務恭摺仰祈

聖鑒事竊臣前奏設立津滬及浙閩粵陸路電線又自津至通州陸線左宗棠張樹聲亦請展辦長江至漢口廣州至龍州電線分別官款商股辦理均奉

旨允准遵行在案誠以電報呼應捷速雖隔萬里若在戶庭有裨軍國要政為目前當務之急成效已昭然可見茲查津沽北塘至蘆台樂亭昌黎

山海關經營口直達旅順俱係北洋沿海扼要之區已分駐水陸各軍妥籌防守惟距津道途遙遠軍情瞬息變易非有電報無以速傳遞而赴事機但陸路二千餘里設線經費約需銀十餘萬兩僅營口一處畧有商報其餘皆係軍報商股既不能招徠北洋亦難籌巨款只可擇要經營復查北塘至山海關一帶為畿東門戶值此海防喫緊布置尤關重要必須先其所急迅速辦成庶蘆台樂亭昌黎榆關各路防軍消息靈通頃刻之間可以互相問答調度機宜不致

遲誤實為海防經久之規天津大沽北塘前已由官設線今應自北塘至山海關依沿海徑路接添當即派員勘定計程四百餘里暫設單線一條過河之處購用水線估需銀三萬餘兩剋期歲事已飭津海關道周馥電報局道員盛宣懷朱格仁采購料物督飭員匠興工趨辦並將沿途應設局棧廵房妥為布置此路並無商報應仿照西洋關繫國家政務線由官造之例及廣西梧州至龍州成案即由官辦現在設線用款自天津至山海關常年局用廵電修理各費

均於北洋海防經費項下核實動撥另行分晰
彙案報銷並飭地方文武隨時認真照料保護
勿任損壞所有籌款添設山海關一路電線以
速軍報緣由恭摺具陳伏乞

皇太后

皇上聖鑒勅部查照謹

奏

覆陳使命約文情形片 閏月十二日

再奉五月初十日

密諭前因福祿諾臨行巡邊之言李鴻章並未奏聞亦未告知總理衙門業經降旨申飭現在法使即以此為口實並以簡明條約法文與漢文不符藉詞嘗試無理取鬧皆由李鴻章辦理含糊所致著責成竭力籌備為自贖之地等因欽此伏讀之下

惶悚萬分查福祿諾臨行時忽以限期退兵之語相要挾臣當即正言駁斥仍飛函密告雲貴督臣岑毓英廣西撫臣潘鼎新相度機宜酌量

進止隨時奏明請

旨辦理緣臣係議約之人與關外相距過遠軍情地
勢究以調紮何處為宜非敢遙度其時適因所
議簡約雖蒙

聖明曲諒而都人士嘖有煩言若聞福酋又請限期
退兵必更譁躁徒惑衆聽臣又明知事難照行
而約款未可遽背欲令岑毓英潘鼎新查照調
回邊界約文自行斟酌妥辦實具委曲求全之
苦衷固未敢據以上

聞致干

聖怒亦未立即告知總理衙門疏忽之咎誠所難辭
迨潘鼎新以電報請示臣即飛告總署屬其請
旨定奪昨又將當日面駁情節詳細函達總署法使
即藉為口實而臣並無允即調回之詞可以互
證其實實無絲毫含混至謂條約法文與漢文
不符似係旁觀挑釁之論臣本不識洋文稅務
司德璀琳道員馬建忠素精法文皆欲成就此
事臣原令該員與法領事法蘭亭等再三校對
據稱並無舛謬自來各國訂約必聲明以洋文
為正非獨此次法約為然而嗣後彼此辨論又

往往以漢文不符兩相齟齬此總理衙門與臣等所歷辦而深知者誠如

聖訓無理取鬧不過臨時多一辨駁究其大旨亦無甚出入也惟是此次越境觀音橋接戰獲勝之後法人藉詞要索所慾甚奢殊難甘心就範臣斷不敢狃於和議辨防疏懈而環顧大局恐竟無收束之法殷憂彌切負疚更深謹附片據實
瀝陳伏乞

聖鑒謹

奏

覆陳商局輪船暫售美國摺 七月初一日

奏為法人開辦商局輪船恐被劫奪經商董等密
籌照西國通例暫售與美國旂昌洋商以保成
本議明俟事定收回恭摺密陳仰祈

聖鑒事竊 臣接准總理衙門密電六月二十五日奉
旨從前設立招商局置買輪船係奏明辦理現聞售
於美國李鴻章何以未經具奏殊屬非是海上轉
運全恃輪船此舉自因恐為法奪起見究竟是否
出售抑暫行租給著據實奏聞並隨時酌奪情形
設法收回欽此伏讀之下悚惕莫名 臣查招商輪

船局本仿西國公司之意雖賴官為扶助一切
張弛緩急事宜皆由商董經營至與外人交涉
權變之處官法所不能繩者尚可援西例以相
維持自本年閏五月間法酋統率兵艦來華恫
喝肆擾海疆不靖局勢日非華商輪船二十餘
艘駛行洋面日有戒心法人徧布謠言遇船劫
奪船貨成本太重懼遭不測之險南北商旅咸
以搭儀局船為戒彼蓋視招商局輪船與船政
煤礦同深覬覦者也若轉運官物兵械等件既
無鐵艦護持必為敵船阻截即使假借他國之

旗斷難冒險行駛若將船隻避泊口內局董唐廷樞又稱久停則船身機器必致損傷一切養船經費商力亦不能空賠於是滬上紳商私相籌議外洋商務皆憑律師主持遂密邀招商局素僱之英國公正律師担文細查各國律例成案凡本國商船改換他國旂幟須在兩國未開衅以前黑海之戰俄商皆懸德美之旂有二艘換旂於戰事三日前遂為法人所奪復有二艘易旂於戰前暗立售回之據亦為英國所奪布法之戰兩國商船多售與他國易旂駛行事後

仍復原業若暫行租賃則非實在轉售他國必
不能保護此萬國通行之公例也先是唐廷樞
在滬議交英商怡和洋行換旂代辦担丈則謂
英律煩苛難罄美律簡易易從美與中國交情
較厚應換美旂為妥適有美國旗昌行主願將
招商局產悉照原值價銀五百二十五萬兩統
歸該行認售該行以銀票如數抵給他日事定
將銀票給還收回船棧權操自我仍可改換華
旂道員馬建忠素習洋文熟諳公法前委赴滬
會查招商局務該員就近與担丈及旗昌反覆

商論担文力保中法事定可以原價收回旗昌
亦誓言決不失信故於價值亦不計較馬建忠
偵知法事叵測遂毅然決然獨肩其責因與眾
商定議訂立合同將各船棧暫交旗昌代為經
管換用美國旗幟照常駛行兩面所押契據銀
行期票與收票按照西國律例均交律師担文
收執日後藉以為憑是戰前商船換旂出售為
各國常有之事中國雖屬創見而眾商為時勢
所迫亦屬萬不得已至將來收回關鍵馬建忠
惟担文是問眾商惟馬建忠是問節節鈐制斷

不容稍有反覆也當法使議約未成之際軍書
旁午臣雖知商船暫換美旗而未悉其詳是以
未遽入

告且此等事件華商與洋商交涉彼此全憑信義
律師既援西例担保而官長卻未便主議外侮
橫加商情惶迫數千人身家關係而官無法以
保護之更無力以賠償之商人自設法保全成
本官尤未便抑勒好在各省公款八十餘萬商
本四百數十萬皆有着落事竣可以操縱自如
但冀法約早定船棧照議歸還中國商務復興

更無喫虧之處惟聞法人四處偵探總疑商局
輪船並非實售與美尚思援西例以乘間攫奪
俾為軍用美國官商亦惴惴相與隱諱竭力保
護此中機括尚求

聖明默鑒而曲原之所有商局輪船暫售美商議明
事定後收回各緣由謹由驛據實詳切密陳伏
乞

皇太后

皇上聖鑒謹

奏

--	--	--	--	--	--	--	--	--	--	--

1711

1711

遵呈海防圖說摺

奏為遵

旨恭呈北洋沿海設防各要隘礮臺營壘圖說仰祈
聖鑒事竊准軍機大臣密寄閏五月初九日奉

上諭旅順口礮臺是否堅實天津至山海關一帶礮
臺共若干處即著查明詳確情形將直隸口岸及
旅順煙台各礮臺繪圖貼說呈進等因欽此又接
總理衙門七月初四日來電本日奉

旨天津海防布置前已據李鴻章詳奏尚未將圖說
進呈其餘沿海各口星羅碁布口岸甚多各防營

四處分紮各專責成著各該督撫將各口地形繪圖貼說即將某營現紮某口兵勇若干何人管帶
有無礮臺分別詳細註寫等因欽此仰見

聖謨廣運經武整軍考核嚴明無任悚感查直隸各口礮臺若干及沿海防務情形經臣於本年閏五月十三日詳奏並聲明各臺壘隨時增修舊存草圖未盡請當遴委正任津海關道周馥前赴各海口會同該將領詳細查勘繪圖貼說彙呈以便恭進在案茲據該道周馥勘畫齊全彙呈前來臣查北洋沿海地段綿長要隘極多現

3
在擇要屯兵處所南起煙臺北迄山海關營口
旅順口等處延袤幾三千里斷難處處周密而
中間以旅順口為首衝大沽北塘及山海關內
外為要衝尤關繫

畿疆要害 臣歷年次第經營規模粗具雖未能創
設大枝水師縱橫海上以扼渤海門戶而督飭
陸軍堅築臺壘精習後膛槍礮以為憑岸固守
之計竭我兵力餉力以萃聚於此三四處設敵
國大隊水陸來犯不敢謂有把握當可力與措
持請將布置形勢為

皇太后

皇上詳晰陳之旅順口地處海外為駐泊水師口岸
瀕臨大洋岡嶺阻複形勢極險礮臺高踞山頂
築造精堅上有巨礮可擊來船其近山要路數
處多設行營礮壘並於口內密布水雷沿岸多
設地雷派四川提督宋慶統毅軍等十一營駐
守巴華江西南贛鎮總兵王永勝帶護軍營八
哨協守台壘天津鎮總兵丁汝昌帶蚊船兩號
快船兩號並道員劉含芳帶魚雷艇弁兵與宋
慶等表裏依護如敵船游弋外海可相機伺便

狙擊冀以牽制其北攻津沽且藉衛奉省門戶
大沽北塘口外各有攔港沙一道潮落不通輪
舟潮長亦不能進鐵艦兩岸礮臺屹立下伏水
雷甚多大沽口內兼設攔河木筏大沽守將為
副將羅榮光後路以湖南提督周盛傳盛字等
營為接應北塘守將為署廣西提督唐仁廉後
路以直隸提督李長樂武毅等營為接應山海
關內外數十里老水貼岸敵船可近岸一二里
外停泊最為險要現築三合土大礮臺一座土
礮臺二座其餘營壘牆瀕海一面均照礮臺式堆

築力求堅厚守將為廣東水師提督曹克忠正
定鎮總兵葉志超其後路撫甯永平一帶以記
名提督劉盛休銘字馬步十一營為接應山海
關迤西昌黎樂亭一帶小港甚多誠恐敵船擾
我不備經會辦北洋事宜通政使吳大澂派所
部鞏字綏字等馬步十一營並新募三營駐守
臨時亦可相機南北援應此旅順大沽北塘及
山海關等處布置情形也至於奉天之營口礮
臺工程為前關道續昌督修力求堅緻今始粗
完口外有攔港沙一道內為遼河水淺不通輪

身經奉天將軍及臣先後派委記名提督左寶貴等帶勇七營防守該處海灘平行無形勢可據無城池可守只一通商碼頭且食水須取之四十里以外惟陸路距瀋陽僅三百六十里應由該將軍派隊接應後路以固邊圉山東之煙臺濱臨大海有山無險有市無城雖築有通伸岡礮臺一座形勢太孤現亦未安巨礮撫臣陳士杰派兗州鎮總兵全祖凱帶八營駐守煙臺後路夾河地方伺敵上岸可以出隊兜擊登州府城露立海崖之上撫臣陳士杰委前濟東道

李宗岱帶八營與登州鎮蔡國祥分守府城內
外以上二口距直稍遠而距京更遠該省兵餉
兩絀布置不過如此亦限於力量之無如何茲
遵

旨繪具總圖一紙凡各處海口礮臺若干統兵何人
兵數幾何一一詳載又具大沽北塘山海關營
口旅順口煙臺登州七處分圖共七紙其山水
曲折臺壘駐紮處所並按地位摹繪又旅順口
黃金山礮臺係延德弁漢納根仿德國新式築
做臺形匾而小兵房子藥房均藏台牆之內敵

礮難以攻入非紙畫所能畢肖因製木樣一具
又山海關甯海城礮臺緊臨深水易受敵礮故
築做力求堅厚臺牆外包沙土內藏子藥頗為
勞費工作半藉兵力三年始成亦製木樣一具
一併恭呈

御覽謹繕摺詳細覆陳伏乞

皇太后

皇上聖鑒訓示謹

奏

--	--	--	--	--	--	--	--	--	--

尖底舢板勢難制勝摺 九月二十八日

奏為尖底舢板勢難攻敵制勝恭摺仰祈

聖鑒事竊准軍機大臣字寄本年八月十四日欽奉

慈禧端佑康頤昭豫莊誠皇太后懿旨神機營奏道員

恩佑擬製造尖底舢板輪船分布海面扼守海口如

遇敵船遠近皆可攻擊著查照所奏悉心籌議酌量

試辦等因欽此當經督飭水師及機器製造各員悉

心籌議茲據統領水師總兵丁汝昌等稟復前

來臣查恩佑原擬尖底舢板船係以人力搖舵

用槳與輪船所帶之舢板式樣相同輪船舢板

用十六槳行駛尚不甚快只可空船渡人不能
裝載軍火行戰今以十二槳駕之即有尾輪亦
不能快必為敵船追及其尖底原期輕捷破浪
今實以二十餘人及槍礮雷箭藤牌等件船載
已重恐遇浪即傾欹潑沈海上風波險惡巨舟
尚不易涉厯欲令舢板出沒洪濤指揮如意與
鐵甲輪船爭雄似非事理所有至諾等飛小礮
管徑一寸二分每出之藥不足三兩遙擊無力
近則必先受敵擊精利水雷非搖槳之小船所
能拖裝洋火箭更非小舟所能取準恩佑以夷

船雖大不能擊我之衆多夷礮雖巨不能擊我
之散漫謂可圍攻制勝不知外洋兵艦鐵甲厚
尺許四面戰台皆有鐵壁艙係隔堵舢係夾層
斷非舢板小礮火箭所能攻破無論海面海口
彼但往來衝駛輪動波翻舢板已把持不定且
鐵艦皆有碰嘴木船觸之即裂若被橫直壓碰
開放鐵壳羣子彈小舟薄脆雖多未有不沈燬
者蓋如驅羣羊攻猛虎大小強弱之勢不敵也
方今海戰大抵以鐵甲禦鐵甲則礮巨鐵厚調
度靈捷者勝以鐵甲禦兵輪則有鐵甲者勝秦

西諸國考究計算最精最確數十年窮力經營於鐵甲非好炫奇因其有實濟也小舟攢攻之說籌海者屢議而未敢行中國如有鐵甲船五六艘快船十餘艘魚雷艇二三十艘必可長驅而前與法艦決一勝負彼亦未敢正視若論以小勝大以多勝寡亦祇能用薄甲大礮快船及魚雷艇三五隻在海口圍攻一大艦追敵易及應變較速尚可出奇制勝若所擬舢板式樣在海面殊無把握似不必輕於一試徒糜經費理合恭摺據實覆陳伏乞

皇太后

皇上聖鑒謹

奏

2002

2002

派船援閩擬用洋將摺

奏為遵

旨派船援閩擬令新募德國水師總兵統帶前往襄助恭摺密陳仰祈

聖鑒事竊照欽奉電

旨飭撥北洋兵船赴閩援剿台灣經臣將派撥超勇揚威兩快船飭令豫備煤糧子藥即由旅順口起旋南下入江與南洋所派五船會齊密商相機前進電請總理衙門代

奏在案查北洋兵船除鎮東鎮西鎮南鎮北鎮中

鎮邊蚊船六隻專備守口威遠康濟兩艘專作
弁兵水手練船並無大礮均不便馳逐洋面接
仗即超勇揚威快碰船兩號每船雖有二十五
噸巨礮二尊而船身過小鐵板薄僅三四分易
為鐵艦大礮轟破穿沈從前在英廠訂購此船
原擬與鐵甲船相輔而行可以巡探接應今德
國定購鐵艦既為公法所阻急切不能駛回僅
此兩船力量太單斷不足以禦大敵臣因旅順
要口令該船駐泊其間與黃金山礮台水陸相
依立脚既穩出入夾擊可期得勁茲台灣危急

奉

旨飭催派援明知法艦堅猛而多非中國現有兵船
所能敵亦不得不勉強派撥與南洋各船略助
聲勢統領水師天津鎮總兵丁汝昌前已奏明
督帶蚊快船各船扼守旅順與宋慶陸軍協力籌
防現撥快船赴閩而蚊練等船必須責令該鎮
督帶布置旅順為津沽門戶防務極關重要勢
難分身遠去其管帶超勇之儘先副將林泰曾
管帶揚威之儘先游擊鄧世昌皆由船政學堂
出身嗣又出洋學習孰諳泰西兵船規法操練

頗為整齊第閱歷戰事尚少未可以獨當一面
適有出使大臣李鳳苞遵

旨僱募德國水師總兵式百齡改名萬里城到津謁
晤英銳沉鷲謀畧甚優同治初年南北花旗之
役曾為美國帶師船打仗據李鳳苞緘稱在德
國水師中出色之員久經海上戰陣深堪倚任
該員願告奮勇帶兩快船前往並謂法船先後
來台灣洋面者不下三十餘號中國師船單弱
又經馬江大挫之後不宜輕試其鋒然亦不可
不設法牽制北洋快船二號加以南洋快船三

號並另派兩船如果管駕得人同心協力雖不能與法國大幫兵船鏖戰而在閩粵之交相機乘間避實擊虛或可攻奪其單行小號兵船及運兵運煤糧之船察其所言洵屬知彼知己切中機宜臣詢之林泰曾等均樂與共事藉得觀摩之益因令該總兵馳赴旅順統帶兩船剋日開駛順過上海修理添煤約須耽擱旬日再會同南洋派出各船相機密速前進惟接福州電報閩口馬祖澳近日法人又添數船難保不聞信截阻已屬式百齡與林泰曾等隨時確探情

形察酌進止 臣等均宜不為遙制庶免意外之虞除咨明兩江督 臣福州將軍閩浙督 臣知照外所有派船援閩擬令德國水師總兵統帶前往各緣由謹繕摺由驛密陳伏乞

皇太后

皇上聖鑒訓示謹

奏

輪船聯絡德國水師片

再外海輪船鐵艦駕駛測量行軍布陣法度為
西人專門名家之學其將弁皆自少至老專力
殫精互相傳習更事既多乃克有所成就緩急
可恃中國創練未久勉效步趨將材非咄嗟能
辦遽當勁敵縱橫洋面實慮船礮人才一無可
恃轉資敵用而損

國威南洋派水師營務處吳安康統帶五船聞其
各管駕未盡熟習海上風濤沙線又未曾與北
洋兵船會哨合操現今聯鯨並進船隻甚單事

機極險一切進止號令必須畫一整齊庶冀同
身共濟可否請

旨勅下兩江福建各督臣轉飭該統帶等與德國水
師總兵式百齡妥為聯絡商辦或有訓練未精
見識未到之處可屬式百齡隨事幫同教練指
示以增益所不能式百齡瀕行時與臣要約伊
及所帶德弁倘臨敵陣亡求加倍卹銀以慰其
家屬倘奪獲敵船求加倍賞銀以酬勞將士臣
皆慨然允之藉以作其忠義之心而用其致死
之力是否有當附片具陳伏祈

聖鑒訓示謹

奏

水師學堂請獎摺 十一月十四日

奏為天津水師學堂辦有成效援案擬保俾資鼓勵繕單恭摺仰祈

聖鑒事竊查北洋籌購碰快鐵甲等船以管駕員弁需材甚亟經 臣於光緒六年七月內奏請於天津建設水師學堂請

旨飭派前船政大臣光祿寺卿吳贊誠駐津督辦嗣吳贊誠因病回南就醫復經 臣奏派二品銜分發補用道吳仲翔駐局總辦各在案迨七年七月學堂落成始添招學生入堂肄業其時北方

風氣未開學生入堂之初非惟於西語西學咸所未聞即中國文字亦僅粗通經飭監督各員嚴加約束教習各員認真課導欲其於泰西書志能知尋繹於是授以英國語言繙譯文法欲其於凡諸算學洞見源流於是授以幾何代數平弧三角八線欲其於輪機礮火備諸理法於是授以級數重學欲其於大洋駕身測日候星積算晷刻以知方向道里於是授以天文推步地輿測量其於駕駛諸學庶乎明體達用矣然猶慮其或失文弱也授之槍俾齊步伐樹之梳

俾習升降嫻其技藝即以練其筋力猶慮其或
鄰浮薄也教之經俾明大義課以文俾知論人
論其靈明即以培其根本為之信賞必罰以策
其倦怠為之月校季考以稽其知能蓋自開堂
以來一日之間中學西學文事武事量畧分時
兼程併課數更寒燠未嘗或輟疊經季考諸生
課業月異而歲不同今年春秋兩季經臣飭派
委員羅豐祿邀同英俄兩國水師兵官到堂會
考該兵官等僉謂歐洲水師學堂所留以俟上
練船後指授之學此堂均已先時預課羅豐祿

亦謂堂中所授繁難諸學多為從前閩廠駕駛
學堂洋教習所未及課計自開堂以來甫及三
年而駕駛頭班學生伍光鑑等三十名均已畢
業堪上練船又課成肄業美國回華學生王鳳
喈等九名或充學堂幫教或經分派各船成效
歷有可稽伏思水師為海防急務人材為水師
根本而學堂又為人材之所自出臣於天津創
設水師學堂將以開北方風氣之先立中國兵
船之本際此成效初收允宜甄陶在事激勸來
茲庶幾人材可期輩出查廣東設立同文館招

募學生課以西國語言文字每屆三年奏請分別給獎有案天津水師學堂所課西國語言文字特其一端此外諸學視同文館實相倍蓰在堂各員弁盡心教導洵屬異常出力學生亦攻苦逾恆現已屆滿三年著有成效據總辦道員吳仲翔詳請援案奏獎前來 臣查泰西各國水師強盛皆以學堂為根基中土創辦之初不得不多方誘掖冀收拔十得五之效理合酌擬獎敘繕具清單恭呈

御覽仰懇

天恩俯准照擬給獎以資鼓勵伏乞

皇太后

皇上聖鑒訓示謹

奏

覆陳海岸不能遏敵摺十二月初二日

奏為煙台旅順海面相距太寬須有大枝水師方可阻遏敵船恭摺覆陳仰祈

聖鑒事竊臣承准軍機大臣字寄光緒十年九月二十七日奉

上諭延煦祁世長奏遵查山東籌辦海防情形呈遞圖說據稱煙台北對旅順海面至此一東若能兩岸同心扼此要隘則津沽得有鎖鑰其防守之法應如何剏淺深審沙綫備船礮設水師招募精習海戰之人必有出奇制勝之策等語該處為海防

要地必須經營布置以扼要衝以杜敵船北犯之路著李鴻章慶裕陳士杰將所奏各節會同悉心妥籌奏明辦理原奏著抄給閱看等因欽此仰見聖主綏靖北洋綢繆門戶欽佩莫名遵查渤海古稱少海言小海也海道自黑水洋北來入山東之成山衛島嶼相望至登州漸漸收束非復茫無畔岸故昔人以小海目之按圖而觀煙台在南旅順在北相距似近實則中隔海面尚有二百四十餘里之遙輪船南過煙台者旅順不得而見北過旅順者煙台亦不得而知臣嘗兩至威

海三至旅順煙台身履其地目擊而心數之非
憑空揣測也由煙台西行百五十里為登州與
旅順相對峙其間海島凡十有四曰廟島曰長
山曰沙礮曰大黑山小黑山大竹山小竹山曰
侯雞曰高山曰砣磯曰大欽小欽曰南隍城曰
北隍城各島相距十餘里二三十里不等其中
皆有行船之路泊船之地而登州至長山島海
面四十里旅順至北隍城島海面六十里尤為
最寬原奏謂島嶼羅峙者即此夫以二百餘里
之洋面而有十四島星羅密布若隱若見萬頃

茫然任其所之敵船處處皆可闖入不惟堵禦
無從抑且瞭望不及於此而籌防守之法但當
以戰為防不能以守為防原奏所稱備船礮設
水師誠為破的之論如欲杜夷船北犯之路必
須船礮相當以鐵艦禦敵之鐵艦以快船禦敵
之快船再以魚雷艇數十艘密布各島伺便狙
擊方可制勝臣昔年創議訂購鐵甲近復經營
旅順修濬船澳原以該處為北洋首衝私冀鐵
艦回華即可在彼停泊練習水軍逐漸擴充使
渤海有重門疊戶之勢津沽隱然在堂奧之中

夷船萬一北犯必顧後瞻前不遽長驅直入竊謂北門鎖鑰計無逾於此者耿耿此心積有歲年徒以經費支絀不能暢所欲言德人又重違公法定遠等鐵甲船急切未能來華時勢所迫財力所限心有餘而力不足至勞

九重東顧之憂此臣所為昕夕焦慮引疚無窮者也目下北洋水師除超勇揚威兩快船調赴朝鮮其康濟威遠兩船專作練船並無巨礮難任戰事六鎮蚊船只宜分扼海口未可馳逐外洋此外如煙台之泰安營口之湄雲船身脆薄難禦

大敵亦不足以聯絡聲援湊成一隊至閩廣沿海漁戶雖多習水性亦未經海戰且必須船礮得力與敵相埒始可酌量募用斷非空拳泗水所能摧陷敵鋒方今庫儲奇絀供億浩繁沿海陸營月餉正慮不敷若添設水軍餉力更難為繼一時亦不得實用惟有就現有船隻量為布置分泊各口與陸營礮台相犄角但冀同心戮力堅穩撐持使敵船久泊大洋無可添煤水之口岸庶不遽懸軍深入若謂兩岸偕心遂可力扼要衝在

聖主必不為空言之責成在微臣亦不敢飾詞以聳聽所有遵

旨籌辦緣由謹會同

盛京將軍臣慶裕山東巡撫臣陳士杰恭摺合詞

具

奏伏乞

皇太后

皇上聖鑒謹

奏

海防經費報銷摺

奏為北洋海防經費自光緒元年
至六年收支各款分造三部清冊
並開簡明清單報銷仰祈

聖鑒事竊北洋海防用款前經總理衙門會同戶部
奏明由督辦大臣咨報總理衙門戶部查核已
於光緒七年三月飭海防支應局將自元年起
至六年底止收支各款遵照前冊咨送總理衙
門戶部核銷在案今年八月准戶部咨開應照
上年奏定報銷新章另造戶兵工三部分辦各
冊等因奉

旨依議欽此當飭據海防支應局司道將光緒元年
起至六年底止收支各款分造三部銷冊並將
戶部兵部簽查咨查各節另冊逐一登覆計六
年之中共收銀四百八十二萬六千六百十八
兩有奇除撥給滇案卹款及各處賑糶井工工
程等項銀八十萬八千八十四兩有奇外購買
船砲槍械及養船經費中外員弁薪糧製造修
築各項應銷銀二百九十六萬四千二百三十
二兩有奇應存銀一百萬四千三百兩有奇已
按支七八年用項等情具詳前來伏查北洋籌

辦海防造端宏大事屬創始一切支款誠如戶部原奏均無專例專案可循且逐事逐件與洋人交涉實非他項軍需章程所可比擬自應實用實銷以期經久無弊臣因餉需支絀凡購一物製一器用一人必再三詳詢審察為各國防海所必需不可少者方始定議其價值等項尤以諮訪比核務求節省而得實用員弁薪糧則視差事之繁簡為等差不使濫竽糜費絕無虛張局面藉端濫支之處所有請銷各款均與核定原案相符斷不敢絲毫浮冒除各冊分送三

部外理合開具簡明清單敬呈

御覽伏乞

皇太后

皇上聖鑒謹

奏

謹將北洋海防自光緒元年七月起至六年十
二月底止收支款目繕列清單恭呈

御覽

計開

新收項下

一收江西省釐金銀六十八萬兩

一收浙江省釐金銀七十五萬兩

一收江蘇省釐金銀九萬兩

一收湖北省釐金銀八十萬兩

一收山海關洋稅銀十六萬三千八百八十七

兩一錢二分二釐七毫七絲七忽五微

一收浙海關洋稅銀三十九萬七千一百九十

八兩四錢

一收閩海關洋稅銀二十萬三千六百八十兩

一錢六分四釐四毫二絲

一收粵海關洋稅銀九十五萬七千六十九兩

八分六釐二毫

一收江海關洋稅銀六十五萬九千四百七兩

九錢二分九釐六毫八絲三忽五微

一收保定練餉局銀十萬兩

一收宗慶解還皮紙鉛丸價銀七百五兩九錢五分一釐九毫六絲三忽二微

一收喜昌劃還吉林防軍撥用鉛丸原價銀五千二百兩

一收預提江蘇釐金抵支鎮西撥船經費銀一千二百九十三兩

一收總稅務司赫德克公經購龍驤等撥船阿摩士莊廠酬勞銀一萬五千九百三十兩六錢五分七釐

一收匯撥購買鎮北等撥船價款暫存麗如洋

行生息銀二千三百四十五兩八錢三分一釐一毫

以上共收銀四百八十二萬六千六百十八兩一錢三分三釐一毫四絲四忽二微

登除項下

一撥給滇案卹款銀二十萬三千三百七十三兩

一借撥河南買米銀四萬兩

一撥給山西河南兩省賑款銀二十萬兩

一撥給京師平糶不敷價銀七萬四千七百十

一兩四錢九分六釐八毫四絲一忽

一撥給直隸賑撫各屬運米脚價銀一萬兩

一撥給河間等處井工銀四萬兩

一撥解

惠陵工程銀四萬兩

一撥給天津機器局銀二十萬兩

以上共登除銀八十萬八千八十四兩四錢九分六釐八毫四絲一忽

開除購買礮械項下

一訂購製造士乃得後門槍彈機器並各種材

料銀六萬三千二百十四兩七錢三分七釐
九毫

一訂購十五二十一生的密達後膛開花子銀
六萬一千二百九兩二錢三分三釐三毫一
絲七微

一購買二十四磅後膛鋼礮轉輪架前後熟鐵
輪路硬質開花彈等項銀十六萬一千一百
三十二兩九錢九毫二絲三忽

一訂購較量槍礮規尺銀二百八十八兩六錢
七分八釐六毫五絲七忽

一訂購吐嗜士得十三响後門馬槍子彈小銅帽裝樂器具等項銀一萬四千二百七十七兩八錢七分一釐五毫七絲六忽七微

一購買各營演礮應用遷安皮紙銀一千六百六十一兩一錢六分五毫六絲六忽

一訂購四磅後膛礮應用子母彈自來火慢藥引門火螺絲彈鍵自來火引白鉛白鐵皮等項銀二萬六千七十五兩八錢四分四釐六毫一絲

一訂購六十磅及四十磅子前膛鋼礮並開花

子實心尖彈子母彈銀四萬三千六十二兩
八分四釐九毫六絲

一訂購二十四磅後膛鋼礮銀五千十八兩二
錢四分八釐一毫

一購買製造鉛丸鉛箭應用愛而皮青鉛銀四
千二百一兩八錢二釐

一定購較量後膛礮內膛微尺刮磨後膛礮彈
鋼螺絲等件銀五百四十八兩七錢七分五
釐一毫

一訂購水雷船銀七千二百五十一兩五錢二

分四釐九毫

一製造四磅礮群子工料銀二百七十五兩三錢三分二釐四絲五忽

一訂購十五十二生的密達後膛長鋼礮銀十五萬六千八百二兩五錢七分四毫二絲五忽

一訂購製造士乃得槍子各種材料銀一萬八千二百六十四兩八錢五分五釐四毫二絲四忽

一訂購馬梯泥槍子銀一千九百六兩二分一

釐九毫

一訂購電線試信子表鋼絲繩直斜測鏡磁電
號鐘電箱印度膠新州膠洋刀鉗沈水電引
電信子五百磅沈雷一千磅沈雷試電箱甕
裏表護線鐵盒接線鐵箱電報機器接線器
具電門等項銀五萬五千二百七十六兩二
錢四分二釐七毫五絲

一購買製造槍彈應用愛而皮青鉛銀一萬四
千二百八十六兩九錢八分三釐五毫

一訂購毛瑟後門馬槍槍彈裝藥器具槍口銅

蓋皮帶先支銀二萬三千八十兩九錢五分

八釐

一訂購六响手槍隨帶銅壳銅帽銅珠等項銀三千五百三十四兩一錢三分八釐三毫六絲二忽

一訂購新毛瑟後門兵槍隨帶銅壳鉛箭先支銀十九萬九百三十八兩四錢九分八釐七毫

一訂購十二生的密達後膛鋼礮並車架器具開花子子母彈羣子拉火等項先支銀一萬

六千四百七十三兩四錢二分一釐五毫三絲

一運送兵槍到津水脚保險銀一百六十兩五錢八分三釐九毫四絲一忽七微

一續購製造鉛丸鉛箭應用愛而皮青鉛並製造工價銀二萬五千五百二十三兩三錢八分三釐

一訂購開挖海口淤沙新式機器先支銀三千八百七十四兩九分二釐

一訂購十二生脫後膛礮並電燈先支銀三萬

四千五百二十七兩五錢六分三釐九毫

一訂購二十四生的密達後膛鋼礮懷台脫魚雷造毛瑟槍彈全副機器水面射雷艇船等項先支銀十三萬兩

一運解前項現銀由津至滬水脚保險銀六百四十二兩一錢三分

一訂購電線生象皮先支銀二千四百四十八兩七錢六分六釐五毫九絲一忽七微

一訂購十五十二及八生的密達後膛鋼礮並礮彈銀九千三百十二兩五錢三分七釐八

毫四絲

一續買電線沈水雷引電信子鋼絲繩直斜測
鏡試電台放磁雷號鐘試信子表抵台噶甚
表洋刀鉗接電線各種器具印度膠膠管文
聖爾士粉鋼軸放雷鑰匙磁雷胆護線鐵盒
信子鋤電報機器等項銀二萬五千六百三
十五兩六錢一毫八絲五忽

一購買後膛鋼礮應用格利蘇令油銀二百四
十八兩二錢五分七釐五毫五絲

一歷次傳遞各國電報費銀一千二百七十三

兩四釐

開除購買礮船項下

一購買龍驤虎威飛霆策雷四船及礮藥彈找
價銀十二萬五千二百二十四兩六錢三分
三釐八毫五忽

一訂購鎮北鎮南鎮東鎮西四蚊船銀六十萬
八十六兩八分八釐九毫

一添購鎮北等四船藥彈銀六萬八千一百十
二兩七錢八分四釐六毫

一歷次解運船彈價銀赴滬水脚等項銀七百

七十七兩六錢六分一釐八毫二絲八忽

一歷次運送礮彈火藥及添購鐵輪等件來津
水脚等項銀三千七百九兩七錢二分九釐
八毫八絲八忽

一犒賞押船自英來津英國弁兵酒食禮物價
值銀四百七十六兩一錢二分五釐九毫

一訂購超勇揚威快砲船先支銀六十五萬五
千二百四十四兩九錢四分九釐四毫

一解前項價銀赴滬水脚等項銀二千一百七
十一兩一錢九分五釐八毫

開除養船經費項下

一龍驤礮船在閩在津新糧公費銀三萬三百六十九兩三分七釐六毫

一虎威礮船在閩在津新糧公費銀三萬一百七兩九錢二釐三毫

一飛雲礮船在閩在津新糧公費銀二萬七千九百六十兩九錢三分一釐七毫

一招募諸練船務在船試用楊進貴等八名薪水銀七百八十七兩九錢三分一釐七毫

一龍驤虎威飛雲策電等船洋教習富思德等

十一員在閩在津薪水火食醫藥盤川酒食
禮物等項銀二萬三千四十一兩四錢三分
七釐五毫二絲

一修理龍驤礮船輪機及添製各件銀一千八
百五十二兩五錢九分四釐六毫

一修理虎威礮船輪機及添製各件銀一千七
百六十二兩一錢四分八釐九毫

一修理飛霆礮船輪機及添製各件銀二千七
十兩二錢一分四釐一毫

一修理策電礮船輪機及添製各件銀二千六

百九十一兩八錢九釐八毫

一龍驤等船進天裕船塢勘底共付塢租銀七百二十三兩八錢一分一釐

一龍驤虎威兩礮船添蓋洋員飯房等工銀一千三百十九兩一錢八分四釐七毫

一龍驤等船添設醫士並員弁夫勇藥資銀一千五百六十五兩六錢

一派迎送龍驤等船弁勇張成等支銀一千三百六十兩三錢三分一釐九毫二絲五忽六

微

一龍驤等船在津添置旗幟號衣及零修機器
銀一千一百四兩九錢五分七釐一毫四絲
六忽四微

一龍驤等船在閩在津領用煤斤銀一萬三千
一百七十五兩五錢二分七釐六毫

一鎮北礮船薪糧公費銀一萬一千一百四十
六兩八錢一分二釐七毫三絲九微

一鎮南礮船薪糧公費銀九千八百三十七兩
七錢三分二釐九絲七忽八微

一鎮東礮船薪糧公費銀九千八百三十七兩

七錢三分二釐九絲七忽八微

一鎮西礮船薪糧公費銀一萬一千九十九兩四錢三分二釐四毫九絲四忽

一鎮北等四船洋教習吉必勛等薪水川資銀七千二百九十八兩四錢八分九釐二毫九絲六忽

一獎賞洋教習葛雷森金寶星支銀二十二兩八錢八分

一鎮北等船共設醫士薪糧並員弁夫勇藥資銀七百五十五兩二錢

一鎮北等四船領用煤斤銀六千一百四十三兩六錢六分五釐四毫七絲一忽

一鎮南礮船在滬修理並添製器件銀四千七百五十三兩四錢九分二釐五毫四絲二忽三微

一鎮北等船製造旂幟號衣等項銀三千六百七十三兩六分三絲

開除薪水糧乾項下

一丁壽昌等十員薪水銀九千四十五兩九錢九分一釐五毫八絲八忽二微

一洋員漢納根等四員薪水銀一萬九千七百三十五兩四錢五分七釐三毫九絲六忽一微

一選派弁兵赴德國學習武備酌給旅費安家銀二萬五千八百十五兩四錢三分四釐三毫九絲八微

一撥給赴美國肄業幼童經費銀四千六百五十五兩九錢四分七釐九毫五絲三忽五微
一丁汝昌等出洋驗收駕回碰快船中外員弁兵勇薪水銀一萬四千七百六十六兩二錢

八分六釐五毫

一水電輪艇弁勇夫役薪糧銀八百兩一錢三分三釐三毫三絲二忽

一調津登榮水師艇船九號薪糧公費及回東歸伍弁兵盤費並製造號衣銀七千六百八兩五錢三分三釐三毫七絲六忽七微

一駁船公所司事夫役薪公銀一百四十三兩一錢五分九釐九毫九絲七忽一微

一隨辦海防前雲南巡撫潘鼎新公費及馬步隊薪餉並購馬鞍靴等項銀一萬五千六十

二兩九錢九分九釐九毫九絲一忽三微

一前船政大臣吳贊誠薪夫銀一千一百七十

九兩九錢九分九釐九毫九絲四忽二微

一直隸提督李長樂小隊員弁薪糧礮費銀四

千六十一兩一錢八分二釐二毫九絲四忽

四微

一總兵葉志超礮車馬乾礮費銀八百十五兩

二錢八分七釐六毫

開除修築製造項下

一津沽電報經費銀二千兩

一北塘電線經費銀六百五十五兩五錢一釐
三毫

一修築大沽船塢經費銀三萬三千三百七十
八兩二錢八分四釐

一旅順口礮台工程先支銀二萬兩

一製造船隻工料銀四千八百二十四兩八錢
六分

一製造大沽北塘水雷廠應用車床螺絲板工
料銀四百四十七兩六錢七分四釐四毫

一建蓋水師學堂工料銀八千十三兩三錢三

分三釐三毫三絲七忽二微

一修理公所房屋等項銀一百六兩五錢七分四釐一毫

一局用銀三百六十八兩一錢九分七釐

以上共開除銀二百九十六萬四千二百三十二兩七錢六分三釐五毫七絲二忽一微
實在項下

一應存銀一百五萬四千三百兩八錢七分二釐七毫三絲一忽一微已接支光緒七八年
用項另行開報

李肅毅伯奏議

及門章洪汝鈞編輯

卷十

日本議立專條摺

中日約款三條

肄習西學請獎摺

法國議和定約摺

中法約款十條

創設武備學堂摺

議展朝鮮電綫摺

駐朝慶軍移駐旅順摺

張樹聲建專祠摺

議覆開源節流摺

周盛傳請卹摺

輪船修工核扣薪糧摺

覆陳直省出入款項摺

肄習西學仍請給獎片

創設電報請獎摺

各軍仍請部餉摺

續選出洋學生摺

驗收鐵甲快船摺

日本議立專條摺 光緒十一年三月初六日
奏為遵

旨與日本使臣商議事務現已訂立專條畫押互換
恭摺馳陳仰祈

聖鑒事竊 臣欽奉光緒十一年正月二十五日

寄諭日本使臣計將到津李鴻章熟悉中外交涉情
形必能妥籌因應本日已有旨派李鴻章為全權
大臣即著該督與日使在津商議事務吳大澂係
原派前往朝鮮查辦之員並著會同商議此次朝
鮮亂黨滋事提督吳兆有等所辦並無不合前據

徐承祖電稱日人欲我懲在朝武弁斷不能曲徇
其請著李鴻章等設法堅拒其餘商議各節該大
臣等務當妥為籌畫斟酌機宜與之辯論隨時請
旨遵行等因欽此仰見

聖訓精詳

指授機要感佩莫名日使伊藤博文抵津息息入都
旋由都來津於二月十八日詣臣行館會議當
邀同吳大澂續昌與之接晤該使臣要求三事
一撤回華軍二議處統將三償卹難民二十二
十二二十五等日會晤復以此三事啾啾不休

經臣疊次據理力爭往復駁詰所有連日問答
節略均鈔送總理衙門轉

奏在案臣維三事之中惟撤兵一層尚可酌量允
許我軍隔海遠役將士苦累異常本非久計朝
鮮通商以後各國官商畢集王城口舌滋多又
與倭軍逼處帶兵官剛柔操縱恐難一一合宜
最易生事本擬俟朝亂略定奏請撤回而日兵
駐紮漢城名為護衛使館實則剽睡卧榻蟠踞
把持用心殊為叵測今乘其來請正可趁此機
會令彼撤兵以杜其併吞之計但日本久認朝

鮮為自主之國不欲中國干預其所注意不在
暫時之撤防而在永遠之輟戍若彼此永不派
兵駐朝無事時固可相安萬一倭人嗾朝叛華
或朝人內亂或俄鄰有侵奪土地之事中國即
不復能過問此又不可不熟思審處者也伊藤
於二十七日自擬五條給 臣閱看第一條聲明
嗣後兩國均不得在朝鮮國內派兵設營乃該
使臣著重之筆餘尚無甚關係 臣於其第二條
內添註若他國與朝鮮或有戰爭或朝鮮有叛
亂情事不在前條之例伊使於叛亂一語堅持

不允遂各不悻而散旋奉三月初一日電

旨撤兵可允永不派兵不可允萬不得已或於第二條內無干句下添敘兩國遇有朝鮮重大事變各可派兵互相知照等語尚屬可行至教練兵士一節亦須言定兩國均不派員為要等因欽此

聖謨深遠杜漸防微正與臣等愚慮脗合臣復恪遵旨意與伊藤再四磋商始將前議五條改為三條第一條議定兩國撤兵日期第二條中日均勿派員在朝教練第三條朝鮮若有變亂重大事件兩國或一國要派兵應先互行文知照句斟字

酌點易數四乃始定議夫

朝廷睠念東藩慮日人潛師襲朝疾雷不及掩耳故不惜糜餉勞師越疆遠戍今既有先互知照之約若將來日本用兵我得隨時為備即西國侵奪朝鮮土地我亦可會商派兵互相援助此皆無礙中國字小之體而有益於朝鮮大局者也至議處統將償卹難民二節一非情理一無證據本可置之不理惟當時日兵被我軍擊敗傷亡頗多國旗既辱軍威亦損聞日本薩長諸黨深以此事為恥羣情洶洶齊動公憤欲圖報復

伊藤謂此二節不定辦法既無以復君命更無以息衆忿亦係實情然我軍保護屬藩名正言順誠如

聖諭該提督等所辦並無不合斷不能曲徇其請且明詔煌煌亦萬無議處之理因念駐朝慶軍係臣部

曲姑由臣行文戒飭以明出自己意與

國家不相干涉譬如子弟與人爭鬪其父兄出為調停固是常情至伊所呈各口供謂有華兵殺掠日民情事吳大澂等在朝鮮時毫無見聞臣亦未聞他人言及難保非彼族藉詞圖賴但既

經該國取有口供正可就此追查如查明實有
某營某兵上街滋事確有見證定照軍法嚴辦
以示無私絕無賠償可議也以上兩節即由臣
照會伊藤俾得轉場完案伊藤亦翕服無異詞
旋奉初三日電

旨所定三條著即照辦餘依議欽此遂於初四日申
刻彼此齊集公所將訂立專條逐細校對公同
畫押蓋印各執一本為據並另給照會交伊藤
收執該使臣即於初五日起程回國謹將約本
封送軍機處進呈

御覽恭候

批准其照會底稿已鈔致總理衙門查照轉奏矣竊

惟去冬十月朝鮮之變竹添陰助亂黨而朝王

亦難免開門揖盜之譏日兵先發難端而華軍

亦有乖投鼠忌器之義日本最貪小利同治十

三年臺灣生番之役優給卹銀略示寬大此次

乘中法交訐之會借朝鮮兵爭之事尋衅而來

冀收漁人之利其願望未嘗不奢駐日使臣徐

承祖函稱該國王調集廣島熊本兩鎮之兵預

備戰事伊藤來華隨帶水陸將弁多人沿途偵

探虛實朝鮮君臣聞日使北來舉國震恐臣等
方慮事機決裂重貽

君父之憂茲幸法夷効順倭人亦就範圍臣等稟承
廟謨反復辯折倖免隕越以後彼此照約撤兵永息
爭端俾朝鮮整軍經武徐為自固之謀並無傷
中日兩國和好之誼庶於全局有裨所有遵

旨會議訂立專條畫押竣事各緣由謹會同都察院
左副都御史臣吳大澂兩淮鹽運使臣續昌恭
摺由驛馳

奏伏乞

皇太后

皇上聖鑒訓示再臣續昌擬即日回京覆

命合併聲明謹

奏

--	--	--	--	--	--	--	--	--	--	--

11

11

大清國特派全權大臣太子太傅 文華殿大學士北洋通商大臣兵部尚書直隸總督一等肅毅伯爵李 大日本國特派全權大使參議兼宮內卿勳一等伯爵伊藤 各遵所奉諭旨公同會議訂立專條以敦和誼所有約款臚列於左

一議定中國撤駐紮朝鮮之兵日本國撤在朝鮮護衛使館之兵并自畫押蓋印之日起以四個月為期限內各行盡數撤回以免兩國有滋端之虞中國兵由馬山浦撤去日本國

兵由仁川港撤去

一兩國均允勸朝鮮國王教練兵士足以自護
治安又由朝鮮國王選僱他外國武弁一人
或數人委以教演之事嗣後中日兩國均勿
派員在朝鮮教練

一將來朝鮮國若有變亂重大事件中日兩國
或一國要派兵應先互行文知照及其事定
仍即撤回不再留防

肄習西學請獎摺 二月十二日

奏為出洋肄業暨天津招募學生學業有成及中西教習出力人員照章請獎繕單恭摺仰祈

聖鑒事竊查同治十年七月內前大學士兩江督臣

曾國藩會同臣奏請挑選聰穎幼童赴美國書院學習軍政船政步算製造諸學使西人擅長之技中國皆能諳悉以培人材而圖自強奏定章程自同治十一年起至光緒元年止四批選送學生一百二十名出洋肄業俟學成回華聽候派用分別奏賞頂戴官階等因經總理衙門

核准覆奏奉

旨依議欽此該學生等先後赴美國肄業除因事故撤回及在洋病故二十六名外其餘九十四名均於光緒七年分作三批回華頭批學生二十一
名均送電局學傳電報二第三批學生內有由船政局上海機器局留用二十三名其餘五十名
經臣札飭津海關道周馥會同機器電報各局
逐加考驗分撥天津水師機器魚雷水雷電報
醫館等處學習當差迄今又逾四年迭經月課
季課並由臣屢次親臨考校試以所習各藝均

能融會貫通各有心得據津海關道周馥查明
各該學生當差年分學業淺深詳請照章給獎
前來臣查選募學生出洋肄習西學培養人材
實為中國自強根本惟事屬創辦風氣初開該
學生等童年應募遠涉重洋學成回華分派各
處當差均能始終勤奮日進有功迭經面加校
試考其所學其習水師者內如魚雷一種理法
最為精奧洋師每有不傳之秘該學生等講習
有年苦心研究於拆合演放修整諸事皆能得
法此外水雷旱雷施放靈捷駕駛測量講求精

細其分赴各營教習者於外洋操法陣法口令均臻嫻熟所教弁勇頗有成效其派值電報者傳遞緊要軍報昕夕從公密速無誤他如步算製造醫學諸大端均能深明窺要質諸西洋教習及泰西各國水師兵官咸謂該學生等造詣有得足供任使該學生等現有派充營哨各官及管駕教習官醫各項差使者亟應量其技能酌保官階給予頂戴以式戎行而資策勵其天津所募學生在水師電報醫館各學堂肄習多年迭經考試其學業之優者足與出洋諸生相

埒自應一律保獎俾昭公允至中西教習各員
課導有方始終不懈其所教諸生既均學有成
效亦應擇尤酌保以獎成勞為此酌擬獎敘繕
具清單恭呈

御覽仰懇

天恩俯念中國選募學生肄習西學以圖自強實為
目前當務之急值此風氣初開稍有成效准予
照擬破格從優給獎以昭激勸可為培養人材
漸收實用之一助所有擬保出洋肄業暨天津
招募學生及中西教習人員緣由理合恭摺具

陳伏乞

皇太后

皇上聖鑒訓示謹

奏

法國議和定約摺四月二十八日

奏為與法國使臣商辦詳細條約畫押竣事仰祈
聖鑒事竊臣等欽奉三月初六日

上諭本日已有旨派李鴻章為全權大臣與法國使
臣辦理詳細條約事務並派錫珍鄧承修前往天
津會同商辦法使巴德納不日到津所有應議事
宜關係重大李鴻章務當與錫珍鄧承修會同詳
細妥籌臨機因應與法使據理辨論毋得意存遷
就總期無傷國體不貽後患仍隨時奏明請旨遵
行等因欽此仰見

聖謨閣遠

訓示周詳曷任欽悚臣錫珍臣承修

陛辭後於三月初十日抵津會晤臣鴻章密商詳細條約業由總理衙門王大臣飭總稅務司赫德與巴黎法外部電商辦理巴德納至津彼此拜晤初未談及公事三月十六日接奉醇親王禮親王慶郡王公函以赫德面交法都所擬詳約十條皆本上年津約之意略有出入現酌改數處屬臣等再行酌度具覆臣等當據管見臚陳去後嗣迭准慶郡王等密函歷次刪改辨論

之處甚多均隨時進呈

御覽遵

旨酌辦三月二十九日先將第一三四七八九共六條彼此均允照辦四月初三初六等日復將第五六條核訂先後鈔交臣等與巴德納督同中法繙譯官詳確考究講解文義間有不符復函請王大臣與赫德丁躋良等妥細校正寄由臣等與巴德納面定仍請總理衙門隨時

奏進請

旨遵行四月十九日第二十兩條亦經法電遵改巴

德納譯送 臣等又緘請慶郡王令赫德丁躉良
另譯進

呈二十三日奉電

旨此次議約往返電商各條均尚得體本日披覽改
定第二第十兩條亦最妥協著李鴻章等再將各
條詳加覈對如意義相符並無參錯即著定期畫
押等因欽此 臣等復與巴德納面商覆加核定隨
即電奏在案該使屢催剋期畫押訂於四月二
十七日齊集公所將中法文四分會同校對無
訛均各畫押鈐印竣事彼此各存正副本二分

竊維中法兩國為越事戰爭數年勝負互見今乘諒山大捷之後

皇威震懾薄海同欽法都既有悔禍之誠中土亦可藉收戢兵之益仰蒙

皇太后

皇上堅持定見杜要求之詭謀擴懷柔之大度諸王大臣和衷匡弼實力贊襄自本年正月迄今往復辨折煞費經營遂得定艱危於俄頃躋舉世於平康實天下臣民之福臣等從事其間稟承廟謨隨機因應倖無隕越斷不敢稍有草率致貽後

悔此後惟冀總理衙門暨滇粵各督撫臣恪遵
條約分晰籌辦慎固封守聯絡邦交庶可防患
於未萌相安於無事耳謹將條約正本封送軍
機處進呈恭候

批准以便屆時互換其副本咨送總理衙門查核臣
鴻章原奉全權大臣

諭旨一道敬謹咨繳軍機處備查所有商辦法國詳
細條約畫押竣事緣由謹繕摺由驛馳奏伏乞

皇太后

皇上聖鑒訓示施行再臣錫珍臣鄧承修即日起程

回京覆

命合并聲明謹

奏

大清國

大皇帝

大法民主國

大伯理璽天德前因兩國同時有事於越南漸致齟齬今彼此願為了結并欲修明兩國交好通商之舊誼訂立新約期於兩國均有利益即以光緒十年四月十七日在天津商訂簡明條約光緒十一年二月二十八日奉

旨允准者作為底本為此兩國特派全權大臣會商辦理

大清國

大皇帝欽差全權大臣 文華殿大學士太子太傅

北洋通商大臣直隸總督一等肅毅伯爵李

欽差總理各國事務大臣刑部尚書管理戶部

三庫左翼世職官學事務鑲黃旗漢軍都統錫

欽差總理各國事務大臣鴻臚寺卿鄧

大法民主國

大伯理璽天德欽差全權大臣賞給佩帶四等榮光

寶星並瑞典國頭等北斗寶星駐劄中國京都

總理本國事務巴特納

各將所奉全權文憑互相校閱均屬妥協立定
條約如左

第一款

一越南諸省與中國邊界毗連者其境內法國
約明自行弭亂安撫其擾害百姓之匪黨及
無業流氓悉由法國妥為設法或應解散或
當驅逐出境並禁其復聚為亂惟無論遇有
何事法兵永不得過北圻與中國邊界法國
並約明必不自侵此界且保他人必不犯之
其中國與北圻交界各省境內凡遇匪黨逃

一
二
三
四
五
六
七
八
九
十
十一
十二
十三
十四
十五
十六
十七
十八
十九
二十
二十一
二十二
二十三
二十四
二十五
二十六
二十七
二十八
二十九
三十
三十一
三十二
三十三
三十四
三十五
三十六
三十七
三十八
三十九
四十
四十一
四十二
四十三
四十四
四十五
四十六
四十七
四十八
四十九
五十
五十一
五十二
五十三
五十四
五十五
五十六
五十七
五十八
五十九
六十
六十一
六十二
六十三
六十四
六十五
六十六
六十七
六十八
六十九
七十
七十一
七十二
七十三
七十四
七十五
七十六
七十七
七十八
七十九
八十
八十一
八十二
八十三
八十四
八十五
八十六
八十七
八十八
八十九
九十
九十一
九十二
九十三
九十四
九十五
九十六
九十七
九十八
九十九
一百

匪即由中國設法或應解散或當驅逐出境
儻有匪黨在中國境內會合意圖往擾法國
所保護之民者亦由中國設法解散法國既
擔保邊界無事中國約明亦不派兵前赴北
圻至於中國與越南如何互交逃犯之事中
法兩國應另行議定專條凡中國僑居人民
及散勇等在越南安分守業者無論農夫工
匠商賈若無可責備之處其身家產業均得
安穩與法國所保護之人無異

第二款

一中國既訂明於法國所辦弭亂安撫各事無所掣肘凡有法國與越南自立之條約章程或已定者或續立者現時並日後均聽辦理至中越往來言明必不致有礙中國威望體面亦不致有違此次之約

第三款

一自此次訂約畫押之後起限六箇月期內應由中法兩國各派官員親赴中國與北圻交界處所會同勘定界限儻或於界限難於辨認之處即於其地設立標記以明界限之所

在若因立標處所或因北圻現在之界稍有
改正以期兩國公同有益如彼此意見不合
應各請示於本國

第四款

一 邊界勘定之後凡有法國人民及法國所保
護人民與別國居住北圻人等欲行過界入
中國者須俟法國官員請中國邊界官員發
給護照方得執持前往儻由北圻入中國者
係中國人民只由中國邊界官員自發憑單
可也至有中國人民欲從陸路由中國入北

圻者應由中國官請法國官發給護照以便
執持前往

第五款

一 中國與北圻陸路交界允准法國商人及法
國保護之商人並中國商人運貨進出其貿
易應限定若干處及在何處俟日後體察兩
國生意多寡及往來道路定奪須照中國內
地現有章程酌核辦理總之通商處所在中
國邊界者應指定兩處一在保勝以上一在
諒山以北法國商人均可在此居住應得利

益應遵章程均與通商各口無異中國應在
此設關收稅法國亦得在此設立領事官其
領事官應得權利與法國在通商各口之領
事官無異中國亦得與法國商酌在北圻各
大城鎮揀派領事官駐紮

第六款

一北圻與中國之雲南廣西廣東各省陸路通
商章程應於此約畫押後三個月內兩國派
員會議另定條款附在本約之後所運貨物
進出雲南廣西邊界應納各稅照現在通商

稅則較減惟由陸路運過北圻及廣東邊界者不得照此減輕稅則納稅其減輕稅則亦與現在通商各口無涉其販運槍礮軍械軍糧軍火等應各照兩國界內所行之章程辦理至洋藥進口出口一事應於通商章程內定一專條其中越海路通商亦應議定專條此條未定之先仍照現章辦理

第七款

一中法現立此約其意係為鄰邦益敦和睦推廣互市現欲善體此意由法國在北圻一帶

開闢道路鼓勵建設鐵路彼此言明日後若
中國酌擬創造鐵路時中國自向法國業此
之人商辦其招募人工法國無不盡力勦助
惟彼此言明不得視此條條為法國一國獨
受之利益

第八款

一此次所訂之條約內所載之通商各款以及
將訂各項章程應俟換約後十年之期滿方
可續修若期將滿六箇月以前議約之兩國
彼此不預先將擬欲修約之意聲明則通商

各條約章程仍應遵照行之以十年為期以後做此

第九款

一此約一經彼此畫押法軍立即奉命退出基隆並除去在海面搜查等事畫押後一個月內法兵必當從臺灣澎湖全行退盡

第十款

一中法兩國前立各條約章程除由現議更張外其餘仍應一體遵守至此次條約現由

大清國

大皇帝批准及

大法國

大伯理璽天德批准後即在中國京都互換

光緒十一年四月

日

西曆一千八百八十五年六月 日

大清國 欽差全權大臣李

欽差總理各國事務大臣錫

欽差總理各國事務大臣鄧

大法民主國欽差全權大臣巴

創設武備學堂摺 五月初七日

奏為天津仿照西法創設武備學堂擬由海防經費內核實開支並俟辦有成效援案請獎恭摺仰祈

聖鑒事竊臣 上年七月間遵

旨選僱德國兵官來津當即派往水陸各軍認真教練業經附片陳

奏在案該兵官等或熟精槍礮陣式或諳習礮臺營壘作法皆由該國武備院讀書出身技藝優長堪充學堂教師之選據總統前敵各軍遇缺

題奏提督周盛波總統盛軍湖南提督周盛傳
等稟請仿照西國武備書院之制設立學堂遴
派德弁充當教師挑選營中精健聰穎略通文
義之弁日到堂肄業經臣批准照辦並令直隸
提督李長樂廣東水師提督曹克忠署廣西提
督唐仁廉四川提督宋慶總統銘軍記名提督
劉盛休正定鎮葉志超通永鎮吳育仁大名鎮
徐道奎皖南鎮史宏祖等各挑選弁兵送堂肄
業前來臣查泰西各國講究軍事精益求精其
兵船將弁必由水師學堂陸營將弁必由武備

書院造就而出故韜略皆所素裕性習使然聞其武備書院學舍林立規模閎廓讀書繪圖有所習藝練技有所專選世家子弟年少敏幹者童而習之長則調入營伍由隊目洊充將領非可一蹴幾也當其肄業之初生徒比屋而居分科傳授其於戰陣攻守之宜直視為身心性命之學朝夕研求不遺餘力而槍礮之運用理法步伍之整齊靈變尤為獨擅勝場我非盡敵之長不能制敵之命故居今日而言武備當以其人之道還治其人若僅憑血氣之勇粗疏之材

以與強敵從事終恐難操勝算該提督等各遣
弁兵來學誠欲因時制宜不得不變通盡利耳
惟是武備書院之設應建廠屋甚多需費甚巨
目下經費支絀不能不力求搏節臣與津海關
道周馥等籌商暫就天津水師公所安置生徒
名曰武備學堂遴委德國兵官李寶崔發祿哲
甯那珀博郎闡士等作為教師並選派通習中
外文字之員分充繙譯即於本年正月將各營
送來弁兵飭該道等悉心考試擇其精悍靈敏
者挑取百餘名入堂肄業其中有文員願習武

事者一併量予錄取並令與該兵官等妥立章程認真訓練數月以來各學生逐日按時進堂左圖右書口講指畫於西洋行軍新法頗有領悟一月之中每間三五日由教師督率學生赴營演試槍礮陣式及造築臺壘之法勞其筋骨驗其所學每屆兩月由臣派員扁試一次分別賞罰約計一年後於西洋後膛各種槍礮土木營壘及行軍布陣分合攻守各法必能通曉屆時擬將頭批學生發回各營飭由各統領量材授事復挑二批弁兵百餘人送堂肄業分番迭

進期無間斷其優者或留堂作為幫教習或回營轉教員弁數年以後教學相長觀摩盡善北洋各營必全曉西洋近日行軍制勝之方矣獨是泰西武備之學皆從天算輿地格致而來欲造其極詣必先通其語言文字乃能即事窮理洞見本原擬俟經費稍充另行建立書院選募良家年幼子弟入院肄業以宏造就學成後再調營帶隊俾資歷練庶乎有本之學將材日出而不窮可備

國家干城禦侮之用現時學堂經費除洋弁已遵

旨酌定辛俸教習繙譯各員應酌量差事煩簡分別
開支薪水外其餘學生飲食紙筆器具獎賞等
項及添造住屋購買西洋兵事書籍圖畫測量
儀器各種均擬在北洋海防經費內撙節開支
按年核實彙報至學堂為培植將材根基中土
創辦之初風氣未開不可不多方誘掖以收鼓
舞作新之效擬將教習繙譯各員及屢考優等
堪充教習之學生援照同文館成案二年奏保
一次以示鼓勵庶幾在事人等奮勉圖功成就
更速所有天津創設武備學堂擬由海防項下

開支經費並俟辦有成效撥案請獎各緣由謹
繕摺具陳伏乞

皇太后

皇上聖鑒勅部查照謹

奏

議展朝鮮電線摺

奏為遵

旨籌議展設奉省至朝鮮陸路電線酌擬辦法恭摺

覆陳仰祈

聖鑒事竊臣承准軍機大臣字寄光緒十一年正月

初六日奉

上諭吳大澂奏籌辦朝鮮善後事宜一摺所稱由奉
省籌款添設電線自旅順接至鳳凰邊門外交界
由邊界至朝鮮國都該國亦頗樂從等語著李鴻
章慶裕吳大澂通盤籌畫會商妥議奏明辦理等

因欽此旋准吳大澂等來咨轉據朝鮮國王咨稱擬自仁川港起安設陸線由漢城至義州達鳳凰城共一千三百里該國財力一時難辦請由北洋籌借限年歸款等語臣查朝鮮為遼瀋屏藩毗連俄日邊境內患外侮在在可虞必須及時接設電線以通信息而便調撥近年日本曾託大北電報公司安置海線由該國西北海岸設起經對州以達於朝鮮釜山並聞朝日訂約五條第一條有陸線承之字樣第二條有二十年朝鮮政府不架設與該海陸線路對抗爭

利之電線並不准他國政府及會社布設海底
線等語是朝鮮設電之權利已為日本所侵攘
幸所設止釜山一口且係水線尚未展至陸路
若不趕緊代為籌辦竊恐日本先我為之將由
釜山徑達漢城水陸線索盡落他人之手中高
氣脈不能靈通此次因朝王商請正當迎機善
導為朝鮮保護陸線之權惟北洋經費枯竭而
奉省亦無款可籌工料浩繁開辦不易當飭總
辦電局道員盛宣懷妥議具復茲據該道議復
四條一曰籌款中國前造津滬電線水陸通計

每里合銀六十五兩六錢有奇今官線已達瀋陽由瀋陽至鳳凰城四百八十里鳳凰城至邊門又一百十里如以津滬陸線比較計需銀四萬兩自仁川至漢城達義州以抵中國邊門據朝鮮咨稱合一千三百里計需銀八萬五千兩另備添設馬山行軍電線及常年修理各項銀一萬五千兩共需銀十四萬兩如工料有可減省之處則樽節存儲以備常年經費不得絲毫虛糜惟北洋與奉天實難籌款似舍滬關出使經費外無可取資一曰定章朝鮮陸線中國官

為代辦易啟猜忌或援照壬午年招商局代借
辦法擬由中國電報總局代朝鮮政府籌借公
款銀十萬兩分限二十年按年由朝鮮歸還銀
五千兩仍由電報總局催收轉解北洋免其計
息此線既由中國電局代為借款創造朝鮮還
款未清之日應由中國電局代為管理以期款
項有著一曰分任華界電線約六百里應在所
籌款內撥銀四萬兩責成北洋電報官局選派
熟手妥員造辦歸併官局經理其自仁川至邊
門電線約一千三百里應責成中國電報商局

與朝鮮政府立約派員辦理其測量打報學生
均由電報學堂隨時撥用一日善後邊門以內
電線常年經費擬由東邊道就近籌畫朝鮮之
線則造易而守難商報無多財力竭蹶雖於借
款內極力節省餘銀只可留備修理而局費巡
費每月需銀若干所收報費抵用不敷應由朝
鮮另籌津貼各局董事司事學生工匠人等目
前暫由中國電報局代為延僱以資熟手仍一
面遴選朝人到局學習以冀逐漸換撤俾垂久
遠等情稟復前來臣查所議各條尚為切實周

密查據江海關道邵友濂電稱出使經費存項
尚可周轉擬請

勅下總理衙門於出使經費項下暫行借撥銀十四
萬兩以應急需臣即檄飭督辦電局盛宣懷遴
派熟悉電務妥幹之員馳赴朝鮮先與妥議辦
法訂立合同隨帶華洋工匠勘路繪圖一面購
辦物料趕緊開辦以期迅赴事機所有遵

旨籌議各緣由謹會同奉天將軍臣慶裕都察院左
副都御史臣吳大澂恭摺馳陳伏乞

皇太后

皇上聖鑒訓示謹

奏

駐朝慶軍移駐旅順摺

奏為遵

旨撤回駐朝慶軍調紮旅順以資控扼而備援應恭摺仰祈

聖鑒事竊本年三月間中日訂約撤兵議自畫押蓋印之日起以四個月為期限內各行全數撤回旋往駐日使臣徐承祖電稱日本外務卿井上謂駐朝中日兵丁屢次滋事恐釀巨案致乖友誼兩國宜即派員往朝撤兵不必拘定限期等語經臣轉電總理衙門代奏欽奉四月初九日

電

旨條約互易後兩國即撤駐朝防兵不必拘定限期
惟於撤兵之先該大臣應照會日本同時並撤不
得稍有先後等因欽此

聖訓精詳自應遵

旨妥辦徐承祖五月初一日來電接日本外務省文
稱該國已於二十六日派船往撤駐朝日兵仍
暫留一百五十二名屆津約期盡再撤臣恐其
暫留之兵或有逗遛情事因電致徐承祖告以
慶軍不久即撤應速商外務將日兵同時全數

撤回以踐原約十七日接徐承祖回電日本先
撤之兵現已回國日外務云暫留之兵隨時可
撤請將中國派船及撤兵日期電知以便同時
盡撤各等語臣查兩國撤兵限期扣至七月初
四日屆滿為時已近今日本在朝兵弁既經先
撤回國其暫留之兵亦允與華軍同時並撤則
我軍自未便久留臣檄飭提督吳兆有督率各
營官即將漢城內慶軍左後副三營整備行隊
拔赴馬山浦暫駐參將方正祥所帶正營分駐
水原之三哨亦次第拔赴馬山浦統於六月初

七日在該浦取齊候船內渡 臣一面將撤兵日期電致徐承祖屬其知照外務迅將日本暫留朝鮮之兵盡數撤回勿任其稍有先後致煩

聖屢惟朝鮮國勢尪弱強鄰環伺內憂外侮在在可虞防軍不得不撤所以暫息爭端援軍不可不張所以遙作遠勢前准總理衙門函商朝鮮善後之策以旅順及鳳凰門外水陸兩路均宜有備慶軍撤回後應酌量移紮何處 臣查由邊門至朝鮮王城千有餘里山徑崎嶇遇有緊急勢難剋期赴援而由旅順乘輪抵馬山浦兩日可

至自馬山水原以達漢城均慶軍熟由之路其險易要害皆所稔知且與北洋師船屯紮一處水陸相依聲援尤壯自以移駐旅順為宜因飭派海鏡官輪並酌調商輪兩艘陸續駛往限於六月初十日齊泊馬山浦將慶軍四營弁勇及軍裝馬匹子藥等件全數運回旅順即令分紮口內東西兩岸礮壘與該處舊有各營聯絡操防以資控馭而備援應所有撤回駐朝慶軍調紮旅順緣由謹繕摺由驛具陳伏乞

皇太后

皇上聖鑒謹

奏

張樹聲建專祠摺

奏為已故督臣勛勞卓著遺愛在民請建專祠以
隆報享恭摺仰祈

聖鑒事據署布政使松椿詳稱據保定府知府朱靖
旬詳據紳士張清元等聯名呈稱前署直隸總
督張樹聲以諸生從戎積功洊擢監司由江蘇
徐海道升任直隸按察使清理庶獄勤政愛民
羣情翕服同治五年秋捻逆賴汶光北犯張樹
聲督隊出駐大名扼守黃河擊退賊衆六年夏
捻復北擾是時直省兵單馬賊勾結鹽梟乘虛

竊發內外交訁樹聲奉

旨駐紮直東交界之張秋鎮防剿兼施寢食俱廢冬間
賴逆就擒方壹意專辦內賊西捻張總愚尋越
太行而東涉水渡河震驚

畿輔總督官文飛檄促樹聲回省比抵保陽賊已
至清苑之大汲店衆號二十萬省垣戒嚴樹聲
以保陽為京師屏蔽密通

西陵不可縱賊北竄夜縋出城商令勤王諸軍繞由滿
城易州依山而北迎頭邀截復出奇兵綴賊南
旋從而尾擊之賊由河獻饒武遁去

陵寢不驚燕郊安堵樹聲之力也七年春賊竄運東樹聲創協守運河之議督飭民團沿河築長牆分段固守張總愚率衆猛撲景州德州之交不得渡逆勢日蹙遂為官軍所殲直隸訟案之繁甲於他省素多積壓自張樹聲創立清訟冊式編定期功過章程案無淹留獄無痠斃至今踵行之民受其賜光緒八年樹聲在署督任內奏撥巨款修築河隄沿河州縣雖大水皆獲有秋其積潦之區如文大安雄各屬工賑兼施全活尤衆跡其生平宦轍由直而晉而吳而粵所至

有聲第就紳等所目擊而身受者臚舉大端豐
功美政深入人心三輔士民同聲頂祝允宜建
祠報享以伸去思乞轉詳入奏等情前來臣查
張樹聲一介書生起家軍旅荷

累朝特達之知由道員存領封圻去秋在廣甬防次病
歿仰蒙

優詔軫惜

卹謚有加凡屬臣工同深欽感該督臣政蹟久在
聖明洞鑒之中無俟贅述而微臣愴念同袍追憶患難
相從出入行陣萬死一生之境終有不能已於

言者張樹聲自為諸生即以忠義倡率鄉團屢挫髮逆百折不回同治元年臣督師赴滬樹聲號召同里敢戰之士如劉銘傳潘鼎新周盛波周盛傳等慷慨請從臣令樹聲募樹字三營相隨東下其後增至六營洄涇之役樹聲星夜赴敵督隊血戰擊退巨寇松滬肅清是為該督臣立功之始福山一口由海外入常熟門戶也得福山而後常熟可守得常熟而後蘇常可圖故在所必爭先是常昭降將殺賊獻城旋被圍困福山亦得而復失四面皆賊援絕勢孤臣令張

樹聲會同各軍航海入援背水為營出賊不意
尤為險著樹聲列隊於毛家山緊逼賊壘肉薄
相持與各軍輪番攻打遂克福山石城乘夜縱
兵四擊立解常昭之圍由是克復江陰規取無
錫樹聲督率偏師且戰且進節節滾紮勢如破
竹無錫既復諸軍乘勝攻常州而宜興溧陽丹
陽各賊冒雨疾趨繞竄腹地分撲江陰常熟無
錫各城冀撤常州之圍臣飛檄張樹聲抽調勁
旅三千橫紮江陰之焦店青暘以截歸路賊攻
各城不克遂分屯楊舍周庄等處屢奪路而西

輒為樹軍截擊不得出漸饑窘乃夜馳三河口
設浮橋六道為歸竄計樹聲偕諸軍感之橫屍
遍野河水皆赤是役也俘賊二萬人淹斃殺斃
無算而樹聲一軍堵紮要隘斷賊歸路禽斬逾
萬功為最多江陰東南竄賊殲除既盡時常州
城西賊營猶二十里樹聲與各軍次第掃蕩徑
薄城下盡夜環攻臣親督將士分段猛撲樹軍
由東城一鼓而上諸將亦奮勇先登遂克常州
府城留樹聲六營守之江蘇肅清復移師赴浙
進剿湖州之大錢口攻克湖州府城計自臣治

兵江南先後三年張樹聲身在行間大小數百戰迭克名城厥後臣督荊賴張兩股捨衆於直東之交張樹聲實左右之臨敵輒居人先論功常居人後蓋其天性謙遜而又澤以詩書文武兼資外和內介求之近世功名之士尤為難得該督臣年尚少臣一歲方期共濟時艱勉副恩遇不意先填溝壑採直北之輿評思征南之舊事俯仰陳迹彌用愴懷未便任其湮沒張樹聲服官數省其治行廉正精覈人所共知臣第據直隸紳士公呈並撮舉吳中戰績之大者覲縷

上聞以備

採擇查近日吉林紳士呈請為富明阿建祠經吉林將軍希元奏蒙

恩准今該紳等聯名呈請同係愛戴至誠合無仰懇天恩俯准將前署直隸總督張樹聲在於直隸地方建立專祠以順輿情而隆報享至江蘇係該督臣劉賊立功省分應有祀典以勸勞臣可否准其一體建祠出自逾格

恩施所有已故督臣請建專祠緣由理合恭摺具陳伏乞

皇太后

皇上聖鑒訓示施行謹

奏

議覆開源節流摺

奏為部擬開源節流各條逐一體察議覆仰祈

聖鑒事。前准戶部咨開會議籌餉一摺。單一分應由各省遵照辦理等因。當經分飭司道關局各就實在情形認真籌議。旋據分條具覆。前來竊維理財之法。誠不外開源節流二端。臣久更兵事。備歷艱辛。又忝任畿疆瘠苦之區。於生財節用之道。未嘗不力求實濟。凡有源可開而為耳目所及。民情政體無礙者。無不斟酌施行。其一切用款。則必權其緩急輕重。是否在所必需。力戒

浮糜嚴稽出入無要者分別停緩必需者亦不敢過事吝刻致誤機宜惟直隸土薄民貧素鮮物產實非南省可比絕無利源可開而差繁事劇災歉頻仍出款皆有定章亦無可分外節省之處方今外患日迫不得不亟講自強拱衛根本海防為久遠要圖屢蒙

諭旨飭辦事關重大尤未可以尋常比擬者戶部前於籌餉及議覆下寶第裕餉疏內謂近年實入各款不為不多民生日苦未可於此外再事苛求又言若必搜求利孔竊恐適以厲民於議覆

余思詒開餉源疏內謂自輪船通商內地生計已不如前重以釐捐民用更困若再加徵絲茶糖酒獲利幾何擾民無藝於開捐疏內謂此時流未易節源未易開求其不病商累民而於財用可稍裨者惟開捐一事等語是近今開源節流之難部臣已籌之熟矣臣仍當節慎度支隨時隨事設法經營就款核實籌辦以冀稍裨時局謹將部擬各條及司道等詳稟分別可行不可行逐一議覆繕單恭呈

御覽伏乞

皇太后

皇上聖鑒勅部查照謹

奏

卷一

三十八

謹將部擬開源節流二十四條逐一體察議覆
繕單恭呈

御覽

開源第一二條擬令兩淮按引收捐其餘有鹽
務各省能否仿辦並擬令各省加收鹽釐查長
蘆係滯銷之區現行京外引六十餘萬道向不
能如數領運課款則須商人包賠從前每引課
款不過一兩一二錢道光以後逐漸加增並將
舊商虧空責令現商攤補又有軍需復價禁工
加價等款每引須完銀二兩數錢且兵燹災荒

之後物價昂貴成本較重遂致商累日深雖迭
次設法整頓而課帑仍有短欠懸岸尚未規復
實無力再捐餉加釐戶部於議覆余思詒請加
鹽價疏內謂多取於商則成本重必至滯銷強
取於民則閭閻貧賤食私流弊日甚近年奏銷
未盡依限引課未盡全完今再議加價恐因此
商力疲困額課終虧非慎保釐綱之計等因所
論實洞見本原長蘆既引滯商疲亦向無冗費
自無庸另議

開源第三條擬就出茶處所徵收茶課查直隸

並不產茶應無庸議

開源第四條擬給販運洋藥華商行坐部票按
票捐銀查天津洋藥除完進口稅外已月定新
章每百觔統令華商交釐稅銀八十六兩詳細
分咨總理衙門戶部在案實較票捐為數增多
辦法亦甚直捷至行坐票事涉繁瑣商情不願
若重複令捐亦非政體應無庸議

開源第五條擬令沙田及牙帖捐輸查直隸並
無沙田其各屬牙行皆因地瘠民貧市面極小
所取用錢除照例納稅外僅敷餬口若令按年

另請部帖捐銀數十兩數百兩勢必藉端騷擾
勒索商民害無底止咸豐十一年戶部曾令直
隸牙行赴部認課領帖旋因百弊叢生地方不
堪其擾同治元年經戶部奏明停止仍照舊由
州縣徵解是此事礙難改章已有明證應無庸
議

開源第六條擬給煙行酒行部帖按年納課查
直隸酒業以燒鍋為大宗早歸戶部給帖收課
無可再議此外惟向燒鍋販賣小本營生其煙
葉間有栽種之處不過一隅中之一隅亦係零

星小販各屬煙酒兩業往往兼賣雜貨並無專
行大棧勢不能加征其課算及錙銖致礙小民
生計應無庸議

開源第七條擬令匯兌票號入貨領帖查天津
匯兌票號係由京城分設迭飭府縣傳諭遵照
據稱該分號僅為京城上海各莊傳遞信息函
運銀兩並非自做生意無力完課一切事宜皆
以京號為進止等語已咨順天府尹核辦應俟
京號定議再行察酌

開源第八條擬劃定各項放款減平減成查直

隸司道府廳州縣年例放款及旂綠各營兵餉
有每兩應扣六分部平者有減一二三四成者
有款關重要或數目零雜不能扣減者早經劃
定章程奏咨有案其所收扣平減成銀兩藩庫
則因入不敷出奏明留存備用運庫津關道庫
則按年解部亦各有一定章程應均循舊辦理
此外各軍餉需海防用款惟淮軍薪餉等項向
按湘平支發折成庫平報銷原為節省起見但
以所收庫平核計每兩實止應扣三分六釐三
毫並無四分之多出入一律毫無參差未便改

扣四分轉致軍士疑怨至各鎮練軍及津防各營薪糧本較湘淮餉章銀數減少又值海防勞瘁勢難再行扣減又如購置外洋船礮軍械機器料物等項皆與洋人交涉修築礮臺等工或係洋匠包辦及洋員洋匠薪工有以英磅馬克佛郎洋元折合庫平者有以規平津平行平折合庫平者有本用庫平者皆隨宜核實辦理斷難強令扣平減成又如津海新關開支薪工經費各款華洋員弁書役扞手同在一處當差凡稅務司所用者皆發庫平不能扣減則監督所

用之人亦未便扣平轉致事多掣肘又如天津
貨釐項下支發各款所收釐捐本係天津市平
每兩較相平尚短四釐祇能原收原放亦不能
再減凡此皆應循舊無庸更議者現飭自本年
六月起將天津支應局機器局保定練餉局支
發各局所文武員弁司事書吏人等薪水公費
及水師船艇雷營薪糧公費等項並地租礮費
雜支用款概按相平扣放每兩扣銀三分六釐
三毫仍列收本案作正開銷毋庸另存解部先
將應扣各款由各該局開具簡明清單咨部備

案准軍向係統扣無庸再開至洋銀每元約合
紋銀七錢制錢每一千六百文約合銀一兩但
各處市價隨時低昂不定未可繩以官法若必
明定劃一章程轉涉虛偽應仍隨時核實辦理
開源第九條擬嚴提交代徵存未解銀兩並嚴
定交代限期此事前已迭飭藩司等認真整頓
清理應再查照部議及向例向章分別查辦力

杜虧挪

開源第十第十一條擬嚴催虧空應繳應賠各
款及入官產業勒限變價解部亦飭藩司等分

別查辦

開源第十二條擬酌提漕規鹽規餘款查直隸
並無漕務其長蘆鹽務項下緝私經費每年僅
收商捐銀三萬餘兩應撥永平所屬七州縣官
辦緝費銀一萬六千兩向存運庫扣抵該州縣
應交課款又撥滄州等四州縣商人緝費銀八
千五百兩薊州等六州縣商人緝費銀八千兩
係屬商捐商用核計尚有不敷長蘆素稱瘠苦
商情疲累實非他省可比向無院司各衙門鹽
規應無庸議

節流第一條擬裁減釐局經費除津海關洋藥釐捐與貨釐情形不同早經奏定經費數目由商董自行經理現定新章加重收捐必須添設巡卡丁役已另行專案咨部外查直隸僅天津大名兩處設局抽收百貨釐捐每年約收銀十萬餘兩其應支總局分卡委員司事薪水差役巡丁工食房租船價煤炭油燭紙張等項一切用款係查照部章統計不及一成之數歷經報部准銷有案此次部議謂各省釐局經費有扣至五成者有一筆開銷銀十數萬兩或數十萬

兩者皆係他省之事直隸既照部章樽節辦理
自應仍循其舊

節流第二條擬核減各關經費查直隸天津道
所管海稅通永道所管木稅每年例定經費僅
止銀數百兩皆不敷用津海關道所管新關係
督飭稅務司經理向於洋稅項下每兩坐扣八
分以充華洋員弁薪工一切經費往往收不敷
支須照奏案由洋藥釐捐項下撥補分別按年
按結報銷有案均屬無可核減亦無開支補平
補水及匯費諸名日至該關道所管鈔關每年

向有京中閣部院科平飯津貼及本關經費銀一萬二千九百餘兩除閣部院科解款不減外其本關經費已兩次議減二成現止按六成開銷今擬於無可節減之中自本年三月關期之日起再行設法核減一成銀一千六兩五錢七分三釐一併報解歸公連前共減五成較例定數目省出一半矣

節流第三條擬該定各省局員額數銀數查直隸前於咸豐同治年間有因尋常事件分設各局或事竣而局未撤者臣已早飭裁汰歸併司

道等辦理以節糜費惟北洋為洋務總匯之區
交涉極煩兼之籌辦海防事體重大凡水陸各
軍糧餉軍火等項采辦製造轉運收放各事以
及教練兵弁並一切緊要營務洋務工務頭緒
繁難臣斷不能以一身兼理衆務必須分設局
所學堂遊員經理各專責成力圖精進迥與尋
常省分事例不同近復屢有新章簿書期會之
繁數倍曩昔臣迭就事務之緩急定員數之多
寡薪水之等差有一局而派若干員亦有一員
而兼若干事要皆量材器使稱事授楮其無關

緊要及可相因而理者隨時分別裁併決不任
冗員充數業飭天津海防支應局保定練餉局
各將支發員數銀數查明專案咨部其歸淮軍
報銷局天津機器局支發者亦迭經奏咨准銷
有案惟海防規模難定勢難遽為定額應仍隨
時核實辦理總期不糜費亦不誤事

節流第四條擬隨營文武分別裁汰酌定額數
銀數查淮軍公費一項按照營制並無委員薪
水在內故隨營辦事得力委員不論有無奏調
向准開支薪水前已迭次節減並歷將員數銀

數奏咨准銷有案現值海防緊要巡查轉運催
提各事一切佐理需人難再議裁其直隸提督
李長樂移駐海濱隨營辦事員弁亦於光緒六
年奏定員數銀數由天津海防支應局支發均
應照舊辦理除再將員數銀數咨部外至練軍
各營事務稍簡現無隨營員弁應無庸議

節流第五條擬酌減內地各省防軍口糧查直
隸係海防省分各營皆屯紮海口要隘異常勞
苦不在部議減餉之列至各鎮練軍原因制兵
餉需太薄無以贍其身家即不能得其死力故

議加餉抽練歸併成營化其游惰之習以期一
兵得一兵之用現在調駐海防者十之七撥赴
各屬擇要巡防及遠戍邊外多倫朝陽庫倫者
十之三並非無事坐食礙難議減應仍照舊支
給以固兵心

節流第六條擬酌減內地防軍長夫每營五百
人只准用一百名查直隸各軍除屯紮海防無
庸議外其練軍馬隊平日只有伙夫本無長夫
名目步隊每營五百人除伙夫外平日僅有長
夫二十四名既不及百名之數自無庸更議

節流第七條擬防軍有營房者不桂重複再領
帳棚查直隸各軍或在海口操防工作或巡防
大道要隘地曠人稀風勁日烈必須支搭帳棚
方免露處亦不致佔礙民居歷係照章製給帳
棚應用其有底營營房者係由營中自辦以備
回營時暫作棲止及堆儲軍裝食米等件並非
既領營房經費又領帳棚向無重複開支情事
應仍循舊辦理

節流第八九條擬核定內地及防戰各省兵勇
餉數並確估各項軍餉按年指撥查直隸綠營

制兵除撥歸練軍外底營所存無多不敷差操
迭經咨行提鎮核議無可裁減但不准空額及
老弱充數其銀數餉數及按年估撥事宜飭由
藩司分別開報核辦至山海關北塘等處新募
津勝等營係專就部餉支放業經分晰造冊報
部外其各鎮練軍練勇馬步隊計三十一營六
小隊礮隊四哨共官弁兵勇一萬四千餘人應
需餉乾薪公軍裝軍火並伙夫長夫等口糧各
項雜支及河工經費核計月支銀十萬餘兩每
月向指部撥固本餉五萬兩江海關協餉連河

工在內合三萬兩長蘆鹽餉復價連藩庫底餉
不及二萬兩近年江海關欠解至五十餘萬兩
實屬收不敷放淮軍原有馬步隊及舢板礮船
計四十七營十六哨四十二棚共官兵勇二
萬四千餘人月需餉乾薪公購製軍裝軍火教
習員弁及小輪船舵水工匠長夫等口糧及各
項雜支銀十九萬餘兩向指各省關奏定專款
解濟近來解數漸不加額且有歷久未解之處
支絀益甚津防原有練軍並大沽北塘等處官
兵計十四營三小隊共官弁兵夫六千餘人歲

需餉乾薪公軍裝軍火各項雜支約銀三十六
七萬至四十萬兩向指長蘆鹽餉復價歲解銀
十萬兩津海關洋稅藥釐歲約撥銀二十萬兩
左右東海關協餉每年原額六萬實解五萬兩
以之抵支恒苦不足故每年須截留長蘆撥解
保定練餉二三萬兩藉資接濟以上營數人數
餉數及實支數目歷經分起造冊報銷部中均
有案可稽今再將各省關應撥淮軍餉銀額數
及近年解數另行彙冊咨部直隸為近畿門戶
根本重地沿海地段綿長四通八達東西洋各

國往來窺探虛實不可無勁旅駐防為建威銷
萌之計又須於奉天之旅順口作為海外水師
口岸駐軍布置相為犄角現有新舊各營難議
裁減餉需斷不可缺除部餉按月請領外其淮
軍練軍指撥協餉皆係同治七八年會商各省
奏定之案彼此遵循已久呼應較靈自無須按
年另行估撥轉致觀望延誤應仍由部催令各
省關務照原額源源撥解以維大局至奉撥北
洋經費一款專為創辦水師購船置械選將練
兵係海防久遠至計經總理衙門戶部奏定應

由江蘇浙江歲撥釐金各二十萬兩江西湖北
廣東福建歲撥釐金各十五萬兩並撥粵海關
海浙海山海各關四成洋稅及江海關二成洋
稅原議稅釐兩項每年約可得銀二百萬兩臣
因各省釐金收不敷解奏准減撥八成並添撥
各關四成招商局稅乃廣東福建釐金皆截留
自用江蘇則以湖北無著之款空抵浙江湖北
停解已久江西亦解不及半又值各關稅收短
絀每年解到者不過數十萬兩自上年海防告
警報撥更稀來源枯竭現在庫無存款而所購

西洋鐵甲鋼快船魚雷艇轉瞬即至月需巨餉
養活操巡並訂買各種槍礮價值及應發緊要
餉項多而且急一籌莫展焦灼萬分昨欽奉

諭旨海防以大治水師為主船廠如何增拓礮臺如
何安設槍械如何精造均須破除常格實力講求
並遴選將才籌畫經費等因誠使擴充辦理必須
另籌大宗的款庶免空言無補即就北洋目前
事局已覺岌岌難支所有各省關撥定經費應
請由部一體嚴催設法籌解以救燃眉之急至
北洋現有船艇礮臺雷營庫廠船塢學堂等項

已隨時奏咨有案其船數人數餉數因規模未定勢難作為定額應俟察酌情形續籌奏辦

節流第十條停止不急工程查直隸地方惟各河工程關係民生水利最為緊要頻年多就捐款樽節修辦以工代賑一舉兩得此外但係無要者概議停辦茲再照部議飭司移行各衙門一體遵照

節流第十一條擬各項欠發勒限清釐各項預支分別核辦查直隸係缺額省分向來藩庫入不敷出故歷年欠發之款不少即使以前者設

法清釐以後者仍不免欠發惟有隨時察看庫
儲情形酌量核發其俸餉等項無論新舊以每
年只發四季為率不必遽將舊欠停發使應領
者絕望人心不固以後辦事為難至各鎮營及
各屬有於頭年封印前預領次年春餉者係歷
辦章程毫無弊混各有奏銷撥冊可稽茲已飭
藩司將歷年欠發各款查核造冊送部此外歷
年

陵工長墊及橋道差場差等項經費並各屬墊支年例
各款因候准銷部覆故未給領勢難作為舊欠

且多已列入交代作抵無庸造冊應仍隨時照數核發有交代未清者扣除撥抵又歷年文武衙門俸廉馬乾役食工料及駐防孤寡錢糧等項或因候算交代或因輾轉行查任卸起支日期勢不能年清年款應俟查算明確照數給領仍與奏銷撥冊內分晰造報至應預發各款若不論輕重緩急概令報部聽候覆准始准開放必致貽誤事機其關係緊要者應仍由臣等隨時核實酌發以符向章再准軍向有欠餉一項初因各省撥解愆期未能按月發足致有短欠

本應隨即補還惟餉需支絀不得不節縮經營
故雖酌補舊欠而新餉仍有欠發所以慎度支
備緩急也近日海防緊要須購大宗精利軍火
曾與各軍商借欠餉五十萬兩移緩應急又如
派防朝鮮各營該國銀賤物貴月餉不敷日用
又分紮沿海各營操巡工作異常勞苦用費既
多衣履亦易破壞皆須酌發欠餉津貼勢難停
止不發致拂軍情應仍照舊核實辦理隨時將
補發之款列冊報部除截至光緒九年底欠餉
數目已於第十二次銷案開報外其十年分欠

數俟第十三次報銷咨送又津防報銷案內歷年欠發銀兩亦即開單咨部再行陸續酌發

節流第十二條另定各省起運存留查直屬地糧起運存留各數遇有增減向係隨時更定如咸豐八年裁減鋪司工食即於存留銀內核除歸入起運項下造報光緒二年議定

文昌帝君加祭祭品又於起運銀內提出列入存留項下造報他項類此並非仍循嘉慶年間舊額查無留多用少輻輳參差之弊至官俸役食駟站夫馬工料早經奏定十成實銀其留支項下

應行扣解司庫各款須各照該年應支數目核
扣多寡不同勢難預定况係缺額省分與他省
庫存候撥者不同自無須通查奏改免致繁費

周盛傳請卹摺 七月初六日

奏為統兵大員甫經奔喪回籍旋因傷發病故謹
臚陳事蹟請

旨優卹恭摺仰祈

聖鑒事據總統盛字新舊各營遇缺題奏提督前涼
州鎮總兵周盛波呈稱胞弟盛傳前奉

恩旨賞假百日回籍治喪遵即星奔就道頃接家信
知於六月初五日馳抵里門日伏苫次哀慟過
甚以致牽發舊傷創痕迸裂嘔血數升竟於六
月十四日酉刻出缺等情前來伏查周盛傳籍

隸安徽合肥縣咸豐初年偕胞兄盛波在籍辦團值偽英王陳玉城偽孚王陳德才等大股悍匪麇至盛傳以少擊衆屢獲大捷以驍勇著名同治元年臣督師赴滬檄令帶隊東下是年七月率師攻克清浦八月回援上海擊敗偽慕王譚紹洸之衆於北新涇九月攻克嘉定復會諸軍馳解四江口之圍二年二月攻克太倉州城先是賊酋蔡元濬獻城偽降我軍倉猝中伏盛傳以嚴兵殿後賊不敢逼七月攻克江陰縣城十一月攻克無錫縣城生擒偽潮王黃子濬父

子乘勝進攻常州受礮子傷甚重三年春常州
守賊偽護王陳坤書由城中分竄揚庫以擾官
軍之後盛傳抽隊回剽盡殲之復率所部踣毀
城外賊壘逕薄城根與賊搏戰城上礮石如雨
頭面又受重傷昏暈竟日猶裹創強起與諸軍
併力猛攻奮勇先登遂克常州府城旋移紮溧
陽收復廣德逐賊於湖州徽州之交江浙皖南
逋寇以次蕩定而擒逆大股由楚竄擾英霍臣
與前大學士曾國蕃商調該軍渡江迎剽四年
五月前安徽撫臣英翰被困於雒河盛傳麾軍

立解其圍遂獲奇捷五年三月連敗賊於考城
鉅野城武荷澤等處拜翎管撥指刀鑲荷包之
賜五月擊牛落洪於亳州龍王廟大破之七月又解柘
城之圍六年二月奉

旨補授廣西右江鎮總兵四月虜賊於信陽之譚家河
斬馘逾萬旋由豫入東轉戰至江蘇徐海賊勢
漸衰東捻尋即肅清而西捻張總愚一股蔓延
河朔七年正月臣檄調該軍隨同北上追賊於
直東豫之交屢有新禽五月賊竄吳橋盛軍時
駐該縣毛家莊偵賊將至設伏狙擊大破其衆

乘夜追至德州之楊丁莊四面合圍縱擊搜斬
殆盡陣斃張逆之姪張三彪生擒逆首李老懷
及大小諸賊目西捻不復能軍遂以殲滅九年
臣督師赴陝威傳剿平北山股匪旋移軍來直
調補天津鎮總兵創築新城仿造洋式礮臺以
實大沽後路又於津東之新農鎮至大沽海口
創開新河九十里分闢支河十數條上接南運
減河又於減河兩旁多開溝渠以便農民引灌
其新農鎮以下又開橫河六道添建橋閘三十
餘處分運河盛漲下匯海潮借淡刷鹹營成稻

田六萬餘畝其瀕河兩岸可墾田地奚止億萬畝居民賴之一變從前斥鹵之舊屯田水利百廢具興沿海一帶畎澮交錯樹木成陰兼可限戎馬之足工作餘暇日以教操為事而於西洋後膛槍礮尤能深窺祕奧手著操槍章程十二篇訓迪弁勇三令五申每合各營打靶取準校其優劣捐廉獎賞以故爭自濯磨技藝精熟盛軍利器足與西洋相埒為各省防軍之冠非偶然也平日治軍專以不擾民為主駐軍之處紀律肅然秋毫無犯比歲存饑集將佐捐資設廠

賑粥遠近窮民全活無數日短衣匹馬巡視各營與士卒同甘苦醫藥有資殯葬有所人憚其嚴又未嘗不感其惠生性至孝同治十一年由津假旋適值母病刲股和藥以進嗣後屢以親老乞歸臣因

畿防重要堅不放行光緒八年擢授湖南提督盛傳感激

恩知益思自効不敢復以家私為念惟頻年在營積勞病劇方慮其困憊難支夏初聞訃不忍不令其奔喪藉資休養仍與約定百日期滿即須遵

旨回營不意哀戚奔馳觸發舊傷遽爾身故該提督
隨臣剿賊辦防近三十年實與兵事相終始今
畿輔失一千城警少一臂助顧時局之日艱痛將
材之凋謝不能不為

朝廷惜此人也合無仰懇

天恩敕部將署理湖南提督周盛傳照提督軍營病
故例從優議卹並將戰功事蹟宣付史館立傳
以彰忠盡至淮軍諸將如程學啟張樹珊楊鼎
勳郭松林吳長慶等均蒙

恩准建祠

予謚周盛傳勳績與程學啟諸人相等而約束軍士
講求操防堅忍耐勞興利通變其經綸智略尤
過之應否

賜謚並

准其於安徽原籍及立功省分建立專祠之處出自

逾格

恩施非微所敢擅擬所有統兵大員傷發病故緣由
謹繕摺由驛具陳伏乞

皇太后

皇上聖鑒訓示謹

奏

卷一

三

輪船修工核扣新糧摺七月初八日

北洋通商大臣大學士直隸總督一等伯臣李鴻章
南洋通商大臣兩江總督一等伯臣曾國荃跪

奏為輪船修工期內核扣新糧應照閩章辦理礙
難率改以期持平而免窒礙恭摺仰祈

聖鑒事竊查閩省船政前議輪船修工期內核扣新
糧章程定以四十日以內為小修四十日以外
為大修遇大修之船自管駕以及各項人等薪
糧通船概給五成公費月給銀六十兩水手幫
同做工礮勇令其操演小修不在此例如更調
管駕新募舵水俟修竣試車之日起支亦不在

此例等語歷經查照辦理在案嗣准兵部咨以大修概給五成未免漫無區別將月支銀自二百六十兩至一百兩者遇修工期內改為支給二成薪糧月支銀自六十兩至四十兩者遇修工期內改為支給三成薪糧月支銀自三十兩至二十兩者遇修工期內改為支給四成薪糧其餘月支銀十六兩至八九兩者遇修工期內即照所擬支給五成薪糧無論大小修一律照扣儻有經年始能修竣之船其管駕人等應即先行撤遣俟修竣試洋之日再行照額募補以

節虛糜等因臣等查南北洋各兵輪船薪糧本較陸營為優原以兵輪船創自西洋其用人薪費獨豐中國經營船政不得不做而行之而在船各色人等又須選擇精於駕駛熟諳機輪之人方能勝任非若陸營募勇但求年富力強者便可操練成軍也顧此等人各挾所長以圖口食駛之之法必平日有以養其誠服之心臨事乃可鼓其忠義之氣若因惜費之故招之來而麾之去以言經武將廢教習之前功以言儲才難收鼓舞之實效權其輕重似小費未可概省

而船章尤貴持平前次閩廠所定大修期內概扣五成薪糧減發公費銀六十兩小修不在此例原於搏節餉項之中仍寓固結人心之意且入隲修船時弁目監修水手做工礮手操演仍各有應辦之事非同虛糜今部議按支數之多寡改為支給二成三成四成五成薪糧經年修船者應即遣撤在部臣以餉需支絀力求搏節具有不得已之苦心苟外間可以勉力奉行自應遵著為令惟其中窒礙多端實難緘默不言蓋兵輪船充當執事者大都閩廣滬甯之人其

始多受僱於商輪船司理駕駛機器諸事兵輪
船取其駕輕就熟是以招而用之加以操練使
就範圍然欲一船之人指臂相聯性情相習亦
非管駕官數年之訓練不可顧此輩浮動之習
計較之私在所不免使知修期大減薪糧修期
久者且須遣撤則此船不合必去而之他船此
省不合又去而之他省其技藝可觀者既不能
禁彼之不去又安能強人之不留迨至一船修
竣而得力之大副鈇櫃無人服習之水勇斃手
無人從新招募操練需時倉卒設有事端其何

恃而禦侮且天下事有一利必有一弊以數十
百萬金製成之船付之一管駕之手此事何等
鄭重儻該管駕官因修船減餉過甚而遂遷就
從事遇銅板之偶有鏽蝕而不修遇木壳之偶
有剝朽而不修遇機器鍋鑪之偶有損傷而不
修日復一日必將一壞而不可收拾又或修船
慮減餉之多遂至先留餘地船衆既遣撤之後
遂至率招賤工此皆臣等所反復籌思審其利
弊而深慮得失之不相侔者當此餉源枯竭之
時臣等亦知節省為第一要義惟兵船大修期

內業經照章核減薪糧若節省太過不得其平
其弊轉至多所損失合無仰懇

天恩俯准南北洋兵輪船修理仍照閩省原議章程
於四十日以內為小修不扣薪糧四十日以外
為大修通扣五成薪糧以示體恤之處出自

逾格鴻慈謹合詞恭摺具陳伏乞

皇太后

皇上聖鑒訓示謹

奏

老子

卷下

覆陳直省出入款項摺七月初八日

奏為直隸藩運關庫及淮練軍海防餉需出入款項就近數年情形切實約計逐款分晰開單恭摺覆陳仰祈

聖鑒事欽奉五月初八日

寄諭各省關每年所入之款究竟實有若干其常年例需及現在添支防勇局卡餉需薪水各款實在費用若干此後常年可以裁減歸併節省之款若干著切實核計逐款分晰開單奏報等因仰見

朝廷經畫海防通籌國用至意欽服莫名當飭藩運

司關局各就出入款項認真遵辦茲據陸續詳覆前來臣維直隸為

畿輔重地各省通衢向來事劇差繁供億極巨即如各

陵寢祭品守護官弁兵役俸餉大小差橋道等項經費古北等處口外駙站經費張家口外牧丁經費熱河經費皆他省所無者駐防旂兵他省或有或無其有者數亦無幾直隸則處數兵數獨多凡此皆動需巨款駙路四通八達夫馬之費亦復不少他如綠營河營兵餉各屬官俸役食及

一切緊要支款並永定南北運等河工費新增
東明黃河工費均關地方治忽民生利病又須
撥解京餉暨東三省新疆協餉而地方貧瘠源
無可開加以災歉頻仍商民苦困賦課迭有蠲
緩度支益覺不敷其有可裁減歸併者屢經釐
定章程分別奏咨核實辦理臣又隨時核飭將
可省者省可緩者緩但係缺額省分向來入少
出多又未敢援咸豐以前成例另請撥款協濟
惟有就款竭蹶敷衍勢難餘出若干此常年例
需支絀之實情也直屬百數十州縣幅頓遼闊

民俗强悍盜匪素多西北邊外馬賊尤夥彈壓防拏在在均關緊要惟賴各路練軍馬步隊分布巡防兼顧口外熱河多倫庫倫等處其存營標兵除撥歸練軍外僅敷看守倉庫監獄護送餉犯各差及例行之事實已無可裁汰而海防尤關中外大局久遠要圖沿海地段綿長處處密邇

京師東西洋各國往來窺探不可無勁旅保衛根本隨時嚴勒操練用備征調而壯聲威又須於奉天之旅順口創設海外水師口岸駐軍布置

相為犄角淮軍分扼近畿門戶其船艇礮臺電
營機局船塢學堂等項皆係籌備軍實必不可
少勢難遽議減併近復欽奉

諭旨大治水師增拓船廠安設礮臺精造槍械遴選
將才均令破除常格實力講求等因臣已詳確籌
議專案覆陳水師既議擴充經費須另籌畫至
現有淮練軍海防餉需惟賴部撥及各省關協
濟除部款按月給領外其餘或解不足額或絲
毫未解來源既少挹注為難前於開源節流案
內請由部一體嚴催在案其一切支款並局費

薪水等項督飭司道等核實經理有可裁併者
無不力求節省不敢稍任虛糜但既入不敷出
亦即無從餘出若干此淮練軍海防餉需支絀
之實情也謹將出入款項就近數年情形切實
約計逐款分晰開單恭呈

御覽伏乞

皇太后

皇上聖鑒謹

奏

謹將直隸藩運關庫及淮練軍海防餉需出入
款項就近數年情形切實約計逐款分晰開單
恭呈

御覽

藩庫每年約收地糧正耗銀一百七十餘萬兩
八項旂租銀十七八萬兩各項雜款銀十五六
萬兩雜租銀一萬兩長蘆運庫每年約收引課
灶課銀四十萬餘兩軍需復價菜工加價銀二
十五萬餘兩

津海關道庫每年約收常關稅料銀六萬數千

兩新關稅鈔並洋藥釐捐銀四十餘萬兩

又每年收部撥各鎮練軍餉銀六十萬兩天津
機器局經費銀十二萬兩江蘇藩運司協撥永
定河歲款銀三萬兩江海關協撥練軍餉及河
工經費銀約三十萬兩東海關協撥津防練軍
餉銀約五萬兩機器局經費銀約八萬兩天津
大名貨釐銀約十餘萬兩

以上每年約收銀四百五十萬兩

藩庫每年約支

東西陵俸餉等項銀三一萬餘兩旂綠各營並河營俸

餉米折等項銀一百萬餘兩文武公廉駟站牧
丁執河經費並各項雜款京外各衙門雜租銀
四十八萬兩應解奉天黑龍江新疆協餉銀七
萬兩

長蘆運庫每年應解京餉銀三十萬兩奉餉銀
約六萬兩部飯扣平暨俸工鹽價等銀約一萬
兩

津海關道每年常關項下約解戶部內務府稅
款及本關應支經費銀六萬數千兩新關項下
約解部庫二成局稅總理衙門船鈔暨出使經

費銀七萬兩稅務司薪工船鈔各署通商經費
並傾鎔火耗銀七萬餘兩

又每年藩運庫撥款並江蘇藩運司協款項下
約支永定南北運等河歲修經費銀十五萬餘
兩又藩庫撥款大名貨釐江海關協款項下約
支東明黃河工費銀七八萬兩又各鎮練軍三
十一營六小隊礮隊四哨應在藩庫底餉運庫
復價部撥練餉江海關協餉項下約支官弁兵
勇餉乾軍裝軍火伙夫長夫等口糧各項雜支
及局費薪水執河兵餉等銀一百十餘萬兩又

天津大沽北塘等處原有海防練軍十四營三
小隊應在長蘆復價津海關稅釐東海關協餉
項下約支官弁兵夫餉乾軍裝軍火各項雜支
並局費薪水等銀三十七八萬兩又天津貨釐
項下約支大沽北塘一帶礮臺工程並京官津
貼順天府公費運鉛水脚釐局薪費等銀九萬
餘兩又津海東海兩關稅款及部撥項下約支
機器局製造各省各路軍營槍礮子彈藥帽等
項並添置庫廠機器銀三十萬餘兩
以上每年約支銀四百六十萬兩皆地方常年

卷十
五十八
必需之款此外應撥賑撫或意外緊要用項或
河隄大工及大小差橋道等項經費尚不在內
儻遇大侵則更入少出多須另籌畫

淮軍餉除上年添募新軍由部庫按月撥餉外
每年約收江漢江海兩關銀各四十餘萬兩蘇
藩司銀十餘萬兩松滬釐捐局銀四萬餘兩蘇
省牙釐局銀十餘萬兩兩淮四岸督銷局銀七
十餘萬兩原撥四川改撥江蘇安徽山東銀二
十餘萬兩此銀尚未盡行照解以上約共二百
餘萬兩

現在分紮畿境各海口要隘及奉天旅順口嶗
嶗嘴等處四十七營十六哨四十二棚每年約
支官弁兵勇餉乾軍裝軍火教習員弁及小輪
船舵水工匠長夫等口糧並各項雜支連局費
薪水銀二百二十餘萬兩亦屬收不敷支

北洋經費

此款本為創辦水師購船置械選將練兵係海
防久遠至計經總理衙門戶部奏定應由江蘇
浙江江西湖北廣東福建各省釐金及粵海關
海浙海山海江海各關四成稅項下歲撥銀二

百萬兩乃廣東福建釐金皆截留自用江蘇以
湖北無著之款空抵浙江湖北停解已久江西
亦解不及半又值各關稅收短絀每年解到者
不過五六十萬兩自上年海防告警報撥更稀
來源枯竭今年僅收銀十餘萬兩現有船艇破
臺水雷魚雷營庫廠船塢學堂等項計口授糈
約歲需餉銀七十餘萬兩而所購西洋鐵甲艦
鋼快船魚雷艇轉瞬即至月需巨款養活又擬
在旅順口創建船池石鵠為鐵艇修理之急需
估計工費約百萬兩款皆無措只有隨時察酌

緩急另請籌撥理合聲明

--	--	--	--	--	--	--	--	--	--	--

肄習西學仍請給獎片

再臣前保出洋肄業並天津招募學生學業有成及中西教習出力人員照章酌擬獎敘一摺
三月初六日奉

旨唐榮浩等張席珍等均著照所請獎勵欽此查所保文職各員業經吏部照章核准註冊武職員弁兵部改照尋常勞績核駁未免兩歧竊維選募生徒出洋學習軍政船政步算製造諸學實為自強至計事極艱難又經重洋危險非明示優獎不足以鼓舞人心臣與曾國藩前曾奏明

俟學成懇賞頂戴官階前船政大臣沈葆楨亦有船政局員弁生徒請無庸照尋常勞績核減之奏自定章以來臣於光緒五年奏保派往德國學習兵法技藝期滿回華之千總袁雨春等又會同沈葆楨等奏保船政學生學業有成之都司劉步蟾等均係免補本班奉

旨允准並經兵部核准在案此次例保赴美國生徒事同一律該生等在洋已歷十年八年之久回華分派當差又逾四年於外洋軍政諸學頗有心得天津招募學生規制與船政局相仿歷在

水師等營勤奮學習並出海操巡深明窺要閱
時既久勞瘁不辭經臣迭次考核始擇尤保獎
且擬請守備以上者僅止數員餘皆千把總外
委官階微末並未敢一律從優方今風氣初開
人材難得若併此靳而不與實恐有志之士無
以觀感奮興此非尋常勞績可比自應仍照歷
屆出洋肄業及船政生徒學成請獎章程核辦
既與部例並行不悖亦與袁雨春等成案相符
除停保衛職及不准超越加銜應照部章辦理
外所有都司銜補用守備山海路中軍千總霍

良順應請仍照原保免補守備以都司儘先補用並照部議俟補都司後再加游擊銜軍功方鳳鳴蔡廷幹王良登把總劉金元均請改以營千總不論雙單月選用並加守備銜其餘原保免補本班及儘先班次之參將劉恩榮千把總王湧泉等各員仰懇

天恩飭部仍遵前

旨給獎註冊以昭激勸理合附片具陳伏乞

聖鑒訓示謹

奏

創辦電報請獎摺 八月十五日

奏為歷年創辦沿江沿海各省電報先後告竣有裨軍國大計請將出力各員擇尤獎勵恭摺仰祈

聖鑒事竊泰西各國編設電報通消息於數萬里外旦夕往還呼應臣以中國洋務海防諸大端事機皆關緊要非此不能靈捷即商民之轉輸貿易者亦可藉此以速致有無而廣收利益且英法美德各使曾請在上海設立萬國電報公司若中國不亟自為無以杜外人之狡謀保我自

有之權利因於光緒六年奏准試辦陸路電線
遴派布政使銜直隸候補道盛宣懷從天津至
上海一路辦起工竣後南北官報商報瞬息可
通成效立見英使格維納旋執同治九年總理
衙門已允成案請由英商添設自上海至甯波
温州福州廈門汕頭各口海綫當令盛宣懷設
法抵制絕其覬覦並去丹國已設上海至吳淞
陸綫英國已設之九龍陸綫堅明約束仍逐漸
推廣又奏設上海至浙閩達廣州陸綫並接至
香港自行設局不使港綫侵入粵境英綫進至

福州於是沿海各省電報始得自主權利不致外散嗣左宗棠奏設長江電綫以通武漢張樹聲奏設廣西電綫以達龍州臣又飭將天津電綫展至山海關並設各防營支綫以速調度又自津北達通州而至京城其由山海關至旅順由濟甯至煙台由營口至奉天省城各路電綫亦即次第辦理今又辦奉天至鳳凰城邊門以達朝鮮仁川一路矣五年以來創設沿江沿海各省電綫綿亘一萬數千里

國家所費無多巨款悉由商集適值法人起衅沿

海戒嚴將帥入告軍謀

朝廷發蹤指示皆得相機立應無少隔閡朝鮮兩次
內亂遣兵保護剋日奏功中國自古用兵未有
如此之神速者其京外一切要政及與出使大
臣往來問答莫不朝發夕至海外直若戶庭假
令沿途口岸皆為英丹海綫所佔則有事之際
或竟為敵人所用或守局外例凡我密電不代
傳遞事機必滯貽誤必多今成效昭著實賴羣
策羣力查承辦各員皆能於從來未經之事勞
心苦思胼手胝足設法趨辦或躬率工匠勘路

植桿設綫終歲在途頻經危險或晝夜傳遞緊急軍報寢饋不遑甚至積勞成疾或重洋護運料物涉厯風濤以及各省總分各局與沿途工次暨天津電報學堂調度教習各員均屬異常出力有裨軍國現值各省大工告竣若不酌給獎敘不足以勸將來前准左宗棠曾國荃楊昌濬劉銘傳劉秉璋咨請會同奏保飭據總局道員盛宣懷開單詳送聲明粵省辦理官綫各員另請兩廣督臣奏獎直奉官綫另行核酌等情前來臣查黃河合龍工程及接遞外洋文報均

照異常勞績給獎有案今創辦電綫大工及由
電接遞軍報事極艱鉅其勞績實皆過之而裨
益

國家控制中外全局尤大且遠自應擇尤請獎其
出力稍次者仍照尋常勞績核擬俾示區別謹
開單恭呈

御覽仰懇

天恩俯准照擬給獎以勵人才理合會同南洋大臣
兩江督臣曾國荃閩浙督臣楊昌濬福建撫臣
劉銘傳浙江撫臣劉秉璋合詞恭摺具陳伏乞

皇太后

皇上聖鑒訓示謹

奏

卷十

七十六

各軍仍請部餉摺

奏為直隸海防捐輸收款業經抵支現有水師經費無可分撥所需練軍及添募各軍月餉仍請由部照案分別給領恭摺仰祈

聖鑒事竊准戶部咨開直隸練軍月餉銀四萬七千五百兩宋慶曹克忠周盛波添募各軍月餉銀八萬二千兩自八月起先由該省海防捐輸收款內撥給三個月毋庸赴部支領等因臣查直隸各鎮練軍月餉向由保定練餉局經理按月派員赴部領回支發其海防添募曹克忠宋慶

周盛波各軍月餉係由天津支應局按月派員
赴部領回即歸該局與淮軍銀錢所分別支發
內應月給會辦北洋事宜吳大澂八千四百兩
歸該大臣添營支發又有提督唐仁廉總兵徐
邦道添募各營亦在周盛波月餉內分撥與支
應局原有水陸各軍之餉無涉以上皆專指部
餉為命脈至海防捐輸收款係奏明專抵北洋
水師經費緣前議北洋購船置械創設水師經
總理衙門戶部奏撥各省關釐稅迄今廣東福
建釐金絲毫未解浙江湖北釐金亦久不解其

餘各省關釐稅皆解不足額頻年入不敷出竭
蹙萬分今年僅收銀十餘萬兩而已有之大小
船艇水陸各軍及船塢船澳水雷魚雷營礮台
學堂防營電報各項月餉經費需用繁巨刻不
可緩又上年軍情緊急時添購西洋雷艇槍礮
等項分批運到若不按期付價必致失信洋商
不得不將本省海防捐款濟用前經奏請撥歸
天津支應局略抵各省關短解北洋海防經費
之數並聲明添募各軍專由部庫撥餉等因奉
旨允准欽遵在案計自第一次至第九次所收捐款

已迭咨明戶部撥歸支應局搭放該局庫空如
洗應發水師要餉甚多隨收隨用動支無存捐
輸不過一時能否常可收獲毫無把握而此後
水師月餉經費仍專指續收捐款接濟否則已
成局面皆將停罷殊失自強至計亦必貽笑外
人且德廠造成之鐵甲船鋼快艦三號陸續到
津更須巨餉養活並應找發價值暨洋員駛送
來華回國之費正在點金乏術莫展一籌今戶
部忽將捐款撥抵直隸練軍及海防添募各軍
月餉似未深悉早經奏定專作水師用款已收

者動支無存續收者仍待接濟也臣深知部庫支絀凡地方河工等項緊要用款向應請部撥款者但可勉籌未敢遽請惟此月餉等項計口授食外間力實未逮不得不專指部款查直隸練軍應食各省解京固本餉係同治年間戶部節次奏定由部按月給領不應短少本屬永遠章程其海防添募各軍亦係上年戶部奏定由部庫另儲東北邊防經費內按月如數給領本皆確有指款茲海防捐項既已留抵水師經費核計尚多不敷實難再行分撥所有練軍及添

募各營月餉不得不專賴部撥免誤事機應請將練軍月餉四萬七千五百兩仍自八月起由戶部於各省固本餉內按月發足如各省欠解並由部庫通融墊發勒令補解還款以符定章至海防添募各軍分紮天津北塘山海關旅順口沿海要地實為

京畿屏藩亦未可操切從事應請將此項月餉八萬二千兩仍由部庫暫行按月如數給領俟善後事定再將添募各營察看分別裁併可裁若干即停餉若干以抵京旂兵餉之用屆時

奏明辦理現在八月之餉尚未發放各軍難再枵
腹荷戈所有八九十月餉項並懇照案剋日
撥發以全大局理合恭摺據實瀝陳伏乞

皇太后

皇上聖鑒俯准勅部照辦施行謹

奏

續選出洋學生摺十月初十日

大學士直隸總督一等伯北洋大臣臣李鴻章跪
署理船政大臣臣裴蔭森

奏為續選閩廠學生第三次出洋肄業擬請加展
年限並遴派華洋監督以專責成恭摺仰祈

聖鑒事竊光緒二年七年兩次選派閩廠學生分赴
英法各國學習節經臣等奏奉

俞旨 在案查閩廠水師學堂設立多年前前堂專習製
造後堂專習駕駛現值倡練海軍駕駛之才視
製造為尤亟北洋舊有蚊快各船均以閩局學
成回華之學生充當管駕尚為得力目下新購

鐵艦到沽機器極精雖僱定洋員教練而華員尚無能獨當一面之選將來逐年添置船隻日新月盛而駕駛為專門名家之學未可鹵莽從事若不亟為儲備實有乏才之慮即製造一端亦宜力求精進以期日起有功臣等往復咨商擬續選前堂學生十三名藝徒四名分赴英法德各國官廠學習製造另選後堂學生九名專赴英國水師學堂鐵甲兵船學習駕駛共計生徒二十二名作為第三次出洋肄業尅日前往該生徒分途投學凡訪聘名師稽考課藝約束

規矩必須有華洋監督專管其事隨時稟商各國出使大臣轉商各外部海部給照分派方可望其盡心指授學有進益查有福建候補道周懋琦才識淹通留心西學現充船政提調待生徒如子弟勸勤懲惰董教兼施臣蔭森與共事半年知之最稔以之派充出洋監督可期勝任至洋監督須熟悉西洋情事又能與華員和衷協力頗難得人查有法員日意格由該國水師出身久襄船政素與學生情意融洽前屆在洋督課亦甚勤懇出使大臣許景澄函稱該員仍

願接辦始終其事自可派令與周懋琦會商以資熟手所需經費應查照向章由閩省釐金及閩海關四成洋稅船政經費項下分別籌撥惟向例學生出洋定限三年為期太促所學不全駕駛學生每年僅有兩個月在大兵船閱歷亦淺以後擬將製造學生展限三年俾之深造有得其駕駛學生改為每年扣足六個月在船無庸加展年限此後天津學堂駕駛學生材質有可造就者亦即陸續挑派隨同出洋肄習以廣甄陶至六年內每年每項需用若干應由臣蔭

森督飭各監督查照舊章切實核減另行具奏
所有續選閩廠第三次學生出洋肄業並遴派
華洋監督緣由除咨明出使英法德大臣就近
督飭認真辦理外謹會同南洋大臣兩江總督
臣曾國荃署福州將軍臣古尼音布閩浙總督
兼署福建巡撫臣楊昌濬恭摺馳陳伏乞

皇太后

皇上聖鑒訓示謹

奏

驗收鐵甲快船摺十月十五日

奏為定遠鎮遠濟遠等船先後抵沽經臣派員驗收並親赴海外駛驗乘往旅順口巡閱兩岸礮台恭摺仰祈

聖鑒事竊前在德國伏爾鏗廠訂造定遠鎮遠鐵甲船二隻濟遠鋼甲快船一隻僱用德國弁役駕駛來華陸續到沽臣飭統領北洋水師天津鎮總兵丁汝昌津海關道周馥隨帶洋文憑單並原訂合同前往驗收認真查勘該鎮道等督同華洋員弁分詣各船按照合同逐細勘驗因各

國製造均用英尺遂以英尺較量計每尺合中國工部營造尺九寸六分定遠一艦量得長二百九十八尺五寸其最寬處六十尺四寸喫水十九尺六寸有奇其中段護衛機艙之鋼面鐵甲堡兩邊各長一百四十四尺厚十四寸礮台甲厚十二寸令台甲厚八寸艙內設康邦大輪機兩具共計實馬力六千匹船頭左右及船後共設魚雷箭三具另帶小魚雷艇兩艘小輪船一艘艙內淡水櫃二十具其造淡水機器每日可供三百人食用全船電燈二百四十盞另有

桅上最大電燈二盞一可敵二萬枝燭光一可敵八千枝燭光艙上設十二寸口徑大鋼礮四尊一二寸口徑五管連珠礮共十尊後膛連珠槍五百二十五桿每半時可行十四海里半約合中國四十七里此驗收定遠之情形也鎮遠鐵甲厚薄一切布置均與定遠相同惟定遠水綫下全係鋼面鐵甲鎮遠水綫下則參用鐵甲因當時外洋鋼價陡長故為此變通之計卷查合同亦已載明而兩艦關係緊要之處皆用鋼面鐵甲保護機器此定遠與鎮遠大致相似之

情形也濟遠快船長二百三十六尺三寸其最寬處三十四尺喫水十五尺八寸有穹甲以覆機槍中凸邊凹形如龜甲係以一寸鋼二寸鐵製成其甲邊深入船旁水綫下四尺若敵礮擊在甲邊之上則穹甲可護各艙如擊在甲邊之下則藉橫水阻力可免穿透係仿照英國赫士本船式製造艙內康邦機器兩具共計實馬力二千八百匹前後左右備放魚雷之筭四具艙面另帶可放魚雷之小艇兩艘艙內淡水櫃八具其造淡水機器每日可供百餘人食用電燈

八十盞另有桅上最大電燈可敵二萬枝燭光
艙上設八寸半口徑長鋼礮二尊六寸口徑長
鋼礮一尊一二三寸口徑鋼礮連珠礮共七尊
後膛連珠槍一百三十六桿每半時可行十五
海里即中國五十里該艦以穹甲籠罩機艙故
機艙較窄然其喫水淺行駛速在快船中實為
新式堅利之船惟機艙既窄則煤櫃不大連穹
甲上十八隔堵共祇裝煤二百七十噸以每日
用煤三十噸計之足供八日之用較之定遠鎮
遠各裝煤七百噸日用六十餘噸其用意無甚

懸殊此又濟遠之實在情形也該鎮道等查得
三艦各件悉與原訂合同相符遂將驗收憑單
親書收到字樣交還鎮遠管駕麥蘭定遠管駕
福士濟遠管駕恩諾爾等寄回德國伏耳鏗廠
於九月二十一二十二月初一等日陸續換
挂中國龍旂升殿如儀華洋弁兵懽呼稱賀據
實稟復前來臣於十月十一日馳往大沽登舟
覆勘無異即於十二日寅刻乘坐定遠並督同
鎮遠濟遠各船展輪出洋試驗速率是日北風
甚勁海濤洶湧船行平穩如常略無顛簸酉刻

駛抵旅順口十三日登岸履勘東西兩岸台壘
東岸黃金山嶗律嘴等處礮台建造已久其西
岸饅頭山蠻子營老虎尾新修各礮台亦已一
律完固布置均得地勢各軍演放後膛槍礮頗
能中靶十四日丑刻起旋回津未刻抵沽核計
往返水程與原訂合同里數不甚差謬而三船
經過印度洋面風浪險惡輪軸屢經挫損尚能
照常迅駛則其機器之精堅可知中國自初辦
師船以來實惟此為攻堅禦敵之利器惟有器
尤須有人以臣十數年來所建議經營合數省

之財力糜數百萬之金錢始克有此巨艦若以
駕駛之任委之生手實不放心除酌留德國僱
來員弁分派教練外所有管駕暨大二三副管
輪鍋爐升火人等均挑選素在兵船之學生及
船廠當差之熟手以資得力此次行駛大洋已
能運掉自如但鐵艦為西國專門名家之學其
機件之繁重理法之精深行陣之變化中國弁
兵人等尚難一蹴而幾惟有督策將領細心講
求切實訓練務求嫻習以期折衝制勝仰慰
宸厪目下北河封凍海軍不便操練擬令丁汝昌督

率三艦及原有之超勇揚威兩快船前赴廈門
澎湖一帶和暖之處逐日勤操俾弁兵膽藝漸
臻純熟藉以周歷沿海形勢風濤俟來春二月
再駛回北洋聽候醇親王等親臨閱看除將定
遠鎮遠兩艦同式繪圖五幅濟遠艦繪圖五幅
並洋廠原造小模樣二具咨送軍機處進呈
御覽外所有試驗鐵艦快船並巡閱旅順各緣由謹
繕摺具陳伏乞

皇太后

皇上聖鑒訓示謹

奏

卷十

八十八

李肅毅伯奏議

及門吳章洪鈞編輯

卷十一

遵議維持商局摺

滇越邊界通商議約摺

北洋月支礮費摺

覆陳部駁海防報銷摺

洋員資費請准銷片

再請別步蟾等獎敘片

輪船修費請免追繳片

請開淄川鉛礦片

威海辦防裁營濟用摺

學堂人員一體鄉試片

電報官報請給半資摺

武備學堂請獎摺

籌議朝鮮通使各國摺

朝王來咨一道

湘淮各軍少裁長夫摺

漠河金廠章程摺

候補知府李金鏞籌議黑龍江金廠公司章程十

六條

永定河仍擬堵築片

四快船到華酌定餉章摺

鑄錢機器工費片

九江陸綫擬接南雄摺

籌撥朝鮮電報摺

請停機器鑄錢摺

開濬澳工製造船隻片

潘鼎新請祀昭忠祠摺

新購雷艇酌定餉章摺

挖泥機器經費片

查覆海防報銷摺

中法接線摺

中法接線章程十二條

遵議維持商局摺 光緒十二年正月二十一日

奏為遵議維持招商局事宜以保中國權利恭摺
仰祈

聖鑒事竊臣等欽奉光緒十一年九月十二日

寄諭順天府代遞道員葉廷春條陳內扶持商局一

條據稱請准招商局輪船裝運鄂鹽該局承運漕
糧請照沙船回空免稅章程辦理並展緩運漕限
期藉容貨水腳補其不足湖北帽合茶酌減稅課
歸局裝運等語所陳各節係專為維持商務起見
惟於各該省釐政稅釐有無關礙者李鴻章曾國

荃體察情形籌商奏明辦理至該局事務應否令
蘇松糧道及江海關道就近會商並著酌議具奏
等因欽此遵即分行各該司道等體察籌商去
後旋據議覆前來竊維輪船招商局之設原因
各口通商以來中國沿江沿海之利盡為外國
商輪侵佔故設法招集華股特創此局以與洋
商爭衡庶逐漸收回權利所關於
國家體制華民生計極巨亦實為中外交涉之大
端惟船棧碼頭各項成本甚重與洋商分攬客
貨常年所得水腳無多且洋商心懷嫉忌屢次

跌價傾擠上年又遭法兵之擾海船難行遂致
局本層遞虧折該員董無法支拄不得不暫借
洋債以濟急需當此局勢岌岌之際必須官為
維持乃可日就起色葉廷眷所陳各節頗有見
地但局船裝運鄂鹽及展緩運漕限期兩條不
無窒礙應無庸議其運漕局船回空照沙船免
稅一條查運漕沙甯船回空凡在北洋三口裝
載豆貨雜糧等項向准全免出口稅在案局船
本可照辦惟恐免稅較多於稅餉有礙飭據津
海山海東海江海關道議復嗣後商局輪船運

漕回空請免北洋三口出口稅二成如原來裝米一千石回空時免收出口貨稅二百石查照派運米數通扯免足二成仍較沙甯船少免八成以示區別又湖北帽合茶一條飭據津海江海江漢關道復稱帽合茶向由鄂豫內地運赴張家口蒙古地方粗枝大葉價值最輕嗣後如華商由鄂附搭商局輪船出口請照孰茶之例每百觔減為出口正稅銀六錢並免復進口半稅庶局船籍得水腳他船不得攬載其由津北運張家口外仍照完沿途內地稅釐以上兩條

應請均自本年開辦起另將執照保單及稽核章程核定分飭遵照惟葉廷眷原請各條以運鹽為大宗今運鹽既有窒礙僅運漕回空免稅二成及裝運帽合茶兩項尚可酌准綜計所沾利益每年不過合銀二萬兩左右局累既深實不足以資補救查該局奏定章程原擬藉運漕水腳以補攬載客貨之不足局中有此津貼方可與洋商爭衡而不為傾擠前曾議明局船應得水腳悉照沙甯船定章每石實銀五錢六分零未幾又有扣減上年美商旂昌與英商怡和

太古輪船承運漕糧減為三錢五分實則支用
不敷皆各虧本夫彼族之甘認此虧而爭運者
蓋明知洋輪運漕可暫而不可久華商力量微
薄藉以去其運漕津貼將立見傾覆而江海輪
船之利仍可專歸於洋商耳其心計極為狡狠
若不杜其覬覦則華商之氣益餒洋商之餒益
張恐中國商務一蹶不可復振

朝廷視華商之輪船與沙甯船原無軒輊現在沙甯
船運漕每石應支銀四錢三分一釐零所有本
屆商局輪船運漕應請仍照沙甯船現領之數

支給以後一體照辦不再區分扣減亦不扣海
運局公費以免虧賠而資津貼輪船運漕較沙
甯船多一保險及麻袋之費其修費亦大今支
款照沙甯船一律庶昭平允且轉運迅速不致
久存船內即有蒸變遇險又可取償是於公家
亦殊有益也湖北湖南江西采辦漕米飭由該
局代購運交其運費亦應照四錢三分一釐零
核給俾無歧異又該局原存各省官本及光緒
二年買併旂昌船棧案內前南洋大臣沈葆楨
奏撥官本未還銀一百七十八萬餘兩於光緒

六年奏明由運漕水脚項下分年扣還其時局中借欠商款有限遂議先還官本尚屬急公今計歷年扣還並湖北軍需扣款業已過半外尚應還銀七十七萬餘兩而該局現欠洋債計有一百餘萬兩若令官本洋債一併拔還商力萬不能逮查所贖各省官本七十餘萬內本多閒款亦非急不可待請暫緩拔還免扣水脚各項以示體恤俟洋債歸結後即責令分年籌繳官本不准短少庶免失信外人亦不致同時催逼掣動全局查泰西各國商務多由國家出費幫

貼即日本新定輪船公司章程議明十五年間
由政府保認商民股本按年八釐利息該公司
向來所負之債並歸政府股分內所得子金償
還誠以商務興廢關係國家強弱必相與維持
於不敵中國帑藏非裕趨尚不同若保認商民
官利代還債負勢有不能自應妥籌可行之策
今所擬運漕水腳仍照沙甯船之數並無增益
其回空免稅則較沙甯船核減帽合茶減稅甚
微官本僅止緩繳實於公家並無甚損而該局
商因藉可少舒事關中國商務要端非此斷不

足以敵洋商而保我權利相應仰懇

特恩俯准照辦以作商民之氣大局幸甚至該局自去秋向旂昌收回後已遴派道員盛宣懷等認真整頓經理嚴定章程力除弊竇務使商民信從可資經久江海津海關道本飭隨時會籌局務應併令江蘇糧道與江海關道遇有要件隨時會同局員籌商協助俾資利便所有遵議緣由臣等往返商榷意見相同謹合詞陳請伏乞

皇太后

皇上聖鑒訓示遵行謹 奏

滇越邊界通商議約摺

光緒十二年三月十三日

奏為與法國使臣會議滇粵邊界陸路通商章程
畫界竣事恭摺仰祈

聖鑒事竊臣欽奉光緒十一年八月十一日

上諭總理各國事務衙門奏法國使臣來華請派員
會議通商章程一摺已另有諭旨派李鴻章為全
權大臣矣此次中法議立滇粵陸路通商章程事
係創辦該大臣務當悉心籌畫詳細商議總期周
密妥善免致將來窒礙等因欽此仰見

聖謨閎遠

訓示周詳莫名欽感嗣於上年十一月間法國使臣
戈可當擬具章程二十四條呈經總理衙門王
大臣逐條簽駁函商到臣經臣督飭津海關道
周馥另擬章程十八條緘請總理衙門核奪作
為底本十二月初五日戈可當帶同參贊等官
來津拜晤當將底本交閱彼此意見懸殊面談
數次萬難就緒戈可當因與臣商訂彼此各派
員先行會議大略其關緊要及所執各異之處
再行面商臣派津海關道周馥候選道伍廷芳
候補知州朱幹臣戈可當派參贊卜法德繙譯

微席葉各將彼此稿本逐條辯論自上年十二月十二日起至本年正月十七日止疊據周馥等與卜法德微席葉會商多次將彼此稿本分別刪改另訂章程十九條且復於本年正月十九二十三二十七三十二月初六初九等日面與戈可當詳晰辯論舌敵唇焦始得粗有規模經臣鈔稿寄呈總理衙門在案竊惟滇粵陸路通商事係創辦敢不慍遵

聖訓悉心籌畫詳細商議惟此次訂章既不能稍違上年四月之新約尤不能與咸豐八年舊約相

背彼此防損取益之處各有援引每因一字一句辯論多日難就範圍其在彼所最著意者通商處所不能僅指兩處雲南廣西省城須派領事往駐又進出口洋土貨稅須較各口減半徵收並求在滇粵地方開礦及製造土貨運越南食鹽數大端皆於彼商務有益意在必行爭之甚力臣以新約第五款雖有貿易限定若干處日後定奪之語而下文仍載明邊界通商處所指定兩處字樣目前斷不能另有增添該使謂中國在北圻各大城鎮設立領事照新約須與

法國商酌如中國許彼派領事駐雲南廣西省城則中國在北圻城鎮設領事亦易商辦臣以通商口岸設領事原為照料本國商民而設滇桂省城係屬內地實不使設立領事該使又請將邊界領事准其每年分駐省城數月察看商務臣亦堅不允行該使詞屈理窮只以中國在北圻城鎮派領事一節執定新約內商酌二字曉曉置辯臣思中國此時本不必多派領事徒增耗費因即於第二款訂明先在河內海防二處設立領事其餘各大城鎮隨後商派尚可操

縱由我至開礦製造運鹽各節通商以來各國
覬覦已久屢經總理衙門辨阻未行該使欲於
章程內添此數條意在決我藩籬攘奪華民生
計事關中國內政須保我自主之權屢經嚴詞
拒絕該使仍以奉有外部訓條必將在口製造
一節添入與臣再四磋磨力執不允該使因請
於第三款內法國商民前來通商均照咸豐八
年五月十七日中法條約句下添入第七一款
蓋咸豐八年約內第七款有工作二字彼欲藉
此以塞外部之意既是援引舊約自不便拒之

過甚况自咸豐八年立約迄今已三十年法商
並無因工作二字在各口開設製造各廠則滇
粵邊界地方亦必不能藉詞設廠製造此法使
要求各節均經詳細辨駁之大略也至減稅一
節該使初議照現行稅則減徵一半其估價之
貨向按值百抽五者改為值百抽二兩五錢臣
以新約第六款所載進出邊界應納各稅照現
在通商稅則較減之語不過稍為減輕詎能驟
減一半只允按照現行稅則減去五分之一其
估價之貨按照俄國陸路章程仍應值百抽五

不能照減該使謂俄國陸路稅則係照各海關三分減一法國事同一律厚彼薄此深恐貽笑鄰邦臣謂北圻與俄國道途遠近懸殊不能比例辯論數日該使悻悻形於詞色罷議而去當經臣商准總理衙門電復由臣酌量辦理細查泰西各國通例大都進口稅重出口稅輕無非為暢銷土貨起見中國通商之始未諳各國情形所定稅則進出口均係一律所以洋貨暢銷土貨滯銷但因約章久定不能設法挽回滇桂地方瘠苦物產不豐值此邊界通商尤須維持

小民生計以期商務漸旺稅課日增因與戈可
當籌商定為出口貨照稅則三分減一進口貨
照稅則五分減一若估價之貨為稅則所未載
者無論進出口仍照值百抽五徵收至洋土各
貨赴內地買賣應完子口稅仍照通行章程辦
理不在減徵之列該使已一一遵允均於第六
第七兩條載明如此變通辦理庶滇桂土貨可
冀暢銷將來如欲修改各國條約加重進口減
輕出口各稅亦可發端於此此分別減稅應輕
應重之要端也至於在我所應爭者其大要亦

有數端一為水陸稅關分清界限查此次陸路通商酌減稅項係專為雲南廣西邊界而設新約第六款既有與通商各口無涉一語自應切實照行以免虧損現於第八第九兩條載明洋土各貨凡在邊關已完稅項復轉運通商各海關者照海關稅則另收正稅不准以邊關單作抵其在邊關所領存票亦只准在邊關抵稅概不發還現銀各守定章可以杜絕一切影射轉轄等弊至洋藥一項新約載明另議專條臣查洋藥流毒已久俄美諸國已議不准販運即英

國現議稅釐併徵新章無非寓禁於徵之意聞
法人欲於越南廣種罌粟而緬甸新併於英亦
恐洋藥從西侵入偷漏更多因於第十四條載
明洋土各藥均不准販運買賣至互交逃犯新
約亦載明另議專條查中西律例不同交犯最
多糾葛現於第十七款內載明倘有中國人照
中國律例無論犯何罪名照會領事官設法拘
送庶免藉詞庇匿又僑居越南華民近日頗有
以法人徵收身稅為苦者臣力與辨駁該使電
告本國許以從寬辦理請不必載入章程因於

第四款載明中國人身家財產法國應與最優待西國之人一律不得有異又於第十六款內載明命案賦稅詞訟等件均與法國相待最優之國之商民無異等語以為將來辨論地步至土司苗蠻地方慮洋人前往游歷滋事准於請護照時載明不能保護其通商處所洋人游歷在百里以內向不請照今改以五十里為限又洋人自用免稅各物舊約漫無限制今更嚴切聲明必係洋人自用數目無多方准免稅如入內地仍照舊章徵稅其餘各條有參照舊約者

有較舊約稍便宜者均經再四商辦期於得寸則寸內惟第十一十二兩條係法人在越南收稅辦法臣與詳細推敲附於此次章程之內亦為保衛在越華商張本但恐愚慮所及或有未周復將會議章程寄交總理衙門王大臣覆核進呈

御覽旋奉電覆章程進呈無改希細酌字句照辦等因近日戈可當又函飭駐津領事林椿迭次謁商請將廣西通商處所先定載入章程臣以界務未定不能遽許該使遂請在第一條註語內

聲明諒山以北本年內擇定通商處所字樣以
期早日開辦經臣電商總理衙門允行該使來
津諄催畫押因將稿本發繕飭由津海關道周
馥稅務司德璀琳督同中西繙譯各員詳細校
對無訛於三月二十二日齊集公所將中法文
章程四分會同畫押鈐印竣事彼此各存正副
本二分伏查此次議訂章程自去冬迄今四月
於茲往復折辨詳細電商其要求過甚者絕不
敢稍與通融而舊日約章所准者亦未便概行
拒絕相機因應煞費經營皆由稟承

廟謨隨事與諸王大臣和衷商榷得以從容成議而此後恪守定章認真籌辦弭患無形是尤在總理衙門暨滇粵各督撫臣之操縱得宜也謹將章程正本封送軍機處進呈恭候

批准以便屆時互換其副本咨送總理衙門查核臣

原奉全權大臣

諭旨一道敬謹咨繳軍機處備查所有商辦法國在滇粵邊界陸路通商章程畫押竣事緣由謹繕摺由驛馳奏伏乞

皇太后

皇上聖鑒訓示謹

奏

北洋月支礮費摺 光緒十二年四月初十日

奏為北洋礮臺防營現在月支各項礮費數目分

晰彙開清單恭摺仰祈

聖鑒事竊北洋各海口為

京師門戶關係至重自光緒元年籌辦防務以來

於天津之大沽北塘海口南北兩岸及石頭縫

煙頭沽青坨寺小站等處山海關之甯海城鐵

門關長龍崗奉天旅順口之黃金山饅頭山嶗

嶧紫老虎尾蠻子營母豬礁等處擇要建設臺

壘購置巨礮調撥淮勇及練軍各營分駐操防

勤加演練以期精熟而資捍衛惟歷年所購礮位均係訪求各國新式擇其至精至利者不靳多金購運於數萬里外並延洋員為之教習此種新礮運用之妙各有不同演放稍不如法擦修稍不加工機關動致損壞既以重價購之不能不倍加慎重也查西國定章於礮位及各項隨礮車具零件用之至精愛之亦備至凡礮管架座輪機子彈關鍵等項須隨時油飾修拭以防鏽澀露置臺牆稍有損缺亦須隨時整理用費在所不惜中國從前未經購有此等新礮應

給前項礮費並無成例可循是以各項礮位購
運到津督飭軍械所委員酌照西國辦法購用
油紗器料勤加收拾將一月實在需用費若干
以作礮費準則撥歸何處臺壘操用即飭局按
月給領礮位有大小之分故礮費亦有多寡之
別均經核實支用俾得積久常新既為利器所
必需未便省此小費致成無用之物所有酌給
各項礮費銀數歷年均照此核發由支應局司
道等會詳請

奏前來臣查西洋新式各礮攻堅致遠洵為戰守

利器惟價值既昂購辦非易自應時加珍惜大者安設臺牆小者馳逐行隊常暴露於風日塵沙之中必藉器物以磨洗之則用費萬不可省否則日久將歸廢棄所需有限而為益甚大所有月支各項碾費數目理合開單恭呈

御覽伏乞

皇太后

皇上聖鑒勅部查照立案謹

奏

謹將北洋礮臺防營現在月支各項礮費數目
彙開清單恭呈

御覽

計開

克鹿卜二十四生脫口徑後膛鋼礮每尊月支

礮費銀十二兩

克鹿卜二十一生脫口徑後膛鋼礮每尊月支

礮費銀八兩

克鹿卜十五生脫口徑後膛鋼礮每尊月支礮

費銀八兩

克鹿卜十五生脫口徑後膛田雞鋼礮每尊月
支礮費銀八兩

克鹿卜十五生的密達後膛鋼礮每尊月支礮
費銀八兩

克鹿卜二十四磅後膛來福銅礮每尊月支礮
費銀八兩

克鹿卜十二生脫口徑後膛鋼礮每尊月支礮
費銀六兩

瓦瓦司四十磅後膛礮每尊月支礮費銀六兩
克鹿卜十二生的密達後膛鋼礮每尊月支礮

費銀六兩

克鹿卜十六磅鋼礮每尊月支礮費銀六兩

六十八磅前膛鐵礮每尊月支礮費銀五兩六

錢

十寸半口徑前膛鐵瓶子礮每尊月支礮費銀

五兩四錢

二百磅前膛來福鋼礮每尊月支礮費銀五兩

四錢

一寸徑十管格林礮每尊月支礮費銀五兩

八寸五分半口徑前膛鐵瓶子礮每尊月支礮

費銀四兩八錢

阿母斯脫郎一百二十磅前膛鋼礮每尊月支
礮費銀四兩八錢

克鹿卜八生脫口徑後膛陸路鋼礮每尊月支
礮費銀四兩五錢

克鹿卜七生脫半口徑後膛陸路鋼礮每尊月
支礮費銀四兩五錢

法國一寸半徑五管荷乞開司礮每尊月支礮
費銀四兩五錢

克鹿卜八生的密達後膛鋼礮每尊月支礮費

銀四兩五錢

克鹿卜七個半生的密達後膛鋼礮每尊月支
礮費銀四兩五錢

三十二磅前膛鐵礮每尊月支礮費銀四兩四
錢

瓦瓦司六十磅子前膛鋼礮每尊月支礮費銀
四兩二錢

六十八磅前膛鐵礮每尊月支礮費銀四兩二
錢

克鹿卜七生脫半口徑後膛過山鋼礮每尊月

支礮費銀四兩

二十四磅前膛銅礮每尊月支礮費銀四兩

瓦瓦司四十磅子前膛銅礮每尊月支礮費銀

三兩六錢

四十二磅前膛鐵礮每尊月支礮費銀三兩六

錢

四分五徑十管格林礮每尊月支礮費銀三兩

五錢

二十四磅前膛鐵礮每尊月支礮費銀三兩五

錢

三十二磅前膛鐵礮每尊月支礮費銀三兩三錢

十二磅前膛銅礮每尊月支礮費銀三兩三錢
金陵機器局仿造六生脫口徑後膛熟鐵過山礮每尊月支礮費銀三兩二

十二磅前膛銅礮每尊月支礮費銀三兩

九磅前膛來福鐵礮每尊月支礮費銀三兩

法國十二磅前膛輕銅礮每尊月支礮費銀三兩

二十四磅前膛鐵礮每尊月支礮費銀三兩

一百二十八磅銅田雞礮每尊月支礮費銀三

兩

六十磅鐵田雞礮每尊月支礮費銀三兩

四分五徑十管迷泰來思礮每尊月支礮費銀

二兩八錢

法國十二磅前膛鐵礮每尊月支礮費銀二兩

八錢

上海機器局仿造十二磅前膛輕銅礮每尊月

支礮費銀二兩八錢

十二磅前膛六楞來福銅礮每尊月支礮費銀

二兩八錢

十二磅來福開花銅礮每尊月支礮費銀二兩

八錢

二十三分徑九磅前膛鐵來福開花礮每尊月

支礮費銀二兩八錢

十二磅前膛銅礮每尊月支礮費銀二兩八錢

四管格林礮每尊月支礮費銀二兩五錢

一寸徑四管神機礮每尊月支礮費銀二兩五

錢

雙管格得納連珠礮每尊月支礮費銀二兩五

錢

一寸徑那登費四管礮每尊月支礮費銀二兩

五錢

十管格林礮每尊月支礮費銀二兩五錢

五分徑格林長礮每尊月支礮費銀二兩五錢

單管格林礮每尊月支礮費銀二兩

十八磅前膛鐵礮每尊月支礮費銀二兩

英國十二磅前膛鐵礮每尊月支礮費銀二兩

六十四分徑六十八磅鐵田雞礮每尊月支礮

費銀二兩

十二磅前膛銅開花礮每尊月支礮費銀二兩

十二磅鐵開花礮每尊月支礮費銀二兩

金陵機器局仿造十二磅前膛鐵礮每尊月支

礮費銀一兩五錢

四十二磅鐵田雞礮每尊月支礮費銀一兩五

錢

二十四磅銅田雞礮每尊月支礮費銀一兩二

錢

四十三分徑二十四磅鐵田雞礮每尊月支礮

費銀一兩二錢

十二磅銅田雜礮每尊月支礮費銀一兩

十八磅田雜礮每尊月支礮費銀一兩

三千觔至五千觔洋莊礮每尊按季支礮費銀

八兩

一千二百觔至二千觔洋莊礮每尊按季支礮

費銀四兩

二千五百觔前膛鐵礮每尊按季支礮費銀四

兩

一千八百觔前膛鐵礮每尊按季支礮費銀四

兩

單耳短鐵開花礮每尊按季支礮費銀三兩

五百觔至七百觔洋莊礮每尊按季支礮費銀

二兩

單管格林礮每尊按季支礮費銀二兩

六十八磅鐵田雞礮每尊按季支礮費銀二兩

二十五分徑前膛洋莊礮每尊按季支礮費銀

二兩

五百六十觔至九百觔洋莊礮每尊按季支礮

費銀一兩八錢

五百六十觔至九百觔單耳礮每尊按季支礮

費銀一兩八錢

九百觔前膛銅礮每尊按季支礮費銀一兩八

錢

三十六分徑十二磅單耳洋莊鐵礮每尊按季

支礮費銀一兩八錢

三十六分徑單耳前膛鐵礮每尊按季支礮費

銀一兩八錢

三十分徑洋莊礮每尊按季支礮費銀一兩八

錢

十二磅銅田雞礮每尊按季支礮費銀一兩

三百舳至四百五十舳洋莊礮每尊按季支礮

費銀九錢

二十二分徑洋莊鐵礮每尊按季支礮費銀九

錢

二十四分徑洋莊鐵礮每尊按季支礮費銀九

錢

二十分徑洋莊鐵礮每尊按季支礮費銀九錢

覆陳部駁海防報銷摺光緒十二年四月初十日

奏為光緒六年以前北洋海防報銷經部駁查各款逐一登覆仍請照銷恭摺仰祈

聖鑒事竊准戶部咨開光緒元年至六年北洋海防

報銷案內臬司丁壽昌月支薪水銀二百兩道

員鄭藻如許鈐身各月支銀一百兩知縣陸爾

發月支銀五十兩提督丁汝昌月支銀一百兩

嗣加為一百五十兩游擊劉步蟾月支銀五十

兩嗣加為一百兩以無例章可循又無奏報案

據均令比照核減又調津登榮水師艇船月支

公費銀一百兩以奏調時並未隨摺聲明又未報部有案無憑核銷又直隸提督李長樂親兵小隊所支銀數雖與淮軍馬隊章程相符惟冊報並無馬隊字樣此外又另有馬兵二十四名則親兵非馬隊可知何以亦按馬隊支給礮費一項冊內並未聲明每礮月支銀若干又新城練軍操用十二磅克鹿卜後膛鋼礮十六尊每尊月支礮費銀六兩此項章程係何時核定又礮船公所司事一名月給銀十兩夫役四名月各給銀三兩六錢月需紙張油燭等項銀六兩

事屬可行係比照何項章程支給均令查覆核
辦等因當飭據支應局司道逐一查覆前來臣
查北洋自光緒元年遵

旨籌設外海水師講求洋務人材訪購新式利器以
為各省之倡當時規模未具並無成例成案可
循西國水師強盛甲於天下中國欲求自強必
須仿照西法斟酌損益其開支各項亦惟有量
能授事實用實銷是以光緒元年戶部會同總
理各國事務衙門奏撥南北洋海防經費摺內
祇言由督辦大臣將用款數目咨報總署戶部

查核初無如何立案分銷之文蓋因籌辦海防創設兵船一切用款非他項軍需可比不能繩以常例也臣既任督辦凡用款數目不得不於樽節之中求有實濟隨時酌量批發本與他案他省例行事件不同亦不敢稍任冒濫嗣於光緒八九年部中始定報銷新章令先奏明立案並分三部造冊但以前已用之款實係無從遵辦迭經聲明奏咨在案查薪水為委員辦公之需總以差事煩簡為斷北洋海防事體煩重非諳練各國水師規制熟習中外交涉事宜人員

不足以供驅使該員等往還海口水陸交馳聯絡洋將一切舟車薪夫因公酬應之費較內地防務差使可以從容坐食者不啻倍蓰勢須量予優給即如前臬司丁壽昌係以一人而兼數差一差而任數事僅此一分薪水辦公尚形竭蹶今其人久經物故若事後刪減追繳勢將因公受累殊非所以示體恤其餘員弁大率類是又調練登榮水師艇船九號係仿照練船之制令弁兵認真操習以備鐵甲碰快船之用該艇船領運餉械一切需費爰照練船酌給每月公

費共銀一百兩因在奏報核給登榮水師新糧以後是以未及隨摺聲明其時亦未有立案新章為數無多向准隨冊聲敘遂未先行報部以艇船九號而月僅支公費銀一百兩實已力求撙節毫無虛糜又直隸提督李長樂所募親兵原係馬小隊其新糧等項胥照淮軍馬隊章程支給冊內無馬隊字樣委係開報未能明晰此外另有馬隊二十四名係該提督出防隨營之本標馬隊不在所募親兵馬隊之列所支各項礮費內二十四磅後膛礮每尊月支銀八兩三

十二磅前膛礮每尊月支銀三兩三錢二十四
磅前膛礮每尊月支銀三兩二十五分徑洋莊
礮每尊季支銀二兩三十六分徑前膛礮每尊
季支銀一兩八錢二十分徑洋莊礮每尊季支
銀九錢自六年七月起至十二月底止共應支
銀二百六十二兩四錢現查銷冊內計多核銀
二兩七錢一分五釐八毫九絲四忽四微係句
稽錯誤應即更正所有此項礮費並新城練軍
操用克鹿卜十六磅後膛鋼礮月支礮費銀六
兩均於所購各項礮位到後按照每月實需油

紗器料等項用費隨時酌定亦因在新章以前
未經先期報部項已另行專摺補奏立案矣又
礮船公所司事夫役月支薪費工食銀兩因軍
火關係至重且遠在海濱食物昂貴所需薪工
難以他項比照部臣亦謂事屬可行以上各款
共應銷銀八千九百八十四兩六錢五分四釐
四毫一忽一微五纖查戶部核覆光緒元年
至六年洋員支款案內聲稱本部核銷各項總
以例章奏案為憑惟所覆各節亦係實在情形
以前用過各款應由該大臣自行奏明辦理等因

今委員薪水等款事同一律均係實用實報無
例可循毫無浮冒相應仰懇

天恩勅下戶部照數准銷以清案款理合恭摺具陳

伏乞

皇太后

皇上聖鑒謹

奏

洋員資費請准銷片 光緒十三二四月初十日
再戶部核覆光緒元年至六年北洋海防洋員
支款內稱各洋員所支薪水向無例章可循且
事隔多年洋員已多遣撤回國所有支過薪水
銀一萬二千八百七十九兩零又赴旅順口修
築礮臺川資銀一百九十五兩應照數准銷嗣
後北洋海防所用洋員可減則減其必不能裁
減者亦應釐定章程何項差使為煩何項差使
為簡煩者月支不得過若干兩所用不得過若
干員簡者月支不得過若干兩所用不得過若

千員先行報部立案如有增減隨時咨報又各洋員支過來華回國川資暨安家一款共冊造銀一萬五千四百九十八兩零該洋員等既經中國催募其來回川資暨安家銀兩自應給予惟數目參差不一應令詳細分晰另報併將海外各國距華孰遠孰近某國來華約需川資若干統行酌定大概數目等因當以北洋創設外海水師本係仿照泰西成法意在取彼之長以為自強之計所購船礮槍械機器等項日新月異理法精奧中國素未經見其用法亦未諳悉

以至精至利之器授諸不諳用法之員弁幾同
廢物是以不得不借才異域僱募洋員來華教
習以期一物得一物之用非好為此糜費亦絕
非冗員可比方僱募之初事屬創始無例可循
薪水川資等項胥由原薦之洋員或各國出使
大臣與之酌量商訂該教習等不遠數萬里而
來所圖者利耳惟餌以重利彼方挾所長而樂
為我用且須視本領之高下以定新資數目之
多寡有於薪水外議給房膳旅費醫藥等項者
有將房膳等項併入薪水內者有新水在華全

支或在本國留支若干以為安家者各隨所欲
得而斟酌允行辦法本無一定非若中國員弁
供差以官階之崇卑事務之繁簡定薪水之等
次也其川資等項則又視其人用費如何其本
領好而用費大者非多金不足以贍用故議給
之數較多不能按照程途遠近以計其值緣該
洋員等來華均須乘坐外國公司輪船其艙位
有頭二三等之分其價值有隨時增減之別或
於船價外另給在途薪費或將船價薪費併計
在內總其名曰川資一經訂立合同即應照付

亦不能由我預定數目中外交涉事件不得不
因時制宜以前所僱洋員除酌留教習差委外
已有限滿遣回者亦有限未滿遣回者委係可
裁則裁可減則減嗣後如事關緊要必須添募
應仍由原薦之洋員或出使大臣詳細選擇力
求撙節並隨時咨部立案現實無從預定員名
額數且借材係權宜之計自亦無須定額業將
此情咨覆戶部並飭局將前項川資等銀分晰
開列清冊咨送核銷在案茲准戶部覆稱該大
臣所覆各節亦係實在情形以前用過各款應

自行奏明辦理等因所有光緒元年至六年用
過僱募洋員來華回國川資暨安家等銀一萬
五千四百九十八兩八錢六分三釐三毫四絲
六忽一微均與外洋交涉實用實報毫無浮冒
相應仰懇

天恩勅下戶部照數准銷以清案款理合附片具陳
伏乞

聖鑒謹

奏

再請劉步蟾等獎敘片

光緒十二年五月初六日

再臣前保出洋照料鐵艦工程並駕駛來華游擊劉步蟾等十員上年十一月二十五日奉

旨著照所請欽遵在案旋准吏兵部咨開前定嚴核保舉章程各省機器船政事務不佳請獎應將此案奏明更正等因臣查部定嚴核保舉章程所稱機器船政不准請獎係指內地各省尋常局務而言其出洋人員係異常勞績並不在嚴核之列即如出使各國大臣隨帶員弁駐洋三年准其優保迭經循辦足為明證今劉步蟾等

卷十一
三二二
係專派赴德國照料定遠等鐵艦工程駐洋已
逾三載朝夕在廠監視研究製造理法勞苦備
嘗工竣後又同德弁駕駛來華遠涉風濤數萬
里俱臻平穩實屬奮勉出力與光緒七年駕駛
英廠所造兵船來華准獎員弁情事相同較出
使隨帶員弁僅辦交涉文案等事准其優保者
有過之無不及也現值創辦海軍添置戰艦講
求製造駕駛必須及時鼓舞冀可人材輩出日
起有功若往返重洋頻經艱險辛勞久著之員
照章應得獎敘忽欲比照內地尋常局務靳而

不與非特顯與出洋准獎成案兩歧且無以感
發人心奚能收指臂之效該員劉步蟾等材藝
既堪造就勞績實邁尋常原保毫無冒濫相應
仰懇

天恩俯准勅部仍遵前奉

俞旨給獎註冊以昭激勸庶於海軍大局有裨其咨
獎千把各弁前已咨部合併聲明理合附片陳
請伏乞

聖鑒訓示謹

奏

輪船修費請免追繳片

光緒十三年四月初八日

再據委辦輪船招商局員山東登萊青道盛宣懷等詳稱准江蘇糧道咨奉戶部催查光緒八九兩年運漕輪船原領修費令即追繳報部等因該道等查修費一款係為體恤商艱慎重漕運起見商局輪船運漕原以輔沙甯船之不足創辦之初水腳修艙等款奏准與沙甯船一律並無歧視向來輪船用費繁重除燒煤薪工等項其應行修理者即就機器而論費已不貲蓋行駛惟賴機器必須隨時加修使其堅實迅利

方免危險之虞光緒八年運漕之永清等十二
船在上海耶松洋廠修理機器各項計支銀五
萬八千二百八十九兩二錢五分一釐除奉給
蘇浙修船銀五萬四千五百九十八兩七錢六
分三釐二毫尚不敷銀三千六百九十兩四錢
八七釐八毫九年運漕之利運等十三船在耶
松洋廠修理機器各項計支銀八萬九千三百
七十四兩六錢九分六釐除奉給蘇浙修船銀
七萬八十四兩五錢八分八釐二毫尚不敷銀
一萬九千二百九十兩一錢七釐八毫以上不

數銀兩因格於定章勢難請益均由商局籌補
至此項修費係專歸運漕時四個月核算與裝
貨各船無涉核計歷年所領修船銀兩皆有絀
無盈所冀攬載客貨水腳稍資挹注前奉部飭
追繳業將未能遵辦情形縷晰稟咨查商局於
十年因法人開辦暫歸旂昌代管十一年收回
自辦員董已多撤換股商亦紛紛更替該道等
係由旂昌收回後接辦之員細核當時所收修
船銀兩確已抵支修費帳冊具在彰彰可考現
在商局輪船運漕領款綜計每歲少領銀至八

九萬兩之多運費已虞賠貼攬載水腳亦較從前減落商力甚形艱窘且沙甯船修費每石尚給銀五分輪船修費已自十年停止同一急公而領款則相形見絀若併責賠從前已用之修費商情實難允服仍請免追等情具詳前來臣查戶部前因江蘇咨覆謂輪船堅固行駛便捷無須修脣又稱近年輪船輻輳搭載水腳較前減半遂將輪船運漕向有修脣一款停給並欲追繳已用銀兩殊不知輪船之堅利全在修脣之認真蓋往來海洋出入口岸駛速力猛船身

固不免有損傷而鍋鑪機器又時有滯塞損壞
每次修費動至數千金或萬餘金船本之重迥
非沙甯船可比且運動全在機器一有不靈即
不能行駛不得不隨時加修斷難惜費誤事非
若沙甯船乘風緩行無輪機之繁重可按年一
修費亦不鉅也是以通商以來上海有耶松祥
生等洋廠專為修理輪船即大沽船塢亦時有
各國輪船請修之件此中外所共見共聞者若
謂無須修脣則各處廠塢豈皆虛設至近來搭
載水腳減半係因中國商局輪船添多洋商心

懷嫉妬跌價相擠馴至大減約計創設招商局
十餘年來中國商民得減價之益而水腳少入
洋商之手者奚止數千萬此實收回利權之大
端華商竭蹶經營獲此明效正宜維持體卹庶
免衆情渙散又為洋商壟斷居奇况現運官糧
客貨得價皆微股商已難獲利又須拔還洋債
彌補前虧若再追繳已用之應給修費力更不
支而與沙甯船顯分軒輊亦未平允相應仰懇
天恩俯念光緒八九年蘇浙發給招商局運漕輪船
修艙銀兩本係照章應給之款且已實在支用

無存准免追繳以昭大信而恤商艱理合附片
具陳伏乞

聖鑒訓示勅部查照謹

奏

請開淄川鉛礦片 光緒十三年四月十六日

再醇親王等會議整頓錢法摺內聲明戶部存鉛不敷應趕緊采購戶部覆奏摺內謂黑鉛一項京局每年配鑄暨神機營工部琉璃窯等處需用甚鉅貴州湖南各有欠解其白鉛一項貴州可認辦若干尚未咨覆若專待該兩省采辦輾轉需時擬先購洋鉛濟急等語誠以銅鉛皆鼓鑄根本二者缺一不可前已奉

旨派唐炯督辦雲南銅礦冀可源源接濟鉛勛為貴州湖南出產今該兩省辦解無多尚不足供京

局之用而洋鉛因各省鑄錢爭購貨缺價昂未
可常恃必須另籌接濟臣訪聞山東淄川縣柵
木溝等處素有鉛礦產苗甚旺質色尤佳從前
商民間往開采每日可出鉛砂七八萬觔於村
庄風水虛墓並無妨碍因無人主持旋開旋止
函商撫臣張曜曾取礦樣寄至上海驗視皆稱
極好該撫又派員前往會縣察看民情頗順臣
查制錢缺乏京外皆然今既推廣鼓鑄此後京
局及各省皆須鉛觔配製東省既有此鉛礦正
可及時開采以天地自然之利為

國家園法之需山東距京較近若果采辦得宜提
鍊合法則部需鉛觔即不必專賴湘黔遠運更
省煩費洵於大局有裨應請

旨勅下山東撫臣張曜迅即遴員酌帶礦師確勘妥
定章程速籌試辦以期興利便民臣又聞熱河
亦有鉛礦已派人帶新募美國礦師前往察勘
如何設法開采容再奏明辦理臣為鑄錢需鉛
孔亟起見理合附片具陳伏乞

聖鑒訓示謹

奏

--	--	--	--	--	--	--	--	--	--	--

1017

威海辨防裁營濟用摺

光緒十三年閏四月十日

奏為威海衛創辦海防工用浩繁擬暫就歲撥舊有額餉酌裁營哨以濟要需而資挹注仰祈

聖鑒事竊臣於光緒十三年二月間准海軍衙門咨稱北洋沿海一帶除已建炮台已設防兵各口外尚有山東界之威海衛奉天界之大連灣兩處水深口寬形勢阨要關係渤海門戶不容不量為布置請將吳大澂所部練軍十一營撥赴威海衛臣部銘軍十一營撥赴大連灣駐紮扼守吳大澂勇營月餉歲需銀四十餘萬兩係舊

有之款擬仍照支毋須再議增減惟兩處購辦
巨炮魚雷築台設棧所費不貲應分年籌撥庶
易集事請在於洋藥釐捐內歲撥三十萬兩以
十年為期逐歲經營威勢可期大振等因於本
年正月二十七日具

奏奉

懿旨依議欽此欽遵咨行到臣當經分飭銘綏各軍統
領遵辦一面派令沿海前敵水陸營務處前署
長蘆運司周馥會同各該統領先行前往各海
口詳細履勘旋據稟覆前來除大連灣設防事

宜另行籌辦外臣查威海衛瀕臨大海地段較長磧砂林立恰當黑水洋來路水勢既寬且深該處南北各口必須分築大炮台十餘座乃可憑以扼守而徧山石骨嶙峋踣紮營壘先須鑿石填坡翻山運土僱夫募匠施工倍極艱難所需各項物件本地無從采買又須遠道購運約計應用經費實繁且巨查西洋後膛大炮三四萬觔以上方可憑高擊遠抵禦鐵艦每炮連架具必需五六萬金每台必需巨炮二三尊魚雷水雷在水面布置者為數亦鉅統計大連灣威

海衛兩處分用前項不敷尚多實未能兼顧築
台之費且吳大澂奏定於吉林機器局內歲撥
銀二萬兩以為製造等需現該軍歸併北洋又
經吉林將軍奏請添撥部議令將前劃之款撥
還吉林該軍少此一項更形支絀臣與沿海前
敵營務處周馥及綏軍各軍統領戴宗騫再四
商議現既無款可籌祇有斟酌變通暫就綏軍
等軍酌裁馬隊兩營護衛步隊一營即以所節
之月餉彌補工用之不足挹彼注茲或可稍資
周轉已令儘此閏月內籌給遣費照議裁減索

案核實造報現留步隊七營炮隊一營馬隊水雷各一哨均經拔隊赴威如此變通辦理既與海軍衙門原奏吳大澂勇營月餉本係舊有之款毋須再議增減一層仍相吻合庫款亦無所出入而於築台興工需費較有裨益該口地段甚長所留八營二哨往後防守不敷分布應請俟炮台一切布置完竣再行酌核辦理臣為該口創辦海防工用浩繁通籌節省起見合將暫就歲撥額餉酌裁營哨以濟要需而資挹注緣由繕摺具陳伏乞

卷二

十一

皇太后

皇上聖鑒訓示施行謹

奏

學堂人員一體鄉試片

再准總理衙門咨開會議御史陳瑋瑩奏開算學取士一疏請

旨飭各省學臣於生監中考取算學生咨送總理衙門考試覆核等因仰見

朝廷遠才惟廣勗業務精莫名欽佩臣思西學所長雖以算學為先導而節目繁多日新月異如總理衙門所試格物測算及機器製造水陸軍法船砲水雷等藝似非佔畢儒生墨守九章成法者所能盡其廣博臣於光緒六年七月奏開天

津水師學堂挑取各省良家子弟專習駕駛八
年四月又分設管輪學堂其習駕駛者則授以
天文地理幾何代數平弧三角重學微積駕駛
御風測量演放魚雷等項其習管輪者則授以
算學幾何三角代數重學物力汽理行船汽機
機器畫法機器實藝修定魚雷等項十一年正
月又奏開武備學堂調取各營中穎異少年授
以兵法地利軍器砲台算法測繪及步砲馬隊
操法近更考取幼生文義粗通者課以幾何代
數重學測量砲準等書查學堂之設雖為造就

將才起見要皆以算學入手兼學經史其中亦有文理清順而志切觀光者倘異日得由科甲進身則文武兼資未始不可為禦侮干城之選惟該學生等籍隸各省程途遠隔若令先期回籍靜候學臣按臨未免廢時曠課臣再四思維當茲洋務奮興之際既欲惜其寸陰又體

國家作人之方未便阻其進取合無仰懇

天恩俯准於鄉試之年除各省士子兼通算學者由本省學臣考試咨送外所有天津水師武備學堂學生及教習人員屆時就近由臣遴選文理

清通者開單咨送總理衙門聽候考試錄送一
體鄉試以資鼓勵而廣登進若倖而獲雋仍歸
學堂及水師陸軍調用俾收實效是否有當謹
附片陳請伏乞

聖鑒訓示遵行謹

奏

電報官報請給半資措

日光緒十三年七月初六

奏為電報商局應收京外衙門頭等官報費部議
不再以領存官款劃抵擬請酌給現資一半以
期官商兼顧持久不廢恭摺仰祈

聖鑒事竊准戶部咨開各省設立電線案內北洋墊
用淮軍餉及南洋山東撥存商局官款共合湘
平銀二十六萬九千六百餘兩除以光緒八年
三月起至十一年六月止頭等官報費劃抵外
尚餘官款未抵報費湘平銀四萬一百餘兩其
廣東前撥官項湘平銀二萬七千三百六十兩

另由兩廣官報費劃抵嗣後頭等官報不得再行計資劃抵等因當經轉飭在案茲據總辦電報事宜東海關道盛宣懷詳稱前創辦津滬電線所用官款除由商繳還六萬兩又議定五年後分年續繳二萬兩其餘湘平銀九萬八千七百餘兩奏明自光緒八年三月改歸官督商辦起以商局應收軍機處總理衙門各省督撫出使各國大臣洋務軍務頭等官報費劃抵俟此項抵繳完畢別無應還官款則前項官報亦不領資以盡商人報効之忱等因此僅就自津至

滬官報抵支官款而言今則南北十餘省皆設
電線官報已四通八達所領各省官款自應悉
照津滬之例一律劃抵報費現除抵繳南北洋
山東官款並將餘銀四萬一百餘兩抵支十一
年六月以後報費外尚有原領江鄂川廣各省
官款應抵銀三十餘萬兩部議嗣後不得再行
劃抵敢不遵照惟官督商辦之舉其要在上下
相濟官款商情似宜兼顧電線創始之時官報
僅居商報十分之一衆商以為官報不復加增
又冀常年官貼巡費因有官款抵繳完竣官報

亦不領資之議旋蒙核定官貼巡費只以五年為限且各省官報日繁動輒數百言均列頭等往往停擱商報夜以繼日猶僅傳發及半實與初議時情形不同是以局董謝家福等僉謂官報冗雜恐誤軍國要務商報停減尤虞局費不支必使惜墨如金斯可官商兩益又據江浙閩粵衆商以官報太多商情竭蹶屢請將官報一律核發現資庶各惜費不致冗雜均經轉詳有案電報必字簡乃可速達西文可逐字傳遞華文一字須用號碼四字代之功夫已費四倍况

華文以曉暢為工報費又有抵支官款未免盈
篇累牘遲誤事機商局常年經費惟賴商報現
資官報日多則商報日少蓋發報定例次序官
先商後故商報必遲惟其愈遲故生意愈少即
如上海福州廈門香港四口往來電報本較各
口為多茲就光緒十二年分核計該局僅有商
報費洋銀二萬三千餘元其流入英丹海線傳
遞者則有洋銀十二萬五千餘元此本華局可
沾之利乃為洋商所得加以電桿露立枯朽隨
之逐年修換必數萬金官中津貼巡費相繼期

滿每歲又需商出數萬金就此三項少入加支之款計之每歲已需洋銀二十萬元他項經費在外所收商報費有限實屬賠累不堪查東西洋各國商設電線其初設之時必由公家認付股商利息至沿途巡護電桿之巡捕均由公家發給口糧凡有官報悉照商民一體給費恤商如是而不嫌其優蓋商利厚則電務益興深有裨於軍國大計也今電局尚有應抵官款即照初議亦未屆報効之期况現值局勢岌岌而部議不准再抵則原領官款須以現銀分年歸繳

衆商力更難支若不將官報核給現資電局斷難立腳然竟照各國通例無論何項官報一律照商報付資為數較鉅亦非上下相濟之道該道傳諭衆商勉以大義悉心酌核所有軍機處海軍衙門總理衙門戶部等衙門南北洋大臣出使各國大臣頭等官報皆關軍國要務請自光緒十三年六月起按月結算報資以一半由衆商報効一半援照遞寄外洋電報章程歸出使經費項下按月核給各省將軍督撫頭等官報亦屬緊要事件並由衆商報効一半其餘一

半各就情形籌發現資以期衆擎易舉均蓋用
印信為憑此外提鎮司道防營局所砲台兵船
印委寄報均照三四等章程令其自行出費如
遇軍務海防要件亦照商報出費仍發在商報
之先以示區別等情具詳前來臣查電局經費
本指商報現資乃各省官報冗雜太甚應接不
暇以致商報日稀經費無出迭據衆商呈稟曾
於光緒十一年咨行各省有案惟號令不齊迄
今仍紛紛列作頭等官報電局接收之後不敢
不遞而統計抵支官款遂成鉅數是公家與電

局兩有所損現既商力艱窘局勢岌岌即不得
不變通辦理妥為維持以免要舉中輟該道擬
京外衙門頭等官報酌給現資一半以一半由
商報効其提鎮司道以下皆自行出費不列頭
等非此無以示限制蓋既須現資則官報自少
較從前抵支官款之數約可節減過半於公家
不無裨益在電局藉得官報價補直並冀商報
漸增稍紓商力至京城各衙門及南北洋大臣
出使各國大臣官報非緊要者不發本屬無多
又僅止半價每歲報資有限出使經費尚易籌

給其各省有由官設電線之處仍照舊辦理此
為節費恤商起見以後官報減少遇有緊急電
信更可迅速傳遞有裨機宜仰懇

特恩俯准照辦以期官商兼顧持久不廢理合恭摺
具

奏伏乞

皇太后

皇上聖鑒訓示謹

奏

武備學堂請獎摺 光緒十三年十月二十日

奏為天津創設武備學堂已逾兩年著有成效應
將教習繙譯人員及屢考優等兵弁援案擇尤
請獎恭摺仰祈

聖鑒事竊臣於光緒十一年在天津建設陸軍武備
學堂挑選各營精健聰穎畧通文義之兵弁入
堂肄習兵法曾於是年五月奏明事屬創始風
氣未開不可不多方誘掖擬將教習繙譯各員
及屢考優等學生援照總理衙門同文館成案
二年奏保一次以示鼓勵奉

旨著照所請該衙門知道欽此欽遵在案上年四月
間醇親王巡閱北洋親赴學堂查勘課程奏稱
規制嚴肅各生徒於陸路槍砲台壘之法童而
習之長令入營帶隊必得實用將材自日出不
窮等語誠以學堂為儲備將材之地亟宜加意
培植西洋各大國皆以此為自強根基天津學
堂自光緒十一年正月創設後據各營統領陸
續挑選兵弁子弟一百數十人來堂肄業多係
驍健精敏之材募雇德國兵官朝夕課導所習
天文地輿格致測繪算化諸學砲台營壘新法

皆有實用並時操習馬隊步隊砲隊及行軍布陣分合攻守諸式仍兼習經史以充根柢兩年以來勤課不懈於西洋武備各學俱通門徑臣屢派司道大員月試季考勸懲兼施前月臣復親臨考驗各項操法一律嫻熟試以砲台工程做法及測繪算化諸學無不洞悉要領於行軍制勝之道頗有裨助因擇其屢考優等學生飭令回營轉相傳授次等者仍留堂學習並選新生入堂肄業分番迭進庶幾成就更多收效更廣惟是西洋練兵製器之法日新月異中國邊

海各防密邇強鄰平日若不認真講求臨事必至張皇無措今之統兵將領皆從前屢立戰功已擢顯職年力漸就衰頽後起材武之士全賴學堂為之甄拔造就若使精心向學屢考冠羣者進身無路而不予以升階殊不足以資鼓舞而開風氣且回營充當弁目何以鈐束衆兵盡心課督至堂內教習繙譯各員有由出使外洋調回者有由總理衙門調用者其出力期滿之員自應擇尤一併保獎以示激勸相應將武備學堂優等學生及教習繙譯尤為出力人員開

具清單仰懇

天恩俯准照給獎敘庶願學者共聞風而興起在事者益奮勉以圖功於培植將材籌邊固圉之道裨益非淺除照章飭開各員履歷咨部並應給千把以下未弁咨部註冊外是否有當伏乞

皇太后

皇上聖鑒訓示施行謹

奏

籌議朝鮮通使各國摺光緒十三年十一月初六日
奏為遵

旨與朝鮮國王籌商派使各國未盡事宜酌擬三端
現准咨覆照辦恭摺仰祈

聖鑒事竊臣欽奉九月初三日

寄諭朝鮮派使各國體制交涉務歸兩全其未盡事
宜仍著李鴻章隨時通問籌商務臻妥協等因欽
此仰見

聖朝保全藩服無微不至欽感莫名遵即電飭駐紮
朝鮮辦理交涉通商事宜升用道補用知府袁

世凱轉商該國應派駐紮公使不必用全權字樣旋於九月二十三日接據袁世凱電稟准朝鮮外署照稱奉國王傳教前派各使久已束裝如候由咨文往返籌商恐須時日請先電達北洋大臣籌覆並據該國王咨稱近年泰西各國屢請派使修聘諸國幅員權力十倍朝鮮不可不派大公使惟派使之初未諳體制未先商請中朝於派定後即飭外署知照各國以備接待茲忽改派深恐見疑仍請准派全權公使前往待報聘事竣調回或以參贊等員代理庶可節省

經費並飭該使至西國後與中國大臣仍恪遵舊制惟事恭謹等語辭意尚為遜順臣復加籌度更將有關體制者先為約定三端一韓使初至各國應請由中國大臣挈赴外部一遇有譙會交際應隨中國大臣之後一交涉大事關係緊要者先密商中國大臣核示並聲明此皆屬邦分內之體制與各國無干各國不得過問當即電飭袁世凱轉達該國王照辦茲復准該國王咨稱於十月杪飭駐美公使朴定陽駐英德俄意法公使趙臣熙先後前往所定三端並飭

一五二
一五四
遵行咨請據情轉奏前來臣查朝鮮派使往駐
泰西本係無益虛名徒糜國用前奉

諭旨開示至為精詳惟該國因原約有遣使互駐之
條遂未先商請

中國遽以全權公使報聞各國此時慮以改派失
信自是實情既稱遣使後與中朝使臣往來恪
遵舊制臣所定擬三端又經遵行於屬邦事例
並無違礙至所稱報聘事竣或由參贊等員代
理以期節省經費亦係遵奉

諭旨審度預籌謹將該國王咨文一道照繕清單恭

呈

御覽除分咨總理各國事務衙門禮部暨出使各國
大臣外所有與朝鮮國王籌商派使各國未盡
事宜酌擬三端現經照辦緣由理合恭摺具陳

伏乞

皇太后

皇上聖鑒謹

奏

--	--	--	--	--	--	--	--	--	--

1171

謹將朝鮮國王咨文一道照繕清單恭呈

御覽

朝鮮國王為咨照事本年九月二十六日據外
署督辦趙秉式啟稱竊於本月本日接准袁總
理照會內開茲於二十四日戌刻奉文華殿大
學士李覆電內開來電述韓王咨前派全權公
使赴泰西各國已知照各國使報其政府未便
另改使號使人見疑擬飭該使前往待報聘事
竣調回以參贊代理節省經費并飭該使至西
國後與

中朝大臣仍恪遵舊制惟事恭謹云云辭氣遜順
本大臣不能不曲為體諒惟欽奉

上諭派駐之後體制交涉務歸兩全所有派往各國
之員與中國往來均用屬邦體制其未盡事宜仍
著隨時通問籌商務臻妥洽等因本大臣亟應預
為聲明有三端一韓使初至各國應先赴中國
使館具報請由中國

欽差挈同赴外部以後即不拘定一遇有朝會公讌
酬酢交際韓使應隨中國

欽差之後一交涉大事關係緊要者韓使應先密商

中國

欽差核示此皆屬邦分內應行之體制與各國無干
各國不能過問即

諭旨未盡事宜籌商妥協之意中國與朝鮮休戚相

關各

欽差皆以名卿出使必能推誠優待韓臣該道應先
照知外署轉達國王務飭使臣遵辦俟咨到再
復各等因據此具見貴大臣仰體

皇上字小之恩曲諒敝邦難便之情俯允所請仍舊
使號俾保信義於天下不啟猜嫌於鄰邦此後

卷十一
五十七
體制交涉無失兩全用能永安其社稷杜息夫
煩言此皆貴大臣始終周全之至意也銘感之
衷更何有既當即於本月杪飭駐美全權朴定
陽駐英德俄意法全權趙臣熙先後前往泰西
各敬厥職至貴大臣遵

旨妥籌三端悉心籌畫既周且詳尤為欽佩除已飭
外署照覆袁總理現行照辦並飭朴定陽趙臣
熙遵行外相應備文咨謝希即貴大臣查照轉
奏施行須至咨者

光緒十三年十月二十日

湘淮各軍少裁長夫摺光緒十三年十一月十日
奏為湘淮各軍長夫多裁必滋流弊實誤要防仍
請每營步隊暫裁六十名藉濟工需免致大損
軍實恭摺 瀝陳仰祈

聖鑒事竊戶部前因豫省河工用款奏裁各省防營
長夫臣等以湘淮各軍營制成豐初年經前督
臣曾國藩奏定刊發章程每營五百人額設長
夫一百八十名勢不可少近值江海防務喫重
只能每營暫裁六十名業經會同覆奏奉
批旨著照所請該部知道欽此仰蒙

聖明體恤兵艱各營將士均深感服昨又經部議每
營通裁九十名抄奏知照前來伏查長夫之制
有關兵事強弱自湘淮軍轉戰南北削平寇亂
其得力在於勇額足而拔隊捷勇額足則力厚
常以一營分紮兩壘故戰守足恃拔隊捷則赴
機迅速不致賊退而兵始來皆原於額設長夫
分執粗重之役不使勇力過勞也曾國藩老於
兵事所以為

國家創法者用意實為深遠議者謂長夫為征兵
而設防軍可以不用此僅因他省內地尋常分

巡彈壓姑為遷就之計非所論於海防江防也
臣等所部各軍皆分紮濱江沿海要地各有修
築洋式砲台營壘及疏河墊道工程防所距城
市或數十里或百數十里且多孤懸海外所需
木石料物新糧子藥均須隔海搬運動資長夫
之力昔年行隊坐營皆用土槍砲尚須多夫幫
運近年因備外患所操槍砲全係西洋精利之
器即如臣鴻章所部淮軍現領用後門槍二萬
餘枝後門大小砲共三百七十餘尊臣國荃所
部湘營較少而用後門槍砲亦多其子藥零件

之笨重可按冊而稽各砲台大砲每尊重者至數萬觔開花子母實心各彈重者至五六百磅非數百人不能運一砲非十數人不能舉一彈較從前所用增至數十倍凡操後門砲自砲目至勇丁皆有應管之物應做之事缺一不可勇既須親操畚鍤幫做土工而練習槍砲口令準頭又不能一日間斷實與征兵勞苦無異其間粗重雜役甚多若長夫太少運用不敷必致有器與無器等西洋營制每軍另有做工運物之人曰工兵工兵即長夫也用以築台濬濠修

路及一切力作而使正兵專練槍砲各國若欲
強兵斷無用兵而不用夫之理今我軍於練習
槍砲之外兼助土工一兵已作兩兵之用若併
此有限長夫而遇事裁減則勇亦人耳何能兼
營並辦必致以月支之餉自行僱夫代役勇丁
口食不敷馴至逃散或且抽勇作夫正勇缺額
疲弱不堪復蹈綠營無用之習此流弊之所必
至者也查他省防營初無台壘艱巨之工又不
必練習西洋新式槍砲亦無湘淮各營利器之
多其所處亦非濱江沿海險阻之地情形本自

不同勢難以彼例此臣等所部各軍向不准一
名缺額工操皆定程限嚴勤督責不使稍有疲
懈務令技藝精熟士氣常新一勇實得一勇之
用蓋籌辦海防欲與洋人爭衡非治土寇可比
必須時加戒備方今強鄰環逼藩屬傾危豈可
稍存僥倖無事之心頓忘厝火積薪之誠部臣
議裁長夫因鄭工需款藉省餉銀以歸部墊自
屬不得已之舉臣等仰體時艱不敢固執業已
竭力設法暫裁步隊每營長夫六十名遵自本
年十一月初一日為始實係勉其為難在各營

弁勇方謂夫力減少恐誤工操而部臣又議再裁三十名合成九十名若果事可遵行絕不肯再行陳瀆惟是海防關係重大總理海軍衙門方奏令臣鴻章分派各軍設防海外之大連灣威海衛等處興築伊始勇夫艱瘁萬狀正議增募忽飭減裁若一減再減營中力不能辦將領無可驅迫弁勇臣又何以驅迫將領耶臣等久任兵事深知利鈍之機惟在作養士氣幾經苦心簡練始能成此勁旅倘裁夫過多則必過勞勇力致懈軍心殊不足以備緩急且即再裁三

十一
十名每年節餉僅數萬兩所得甚少而所關甚
大臣等再四察體不敢不據實上

聞實未便以一時歸墊工需致墮自強久遠至計况
馭軍尤在守信臣等前奏奉

旨准之後業經通行各營欽遵若飭再減亦無以示
信於軍士相應籲懇

天恩勅部仍遵前奉十月二十四日

俞旨將湘淮各軍每營步隊暫裁長夫六十名藉濟
工需庶免大損軍實此係目前權宜應急之法
未便永遠裁除俟河工事竣或遇有戰事仍應

照曾國藩刊章添足至淮軍因餉項不充未能按月發給足餉向來俟年終連坐抵月餉之採辦米價通盤截算結欠尾餉若干彙冊造報陸續酌補此次暫裁長夫銀兩應按各營實發月分年終核明騰出現餉若干再行報部候撥又淮軍中每營勇數有不止五百名其長夫亦不止一百八十名者應按每五百人暫裁長夫六十名仍留一百二十名之數分別核計裁留又樂字營步隊向按淮軍營制用長夫一百八十名今應一律暫裁六十名此外如淮軍馬隊每

營僅長夫五十名綏鞏軍步隊每營僅長夫一
百四名提督宋慶毅軍步隊每營僅長夫一百
名馬隊每營僅長夫六十名直隸練軍步隊每
營僅長夫二十四名為數本少即直字營義勝
營保陽軍步隊每營亦僅長夫一百二十名以
上各營或扼紮沿海砲台或遠駐海外之旅順
口威海衛同辦工操均屬勞苦既未逾奏定仍
留一百二十名之數且有減至倍蓰者應與零
星哨隊懇

恩一律無庸再裁以固軍心而昭公允所有湘淮各

軍每營步隊仍請暫裁長夫六十名藉濟工需
實難多裁緣由謹合詞恭摺滙陳伏乞

皇太后

皇上聖鑒訓示再此摺係臣鴻章主稿合併聲明謹
奏

漠河金廠章程摺 光緒十三年十二月初五日
奏為黑龍江漠河金廠擬定官督商辦詳細章程
以開利源而杜邊患恭摺密陳仰祈

聖鑒事竊臣前准軍機大臣密寄光緒十二年十二
月二十八日奉

上諭恭鏜等奏漠河金廠亟應舉辦一摺黑龍江漠
河山地方上年曾有中俄匪徒過江偷挖金礦自
應及時開採以杜外人覬覦著李鴻章遴派熟習
礦務幹員迅往黑龍江隨同恭鏜認真勘辦如津
滬殷實各商有情願承辦之人並著飭令同往俾

可圖成另片奏吉林候補知府李金鏞熟悉礦務
請飭派往會辦等語即著希元轉飭赴黑龍江會
辦等因欽此仰見

聖明思慮豫防籌邊興利之至意臣查漠河金礦出
產頗旺往年俄人越境開採華商間往收買金
沙自光緒十一年秋間派兵驅逐孽芽未淨迭
接出使大臣劉瑞芬函稱俄國官商仍思集股
採取若不及早籌辦久必為人佔據貽患匪輕
惟地處極邊集資不易得人尤難當經恭鏜奏
派道員用候補知府李金鏞前往查勘所有勘

礦及籌辦大略情形恭鑿已於本年九月奏明
飭李金鏞來臣處稟商一切擬定詳細章程由
臣先行具奏在案該員於十一月杪來保定面
稟據呈章程十六條臣逐一覆核皆該處開礦
應辦之事其中自備輪船開通陸路募兵保護
招回流民四條於邊防尤有關係現擬仿照西
國公司之法招集股本二十萬兩先行試辦惟
近日商情困敝股分驟難集成據該員聲稱年
內外趕緊勸集約不過六七萬金合之恭鑿籌
借庫款三萬兩僅得其半北洋庫儲支絀無可

騰挪適有天津商人情願出借當即由臣代借
十萬兩以足二十萬之數一俟股分招齊將借
款陸續繳還將來開辦後所獲餘利除開支局
用官利外當以十成之三呈交黑龍江將軍衙
門報充軍餉應用礦師詢據山東平度州礦局
道員李宗岱電稟該局礦師美國人阿魯士威
明年四月內可往漠河察勘一面購置機器建
造廠屋以備剋期開工前奉

諭旨勅臣遴派幹員迅往勘辦臣查李金鏞血性忠
勇不避艱險向本隨臣辦事經前吉林將軍銘

安奏辦琿春墾務兼理中俄交涉事件先後將
及十年邊情最為熟悉此次勘礦之便恭鏜派
赴精奇理江南岸與俄酋釐定四十八旗屯地
界尤能力持正議動合機宜現與恭鏜往返函
商擬即飭令該員總辦礦務該廠地處極邊驛
程稽滯除重大事件應稟商黑龍江將軍酌奪
其餘一切准由該員相機妥辦以專責成竊惟
金礦之興數十年來競推美之舊金山英之新
金山及俄之悉畢爾部皆係荒地開採以後日
臻繁殖遂成都會新舊兩金山近年出金漸少

而耕牧之利代興惟俄猶擅此為國大利查漠河一帶山脈正接俄境悉畢爾諸山據稱金苗長及五百里李金鏞所呈金樣成色尚佳中外謂為金穴似非無據從來疆場之間常以虛實為強弱俄自嘉慶季年創開金礦逐漸締造至道光咸豐之際尼布楚遂為雄城已有駸駸東逼之勢其時中原多故未暇兼營遂至以彼之實乘我之虛侵我邊陲如陟庭戶今之新界三面斗入僅隔一江彼方治兵招礦並議自新穆斯克至烏蘇里海參崴一帶興築鐵路繇巨黑

龍江吉林東北伺隙蹈瑕意殊叵測漠河奇乾
河之間尤所注意漠河距將軍都統所駐均極
寫遠而齊齊哈爾墨爾根兩城且隔在內興安
嶺之南若不及早經營誠為可慮夫實邊之計
在人聚人之計在財該處林木富饒地氣本旺
特以極邊寒苦千餘里荒僻絕無人烟若金礦
一開人皆趨利商賈駢集屯牧並興可與黑龍
江北岸俄城聲勢對抗外以折強鄰窺伺之漸
內以植百年根本之謀且因此自行輪船則江
面不令獨佔開通山路則軍府不至遠懸此皆

防患未萌而不容稍緩者也現在開通運道工程尤為緊要必須借資兵力應請

勅下黑龍江將軍會商練兵大臣派兵一二千名隨往調遣至經辦各員涉歷險遠創造艱難將來著有成效應將出力人員懇

恩准予從優保獎以昭激勸謹將李金鏞籌議章程十六條照繕清單恭呈

御覽除咨總理各國事務衙門查核外所有議辦漠河金礦緣由理合會同署黑龍江將軍臣恭鏜恭摺由驛密

奏伏乞

皇太后

皇上聖鑒訓示遵行謹

奏

--	--	--	--	--	--	--	--	--	--	--

1971

1971

謹將候補知府李金鋪籌議黑龍江金廠公司
章程十六條繕具清單恭呈

御覽

計開

一設局宜統籌也僱礦師購機器蓋房屋置車
輛買牲口設碼頭招流民募勇丁造輪船開
山路事多用繁非籌足資本無從入手惟近
年南北災荒勢難剋期集事今擬先招商股
二十萬兩惟恐一時難齊仰蒙北洋大臣李
保借商人銀十萬兩又蒙黑龍江將軍恭籌

撥庫銀三萬兩此兩款應俟招股齊時先行繳還

一股本宜招集也南中近年市面蕭條其殷實之家固尚不少或因他處之礦得手無多不免裹足不知漠河金沙已為俄人確著明效然恐羣情多疑故先借款創舉以期共信凡官紳富商同抱公忠必有樂助其成者應仍招股集資辦理現議籌本二十萬兩分作二千股每股收天津行平化寶銀一百兩如交上海規元每股收一百零六兩填發股票一

張息摺一扣認票不認人一股至百股均可
附搭擬於上海天津吉林等處遴派妥友設
立分局招徠俟股滿即行截數長年官利七
釐均於次年端節憑摺支付屆期先應匯銀
至各分局就近支付以免輾轉遠寄即將來
得金亦運往各分局銷售

一開辦宜定地也勘得漠河在愛琿之西江道
一千五百餘里是處起旱七十里即達金廠
地名元寶山兩邊帶坡高山中間有溪河一
道寬一丈至丈三四尺不等昔年俄人即在

北溪兩邊盜挖五六年已挖長十四五里惟
溪身正脈尚未挖及西至奇乾阿勒罕等河
均二百餘里東至阿木爾河下游口三百餘
里據俄人云此道金脈自額爾古納河西山
發源經奇乾阿勒罕直至阿木爾河下游計
長五百餘里奇乾河與阿勒罕阿木爾河均
有挖迹可指俄人所稱脈長五百餘里或非
無因須俟美國礦師前往試鑽扞探方知確
鑿茲擬就昔日俄人盜挖之處先行開辦俟
辦有成效其奇乾阿勒罕等處可次第辦理

卑府前此赴漠河所得金樣即在溪邊之殘沙內淘出經美國化學師樂百時化煉計一千分中得淨金八百七十一分銀七十五分鉛硫磺鐵五十四分據該化學師稱此金可與美國舊金山之金並埒云

一礦師宜妥延也既用機器即不能無礦師說者以為僱用工頭較礦師為廉然工頭僅熟機器不識金脈非老於礦學者未易推測况漠河金廠尚有數處擬一面開辦一面即四出相度而工頭仍須僱用惟向來泰西礦師

聲價自高居處飲食性喜侈靡本公司事事
核實兼之僻在荒漠須耐艱苦宜擇用西國
礦師之肯耐勞耐煩者自總辦以下只能與
廠中司事同其隆殺有功則賞有過則罰雖
礦師所用之通事人等亦不能任其迴護如
熱河礦師之哲爾者平度礦師之阿魯士威
皆有本領延訂合同內聲明到廠後如無明
效不拘年限即行辭換

一事權宜歸一也竊以開創之事難邊疆之事
更難邊疆而兼開創之事難而又難漠河金

廠去齊齊哈爾省城陸路幾二千里內多人迹未到之地凡有公文要件須派人專送或附俄輪送至愛琿驛站轉遞往返極速亦須三四十日凡遇風雪雨雹更難定期該處與俄界一江之隔俄人久在漠河竊挖今一旦收回俄人耿耿逐逐之心尤所莫測此後交涉事件勢必常有遠道稟商誠恐緩不濟急可否遇有小事即由卑府相機酌量妥辦其重大事件仍稟商北洋大臣黑龍江將軍核奪

一輪船宜自備也黑龍江本隸中國版圖今則
為俄人獨行之江由於我無船也所設駐防
僅東有愛琿一處其西至額爾古訥河一千
七百里如入無人之境雖新設卡倫二十處
兵力極單山路深遠消息難通愛琿至漠河
水路一千五百里冬時猶可踏冰行車夏則
我無一舟可濟因之兵糧往來不得不借坐
俄輪種種受其挾制然此猶患之輕者其大
害則在漠河金廠久為俄人竊挖覬覦此次
卑府奉差前赴黑龍江左分界俄員諄諄以

稅租金廠為託今我一旦開採彼不必違好
興我祇須輪不我借即糧無可運金廠中人
便有束手待斃之慮反覆籌議必須自備輪
船庶幾有恃無恐且於邊防信息亦可靈便
惟黑龍江海口久為人有如輪船由他省置
造苦無海口可入祇得商請吉林機器局代
造小輪船二隻一上一下專以拖帶駁船為
主造成後可由松花江轉入黑龍江直達漠
河查松花江上抵黑龍江之水道淺處不過
四五尺小輪吃水當以四尺為度可期往來

通用並擬製造十二槳之小長龍船四隻以濟輪船之不及且可往來梭巡江面再黑龍江二千里內尚未探得產煤之處俄國輪船往來俱用木柴代煤故江左沿江每距三五里即有一村村民砍木存儲供賣俄輪之用江右絕無居民我輪往來用煤不便擬稟請黑龍江將軍恭將原設之卡倫一律整頓就飭各卡兵一體砍儲木柴待用立定章程給予價值卡兵儲木不得缺誤輪船給價不得短少行船半年核計每卡可得市錢數百

千該兵有此分外出息當以卡倫為優差不
但不視為畏途抑且爭從其事矣

一機器宜購置也產金之處地氣嚴寒夏秋之
間積雪始化掘地四五尺堅冰如鐵金生於
沙沙凝於冰須先融冰而後得沙淘沙而後
見金工作非易若全賴民夫則費力多而見
功難佐以機器則吸水淘金事半功倍且人
夫少用則良莠易辨不使無業莠民聚而成
黨其利一人夫少用則稽查易周不致有藏
匿影射偷漏等弊其利二人夫少用則工價

可省且該處無煤而有樹或用木柴或燒木
炭皆極便易惟此項機器必須購自外洋幸
漠河之沙金與礦金不同所用機器無多僅
需吸水淘金鑽地等件每副價值亦不甚鉅
但定購之時宜加詳考須求其至精至堅可
適久用者以免停工待修虛糜貽誤

一用人宜慎選也開辦一事尤在襄助得人惟
黑龍江為邊遠苦寒之地漠河更遠更寒內
地有用之才孰肯謀食於負罪謫戍之鄉而
鉅細諸務非賴羣策羣力不克相與有成今

欲任用得人非豐薪優獎不足養其家而得其力所有監工稽查辦糧押運文案收支等事宜均關重要俟三年有成實效昭彰擬請擇其尤為出力者照異常勞績詳請從優保獎以資觀感漠河一帶千餘里無人煙艱險勞苦勝於內地十倍且開辦金廠既藉以防邊又可抽助軍餉二者均關軍

國大事非破格獎勵實不足昭激勸也

一流民宜召回也查工作之役應招土著之民漠河金廠地屬遐荒民無土著前有流入俄

境之華民即昔日俄人盜挖時招集之華民

也當時俄人從海參崴恰克圖等處僱覓山東直隸之民若輩開礦尚

稱熟手自官兵驅逐後絕其歸途俄人仍收

作傭工蚩蚩之衆誰不思歸不得已而易服

從人以圖生命凌辱威嚇困苦備嘗今擬招

回此項流民仍為我用並優給工食勤加約

束賞罰嚴明在若輩久思仍回父母之邦今

一旦遂其所欲其悅服可知倘流民不敷遣

用所有愛琿等處八旗苦寒之人願充斯工

者亦一體招入

一陸路宜開通也查齊齊哈爾省城至愛琿計程八百五十里自愛琿附俄輪至漠河有江道千五百里水陸兼程共二千三百五十里若省城徑至漠河由墨爾根取道入山本有陸路可通因山深林密向為人迹所不到卑府親率員弁冒險直入探明捷徑漠河去墨爾根一千五百里墨爾根距省四百五十里共一千九百五十里復又另探一路由齊齊哈爾逕達漠河旱路僅止一千四五百里照向來水陸兼程可近八九百里是開通運道

為急務也惟僱募夫役經費較巨擬請撥兵
一二千人除底餉外量予犒賞開路寬以一
丈為率分哨定段限日興挑其監察一切及
設渡造橋因地制宜另議細目斯役約一年
可竣工竣即可安電線置卡房次第舉行且
道路既通即以此項兵丁分布要隘人烟漸
集邊庭日益強固亦足消強鄰覬覦之心即
不開礦亦是邊防要圖

一保護宜募勇也查開辦後招集流民動以千
計日夕相聚加以強鄰逼處在在堪虞存廠

之款既必不少挖出之金尤關重要漠河口
現有五百兵以之駐防尚慮不足勢難調遣
入廠必須另募一營即在金廠內自行籌給
口分由總辦為統領用西法西械勤加訓練
庶內可以資彈壓外可以與防兵聯為一氣
聲勢既壯礦務邊務兩有裨益

一司帳宜公舉也錢財出入為金廠之根本况
屬公司尤宜公辦主廠者不當兼理錢財致
涉嫌疑今擬將收支事務由股本最大者公
舉保薦平素誠實有望之人然後延訂將來

如有虧空舞弊等情一經查出惟原薦主理

直認賠

內即在股本扣還

凡經理銀錢非任勞任怨

者不能稱職倘有人商借挪移自當破除情

面一概回絕即如總辦司員等除每月初三

日給領薪水外亦不得透支分文以重公款

一股友宜助理也凡入股之友皆與廠中有維

繫之勢議定萬金之股或自駐廠或派人駐

廠以便監察金銀出入如廠中有合宜職司

自當量才派事開支薪水如不諳公務或無

職司可派僅能供給火食不送薪水祇可在

廠查察帳房侵虧浮冒等弊他處公事不得與聞即司帳之人於銀錢有出入不當處亦宜通知總辦核奪至於未滿百股之友亦有三四千金搭入者准其二三人湊足百股公派一人到廠監視以憑共信其餘零星股友均不得援以為例

一局用宜節省也所有各員司人等按其責任之輕重才能之大小酌定薪水之多寡既不失之於刻亦不失之於寬即因邊地苦寒非重祿不足以勸士然少用一人則費自省矣

至局中飯食油燭芯紅筆墨紙張雜用一切等項必須實用實銷不得浮開浪費致使公本虛糜如各員司因公他往無論遠近車馬等費由局動支至因一己私事出外由本人自備事事皆歸實濟凡收支各帳周年彙齊刊刻清冊分送各股友閱核以憑徵信並呈報北洋大臣黑龍江將軍查核

一盈虧宜預計也開辦一年後出金果旺獲利果多是公司與股友幸事如無盈餘亦未折耗在股者一時不准提本只准招人接替更

易姓名調換股票息摺萬一股本有虧折之處由總辦稟知北洋大臣黑龍江將軍並函商股分最大者定奪辦理不參私意當取公評以為行止

一餘利宜分派也金廠開辦後每日所得金沙由監工稽查同送至收金所經主廠者眼同兌收登冊蓋戳聚總鎔鍊成條運售津滬各處按月一小結周年一大結共得金沙合銀若干兩除將借款陸續提還並將官利及員司礦師薪水局費夫役護勇工食一切開支

外若有盈餘作為二十成均分內呈交黑龍
江將軍衙門六成報充軍餉商股十成本廠
員友司事花紅四成在廠之人自總辦及員
司夫役等皆得均沾酌賞計人計功不得使
有一人向隅

永定河仍擬堵築片

再欽奉光緒十三年九月十八日

寄諭李鴻章奏永定河南七工漫口現在若就原口堵築及就南隄外改道均屬工艱費鉅驟難辦理自係實在情形著熟思審處或仍歸故道或別立隄防務求一經久妥善之策奏明辦理等因欽此遵查南七工西小隄四號漫口前因工艱費鉅猝辦恐難穩固且封凍前已趕辦不及是以暫緩興工本非決而不塞欽奉前因迭經督飭前署永定河道金福曾現任永定河道方濬師連

月周歷查勘該河中洪既甚高仰如就南隄外之老南隄內改走老南洪雖水流暢順但老南隄內數十村庄無處移置且太溜直衝淀河將被淤塞若聽其漫入現行之信安窪勻散沙泥使清水下歸東淀本係天然形勢惟水所經過各村地難耕種民情不願以上兩策皆有窒礙此原摺已詳細聲明者或又擬挖開北七工大填改走北洪乃黃花店以下舊為毋豬泊沙家淀早已淤成平陸占為民業下口不通亦難議再四籌度惟有仍堵南七工西小隄口門該處

距北七工大堤甚近河身過窄防守不易今擬
廣挑引河並自南八上汎十五號起改向北面
斜趨折而東下避出下八汎險工冀得順下行
疾之益藉輕逼隄橫突之勢仍歸韓家墅故道
出口其南八下汎尾閘旱口亦即設法堵閉查
永定河身自乾隆嘉慶以後淤墊已久下口停
沙水流不暢今又歷百數十年前人譬之於牆
上築夾牆行水實乏經久妥善之策臣遵
旨熟思審處目前補偏救弊舍仍歸故道酌改引河
辦法無可他求刻值冰雪在地僅能約畧估計

俟明春凌汛後再就水勢河形逐細勘籌一面
相度機宜湊撥款項次第興作即責成金福曾
方濬師督同員弁妥實經辦惟口門寬至二百
丈河坎抽深至二丈引河長至七十餘里實屬
工大費鉅除酌調淮練各軍協挑引河外仍需
銀十數萬兩容臣督飭司局竭力挪措以應急
需至被水村庄業由臣與府尹臣分別籌款撫
恤所有永定河南七工漫口仍擬就原口堵築
酌改引河下歸韓家壑出口緣由合先附片覆
陳伏乞

聖鑒訓示謹

奏

四快船到華酌定餉章摺光緒十四年二月初八日

奏為新購英德兩廠四快船業經到華酌定人數

餉數照章赴海軍衙門支領恭摺仰祈

聖鑒事竊前在英德兩國船廠訂造快船四號英廠

兩號名曰致遠靖遠德廠兩號名曰經遠來遠

約定光緒十三年春夏間工成經臣奏明飭派

英員提督銜琅維理於十三年正月初先往英

德兩廠驗視並派管帶官參將鄧世昌等帶同

弁兵於二月杪由津出洋會同琅維理接收駕

駛來華因遠涉重洋數萬里沿途又須操練派

往官弁不敷每船須商僱精於管輪駕駛西員
八名幫同管駕以昭慎重隨摺聲明在案旋據
琅維理節次電報四快船已接收起程惟核計
十月間未能駛抵大沽海口其時北洋封凍當
飭在廈門海口操練過冬並派統領水師總兵
丁汝昌督帶所部各船前往廈門會同琅維理
逐一驗收將隨來西員除酌留外先行分別遣
回以免久候糜費所需四船薪餉酌照濟遠船
定章辦理其出洋員弁薪餉雜費即於定章之
日往支與遣撤回國西員薪水川資等項均歸

接船款內彙報等因嗣據丁汝昌稟稱抵廈後
十月杪四船亦到會同琅維理驗明各船與原
訂合同相符船身砲械機器均係新式較濟遠
堅固寬敞計四船共酌留洋員十三名餘皆遣
撤回國各船人數餉數酌照濟遠擬定每船官
弁水手升火匠役二百二員名各月支薪糧公
費京平銀三千六百三十九兩又每船歲給醫
藥費京平銀二百兩均自十三年十一月分起
支洋員十三名每月共支薪飯關平銀二千五
百二十兩自十三年十一月十八日即西曆一

千八百八十八年正月初一日起支臣復飭支
應局司道確核與濟遠船名餉章程雖間有酌
改而月支總數仍屬相符應即照擬辦理將來
有須斟酌損益之處再隨時咨報立案現留洋
員俟原訂六個月並一年期滿照議給予頭等
船費遣撤回國如尚須留用屆時察看核辦該
四船應需煤舳油修並添購料件製辦旂幟號
衣及冬季棉號衣褲等項雜支用款每年約需
銀十餘萬兩難以預計確數應援照定鎮濟三
艦減案摺節動支實用實銷至該四船餉項業

經海軍衙門奏明籌發前已領過銀五萬兩本年應續領各船薪餉並洋員薪水煤舫雜支等項若干即當核明給咨委員赴海軍衙門請領以資撥放而濟要需其訂造價銀及出洋接船經費另飭分起開報請銷所有該四船到華後酌定人數餉數並洋員名餉訂定年限除開清單分咨海軍衙門總理各國事務衙門戶兵工部外理合恭摺具陳伏乞

皇太后

皇上聖鑒勅下各衙門查照再臣已於二月初七日

抵津俟丁汝昌等駛船至大沽海口再親往察
驗另行奏報並將船身寬長吃水深淺丈尺馬
力若干分咨合併聲明謹

奏

鑄錢機器工費片

再欽奉光緒十三年正月二十七日

懿旨規復制錢必須廣籌鼓鑄著李鴻章先行購置機器一分就天津機器局趕緊鼓鑄運京備用等因欽此遵飭天津機器局前福建藩司沈保靖等擇要定購英國格林活鐵廠鑄錢機器一分凡可就局中廠屋器具歸併勻用者概不購買俾從節省議明英金五千三百八十三磅合中國銀二萬二千餘兩水腳保險在外先由該局暫行挪款墊付半價俟機器運到連後半價核明若

千一併奏請撥給經臣於上年四月十二日覆
奏並以機器由外洋造成運到需時應先用土
法鼓鑄解京濟急等因奉

硃批著照所請戶部知道欽此轉行遵辦在案茲據
沈保靖等呈稱此項鑄錢機器現已到津點收
又續經添購錢模連外洋至上海水腳保險費
共合英金六千二百二十二磅十喜林八本土
加以上海棧租上下抬力起重費並運津水腳
共折合庫平銀二萬七千八百七十二兩九錢
二分四釐五毫請奏撥款項分別歸墊等情前

來臣查直隸庫儲極絀無款可籌前用土法鼓鑄解京制錢工本已奉

旨准於長蘆鹽課應解京餉內截用此次購辦鑄錢機器應需價腳等項事同一律將來開鑄制錢恪遵

懿旨專備運京應用此外尚有建造廠屋鍋爐及安置機器工程擬懇

天恩俯准先撥給銀三萬仍在長蘆鹽課應解本年京餉內就近截留以濟要需俟廠屋各工完竣核明實用確數不敷若干另行奏撥除將機器

價脚細數咨明戶部外理合附片具陳伏乞

聖鑒訓示謹

奏

九江陸綫擬接南雄摺光緒十四年四月初十日

奏為廣東官辦陸路電綫現已造至南雄州擬將商局陸綫由九江造至庾嶺與之相接以期官報靈通恭摺仰祈

聖鑒事竊據總辦各省電報山東登萊青道盛宣懷稟稱奉兩廣督臣張之洞札知現由省城展造陸綫經韶州至南雄州以捷官報該道以商電局前於光緒九年由上海接設陸綫經浙江福建而達廣州並至香港惟浙省之蘭溪衢州閩省之浦城建甯等處每逢春夏山水漲發輒衝

壞電桿數十百根修理既需時日南北電報往
往阻誤仍由洋商海綫傳遞遇有緩急究多隔
閩曾擬在內地添設一路今粵省官綫既造至
南雄州若商局由九江陸綫造至庾嶺相接歷
江西之南昌吉安贛州不過一千七八百里衆
商尚可勉辦其常年養綫之費所收報資或可
相抵如此則一綫偶斷仍有一綫可通既免水
發阻誤之患而洋商海綫之利亦可漸為華局
收回以期經久不敝官報商情兩益詳請奏辦
前來臣查光緒九年英法美德各使請在上海

設立萬國電報公司擬由洋商添造自滬至香港沿海各口水綫經臣飭盛宣懷等勸集華商接辦由滬至粵沿海各口陸綫以杜外人覬覦之漸而保中國自主之權惟經由閩浙地面春夏水發不免阻誤仍須由洋商海綫傳遞今粵省官辦陸綫已造至南雄州盛宣懷擬將商局陸綫由九江造至庾嶺與南雄之綫相接實屬變通得法且事歸商辦公家不須經營締造之費而官報得以靈通洵於軍國有裨除飭籌集商本分別勘路購料妥辦外相應請

卷之二十九
旨勅下江西撫臣轉行經過地方官妥為照料保護
勿使稍有阻撓損壞俾昭慎重除咨總理衙門
查照外理合恭摺具陳伏乞

皇太后

皇上聖鑒訓示施行謹

奏

籌撥朝鮮電報

再據辦理朝鮮交涉通商事宜升用道補用知府袁世凱稟稱朝鮮陸路電綫前由中國籌議借款建設自奉天鳳凰邊門經該國義州平壤漢城而達仁川沿途設立四局歸中國電局代管以期中韓氣脈靈通遇事便於調撥惟該國商務初興中西商報無幾每月所收報費祇數零星雜用所有四局委員司事華洋工匠通事測量值報繙譯各生巡綫弁兵送報夫役新工暨油燭紙張房租等項每月除朝鮮貼銀四百

餘兩實計尚短銀七百餘兩蓋因朝鮮各物皆
貴銀價極賤雖竭力節省仍較中國電局費用
為多此外歲修及隨時添置物件並需用川資
尚不在內前於設綫餘款項下暫行挪借現在
餘款告罄該國本甚貧弱月貼四百餘金已於
本年二月後停止請另行籌發經費等情經臣
札飭總辦電綫東海關道盛宣懷會同天津支
應局司道妥細核議茲據復稱袁世凱所稟皆
係實情日本前設海綫至朝鮮釜山口今於漢
城另設陸綫一局西報悉歸釜綫不由仁川陸

綫遞寄僅收華商報費為數益微朝鮮月貼之
款又已停止養綫經費無出袁世凱駐紮朝鮮
因公寄華電報照章計價每年約合洋銀一萬
餘元今請自光緒十四年三月起每年撥給銀
七百兩照出使各國往來報資之例按月由上
海電局赴江海出使經費項下具領轉發督飭
樽節支用按年造報然此係除朝鮮貼款就下
短之數酌撥若朝鮮貼款從此竟停則仍短缺
應由袁世凱設法催收以資貼補等情前來臣
查朝鮮陸路電綫前於光緒十一年遵

旨籌議借款建設原因該國為遼瀋屏藩毗連俄日
邊境內患外侮在在堪虞中國控制保護必有
電綫以通消息否則機務阻滯事事盡落人後
是以借給款項飭電局代為管理其常年所需
局用巡費等項本擬由朝鮮籌貼但該國力不
能逮前僅月貼四百餘金今且停止西報又悉
歸金山口日本海綫所收華商報費益微仁川
漢城平壤義州四局養綫經費無出臣仰體
朝廷字小之義勢難漠置不問况借款設綫既已曲
成於前尤不得不維持於後袁世凱駐韓經理

交涉通商事宜關係重要與出使外洋事同一律其因公電報亦與出使大臣電報應行給費者無殊既據盛宣懷等酌議自本年三月起每月於滬關出使經費項下撥給銀七百兩再設法催收朝鮮貼款以為此綫常年用項所費尚屬無多而遇事赴機迅速實於中韓大局有裨除分咨總理衙門南洋大臣並飭江海關查照外理合附片具陳伏乞

聖鑒訓示謹

奏

--	--	--	--	--	--	--	--	--	--

1.1.1

1.1.1

請停機器鑄錢摺 光緒十四年八月初二日

奏為新購西洋機器試造制錢核計工本虧折過鉅無從籌補擬請停造恭摺仰祈

聖鑒事竊臣於光緒十三年正月欽奉

懿旨規復制錢著先購機器一分就天津機器局趕緊鼓鑄備用等因欽此遵飭機器局員前福建藩司沈保靖等定購英國格林活鐵廠造錢機器於本年開河後運到天津業將籌辦情形及價腳等項於上年四月本年三月兩次奏報並聲明西洋機器造法與中國模鑄不同其自鎔銅

卷片以至成胚鑿孔印字光胚挨次相連非多
建廠座不敷分設事體極為繁重工本恐多虧
折應俟開鑄後核明實需銅鉛各項工本若干
再行專案奏辦等因均蒙

聖鑒在案臣督飭沈保靖等於機器運到後即置設
局內按照尺寸修築廠房添配石座並造鍋爐
輪軸車牀各項除零星工程及烤銅爐捲銅滾
軸須隨時添修外其餘均已就緒當於秋初開
輪試造查閱造成制錢字畫輪廓均尚清楚惟
機器時有損壞極費工力緣西洋造錢係屬平

面中無方孔壓成較易今以西洋機器造中國錢式須另添打眼挺桿由錢模正中穿透始能撞出錢孔地位殊窄撞力過大挺桿上下與錢模互相磨觸最易傷損每日每座機器模撞修換數次及十餘次不等人工既費成數亦少又土鑄係用生銅鎔灌工料簡易僅用銅五成四鉛四成六機器則須銅七成方受壓力鉛只三成且必先化成六分厚銅板再用捲銅斤機器烤捲十數次使其質性純熟減至不及半分厚之銅片始能壓造成錢其銅片成錢者只六成

下餘四成廢邊又須加費鎔捲再造僅捲銅片
一項工料每造錢千文應合銀四錢一分零加
以他項工料為費甚夥原訂此分機器日長時
每日成錢二百四十串今因機器時須修理約
計每日成錢二百串且與沈保靖等逐款搏節
料算雖銅鉛市價現在增昂日後冀可稍減而
捲銅等項工料實難過省每年成錢七萬二千
串共需工料銀十萬七千四百餘兩按制錢一
千五百文合銀一兩每造制錢一千約需工本
制錢二千二百三十七文七釐虧折未免過鉅

直隸貧瘠素著並無閒款可籌非比廣東另有
捐項彌補即須全數作正開支計每年機器造
成之錢直銀不足五萬兩而工本則需十萬七
千餘兩賠貼銀至五六萬兩之多值此庫儲極
絀必應通盤籌算可省則省現用土法鼓鑄計
每鑄制錢一千文不過賠貼三百文左右較機
器省至數倍其錢樣亦頗光潔似不如專就土
法以節糜費夫西洋機器專以製造金銀錢內
可夾用銅鉛資料既省工力易速價值較昂故
甚合算中國以改鑄制錢每錢一文所值幾何

而為費太鉅應懇

恩暫行停辦前項已購機器仍可留局設法改作別
用除將機器造成錢樣及土鑄錢樣咨送戶部
查核外理合開具機器試造各項工本細數清
單恭呈

御覽所有現購機器擬請停造制錢緣由是否有當
伏乞

皇太后

皇上聖鑒訓示遵行謹

奏

開濬澳工製造船隻片

再北洋創練水師購置鐵甲鋼甲快船身大力
重喫水較深不能駛進河口因擇定旅順口內
西澳山圍沙亘形勢天然堪為師船停泊之處
惟口狹底淤非大加開濬不能展輪下旋前已
購造挖海接泥各船勤加疏治其挖出淤泥必
須小輪船拖帶出海遠卸方免口內阻塞原僅
利順小輪船一隻不敷往返拖駛接泥船亦復
短少軍用繁要不得不及時添備當飭大沽船
塢製造暗輪鋼拖船一隻名曰遇順身長一百

二十尺寬二十尺喫水八尺五寸船身用鋼板
艙面用油木板造成氣缸三具康邦汽機全副
馬力三百五十匹每點鐘行十二海里極為堅
緻靈捷且艙面平厚有事時即可撥兵設炮為
安置水雷之用實於工程防務兩有裨益計連
舢板二隻桅索裝修及一切應用器具物料俱
全並隨帶小火輪舢板一隻除工價由船隲月
支經費內開支外實用料價庫平銀三萬四千
一百六兩有奇又另造大小鐵駁接泥船六隻
亦均一律堅固用料價庫平銀三萬九千四百

二十七兩有奇均在北洋經費項下設法湊撥
應俟彙案報銷至該輪船常年用款除煤炭油
修一切活支之項難以預定外計配設管駕人
等二十六員名月支薪糧銀四百十四兩並以
該船輪機均係新式暫僱洋管輪馬庚一名指
授理法議明當差三箇月期滿即行辭退未經
訂立合同月給薪水銀一百八十兩均自光緒
十二年十月分起在北洋經費項下開支除洋
員現已遣撤並將管駕人數餉數開單分咨海
軍衙門戶兵工部外所有開濬旅順澳工製造

遇順鋼拖輪並鐵駁等船緣由理合附片具陳

伏乞

聖鑒勅下各衙門查照謹

奏

潘鼎新請祀昭忠祠摺光緒十四年九月十三日

奏為已故大員勳勞卓著被議之後立著戰功懇
恩開復原官入祀淮軍昭忠祠恭摺仰祈

聖鑒事竊查開復銜翎前廣西巡撫潘鼎新於光緒
十四年五月十三日因瘴疾猝發牽動傷痕在
籍身故查潘鼎新由舉人議敘知縣於同治元
年募立鼎軍隨臣率師赴滬克復蘇之川沙奉
賢金山南匯浙之嘉興烏程平湖湖州各城同
治四年捻逆北竄突逼

畿輔臣檄調潘鼎新首率所部航海赴津轉戰無

前屢獲大捷東捻既平西捻驟至其時淮軍諸將大半假歸復令潘鼎新星夜督隊北援張總愚股匪方圍保定省城圖犯易州遂能抄出賊前保護

陵寢戡定二捻肅清三省論功最多而赴援之速尤冠諸將迭蒙

特恩賞穿黃馬褂頭品頂戴雲騎尉世職仰承

知遇薦擢封圻歷任雲南巡撫署湖南巡撫調任廣西巡撫光緒十一年二月以諒山失守罷歸當法越事亟滇廣辦防而桂邊獨當兵衝尤為重

要法嘗宣言必奪諒山驅華人出越境事乃可
了其蓄意已非一日該故撫受任於兵事糜爛
之後倉卒出關收集傷亡激勵將士始有觀音
橋之捷士氣漸振迭獲勝仗擒斬要酋支持年
餘迨十年十二月間諒山之役法人盡銳以全
力來攻該故撫督淮桂兩軍奮死搏戰援軍近
接飛催不前獨以孤軍撐拄強敵身受重創力
竭退師失事之先該故撫電奏有掣肘萬分惟
有死報之語張之洞電奏亦有可謂力戰特敵
太猛之語蓋所處之地實屬萬難衆論同聲非

由飾說諒山失陷之時

朝廷鑒其危苦有戴罪圖功之

溫諭有各軍悉歸調遣之

嚴旨該故撫乃能仰奉

天威部勒衆將規取故地誓死為期遂於二月初間

迭有鎮南關連日之大捷該故撫親自督師出

關追勦再戰再勝又於二月十三日克復諒山

乘勝進紮觀音橋攻取谷松方擬進攻船頭各

處旋於途次接奉革職之

命既解兵柄然後折回先是法來議盟索地責償諸

多要挾經此屢敗該國以為用兵越南以來未
有如此疊次大衄者敵氣中挫款議乃成關係
大局誠非淺鮮同時諸將論功皆受上賞而該
故撫以統兵大員身親前敵已失之地一時盡
復功罪實足相抵獨以業經罷職未荷

恩施當時既不能自言事後亦莫為追論齋志沒地
深堪憫傷臣惟潘鼎新於淮部諸將資勞最深
屢為軍鋒再平巨寇雖諒山失律咎無可辭終
能轉敗為勝大振

國威進取方銳受代遽還較論前功未可盡沒該

故撫業經海軍衙門奏奉

懿旨開復原銜翎枝合無仰懇

天恩俯念該故撫於被議之後立著戰功

准予開復原官入祀淮軍昭忠祠以昭忠蓋出自

逾格恩施所有已故大員勲勞卓著懇

恩開復祀緣由理合恭摺具

奏伏乞

皇太后

皇上聖鑒訓示謹

奏

新購雷艇酌定餉章摺

奏為新購英廠魚雷大快艇到華籌付價值並酌定人數餉數由北洋經費開支恭摺仰祈

聖鑒事竊查北洋創設海軍必須購製出海魚雷大快艇與鐵甲快船相輔而行方於戰守有益光

緒十二年四月經臣派員與英商百濟公司訂造新式頭等出海魚雷快艇一隻計長一百二十五英尺寬十三英尺吃水六英尺六寸馬力一千匹每點鐘行二十六英里議明艇價英金六千鎊訂立合同咨會出使英國大臣劉瑞芬

俟該艇造成飭派委員按照合同認真驗試並將艇上砲位雷燈雷筒魚雷及各項要件另行購配旋准劉瑞芬向各廠分別購備齊全計價英金一萬一千四百餘鎊節經買鎊匯付此項雷艇造成在十二年冬間因洋面多風行駛不便緩至十三年春間適英德兩國訂購四快船告成飭派洋員提督銜琅維理參將鄧世昌管帶弁兵出洋接收將艇拖帶來華琅維理因重洋遠涉須僱用洋弁水手幫同管駕拖駛兼施方期穩慎准劉瑞芬函商照辦並冊報驗艇看

守保險電報各費開駛來華添購各件及辛工等項計英金二千五百餘鎊關平銀一千三百餘兩統計連各項英金共合庫平銀八萬五千九百餘兩因北洋防費係海軍衙門指撥本無多餘且各省解未足數甚形竭蹶無從籌付又不便專案另請惟查有購買四快船價銀二百四十八萬兩前因須陸續提用先行發存英商滙豐銀行生息計收庫平息銀七萬八千八百餘兩原備增添船價之用今船價已敷自應將此艇價值等項即就息款盡數撥付以分外所

得之息銀添海軍必需之利器實屬以公濟公
一舉兩得計尚不敷銀七千餘兩在於北洋防
費內急湊應用上年准劉瑞芬咨稱細驗船身
及輪機鍋爐均無瑕疵試行里數較原議有盈
無絀甚為靈捷十月底該艇隨同四快船駛抵
廈門當派水師統領天津鎮總兵丁汝昌赴廈
一併驗收並飭旅順魚雷營道員劉含芳將該
艇應用弁兵由旅點交丁汝昌帶往照配即將
洋弁等酌遣回國以節糜費此艇已於開凍後
駛抵旅順歸隊操練臣前月出海復將該雷艇

調往大連灣海面親驗駛行速率較原有各雷艇加倍迅捷查北洋前購大魚雷艇五隻每隻酌設管駕舵工人等三十二員名月支新餉油燭銀四百九十七兩此次新購頭等魚雷快艇船身較長機件繁重應需員名薪餉應稍增益擬將管駕大副薪水略加並添用二副以資照料共計管駕大二副舵工雷兵人等三十三員名月支新餉京平銀五百五十一兩並油燈一項五大艇每月各支銀六兩此艇身長艙多應月支銀十兩計全艇月共支京平銀五百六十

一兩尚屬搏節自光緒十三年十一月初一日起按大小建照數開支並酌留洋管輪一員用作教習月支薪飯關平銀二百十二兩自十三年十一月十八日即西歷一千八百八十八年正月初一日起按西歷月分支給訂明當差六個月將來期滿回國給予船費如續行留用屆時察看辦理所有應支薪餉等銀均在北洋防費項下撥給除將此項雷艇價銀並開駛來華一切用款另行造冊報銷並將酌定人數餉數開單分咨海軍衙門戶部兵部外理合恭摺具

陳伏乞

皇太后

皇上聖鑒飭下各衙門查照謹

奏

挖泥機器經費片

再直屬河道泥沙過多頻患淤淺盛漲容納不下
汜濫為災必須隨時擇要疏濬惟水中撈挖
人力難施非西國新式挖泥船不克奏效津河
於十數年前曾購置第一第二兩號但尚非新
式出土難於遠送祇能傍隄挖淤其第一號因
調赴旅順已在大沽口外遭風沈失適有英商
三摩答船廠寄到新樣挖泥船圖說並卸泥梯
一架可送土至岸上十二丈以外甚為適用當
於上年四月飭天津道胡燏棻妥籌商訂通准

總理衙門咨詢醇親王會議黃河事宜案內聲稱德國來因河用機器船有效可仿而行之等因業將擬購此船大略函告總理衙門在案即據胡燏棻與英商議明定造新樣挖泥船一隻船身長十丈有零連隨船各種器具計價英金六千四百鎊又機器床一具英金一百五十鎊又運華水腳保險費英金八百三十四鎊又僱洋匠頭二名自到華辦事之日起每名月薪三十鎊來華川資各八十鎊途中兩個月半薪各三十鎊其回國川資並途中半薪與來華同於

上年閏四月初十日訂立合同限五個月造成
運至大沽海口交卸一面咨明出使英國大臣
劉瑞芬派員赴廠驗視並將船價分次匯交劉
瑞芬轉付嗣該船廠經理人德拉於十一月初
七日將挖泥船機器料物等件分批運送到沽
並代僱機器匠頭克拉格船匠頭瑤利士先於
十月初九日到沽當派通判宋春陶前往管帶
按照合同驗收相符工料均稱堅實就大沽船
塢督飭洋匠妥為裝配令華匠隨同學習本年
二月初一日合攏工竣下水試挖機器靈便命

名導河三月初九日拖入內河歸華匠自行駕駛即將洋匠辭退統計船價六千四百鎊合行平銀二萬八千三百五十一兩九錢七分機器床與運華水腳保險費英金九百八十四鎊合行平銀四千四百五十九兩九錢五分在大沽船塢另配料件行平銀一千七百二十一兩七錢六分四釐洋匠頭二名在華五個月薪水及來華並回國川資暨途中兩個月半薪英金七百四十鎊合行平銀三千一百三十三兩九錢三分催引水公司拖入大沽船塢並小火輪拖

入內河行平銀四百兩除該船到華逾限兩月
應罰扣英金五十鎊合行平銀二百二十六兩
四錢一分外共計船價等項撥付行平銀三萬
七千八百四十一兩二錢四釐查所購新式挖
泥船為疏濬河道要需本應動用正款惟值各
庫支絀已勸令南紳集捐應用仍彙入工撫案
內開單奏報免造細冊至該船常川濬河應需
烟煤油燭鐵木等件委員役匠薪工每月約銀
五六百兩又須配置齒輪汽機接泥等船及隨
時修理之費應均歸支應局釐金項下核發列

入該局用款造銷以資經久據胡燏棻等具詳
前來除批飭照辦外所有新購西洋新式挖泥
船疏濬河道由南捐撥付船價及此後常年經
費配置各件歸支應局支發緣由理合附片具

陳伏乞

聖鑒勅部立案謹

奏

查覆海防報銷摺 光緒十四年五月十八日

奏為光緒七八兩年北洋海防經費案內戶兵部
刪查各款現經逐一查覆仍請照銷恭摺仰祈
聖鑒事竊准戶兵部核覆光緒七八兩年北洋海防
經費報銷一案內有刪查各款當飭支應局司
道查覆核辦茲據該司道詳稱登榮水師添派
教練官二員水長一名前奉部查業將定購鐵
艦應先期教練緣由登覆茲戶部復以鐵艦尚
未到華不必先期二三年添派查鐵艦為向來
中國所未有其應行練習技藝甚屬繁難必須

先行添派教練庶船到即可補用以免重資外
招至該艦本早工竣屢備回華嗣因光緒九十
兩年法越事起中阻遂至十一年九月始行到
津此非初派時所能預料須待二三年者嗣於
船到後即將該弁兵全數挑補任支原有薪糧
實無絲毫冗費所有冊造銀四百六十四兩三
錢三分三釐三毫二絲二忽六微仍請照數准
銷又水雷營管帶幫帶柴草銀兩前奉部駁業
將僻處海濱採購為難情形登覆茲戶部復恐
沿海辦防省分援照應請自光緒十四年正月

起住支其已支之款除俟按年造報外所有七八兩年分冊造銀八兩二錢九分四釐四毫仍請照數准銷又水師管輪兩學堂用費前奉部查業經逐一登覆茲戶部復令或酌刪人數或酌減支數不得過一千六百兩之譜查該兩學堂用費前經詳咨月需銀一千六百餘兩係因管輪學堂於光緒八年四月續行開辦其公費先按每月一百五十兩酌給飭俟試辦一年有餘不足再行核定是以立案文內聲明事屬創辦一切章程未能遽作定數嗣一年期滿所用

公費照原給之數每月實不敷銀五六十兩自應照水師學堂一律按每月銀二百兩補給免使賠累雖酌增銀數十兩而款條實用且經聲明在先現逐一覆核實皆事浮於人精稱其事無可刪減該兩學堂為水師人才所自出即為海防根本所由係教養之方亟宜講求前於九年四月嚴校各學生所習各藝頗有進益因酌仿船政成案將考取各生量給贍銀使無室家之累得以專心肄業復隨時校試按等酌加藉資鼓勵又因增課魚雷添僱機匠月需費用均

不能不較前有增前奉海軍衙門暨戶部查取北洋海防經費月支各款已將該兩學堂隨時加支數目彙造清冊送核除歸入各該年起支造報外所有七八兩年分冊造月支銀一千七百二十六兩仍請照數准銷又水師總查洋員琅維理月支銀六百兩兵部以無成例可循應令奏明核辦查該洋員本係英國水師副將該國派在香港等處管帶兵船頗有本領北洋創辦水師仿照西國章程認真操練須延英員幫同整理因令該洋員自向海部告假應募來津

月給薪費銀六百兩曾經抄錄合同咨報總理
衙門九月正月因辦事出力酌加公費銀十兩
十年九月請假回國十一年九月鐵艦到津事
務尤繁復募該員來津講求操練時該員已升
英國水師總兵議給每月薪費銀七百兩於次
年三月到津派赴各船教練蒙醇親王臨閱嘉
獎奏奉

懿旨賞給二等第三寶星並

加恩賞給提督銜欽遵在案該員深知感奮於上年帶
同員弁水手出洋接帶英德兩廠訂購四新快

船妥速回華沿途照料訓練勤勞卓著其續募
合同業經彙案抄錄送部所有七八兩年分冊
報銀二千四百兩應請照數准銷又水師軍樂
樂童一款兵部以營制所關應令奏明核辦查
西洋各國水師皆有軍樂以壯聲威光緒八年
先後募到樂童三十五名各月給口糧銀三兩
六錢又購買樂譜及油燭等費銀一百兩業於
十三年十月擇定二十人派上鐵艦設立領隊
一名月給銀十二兩幫領隊一名月給銀十兩
一等樂軍六名各月給銀八兩二等十二名各

月給銀六兩餘均裁撤俟歸入十三年分別造報所有七八兩年分冊造銀九百六十二兩二錢六分六釐七毫應請照數准銷又在船病故之鎮西砲船伙夫陳坦卹賞銀十五兩兵部行令將章程抄送核辦查北洋水師輪船員弁水手在船病故應給賞卹銀兩前飭據水師統領丁汝昌等酌議稟定水手人等每名卹賞銀十五兩員弁等每員給與一個月薪糧作為卹銀間有因其生前較為得力或在洋因風漂沒及陣亡傷亡者給與兩個月三個月薪糧以示優

卹北洋定章如此十三年七月奉兵部奏定水師卹賞章程應自奉文之日起遵照新章辦理其未奉部章以先仍當按年照實發之數造報隨案聲敘明晰所有七八兩年分冊造銀十五兩應請照數准銷又水師學生林履中派充威遠船教練大副月支銀五十兩兵部以威遠船自有大副不必添派查該學生本係閩廠伏波輪船大副調津後因威遠船須添練水勇五十名操習鎗砲帆桅各技事務甚煩即派該學生先期隨同招募充當教練大副與威遠船原設

之大副專理船事者各有責成所有冊造銀四百五十九兩九錢九分九釐八毫應請照數准銷又克鹿卜砲位塞門德土運腳保險一款兵部以按照廠價已逾一五成之數與籌購西洋軍火運腳章程不符查一五成之數係查照歷次購買軍火一項成案約略估計至他項貨物有精巧之件廠價貴而運腳賤者有笨重之件廠價賤而運腳貴者蓋視所占艙位之多寡為衡且洋商係將驗保運腳等款及同時所購之物視其重輕大小將運腳併同牽算並不分晰

估報所有前項運保等費內查門錄上五千六百五種版價甚賤而貨極笨重所占船位實多運脚必須加增是以既洋商與同時購辦之噸位等件運保各費一併核計由出使德國大臣議明咨飭應付據實造銷實未便概以軍火運脚一五成之數作準除九年及十一年續支各款歸入各該年造報外所有七八兩年分冊造銀八千八百二十九兩二錢五分九釐九毫八絲七忽八微應請照數准銷又江海關墊給洋行轉運外洋軍火噸位運脚保險一款兵部以

僅有補數並無廠價應補造冊送核查向章
運保等費須由外洋運華物件始將廠價造列
至內地江海各口轉運水脚洋商輪船向係隨
時議給與招商局之附運官物立有定章者又
各不同前項軍火礮械係已由外洋運滬交收
寄棧復由上海洋行分批裝搭外國輪船自滬
運津議給水脚乘於銷冊內聲敘明斷與外洋
運華物件不同並不按廠價核計應免補報所
有冊造帳九千一百八十九兩七錢四分二釐
四毫一絲請仍照數准銷又軍械所海船雇價

一款兵部以未據聲明照何例案開支查軍械所起卸駁運砲位軍火機器等項如山海關旅順口等處時有待用要件非遇便輪即須專僱海船運往按照民價議給本無例案可循所有冊報銀八百七十六兩八錢五分三釐二毫九絲應請照數准銷等情具詳前來臣查戶部核覆光緒元年至六年洋員支款案內聲稱本部核銷各項總以例章奏案為憑惟北洋所覆各節係實在情形以前用過各款應由該大臣自行奏明辦理等因當將六年以前海防報銷經

部駁查各款逐一登覆奏請准銷奉

旨著照所請戶部知道欽遵在案今七八兩年報銷
事同一律且均係力求樽節實用實報無例可
循應仍懇

天恩勅下戶兵兩部照數准銷以清案款理合恭摺
覆陳伏乞

皇太后

皇上聖鑒訓示謹

奏

中法接線摺光緒十四年十一月十二日

奏為滇粵邊界中國電線與越南北圻法線相接
藉收越南暹緬印度等處商報之利現已議定
章程恭摺仰祈

聖鑒事竊於光緒十二年十月准總理各國事務衙
門咨開據法國駐京公使照會以廣西邊界中
國電線距越南東京法國電線甚近若彼此接
連受益不淺咨查有無窒碍等因飭據總辦電
報事宜東海關道盛宣懷稟稱法國陸路電線
自鎮南關邊外起以達越國東京至西貢並通

越南各內地又由西貢接通英線至暹羅之都
城彭高地方且繞出緬甸至印度等處中國陸
線如與接連則價目較海線便宜以上各處電
報皆可由此線轉遞獲利誠於中國有益中國
電線既與英丹海線接連法線事同一律祇須
章程嚴密中國界內不准該國陸線侵越尺寸
地步亦不准該國設立電局無事時不妨接線
以收利益有事時仍可斷線以示隔絕自無窒
碍等情業經咨商總理衙門核准照覆法國公
使允其接連在案臣即分咨粵省督撫臣查照

一面飭盛宣懷會商粵電局妥辦旋據盛宣懷稟稱奏兩廣督臣張之洞批示亦以祇須中國界內不准該國陸線侵越為關鍵今年七月法國駐津領事林椿奉其本國之命前至烟台會同該道擬就廣西之鎮南關電線與越南北圻之同登地方法線相接事宜十一條並另加專條大致以設局造線彼此各至分界處所為止不准侵越邊界尺寸地步其餘條傳報章程及報費數目推第二條內該國擬請廣東邊界之東興電線與北圻之芒街即蒙開法線相接又

雲南邊界之蒙自電線與北圻之保勝即老開法線相接雖均為初議所未及但東興蒙自兩處邊線並無商報其費皆出自公家若准連接亦可藉收商報於養線經費不無裨助且與鎮南關情事相同經臣照錄所擬章程咨准總理衙門覆稱添接東興蒙自兩線核與接線原議事屬一律詳閱各條尚無窒碍難行應如所議辦理並擬入萬國電報公會及第十條法郎兌價隨時增減之說稍欠分曉應更正等因復飭據盛宣懷稟稱萬國電報公會願入即入與此

約無干不必添列至第十條法郎增減遵已更正並將前次繙譯字義稍有未符之處妥細核對準確連專條統訂為十二條林椿以時屆封河即須回津請即在烟台畫押並請奏明遵行該道遂電請臣與總理衙門覆准即於十月二十八日將所訂章程與林椿畫押蓋印訂明鎮南關一線俟中國奏明奉准即行連接東興蒙自兩線俟奉准後十八個月內再接計繕漢文法文章程各四分法國應執兩分中國電報總局存留一分其餘一分稟送前來臣查外洋各

國電線彼此相接以通平日商報而資養線經費各國均無禁止接線之例即如法德鄰邦世仇日相窺伺而電報仍往來如織蓋有事時明斷其線暗阻通信我可自主並無窒碍中國電線久與英丹兩線相接藉通中外消息甚於大局有裨今與法線接連藉收商報之利有事時斷線阻信仍可操縱由我除飭盛宣懷隨時會商滇粵電局妥慎辦理並將送到印押漢洋文章程一分咨送總理衙門備案暨分咨滇粵督撫臣查照飭遵外理合照錄章程恭摺具陳伏

乞

皇太后

皇上聖鑒訓示謹

奏

謹將東海關道盛宣懷與法國駐津領事林椿
議定滇粵邊界中國電線與越南北圻法線相
接章程十二條照繕清單恭呈

御覽

第一款

中國法國在中國與北圻邊界相接電線以通
條款內所註明之所有一切電報

第二款

中法電線訂明在三處相接

一法國在北圻之同登地方電局與中國廣西

省之鎮南關電局互相接線

二法國在北圻之芒街即蒙開地方電局與中國廣東省之東興電局互相接線

三法國在北圻之保勝即老開地方電局與中國雲南省之蒙自電局互相接線

此條款俟奏明中國

國家批准之後鎮南關與同登兩局迅速接線至於東興與蒙開並蒙自與老開兩處訂明條款批准後十八個月之內接線

第三款

中法兩電報總局所應辦之邊界相連接線及保護修理電線並設局管理電線以上各項兩國彼此在本界限內各自出資辦理均不侵越邊界尺寸地步兩電局互相接線之後即用此線傳遞電報

第四款

所有電報由中法相接之旱線收發傳遞者均照萬國公例所定歐洲以外電報章程辦理至於中國與北圻越南西貢真臘來往電報算字一節照萬國公例所定歐洲以內電報章程辦

理

第五款

所有電報經過中法兩電局旱線者以兩國界限為止各自定價收資惟兩局約明照此條款之第六款註明價目取資條款年限以內不得再有增加如須減價各隨其便

第六款

照第二款議定接線之後傳遞電報價目每字取費若干列明於左

一中國電報局於中國全境各局與他國來往

電報每字取資價目越南北圻西圻真臘暹羅
等處電報由中國與北圻邊界相接之線傳遞
與中國之廣東廣西雲南各局來往者每字七
十五生丁所有各局在長江以及長江以南來
往者每字一法郎二十五生丁除朝鮮外所有
各局在長江以及長江以北來往者每字二法
郎二十五生丁朝鮮各局來往者每字二法郎
五十生丁

二所有中國全境各局與歐洲並歐洲過去各
國來往由中國北圻邊界相接之線傳遞者每

字五法郎五十生丁

三所有他國電報由中國北圻邊界相接之線
與中國廣東廣西雲南各局來往者每字一法
郎所有各局在長江以及長江以南來往者每
字一法郎五十生丁除朝鮮外所有各局在長
江以及長江以北來往者每字二法郎二十五
生丁朝鮮各局來往者每字二法郎五十生丁
四所有電報歐洲並歐洲過去諸國由中國北
圻邊界相接之線傳遞經過中國全線及中國
各處邊界轉遞來往者每字五法郎五十生丁

五所有電報由中國北圻邊界相接之線傳遞
與香港來往者每字七十五生丁廈門福州上
海來往者每字一法郎二十五生丁中國各處
邊陲轉遞來往者每字二法郎五十生丁

法國電報價目

一所有電報由中國邊界旱線傳遞與北圻來
往者每字十五生丁與越南來往者每字三十
生丁與西貢真臘來往者每字四十五生丁

二所有電報由中國邊界經過法線與他國來
往者每字五十生丁與海防上岸之水線來往

者每字二十生丁與越南京城順化上岸之水
線來往者每字三十生丁與西貢上岸之水線
來往者每字五十生丁

第七款

上款註明之中法兩電局所有各電報分局地
名另行抄錄一紙粘於條款之後

第八款

寄報之人如不註明由何路傳遞中法兩電局
議定如中法相接之旱線價目較別路便宜此
等不註明何路傳遞之報全歸中法相接旱線

寄發如中法相接之旱線價目與別路一樣此等不註明何路傳遞之報最少一半須歸中法旱線寄發

第九款

中法兩電局邊界接線之兩分局每日須將來往之電報字數對清所有賬目須於每月月底結算清楚賬目數尾應歸法電局者即交付西貢之法蘭西電報總局應歸華電局者即交付上海之中國電報總局須不得過每月結賬後十日之外一律付清所有算賬付賬電報均作二

等公報月分日期均照西曆

第十款

算付賬目全用洋銀每法郎作洋銀二角六分

第十一款

此條款畫押即行奏請中國

國家批准之後便可照辦並約明畫押之後以十五年為期限期滿之後不論何時或中或法如欲將此條款停止以及更改應於六個月前預先知照如不於六個月以前知照要停止或要更改則仍行照前辦理惟中法兩電報局訂定將

來中國與歐洲以及歐洲以外諸國來往電報
價目照現在中國電報局與東北兩海線公司
簽定者如有所更改則法國電報局亦得照樣
改減

第十二款

雲南蒙自與北圻老開相連電線因上款言明
十八個月方能接線今約明蒙自老開兩分局
未接線之前如有電報由中法別處相接之線
傳遞與雲南來往者仍照各局在長江以及長
江以南者第六款所定報價一律取資

光緒十四年十月二十八日

西歷一千八百八十八年十二月初一日

李肅毅伯奏議

及門吳章洪綸鈞編輯

卷十二

覆奏海防經費部駁各款摺

定造快船報銷摺

雷艇經費請銷片

覆奏部駁海防經費摺

洋息請撥藥釐片

查覆部駁海防經費摺

免停燒鍋片

驗收旅順各要工摺

李金鏞請卹摺

覆奏直隸水田難成摺

酌議土藥稅釐摺

出洋巡閱摺

巡閱海軍竣事摺

郭嵩燾請付史館摺

覆奏停購船械裁減勇營摺

辭節制嵩武軍摺

與俄接連電綫定約摺

潘鼎新請建專祠摺

漠河金廠請獎摺

變通學藝期限片

重整上海織布局片

海軍擬購新式快礮摺

推廣機器織局摺

醫院創立學堂摺

覆奏海軍統將摺

粵將無庸調津摺

據實陳奏軍情摺

大東溝戰狀摺

海軍懲勸章程片

彙覆鐵路電報等事摺

覆奏海防經費部駁各款摺 光緒十五年三月十二日

奏為光緒九十兩年北洋海防經費報銷案內戶部刪查各款現經逐一查覆仍請照銷仰祈

聖鑒事竊准戶部核覆光緒九十兩年北洋海防經

費報銷一案內有刪查各款當飭支應局司道查覆核辦茲據該司道詳稱出洋工匠龐玉順等四名由津赴德川資銀一千一百六十二兩零已奉戶部准銷其應歸光緒十一年造報由德回津川資銀一千二百七十七兩零令將多支銀一百十餘兩歸入十一年案內核刪等因

查該工匠於十年八月回華時正值法越有事
外洋船價較昂是以比赴德時川資略增現已
於十一年銷冊內據實聲敘所有該工匠由德
回津川資銀一千二百七十七兩八錢二分八
釐九毫應請照數准銷又大沽水雷營管帶幫
帶所支柴草奉戶部刪除銀七兩九錢七分四
毫查大沽水雷營管帶幫帶所支柴草前已覆
奏自光緒十四年正月起住支其已支之款仍
請照銷奉

旨允准欽遵在案所有前項已支柴草銀七兩九錢

七分四毫應請仍准照銷又北塘山海關旅順各水雷營薪糧等項戶部以大沽營內並無管理雷庫官員庫書名目應將月給銀兩同日給柴草照數刪除管帶幫帶亦應照大沽營成案將柴草銀兩一律刪除計共刪銀六百七十二兩九錢四分六毫一絲一忽八微查水雷為海防利器械件繁多各營地處海濱異常潮域必須設庫妥慎收儲是以添設庫官各一員庫書各一名以昭慎重大沽雷營本亦稟請添設因該營員名薪糧已較北塘等處為多未便再添

飭令自行設法勻撥經管以免糜費北塘山海關旅順三處雷營本係比照大沽雷營章程酌量增損雖添出庫官庫書薪糧核其月支總數仍較大沽減少此係得省即省核實議定並無溢於大沽雷營之數其管帶幫帶柴草一項已請自十四年正月起住支所有奉刪銀六百七十二兩九錢四分六毫一絲一忽八微應請仍准照銷又登榮水師艇船續派官二員水長一名戶部令刪除銀一千三十三兩二錢查該艇船自光緒六年八月由山東調津挑留弁兵三

百十員名教練快礮船水手各事宜除挑配外尚餘武弁二員兵一百二十五名因七年冬間定購鐵甲巨艦所需水兵必應先期籌備其應習技藝較快礮船尤為繁重是以添派官二員水長一名分班教練業於十一年九月一律撥上鐵艦將艇船薪糧住支是雖添派數人而一百餘名之兵丁盡收實用尚非糜費前已覆奏奉

旨准銷欵遵在案此次九十年照案接支銀一千三百三十三兩二錢應請仍往照銷又旅順威海兩堪

廠並水師子彈火藥等庫司事人等新糧戶部
以大沽礮船公所司事每名月支銀十兩今每
名月支銀十二兩應每名刪銀二兩計刪除銀
一百四十一兩九錢九分九釐九毫八絲二忽
一微五纖查旅順威海兩煤廠並子彈火藥等
庫司事夫役薪糧公費係比照大沽礮船公所
章程核給因收發煤噸事務較繁子彈火藥關
繫尤重且該兩處孤懸海外食用昂貴是以司
事每名議給薪水銀十二兩較礮船公所司事
每名多支銀二兩實係稱事授精並無浮濫與

現奉海軍衙門奏定北洋海軍章程司事在岸
當差月支銀十二兩亦屬符合所有奉刪銀一
百四十一兩九錢九分九釐九毫八絲二忽一
微五纖應請仍准照銷又戶部以北洋員弁薪
公論差使不論官階道員高駿麟會辦機器製
造局係知府徐建寅請假派委該道會辦自應
按照徐建寅薪水五十兩之數支給今支薪水
六十兩未幾復加公費二十兩令將多開薪水
公費一併刪除計刪銀二百九十六兩三錢三
分三釐二毫五絲五微查北洋員弁薪公原論

差使不論官階惟差使有繁簡之別薪公即有多寡之分徐建寅辦理機器製造局其時事務尚簡故每月僅支薪水銀五十兩自徐建寅請假後事務漸繁改派道員高驂麟會辦是以月加薪水銀十兩嗣因海防各營需用軍火愈多製造日益增劇該道月薪六十兩實屬不敷辦公迨一年後始每月酌加公費銀二十兩共日支薪水公費銀八十兩其時若徐建寅仍在局會辦亦當酌量加給且北洋道員薪公有月支一百兩及一百三十兩者均奉部准銷有案該

現奉海軍衙門奏定北洋海軍章程司事在岸
當差月支銀十二兩亦屬符合所有奉刪銀一
百四十一兩九錢九分九釐九毫八絲二忽一
微五纖應請仍准照銷又戶部以北洋員弁薪
公論差使不論官階道員高駿麟會辦機器製
造局係知府徐建寅請假派委該道會辦自應
按照徐建寅薪水五十兩之數支給今支薪水
六十兩未幾復加公費二十兩令將多開薪水
公費一併刪除計刪銀二百九十六兩三錢三
分三釐二毫五絲五微查北洋員弁薪公原論

差使不論官階惟差使有繁簡之別薪公即有多寡之分徐建寅辦理機器製造局其時事務尚簡故每月僅支薪水銀五十兩自徐建寅請假後事務漸繁改派道員高駿麟會辦是以月加薪水銀十兩嗣因海防各營需用軍火愈多製造日益增劇該道月薪六十兩實屬不敷辦公迨一年後始每月酌加公費銀二十兩共月支薪水公費銀八十兩其時若徐建寅仍在局會辦亦當酌量加給且北洋道員薪公有月支一百兩及一百三十兩者均奉部准銷有案該

道月支八十兩已屬節省並不為多所有奉刪
銀二百九十六兩三錢三分三釐二毫五絲五
微應請仍准照銷又總理衙門調取繪圖委員
陳文祺前在大沽船塢繪圖每月支薪水銀四
十兩仍請照數接支戶部以大沽船塢繪圖二
員一員月支三十兩一員月支十六兩並無四
十兩應照三十兩之數支給計刪銀二十九兩
三錢三分三釐二毫該員又隨同前會辦福建
海疆事宜張佩綸赴閩計刪薪水銀二十九兩
三錢三分三釐二毫查陳文祺前在大沽船塢

繪圖實係月支銀四十兩嗣於光緒十年三月
奉派赴總理衙門當差船塢另派繪圖二員一
員月支銀三十兩一員月支銀十六兩前將大
沽船塢經費議定章程開摺奏請立案係自光
緒十一年正月起支敘明從前薪工經費係核
入修船費內彙總開報嗣因工與料併稽核為
難是以將委員司事工匠薪工等項按月另給
每遇修船只給料價不給工價在案所有陳文
祺月支銀四十兩係定章以前在塢原支之數
並無不符奉刪兩款銀五十八兩六錢六分六

釐四毫應請仍准照銷又洋鎗教習查連標月
支薪水三十兩公費二十兩戶部以查連標已
准支薪水三十兩此次又月支公費二十兩礙
難核准計刪除銀五十九兩三錢三分三釐三
毫查該教習月支薪水銀三十兩嗣因派赴盛
軍教練經盛軍統領周盛傳以該軍馬步十餘
營分紮數處該教習往返教練異常勤苦是以
月加公費銀二十兩以示鼓勵該教習一人而
教練十餘營即係一人兼辦數人之事且十餘
營分紮各處周流教練車馬費用為數不貲原

支銀三十兩實屬不敷辦公所有奉刪銀五十
九兩三錢三分三釐三毫應請仍准照銷又出
洋學習武弁巫炳修找支川資薪水銀一千一
百九十七兩八錢一分七釐五毫七絲二忽戶
部以該弁出洋發給薪水船資一千二百兩係
批定之款今又找一千一百餘兩礙難核准應
行刪除查該弁派赴奧國學習馬隊應需薪水
川資均由稅務司德瑾琳經理共用英金六百
十九鎊零合庫平銀二千三百九十七兩八錢
一分七釐五毫七絲二忽出洋時發給薪水川

資銀一千二百兩原令該稅務司儘此數動用
嗣該稅務司稟報該弁在奧每月僅給用費英
金十五鎊兩年共給三百六十鎊實屬減無可
減其來回川資等項共用英金二百五十九鎊
零亦係核實支給前次奉發銀一千二百兩本
條約估給領實有不敷迨後鎊價昂貴折合英
鎊又有短少業由該稅務司代墊等語遂由局
照數撥還以免該稅務司因公賠累貽誚外人
且查閩廠前派武弁赴德國監造三艦因外洋
房膳雜支費用較大經酌定薪水川資外每月

月給房膳雜支英金三十鎊已奉准銷在案今
該弁在德兩年有餘連薪水川資等項共僅用
英金六百十九鎊零實較節省所有奉刪銀一
千一百九十七兩八錢一分七釐五毫七絲二
忽應請仍准照銷又水師管輪兩學堂用費月
支銀一千九百一兩戶部以上案兩學堂每月
用費一千七百餘兩核與原定一千六百餘兩
之數有浮應酌量刪減此次較上案更增礙難
照准應令自行刪減核定計行查銀四萬六千
一百四十六兩查水師管輪兩學堂用費前奉

戶部飭令刪減當查該兩學堂原擬月需銀一千六百餘兩係因管輪學堂於光緒八年四月續行開辦其公費先按每月一百五十兩酌給須俟試辦一年有餘不足再行核定是以立案文內聲明事屬創辦一切章程未能遽作定數迨一年期滿核計所用公費照原擬之數每月實不敷銀五六十兩應照水師學堂一律按每月銀二百兩補給免使賠累致涉廢弛雖較立案時約增數十兩而款係實用曾經聲明在先毫無可刪可減之處且該兩學堂為水師人材

所自出即為海軍根本所由基教養之方亟宜
講求前於九年四月間嚴校各學生所習各藝
均有進益因酌仿船政成案將考取學生量給
贍銀使無室家之累得以專心肄業復隨時試
校按等酌加藉資鼓勵又因增課魚雷添僱機
匠月需用費均不能不較前有增前海軍衙門
暨戶部查取北洋海防經費月支各款已將該
兩學堂隨時加支數目彙造清冊送核除歸入
各該年造報外業將七八兩年冊造銀兩奏請
照數准銷奉

旨允准欽遵在案九十兩年該兩學堂用費仍係循
案實用實報委屬無可刪減所有奉查銀四萬
六千一百四十六兩應請仍准照銷又道員朱
壽鏞赴廣西知州羅豐祿赴上海朝鮮學生陳
兆蕙等由閩粵來津繙譯福連赴上海武弁王
義才等赴閩工匠沈若球等赴滇桂都司徐開
元等赴廣西酌給川資公費安家等項共銀一
千八百五十九兩九錢四分一釐七毫二絲戶
部以前項銀兩有川資公費並支者有但支川
資但支安家者其多寡數目是否按照官階差

使抑係酌量程途均未聲明令將何項員名至
何處差遣需用川資公費安家各若干逐一立
定章程先行送部存案再行核辦至知縣魏瀚
叅將陳季同回閩盤費一百三十六兩二分四
釐亦應俟章程送部一併核定計行查銀一千
九百九十五兩九錢六分五釐七毫二絲查道
員朱壽鏞飭赴廣西偵探軍務應需輪船水腳
及在粵房飯夫馬辦公等費給銀二百八十九
兩四錢九分一釐五毫又直隸州知州羅豐祿
飭赴上海隨同南洋大臣議訂法約該員及隨

從丁役人等應需來往輪船川資並在滬房飯
夫馬等費給銀二百四十八兩三錢二分七釐
三毫一絲又羅豐祿隨同前北洋會辦大臣吳
大澂赴朝鮮商辦善後事宜該員及隨從丁役
人等應需輪船川資並朝鮮食用辦公等項給
銀一百九十二兩九錢九分四釐三毫一絲又
繙譯福連因法使在上海議約派令由津赴滬
供差給川資銀四十八兩二錢四分八釐六毫
又洋操槍礮教習都司徐開元千總李厚陞把
總祝洪興三員調赴廣西前敵軍營教練隊伍

應需水陸川資每員給銀五十兩共銀一百五十兩又知縣魏翰叅將陳季同准船政衙門派令來津商辦快船事宜回閩給盤費銀一百三十六兩二分四釐又武弁王義才黃增祥二名熟習後膛行礮口令操法由津赴閩差遣共給川資銀六十八兩八錢八分委員布理問沈若球帶同雷弁周洪發雷匠王永和陸誠運解水雷沈雷等件赴滇桂關外以備阻塞河面攔遏敵船時值中法失和關外軍情緊急聞者裹足該員弁不畏艱險毅然前往是以酌給沈若球

三個月薪銀九十六兩周洪發三個月薪銀六十兩王永和陸誠各三個月工銀五十三兩共支銀二百九十二兩作為安家之費俾免內顧而資鼓勵以上八款均係臨事酌量核發又閩粵等處學生陳兆渠等二十名飭調至津以備水師撥用均係航海而來內四名由船政衙門每名墊給川資銀三十兩由津撥還其餘十六名係照閩廠墊發之數撥給亦非由津局核定銷冊內均已詳細聲敘北洋辦理海防事屬創始一切支款多無例章可循當此庫款支絀之

際無不遇事撙節前項川資公費安家等銀均
核其事機緊要酌量發給並未按其官階程途
緣官階大小不一程途遠近不同究應差遣何
處是否水程陸路以及往返久暫均無一定必
須臨時方能酌奪與額支各款不同實難預先
懸擬章程致多窒礙所有奉查銀一千九百九
十五兩九錢六分五釐七毫二絲應請仍准照
銷等情具詳前來臣查戶部核復光緒元年
至六年洋員支款案內聲稱本部核銷各項總以
例章奏案為憑惟北洋所覆各節亦係實在情

形以前用過各款應由該大臣自行奏明辦理
當將元年至六年並七八兩年北洋海防報銷
經部駁查各款逐一據實登復奏請准銷均奉
旨著照所請戶部知道欽遵在案今九十兩年報銷
事同一律且均係力求樽節實用實報並無例
章可循仍懇

天恩勅下戶部照數准銷以清案款理合恭摺復陳
伏乞

皇上聖鑒訓示謹

奏

定造快船報銷摺 四月初六日

奏為查明訂造英德兩國商廠快船四號收支款
目開單報銷恭摺仰祈

聖鑒事竊臣前遵光緒十一年六月二十四日電

旨照前購濟遠快船式樣商由出使英德國大臣曾

紀澤許景澄向兩國商廠訂造鋼板鐵甲快船

四號英廠兩號名曰致遠靖遠德廠兩號名曰

經遠來遠約定十三年春夏間工成屆時經臣

飭派英員提督銜琅維理先往英德兩廠驗視

並派管帶官叅將鄧世昌等帶同弁兵出洋會

同琅維理接收駕駛來華於十三年冬駛抵廈門即在南洋過冬操練十四年開河後調來北洋經臣出海驗駛精堅迅利已奏蒙

聖鑒並酌定人數餉數奏咨在案所有訂造四船用款先後准曾紀澤許景澄並接任出使英德國大臣劉瑞芬洪鈞開送飭據海防支應局司道逐細鈎稽繕單具詳前來臣查此案先經戶部在於神機營息借英商怡和洋行款內劃撥船價銀二百四十八萬兩因係廣平每兩較庫平增銀四釐四毫計共增銀一萬九百十二兩另

行抵作北洋應領勇餉計淨收歸船案庫平銀
二百四十八萬兩當以船價須一兩年分批匯
付久存償息殊不合算遂於光緒十一年八月
初一日全數發存英商匯豐銀行按西歷每年
生息五釐截至十三年二月初四日將存款節
次買鎊匯付船價完竣計共收回息銀七萬八
千八百九兩五錢八分五釐六毫二絲六忽八
微已詳細分咨總理海軍事務衙門各國事務
衙門戶部查照嗣因所造各船添購魚雷大礮
等項不敷價銀甚鉅經海軍衙門轉商戶部指

撥各省展限海防捐輸銀一百萬兩續因解不足數又指撥江海浙海閩海三關洋藥稅釐計解到捐輸銀七十五萬一千一百十七兩四錢七分六釐八毫洋藥稅釐銀二十六萬六千一百八十七兩八錢一分三釐二毫共銀一百一萬七千三百五兩二錢九分亦經陸續買鎊匯付隨時分咨並將各省關解到捐款稅釐細數分晰咨報各在案統計列收神機營撥給洋款及各省關捐輸洋藥稅釐共銀三百四十九萬七千三百五兩二錢九分英廠訂造致遠靖遠

二船船價及各項礮位槍枝魚雷電燈各種彈藥器具並購備物料等項用款共支銀一百六十九萬七千四百五十三兩三分一釐六絲六忽五微德廠訂造經遠來遠二船船價及各項礮位槍枝魚雷電燈各種彈藥器具並購備物料等項用款共支銀一百七十三萬九千七百六十一兩三錢六分七毫三絲七忽三微四船統共支銀三百四十三萬七千二百十四兩三錢九分一釐八毫三忽八微尚餘銀六萬九千兩八錢九分八釐一毫九絲六忽二微已奏明

撥歸旅順船塢添建石壩工款之用其所收息銀七萬八千八百九兩零亦奏明歸於另購百濟雷艇案內收銷臣查訂造四快船支用各款均在英德商廠與洋人交涉毫無例章可循無憑造冊應即開單報銷其價目銀數有可分晰者已於清單各款下註明並將船廠價內扣讓若干暨預付後半礮價收回息銀抵除腳價等項若干均於單內明晰登註以備稽核此係出使大臣經辦皆實用實銷並無絲毫浮冒北洋前購定遠鎮遠濟遠三艦收支各款經臣開單

奏咨當由各部會核具奏不限常例照單准銷
在案此次事同一律且現在創辦海軍一切事
宜及該四船薪餉均由海軍衙門主持籌發應
請

旨飭下海軍衙門會同戶兵工部查核照單准銷以
清案款除將詳細清單分咨外理合恭摺具陳
並另開簡明清單敬呈

御覽伏乞

皇上聖鑒謹

奏

--	--	--	--	--	--	--	--	--	--	--

謹將訂造英德兩國商廠致遠靖遠經遠來遠
四快船收支各款開具簡明清單恭呈

御覽

收款項下

一收截留神機營息借怡和洋行銀二百四十
八萬兩

一收部撥各省捐款並江海浙海閩海三關洋
藥稅釐共銀一百一萬七千三百五兩二錢
九分

以上共收銀三百四十九萬七千三百五兩二

錢九分

英國訂造致遠靖遠二船支款項下

一支英國阿模士莊廠訂造致遠靖遠快船二隻共價銀一百十七萬七千四百十九兩五錢四釐五絲

一支德國克虜伯廠代造二十一生的三五圓徑後膛來福廠六尊備用器具全分配鋼鐵等彈九百個並添購演廠藥彈價值暨運保駁力棧租及監造洋員津貼等項共銀九萬七千六百六十七兩一錢二釐七毫八

絲四忽六微

一支克虜伯後膛礮用礮架礮彈火藥備用各
機器零件共價銀七萬二千七百一十兩八
錢一分八釐六毫

一支阿模士莊廠六寸徑後膛螺紋大礮四尊
並礮架礮彈火藥引線各零件備件共價銀
四萬八百二十五兩四錢七分一釐九毫七
絲

一支霍智紀士六磅彈急放礮十六尊連礮架
藥彈引線箱車各零件備件共價銀五萬六

千六百六十四兩八錢六分二釐九毫七絲
一支四十五徑格林急放礮十二尊連礮架藥
彈備件器具等項共價銀三萬二百九十兩
六錢六分五釐九毫八絲五忽

一支馬丁尼後門槍八十枝梅花手槍三十枝
腰刀八十把長矛八十枝連皮帶藥袋藥彈
斧箭等件共價銀五千一百二十二兩八錢
七釐六毫七絲四忽

一支魚雷礮八尊魚雷二十四個連各項機器
零件備件並裝配一切共價銀九萬六千七

百五十四兩九錢六分四釐一毫五絲七忽
四微

一支電氣查察燈四盞玻璃電氣燈三百盞提
手燈二十盞並輪機電機裝配各件共價銀
二萬四千四百五十七兩二錢七分五釐三
毫一絲二忽二微

一支添製霍智紀士小機器廠二十尊連子藥
等件共價銀三萬六千九百七十五兩一錢
三釐七毫二絲三忽七微

一支添購六哲斯鎊二具電氣引四百枝共價

銀七百九十八兩七錢一分七釐四毫五絲

三忽

一支演試阿模士莊並霍智紀士格林各廠添
購藥彈等項及添備兩船回華途用廠藥共
價銀一千四百六兩二錢五分八釐九毫七
絲二忽四微

一支阿模士莊廠添辦兩船放廠電氣燈電氣
準頭分度弧等項並裝費共價銀七千四百
五十九兩五分五釐九毫四絲

一支兩船廠用皮盤器具並經度艙面各表儀

器遠鏡繪圖器具及礮手木匠水手所用各料件暨行船海圖共價銀三千一百七十六兩四錢五分七毫三絲

一支兩船汽鑪房所用各項料件共價銀七千一百五十八兩九錢六分八釐七毫九絲五忽二微

一支使館隨員並繙譯官赴英國各海口船廠查訪造船情形並參贊官赴船廠商論事宜及勘驗船工火車路費等項並繙譯德文筆資共銀一千五百七十二兩五錢四分二釐

八毫九絲八忽八微

一支派赴阿模士莊船廠監驗工程監工匠首
津貼房膳歸裝路費等銀八千八百六十六

兩二錢九分五釐八毫五絲六忽九微

一支商論造船事宜節次電報費並信資共銀
七千三百四十六兩七錢一分九釐三忽九

微八沙

一支洋匠本敦照料兩船裝修艙位等處工食
銀三百五十七兩八錢七分三釐五毫六絲
五忽

一支英海部派員演試兩快船應需折席車費
等銀二百九十七兩四分三毫一絲四忽四
微

一支英廠兩快船回華沿途用煤八百九十噸
零八百九十六磅共價銀一千九百九十六
兩三錢八分二毫八絲三忽

一支洋員琅維理在英購買兩快船備用物件
共價銀六千六百二十二兩九錢三分五釐
四毫七絲七忽

一支撈取致遠船海口失落船錨鍊用費銀七

十七兩八錢三分三釐七毫

一支阿模士莊廠續寄兩快船需用器具軍火
水腳保險銀七十七兩七錢九分五釐

一支致遠靖遠二船開駛來華時在洋購買備
用各件共價銀四千八百七十八兩三錢四
分八釐七毫五絲

一支撥還船政大臣墊支赴英監造快船監工
匠首薪水行裝船價等銀六千四百七十一
兩二錢三分七釐一毫

以上統共支銀一百六十九萬七千四百五十

三兩三分一釐六絲六忽五微

德國訂造經遠來遠二船支款項下

一支德國伏耳鏗廠訂造經遠來遠快船二隻
共價銀一百三十八萬四百三十八兩七錢
八分三釐九毫五絲五忽

一支克虜伯二十一生的十五生的口徑三十
五倍長後膛鋼礮各四尊四生的口徑三十
五倍長快放礮二尊連架座並配鋼鐵彈一
千七百八十個操演子管八個栗色餅藥裏
四百個引火八千出引火螺絲一百個銅壳

藥並引火五百個合彈藥器二分價值並由
廠運船運腳保險暨船上裝配費共銀十二
萬九千九百五十三兩七錢四分九釐二毫
三絲七忽七微

一支哈乞開思四十七密里五管鋼礮四尊三
十七密里五管鋼礮十尊連插架隨件並配
鋼彈一萬四千枚合彈藥器四分子藥箱三
百三十四隻價值並由廠運船運腳保險暨
裝配等費共銀四萬九千一百五兩五錢一
分二釐八絲七忽

一支刷次考甫魚雷二十二具銅帽二十二分
雷筒八具輪機舢板活架四具戰頭棉藥二
十二分連隨件備件價值暨運腳保險安配
工費共銀七萬九千一百四十三兩九分八
毫四絲八微

一支連珠手槍六十枝插桿螺鑰全槍子二萬
枚價值並試驗工費運費共銀六百四十四
兩七錢一分九釐八毫九絲五忽四微

一支大電燈四架橫桿電燈二盞小電燈四百
六十四盞艙房電燈四百盞大小機器四具

價値並工費共銀二萬九百六十五兩一錢四分九釐四毫六絲四忽一微

一支德廠兩船添備器具並備換物件共價銀

一萬二千五十九兩六錢三分四毫八忽六微

一支來遠船入隲油漆費銀七百七十六兩四錢六分九釐八毫二絲九忽三微

一支監工匠首津貼歸裝川資等銀八千九百五兩一錢五分四毫一絲五微

一支洋供事分銳飛薪水銀一千四百五十七

兩七錢九分七釐八絲四微

一支兩快船僱募大管輪海南白羅們他耳薪
水銀四百六兩七分一釐六毫一絲一微

一支華洋員弁赴各處查驗工料並試船試礮
械盤費工費賞號薪水等銀三千六十八兩
八錢一分九釐一毫九絲一忽九微

一支電報信資銀四千四百三十兩二錢七分
七釐八毫一絲三忽一微

一支出使大臣許景澄並參贊隨員繙譯人等
節次赴船廠察驗船工暨海口試驗速率往

返船費及犒賞等項雜費共銀一千七百四十四兩二分八釐八毫三絲七忽

一支德廠兩快船開駛時購備油煤並一切零星物件共銀一萬五千五百二十五兩四錢七分三釐九毫三絲五忽一微

一支兩快船添製房艙禦寒湯汽管兩全分舢板四隻並添備改換一切工價共銀一萬四千七百五十九兩九分四釐九毫八絲五忽三微

一支電燈備換一切器具物件共銀四千七百

五十九兩二錢三分三毫三絲三忽二微

一支添購合彈藥器具由德運滬轉發旅順運費棧租銀八兩五錢二分五釐九毫

一支電燈回光鏡二具由德運滬運腳保險銀六十一兩三錢七分五釐七毫二絲三忽七

微

一支經遠來遠二船開駛來華時在洋購買備用各件共價銀四千八百五十六兩六錢六分七釐二毫

一支撥還船政大臣墊支赴德監造快船監工

匠首薪水行裝船價等銀六千六百九十一兩八錢

以上共支銀一百七十三萬九千七百六十一兩三錢六分七毫三絲七忽三微

統共支銀三百四十三萬七千二百十四兩三錢九分一釐八毫三忽八微以收抵支尚餘銀六萬九十兩八錢九分八釐一毫九絲六忽二微已奏明撥歸旅順船塢添建石堤工款之用理合登明

雷艇經費請銷片 四月初六日

再前因北洋創設海軍必須購製出海魚雷快艇與鐵甲快船相輔而行方於戰守有益臣於光緒十二年四月派員與英商百濟公司訂造新式頭等出海魚雷大快艇一隻咨會出使英國大臣劉瑞芬俟該艇造成飭派妥員逐細驗試並將艇上礮位電燈雷筒魚雷及各項要件在洋廠另行購配嗣經造成配齊驗試靈捷飭由接帶四快船洋員琅維理並管帶官叅將鄧世昌將該艇拖帶來華因遠步重洋訂雇英國

員弁水手幫同管駕以期穩慎於十三年十月
同四快船駛抵廈門時值北洋封凍派統領北
洋水師海軍提督丁汝昌前往一併驗收遣撤
洋弁回國以節經費旋將該艇駛抵旅順交道
員劉含芳督率歸隊操練擬定員名薪餉數目
於十四年五月

奏咨聲明北洋防費竭蹶無從籌付艇價又不便
專案另請查有購買四快船款內收回息銀七
萬八千八百餘兩擬儘數動用不敷銀兩由北
洋防費內勻湊等因奉

殊批該衙門知道欽遵在案茲將劉瑞芬開報該艇
支款飭據海防支應局司道逐細鉤稽共用艇
價礮位水雷筒水雷電燈並洋弁駕駛來華薪
工煤費零件各項銀八萬五千九百九十八兩
六錢三分四釐九毫除收息銀七萬八千八百
九兩五錢八分五釐六毫二絲六忽八微外計
由北洋防費項下湊撥銀七千一百八十九兩
四分九釐二毫七絲三忽二微此款皆與洋人
交涉毫無例章可循無憑造冊均係實用實銷
並無絲毫浮冒應併請

旨勅下海軍衙門會同戶兵工部查核照單准銷除
將詳細清單分咨外理合附片具陳並另開簡
明清單敬呈

御覽伏乞

聖鑒謹

奏

謹將訂造英商百濟公司魚雷大快艇收支各款開具簡明清單恭呈

御覽

收款項下

一收四快船款發存匯豐銀行取回生息銀七萬八千八百九兩五錢八分五釐六毫二絲六忽八微

一收北洋防費內湊撥銀七千一百八十九兩四分九釐二毫七絲三忽二微

以上共收銀八萬五千九百九十八兩六錢三

分四釐九毫

支款項下

一支訂造英商百濟公司魚雷大快艇一隻價銀二萬五千三百四十八兩七錢九分四釐六毫

一支購買大電燈一座小電燈二十五個連零件備件共價銀五千三百六十五兩四錢九分四釐八毫

一支購買哈乞開司後門礮二尊藥彈四百出格林礮四尊藥彈包二十萬出並礮架零件

備件價值暨裝配寄運等費共銀二萬六百二十兩三錢二分九釐一毫

一支購買水雷筒二個水雷四個連零件備件共價銀一萬六千二十八兩八錢八分七釐七毫九絲

一支續添雷筒羅經鐵纜掛鋪火藥柱架長槳三葉輪掛簾經度表等件價銀七千八十八兩八錢九分六釐

一支雷艇停泊太唔斯江保險僱洋人看守開行時油漆並試驗車馬費以及僱用引水回

華時購備途用物件煤輒共價銀二千七百

十二兩八錢三分一釐五毫九絲

一支電報信資銀一千八百四十四兩六錢五

分二釐九毫

一支僱用洋管帶水手人等駕駛雷艇來華薪

工飯食賞薪並回國船費共銀六千九十一

兩三錢一分六釐八毫二絲

一支雷艇開駛來華沿途燒用煤斤並添購零

件雜支洋水手升火廚役火食等項銀八百

九十七兩四錢三分一釐三毫

以上統共支銀八萬五千九百九十八兩六錢
三分四釐九毫

--	--	--	--	--	--	--	--	--	--	--

覆奏部駁海防經費摺十一月初一日

奏為光緒十一十二兩年北洋海防經費報銷案
內戶部駁刪各款現經逐一查覆仍請照銷恭
摺仰祈

聖鑒事竊准戶部核覆光緒十一十二兩年北洋海
防經費報銷一案內有駁刪各款當飭支應局
司道查覆核辦茲據該司道詳稱武備學堂添
僱幼學生使役十名戶部以前送單內酌定學
生五名公用使役一名添設學生四十名應用
使役八名刪除二名當以前次酌定學生五名

公用使役一名係指原設之大學生而言此次
添設幼學生年皆十四五歲以下童蒙無知事
事需人照料與大學生之能自操作者情形不
同礙難核刪等情聲復仍請照准復奉戶部以
前送單內並未分晰年歲大小何以此次又以
學生年幼為詞仍令刪除等因茲計刪銀五十
九兩查天津創設學堂及開支經費先後奏咨
各案均聲明該學堂學生係由各營挑選弁兵
送堂肄業將來尚須添募良家年幼子弟以宏
造就就是添募幼生迭經奏咨有案並非奉部駁

查始以年幼為詞既係幼生其童蒙無知需人照料與大學生之能自操作者不同自屬實在情形今必欲使之與大學生一律而強其力之所不能似亦非幼及人幼之道且幼學生四名公用使役一名尚覺不敷分布斷難再減所有飭刪銀五十九兩應仍請照數准銷又旅順口水陸軍械局管理帳冊二員前奉戶部以檢查水師各營均無此項名目行令刪除當以水陸各營軍械或重價購置或鉅款造成均係新式精利之件往往有一物須裝配零件數十百種

方能使用收發之際非詳記冊籍無從稽考非專司其事無所責成管理帳冊與水師統領隨帶員弁內稽察兼管後路收核餉冊名目相仿職事相同等情聲復仍請照准復奉戶部以水師統領隨帶員弁內收核餉冊一員月支銀十二兩此次管理帳冊二員每員月支銀十六兩殊與所援之案自相矛盾應照水師統領隨帶員弁准用一員月支銀十二兩等因茲計冊銀一百七十兩九錢九分九釐九毫查水師統領隨帶員弁內收核餉冊係稽查委員兼辦該委

員本有薪水銀二十四兩兼辦餉冊另加十二兩實共月支銀三十六兩今該局帳冊二員每員僅月支銀十六兩核與所援之案尚不及半實有減省並無矛盾且該局所派司事月支銀十二兩業經奉部准銷委員責任較重費用較繁自不能與司事相等至原派二員係因收發水陸兩項軍械稍有舛錯貽誤匪輕必須分任方能有條不紊若僅用一員斷難兼顧所有飭刪銀一百十七兩九錢九分九釐九毫應仍請照數准銷又水師學堂用費前於十一十二兩

年分立案冊內開報第三第四兩屆考試駕駛
管輪各學生月支養贍及添募管理魚雷機器
匠鐵匠泥模匠等月支辛工各銀兩迭奉戶部
駁查當以該學生等自光緒九年酌仿船政成
案將考取各生量給贍銀復隨時校試按等酌
加業於覆奏九十兩年案內奉

旨准銷此次月支贍銀仍按考列等次照章核給其
添僱魚雷機器匠等係因管輪學生增課修定
魚雷技藝不能不酌添精巧工匠俾資練習亦
屢經奏明在先各等情聲復仍請照准復奉戶

部以統計該學堂用費月支銀二千二百餘兩擬自十一年起月以二千兩為准數此案多支銀兩即行照刪等因茲計刪銀二千七百五兩查該學堂內額設監督教習學生及各項員司書役夫匠人等月支薪水辛工飯食公費等銀係自光緒七年起歷奉准銷照案接支之款其學生月支贍銀係自九年起歷奉准銷照章加支之款其添僱魚雷機器匠等係因學生添習新式技藝而設且於奏復七八兩年銷案內業經預先陳明應歸入該年造報並於光緒十一

及十三等年奉海軍衙門暨戶部先後查取北
洋海防經費月支各款又將該學堂隨時增減
數目彙造清冊送核是皆有案可稽無款不實
今戶部復以二千兩為定數其月支在二千兩
以內者照數核銷二千兩以外者照數核刪並
未指定所刪何款固已深知無款可刪然戶部
可以籠統議減該局不能不縷晰覆陳除每月
照案接支之薪水辛工飯食公費銀一千七百
二十六兩歷奉准銷毋庸再議外其添僱魚雷
機器匠等係因魚雷為海上攻戰利器北洋既

設有魚雷大艇中艇及鐵甲鋼快等船隨帶魚雷小艇該管輪學生等應兼備雷艇管輪之選凡魚雷裝卸修定各藝在在均關緊要無一不宜預為講求該堂雖原有管輪應用機匠然魚雷為專門之學非另募不能應手且理法之與工作之繁需用巧匠甚夥以應習各藝學生非一蹴可幾工匠亦未同時並募相時酌增不致糜費此次甫經試習是以僅僱三名共月支銀二十七兩已屬節省辦法斷難刪減連原支薪工飯費等銀共月需一千七百五十餘兩按部

定二千兩之數僅餘二百數十兩為兩堂一百二十名學生贍銀萬萬不敷分給水師人材以駕駛管輪兩項最關緊要以其職皆將領凡算學輿地步天測海御風布陣以及帆纜槍礮雷電輪機等事無一不宜通曉非豫為儲育倉猝無從招致是以考選聰穎子弟及品質樸實能安心學習者循序指授以冀拔十得五備異日海上禦侮之用但該學生等到堂肄業五年之內不准請假五年業畢之後尚須派上練船操習風濤之險火器帆檣等事無在不履危機非

迫於貧窶孰肯為此且其中尚有來自遠方者使無以利之更何能致之是以自光緒九年間經該學堂援照船政成案詳奉核定贍銀章程凡考取各生列二等者月給贍銀四兩列三等者月給贍銀三兩由三等考拔二等及二等考拔一等者均月加贍銀一兩由一等考拔優等者月加贍銀五錢取列優等以後須按該學堂季課積次併計其三次考列原等前六名再月加贍銀五錢加至十兩為止以示限制而期鼓勵自有此項贍銀該學生等各致其心思巧力

爭相奮勉月異而歲不同曾於十一年及十四
年間先後挑出學生六十餘名派上練船學習
內十一年所挑三十名已陸續充補鐵甲快砲
等船駕駛管輪各額缺並有派令出洋肄業近
皆學成回華均堪得用業已派充教習酌給薪
水藉資觀感此亦平日作養之明證也若按部
定月支之數僅二百餘兩作為贍銀計其所得
甚微匪特日後無以招徠即在堂諸生恐亦將
咨然思退當今海軍規模初定需材正亟方將
設法擴充加意培植以免臨時缺乏豈可轉惜

小費致棄前功是學生月支贍銀亦係斷難刪減並請嗣後按年考試即照定章支給免再駁查徒煩案牘所有飭刪銀二千七百五兩應仍請照數准銷以上共應請准銷銀二千八百八十一兩九錢九分九釐九毫等情具詳前來臣查戶部核覆光緒元年至六年洋員支款案內聲稱本部核銷各項總以例章奏案為憑惟北洋所覆各節亦係實在情形以前用過各款應由該大臣自行奏明辦理當將元年至六年北洋海防報銷經部駁查各款逐一據實登覆奏

請准銷奉

旨著照所請戶部知道欽此並將七八九十等年報銷經部駁查各款先後援案奏請准銷均奉

俞允各在案今十一十二兩年報銷事同一律且均係力求樽節實用實報並無例章可循仍懇

天恩敕下戶部照數准銷以清案款理合恭摺據實復陳伏乞

皇上聖鑒訓示謹

奏

洋息請撥藥釐片十一月初一日

再津海關奉派攤還神機營借用洋款前經奏
明擬撥洋藥釐金暫行按期歸付息銀並聲明
藥釐項下如尚不敷只可在洋稅連招商局稅
內竭力搜索湊付免誤期限儻以後洋藥改章
或進口箱數過少再隨時察核辦理奉

旨允准欽遵轉行遵辦在案茲據津海關道劉汝翼
詳稱近年藥釐收數逐漸減少自一百十四結
起至一百十六結期滿止計三結共收銀九萬
二千七百餘兩現在一百十七結尚未屆滿約

計可徵銀三萬餘兩統計四結不過十二萬之譜除部准每年留支銀七萬三千餘兩並一分二釐火耗外僅餘銀四萬餘兩近年鎊價日漲洋息之數愈增每年應付四期洋息已需銀九萬兩上下核計不敷甚多是以第四年第二期四兩期及第五年第一期洋息除洋藥釐金並土藥釐一併動撥外已於六成洋稅項下借撥銀四萬一千四百餘兩本月十二月第五年第二期洋息又將屆限關庫別無款項可挪仍須借撥洋稅統計本年共需借動六成洋稅銀六

萬四五千兩惟六成洋稅亦止此數除提八分
經費並招商二成出使經費等款外本年自一
百十四結至一百十六結實收銀十九萬二百
八十餘兩將來一百十七結屆滿連一百十三
結實存之五萬六千餘兩約共不過三十一萬
兩左右內應照案撥解支應局海防練兵餉銀
二十一二萬兩稅務司經費銀四萬八千兩皆
係必不可少下餘之款原擬批解本年加放俸
餉及應行帶解各款乃因歸還洋息緊要驟然
借撥六萬餘兩本屆加放俸餉現雖竭力騰挪

能否全數湊解實無把握其應行帶解舊欠抵
閩京餉東北邊防經費已成無米之炊因思藥
釐一項收數漸絀總因銷路日滯是以來路日
微恐明年所收更不及今年之數而洋息到期
即須應付十七年以後又應兼還本銀歲需二
十餘萬兩加以增漲鎊價為數更鉅收數愈少
出款愈多若不先事預籌倘來年仍借用六成
洋稅不特款目日多糾葛且洋稅本無盈餘勢
必無款可借既借之後又苦於無款提還從前
因洋息無款可湊曾在二成招商稅項下暫行

動撥旋准戶部覆以係解部專款不准擅行動
用然就現在而論每年應付息銀所短不貲即
使部中准撥招商二成尚恐不敷抵補再四思
維惟有將洋藥釐金一項擬請自一百十八結
起除奉准留支外儘數撥作洋息不敷之數即
請由部指定專款先期請領存庫俾得按時湊
撥付給以免失信而維大局等情請奏前來臣
覆加查核確係實情理合附片陳明伏乞

聖鑒敕部迅速核議施行謹

奏

--	--	--	--	--	--	--	--	--	--

11111

11111

查覆部駁海防經費摺 光緒十六年五月初八日

奏為光緒九十兩年及十一十二兩年北洋海防
經費案內兵部刪查各款現經彙案逐一查覆
仍請照銷恭摺仰祈

聖鑒事竊准兵部核覆光緒九十兩年並十一十二
兩年海防報銷各案內有刪查各款當飭支應
局司道查覆核辦茲據該司道詳稱光緒九十
兩年登覆案內道員唐廷樞在法國坐探軍務
寄電報十七次前經兵部行查每字價若干當
以部覆七八兩年銷案內行令嗣後定購外洋

軍械軍火電報字價詳細分載此次唐廷樞坐探軍務事多機密與定購軍械等項不同且在未定部章以先自當循舊造報覆請照准茲兵部仍令開報字數並令將中國電外洋各國官報價值章程鈔錄送部查唐廷樞在法國所寄電報均係由外洋電報公司遞相轉寄該公司向按時價連譯費等項彙開總數收取報費並不載明每字價若干確數且部章總以奉文之日為始上屆部覆係十四年三月奉到前項電報係十年以前所寄其時尚未定有發電應報

字價部章通行各處故唐廷樞寄報時並未向西洋公司將字價詢明無憑分晰報部至電報價目除官電本綫因公寄報向不給費外其中國商綫均係由商經理報費時有增減以與洋商爭衡不能官為強定不易之規致礙商電大局至外洋海綫寄報如何章程中國更無從過問嗣後自應按照時價分晰字數據實造報無從抄送章程所有行查銀七百五十九兩一錢二分二厘四毫九絲應請照數准銷又專催招商局輪船裝砲械軍火各物由天津上海運至

山海關旅順口等處水腳共十款前經兵部彙
同天津旅順營口金州等處裝運官弁勇夫四
款一併行查每噸担每員名各給水腳銀若干
當以光緒九年開送部輪船水腳章程案內聲
明順便搭載可照定價若專僱則須另議難繩
以畫一官例致拂商情奉部覆准照辦此次所
支水腳內有專僱各款係照章另議其搭運至
旅順口山海關等處皆非通商口岸係由便輪
繞道運往向無應收水腳若干定章隨時酌給
津貼均不按噸担員名核算聲復並將續定旅

順口等處水腳章程隨案報部聲明自十一年起凡搭載則照章支給若專僱則仍須另議茲兵部復令分晰噸磅支數查專僱輪船向照招商局與洋商公定規例按該商成本保險辛工煤炭雜支各款彙總議給水腳此係以船為準並非以貨為準故不按噸磅核算惟專僱一船無不滿載較按噸按担核計水腳既為節省而裝運官物尤必格外減讓如本案旅順營口等處裝運弁勇人等水腳均係專僱之船彙總議給據實開報現經兵部核以續定章程均屬有

減一概准銷由此類推前項裝運礮火水腳絕無浮多已可概見且專僱輪船必須另議不能繩以畫一官例經部復准照辦有案自應援照舊章辦理其中搭運至旅順口山海關等處砲械各物前已聲明係由便輪繞道運往且在未經定有水腳章程以前故從減酌給津貼本未較準噸磅數目勢不能將從前運往各物復一聚而權其輕重所有行查銀一萬一千九兩七分五厘一毫五絲六忽九微應仍請照數准銷又十一十二兩年報銷案內除劃歸工部核

銷房棧租及津貼礮船油船等銀三百四十六兩七錢八分二厘七毫業奉工部行令歸入下案造報並將全冊總數少結銀九分七厘二毫業經更正外計刪查各款內桿雷小輪船管駕人等六員名月支薪糧公費銀八十六兩兵部以未據奏咨有案又水師各船槍砲正副教習二十名每名月支銀十五兩至二十兩不等以未造花名行令聲復開報查桿雷小輪艇即上岸水雷輪艇此係照案接支更正船名並非新添之船亦未增減薪糧毋庸再行奏咨其槍砲

正副教習二十名前由海軍提督丁汝昌選充
時酌定等級餉數計正教習李貴林永益玉發
唐建冬黃生基翁羲年葛長清于連會等八名
各月給銀二十兩副教習江杜劉上林張華春
任亨黎潘細第林興黎張士魁張鎮潘恆言張
金甲陳金海張翰清等十二名各月給銀十五
兩所有行查銀二千六百九十八兩二錢六分
六厘五毫應仍請照數准銷又威遠鍊船學生
僱用薙髮匠一名兵部以各船所無又屯船醫
士一名以六鎮蚊船各配管駕人等五十三員

名每二船設醫士一名該船十三員名設醫士一名比較過優行令刪除查雜髮匠各船皆有係在公費內開支此項學生並無公費威遠船原有之匠又不敷用且該學生等盡在幼年恐以雜髮為名託故登岸致涉荒嬉是以專用一匠俾供職役其屯船醫士該船額設督操人等雖僅十三員名而練勇四百餘名除以一半分撥康濟威遠兩練船外其餘皆在屯船操習是該船弁勇人等實有二百餘員名添設醫士一名較六鎮蚊船並不為優所有刪減銀五百四

十二兩八錢應仍請照數准銷又咨調閩廠千
總陸麟清來津差遣照閩廠原支月給薪水洋
銀一百二十元兵部行令將准銷成案錄送查
千總陸麟清前派監造鐵甲船工月給薪水洋
銀一百二十元由閩廠折合庫平番銀八十六
兩四錢按月墊發業經歸入訂造三艦款內撥
還造報經戶工二部奏明准銷並分咨兵部有
案毋庸再行抄送且該千總調津以後即派充
鐵甲船總管輪前赴滬閩香港一帶選募三艦
需用管輪人等預先教練以備撥用若按鐵甲

餉章總管輪每月應支銀一百三十兩現支一百二十元合銀僅得過半而往返川資旅費概未請領是無論原支若干揆以稱事授糈已屬格外核減所有行查銀四百七十二兩七錢九分一厘七毫八絲應仍請照數准銷又操江輪船月給公費銀二百十兩兵部以曾否奏明有案並有無在南洋支過行令查明報部其醫士一名行令刪除查操江輪船自同治十年調赴北洋巡哨應用油蠟紙張向由南洋每月支給銀三十兩其水綫以上零星修理並應需車油

卷三
二四三
綿紗旂幟號衣等項由天津機器局墊辦再由
南洋撥還每年約需銀三千餘兩大修尚不在
內光緒九年間經南洋咨准改由北洋支給嗣
因該船歸水師副統領洋員琅威理乘坐隨同
各船操巡凡隨時應用料物需費甚繁刻不可
緩若赴天津機器局請領動需時日必悞事機
該管帶又無款可墊當經水師統領稟准比照
北洋各兵船月給行船公費銀二百四十兩既
免貽誤且有限制除由南洋月領油燭紙張銀
三十兩外北洋實計發公費銀二百十兩所有

水綫以上零星修理并應用車油綿紗及旂幟
號衣等項均不得再行開支較向由機器局每
年支用三千餘兩之數更為核減其添設醫士
一名係因該船官兵人等終年操巡海上櫛風
沐雨冒暑衝寒沴厲最易相侵療治不容稍緩
無論全船人數多寡皆應設有醫士以備緩急
况該船設管駕人等七十餘員名較之六鎮人
數為多雖六鎮每二船設醫士一名而六鎮係
屬守船以二船共守一口故可共用一醫該船
係屬巡船周歷無定洪濤巨浸之中咫尺千里

設有急症他船不能兼顧必須專設一醫所有
行查銀一千二百三十九兩並刪銀一百六兩
二錢應仍請照數准銷又護軍營弁勇二百名
往返仁川每名津貼輪船飯食銀六錢兵部以
未開明每日支銀若干共若干日行令查明報
部查前項津貼本係酌量核給按旅順至仁川
往返共須四日每日應攤銀一錢五分所有行
查銀一百二十兩應仍請照數准銷又軍械所
催大車裝兵槍等項由大沽包運至軍械所每
輛價銀一兩五錢兵部以未將程途里數開報

並以車輛與銀數不符行令聲復查大沽至天津城內軍械所陸路計一百餘里前項大車係按照民價僱定包送並不以里數為準至所僱車輛運送兵槍等項共重六萬九千餘斤共僱大車六十九輛每輛約裝一千餘斤冊開三十九輛實係繕寫錯悞應即隨案更正所有行查銀一百三兩五錢應仍請照數准銷入普濟輪船由天津裝拉火子彈等物赴山海關內差弁一員支水腳銀五兩兵部以立案所無行令刪除查立案與銷冊不同立案祇摘敘案由開報

總數銷冊須分別名目造具細數該弁係派令
押送軍火故立案冊內即將差弁水腳歸入軍
火水腳彙總開報今銷冊總數悉屬相符並無
多支所有刪除銀五兩應仍請照數准銷又專
僱輪船赴澎湖裝官弁勇夫至廈門又鍊錨由
滬運至烟台又上海地亞士洋行轉運鉄件砲
彈等項至天津又英商帶水駁船裝運砲械等
件至天津又專僱輪船裝砲位等件由天津旅
順等處運至山海關又專僱輪船由天津赴香
港裝砲位等件運至天津旅順等處又專僱輪

船由滬裝砲位等件至天津共七款支過水腳銀八千九百七十六兩九錢一分一厘六毫六絲四忽三微九纖兵部以未分晰噸担員名行令將細數報部查前項七款內招商局輪船水腳四款均係專僱之船不按噸担員名核算與九十兩年部查各款事同一律業經詳細登覆於前其鉄錫由滬至烟台運腳保險等費又地亞士洋行轉運鉄件等項由滬至天津又英商帶水駁船裝砲械等項由大沽至天津均係外國輪駁等船承裝該洋商不諳中國規例向係

約估貨件由軍械所彙總議給不能執招商局
搭載章程強以相繩委實無從分晰所有行查
銀八千九百七十六兩九錢一分一厘六毫六
絲四忽三微九纖應仍請照數准銷又截留招
商局海琛輪船差遣朝鮮等處每日用費銀一
百八十餘兩及二百三十餘兩不等兵部以該
船係赴朝鮮何項差遣並所運何物行令聲明
報部查該船係派赴朝鮮偵探巡哨及轉運各
兵輪餉械煤糧等件以備不虞所有行查銀二
千九百八十兩二錢六分四厘應仍請照數准

銷又第五十八款內僱泅水打凌夫每名給銀
一兩行令查明僱用幾日又烘冰柴草每百斤
價腳銀二錢行令查明價值若干運腳若干查
前項用款係因光緒十年冬間赴援朝鮮台灣
各軍由山海關乘輪前往海口冰堅舟不得進
經升任正定鎮總兵葉志超僱覓打凌夫以鑿
開冰路為度每名酌賞銀一兩並非按日而計
其所購烘水柴草即令賣戶包送價腳併計每
百斤給銀二錢較另僱挑夫為省又第八十二
八十七九十二九十八等四款內撥還上海勘

驗軍火局地亞士洋行起卸兵槍槍子砲位電
燈火藥機器等件租用起重架駁船轆轤並驗
保各雜費行令查明每項幾日及如何開支並
保險各物原價若干查前項租用洋商起重架
等件起卸槍砲各物事極繁瑣若逐項按日計
算不免多立名目稽延時日是欲求惜費而所
費轉多故遇有洋商交涉率皆責令承包將一
切費用格外從減與之彙總議定俾免另生枝
節其保險一項報部輪船水腳章程內稱貨值
千兩自滬至津收保費定銀三兩雖係以貨價

定保費寔係以保費定貨價如貨值萬金而保費祇按千金估給倘中途失事保險行家即按千金認賠其千金之貨而按萬金估給者亦然皆不以各物原價為憑如此次第八十二款內兵槍一百六十七箱計四千桿原價四萬二千餘兩槍子二千箱計二百萬粒原價三萬二千餘兩照章共應給保費銀二百二十餘兩現僅支銀一百九十餘兩係由勘驗局從少估給雖較定章有減寔與原價不符其餘各款亦復類是又第八十五款內裝運齋堂煤寄存招商局

棧抬力包袋每噸銀一錢五分七厘二毫一絲
四忽又齋堂煤並焦炭運至旅順每噸水腳銀
七錢行令查明係由何處運至招商局及旅順
各計程若干又仁川口卸運水師備用煤每噸
損運各力銀三錢八分行令查明照何例章支
給查齋堂煤寄存招商局棧即由紫竹林碼頭
抬至該局棧房其運至旅順煤炭係由天津搭
裝輪船運往并不按程核計其仁川口損運煤
噸各力係按照該處民價核給并無例章可比
又第一百一款大沽船塢由內河及大沽口沙

外運交各兵輪煤炭每噸駁費銀自一兩六分至五錢不等行令查明各計程若干查大沽船隲運往各兵輪煤噸潮汐時有長落即路程時有遠近通扯搭算其在內河運交者約四五十里出海至大沽口運交者約六七十里在大沽口沙外運交者約百餘里其運至沙外原定每噸銀一兩六分嗣於十二年間經該隲詳明核減二錢業於立案冊內詳細聲明按年照章造報所有行查銀八千三百六十五兩七厘八毫三絲一微應仍請照數准銷等情具詳前來臣

查前經戶部核覆光緒元年至六年洋員支款
案內聲稱本部核銷各項總以例章奏案為憑
惟北洋所覆各節亦係實在情形以前用款應
由該大臣自行奏明辦理當將元年至六年以
及七八兩年北洋海防報銷經部駁查各款逐
一據實登覆奏請准銷奉

旨著照所請該部知道欽此並將九十及十一十二
等年戶部駁查各款先後援案奏請准銷亦皆
仰荷

俞允茲九十及十一十二等年造歸兵部核銷各款

事同一律且均係力求樽節實用實報事多中
外交交涉並無例章可循應請

旨飭下兵部照數准銷以清案款理合恭摺覆陳伏

乞

皇上聖鑒訓示謹

奏

免停燒鍋片 八月廿日

再准部咨光緒十六年七月初五日奉

上諭御史崇齡奏災區甚廣請停燒鍋以蘇民困一
摺本年大雨成災糧價昂貴各處燒鍋耗糧甚多
誠恐有妨民食著直隸總督嚴飭各屬停止燒鍋
一年以平糧價而濟貧民等因欽此轉行一體欽
遵查禁在案茲據口北道吉順宣化府知府汪
守正稟稱宣屬十州縣並張理獨石多倫三廳
本年夏秋水調均秋收可望豐稔無一災歉
之區民間向食菽麵小米為大宗至所產苦高

糶一項味苦而盟人不能食向來專供燒酒之用燒鍋就地購取實係無妨民食該道屬統計鍋戶數百家如今停歇一年不特窮民坐失生計且恐商戶貪利私燒吏役藉端訛索為害非淺關外地方遼濶查不勝查辦不勝辦即使飭禁徒成虛文難收實效現值天津河間保定等處水災極重賑款難籌擬援照光緒十二年奏案免其停燒分別資本大小每戶酌捐數十金計可得銀二萬兩內外解津分撥濟賑於災民殊有裨益等情請奏前來臣查燒鍋之禁乾隆

年間直隸督臣孫嘉淦屢疏剴切上陳以為無益有損初謂宜於歉歲而不宜於豐年繼且奏稱身親辦理乃知是書生謬論飢饉之餘民無固志失業既衆何事不為歉歲難禁似更甚於豐年等語孫嘉淦一代名臣久任畿疆體察民情極為真切原疏具在可覆按也况口北道屬一府三廳僻在山北年穀順成並無災歉與他屬情形迥異所產苦高粱另是一種人不能食專用釀酒更與他處地產不同據該道府確切查明該屬燒鍋於民食毫無妨礙應請免其停

燒仍令按戶酌捐解津助賑以拯災黎其應納
本年課銀並令照數赴部完交不準拖欠除咨
部查照外理合附片具陳伏乞

聖鑒訓示謹

奏

驗收旅順各要工摺十一月初三日

奏為旅順大石船塢及船澳廠庫各工告竣派員
驗收恭摺仰祈

聖鑒事竊臣前於光緒七年十月驗收碰快船摺內
奏明奉天金州旅順口形勢實居北洋險要局
廠船塢各項當陸續籌款興造九年二月附片
具陳籌辦旅順各工大概範圍聲明該處工程
開山濬海工大費鉅仿照西法多與洋人交涉
絕無例案可循實難預為估定嗣於十四年十
二月附片陳明旅順船塢工程交法國人德威

尼承攬包做派按察使周馥候補道劉含芳督
同妥辦並添築攔潮石壩暨籌撥工款數目均
經蒙

恩允准在案本年秋間據報全功告竣當經遴派北
洋海軍提督丁汝昌直隸按察使周馥津海關
道劉汝翼會同前往逐細認真驗收茲據詳稱
該提督等於九月二十三日齊抵旅順包工之
德威尼因事回國現有德威尼自覓監工洋人
吉禮豐在工次開具洋文做工清單送由督辦
旅順鵬澳工程候補道劉含芳譯成華文該提

督等會同照單逐細量驗查大石船塢長四十
一丈三尺寬十二丈四尺深三丈七尺九寸八
分石階鐵梯滑道俱全塢口以鐵船橫攔為門
現在塢水吸乾平遠兵船已入塢修理全塢石
工俱用山東大塊方石壘以西洋塞門德土凝
結無縫平整堅實堪為油修鐵甲戰艦之用又
查塢外停艦大石澳東南北三面共長四百一
十丈六尺八寸西面欄潮大石壩長九十三丈
四尺形如方池渟泮蕩漾潮水落盡水深尚有
三丈四尺西北留一口門以便兵船出入四週

全砌寬大石岸由岸面平地量至澳底深三丈八尺二寸週岸泊船毫無風浪搖動凡船入隄油底之後即可出隄靠岸鑲配修整做工極為便利先是西面攔潮壩下積年稀淤有深至八九丈者各國洋監工往視均稱難以著手該洋人築造岸基時先砌鐵石圍牆下壓而於圍牆中空之處用繩汲取淤泥迨牆漸砌漸墊淤泥漸取漸出露見堅結老土然後層築灰石上復接砌圈洞再上始砌石岸此澳岸三丈八尺以下之工做工之難做法之巧實所創見洋師經

營之苦勞費之鉅亦以此段工程為最又隰邊
修船各廠九座佔地四萬八千五百方尺計鍋
爐廠機器廠吸水鍋爐廠吸水機器廠木作廠
銅匠廠鑄鐵廠打鐵廠電燈廠又隰之南岸建
大庫四座隰東建大庫一座每座佔地四千八
百七十八方尺備儲船械雜料以上廠庫各工
概用鐵樑鐵瓦以避風雪而防火燭高寬堅固
較瓦房更為合用又隰之四週聯以鐵道九
百七丈間設大小起重鐵架五座專起重大
物件以濟人力之所不及又隰與各廠庫碼

頭等處置大小電燈四十六座以便趨工夜做之用又慮近海鹹水之不便食用也遠引山泉十餘里束以鐵管埋入地中穿溪越隴屈曲而達於澳鵑之四旁使水陸將士機廠工匠便於朝夕取用不致因飲水不潔易生疫病又慮臨海遠灘之不便起卸也建丁字式大鐵碼頭一座使往來兵艦上煤運械不致停滯遇事赴機迅速其餘如修小輪船之小石鵑藏舢板之鐵棚繫船浮標鐵樁以及各廠內一應修船機器均一一設置完備以上各項均與代德威尼監

工之洋人吉禮豐開送洋人做工清單相符此
次該提督等驗收德威尼包辦工程係於本年
九月二十七日即西曆一千八百九十年十一
月初九日收工完竣自是日起限一年查照原
議由代德威尼擔保之外國銀行照料一年限
滿再行保固十年均與包工監工各洋人交代
明白此項工程原估銀一百二十五萬兩開辦
之始由北洋經費內撥過銀七萬八千零八
十兩仍需銀一百十七萬一千九百二十兩添
做攔潮石壩等工須添籌銀十四萬三千五百兩

二共需銀一百三十一萬五千四百二十兩奏
准由直隸海防展捐項下撥銀六十三萬一千
四百三十二兩八錢九分又由部庫及鄭工捐
內撥銀五十三萬九千四百九十七兩一錢二
分又撥給購買四快船餘銀六萬九千八百二
十五兩九錢一分零又由北洋經費內續撥銀
七萬四千六百六十四兩七分零以上先後共
撥給銀一百三十九萬三千五百兩統作旅順
鴨澳廠庫各項工程之用內德威尼承辦鴨澳
石泊岸等工用銀一百十五萬兩又添做攔潮

石壩自來水管鐵棚涵洞小石船塢等工用銀
二十萬八百五十兩又添購機器用銀四萬二
千六百五十兩出入兩抵儘數開銷業經旅順
工程局將歷次請領銀數與海防支應局逐款
核對均屬相符應由海防支應局將收放此項
工程各銀數開單詳請咨送海軍衙門戶部查
核至所做各工均係洋人包辦前經臣奏明與
內地做法迥異無例可循准工部咨覆有案應
由旅順工員另開工程丈尺做法機器名色件
數清單詳請分咨海軍衙門工部存案并據繪

具船塢船澳廠庫各工圖說前來臣查旅順海口居奉直東三省洋面之間口內山圍沙互東西兩澳可泊兵船多隻三省海面設有戰事策應均極便捷洵為北洋緊要門戶既有大支海軍駐紮船塢一項實係必不可緩之工自奏明籌辦以來已及十年祇因鉅款難集工程浩大其間又值海防有事未能一氣呵成幸賴海軍衙門暨戶部顧全大局撥款應手俾要工得以速歲旅順口濱臨大洋怒潮衝激風浪搜淘水底施工極難絕鑿間在外洋經營水師海口

澳各工需費動輒千百萬金與內江內河工程迥異德威尼全仿西法製造亦復幾經改作始底於成今據驗收各工均屬相符一年限內由代德威尼擔保之外國銀行照料並具保固以十年為限嗣後北洋海軍戰艦遇有損壞均可就近入鵞修理無庸借助日本香港諸石鵞洵為緩急可恃並無須糜費鉅貲從此量力籌畫逐漸擴充將見北洋海軍規模足以雄視一切渤海門戶深固不搖其裨益於海防大局誠非淺鮮此項工程僅與洋匠包辦全用洋法並無

例案可循請免造冊報銷除俟將工程丈尺做法清單暨用過銀數隨後分咨海軍衙門戶工兩部存查外謹將鴉澳各工圖說咨送軍機處備呈

御覽并咨各衙門查照所有旅順口船塢船澳廠庫各工完竣驗收緣由理合恭摺具陳伏乞

皇上聖覽訓示謹

奏

李金鏞請卹摺十一月十六日

奏為辦理漠河邊礦道員積勞病故懇

恩優卹恭摺仰祈

聖覽事竊三品銜吉林補用道李金鏞經臣遵

旨奏派辦理黑龍江漠河金礦事務自光緒十三年

五月由墨爾根入山勘道至十四年十二月在

漠河設廠開工前後出金幾及四萬兩礦務日

有起色前據該道稟稱本年夏間時患怔忡氣

逆咳血頭暈夜不成寐猶能力疾治事七月以

後日難支持醫言積寒已深用心過度乞假靜

養暫委該局提調候選知縣袁大化代理廠務
旋接電報該道於九月初四日在差次病故茲
據袁大化等稟請具奏前來臣查李金鏞江蘇
無錫縣人同治元年由候選同知投効臣軍隨
同克復常州無錫宜興各府縣城九年經前大
學士左宗棠派辦興安甘捐並轉運軍械糧餉
光緒二年徐海一帶奇旱官賑不能徧及該道
首倡義賑南紳聞風競起三年四年直東晉豫
大饑諸紳分道往賑該故道經辦山東之青州
武定兩府直隸之天津河間冀州等處集資數

十萬活民數十萬自是東南義販接踵而興十
餘年來徧及各省論者咸謂該道徐海一役實
開風氣之先六年派修直隸西淀之千里長隄
工堅費省旋經前督辦吉林防務吳大澂奏調
出關勘定奉吉兩界圍荒查出琿春間荒四十
八處招集流民墾種遷回界外蘇城溝越墾華
民數千戶勘定黑頂子被俄人侵佔舊地畫清
黑龍江東岸精奇里河四十八旗屯被侵界址
其署吉林府任內嚴禁林兌以整錢法攤丁於
地以蘇民困署長春廳任內裁革陋規清理積

訟自捐廉俸建書院立善堂其最得民心者尤
在清查廓爾羅斯公地詳經調任吉林將軍希
元奏明永遠免丈加租一案至今關東稱循吏
者競稱高李高謂該故道及前署昌圖知府高
同善也速漠河之議辦金礦也該處三面陡入
俄界又以產金久為俄人覬覦屢招游匪潛入
開挖頻年派兵驅除茅藥未靖疊經出使大臣
劉瑞芬黑龍江將軍恭鏜奏請開辦礦務以絕
窺伺之萌仰蒙

寄諭垂詢飭臣選幹員前往籌辦地居絕徼集資匪

易得人尤難當以該員李金鏞熟習邊情且於南中紳商信義久著奏明派令招集股分前往開辦該道亦以事關重大概然自任不敢辭避遂勘道入山裏糧露宿披榛伐木皆自古行迹所未經歷四十餘日經千九百里始達漠河漠河向無人煙建置之難則平地亦立購運之費則千里孤懸往來轉解皆必由俄境催俄船需費浩大口舌百端兩年以來規模粗具十五年出金一萬九千餘兩本年正月至八月出金一萬八千餘兩取金之洞夏則盛漲冬則層冰絕

深鑿堅備形艱險其初礦丁不耐工作旋集旋
逃駕馭招徠殫盡心力現招回流民二三千人
悉恃礦務以為生計調練防勇藉壯聲威以前
日之絕域窮荒自經營金礦以來商販漸興兵
民相習氣象迥非昔比邊外空虛之地得此措
撐其間隱收實邊興利之益方謂經理得人遂
漸開拓有裨時局該道竟以積勞致疾遽隕其
生前此奏調漠河差委之同知姚嶽松知州劉
域林等先後病歿差次皆患怔忡咯血病狀畧
同蓋其地瘴癘毒惡凝寒中人而經辦事件又

極勞瘁險阻也李金鏞氣體素健自到廠後始
有脾洩心悸等症經年隨從員役相繼死亡終
無退悔歿後接其病中稟牘區畫各事詳盡如
常歎其忠懇之忱臨危不改卒以身殉深可痛
傷伏查李金鏞從戎服官並有功績生平遇有
義舉無不踴躍爭為即如天津之廣仁堂上海
之撫卹局並其一手創辦利賴至今而江北直
東之救災吉林長春之治行尤彰彰在人耳目
卓然可傳出關十年周閱三省懋辦墾荒勘界
並有益於邊務民生而漠河一役力任艱難漸

著成效勦久屯之規畫杜強敵之侵陵尤屬中外大局所關默數邊才彌堪惋惜合無籲懇

天恩勅部將已故三品銜吉林補用道李金鏞照軍營立功後積勞病故例從優議卹並將事蹟

宣付史館仍准在無錫縣原籍自行建祠以為絕域勤事者勸除將履歷事實清冊咨部外所有辦理邊礦道員積勞病故緣由理合會同黑龍江將軍臣依克唐阿恭摺具陳伏乞

皇上聖覽訓示謹

奏

覆奏直隸水田難成摺十二月初二日

奏為遵

旨體察直隸地勢分水漑田不能消除水患且多窒礙難行恭摺覆陳仰祈

聖覽事竊臣承准軍機大臣字寄光緒十六年八月二十二日奉

上諭給事中洪良品奏直隸頻歲水災請籌疏濬以興水利一摺據稱疏濬不可緩者有六似難而實易者有三行之大利者十有一所當豫計者有五請飭集議興辦等語所陳各條是否可行著李鴻

章體察情形妥籌具奏等因欽此遵即轉飭辦理
永定河工臬司周馥候補道吳廷斌會同籌賑
局司道等體察情形妥細籌議茲據該司道等
核議詳覆前來臣查核原奏該給事中請修水
利大致以開溝渠營稻田為急疏中所稱不可
緩者六似難而實易者三行之大利者十有一
累累數千言反覆推闡無非極言未辦之害已
辦之利及當今易辦之勢如果直隸溝渠可以
盡開稻田可以盡營自不難收此十一大利惟
查以上各條大都沿襲舊聞信為確論而於古

今地勢之異致南北天時之異宜尚未深考其所陳利害今姑勿論僅就原奏所當豫籌者五條詳加籌度五條之中尤以審地勢一條為主腦而籌經費選賢才持定見策工作皆其後焉者也考古冀州跨有今直豫晉三省之地唐虞夏商建都三面環河昔之黃河由河間天津入海以地勢揆之南北泊即禹貢大陸澤久已淤為沃衍東西淀即宋時塘灤為遼宋所分界今已半成沮洳任邱縣境內之鄭州鎮為古州治今則形如釜底天津之三汊河為宋時黃河入

海之口今海口遠在大沽代遠年湮滄桑變易
高原或成陂澤窪下強半填淤殆非人力所能
為夫以太原左轉西北萬峯矗天伏秋大雨口
外數千里千溪萬派之水奔騰而下畿南一帶
地平土疏頃刻輒漲數尺或一二丈衝蕩泛溢
勢所必然

聖祖仁皇帝慮清濁合流之不可制也乃築千里隄格
淀隄使淀與子牙河各行一路

世宗憲皇帝慮永定河南行之淤淀也令引渾河別由
一道改移下口其餘官隄民隄今昔增築總計

不下三四千里沙土雜半險工林立每當伏秋
盛漲兵民日夜防守甚於防寇豈有放水灌入
平地之理今若語沿河居民以開渠引水無不
錯愕駭怪者顧謂民志易從勢順易理耶且水
田之制不獨地勢難行即天時亦南北迥異春
夏之交布秧宜雨而直隸彼時則苦雨少水涸
今滄陽各河出山之處土人頗知鑿渠藝稻節
屆芒種上游分水入渠則下游舟行苦淺屢起
訟端東西淀左近窪地鄉民亦散布稻種私計
早年一獲每當伏秋漲發輒遭漂沒此實限於

天時斷非人力所能補救者也宋何承規元郭
守敬虞集明汪應蛟徐貞明董應舉左光斗諸
人皆謂直隸可營水田言之鑿鑿宋元事遠難
以取證今以明代已行之事考之徐貞明僅營
田三百九十餘頃汪應蛟僅營田五十頃董應
舉營田最多亦僅一千八百餘頃然皆黍粟並
收並不盡種水稻且其意在墾荒殖穀並非藉
以消滅全境水患今訪其遺跡所營之田非導
山泉即傍海潮絕不引大河無節制之水以資
灌溉安能藉減河水之患又安能廣營多穫以

抵南漕之入後人拘守陳編遂謂當日諸人未
能久任以竟厥功其亦弗思甚矣雍正五年怡
賢親王大學士朱軾興修直隸水利四年之間
營治稻田六千餘頃然不旋踵而其利頓減九
年大學士朱軾河道總督劉於義即將距水較
遠地勢稍高之田聽民隨便種植乾隆九年大
學士高斌吏部尚書劉於義復加相度專於河
道施工奏明營田應順民情只酌借井陘等縣
民人工本銀數千兩是營田並未能加多也當
雍正乾隆年間

聖明裁斷於上羣臣奔走於下帑項充足賞罰風行其規模迥非前代可比而收效祇有此數可見直隸水田之不能盡營而踵行擴充之甚不易也

恭讀乾隆十二年四月二十八日

上諭直隸水利關係甚重是以

皇考特命怡賢親王及大學士朱軾等督修欲營水田以備不虞後以南北地利異宜難臻績效等因欽此
又恭讀乾隆二十七年十一月

上諭范時紀摺奏京南霸州文安等處地勢低窪易致淹浸請設法疏通添築隄埝改為水田一事此不過

偶以近來一二年間雨水稍多竟似此等地畝素成積潦之區殊不知現在情形乃北省所偶遇設過冬春之交晴霽日久便成陸壤蓋物土宜者南北燥溼不能不從其性即如附近昆明湖一帶地方試種稻田水泉最為便利而蓄洩旺減不時灌溉已難遍及倘將窪地盡令改作秧田當雨水過多即可藉以潄用而雨澤一歉又將何以救旱從前近京議修水利營田未嘗不再三經畫始終未獲實濟可見地利不能強同亦其明驗等因欽此仰見

聖明洞燭利病考究精詳

謨訓昭垂允宜遵守後世臣民可毋庸輕議更張矣即如天津地方康熙年間總兵藍理在天津城南墾水田二百餘頃不久被河水淤廢咸豐九年親王僧格林沁督師海口在鹹水沽等處墾水田四十餘頃嗣以旱澇不時迄未能一律種稻而所費工本已屬不貲光緒初年臣以海防緊要不可不講求屯政曾飭前湖南提督周盛傳在天津東南鄉開挖引河墾水田一千三百餘頃用淮勇民夫數萬人經營六七年之久始獲成熟此在潮汐可恃之地役南方習農之人尚

且勞費若此若於腹地五大河經流多分支派
穿穴隄防濬溝遂於平原易黍粟以杭稻水不
應時土非澤埴竊恐欲富民而適以擾民欲減
水患而適以增水患也至原奏籌經費條內謂
請添百餘萬金再移工賑百十萬金以為水利
開基後復分年籌費限以十年竣事查本年水
災仰蒙

皇恩優渥先後所發順直銀米皆係辦賑要需災黎
待哺嗷嗷何能奪貧民口食移以辦此且被災
饑民老幼婦弱居多豈能概令工作以代賑撫

直隸庫儲極絀供億浩繁亦斷難歲籌鉅款議
辦營田諸事又原奏策工作條內請以西洋濬
河機器施之永定各河又請於伏秋汛後挑切
淤灘又請於海口多開引河以暢去路查此三
事固人力所能行者西洋挖河機器船陸續共
購三隻一在大沽口外遭風沈溺一已報發現
僅存一隻頻年在東淀挖泥培隄水深隄寬頗
有效驗但購船養船之費為數過鉅實無餘力
多置永定河則挾沙帶泥來去靡定自來不通
舟楫機器船無從駛入且灘寬隄遠所挖之泥

不能送堆於岸仍屬無益伏秋汛後挑切淤灘
原為去河內頂衝之險今欲以裁灘多少為河
員殿最大抵河員不患工多只患無工可辦此
項經費浩大祇能相機酌籌未便另請添款海
口多開引河議者頗多然必審酌地勢之宜蓋
減水分溜須於上游另開一途入海方於全局
有裨查直隸五大河惟南北兩運距海稍近各
有減河南運減河在山東境者有四女寺哨馬
營兩處在直隸境者有捷地興濟兩處自道光
咸豐以來各減河皆就淤廢是以全河之水悉

注天津三汊口其捷地興濟舊河久成平陸屢
議勘辦輒以工大費鉅而止光緒六年臣飭前
湖南提督周盛傳墾闢水田自靜海縣之靳官
屯運河東岸至興農鎮開挖減河一道直接該
軍營田之河分洩盛漲入海十三年臣又會同
山東撫臣張曜派員挑挖四女寺減河宣洩南
運河盛漲稍著成效北運減河有王家務筐兒
港二處又於天津之霍家嘴挑挖減河一道添
設滾水石埧分溜甚暢同治十三年曾於天津
城東開濬陳家溝減河一道名曰金鐘河分由

北塘歸海亦減海河正溜十分之三本年復調
淮練各軍重加修治此外實無可再議分減之
處臣兼任河防但能有裨民生曷敢稍執成見
溯自同治十年以後直隸屢被水災修培隄岸
疏濬支流幾於無河不隄無工不辦深知部庫
艱絀不敢多請賴各省官紳商民時相解推集
腋遠助厯查成案直隸治河之勤勸捐之多未
有若近歲者在尋常漲發之年無不獲保安瀾
觀安州雄縣文安大城天津靜海各低區有向
來棄為汙萊斥鹵者皆播種殆徧絕少曠土雖

不能盡墾水田亦可謂地無遺利矣今夏靈雨
決旬異常大漲為百十年所未有河身不能容
納隄岸遂多漫溢甚至隄外窪地滲水亦積深
數尺此誠困於天時地勢之無可如何非盡由
人謀之不臧也地方官吏惟有意圖塞決多方
疏消以冀河流早日順軌農民復業即小民所
亟亟籲求者亦莫不以此為急現在各河漫口
臣已督飭各該管河道分別一律堵合惟兩水
夾隄難於取土明春尚須加高培厚以資保障
此外各大河正隄及各減河分支擬俟來春派

員分別查勘應修築者修築應疏濬者疏濬統
視力量之所及籌款設法補救以期仰副

宵旰焦勞之至意至於開墾水田祇可因地制宜量
為勸辦以收一隅之益斷難全力大舉貪迂遠
無成之功該給事中所陳各條詳加體察實屬
窒礙難行應請無庸置議理合據實覆陳伏祈

皇上聖覽訓示謹

奏

酌議土藥稅釐摺 十二月十七日

奏為查明直隸裁種土藥情形酌議徵收稅釐恭摺覆陳仰祈

聖覽事竊臣欽奉光緒十六年四月十五日

上諭總理各國事務衙門戶部奏整頓土藥稅釐請飭詳查妥辦一摺內地裁種土藥為中國出產大宗果能設法稽徵認真辦理既可裨益餉需且亦收回利權之一助並可以徵為禁隱寓崇本抑末之意近聞吉林黑龍江呼蘭熱河及四川雲南江南淮徐等處土藥出產日繁各該省局卡徵收稅

項官吏隱匿入已為數甚鉅弊端百出以致徵多報少於國課毫無裨益若不及時整頓於洋藥併徵辦法大有關礙稅數必將日絀何以昭核實而裕餉源著各直省督撫詳察地方情形或於出產之處就地徵收或於販運過境嚴查走漏務當破除情面實力稽核將原定新定各辦法迅速覆奏等因欽此當經飭令藩司裕長臬司周馥會同津海關道劉汝翼詳查案卷體察情形切實籌議茲據該司道核議詳覆前來臣查土藥稅釐按畝徵收似有實際然流弊孔多今先舉其不

便之處直境所種罌粟零星無多固由沙瘠不
宜亦因蔣藝不甚得法凡沃土近水有種數畝
數十畝者餘或半畝數分或種於園邊屋角或
今種此區明年改種彼區或一區之中與他物
雜植村村不同年年不同必欲一一查明無遺
無濫勢所不能且利之所在人思避就脫漏影
射伎倆百出雖竭有司之智力無以勝之是難
於稽查其不便者一種植既屬無多而收成豐
儉不同因災緩免又每年不一凡種罌粟之地
大半鄉僻不近大道官若不能處處踏勘勢必

假手吏役則索詐之禍滋若聽民自報報而不實者罪之則告訐之風起是易於擾累其不便者二出於貨者曰稅出於地者曰賦貨徵於商賦徵於農徵於商者以貨之權量計徵於農者以地之頃畝計今所徵者明明稅也苟不徵於貨而徵於地不以貨之權量計而以地之頃畝計民必驚為加賦官必畏其考成是名實不符難以持久其不便者三即如蠡縣臺城光緒十二年擬辦按畝收捐該處民人稱曰煙糧恐成永額紛紛阻撓靈壽縣前擬按畝收捐縣民聚

衆抗違總未辦有成效並聞山西州縣曾因按畝收捐幾釀重案是以山西現在專辦釐捐不辦畝捐此畝稅一事實屬窒礙難行也查總理衙門原奏及欽奉

諭旨皆云或於出產之處就地徵收或於販運過境嚴查是漏所謂就地者即總稅務司申呈內之落地稅所謂過境者即總稅務司申呈內之稅釐俱指按貨徵收而言今惟有就地徵收落地稅及過境徵收稅釐兩法博採衆論統籌全局尚屬可行竊惟土藥徵稅本為

國家不得已之舉伏讀

諭旨原奏於崇本抑末諄諄垂戒自當仰體

朝廷內顧邦本之至意首以不擾民生為主稅課之贏絀猶其次也欲不擾民必須輕稅蓋貨之稅輕者走私之利亦輕稅重者走私之利亦重故稅輕則民重犯法而偷漏少稅重則民輕犯法而偷漏多偷漏少則法可寬偷漏多則法必嚴法寬則不擾民法嚴則擾民自然之理也然光緒十一年與英國所定洋藥稅釐併徵專條有中國應許此等貨色在行銷洋藥地方開折

者如有應納稅捐等項或當時或日後不得較
土煙所納稅捐格外加增之議今土藥定稅若
輕於洋藥恐彼將藉為口實則土藥稅捐又有
不得不與洋藥相等之勢查總稅務司赫德申
呈總理衙門條陳內稱洋藥在印度每百斤先
須完稅約二百五十兩運赴中國復徵稅釐一
百十兩等語故彼欲將土藥比照洋藥在印度
出口之例先收落地稅一百十兩又比照洋藥
在中國進口之例再收關稅釐捐一百十兩是
每土藥百斤應完二百二十兩矣殊不知洋藥

在印度所完與中國所完乃兩國之稅中國土藥並不運至外國而於中國兩次重複徵收是視一國如兩國而與專條內行銷洋藥地方所納稅捐字樣不合故土藥稅捐額數但須與洋藥在中國進口所完稅釐數目無所軒輊即與條約不背惟查各省土藥價值每百觔自一百餘兩至三百餘兩不等貨之高下懸殊價之低昂各異若不論價低昂而一例按其觔數比照洋藥收稅未免偏枯必須估價定稅方為公允現在洋藥每百斤售價自三百八九十兩至四

百八九十兩不等折中約四百四五十兩以稅
釐一百十兩核之約計每價百兩徵稅釐二十
四五兩之數擬請將土藥亦按價每百兩共徵
稅釐二十四兩惟洋藥祇有關稅釐捐兩項無
落地稅土藥則當分為落地稅八兩關稅八兩
釐捐八兩合計共二十四兩如此則與洋藥稅
釐額數銖兩悉稱無畸輕畸重之處可免滋生
異議而落地稅關稅釐捐三項俱全分次徵收
係屬土貨辦法與總稅務司原議亦相脗合至
於稽徵之法則與洋藥情形又不相同洋藥先

至海關後分運於內地必併徵而後稽察易周
土藥先散出於內地後過關卡必分徵而後商
力易舉各州縣出產土藥之地散漫難稽不比
洋藥進口非報海關不能起岸自非稅則稍輕
使走私無甚大利斷不能免繞越偷漏之弊而
條約所限又不能輕於洋藥惟有將落地稅釐
捐關稅分作三次徵收則每次皆止值百抽八
雖未減輕而不覺其重若能認真稽收一無擾
累商民各顧身家似尚不致行險徼倖難於防
範細查直省各州縣之種罌粟畝數甚少與川

滇及東三省情形不同其自種自食者難以計數外如甯河豐潤灤州藁城蠡縣及大名順德所屬州縣間有種者皆有商販於四五月間買漿曬土而農民彼時收漿亦必隨時變賣毫不停留向有經紀在市為之評價官不過問絕無官吏私收稅捐隱匿入己之事今擬請將土藥落地稅責成各州縣辦理飭令種藥各州縣各募充土藥官牙一名或數名設立土藥集市一處或數處凡買土藥皆於集市交易由官牙過秤評價按價每百抽八完納落地稅給與落地

稅印花粘貼其官牙許照各項牙行常例按三分抽用稅出於買主用出於賣主私相交易者查拏罰辦粘有落地稅印花之貨運至別州縣不再徵落地稅運過釐卡再按價每百抽八完納釐捐粘貼釐局印花粘有釐局印花之貨運至別處釐卡不再徵釐運至稅關再按價每百抽八完納關稅粘貼關稅印花迨三次納畢無論運至何省何處不再重徵無印花者即為私貨照章罰辦並照總稅務司所擬省城設立土藥關之議於省城設立土藥總局遴派委員專

司其事關稅印花即用監督關防釐捐印花即用釐局關防惟落地稅印花若用各州縣印信不能畫一且恐州縣徵多報少無可稽考應專刊稽徵土藥落地稅木質關防一顆存於總局並刊騎縫印花板式鈐用關防分發各州縣應用各州縣領回加蓋本州縣印信按包粘貼截根繳回備查各州縣准於所收落地稅內酌提一成作為經費不准額外需索絲毫總局費用於所收稅項內作正開銷至多亦不得逾一成之數如此則於條約無違於民生無擾似屬兩

得當此試辦之初雖每年可收釐稅若干不能
預計成數而以各州縣所收牲畜花布等稅辦
法比較似落地稅一節不致毫無把握且立法
簡易便於商民果能認真經理自可日有起色
至完落地稅之後應准其隨地銷售過關過卡
能否如完落地稅之數則不可知惟有嚴查走
漏明定罰章以杜弊端而裕稅課所有酌議直
隸徵收土藥釐稅緣由理合恭摺覆陳伏乞

皇上聖覽訓示謹

奏

出洋巡閱摺 光緒十七年四月十五日

奏為定期出洋會閱海軍並查勘各處臺隄工程
恭摺仰祈

聖鑒事竊准海軍衙門咨開光緒十七年二月十六
日具奏請

派大臣出海會校北洋合操一摺十七日奉

旨現屆校閱海軍之期著派李鴻章張曜認真會校
欽此恭錄知照到臣伏查北洋海軍自成軍後
已屆三年其堪備戰陣各船計前購之鎮遠定
遠濟遠三鐵艦致遠靖遠來遠四快船合

之舊有超勇揚威快船鎮中鎮邊等礮船及練
船雷艇等共大小二十餘艘為中國創立海軍
之始北洋海軍提督丁汝昌每年春夏秋三季
督帶各船在沿海往來操巡周歷奉天直隸山
東朝鮮各洋面東北至於倭俄各島冬令駛往
南洋巡閱江浙閩廣沿海各要隘西南至於英
荷屬埠終歲勤動弗稍休息藉以涉歷風濤練
習陣技勞苦可云至矣其防守各海口勇營操
練臺礮水雷等藝並築造臺壘鴈澳鉅工手胼
足胝寒暑無間風濕瘴癘動致疾疫亦殊可念

至各處船塢機器局製造船艇器械水雷電燈
大小槍礮應用子藥架具均仿西洋新式冀其
日進精強海軍衙門定章每屆三年奏請

欽派大臣會同出海校閱嚴明賞罰示以勸懲且使
歷年工操情事無不

上聞益知激勵奮興而不敢稍涉疏懈用意極為深
遠現屆第一次校閱之年欽奉

諭旨認真會校遵即咨商山東撫臣張曜約定日期
馳赴煙臺臣趕將地方春撫事宜及各河工程
分飭辦理就緒定於四月十六日率同水陸營

務處直隸臬司周馥津海關道劉汝翼等由大
沽乘輪船放洋徑往旅順先經飭知海軍提督
丁汝昌調集各船並派船至煙臺迎候張曜渡
海至旅順口會看船陽礮臺等工校閱毅軍親
慶各營陸操隨赴大連灣洋面會齊各兵船演
陣打靶並調南洋六船隨同操演旋登陸閱看
銘軍新築礮臺再渡海至威海衛閱看綏鞏等
軍新築礮臺並查勘各處一切布置工程事竣
即赴膠州澳察看形勢竊維旅順威海兩處並
為北洋屯泊水師口岸旅順綰轂渤海辦防最

先十餘年來逐漸經畫已成重鎮近日船塢造成尤為海軍歸宿根本大連灣威海衛則自光緒十三年始創議分設礮臺移軍填紮現臺工將竣而訂購西洋大礮係逐年分批購運尚未到齊至膠州地居南北洋之中為北來第一重深水船澳自應設防屯守以期周密惟目前限於經費無可籌撥擬俟威大兩處措置完密騰出餉力會商張曜次第經營此次就便前往詳細相度以為將來舉辦之地約計周歷各口往返須至兩旬所有津署日行事件檄委長蘆鹽

運使季邦楨代折代行其緊要公事仍封遞臣
巡次核辦所有定期出洋會閱海軍各緣由理
合恭摺由驛具

奏伏乞

皇上聖鑒謹

奏

巡閱海軍竣事摺五月初四日

臣李鴻章
張曜跪

奏為會同校閱海軍並查勘各海口臺隄工程事
竣恭摺覆陳仰祈

聖鑒事竊北洋海軍自光緒十四年成軍以後現屆
三年係第一次校閱之期特蒙

簡派臣鴻章臣曜認真會校當將起程日期先後各
奏明在案臣鴻章即於四月十六日率同水陸
營務處直隸臬司周馥津海關道劉汝翼等由
大沽乘輪出海北洋海軍提督丁汝昌統率所
部定遠鎮遠濟遠致遠靖遠經遠來遠超勇揚

威平遠康濟威遠廣甲各艦及南洋統領前壽
春鎮總兵郭寶昌所帶之寰泰南琛開濟鏡清
南瑞保民六艘隨同放洋十七日駛抵旅順臣
曜先期行抵煙臺亦於是日渡海會齊十八日
校閱四川提督宋慶所部毅軍八營演習德國
陸操日臻純熟步武槍法一律整齊旋閱記名
提督黃仕林總兵張光前所部親慶六營兼習
英德操法亦稱精練各軍演放槍礮有準十九
日查看新建大石船塢全塢皆用大塊條石壘
以外洋塞們德土鵞外大石澳周圍泊岸俱用

條石壘砌西面攔潮壩與南面泊岸相連並極
堅固隄傍設機器廠庫十四座大小電燈四十
六座建鐵碼頭造大鐵道通連廠庫以便起卸
轉運料物澳東建小石船隄以便修理雷艇礮
船其工程之艱鉅布置之詳密臣鴻章前於工
竣驗收摺內已縷悉陳明今復逐加履勘工段
做法一一符合新授安肅道劉含芳擬定善後
章程均極周妥此後北洋各艦隨時入隄修理
無須遠借異國洵為一勞永逸之計連日閱看
東西兩岸各礮臺其工程形勢十二年四月間

醇賢親王於巡閱北洋摺內曾經奏明歷經培修益增完固礮勇打靶亦能中的兩岸後路水陸師子藥各庫累年儲備頗極精詳旋派員考核魚雷水雷兩學堂該學堂為雷學根本各口皆取資於此肄業各生多穎異勤謹之士弁兵等耳濡目染條對無遺尋在西岸試放水雷海水激立數十丈足稱守口利器二十一日開赴大連灣北洋各艦沿途分行布陣奇正相生進止有節夜以魚雷六艇試演泰西襲營陣法兵艦整備禦敵攻守並極靈捷頗具西法之妙次日駛

往三山島調集各艦魚貫打靶能於駛行之際
命中及遠旋以三鐵艦四快船六雷艇演放魚
雷均能中靶南洋各艦隨同布陣打靶亦尚可
觀連日察看河北鎮總兵劉盛休所部銘軍新
築和尚島老龍頭黃山徐家山各處礮臺六座
仿照外洋新式曲折堅固後面兵房子藥庫純
用條石砌成前牆厚培素土寬至十數丈足禦
敵彈老龍頭一座犇山拓地以作臺基用力尤
鉅二十五日開赴威海衛閱看候選道戴宗騫
所部綏鞏軍新築南北兩岸各礮臺於原估北

岸之北山嘴祭祀臺兩處外添築黃泥巖礮臺一座以便居中策應又於南岸龍廟嘴鹿角嘴兩處外添築趙北口大礮臺一座以便向外迎擊均得形勢做法堅固足與大連灣各臺相埒劉公島橫據口門勢甚扼要副將張文宣所帶護軍於島北新築地阱礮臺鑿山通穴夾層隧道安設二十四生特後膛礮機器升降靈速非常能狙擊敵船而礮身蟄藏不受攻擊為西國最新之式又於劉公島西接連黃島上設礮臺一座跨海通道工力尤艱島南相距七里之日

島矗立水中亦設地阱礮臺與南岸趙北嘴礮臺相為犄角鎖鑰極為謹嚴臣等詳察大連灣威海衛布置情形地勢臺工均甚得力惟訂購礮位尚未到齊後路營庫各工仍須隨時添設當飭劉盛休戴宗籌督率營勇加意工作期臻完善劉公島為水師各艦寄旋上煤之所道員龔照璣創造大鐵碼頭用厚鐵板釘成方柱徑四五尺長五六丈中灌塞們德土凝結如石直入海底較之各處所設鐵碼頭工程尤鉅調閱綏華八營陸操兼看洋槍打靶中至九成以上

旋派員考較劉公島水師學堂學生等日習風
濤筋力堅定於幾何算學頗能默會貫通嗣調
集各兵艦小隊登岸操演陸路槍礮陣法精嚴
快利旋轉如風為各處洋操之冠旋令威遠敏
捷廣甲操使風帆一律便捷是夜合操水師全
軍萬礮齊發無稍參差西人縱觀亦皆稱羨二
十九日開赴膠州次日由黑水洋抵澳詳閱形
勢輪船進口係向西行青島在北陳家島在南
相距六里既進口轉向北行坦島在東黃島在
西相距七里澳內周圍百餘里可泊大隊兵艦

口門係屬灣形從東至北環山蔽海形勝天成
實為旅順威海以南一大要隘臣等籌商辦法
已於另片具陳五月初一日臣曜即於膠州登
陸取道青州回省臣鴻章仍由海道於初二日
北駛煙臺調閱漢中鎮總兵孫金彪所部嵩武
軍四營陸操整齊靈變陣法純熟可稱勁旅初
三日駛回大沽察看南北兩岸礮臺並校閱暑
大沽協副將羅榮光記名總兵劉祺副將史濟
源所帶各營即由輪車馳抵天津此行往返十
有八日周歷海道三千餘里惟煙臺至大沽途

次午後驟遇颶風直至中夜船身傾側進水危
險殊常幸獲無恙此外所至俱值天氣清明得
以逐一履勘尅期竣事水陸將弁胼胝力作亦
能各盡所長伏念中國創辦海軍實惟

醇賢親王注意經營之舉臣鴻章前此隨同巡閱北
洋各口曾蒙將布置情節於覆

命疏內詳細

上聞而於陸軍之不可輕裁船艇之尚須添置學堂之
必應推廣尤三致意洵為遠慮深謀其時英德
四快船訂購未到大連灣威海衛亦未辦防今

則兩處臺壘粗成移軍填紮北洋兵艦合計二十餘艘海軍一支規模畧具將領頻年訓練遠涉重洋並能衽席風濤熟精技藝陸路各軍勤苦工操歷久不懈新築臺壘鑿山填海興作萬難悉資兵力旅順威海添設學堂諸生造詣多有成就各局仿造西洋棉花藥栗色藥後膛礮連珠礮各種大小子彈計數各艦操習之需實為前此中國所未有綜核海軍戰備尚能日異月新目前限於餉力未能擴充但就渤海門戶而論已有深固不搖之勢臣等忝膺疆寄共佐

海軍臣鴻章職任北洋尤責無旁貸自經此次
校閱之後惟當益加申做以期日進精強庶無
負

醇賢親王歷年締造之苦心仰副

聖明慎重海防建威銷萌力圖自強之至意海軍各
員弁頻年勤苦不無微勞容臣等查明按照海
軍衙門奏定章程擇尤分別保獎以昭激勸所
有會校海軍及查看各口臺塢工程緣由謹合
詞恭摺由驛具陳伏乞

皇上聖鑒訓示謹

奏

奏

奏

奏

1714

1714

--	--	--	--	--	--	--	--	--	--

115

115

郭嵩燾請付史館摺七月二十二日

奏為已故大員學行政績卓然可傳據實臚陳懇
恩宣付史館恭摺仰祈

聖鑒事據湖南在籍紳士前國子監祭酒王先謙前
貴州思南府知府周開銘前甘肅甯夏府知府
黃自元員外郎曾廣鎔等聯名呈稱原任兵部
左侍郎郭嵩燾由道光二十七年進士改庶吉
士丁憂回籍咸豐初粵匪犯湖南以守城功議
敘並

命在籍幫辦團練時故大學士曾國藩守制家居奉

命辦理湖南團練遲回未出該侍郎馳至其家陳說大義國藩感動始起視師方經費奇絀該侍郎親行各州縣勸捐集餉創議舉辦通省鹽釐捐局手定章程旋帶湘勇援前安徽巡撫江忠源於南昌解圍後奉

旨授職編修在江西守城日為江忠源言賊踞江路宜製造戰船以備攻勦忠源韙其議屬為草奏得旨允行其後曾國藩等卒用水師成肅清江面之功七年回京當差八年入直

南書房九年隨親王僧格林沁赴天津辦防敘功

賞戴花翎旋

派赴山東查辦稅務十年假歸同治元年

特授蘇松糧儲道旋遭兩淮鹽運使時運庫存銀不及
四萬欠解江南糧臺及安徽協餉甚鉅到任後
詳請各營配鹽必由運司掣驗提督李世忠擁
重兵行私鹽莫敢詰問至是緝獲並沒其船鹽
運大暢在任一月欠餉全清續運銀米以濟皖
軍而江南大營支運營鹽隨時應付移交後存
銀尚二十餘萬其綜理精密如此旋

賞三品頂戴署理廣東巡撫粵中盜船林立師船乏餉

與盜相比該侍郎仿造三板戰船守東江口之石龍攻破盜村次及北江西江盡斂其船歸官歲省餉需十數萬粵釐設卡多弊歲入不過七十萬自裁汰歸併歲增至百四十餘萬又別立籌餉庫以儲捐罰各款兩歲亦積至二百餘萬此皆實政可紀者五年開缺回籍十三年

特召赴京光緒元年補福建按察使內遷兵部左侍郎在總理各國事務衙門行走二年充出使英法
國大臣遣使之初人皆視為畏途

朝命特以充選在西洋三年考究利病知無不言英

國於南洋開闢新嘉坡一島閩廣人流寓貿易
工作者不啻十萬悉受制於英官該侍郎據約
力爭於英外部乃設中國領事官英埠設華官
自此始自是華人得官保護遇事不至見陵其
品望最為西人敬服去任後猶稱頌弗衰差旋
抵滬猝染重病陳情乞休時以不能趨叩

闕廷為憾每遇交涉艱危旁皇形色嘗言冀多得
通知中外事體之人轉相開諭他日或收其用
其秉性忠誠繫懷時局如此生平廉潔自矢任
運司時裁汰規費出使三年開報公款僅薪水

房租兩事其他皆自支銷歸後家無餘貲惟以書院脩脯自給文章學問為後進所宗生平纂述甚富所著禮記質疑四十九卷業已成書體大思精為海內通儒推重茲於本年六月十三日在籍病歿除由湖南撫院奏報外以臣於該侍郎事蹟知之最悉懇請奏乞

恩施專差航海呈遞前來臣查已故侍郎郭嵩燾早從軍旅游歷封圻晚使絕國行能功績久在聖明洞鑒之中臣早歲即與相識其後同官京曹同在兵間及至江蘇又與共事逮該侍郎充出使

大臣與北洋交涉尤繁故其志行知之獨詳實
有不容泯沒者曾國藩初以憂歸屢奉

詔旨敦促該侍郎以事關大局不容預計利鈍手書面
請至再至三曾國藩感其至誠後每與臣言未
嘗不歎其篤摯悱惻能任事也左宗棠初中危
獄以該侍郎之力得全遂至顯用戡定以來論
武勲者盛稱曾國藩左宗棠而二臣之起則該
侍郎實推挽之至創釐捐以濟師練戰船以剿
賊尤為兵餉大政所係皆事成而不居其功當
時將帥爭欲得以為重自以侍臣乞退出處宜

嚴雖於胡林翼之書招李續宜之奏調並辭不
赴及臣治軍東下求賢於曾國藩專疏薦達蒙
恩特授蘇松糧道該侍郎始起赴官甫及一年超署廣
東巡撫時當廣東吏治軍務釐務積敝之後該
侍郎感激

知遇自矢澄清履任之初更置將吏百城肅然歲籌餉
項贏百餘萬而商民不知擾累尤為人所難能
生平於洋務最為究心所論利害皆洞入精微
事後無不徵驗前後條列各件外廷多不盡知
病歸後每與臣書言及中外交涉各端反復周

詳深慮長言若憂在己迄今展開敬其忠愛之
誠老而彌篤且深歎不竟其用為可惜也該侍
郎初官翰林即以文章負天下重望於學無所
不通而尤善言禮曾國藩嘗謂先王修己治人
經緯萬彙惟在於禮故於

國朝儒生之顯者獨推故尚書秦蕙田王引之該
侍郎所著禮記質疑一書折衷羣經淹貫三禮
括歷代制度之大得諸家訓詁之通實兼秦蕙
田王引之二家所長卓然禮學大師為當代所
僅見道光初故大學士阮元督粵始作學海堂

以課士及該侍郎為巡撫增設條教黷門之學
成就尤多粵士稱為百年以來兩人而已伏念
該侍郎服官中外歷著勤能

聖朝軫念前勞自有

恩卹之典至其政績學術卓絕可傳應請

旨宣付國史館列傳並

飭下湖南巡撫錄其所著書咨送史館以垂不朽伏

讀乾隆十七年二月

上諭以故禮部尚書韓奕碩學績文加恩追謚又乾隆

三十四年四月

上諭原任刑部尚書王士禎積學工詩從前未邀易名
之

典宜示褒榮以為稽古者勸各等因欽此咸豐十一年曾國藩為前太常寺卿唐鑑代遞遺摺以其宿學忠敬籲請

特旨賜諡蒙

恩允行仰見

先朝激勵儒修一時傳誦以為文臣之至榮郭嵩燾經術政績視韓奕等殆尤過之可否

特予褒嘉以勸學行出自逾格

恩施非臣所敢擅請所有已故大員事蹟可傳請
旨宣付史館緣由理合恭摺具陳伏乞

皇上聖鑒訓示謹

奏

覆奏停購船械裁減勇營摺八月初十日

奏為遵查部議北洋停購船械裁減勇營情形據
實覆陳恭摺仰祈

聖鑒事竊臣欽奉光緒十七年四月二十五日

寄諭戶部奏酌擬籌餉辦法一摺等因欽此當即恭
錄轉行欽遵查照逐細籌議茲據各司道將領
等詳覆前來臣查部議外辦四條除鹽商捐輸
督飭運司勸商量力報効方片具奏土藥稅厘
俟開辦後儘數解部外至北洋向來購買船械
本無專款存儲沿海駐紮勇營又與他省迥異

謹將詳細情形縷析為我

皇上陳之原奏南北洋購買外洋槍礮船隻機器暫
行停購兩年即將所省價銀解部充餉等語查
北洋歷購鐵艦快船均係奏明奉

旨由部另籌專款不在歲支北洋經費之內其兵船
礮臺應配礮械均於創辦時估計併購前奏定
海軍章程內載明若購大批軍火需款較巨專
案咨商海軍衙門辦理故額定歲支款內並無
購買外洋槍礮一項是北洋購買船隻槍礮均
係另請籌撥實無存儲備用之款今即停購仍

屬無銀可解至購買外洋機器約分兩大端一為從前所無新議創購之件一為原來所有隨時添配之件其創購者苟非海防急需自當暫停惟歷年撥定經費各省解不足額額支之款尚屬不敷此則雖暫停購仍無餘款可以騰挪若隨時添配之件如艦艇塢廠原有各機器俱係西洋新式靈巧異常機關極脆用久易敝各口所設魚雷水雷尤為攻守利器其雷筒電信等件遇有缺壞若不添配遂成棄物各廠局輪機器具運動倍繁損壞尤易倘拘於停購二年

之議任其缺損一物壞則全機俱停一器乖則全船坐廢製造闕則軍實立匱操防缺則攻守無資積年之功墮於一旦所省甚微所關甚鉅此則萬難停緩然統計每年所費不過十萬金亦無數十萬之多此查明北洋船械項下並無餘款可解之實在情形也又原奏各省營勇原額恐難皆足能有八九成即稱上選令將馬步勇營各就所存限一年內裁足一成等語查直隸現存營勇淮軍分紮沿海各處東至奉天之旅順口大連灣渡海而南至山東之威海衛皆

北洋海防最為緊要之地自來湘淮軍得力實由勇數足額足則力厚當用兵時常以一營分紮兩壘近年因備外患修築礮臺亦多以一營分紮兩處則人數斷不能少所用槍礮全係西洋精利之器凡操後門礮自礮目以至勇丁皆有應管之物應做之事缺一不可演槍則分行布陣悉照西法進退分合均有一定之數亦缺一不可准軍調防

畿輔逾二十年平時疏渠屯田築臺修壘及歷年修濬河工如黃漳永定下游南北運減河各工

見於奏牘者幾無虛日藉非兼資勇力勞費殆不可勝計直隸沿海以至東奉各口礮臺相望俱仿照西洋新式而旅順威海大連灣等處臺工鑿山填海致力尤艱藉非全用勇力其勞費尤不可勝計論前日之戰守則一勇實得一勇之用論平時之工操則一勇實兼兩勇之用部議勇額八九成即稱上選此論他處營制或未可知若准軍則自來所未有蓋按冊可稽隨時可驗者也光緒六年正月奉

旨飭裁各省防營以直隸須辦邊防

特諭毋庸議減卽十年戶部議開源節流各條內亦
僅及內地防勇而於海防各營均未議及誠以
三輔本根重洋門戶

廟謨遠燭廷議僉同長慮周防原不可以外省及內
地各營為比而六年防俄十年防法徵調客軍
添募新軍旬月之間

詔書疊下則近畿兵力並不甚足久在

聖明洞鑒之中際茲費絀用繁疆臣誼共時艱但使
勉可支持何敢不力為其難藉紓餉力臣自調
任直隸以來歷年裁勇就餉之案非止一端其

最鉅者光緒十一年特奉

懿旨飭各省裁勇以增旗兵加餉當時新募勇營一律
裁減歲節部餉九十四萬八千兩實為大宗自
十一年裁定以後未增一營次年四月間

醇賢親王巡閱北洋覆

命具疏亟稱陸軍將領雖屬可恃猶以分布各隘力量
未厚為言其時威大兩海口尚未設防今則均
已移軍填紮布置愈廣兵力愈單現又須遵

旨續籌膠州澳煙臺等處防務將來如何分撥屯駐
尚待妥籌此即未能添募何可更議裁撤今若

就各營統裁一成每歲所省無多而有關於畿
防海防及營制軍實者甚大此查明北洋防營
現難裁減之實在情形也竊維北洋拱衛

畿輔環帶大洋近年創辦海軍防務尤重自來設
防之法必須水陸相依船艦與陸軍實為表裏
北洋現有新舊大小船艦共只二十五艘奏定
海軍章程聲明俟庫款稍充仍當續購多隻乃
能成隊而限於餉力願大難償

醇賢親王巡閱疏中已極言師船兵力尚單全恃陸
軍礮臺以為固今則船艦既暫停添購防營更

未便遽裁伏讀本年五月初八日

上諭海軍關係緊要必須精益求精仍著督飭各員認真經理以期歷久不懈日起有功等因欽此各

營將士傳誦

詔書莫不馳驅感奮膠煙兩處特奉

諭旨添築礮臺難更停緩臣此次出洋巡視各口親見弁勇工作勤苦胼胝黧黑備極辛勞臺工尚多未竣臣與前撫臣張曜徧加拊循方蒙激勵之

恩忽有汰除之令懼非

聖朝慎重海防作興士氣之至意也詳閱部臣所議
既曰自相商定又令察酌情形固已深知外間
事勢各殊斷難一律現經再三籌度目前餉力
極絀所有應購大宗船械自宜照議暫停至裁
減勇營一成應俟各處臺工竣後再行酌辦惟
值部庫竒絀需款正殷直隸雖係缺額之區自
應與各省分任其難勉籌涓滴之助容當督飭
藩運兩司無論何款竭力撙節勻撥一俟集有
成數再當隨時奏明辦理所有遵查部議北洋
停購船械及裁減勇營實在情形理合恭摺覆

陳伏乞

皇上聖鑒訓示謹

奏

辭節制嵩武軍摺九月二十四日

奏為嵩武軍駐防山東請仍歸撫臣節制以資鎮攝恭摺仰祈

聖鑒事竊臣承准軍機大臣字寄光緒十七年七月二十五日奉

上諭張曜所部嵩武軍訓練有年所辦皆海防之事著歸李鴻章節制調遣等因欽此伏查已故山東撫臣張曜所部嵩武軍馬步共十一營惟漢中鎮總兵孫金彪所統四營駐紮煙臺後路其餘七營分紮曹州兗州一帶察度情勢一時未能

全調海防臣所部淮練各軍向皆申明紀律勤奮工操若該軍歸臣調遣斷不能令勞逸迥異該軍雖百戰精銳然皆豫頽剝悍之士稍異湘淮節制之師當此新失大將羣情未免觀望寬緩之餘驟以嚴明馭之或非所宜山東撫臣亦有海防之責該軍所駐全在山東境內而分防腹地尤多距撫臣所駐濟南密邇距臣所駐天津千有餘里遠近懸殊且各省內地防軍亦從無不歸本省督撫節制之理現聞張曜歿後該軍頗有浮言互相稟訐軍心不壹此軍自同治

六七年間曾隨臣勦辦東西捻匪而奉調出關以後迄今已二十餘年各營將領均已更易多不相識亦不深知其賢否餉糈一切向由張曜自行經理支發文卷冊籍無從移交其中情偽曲折非遙度所能周詳若紛紛檄調查詢頭緒太繁尤慮衆心搖惑臣實不敢擁節制之虛名而無整頓之實際再四思維撫臣福潤在東年久較為熟悉就近清查彈壓當可消弭無形擬請將現駐山東之嵩武軍

飭歸撫臣節制庶遇事呼應靈速責成較專俟將來

調歸海防修築臺壘再由臣分撥調遣臣為關
繫東防大局起見不敢緘默謹專摺由驛四百
里馳陳伏乞

皇上聖鑒訓示施行謹

奏

與俄接連電線定約摺光緒十八年七月廿一日
奏為遵

旨與俄國使臣妥商中俄邊界連接陸路電線訂定
約款恭摺具報仰祈

聖鑒事竊臣於光緒十八年三月二十八日准總理
各國事務衙門咨以俄國使臣喀希呢赴總署
申請議接海蘭泡琿春等處陸路電線請派大
員會商辦理奉

硃批著派李鴻章與俄國使臣妥商奏明辦理欽此
欽遵臣即劄派總辦電報事宜津海關道盛宣

懷與俄使所派之駐津領事官王厚在津商訂
磋商數月議定華洋文條約十款大致與前任
俄使庫滿所訂草約十一款不甚懸殊當將議
訂接線條款一併抄咨總理衙門詳加覆核悉
臻妥洽本年閏六月十五日已由該衙門抄錄
條款進呈奉

硃批依議欽此並由該衙門繕譯清文咨送到臣即
由臣處照繕漢文於七月初四日在津先行畫
押蓋印交俄領事寄京與俄使喀希呢印押其
俄文法文則由該使在京先行畫押蓋印仍交

俄領事寄津與臣印押齊全已於七月十五日
各自分執臣查中國陸路電線創自光緒六年
經營十餘年布滿各省瞬息萬里官商稱便惟
丹國大北公司海線先於同治十年由香港厦
門逆遷至上海一通新加坡檳榔嶼以達歐洲
名為南線一通海參歲由俄國亞洲早線以達
歐洲名為北線俄丹早有連線之約嗣後英國
大東公司水線亦由福州至上海英丹復有合
辦之約其始英丹兩國湊集巨款製造水線來
華原欲併收中國通商各口之電利故同治九

年英使威妥瑪曾有各海口准其設立水線之
議逮各行省自設陸線併拆去英丹在滬粵已
成之陸線彼乃知中國已能自守境內之權利
不可復奪遂欲獨專中國與外國往來電報之
利迨我之吉林黑龍江綫成與俄之東海濱境
內咫尺毗連該公司深慮中俄線接分奪其生
計惟恃俄丹交密並有海參崴約章在前俄雖
欲自利仍不能不保護丹國之利而各國洋人
之在中國者聞中俄接線皆願陸線與水線跌
價相爭使洋人寄洋報可佔便宜此不特俄丹

所不允即中國電局亦無力與之跌鬪且丹英
水線到中國已二十餘年彼洋商無法使水線
跌價亦何能獨使陸線跌價以遂其漁人得利
之謀現在中俄定議上海福州廈門香港該公
司本有水線處不與爭跌留其生計該四口以
外各口電價亦不准水線公司爭跌庶使華線
略分其利如以後水線減價則中俄電線亦同
時照減辦理甚為平允臣與總理衙門往返函
電互商均屬妥協至展造恰克圖線應用造線
經費甚鉅並常年養線用款繁重擬飭總辦電

報事宜盛宣懷勸諭華商電報公司設法添招
商股二十萬歸商認辦以免另籌官本以後邊
界既經接線凡京津等處出洋電報必須將京
津等處至海參崴琿春恰克圖內地報費由我
酌量全行豁免祇收條款內應分來往經過之
電費自應仍歸華商電報公司收取除抵過密
免內地報費外即以抵展造恰克圖電線經費
及以後此線常年修巡之費以期持久而免廢
弛此又中俄接線以後所擬之辦法也所有議
立中俄接線條約二分以一分咨送總理衙門

以一分存留臣衙門備案理合專摺由驛覆陳
伏乞

皇上聖鑒訓示謹

奏

潘鼎新請建專祠摺光緒十八年八月二十二日
奏為已故統兵大員功在地方輿情愛戴籲懇
天恩准其捐建專祠恭摺仰祈

聖鑒事據天津縣在籍紳士浙江候補道徐士鑾等
聯名呈稱已故廣西巡撫潘鼎新前在直隸剿
辦捻匪卓著戰功同治四年捻匪逼近畿郊天
津為馬賊鹽梟出沒之區時虞勾引內犯中外
惶惶該故撫統率所部鼎軍由滬航海抵津聲
威大振人心始定七年之春西捻張總愚突竄
畿境該故撫首先入援在保定河間一帶防剿

固守北面藩籬其夏捻逆由東省回竄天津復會合郭松林楊鼎勳兩軍倍道抄前迎頭痛剿逼賊回竄津郡始獲保全嗣嚴防滄州減河使逆氛不得北擾該故撫平生戰績天下共聞而此數端津人所目睹而身受者軍興以來統兵大員故後均准於立功省分建立專祠該故撫功德在人擬請在天津捐建專祠列入祀典呈請具奏前來臣查已故廣西巡撫潘鼎新於同治元年募立鼎軍隨臣東下始自平吳迄於剿捻疊著戰績實為淮部大軍與兵事相終始剿

捻之役馳逐四年轉戰五省勞苦功高一時稱
最而兩次入衛

畿輔赴援之速尤為中外所推四年夏初親王僧
格林沁殉難曹州賊屯聚鄆濮之間蔓延東明
長垣界內蓄謀北犯直境震擾屢奉

諭旨徵兵入援曾國藩方駐徐州各軍皆赴東豫以南
臣在兩江總督任內奏派該故撫統率所部十
營克日航海赴援徑抵天津旋由景州德州一
帶遏擊南下直境始無寇警特蒙

諭旨獎勵謂能視國如家顧全大局曾國藩疏稱有此

一軍可以壯畿輔之聲威可以補籌畫之迂緩
其為當時所重如此西捻戰事多在近畿該故
撫始援保定繼援天津防護

陵寢屏蔽

京師全局所關尤非淺鮮回憶七年春初張總愚
由晉竄直時東捻甫經剿定奉

旨休息將士未及兩旬諸將大半假歸臣聞警即令該
故撫剋日北援時賊已連陷饒陽祁州逼近保
定方謀分股北竄涿易東竄津沽該故撫於正
月十六日自東河拔隊馳抵饒陽正遇東竄之

賊迎擊大勝抄出賊前徑趨保定遮蔽易州滿城一帶賊既不得北竄其東竄者繼為諸軍所遏回竄西南其先官文崇厚衍秀等連疏告警情形岌岌若非該故撫赴援迅速大局幾不可問同時起行之善慶等所部馬隊猶後二日始入直境蓋師行之速一時所無也天津為著名富庶之區賊所注意旋於三月杪由東昌渡運疾捲北趨冀乘我之不備時該故撫已追賊而南屢捷於長垣內黃滑莘冠之交臣即檄令會合郭松林楊鼎勳等倍道急馳繞由北路向

南兜截以蔽津沽衝要該故撫與各軍議以賊
銳意北竄非兜前截擊不為功雖霖雨積淖軍
士勞苦亦不遑恤遂於二十八九等日迭在荏
平高唐平原陵縣吳橋南皮東光滄州靜海一
帶沿途要擊或綴賊後或出賊前連日搏戰疾
行竟於四月初五日先抵天津賊亦庸集城南
一敗之於衛南窪再敗之於楊柳青賊知不可
圖即由鹽山慶雲回竄海豐該故撫仍慮其乘
隙北擾復在滄州之捷地減河東岸引水開淤
直達於海築長牆八十餘里屏障滄青靜海各

屬津防自此屹然賊西不得渡運北不得竄津
遂為官軍蹙向東南盤旋於高唐禹城臨邑之
間不百日而全股蕩平論者謂非防剿得力不
能奏功如此之速是役也潘鼎新與郭松林楊
鼎勳並以力戰著聞而發謀則皆由於潘鼎新
臣當時奏牘詳敘戰狀厯厯具在可覆按也伏
查淮軍剿捻各統將如郭松林楊鼎勳等歿後
並奉

旨准建專祠潘鼎新戰功與郭松林等相同而其兩次
赴援之速論功實在諸將之上天津尤其力戰

保全之地該紳等感念前績懇請捐建專祠足見公論之孚未便壅於

上聞合無籲懇

特恩俯准為該故撫潘鼎新在天津地方捐建專祠列入祀典由地方官春秋致祭以彰蓋烈而順輿情出自逾格

慈施理合繕摺具陳伏乞

皇上聖鑒訓示謹

奏

漠河金廠請獎摺九月十八日

奏為黑龍江漠河金廠創辦三年期滿著有成效
謹將出力文武員弁遵照奏定章程分別酌請
獎叙繕單恭摺仰祈

聖鑒事竊照光緒十二年十二月間前署黑龍江將
軍恭鏜等密陳漠河金礦亟應及時開採以杜
外人覬覦欽奉

寄諭飭臣籌辦當經議定章程十六條遴派道員李
金鏞總辦礦務奏蒙

飭下總理衙門會同吏部戶部議准覆奏內開用人

一條以漠河為邊遠苦寒之地人皆視為畏途
金殿襄辦需人非尋常局務可比若非破格優
獎不足以示鼓勵在廠經辦各員俟三年後如
果實效昭彰准擇其尤為出力者照異常勞績
從優酌保其出力較次之員照尋常勞績保獎
以示區別等因奉

旨依議欽此欽遵在案計自光緒十四年十二月開
工日起扣至十七年十二月止三年期滿據現
辦局務候選知府袁大化查明在事出力文武
各員開單稟請奏獎前來臣查漠河地方三面

斗入俄界距俄國新設之博克諾付克屯及阿勒巴金城僅一江之隔該處金苗頗旺久為外人所垂涎往年中俄匪徒私自開挖雖經派兵驅逐孽芽未淨光緒十三年春間李金鏞帶同員司由墨爾根入山勘度地興工締造經營時歷二載規模始具開廠後召回流民數千募練護礦防勇一營並於漠河口各處建造房屋廣集商販沿江平曠之地設法墾種屯牧並興以絕域窮荒人迹罕到之地兵民輻輳商賈繁興屹然為邊陲重鎮十六年秋間李金鏞病故

後奏派袁大化接辦力持危局規畫井然三年
以來先後出金砂六萬二千餘兩除陸續歸還
借款分給商股官利外所有勇夫餉械糧運及
各局經費均由該廠籌給不費公家之款並提
存餘利解充黑龍江軍餉以伸報効實屬辦理
得法成效昭彰自來謀國遠圖不外興利實邊
當該廠未經開辦以前俄人越界私採出入自
由伺隙抵瑕意殊叵測該處距將軍都統所駐
均極寫遠防範難周時虞侵佔今自開礦以來
上至奇乾河下至愛琿沿江二千餘里弁丁

夫來往不絕所募護礦營勇訓練精強沿邊卡
倫聲勢聯絡與黑龍江北岸俄城隱然對抗外
以折強鄰窺伺之漸內以立百年富庶之基其
有益於

國計民生殊非淺鮮在事文武員弁及司事人等
遠役遐荒備嘗艱苦漠河向無人煙建置之難
則平地亦立購運之遠則千里孤懸往來轉解
必須取道俄境彼族多方掣肘口舌百端礦丁
驕悍性成駕馭招徠殫盡心力兼以地居邊徼
瘴癘毒惡凝寒中人易生疾疫取金之峒夏則

積水冬則層冰鑿險絕幽艱難萬狀前此道員
李金鏞同知姚嶽崧知州劉械林等均以積受
寒濕病死差次歷年司事兵役相繼物故者更
多衆皆視為畏途各該員弁始終奮勉罔顧身
命勞苦勝於內地十倍今當三年期滿礦務日
有起色局勢逐漸開拓自應遵照奏定章程破
格優獎以期鼓舞人心藉收羣策羣力之效查
該廠總分各局十餘處在事員司不下數百人
茲謹核實刪減擇其尤為出力者酌照異常勞
績獎敘凡出力較次之員仍按尋常勞績請保

未敢一概從優理合彙繕清單恭呈

御覽仰懇

天恩俯念漠河金廠事屬創辦關係緊要邊防迥非尋常局務可比准照所請獎敘出自逾格

慈施總辦委員候選知府袁大化先充該廠提調辦事認真力任勞怨接辦局務堅苦卓絕支柱艱危洵屬懋著勲勤有裨時局應請

旨將該員免選本班以道員不論雙單月遇缺儘先即選並加二品銜以示鼓勵除應給千把等項照章咨部註冊並飭取各員詳細履歷分咨外

理合會同黑龍江將軍臣依克唐阿恭摺合詞

具陳伏乞

皇上聖鑒訓示謹

奏

變通學藝期限片

再查總理海軍衙門奏定海軍章程摺內聲明章程容有未備及臨時應行變通者隨時酌議具奏等因欽奉

懿旨允准在案茲據北洋海軍提督丁汝昌呈稱章程內原定駕駛學生在堂習業四年畢業派上練船學習船藝一年送回學堂再習三月然後撥入槍礮練船再學三月考校如式派歸兵船差遣補用等因查學習船藝槍礮原定期限太促學習甫得門徑即改肄別業恐有未精難免功

虧一篑當日海軍創設在在需材欲其速成以供驅策故不能寬予限期現在天津學堂學生日增威海學堂學生亦將畢業又有北京內學堂學生將次上船人材不患不多惟在力求精邃擬變通舊章將京津兩學堂學生畢業後即先派入槍礮學堂學習六個月考校如式分別等第填給執照再派上康濟練船學習魚雷水雷各種技藝六個月考校給照然後派上威遠練船學習船藝並令隨船廣歷東南洋一帶考究風濤沙線寬限兩年俾臻精進其春秋考校

仍照章分別等第統以三年為期諸藝學畢業
集各照擇其最優者以千總候補次者以把總
候補加儘先字樣如此量為變通年限稍寬藝
業必更精到且分班上船學習亦免擁擠之虞
其威海學堂學生本已兼習槍礮仍照定章辦
理等情呈請核辦前來臣查槍礮船藝極難精
熟欲究其精微之奧必寬以學習之期該提督
所擬變通辦法較原限計寬年半為時亦不過
久而學生藝業更可精益求精自為因時制宜
期收實效起見於造就海軍人材不無裨益除

咨海軍衙門兵部立案外理合附片陳明伏乞

聖鑒訓示謹

奏

重整上海織布局片光緒十九年十月廿六日
再臣於光緒八年因華商稟請分招商股在於
上海設立機器織布局以華棉紡織洋布酌輕
成本抵敵洋產當經

奏准變通稅釐專章在案上年復派紳商添籌資
本建廠開機每日夜已能出布六百疋銷路頗
暢正擬推廣紡紗漸收利益乃據江海關道稟
報九月初十日該局清花廠起火適值狂風施
救不及廠貨被焚當即派員會查所剩基地局
房估價攤派惟查洋貨進口以洋布洋紗為大

宗光緒十八年洋布進口值銀三千一百餘萬
兩洋棉紗進口值銀二千一百餘萬兩中國出
口絲茶價值不能相抵布縷為民間日用所必
需其機器所紡織者輕軟勻淨價值尤廉故遠
近爭購豈知多銷一分洋貨即少用一分土產
是以因勢利導不得不用機器仿造必使所紡
之紗與洋紗同所織之布與洋布同庶機華棉
有銷路華工有生機華商亦沾餘利此事斷難
中止亦難緩圖應仍在上海另設機器紡織總
局籌集款項官督商辦以為提倡並釐訂章程

號召華商多設分廠以資推廣方可以土產敵
洋貨力保中國商民自有之利權謀始圖成得
人尤難臣查津海關道盛宣懷歷辦輪船招商
局及各省電報局著有成效於商務洋務尚肯
苦志研求現值津河將封關權事簡擬派令暫
行赴滬會同江海關道聶緝梨商明前辦紳商
將前局妥為結束截清界限分籌資本一面規
復舊局一面設法擴充俟該道等籌辦稍有頭
緒隨時續

奏除札委候補道黃建筦暫行代理津海關篆外

所有上海織布局派員續籌辦法以敵洋產而
保利權緣由理合附片具陳伏乞

聖鑒謹

奏

海軍擬購新式快砲摺光緒二十年二月初二日
奏為海軍鐵甲快練各船擬添購新式快砲酌定
分年訂購由應領額款內陸續籌付價銀恭摺
仰祈

聖鑒事竊據北洋海軍提督丁汝昌文稱鎮遠定遠
兩鐵艦原設大小砲位均係舊式濟遠鋼快船
僅配大砲三尊砲力單薄經遠來遠鋼快二船
尚缺船尾砲位鎮定兩艦應各添克鹿卜新式
十二生特快砲六尊濟遠經遠來遠三艦應各
添克鹿卜新式十二生特快放砲二尊共十八

尊並子藥器具又威遠練船前桅後原設阿摩士莊舊式前膛砲不甚靈動擬換配克鹿卜十生特半磨盤座新式後膛砲三尊並子藥等件均係海防必不可少之要需請查核酌辦等情當經咨商總理海軍事務衙門接準復文以此項砲位關係軍艦待用利器令將約需銀數奏明辦理當即飭據軍械局會同支應局司道詳稱前項添購新式砲位共二十一尊均連子藥器具按照克鹿卜廠定價確核估計連運腳保險等費共約需銀六十一萬三千四十餘兩查

奏定海軍章程凡添購大批軍火應由海軍衙門核明另行添撥不在常年經費之內等因惟目下海軍衙門戶部同一支絀若添此購砲巨款誠恐籌撥為難再四籌畫查每年由海軍衙門額定領銀二十萬兩專備鎮遠等八船常年煤修及隨時添置各物之用近來支放力求樽節擬自本年起重會商海軍提鎮凡八船常年添置各件酌量停減即就備用項下設法勻奏移緩就急將鎮遠定遠兩鐵艦應添克鹿卜十二生特快砲十二尊先行訂購連開花子葯器具

共估需庫平銀三十五萬四千餘兩暫由備用
款內分年撥付仍歸八船報銷案內造報其濟
遠經遠來遠威遠等四船應購各砲俟鎮定二
船砲價付清後如備用項下仍可騰挪再行陸
續添購等情開單請奏前來臣查德廠新式快
放砲每六分鐘時可放至六十出之多其力可
貫鐵數寸實為海上制勝利器各國師船爭先
購換北洋海軍鐵甲快練各船原設砲位當時
雖稱新式但較現時快砲實覺相形見絀且海
軍以定鎮經來鐵快等船為巨擘船堅尤須砲

利若砲位不多單薄過甚遇有緩急固不足恃亦無以壯聲威亟宜逐漸添購以資戰守惟是餉項支絀鉅款難籌茲擬於八船經費備用額款內竭立勻奏先購鎮定二船快砲十二尊似有贏餘陸續購置似此分年辦理既有裨於軍寔亦無須另籌帑項殊屬樽節得宜除清單咨總理海軍事務衙門兵部工部查照立案外理合繕摺具陳伏乞

皇上聖鑒謹

奏

卷三

三

--	--	--	--	--	--	--	--	--	--

推廣機器織局摺三月二十八日

奏為上海機器織布局現已設法規復另籌推廣
辦法以擴利源而敵洋產恭摺仰祈

聖鑒事竊查上海機器織布局上年九月間被焚臣

因大局所係斷難緩圖當飭津海關道盛宣懷
趁封河期內暫行赴滬會同江海關道聶緝梨
商明前辦紳商妥為結束截清界限籌集資本
一面規復舊局一面設法擴充附片陳明在案
本年二月杪該道回津當飭仍回本任茲據將
辦理情形稟請核奏前來臣詳加查核前布局

所剩地基及燬傷機器鍋爐鋼鐵廢料估值無多該道到滬後會商鼎緝梨及前辦紳商截清數目議明將前布局銀錢花布剩款除支付應還現款外按照各商股總計分攤不過二成其餘被焚無著各款悉歸以後商辦各廠按每出紗一包提捐銀一兩陸續歸繳以恤商艱一面招徠新股仍就織布局舊址設立機器紡織總廠名曰華盛另在上海及甯波鎮江等處招集華商分設十廠官督商辦總廠請辦紗機七萬錠子布機一千五百張各分廠請辦紗機四萬

錠子至二萬錠子不等其有兼辦織布者請辦
布機五百張至二百張不等統共紗機三十二
萬錠子布機四千張合之湖北官辦紗機八萬
錠子布機一千張共成紗機四十萬錠子布機
五千張如果紗布暢銷機器全行開辦約計每
日夜可出紗一千包出布一萬疋每紗一包通
扯售銀六十兩每年約得紗價銀一千八百萬
兩每布一疋通扯售銀二兩五錢每年約得布
價銀七百五十萬兩上海華盛總廠及華新大
純裕源數廠現已購機建廠先行開辦其餘各

廠亦經陸續措置商情尚形踴躍查光緒十八年各海關總結計進口洋紗值銀二千一百萬兩又粗布斜紋布值銀六百二十九萬兩十九年亦大致相同中國財源頻年漏於外洋元氣暗虧無所底止且多銷一分之洋貨即少銷一分之土貨小民生計日艱隱患實在於此目前金磅騰貴外洋運來紗布亦因而日昂若不乘時趕緊籌款購機自行紡織此後虛耗民財恐尚不止往年之數且恐洋商自運機器來華製造紗布則中國自有之利權必至一網打盡此

臣所以日夜籌維力圖振興而不敢中止也中國試行西法創立公司從前經理未得其人商情疑阻此次督令盛宣懷等推誠勸導得於燬燼之餘另開局面僅能從此漸推漸廣未始非商務一大轉機除飭盛宣懷隨時相機認真督辦並由臣衙門核給各廠憑照嚴定章程必須華商資本方準領照購機擇地開辦併在上海設立公所互相稽查以杜影射仍照光緒八年奏定辦法比照洋布洋紗稅則飭於出口新關完一正稅概免內地沿途稅釐俾輕成本而廣

招徠惟是保護權利更須體恤商情核計現辦上海等處機器紡織各廠以及湖北官辦兩局全行開辦以後每年所出紗數較之近年進口之數已得十之八九所出粗布斜紋布二項較多而外洋紗布仍不能不入內地互爭銷售況洋布各色除粗布斜紋布之外中國棉花尚不合用若不酌示限制則跌價傾擠華商資本有限虧折堪虞應請

飭下總理各國事務衙門立案合中國各口綜計無論官辦商辦即以現辦紗機四十萬錠子布機

五千張為額十年之內不准續添俾免壅滯至
洋商販運機器在中國口岸改造土貨本條條
約所無前准總理衙門咨行洋商販運機器有
關華民生命有礙華民生計之物又為稅則所
不載者不准進口等因洵為思患預防之計紡
織機器華商既經限定額數如果洋商販運軋
花紡紗織布及棉子榨油機器進口自行製造
實有礙華民生計臣已咨明總理衙門飭令關
道稅務司查明禁止近來日本廣開紗廠皆係
日本商民自設並無洋商在內中國生齒尤繁

自保利權斷不容外人稍生覬覦臣仍督飭現
設各廠紳商講求種棉之法徐圖紡織細紗原
布以期開拓利源漸敵洋產所有現籌推廣紡
織紗布情形理合會同南洋通商大臣兩江總
督臣劉坤一合詞恭摺具陳伏乞

皇上聖鑒訓示謹

奏

醫院創立學堂摺五月十八日

奏為天津總醫院遵照海軍章程接續開辦著有
成效估需經費銀兩恭摺仰祈

聖鑒事竊查光緒十四年八月奏定北洋海軍章程

內載天津儲藥施醫總醫院與威海衛旅順口

水師養病院由海軍提督水師營務處津海關

道會商派員管理等因威海旅順兩醫院已於

光緒十五年開辦歷屆造報准銷有案天津總

醫院內分西醫學堂施醫院儲藥處三大端專

司購儲材料診治弁兵並挑選生徒分班肄習

俾學成後派赴海軍各營艦充當醫官尤為北
洋各醫院之根本由臣督飭津海關道等漸次
經營旋經該關道督率官商捐籌鉅款在天津
城外創建醫院房屋一百八十餘間惟該院內
應設西醫學堂所有教習生徒人等復添建住
房七十八間估需工料銀八千三百餘兩另由
海防支應局籌撥竣工酌擬章程試辦該總醫
院應派正副總醫官監督員司夫役人等名額
薪費均參酌天津水師武備各學堂成案變通
辦理選募聰敏生徒撥入西醫學堂分班肄業

訂僱英國醫官歐士教來津偕同洋漢文教習
擬定課程盡心訓迪院內應購中西各項傢具
需銀四千餘兩援照武備學堂准銷成案樽節
購用於光緒十九年十一月初一日開院試辦
海軍各營艦及各炮台防營弁兵內外各症隨
時診治有效遇有四方貧民求診亦酌給方藥
所選頭二班學生分習洋文醫理講貫編摩均
能領悟經該關道先後稟報並據天津海防支
應局司道核詳奏咨立案前來臣查西洋各國
行軍以醫官為最要而救治傷科直起沉痾西

醫尤獨擅專長其學以考求經絡辨別藥性為始基以察臟腑之運行練臨症之理法為進步其究以洞內科之精微平諸家之同異為極功非專門名家歷經考試該國家未能給憑診治北洋創辦海軍之初僱募洋醫分派各艦為費不貲是興建西醫學堂造就人材實為當務之急臣於威海旅順兩醫院開辦後即遵照海軍章程接續籌議自天津醫院告成試辦至今著有成效該總醫院所設員司人等各有專司月共支薪工經費銀九百三十餘兩每年應支銀

一萬一千二百餘兩其餘應需書籍器具筆墨紙張等項並頭二班學生按時考課應給加贍等銀仿照水師武備各學堂章程隨時核實稟支均在北洋海軍經費內動用現僱之洋教習將來期滿時察看如各醫官學生等技藝精進能與西醫頡頏即隨時裁撤不在常年經費之內至撥過添建學生住房工料購置中西傢具各銀兩應即彙案分款造銷其津海關道督率官商捐建之醫院業據聲明出自樂輸不敢仰邀獎敘自應免其造報該醫院甫經創辦一切

用款尚難遽定續有未盡事宜再隨時酌核樽
節變通以期妥善除月支薪工經費核定銀數
分咨海軍衙門及戶部工部查照立案外所有
遵照海軍章程開辦天津總醫院緣由理合恭
摺具陳伏乞

皇上聖鑒勅部查照謹

奏

覆奏海軍統將摺七月二十九日

奏為遵

旨據實覆陳恭摺仰祈

聖鑒事竊臣於七月二十七日准總理各國事務衙門電稱本日奉

旨現在倭船屢窺海口海軍防剿統將亟須得人丁汝昌畏蕙無能巧滑避敵難勝統帶之任嚴諭李鴻章於海軍將領中遴選可勝統帶之員於日內覆奏不得以臨敵易將接替無人等詞曲為迴護致誤大局等因欽此伏讀之下悚惶莫名北洋海

軍是臣專責提督丁汝昌疊被彈劾屢蒙

諭旨垂詢當此軍事緊急之時果有遷延避敵情事
亟應隨時嚴參斷不敢稍涉徇護惟現在密籌
彼此情勢海軍戰守得失不得不求保船制敵
之方敬為我

皇上詳晰陳之查北洋海軍可用者只鎮遠定遠鐵
甲船二艘為倭船所不及然質重行緩喫水過
深不能入海汊內港次則濟遠經遠來遠三船
有水線甲穹甲而行駛不速致遠靖遠二船前
定造時號稱一點鐘十八海里近因行用日久

僅十五六海里此外各船愈舊愈緩海上交戰
能否趨避應以船行之遲速為準速率快者勝
則易於追逐敗亦便於引避若遲速懸殊則利
鈍立判西洋各大國講求船政以鐵甲為主必
以極快船隻為輔胥是道也詳考各國刊行海
軍冊籍內載日本新舊快船推為可用者共二
十一艘中有九艘自光緒十五年後分年購造
最快者每點鐘行二十三海里次亦二十海里
上下我船訂購在先當時西人船機之學尚未
精造至此僅每點鐘行十五至十八海里已為

極速今則至二十餘海里矣近年部議停購船械自光緒十四年後我軍未增一船丁汝昌及各將領屢求添購新式快船臣仰體時艱款絀未敢奏咨竇請臣當躬任其咎倭人心計譎深乘我力難添購之際逐年增置臣前於豫籌戰備摺內奏稱海上交鋒恐非勝算即因快船不敵而言儻與馳逐大洋勝負實未可知萬一挫失即趕緊設法添購亦不濟急惟不必定與拚擊但令游弋渤海內外作猛虎在山之勢倭尚畏我鐵艦不敢輕與爭鋒不特北洋門戶恃以

無虞且威海仁川一水相望令彼時有防我海軍東渡襲其陸兵後路之慮則倭船不敢全離仁川來犯中國各口彼之防護仁川各海口與我之防護北洋各口情事相同觀於前次我海軍大隊游巡大同江口彼即乘虛來窺威海旅順迨我海軍回防則倭船即日引去敵情大概可知伏讀疊次電

旨令海軍嚴防旅順威海勿令闖入一步又令在威海大連灣煙台旅順各處梭巡扼守不得遠離等

因

聖明指示洞燭機宜至今恪遵辦理北洋門戶無無
竄擾之虞蓋今日海軍力量以之攻人則不足
以之自守尚有餘用兵之道貴於知己知彼舍
短用長此臣所為兢兢焉以保船制敵為要不
敢輕於一擲以求諒於局外者也至論海軍功
罪應以各口能否防護有無疏失為斷似不應
以不量力而輕進轉相苛責丁汝昌從前創辦
粵捻曾經大敵迭著戰功留直後即令統帶水
師屢至西洋藉資閱歷及創辦海軍特蒙

簡授提督情形熟悉目前海軍將才尚無出其右者

各將領中如總兵劉步蟾林泰曾等階資較崇
惟係學生出身西法尚能講求平日操練是其
所長而未經戰陣難遽勝統率全軍之任且全
隊並出功罪相同若提督以罪去官而總兵以
無功超拔亦無以服衆志若另調他省水師人
員於海軍機輪理法全未嫻習情形又生更慮
債事貽誤臣所不敢出也自來用兵謗書盈篋
而卒能收功者比比皆是伏懇

聖明體察行問情事

主持定斷臣不勝迫切悚懼之至緣電奏未能詳盡

謹繕摺由驛五百里據定復陳伏乞

皇上聖鑒訓示謹

奏

粵將無庸調津摺八月初三日

奏為遵

旨覆陳仰祈

聖鑒事七月三十日准總理衙門電稱本日奉

旨前據張之洞奏保總兵張春發潘瀛曾在廣西立功當諭李瀚章傳令該二員募勇北上茲據電稱南勇不宜於北路遠難以速到或令赴津聽候派營給管等語著李鴻章酌量情形應否飭令來津調遣之處即行電覆等因欽此臣查張春發潘瀛前於法越之役頗著戰功現在一任右江鎮總

兵一署高州鎮總兵均係兩廣極邊之地若俟
招募成營後由陸北上至速亦須歲杪始能到
防粵人不耐嚴寒不慣麪食李瀚章所稱南勇
不宜於北路遠難以速到洵為扼要之言至擬
令來津聽候派營給管一節湘淮各營招募新
勇俱責成該將領等自行挑選精壯教習成軍
即歸其統帶所有營哨各弁亦須由統將揀派
兵將相習臨陣方期可恃若以新來之將統素
不相習之兵人地不熟調度不靈緩急斷難得
力自倭事告警臣先後遴派精悍能戰之將在

直東及淮徐以北陸續添募四十餘營但使餉械足數儘可就近募練似無須借才遠省稽延時日徒增勞費所請將張春發二員調津派營給管之處應請無庸置議理合恭摺覆

奏伏乞

皇上聖鑒謹

奏

據實陳奏軍情摺八月二十日

奏為軍情益急臣力難支據實懇陳仰祈

聖鑒事竊倭人起傾國之兵進圍平壤危急萬分前據葉志超迭次來電均轉電總理衙門代奏現接義州電報安州以北電線亦斷葉志超自十五日以後並無續電風聞平壤業已失守其派護銘軍赴大東溝之海軍各艦於十八日在大鹿島洋面與倭船惡戰三時之久互有沉毀亦經轉電奏

聞並據各國探報倭人將以大股圖犯北京又云謀

襲瀋陽現值水陸兩軍新有挫失凶敵日張臣
督率無方罪戾叢積謗議咎責實無可辭至此
事本未及統籌全局情形有不敢不披瀝直陳
於

聖主之前者方倭事初起中外論者皆輕視東洋小
國以為不足深憂而臣久歷患難畧知時務夙
夜焦思寔慮兵連禍結一發難收蓋稔知倭之
蓄謀與中國為難已非一日審度彼此利鈍尤
不敢掉以輕心凡行軍制勝海戰惟恃船礮陸
戰惟恃槍礮稍有優絀則利鈍懸殊倭人於近

十年來壹意治兵專師西法傾其國帑購製船械愈出愈精中國限於財力拘於部議未能撒手舉辦遂覺稍形見絀海軍快船快礮太少僅足守口寔難縱令海戰臣前奏業已陳明至陸路交鋒倭人專用新式快槍快礮精而且多較中國數年前所購舊式者尤能靈捷及遠此次平壤各軍倭以數倍之衆布滿前後分道猛撲遂至不支固由衆寡之不敵亦由器械之相懸並非戰陣之不力也臣屢電奏前敵兵勢過單但北洋沿海各要口關係至重正議添兵更無

餘力除盛軍係津沽遊擊之師全隊調往外復
經抽調北塘蘆台山海關旅順各防隊已覺處
處空虛昨又撥調大連灣銘軍四千人移緩就
急實萬不得已之舉至招募新營必須數月精
練徵調外省多屬零星湊集又難尅期到防且
有兵尤須有械舊儲槍械本屬無多開戰後設
法購運來華尚需時日此皆非倉猝所能集事
者也臣忝司軍旅三十餘年從前剝髮捻薄
奏微效然皆內地賊匪與外洋情勢迥殊數月
以來朝作夜思寢食俱廢迄無起色焦憤莫名

仰荷

聖慈不加重譴僅予薄責策勵將來感激涕零固知所報際此時艱方亟斷不敢自請罷斥致蹈規避之嫌惟衰病之軀智力短淺精神困憊以北洋一隅之地搏倭人全國之師自知不逮若不熟思審處據寔陳明及至貽誤事機百死詎足塞責伏願

聖明在上主持大計不存輕敵之心責令諸臣多籌巨餉多練精兵內外同心南北合勢全力專注持之以久而不責旦夕之功庶不墮彼速戰求

成之詭計故就目前事勢而論惟有嚴防渤海以固

京畿之藩籬力保瀋陽以顧東省之根本然後厚集兵力再圖大舉以為規復朝鮮之地奉天地廣兵單與臣處相距過遠且為將軍及練兵大臣駐紮處所一切調度未便遙制應請

特簡重臣督辦以便調遣而專責成北洋海軍尚有定遠鎮遠兩鐵艦輔以快船蚊雷各艇與陸路礮台聲勢相倚各口守台弁勇均係訓練有素合以新募各營扼要填紮倭人若以大股來犯

臣當督率各將領奮力迎擊斷不敢稍有疎虞
上勞

宸慮至臣前奏所請撥發餉項一切募軍購械及水
陸轉運各事支發浩繁年內外亟須接濟屆時
或請撥部款或酌借洋債再行奏明請

旨遵行所有通籌情勢據寔懇陳各緣由謹繕摺由
驛六百里馳

奏伏乞

皇上聖鑒訓示謹

奏

--	--	--	--	--	--	--	--	--	--	--

11.11.11

大東溝戰狀摺九月初七日

奏為海軍在大東溝口外接仗力挫賊鋒並查明兵船管帶各員死事慘烈情形懇

恩優卹恭摺仰祈

聖鑒事據海軍提督丁汝昌呈稱海軍各兵艦奉調護送招商局輪船裝運總兵劉盛休銘軍八營陸兵赴大東溝登岸於八月十七日丑刻由大連灣開行午後抵大東溝即派鎮中鎮南兩船魚雷四艇護送入口平遠廣丙兩船在口外下旋定遠鎮遠致遠靖遠經遠來遠濟遠廣甲超

勇揚威十船距口外十二海里下旋十八日午
初遙見西南有煙東來知是倭船即令十船起
旋迎剿我軍以夾縫雁行陣向前急駛倭人以
十二艦魚貫猛撲相距漸近我軍開砲轟擊敵
隊忽分忽合船快砲快子彈紛集我軍整隊迎
敵左一雷艇亦到各船循環攻擊堅忍相持至
未正二刻平遠廣丙二船福龍雷艇續至定遠
猛發右砲攻倭大隊各船又發左砲攻倭尾隊
三船中其扶桑艦三船即時離開旋即回隊圍
繞我軍夾擊包抄開花子彈如雨一排所發即

有百餘子之多各船均以船頭抵禦冀以大砲
得力敵忽以魚雷快船直攻定遠尚未駛到致
遠開足機輪駛出定遠之前即將來船攻沉倭
船以魚雷轟擊致遠旋亦沉沒管帶鄧世昌大
副陳金揆同時落水經遠先隨致遠駛出管帶
林永升奮勇督戰突中敵彈腦裂陣亡濟遠先
被敵船截在陣外及見致遠沉沒首先駛逃廣
甲繼退經遠因管帶既亡船又失火亦同退駛
倭始以四船尾追濟遠廣甲因相距過遠折回
乃聚團經遠先以魚雷繼以叢彈拒戰良久遂

被擊沉超勇艙內中彈火起旋即焚沒揚威艙內亦被彈炸又為濟遠當腰觸裂駛至淺水而沉該兩船管帶黃建勳林履中隨船焚溺同殞來遠靖遠苦戰多時來遠艙內中彈過多延燒房艙數十間靖遠水線為彈所傷進水甚多均即暫駛離隊撲救修補平遠廣丙及福龍雷艇尾追裝兵倭船為敵所斷未及歸隊此時僅餘定鎮兩艦與倭各艦相搏歷一時許巨砲均經受傷定遠只有三砲鎮遠只有兩砲尚能施放丁汝昌督同各將弁誓死低禦不稍退避敵彈

霰集每船致傷千餘處火焚數次一面救火一
面抵敵丁汝昌旋受重傷總兵劉步蟾代為督
戰指揮進退時刻變換敵砲不能取準又發砲
傷其松島督船並合擊傷其左側一船白煙冒
起數丈靖遠來遠修竣歸隊平遠廣丙魚雷各
艇亦俱折回倭船多受重傷復見諸船並集當
即向西南一帶飛駛遁去我軍尾追數里敵船
行駛極速瞬息已遠然後收隊駛回旅順濟遠
一船已先回旅廣甲一船在三山島擱礁拖救
不起該兩船管帶方伯謙吳敬榮業經電請分

別從嚴參辦所有致遠經遠超勇揚威四船管帶鄧世昌等力戰陣亡應從優議卹請奏前來臣查大東溝一戰我以十船當倭十二艦倭艦雖不及定鎮兩鐵艦之精堅而船快砲快實倍於我我軍奮力迎擊血戰逾三時之久為地球各國海戰向來罕有之事各將士効死用命愈戰愈奮始終不懈實屬勇敢可嘉此次據中外各將弁日擊攻沉倭船三艘而采諸各國傳聞則被傷後沉者尚不止此數內有一船係裝馬步兵千餘將由大孤山登岸襲我陸軍後路竟

令全軍俱覆而我運送銘軍八營駛抵口內得
以乘間陸續起岸不至被其截奪關係大局匪
細實賴海戰保全之功若非濟遠廣甲相繼遁
逃牽亂船隊必可大獲全盛猶幸致遠經遠衝
鋒於先定遠鎮遠苦戰於後故能以寡擊衆轉
敗為功此則方伯謙之罪固不容誅而鄧世昌
劉步蟾等之功亦不可沒者也提督丁汝昌統
率全軍身當前敵受創後猶復輿疾往來未嘗
少休激勵將士同心效命當時交戰情形疊經
臣電致總理各國事務衙門先後奏

聞在案八月二十九日欽奉電

旨東溝之戰倭船傷重鎮遠定遠各將士苦戰出力
著李鴻章酌保數員以作士氣等因欽此當經恭
錄轉行欽遵查照容俟查明核實奏保其力戰
陣亡之管帶大副等自應先行奏請

恩卹以慰忠魂致遠管帶提督銜記名總兵借補中
軍中營副將噶爾薩巴圖魯鄧世昌經遠管帶
升用總兵左翼左營副將穆欽巴圖魯林永升
致遠大副升用游擊中軍中營都司陳金揆爭
先猛進死事最烈擬請

旨將鄧世昌林永升照提督例陳金揆照總兵例交
部從優議卹鄧世昌首先衝陣攻毀敵船被溺
後遇救出水自以闔船俱沒義不獨生仍復奮
擲自沉忠勇性成一時稱嘆殊功竒烈尤與尋
常死事不同且官階較崇可否

特旨予諡以示優異而勸將來出自逾格

恩施非臣所敢擅擬起勇管帶副將銜左翼左營參
將黃建勳揚威管帶副將銜右翼右營參將林
履中力戰捐軀同堪憫惻擬請

旨各照原官升銜交部從優議卹其餘陣亡傷亡受

傷員弁應俟查明奏請分別照章卹賞所有海
軍接仗及管帶員弁陣亡各緣由理合恭摺由
驛具陳伏乞

皇上聖鑒訓示謹

奏

海軍懲勸章程片九月初七日

再據海軍提督丁汝昌呈稱海軍戰備首重選才拔之千百人養之數十年然後得一將之用兵船猶可驟添將才殊難猝致昔人得一良將比於敵國百城蓋深知其難也大東溝之戰致遠管帶鄧世昌首先衝鋒攻毀敵船旋因致遠船沉同沒業已被人救起自以船亡不能獨存不肯出水仍復溺斃聞者無不歎傷在該管帶忠勇性成死事固其本分特恐諸將狃於見聞但以輕生為烈而不知徒死無益非所以示常

守之法而全有用之才應請明定章程俾有遵奉擬嗣後海軍各船遇敵退縮即以軍法從事其有前敵衝鋒盡力攻擊者或被敵轟沉或機器損壞或子彈罄盡或傷焚太甚無可挽救雖軍艦沉焚而船中將士遇救得生准免治罪仍與論功儻敢臨陣擅離部位船被沉焚即死亦不准邀議卹之

思其遇救得生仍當治以應得之罪至船中有進水被焚等事應由管帶官督令撲救仍行迎敵如遇險時弁兵倡議逃駛准管帶官先予正法收

隊再報以肅營規等情呈請奏咨立案前來臣
查海軍交戰與陸路不同一船被毀大眾同沉
及至遇救得生實非意料所及萬目共覩斷非
捏飾逃避者所能藉詞即如此次與船同沉之
管帶鄧世昌業經救起而堅執船亡與亡之義
卒以身殉迹其至誠激發本無纖毫微功畏罪
之心完節純忠無可訾議但使遇救果能不死
亦為衆所共諒則為海軍留一忠勇可恃之將
所全更多該提督所請分別擬定章程係為愛
惜人才整肅軍紀起見自應准如所擬辦理以

昭核實而示勸懲理合附片陳明伏乞

聖鑒訓示謹

奏

彙覆鐵路電報等事摺九月二十六日

奏為疊奉

諭旨據實覆陳恭摺仰祈

聖鑒事竊臣欽奉九月十八日

寄諭有人奏鐵路開至關東已將關門東偏平為坦
途恐倭以海輪裝兵由牛莊金州等處乘間登陸
強劫火車駕駛應將過關一段鐵路拆卸將關城
照舊修復等語山海關防務緊要自應修守嚴整
預杜狡謀著李鴻章按照摺內所陳各節體察情
形將如何籌備之處即行覆奏等因欽此臣查山

海關在今臨榆縣之東門縣城包跨長城一段
城南北相距里許原各有缺口一道為山外水
道總滙之地向無甃石基址並非近日始行開
通關南缺口之東即為防營炮台屯紮處所鐵
路取道於此既非穿墉而出又有砲台防護無
慮其從此直入至火車來往事前預定時刻臨
時又可電告若有警信道中拆去一節則進退
俱窮車內短少一物則頃刻成廢原指所稱敵
人駕駛內犯毫無阻隔似於鐵路情事尚未深
知現在鐵路僅至山海關而止關外尚未行車

原摺慮其由牛莊金州登陸劫車及所擬關內
外行車之法亦於現造工程未能詳悉山海關
防兵雲集斷無縱令敵船駛近駁渡淺灘從容
登車之理此查明山海關鐵路之情形也又奉
上諭有人奏該大臣於前敵各軍電報往往改易增
損字句然後入告等語著據實覆奏等因欽此臣
查前敵電報關係緊要軍情均係據各統將來
電隨時電達總理各國衙門轉奏本無所用其
隱飾至各將領於文義未盡精通同時電到間
有重複粗率訛寫之處偶有刪易並無增添於

事實毫無出入平日往來各報俱臣親自經理
從不假手他人且軍情瞬息變遷稍有不實不
盡必有疎漏可指斷難始終掩匿臣歷次電奏
原牘具在可以復按此前敵各電並無改飾之
情形也又奉九月二十一日

寄諭洋員漢納根在北洋當差有年若令統帶師船
出洋攻剿是否相宜並應如何重其職任授以實
官之處均著妥籌具奏等因欽此臣查漢納根係
德國陸軍千總出身頗諳韜略臣招致來津派
築砲台已逾十年臨陣甚有膽識前委赴海軍

總查八月十八日大鹿島之戰受傷尚未全愈
日下海軍戰艦僅修成六艘力量過單只可為
北洋各要口防守之用勢難遽令出洋攻剿該
員已蒙

特旨賞給寶星又經臣奏請

賞加提督銜足資鼓勵竊以目前戰船過少似無庸
遽授洋員實職若將來購得大快船及魚雷獵
艇全到時或參用洋將仿照從前琅威理之例
授以副提督會同督率互相稽核庶於軍事有
裨此漢納根宜暫緩授官之情形也又奉

上諭有人奏盛宣懷承辦轉運採買兵米浮冒多至數十萬金天津招商局突被火焚兵米付之一炬難保無侵蝕後希圖掩飾之弊等語著確切嚴查據實覆奏等因欽此 臣查前敵各營兵米飭由臬司周馥道員袁世凱就近在奉省採買前經電奏有案畿防各軍兵米向由各該統將自行設法購備現因軍食不敷復蒙

恩准截留南漕俾資接濟盛宣懷但司轉運並未經手採買無從浮冒至天津招商局北棧已於光緒十六年租與金寶源商號訂期五年本年九

月初七夜被火所燬只有商米三百包及棉花羊毛襪貨均係客商寄頓之件並無官米存儲在內該棧房產本屬洋商保險業已照數賠修盛宣懷無從侵蝕更無可掩飾此查明盛宣懷被參之情形也所有疊奉

諭旨查明據實分別覆陳緣由理合繕摺由驛具

奏伏乞

皇上聖鑒謹

奏

李肅毅伯奏議

及門章洪鈞編輯
吳汝綸

卷十三

籲辭賀俄正使摺

謝赴俄致賀正使摺

請隨帶人員摺

請頒致俄德法英四國禮物摺

請以李經方隨行摺

領到頭等出使大臣關防并繳議約全權大臣關

防摺

查勘山東河工摺

馳赴山東查勘河工酌帶人員摺

山東查勘照章支給薪水摺

勘籌山東黃河會議大治切實辦法摺

山東河患救急治標辦法

大治辦法條陳清單

救急治標條陳清單

代陳盧法爾擬辦河新法片

請啟續仍回原省片

額辭賀俄正使摺

奏為額懇

天恩收回成命恭摺滙陳仰祈

聖鑒事十二月二十七日准總理衙門鈔電本日奉
旨明年四月初為俄君加冕之期已派李鴻章為正
使前往致賀等因欽此聞

命之下惶悚莫名伏念人臣之義苟益於

國艱險不辭雖當垂暮之年敢忘致身之訓况臣

受

恩深重踰越等倫久許馳驅誓甘赴蹈春間馬關之

卷十三
一
役衆皆束手危急萬分臣拜

命即行未嘗少避今者俄君加冕之禮本非尋常交際之儀俄人以王之春位望未隆與各國遣使相形難於接待惟現在中外大臣通知洋情嫻習儀節堪膺專對者尚不乏人微臣以七十有四之衰齡涉三萬有餘之海路時逾數月地隔三洲凡風濤寒暑之交侵實疾病顛連之莫保臣自夏初使旋後曾將積受病狀疊次據實上陳仰蒙

恩許寬閒得以加意調養而本原虧損傷病時發步

履輒弱更甚於前行動之際扶掖須人即使憑仗

威靈長途無恙亦豈能以殘軀暮齒從事於樽俎之間倘隕越於禮儀殊有傷於

國體躊躇再四跼踖難安惟有籲懇

聖慈鑒臣衰疾

收回成命別簡賢員剋期前往感戴

隆施曷有既極理合繕摺披瀝懇陳伏乞

皇上聖鑒謹

奏

赴俄致賀正使謝

恩摺

奏為恭謝

天恩事光緒二十一年十二月二十八日准軍機處

鈔奉

上諭李鴻章奏籲懇收回成命一摺李鴻章耆年遠涉本深眷念惟赴俄致賀應派威望重臣方能勝任該大學士務當仰體朝廷慎重邦交之意勉效馳驅以副委任無得固辭欽此跪聆之下感極涕零伏念臣以衰朽之餘年沐

卷十三
生成之大德但蒙

驅策豈避險艱特以壇坫周旋既異兵爭之甚迫風
濤簸蕩尤非老病之所宜非敢愛身惟虞辱

命乃荷

俯加勉勵令效馳驅

念其遠涉之勤

勛以邦交之重繹

訓詞之深厚真堪淪浹於髓肌顧志力之衰頽猶誓
捐糜於項踵謹案禮記大夫七十有適四方之
事孔疏即指遠聘異國而言今合五洲强大之

區儼同七國縱橫之局為從來所未有實交際
所宜隆况俄國本通聘最早之邦而加冕又異
俗至崇之禮但有益於交鄰之道何敢憚夫越
國之行臣惟有勉竭愚誠敷宣

德意期永敦於和好冀仰答於

恩知一息尚存萬程當赴阻重深於山海未改叱馭
叩坂之心夢咫尺於

闕廷猶存生入玉關之望所有微臣感激下忱謹繕
摺叩謝

天恩伏乞

皇上聖鑒謹

奏

請

命李經方隨往片

再臣以衰年遠使異域仰蒙

朝廷軫念

特命臣子李經述隨侍前往

體恤周至感戴莫名臣子李經述隨任讀書多年謹
飭自愛向未學習洋務此次隨臣前往於臣起

居動履自能盡心侍奉惟於應接外事只可藉
資歷練臣子李經方幼曾兼習西國語言文字
嗣充駐英參贊游歷法德美各邦旋充出使日

本大臣於各國風土人物往來道里均所熟諳
臣年逾七十精神步履日見衰頹所有沿途舟
車館舍及隨從僕役約束指揮勢不能處處周
到而所至之地各國官商士庶必多聞風來謁
不勝接待之煩若得李經方同行則程途之照
料賓客之酬應均可分勞現既奉

旨以李經述隨行本不應作再三之瀆惟臣體察事
勢揣度年力所有為難之隱不敢不據實

上聞合無籲懇

天恩俯念臣老朽多病准令李經方一併隨行俾臣

不至以瑣務逐細分心庶得專力於重要各端
於公事私情裨益非淺伏候

聖裁再馬關之役勢處萬難所有辦理各事皆臣相
機酌奪請

旨遵行實非李經方所能為力局外不察橫騰謗議
應邀

聖明洞鑒李經方於上年五月奉

命赴台灣交割後因病蒙

恩賞假調理半年以來漸見痊愈惟病後畏寒本擬
春融銷假北上若隨往外國尚可支持理合附

片陳請伏乞

聖鑒訓示謹

奏

開用出使關防日期片 光緒二十二年正月十三日
再臣此次奉使應有行用關防以昭信守准總
理衙門刊送木質關防一顆文曰

欽差頭等出使大臣關防 臣即於正月十二日敬謹
開用其原刊議約全權大臣關防即咨還總理
衙門轉交接辦商約大臣張蔭桓收用理合附
片陳明伏乞

聖鑒謹

奏

酌擬隨帶人員摺

奏為酌擬隨帶人員恭摺仰祈

聖鑒事竊臣奉

命赴俄致賀並往德法英美各國聘問

特派頭等出使大臣

朝廷慎重邦交禮意崇隆為前此所未有此外如荷

蘭比利時各國聞臣奉使均來請便道詣其國

都臣與總理衙門籌商各國皆有交涉事件自

應加意聯絡至各邦新政商務凡有益於

國者均須隨時隨地認真考究庶無負

特遣專使之意亦以慰殊方嚮慕之忱道遠事繁需
才任使應慎選深通西學能知大體及熟諳西
國語言文字品行端潔足備繙譯之選者隨同
前往以資臂助謹就平日所知分別調派酌定
員數繕單恭呈

御覽如不敷用隨時奏明續調所需經費照奏定章
程核實開支即在江海關出使經費項下提撥
咨明總理衙門查核理合恭摺具

奏伏乞

皇上聖鑒訓示謹

奏

10: 17m

2

謹將隨帶各員銜名繕具清單恭呈

御覽

兵部候補主事于式枚

分省補用道塔克什訥

記名海關道羅豐祿

升用道分省補用知府聯芳

候選知府林怡游

浙江試用同知薛邦蘇

升用直隸州補用知縣柏斌

直隸試用縣丞麥信堅

北河試用縣丞張柳

分省試用縣丞洪冀昌

酌帶洋員隨往片

再據總稅務司赫德面稱因臣遠役外洋雖帶
有熟悉洋情之華員似須生長是邦者為之鄉
導以備隨事顧問俄使喀希呢亦請酌帶俄員
現充稅司者就地照料更昭妥洽查有五品銜
副稅司柯樂德係俄國人二品銜稅司德瑾琳
係德國人三品銜稅司穆意索係法國人花翎
頭品頂戴稅司赫政係英國人三品銜稅司杜
德維係美國人以上五員効力多年均通曉中
國語言文字品行端正臣與赫德商酌暫作為

參贊官令其各至該本國伺應其應領月薪仍
由新關照舊支給毋庸在出使經費項下開支
所有路費店費一切雜用准其開報除咨總理
衙門並分行知照外謹附片具陳伏乞

聖鑒謹

奏

請

頒禮物齋致俄德法英四國片

再俄德法英四國交誼輯睦均應有

欽頒禮物由臣齋往致其國君擬請

頒發內庫古磁器古銅器玉器各件以期精美而示

隆重可否請

旨飭下內務府每樣各備四分臣定於正月二十日

出京並祈剋日交臣祇領此外應配用各色土

儀由臣隨地購辦屆時奏報理合附片陳明伏

乞

聖鑒謹

奏

欽奉

懿旨恭摺遞陳摺 光緒二十四年十月初一日

奏為欽奉

懿旨恭摺遞陳仰祈

聖鑒事九月三十日欽奉

慈禧端佑康頤昭豫莊誠壽恭欽獻崇熙皇太后懿旨
山東黃河工程著派李鴻章前往會同任道鎔張汝
梅周歷河干履勘情形通籌全局擬定切實辦法必
須確有把握仍將各項工程分別核實估計應須經
費奏明請旨辦理等因欽此聞

命之下惶悚莫名竊維山東黃河連年潰決積敝已深
即使設法籌辦實恐無甚把握論者以為讓地
與水及束水攻沙或開闢引河均非巨款不辦
現在庫帑支絀亦恐無從籌措臣年將八十精
力衰頹步履蹇滯全河工段過長處處必須親
歷臣受

恩深重何敢辭勞惟此事關係重大精神智慮或有
未周致滋貽誤負疚更深可否籲懇
聖慈責成山東巡撫一手經理抑或另行
簡派大臣前往會勘之處出自逾格

恩施理合滙情具陳伏乞

皇太后

皇上聖鑒謹

奏

查勘山東河工酌帶人員摺

奏為馳赴山東查勘河工酌帶人員恭摺仰祈

聖鑒事竊臣欽奉

懿旨查勘山東黃河工程當以衰疾恐難勝任具摺籲
辭未蒙

俞允仰惟

皇太后

皇上慎重河防軫念民生之至意但使稍能支柱何
敢不勉力一行茲定於本月十七日出京由鐵
路馳往天津趁南運河未凍之前乘船駛赴德

州俟至濟南後會同河臣任道鎔撫臣張汝梅
認真勘籌河隄兩岸千有餘里工段綿長必須
諳練得力人員分投察勘查有前任大順廣道
吳廷斌樸誠廉幹在直隸治河三十餘年閱歷
最深機宜熟悉禮部員外郎于式枚北洋差遣
道員孫寶琦袁大化講求河務樸實耐勞均擬
隨帶前往其餘應用測量差遣員弁當於過津
時咨商督臣裕祿酌調除分咨查照外理合繕
摺具陳伏乞

皇太后

皇上聖鑒訓示謹

奏

五十一

五十一

請

飭戶部行知東省照章支撥片光緒二十四年十月十六日
再查光緒九年徐桐薛允升前往奉天查辦事
件奏准在本省公款內分別支給薪水嗣後奉
使諸日歷經遵辦在案今臣奉

命派往山東查勘黃河工程擬請

旨飭下戶部查照成案行知該省照章支撥以資辦
公理合附片陳明伏乞

聖鑒訓示謹

奏

勘籌山東黃河會議大治辦法摺

光緒二十五年二月初十日

奏為勘籌山東黃河會議大治切實辦法恭摺覆

陳仰祈

聖鑒事竊臣欽奉光緒二十四年九月三十日

慈禧端佑康頤昭豫莊誠壽恭欽獻崇熙皇太后懿旨

世鐸等會奏籌議山東黃河工程請特簡大員前往
察看一摺著派李鴻章前往山東會同任道鎔張汝
梅周歷河干履勘情形通籌全局議定切實辦法必
須確有把握實在可行此項河工關係數省民生李
鴻章等務當認真勘辦不得互相推諉徒托空言仍

將各項工程分別核實估計應需經費開單奏明請
旨辦理用副朝廷慎重河防至意等因欽此嗣山東
糧道尚其亨福建興化府知府啟續先後奉

旨隨同勘工臣鴻章復奏調熟悉河務之前直隸臬
司周馥前大順廣道吳廷斌等來工勘籌一切
該司道等會同上中下三游總辦等周歷履勘
上自曹州府屬黃河入境起下至利津縣海口
止南北兩岸往來逐段察看並帶天津武備學
堂學生上下測量沿路遇員弁鄉民勤加詢訪
酌擬大治辦法具詳請奏前來臣等先後前往

覆勘情形甚為詳確謹據實為我

皇太后

皇上縷晰陳之山東黃河自咸豐五年銅瓦廂改道
以來初因大清河槽深通時當軍務煩興未遑
修治同治十一年以後漸有潰溢始築上游南
堤光緒八年以後潰溢屢見遂普築兩岸大堤
尺寸初不高寬乃民間先就河涯築有小埝隨
灣就曲緊逼黃流大堤成後復勸民照舊守埝
後又有將埝改歸官守之處於是堤久失修有
殘缺而不可守者守埝之民又因河灘淤高漸

將埧身加高每遇汎漲埧決水遂建瓴而下堤亦因而隨決此歷來失事病根也上游曹兗所屬南北兩堤湊長四百里兩堤相去有二十里至三四十里不等皆官為修守中間民埧偶決水仍由埧外堤內歸入正河大決則堤亦不保計南北險工十四處自同治以來決僅四五見此上游情形也中游濟南泰安所屬兩岸堤埧各半湊長五百里南岸上段傍山無堤下段守埧北岸上段守堤迤下又守埧彼此參差不一無非為埧內村庄難遷權為保守之計下游武

定府所屬南岸全守堤北岸全守埝湊長五百三十餘里地勢近海愈平水勢近海愈大情形較中游更重綜計全河之險中游以下極多計南岸近省百里近埝之險有二十三處北岸自長清官庄至利津以下鹽窩止四百六十八里之間有險五十四處二十年來已決三十一此中下游情形也至下游近海百里之間向無堤埝間有之亦甚卑薄現在黃水由絲網口入海一望瀰漫寬約二三十里串溝甚多並無一定河槽深四五尺或一二尺數寸不等愈下愈

淺此又入海尾閘阻滯情形也詢考在工員弁
僉稱去年盛漲堤埵高水面一二尺者十之五
與水平者十之三竟有水高堤頂搶築子埵以
防護者各處埽埧卑薄歲修稽料勉敷春日廂
修至伏汛搶險早已用罄無存碎石為護險要
需亦因無款不能多購防汛兵夫額設四千餘
人分防南北兩岸一千四百餘里僅合每里三
人平時巡水查漏已去其半昔年防汛尚添雇
月夫近亦因無款少雇該司道此次到工一路
少見存料亦無土牛問之兵弁據稱春日廂埧

夏日防汛秋冬又搶堵漫口竟無餘閒挑積土
牛即此可概其餘此近年山東辦工竭蹶情形
也查黃河自改入東省修防諸務本屬草創間
有興作皆因經費支絀未按治河成法如前撫
陳士杰創立兩岸大堤只高一丈嗣經前撫張
曜請款增培亦只擇要加高幫寬規模固未大
立前撫李秉衡於二十二年十月間歷陳山東
受河之害治河之難謂近年幾於無歲不決無
歲不數決除額撥經費不計外其另案之款十
年通算不下八百萬兩而河工敗壞日甚一日

等語二十三、四等年仍復漫溢多處東民久罹
昏墊幾不聊生

朝廷屢糜鉅金閭閻迄無安歲日積月累長此焉
窮若不按照成規大加修治何以仰答

皇太后

皇上愛養元元之至意臣等與該司道等詳攷古今
治河之法惟漢臣賈讓徒當水衝之民讓地於
水數語寔為上策其次則惟有展寬河身令開
封河寬十餘里決溢尚少從前江南徐州上下
河形較狹決溢頗多今山東上游河面寬於中

下兩游決溢較少皆明證也明臣潘季馴有言
河堤必須遠築大約離岸須三四里庶容蓄寬
廣勿逼水以致易決康熙中河臣靳輔有言豫
省築堤甚遠其至近者亦三五里遠則遊波寬
緩不能深入勢必復引而他去而淤灘仍為平
陸雖險易守此皆按事切理之言查光緒九年
前撫陳士杰建築中下游兩岸大堤南岸自長
清達於蒲台計四百餘里北岸自東阿達於利
津計六百餘里現派武備學生逐細測量兩堤
相距有五六里至八九里不等應即就此兩堤

加培高厚永為修守似不失為中策惟查兩岸
之中先有棄堤守埝之處如南岸濼口上下守
埝者一百一十里內除上段近省六十餘里為
商賈輻輳之區近來險工稍平暫緩推展其下
段四十餘里要險極多十餘年來已決口九次
耗費寔甚擬將此埝外二十餘村妥為遷去棄
埝守堤庶離水稍遠防守易周此南岸酌擬遷
民廢埝辦法也至北岸守埝之工計長清至利
津有四百六十里之長埝外堤內有數百村庄
之多此埝逼近湍流河面太狹無處不彎無彎

不險斷無久守不敗之理河脣淤高埧外地如
釜底各村亦斷不能久安室家且埧破堤無不
破欲保此埧外數百村而併堤外數千村同一
被災尤覺非計但自棄堤守埧以來時閱八載
小民安土重遷不肯遠去非可旦夕議定今詳
加勘度北岸從長清官庄至齊河六十餘里之
民埧因南岸傍山無堤河面尚寬擬即以埧作
堤又利津以下至鹽窩七十餘里埧外地皆斥
鹵不便徙民亦擬以埧作堤此兩段民埧既經
改為官堤埧外之民即堤外之民自應無庸遷

從其齊河至利津尚有三百二十里之民埝緊
逼河干以致河面太狹竟有寬不及一里者要
險林立屢遭冲決勢不得不廢埝守堤但北堤
殘缺多年無可退守且需款過鉅遷民更難應
暫照舊守埝此北岸分別現在守埝作堤及將
來再議廢埝守堤辦法也至南北兩岸大堤為
河工第一重大關係今既處處卑薄險工無以
資防禦即平工常有鑽漏之害非照黃河舊式
大加培築不足以固修防而垂久遠現擬一律
加培凡平工以頂寬三丈險工以頂寬四丈五

丈為率底寬以十一丈至十五丈為率其中改
埝為堤之處併照此式修培遇有應行展寬取
直之處酌量估辦其暫守民埝之處一併量加
修築總期足禦汎漲至下口入海尾閘尤關全
河大局現在水行絲網口入海去路偏向東南
形勢不順而汪洋無涯人不能立足堤無法施
工既無以束水攻沙故不免下壅上潰今勘得
鍊門關故道尚有八十餘里之河形愈下愈見
寬深直通海口形勢較絲網口韓家垣兩路為
順疏築之工亦較該兩處稍省然建攔河大堤

一座挑引河三十餘里築兩岸大隄各八十餘里所需工費頗鉅惟是下口不治全河皆病朱子有云治水先從下游施工靳輔云下口受淤必以漸而決於上今欲整頓全河不得不從長計議核實勘估此又大培兩岸堤工改正下口以振全河局勢之辦法也其餘如添修費以固根基設減埧以洩異漲以及設堡夫辦豁免設廳汛武職等事辦理雖有先後緩急之分寔為將來必不可少之舉臣等與該司道等通盤籌畫悉心妥議臚列應辦之事計已估工程所需

各費除官俸兵餉不計外約共須銀九百三十萬三千餘兩以外尚有未能約估者亦於各條內敘明工程分年辦理經費亦分年具領開辦某工再將某工細造估冊現只綜核大數而言大約此項鉅工如果將來遷民等事順手經營五六年可期辦竣略如從前南河規模但需南河當日三四年修費則一切法制犁然畢具而山東無蓄清敵黃之累歲修經費必較南河大省南傍泰山之麓北限徒駭之流宣防得宜不致輕易改道中變亦較南河收效為遠大工成

後嚴定賞罰章程得人而理誠如軍機大臣等
原議雖不能一勞永逸究非漫無把握謹將所
擬大治辦法十條繕具清單恭呈

御覽此項工程過大請款較鉅應請

飭下軍機大臣會同戶部迅速核議施行謹合詞恭
摺由驛覆陳伏乞

皇太后

皇上聖鑒訓示 臣鴻章拜摺後即行起程回京覆
命合併陳明謹

奏

謹將籌議山東黃河大加修治辦法十條繕具
清單恭呈

御覽

一大培兩岸隄身以資修守而垂久遠也潘季
馴曰治河欲順其性先懼其溢惟當繕治隄
防俾無旁決則水由地中沙隨水去故歷代
治河之法不外東水攻沙若兩隄不堅焉能
束水埽壩所以護隄兩隄不堅埽壩亦不可
恃查東南河舊隄有寬十丈八丈者此固非
一次所能辦成惟山東黃河兩隄高僅七八

尺頂寬多在二丈其中極寬者頂不過三丈
極高者不過一丈二三尺險工段內除去堆
料地步兵夫汎房竟無間地可容操作若長
水距隄頂二三尺則出漏甚多搶救不及此
卑而且薄之弊也今擬險工加頂寬四丈五
丈平工頂寬三丈底寬以十一丈至十五丈
為率高以一丈六尺至二丈為率庶險工得
以有恃無恐即平工段內河灘漸漸淤高尚
有高出丈許之隄可禦漫水日久雨淋風揭
不致遽見損壞此為河防根本要圖不得不

從穩計算通計兩岸堤埝工長二十三萬四
百十五丈三尺統共加土二千五百十一萬
七千一百三十六方三分按照山東現時工
價每方連礮工在內合銀二錢五分統共合
銀六百二十七萬九千二百餘兩細數另具
估單呈核此外尚有展寬取直及完灘取直
之工此時未及勘估須由工員隨時相度形
勢估辦至舊隄埝應扣除之土已飭委員逐
步丈量核實算除將來興工尚須督辦大員
躬親量驗以昭核實至方價係照山東近日

時價與例價不符合併聲明

一下口尾閘應規復鐵門關故道以直達歸海而杜橫潰也考黃河自西漢末經千乘入海歷唐及宋初未變千乘即今利津縣也大川赴壑趨向有定河自銅瓦廂而下滔滔千里由西南而趨東北尾閘自在東北今利津以下之鐵門關即古河故潰亦即咸豐以後黃河循行之道光緒十七年河決於鐵門關之南改由韓家垣入海前撫張曜以水流頗順不堵至光緒二十一年又北決於呂家窪前

撫李秉衡欲就此挽復鐵門關故道未果未
幾又南決於南嶺子即今水由絲網口入海
之道也推求當日屢決屢改之由皆因近海
百里無隄約束聽水散漫停淤此淤彼決理
固宜然現勘得南嶺子至絲網口一百餘里
一望彌漫水寬十餘里至二三十里上深三
四五尺下深一二尺愈下愈淺溝汊紛歧測
量者探視河底膠泥堅結數年以來並未刷
出河槽商船不通去冬嚴寒冰積如山壅水
不下以致利津以下六七十里搶險多日其

漫水復倒漾西南東北各數十里下口不暢
斷不能經久弗變且其漫流寬遠畚鍤難施
疏築俱窮難以補救此絲網口一路情形也
又查韓家垣一路在南嶺子之北上段二十
餘里即是鐵門關之道下段自韓家垣分岔
而東行百餘里入海其中淤成平地者三十
餘里有河槽者二十餘里深五六七尺不等
至近海四十里一望淤灘板沙絕無河形此
韓家垣一路情形也又查鐵門關故道上段
淤成平地者三十餘里有河槽直通入海者

八十餘里其近海五十里河形尚寬數十丈至一二百丈不等深數尺至一丈數尺不等數百石商船乘潮尚可出入口內現停船數十隻探視河底皆係稀淤深一丈數尺出此海口而東兩邊茫茫無岸水深一丈餘又東四五里水內有攔門沙一道長約二十餘里寬約一里不與兩岸相聯乃在口外落潮水綫二三尺之下可測探而知不能見也詢據老漁戶云黃河初行此道時攔門沙較今更長近數年黃水不來沙被海水汕刷漸短各

河入海皆有攔門沙不能攔住上游來水等語此鐵門關一路情形也該司道等公司勘商非先將海口籌一至穩至當之策不能有裨全局而以絲網口韓家垣鐵門關三路比較自以鐵門關為勝勢趨東北直接上游來源黃河前行此道三十餘年兩岸無隄竟不改道旁溢可見勢順行疾一也下段有大河槽深通入海此非人力所能闢其近海見朝難以築隄之處可藉兩涯刷沙免致氾濫淤滯二也海舶通行百貨雲集商民樂利三也

然欲挽復此道辦理亦頗費手非挑引河三十餘里不能引溜入河非築兩岸大隄各八十餘里不能束水攻沙非於現行河內堅築堵閉大壩一座不能杜其旁潰非將兩隄內大小舊莊十餘新莊三十餘撥地蓋屋遷於隄外不使開壩放水四者不能缺一乃望成功計費所需頗鉅兩隄各長八十餘里高一丈至一丈四尺為度隄頂寬三丈為度挑河深八尺至一丈六尺為度其舊河形內裁灣取直及兩坡各挑川字溝一道以暢水勢並

購地遷民各費又大壩一百三十丈與奪溜
合龍辦法無異詳細約估再三節省需銀二
百萬兩閱時一二年始能辦竣另具估單呈
核該司道等欲求妥便簡省之法復從蒲台
利津南北兩岸相度地勢求一入海之道其
民田廬墓室碍更多費亦不省遍閱治河諸
書明臣潘季馴曰舊海口皆係積沙人力雖
不可濬水力自能沖刷乃若新闢之地土壤
堅實不特人力難施水力亦不能沖康熙中
河臣靳輔曰雲梯關外原屬平敞漫灘故出

關之水隨地散淌散淌則無力無力則沙停耳爰自清口以至雲梯關三百餘里挑引河以導其流築隄一萬八十餘丈使水逼東於中不得外溢則沖沙有力海口壅積自闢等語今擬辦法即宗其遺意也

一建立減水石壩以洩異常盛漲而保隄工也黃河之水原不宜輕使分流分流則正河受淤倘遇異常盛漲河不能容與其潰溢而貽害多處不若減歸壩外引河使有所納昔靳輔治南河時開壩極多集中言之詳矣後人

不慎防守每致奪溜故皆廢而不治今欲建
減壩必使擇迎溜處所建立壩基必使龍骨
高低合度算定只減漲水幾分河中仍存正
溜幾分漲至自洩漲消自停減溜而不奪溜
確有把握此事非精於測算推出水力速率
低率不能得其要領擬俟大隄告成之後覓
得精通水工算學之人再議興辦

一添置浚船以疏積沙而保險工也查黃河浚
船自靳輔以後迄無用者間用之皆以無益
遂罷如山東近年購置小輪船試挖泥沙亦

不得力近聞外洋有新式機船每隻價銀約三十萬兩其船能自運輸機挖取泥沙噴出岸上一里半之遠藉疏而築其法最妙但外洋濁流似黃河者甚少此項機船是否於黃河相宜必須實船之人驗明黃河水力沙性方能議辦亦必確有把握方能定購

一應設遣民局以便隨時辦理遣民等事以恤民情而裨河務也遣民本屬不得已之舉而不遷則河與民更受其累安得畏難而不急為之所靳輔有言治河之道當損小以圖大

母保一方而誤全局當忍暫而謀久母顧一時而遺害他年此語實為治河要領查北岸自齊河至利津三百四十里之間約有一千餘村此次沿途訪問每村多者不過三百家少則數十家大村少小村多富者少貧者多連年被灾情形甚苦現因北隄殘破約計遷民築隄共非四五百萬金不可應從緩再議惟南岸歷城華不注山以下四十里民捨險工極多即去年楊史道口及歷年霍家溜何王莊河套圈胡家岸蚤溝小沙灘漫口之險

也此埝距堤不過數里現擬棄埝守堤埝內
二十餘村連年被水非遷無以保民無以保
工又利津縣鹽窩以下之薄家莊等二十餘
村現議改正海口河向東北該各村正在河
灘之內亟應遷徙又利津縣南岸迤下至南
嶺子河面寬不及一里亦擬棄埝守堤展寬
河身計築新堤五十八里其民埝以內村莊
應遷數千戶統計遷民經費約需銀二十八
萬兩

一兩岸隄成應設廳汛並按廳設立武職額缺

以專責成也河工本係專門之學非細心講求躬親閱歷不能得其奧竅故河員例無選缺無論截取候補人員到班應補必須試署一年期滿安瀾方請實授今山東河務創始借用地方候補人員心不專屬事無責成每年防汎五月上隄九月下隄明年汎期或委甲後年又委乙孰肯專心考究人不與河習河務安得而理同治年間前撫臣丁寶楨議請設立廳汎未及舉行前河臣曾國荃奏請於山東黃河兩岸設立七廳部議俟直隸山

東河南三省籌有的款再議現在河患日重
河務日煩非同治年間可比大隄告成後若
不設立廳汛實無以專責成而持久遠計山
東兩岸工長一千四百餘里又將來下口添
隄一百餘里應設廳官十員汛官四五十員
方足以資分守官缺似可由山東及各省同
通撥補俸廉不必另籌惟須酌給津貼以資
辦公廳汛既設上游歸沂道管轄中游歸
濟東道管轄下游歸武定府管轄但須有熟
悉河務之人為之統率查雍正二年曾設副

總河七年改為河南山東河道總督將來應
否復設總河抑專派大員督辦之處俟大工
告竣請

旨辦理至河工武營本係專管埽壩查東南河定章
每一廳設守備或協備一員亦有設都司者
督率兵弁工作乃其專責都守以下復設千
把外委等缺以出力兵弁拔補終其身任在修
防之中故諸事諳練常為廳汛所取資今查
山東河防各營猶沿操防營制弁兵出力無
額缺可補不足以資鼓勵營哨官年久資深

欲酬其勞勛勢必補署地方之缺轉令熟手
離工非所以重 務而練人才擬請奏設廳
汛之時一併援案辦理再河防營制本與操
防不同將來尚須酌加改定勇額去來無定
技藝生熟不一將來須調河南熟手弁兵數
百名分佈各汛酌補額缺以資訓練

一設立堡夫以期永遠保護隄工也黃河隄工
沙多土少最易傷損非按里設堡派夫看守
無以專其責成非按堡給以隙地無以資其
養贍應按每里設堡夫一名山東黃河新舊

隄工將來合長一千六百里共設堡夫一千
六百名應選沿隄樸實農民有家室者各給
堡房一座終年居住隄上凡栽草栽柳搜捕
獾洞鼠穴填補水溝道口看守料物傳送水
籤公文諸事皆為堡夫是任其隄脚內外十
丈種柳隙地照章准其種植度活不另給口
糧如係險工地段大隄內外皆水無地可種
者應酌給口糧由歲修款內核發

一隄內隄外十丈地畝及隄身續壓地畝統應
給價除糧歸官管理以清界限也查隄工內

外坡脚之外至少須各留地十丈栽種柳樹
既可保護隄身且添防險之料今查山東黃
河隄脚一步之外即係民地大屬不便應將
兩岸隄脚以外民地各十丈量地肥瘠給價
豁除糧銀歸工員管理至隄身所壓地畝從
前已按十丈給價除糧惟黃河隄底應以二
十丈為率今擬從省少買概以隄底寬十五
丈為度應將此續用五丈之地一併給價除
糧連內外隄脚以外十丈之地計隄長一丈
應買地二十五丈查此項近隄地畝照向章

每畝給價八千文計兩岸舊隄及以埧改隄之工並下口添修新隄共長二十六萬九千餘丈合長一千四百九十餘里內除新淤官荒水窪廢地及有碍墳墓民居之處無庸收買約除十分之二外應買地合官畝四萬四千八百二十六畝合用大錢二十六萬八千九百五十六千文按時價一千一百文作銀一兩共合銀二十四萬四千五百餘兩此係約略估算隄成之後核實算明需價若干由工員詳辦此為保護隄工根本於修防大有

裨益又河水所經之地自應豁免錢糧而灘地挂淤一畝尚可豐收秋糧則殊難望凡麥收一季似應免征上忙以養百姓元氣山東河務草創本無定章民間每於河灘上搶築私埝埝愈逼河愈狹動遭沖決旋復修築州縣官以此請津貼村董亦歲以此歛畝費民收一季官征一季民失收一季官又請賑一次如此為民固非經久之計而於河工窒礙尤多灘上多佔一分則對岸險工喫重一分是顧一隅而害全局也擬請嗣後凡官守之

隄如上游兩隄之中灘地及中下游南隄以
內灘地民間只收一麥者免征上忙若淤灘
甚高或距河甚遠能收兩季者俟兩年後察
看情形啟征一季如兩季全失收者冬季自
應加賑其隄內民捻應由工員察看如係順
水之捻聽民自修官不必津貼尤須定明尺
寸不准歲歲加高其攔河逼溜之捻有礙河
流者一律折除如此辦理於河務大有裨益
灘內居民亦無所藉口至北岸齊河以下利
津以上因北隄尚未修復官仍暫守民捻其

險外堤內未見河水之地畝仍照向章辦理
不在此例

一南北兩堤應設德律風傳語以期呼應靈通
並於險工段內酌設小鐵路以便取土運料
也查新舊兩堤共長一千六百餘里三游總
辦各分管兩岸數百里汛時奔走不及要在
調度靈便永定河近年設德律風傳語大於
工防有益山東黃河應仿照辦理又險工地
段用土較多而大堤內外皆水取土更難路
遠運遲尤不濟急應設置小鐵路俾取遠處

膠土且省方價此兩項約估銀二十萬兩俟興辦時確算實需若干另呈估冊

一兩岸清水各工應俟治黃要工粗畢量加疏築以竟全功也查山東南岸有汶水入黃近年因黃高於汶以致東平州一帶淹浸頗廣又有小清河由歷城縣北注高苑樂安入海亦因連年河決更淤舟楫阻滯又北岸外有徒駭河上承東昌府坡水下會武定府諸水由商河濱州入海亦因黃流歷次漫入間段淤阻以外兩岸尚有小水應加疏濬之處雖

於黃河工程無涉皆關小民生計且徒駭河
將為減壩分水之用下游尤宜疏築得法汶
水入黃尤得刷沙之益俟黃工大致完畢河
流順軌即將各清水分投疏治以裨全局此
時未使核估

籌議山東河工救急治標辦法摺

奏為山東河患日亟大治需時公議救急治標辦法恭摺仰祈

聖鑒事竊據臬司周馥等議將山東黃河展寬河面大培堤身各節籌擬大治辦法經臣等另摺具陳在案惟是遷民之舉繁瑣委曲斷難尅期完事修培大堤工段太長土方太多亦非一二年所能辦竣而頻年決溢河底淤高如再節次告決不特一切工程種種棘手兩岸災民元氣已傷何忍再罹昏墊茲公同籌議惟有竭力防備

求一救急善策亦即治標以待治本之要圖查
山東黃河連年告決弊固在於民捨其堤身卑
薄料物稀少兵夫不足皆實有以致之歲修經
費原定六十五萬兩除去弁兵月饗二十萬及
委員薪水等銀五萬兩外實計購料加工之銀
共四十萬兩不敷甚鉅擬請自光緒二十五年
起於原定歲修六十五萬兩之外再請添修費
銀四十萬兩以為添料添夫防汛雜項之用並
請照支三年至光緒二十八年再行察看情形
斟酌損益刻屆春融農事漸興購運料物愈遲

愈貴倘稍涉游移春日之工作已逾伏秋之防護何恃勢必決溢再見何以上慰

宵旰下恤災黎擬將此添請四十萬歲修之款奏明先行照撥俾工員趕緊購運料物五月以前一律修作整齊至兩岸堤埝岌岌可危應修之工應裁之灘不勝枚舉只有擇要加修之法並擬請在前奏大治案內土方項下撥銀六十萬兩俾得速募被水災民春融到工興築按去年水痕加高堤埝三四尺幫寬一二三丈其頂冲極險硬灣之處對岸灘嘴挺出相度情形挑引河

抽溜溝以掣水勢庶幾汎漲得資抵禦沿河貧民亦藉以傭趁度活此六十萬兩將來即在大治案內土方項下扣除並非重費至光緒二十六年應否照案擇要加培抑或通工大加修築應俟前奏辦法議往後再由工員核議稟辦至於海口尾閘關繫緊要若尾閘不暢則上游節節壅遏水勢抬高隄防亦難久恃今統籌全局再四踏勘仍以挑鐵門關舊道深挖引河堅築兩堤以束水攻沙為宜辦理此工尚有購地遷民各事統共約需銀二百萬兩亟應提前趕辦

以上所請加撥修防銀一百萬兩以常年修費較之數固見多而以每歲決溢所耗工款賑款及蠲緩之項比之則見其少其挑通尾閘之工亦須兼營並舉倘幸邀一屆安瀾嗣後修防便得要領三屆安瀾河道自見刷深可除歷年因決受淤之病此名治標亦即治本先務等情臣等復查河工本係費財之事欲圖省費必致大費要在當事者得人整頓核實支用耳該司道等所陳現時救急事宜培修隄岸疏通海口實係必不可緩之工如撥款不能應手勢必貽誤

目前擬請將加撥修防銀一百萬兩務於四月
前解到俾得趕辦一切培隄之工尤為緊急擬
請由司道各庫先行竭力挪湊二十萬兩以便
及時開工至疏通海口現挑汛已屆礙難興作
惟尚有遷民各端必須先期從容料理勢難倉
猝舉辦擬請於本年八月以前解到一百萬再
於十二月以前解齊一百萬可於霜清水落趕
緊興工斯辦法既有次第財力冀可周轉但須
責成經辦各員核實經理倘能保一屆安瀾即
當量予優獎設有侵欺貽誤亦必從嚴叅辦似

此明定賞罰可望力除積弊尅日程功果使尾
間通暢修防足恃庶幾稍有把握仰慰

聖鑒應請

敕下軍機大臣會同戶部一併迅速覈議施行所有
公議救急治標辦法緣由謹合詞恭摺具陳伏
乞

皇太后

皇上聖鑒訓示謹

奏

謹將修築山東黃河上中下三游南北兩岸大
隄民埝平險各工高寬丈尺及新舊土方數
目繕具簡明清單恭呈

御覽

第一段上游南岸大堤上自東交界劉莊起下
至壽張縣十里堡止工長三萬三千三百九
丈舊堤頂均寬二丈五尺底八丈五尺均高
一丈五寸共土一百九十二萬三千五百九
十四方七分五釐今擬加培收新堤頂寬極
險五丈次險四丈平工三丈均頂寬四丈底

寬十二丈五尺高一丈六尺至二丈均高一丈七尺每丈估殘缺地平土二方共新舊土四百七十三萬八千二百五方二分五釐除舊應加新土二百八十一萬四千六百一十方五分 又雙合嶺套堤一段工長一千一百七十丈舊堤頂均寬二丈四尺底八丈六尺均高一丈共土六萬四千三百五十方今擬加培收新頂寬四丈底寬十二丈五尺高一丈七尺每丈估加殘缺地平土二方共新舊土十六萬六千四百三十二方五分除舊

加新土十萬二千八十二方五分

第二段中游南岸民埝上自長清縣玉符河起
至歷城縣堰頭鎮止工長二萬二百五十一
丈七尺舊埝頂均寬二丈底六丈均高七尺
共土二十八萬七千四十七方六分今估加
培新堤收頂寬極險五丈次險四丈平工三
丈均頂寬四丈底寬十二丈五尺高一丈六
尺至二丈均高一丈七尺每丈估加殘缺地
平土三方共新舊土一百四十六萬八千五
百五十六方二釐五毫除舊加新土一百一

十八萬一千五百八方四分二釐五毫 又
華山格隄一道工長一千八十丈舊隄頂均
寬一丈二尺底三丈八尺均高六尺共土一
萬六千二百方今擬加培新隄頂寬三丈底
十丈五尺高一丈五尺每丈估加殘缺地平
土二方共新舊土一十三萬九百五十方除
舊加新土一十一萬四千七百五十方

第三段中下游南岸大隄上自華山格隄起至
利津縣三里庄止工長四萬四千九百九十
七丈六尺舊隄頂均寬二丈底六丈均高七

尺五寸共土一百三十四萬九千九百二十
八方今擬加培收新隄頂寬極險五丈次險
四丈平工三丈均頂寬四丈底寬十二丈五
尺高一丈六尺至二丈均高一丈七尺每丈
估加殘缺地平土四方共新舊土六百四十
九萬九百三方八分除舊加新土五百一十
四萬九百七十五方八分

第四段下游南岸添築新大隄一道自利津縣
三里莊起至南嶺子止工長一萬五百三十
丈今估修成新隄頂寬四丈底十二丈五尺

高一丈七尺每丈估加地平土三方共新土一百五十萬八千四百二十二方五分

第五段上游北岸臨黃大隄上自直境耿密城起至壽張縣境疊波浪止工長二萬三千六百九十一丈舊隄頂均寬一丈八尺底五丈四尺均高九尺共舊土七十六萬七千五百八十八方四分今擬加培收新隄頂寬極險五丈次險四丈平工三丈均頂寬四丈底寬十五丈五尺高一丈六尺至二丈均高一丈七尺每丈估加殘缺地平土三方共新舊土

三百三十九萬三千七百三十五方七分五釐除舊加新土二百六十二萬六千一百四十七方三分五釐

第六段上中游交界臨黃埧缺口一段上自疊波浪起下接曹隄口大隄止工長二千七百丈今擬估修頂寬四丈底十二丈五尺高一丈七尺每丈估加水溝地平土十八方七分五釐共土四十二萬九千二百方

第七段中游北岸大隄上自曹隄口起下至王家廳格隄尾止工長二萬一千九百八十八

丈舊隄頂均寬一丈八尺底五丈四尺均高
九尺共舊土七十一萬二千四百一十一方
二分今擬加培收新隄頂寬極險五丈次險
四丈平工三丈均頂寬四丈底寬十二丈五
尺高一丈六尺至二丈均高一丈七尺每丈
估加殘缺地平土四方共新舊土三百一十
七萬一千七百六十九方除舊加新土二百
四十五萬九千三百五十七方八分又陶
城埠格堤一道工長一千三百五十丈舊隄
頂均寬二丈底六丈五尺內外均高五尺共

舊土二萬八千六百八十七方五分今擬加
培收新隄頂寬三丈底九丈均高一丈二尺
每丈估加殘缺地平土二方共新舊土九萬
九千九百方除舊加新土七萬一千二百一
十二方五分

第八段中下游北岸民埝上自王家廳格隄尾
起下至利津縣鹽窠新引河頭止工長七萬
九千三百四十八丈舊埝頂均寬二丈底六
丈均高八尺五寸共舊土二百六十九萬七
千八百三十二方今擬加培收新隄頂寬極

險五丈次險四丈平工三丈均頂寬四丈底
寬十二丈五尺高一丈六尺至二丈均高一
丈七尺每丈估加殘缺地平土三方共新舊
土一千一百三十六萬六千六百一方除舊
加新土八百六十六萬八千七百六十九方
以上南北兩岸擬培修大堤民埝並套隄格隄
統計除舊土應加新土二千五百一十一萬
七千一百三十六方三分七釐五毫取土遠
近難易牽算連碾工每方價銀二錢五分共
需銀六百二十七萬九千二百八十四兩九

分三釐七毫五絲

1.1.1

5.1.2

謹將規復利津鐵門關海口故道挑挖引河建築長堤堵築攔黃河大壩土方工料銀兩數目繕具簡明清單恭呈

御覽

一自利津鹽窠庄東首起至羅家庄下首入舊河止新挑引河一道工長六千四百二十丈三尺河頭口寬五十丈底寬四十丈遞減至河尾口底均寬三十六丈河頭挑深一丈六尺遞減至河尾深八尺共土三百一十二萬二百六十五方八分

一自前畢家庄至後畢家庄裁灣取直挑引河
一道工長六百八十丈仍入舊河口寬三十
丈深七尺五寸底寬二十六丈共土十四萬
二千八百方

以上引河二段共合上三百二十六萬三千六
百十五方八分三十丈外出土難易水工牽
算每方價銀三錢二分共需銀一百四萬四
千一百八十一兩五分六釐

一自崔家小庄起至三溝子以上工長五千二
百四十丈河身兩邊各挑川字溝一道口底

均寬八尺深四尺共土三萬三千五百三十
六方二十丈外出土每方價銀二錢共需銀
六千七百七兩二錢

一南岸新築大隄一道上自南嶺子庄起至三
溝子以下草頭止工長一萬五千一百四十
丈頂寬三丈底寬九丈均高一丈三尺共土
一百一十八萬九百二十方

一北岸新築大隄一道上自西鹽窠庄起至三
溝子以下草頭止工長一萬五千八百丈頂
寬三丈底寬九丈均高一丈三尺共土一百

二十三萬二千四百方

以上南北大隄共土工二百四十一萬三千三百二十方連礮工難易均算每方價銀二錢

一南北大隄尾段近海處長一千丈隄之兩面均作防風護沿埽高六尺椿料夫工價值共需銀五千兩

一鹽窠庄東引河頭下築攔黃雙壩一道河面寬一百二十餘丈水深三丈五六尺不等正壩每占寬長各五丈邊壩每占長五丈寬三丈合龍占均長六丈一切正雜料物土方夫

價共需銀二十五萬兩

統計挑河築堤攔黃壩防風埽等工及購地遷
民各項共需銀二百萬兩

覽

代陳盧法爾擬辦河新法片

再臣鴻章於去年十月十六日

陛辭時面奉

懿旨令臣考求西國治河新法適有比利時駐京使臣

費葛保薦有該國工程師盧法爾諳悉水學來
華游歷堪以隨帶赴工該監工到東後沿河查
勘兩月有餘擬具辦法大略所論沿河應辦事
宜以測繪全河形勢為先以算學為本洵是至
當不易之義其欲窮究來源沙從何生水何由
減而思所以治之向未經人辦過亦非剋日所

能程功臣今其酌照所擬辦法約略估計約共
需費銀三千二百萬兩四五年可一律完工現
值度支告匱誠恐無此財力至所稱現時應辦
救急事宜培修隄岸固築險工疏通尾閘各節
與周馥等勘議辦法大略相同謹譯原文鈔錄
清單恭呈

御覽伏乞

聖鑒采擇施行謹附片具

奏奉

硃批另有旨欽此

照譯比國工程師盧法爾稟覆勘河情形

敬稟者竊鑒奉委履勘黃河遵於十一月初十

日由雒口起程先勘下游並新舊各海口茲

謹先將所勘情形以及應辦事宜分為四大

篇一為雒口至鹽窩沿河情形一為鹽窩至

海口尾閘情形一為酌量應辦治河事宜一

為現時應辦救急事宜四篇之中又分條目

以期明晰現在所勘者皆據事直書將來應

辦者係據理立論伏維採擇施行不勝榮幸

一雒口至鹽窩沿河情形 河身 黃河自河

南龍門口改道以來水性趨下由北而東奔流山東入大清河遂取道入海其始東奔西突人力難施至兩年以後河流已定方築隄岸河流曲折其隄岸亦因之而曲折迨河流變遷隄岸不能俱隨之變遷臨水遠近不等然隄岸全無保護任水漂刷現在小水河面約寬九十丈至一百五十丈河底則深淺不一有河面寬處水深僅四五尺不便行船者有河面忽窄水深至三丈者河流朝夕改道旋左旋右臨流之岸即為衝刷帶至流緩之

處又淤為灘官民則任水所為向無善策惟於險處救急決處補苴而沿河常見岸土於四五尺高處塌陷入水際此隆冬水小流緩尚且如此化凍之後大汛之時水大流急更當如何下游低岸如此上游土山一帶不問可知無怪黃河泥沙之多為五大洲羣流之最也大汛時隄內沙灘全為漫淹因河底淺深不一河身亦俯仰不一故流水速率處處不同且下游之地極平每里高低不逾五寸河流甚緩容水之地日益以隘淤墊日高年

復一年險上加險職此之故隄外之地較隄
內之灘有低一尺者有低至七八尺者鑿路
過楊史道口時曾將河面測量計水面寬一
百三十八丈河底最深二丈三尺流水速率
一杪鐘約四尺按此推算每杪鐘過水之數
約五萬七千四百五十六立方尺容水面積
約一萬三千六百八十方尺又在鹽窩上游
測量計此處水面僅寬一百零二丈河底最
深一丈二尺容水面積約九千一百八十方
尺斯時楊史道口尚未合龍大溜半歸決口

不走鹽窩理合聲明至咸漲時過水數目言
人人殊按照兩處地方文武官員所指示水
誌計楊史道口容水而積應係三萬六十一
百八十方尺鹽窩容水面積應在二萬四千
四百八十方尺因大水速率無從探詢致過
水之數不能覈計然不知過水之數斷難定
河面寬窄堤岸遠近之數也計自維口至鹽
窩約三百七十里 民物 積貯之數難
民念係民所修官所守為現時東水最要之
隄也民念距水遠近不等有即在水濱者有

離水至三四里者當時修造任意為之並無
定理甚至其灣曲有令人不可解者其高低
厚薄亦各處互異有高於現時水面九尺者
有高至一丈五尺者高逾沙灘五尺至八尺
不等高逾隄外之地亦九尺至一丈五尺不
等其隄頂有寬二丈四尺者有寬三丈六尺
者新築之埝則較厚忽高忽低忽厚忽薄其
收坡亦斜直不同良可異也看守民埝未甚
周密為水挖刷之處頗多併無隨時修理積
年累月不至於決陷者幾希民埝皆以極鬆

淤土為之併無焦泥入地不深即有焦泥不
難挑取矧項可行大車坐車手車軌道甚深
過路處或緣坡而上下或截隄而低之隄上
築蓋民居並不加寬培厚凡此皆最易損隄
者查泰西各國隄工坡上種青草不憚講求
不惜鉅費蓋草根最能護隄也此處之隄都
不種草一二處偶爾有草亦為民芟除淨盡
甚至連根拔起據云係取以燒鍋或餵牲口
殊不知無草則隄難保隄難保則水患不旋
踵矣愚民不思甚屬可嗤耙草之器最能損

堤應懸厲禁不准行用此亦保堤之一道蓋
草既拔去堤復耙鬆大風一起堤土飛揚堤
頂遂逐漸而低堤身亦逐漸而薄此器為害
不亦大哉沿河之堤有種柳已成陰者有初
栽僅盈尺者柳根最能固堤應於沿河隄岸
一律編栽設法保護不准攀斫併行種籐更
為堅實柳條籐條俱可編埽築隄較稽料堅
固遠甚且可隨處就近取材毋須更出資採
買一舉兩得莫妙於此何憚而不為之耶
大隄 大隄係公家所修距民廛甚遠而遠

近處處不同且多灣曲殊不可解現在此隄
雖有如無大不可恃堤上居民鱗次櫛比全
成村落即取隄土以築其居致隄殘缺不全
且過路之處切與地平竟成大口隄上坡上
亦多種麥頗能損隄盛漲時民埝倘決大隄
未有不潰者也該隄寬處其頂尚有三丈六
尺高一丈二尺至一丈六尺不等然完整者
絕少聞楊史道口水決民埝竟能走溜入小
清河淹溺村落貽害居民者良以大隄舊口
未修使水有隙可乘耳詢諸河官何以大隄

之口不堵據答百姓不願今若修大堤則千
餘村之居民必環起而攻等語可見修大堤
非特無益且不洽輿情也大堤之外居民甚
多有數百十戶成村者有四五家自立門戶
者或築圍堤自護或建高阜而居大抵皆預
作防水之計村外周圍之地頗屬膏腴居民
即以之耕耘以供飲啄此外尚有斜堤攔壩
皆以保此村田者也然殘廢亦與大堤同若
民埵出險不足恃也 險工 沿河一帶險
工最多凡頂衝之處或已決之處皆有工程

其工程磨盤埽居多以楷料覆土層疊為之
形如磨盤或緊貼於岸或接連於堤其形勢
紛歧不一即高低厚薄亦每埽不同每埽錯
落參差絕不相連中仍走水以使三面受敵
不知何意鄙見數埽應一氣呵成不存罅隙
既省料工更形堅固且料埽入水削如壁立
不作斜坡適足以當衝不能使水滑過似非
得法至楷料亦非經久之物因其中有心質
如燈草最能吸水使料易於腐爛料爛則與
沙土同毫無勁力矣壘曾見舊埽數處雖形

勢相連而根基已壞一經盛漲必即漂流民
驗定為所累或云稽料為本地土產用廣價
廉舍此別無他料誠能如鑿前篇所言多種
籐柳數年之後便可足用更毋須以鉅萬金
錢造此不經久之事或又云料埽原以挑水
一兩年後水已改道料埽雖爛亦復何慮鑿
殊不謂然若不改絃更張恐搶險不過養疽
耳為今之計雖無他料可用其埽工應先行
改式傍岸者使之聯成一片作斜坡入水以
導其流並須多用木椿牽連於岸以堅固麻

繩繫之其護埽所拋之石亦宜加粗加多位
置得法方可禦衝刷之力鑿曾見有以石塊
排於埽上者鎮壓稽料不使為風吹去抑何
可笑此外尚有石隄如北鎮一帶尚稱穩固
而鹽窩右隄則已根底全虛所未即坍塌者
賴尚有石灰粘湊然不能久矣

一鹽窩至海口尾閘情形 黃河尾閘已由鹽
窩改道三次首次向東北由鐵門關入海二
次向東由韓家垣入海三次向東南由絲網
口入海今謹將三處情形次第言之尚有新

挑引河一條亦並論及 鐵門關海口 此
係大清河尾間黃河改道山東以來由此入
海歷三十餘年至韓家垣決口舍東北而向
正東今鐵門關一道前半已淤墊甚高河身
成為平地莫可辨識左右兩隄盡成村落鐵
門關以下隄已盡矣一派黃沙地極瘠苦約
距鐵門關下游八里河形復見有水直通於
海河邊之地雖係沙灘而沙下不深便有泥
土河中之水平時約深二尺大潮可漲至三
四尺可至蕭神廟若東北風大作可增至五

六尺不等由三溝子起有船隻可以出海往來煙台此次因河凍地潮不能出海察勘僅至三溝子以下十里滿地葦草大潮所經遂返轡不復前進據土人言往下八里已見尋常潮汐再往下十二里便為海濱海口有攔門沙潮退時僅深二尺此沙共長寬若干未嘗履勘揣度必不甚小計自鹽窩至鐵門關海口約一百一十里 韓家垣海口 自韓家垣決口黃河尾閘取道於此垂八九年近復改道東南韓家垣一帶已無黃河蹤迹惟

自新蕭神廟以下距海約六十里之遙復見
河形中亦有水係最低之地積水不消聞距
海約十一里此河分為兩溜狀如燕尾然亦
不深海口亦有攔門沙潮退時直塞口門不
容河水瀉出此攔門沙露出水面寬約二里
查韓家垣一道並未築隄計自鹽窩至韓家
垣海口約一百里 新挑引河 此河係于
韓家垣決口之後特于口門之下挑挖一道
以便引水至蕭神廟舊槽入海然當時深僅
四五尺寬僅三丈現在尚無此數彎曲甚多

此河計長四十里若取直共有二十五里大
約係循原有水道掘挖節省工費之故河底
以蕭神廟韓家垣兩處挖深三尺便有泥土
亦有泥土竟見于地面者周圍各村均有井
深一丈一尺即可見水泥在水中不甚深也
鐵門關附近有燒瓦器之窰該處土質概可
想見 絲綢口海口 現在黃河之由此口
入海漫散地上併無河道小水時分為多溜
底均不深中有沙灘正溜水底深僅三四尺
有一兩處最深亦不過一丈將近海口則只

有一尺四五寸此處水面甚寬約有三百丈之多聞海口並無攔門沙想係流緩溜淺其沙已於地上停淤無可再送入海也查北嶺子決口之時尚有上游三處同時開口故絲網口水流不猛北嶺子門之樹至今猶豎水中古廟一座亦巍然獨立是其明驗若謂阜莊等處房舍漂流則係土屋不堅之故非水力洶湧有以致之也北岸於北嶺子以下並未設隄惟以鐵門關南隄為北岸以護村落而已南岸則由鹽窩起新行接築一隄距水

約遠二里計自鹽窩至絲網口海口約九十
里

一酌量應辦治河事宜 治河如治病必須先
察其原欲察其原必須先按脈理方知其病
原之所在然後施藥不特厥疾可瘳而且永
無後患若但按瘡敷藥不問其毒發於何處
非良醫之所為也黃河在山東為患而病原
不在於山東若只就山東治黃河何異於按
瘡敷藥雖可一時止痛而不久舊疾復作矣
蓋其毒未消其病根未拔也夫水性猶人初

本善也若不導之教之性乃遷矣天之生水
原以養人何嘗以害人乃人不知其性不妨
其遷遂使肆為暴虐生民昏墊國帑虛糜終
無底止推原其故良因治水僅就一隅不籌
全局今若一誤再誤恐徒勞無功耳欲求一
勞永逸宜先竟委窮原由山東視黃河黃河
只在山東由中國視黃河則黃河尚有不在
山東者安知山東黃河之患非從他處黃河
而來故就中國治黃河黃河可治若就山東
治黃河黃河恐終難治請詳言之溯黃河之

源出於星宿海取道甘肅流入蒙古沙漠改
道多次始至山西已挾沙而來矣道出陝西
又與渭水匯流其質更濁再穿土山向東而
出拖泥帶水直入河南所至波靡水益渾矣
此即黃河之病原也下游之病良由此主治
之宜在病原加意蓋下游停淤之沙係從上
游拖帶而來上游地高勢如建瓴且兩面有
山約束之水流極速沙不能停迨一過榮澤
一派平原水力遂殺流緩則沙停沙停則河
淤河淤過高水遂改道此自然之理證諸往

事已有明徵惟一河改道萬姓遭殃轉於溝
壑死於饑寒從古迄今不知凡幾而黃河則
南遷北徙暢所欲為以開封為中心自闢半
徑之路於揚子江北中間千五百里扇形之
地任意穿越雖齊魯諸大峯亦難阻制河水
所經之處沙停灘結民歎其魚防不勝防迄
無良策補偏救弊勞民傷財其禍較疾病刀
兵尤為猛烈然天下無不治之水雖非易事
尚非人力難施其法維何曰求諸算學而已
治法 夫治法豈易言哉黃河延袤中國

境內計一萬餘里之長地勢之高低河流之
屈曲水性之緩急含沙之多少向未詳細考
究並無圖表問諸水濱亦鮮有能答之者今
欲求治此河有應行先辦之事三 一測量
全河形勢凡河身寬窄深淺隄岸高低厚薄
以及大水小水之淺深均須詳誌 一測繪
河圖須纖悉不遺 一分段派人查看水性
較量水力記載水誌考求沙數並隨時查驗
水力若干停沙若干凡水性沙性偶有變遷
必須詳為記出以資參考 以上三事皆極

精細而最關緊要者非此無以知河水之性
無以定應辦之工無以導河之流無以容水
之漲無以防患之生也此三事未辦所有工
程終難得當即可稍紓目前不旋踵而前功
盡壞矣若測繪既詳考究復審全局在握便
可參酌應辦工程以垂久遠猶須各省黃河
統歸一官節制方能一律保護永無後患但
照此辦理經費必鉅然欲使一勞永逸宜先
籌計每年養河之費若干堵築之費若干蠲
免錢糧若干賑濟撫卹若干財產淹沒若干

民命死亡若干並除弊後能興利若干積若干年共計若干較所費之資孰輕孰重孰損孰益不至於猶豫矣 按照圖誌可以知某處水性地勢定其河身由河身即可定水流之速率不使變更水面之高低不使游移凡河底之淺深河岸之堅脆工料之鬆固均可相因無意外之慮此皆算學精微之理不能以意為之定河身最為難事須知盛漲水高若干其性若何停沙於河底者幾多停沙於灘面者幾多 漲之高低速率不同定河

身須知各等速率方能使無論高低之漲其
速率均足刷沙入海 河形彎曲致生險工
亦須酌改然大非易事非詳慎推算不為功
蓋裁彎取直則路近路近則低率即地勢高
低之數增低率增則速率亦增速率增則過
水之數亦增於盛漲時尤宜並上下游通行
籌算後方可裁去一彎蓋裁彎能生他險不
可不慮此亦非但憑眼力可為之事 河隄
所資以束水者也須併河身一同推算即入
水斜坡統須堅固以禦異常盛漲方不至誤

事至隄之高低厚薄則視土性之鬆實料質之堅脆耳至應如何造法亦須視水綫高低水力緩急所需材料總以能禦水挖為妙不必盡用石隄亦毋庸盡田料埽蓋土隄築造堅實護以柳樹草片亦足以禦尋常水力查各國護河之隄多以土為之並無全用石工者但須推算合法位置得宜看守不懈勿任糟蹋耳其石隄料埽只於險處用之總而言之可省者宜省不可省者必不宜省然非測算精詳不可鑿茲繪隄式兩種似與黃河合

宜何處應用何式則俟臨時查勘因地制宜
非謂全河均應改用也惟無論需用何種材
料均須採擇上品者方能堅久 大水時河
流至隄根小水時河流在兩岸之中而隄與
岸均係鬆土常為急流挾之以去即化為沙
至流緩處淤成高灘積漸遂生危險此固可
慮而尤可慮者上游各土山隨時坍塌入水
流至下游為患甚烈應行設法保護於過水
兩岸盡築斜坡先護以泥再種草片併多栽
樹木以堅實之有險之處則宜於岸根打椿

以樹枝編成筐以泥土填成塊再疊石為牆
或砌石為坡並拋大石塊於水底方足以禦
水力其土山兩旁亦須拋石水底再築石牆
於其上以阻塌陷如此則岸土不致為水拖
帶河流可以漸清河患自然日減此係治河
應辦緊要之工程 大溜應教常走河之中
間宜在何處設法此時不能預定大約須於
彎處水底多築挑水壩以導其流挑水壩應
用樹枝或用石塊則俟隨時斟酌情形辦理
惟稽料不能經久且無勁力則不可用 減

水壩亦應講求以防異常盛漲宜即設在隄
邊應先測量地勢察勘情形以河流之方向
定壩口之方向此壩須以大石並塞門德土
為之壩後所挑之河或已有之河應築堅堤
約束庶所過之水不致以鄰國為壑此河亦
須寬深不甚彎曲且低於黃河其河身實有
容水之地始能合用 黃河尾閘海口高仰
後有攔門沙致河水入海未暢應用機器挖
土船以挑挖之然先築海塘再用機器或可
事半功倍此海塘接長河堤入海則水力益

專能將沙攻至海中深處為海口必不可少之工程再用機器於攔沙挖深一道俾水力更激可以自刷其餘此項工程需費頗鉅然各國海口均有之黃河何獨不然美國米西西北海口奧國大牛白海口前亦堵塞今大輪船可以往來是其明驗法國仙納海口前此亦有攔沙阻礙行船最為險惡旋經以大石填海築造海塘高出大潮水面兩塘相距九十丈塘成之日海口竟深至二丈至今船隻稱便比國麥司海口亦曾興此大工此外

尚有多處不勝枚舉 黃河延袤數省關繫
國計民生極大現時上游水至下游不能即
知下游出險上游事後方覺聲氣不通防範
未能周密應照永定河辦法沿河設立電綫
按段通電隨時隨事報知全河官弁俾患可
預弭此為刻不容緩之事 治河之工程既
已舉行守河之章程亦宜釐定俾一律恪遵
永遠辦理方不致前功盡隳查現在河防員
弁雖能克己奉公而百姓踏蹋隄埝挑土砍
柳鋤草諸惡習並未廣為禁止應安定律例

嚴行厲禁周密巡查犯者懲治隄上不准搭
蓋房屋如須行車必專築馬路之處格外培
厚方不至於損堤官弁隨時稽查稍有殘缺
不整即為修補如此則工程可永遠完固不
致生意外之虞 黃河上游應否建設閘壩
用以攔沙或擇大湖用以減水亦應考求治
河有此辦法理合聲明 上游之山應令栽
種草木以殺水勢秦西各國因山水暴發屢
次為災飭令於源頭及瀕水諸山栽種草木
水勢遂殺偶有一二處樹木被人私砍水勢

即復猖狂政府嚴行禁止並設官專管樹木
西人重視此事是有效驗之明證查山水暴
發其故有二一因山上土鬆不能吸水一因
山勢陡峭無以阻水若遍種樹木則樹根既
能堅土又復吸水且可殺其勢從容而下不
至倒瀉倘山土不宜種樹亦應種草其功雖
不及樹木之大亦終勝於無法國頒行亞爾
伯諸山種樹律例以來成效已大著矣
一現時應辦救急事宜 前篇治河應辦各事
既非旦夕之功必俟全河詳細測量估計工

料妥籌辦法方臻美備誠恐河流洶湧迫不及待亟應先辦救急事宜庶幾現時災患不生將來治理較易救急之事維何曰培修隄岸固築險工並疏通尾閘而已至於更改河形以暢其流展縮河身以順其性保護隄岸以阻其傾各工程應俟日後從容辦理此時無暇及此 培修河隄之法前篇已詳言之毋庸再贅惟應以埽為隄若大堤則相距太遠有河面過寬之患又復殘缺不整修無可修即修亦無益 各處險工宜全行固築應

派員全工察勘估計工程凡當衝之堤已朽
之埽務即一律保護其過低過薄之堤亦應
加高培厚 堤內臨水之坡應加泥一層以
種青草並於隄根編栽樹木設法禁人糟蹋
此為最急之務速辦為妙有險處之隄根或
拋石或編壩以固之亦須因地制宜凡隄有
所開過路之道應即行修補並於隄頂築造
石子馬路以便車馬往來不至損礙 尾閘
海道最宜妥定以鐵門關韓家垣現均淤塞
絲網口則水勢散漫並無河槽查此項尾閘

擇地者主見不一有謂鐵門關淤墊處應挑
通使水仍復舊道者有謂宜仍由韓家垣舊
道者有謂應由十六戶挑引河直至鐵門關
以避鹽窩險工者有謂應由鹽窩挑一直河
仍出絲網口者有謂應於蒲台縣三岔河引
水入海者有謂黃河應於大馬家挑河至孔
家莊並入徒駭河使之入海者大馬家在利
津上游八里之地查徒駭河形頗彎曲孔家
莊河面約寬九十丈小水水面約六十丈兩
岸頗高並未築堤大水約離岸尚低八尺其

上游於禹城以下全已淤塞海口約距孔家莊七十里並無攔沙鄙意黃河未治之先其水不應走徒駭河蓋恐獨流入清即使清者亦變為濁未免可惜如欲酌定一處必須於各處詳細測量品地勢之高低察流水之方向查現在武備學堂測量生頗具聰明又復勤奮四散測量不遺餘力惜時日太促未能詳備所繪之圖只能閱其大概况各段河中過水沙一數以及地之低率無從查考至引河河形惟按海口之地甚平引河以愈短愈直

愈妙蓋河短勢直則低率可增流水較有力也河身則以能容盛漲為度兩隄則以能束水為度又須格外堅固以防衝決大約海口所有舊河槽以不用為妙以舊槽形皆曲折堤亦不周備不如另擇新地酌量形勢辦理之為愈今無論引河挑在何處其海口必須有機器挖沙不能恃水自刷因河病未除河沙未減到處停淤之病仍不能免恐新挑之河不久亦如舊口為沙堵塞不通也鄙意引河河形以能容水暢流為度庶無意外之慮

文減水壩為必不可少之件應設何處尚未
詳考有人指示濟南府城下游十八里原有
滾壩之處似可合用鑿於歸途使道履勘見
此壩距黃河尚有五里原造之意係引濟南
諸山清水入黃以助攻沙然向未啟用壩門
甚小只有一丈四尺又與諸河不通若欲用
之尚須另挑引河以通小清河查小清河河
身僅足自容盛漲時水已漫岸又無河堤約
束若再將黃河灌入勢必漫浸即濟南省城
亦恐遭淹溺鄙意如欲減水以入徒駭河為

宜然仍須測量籌算方可定議惟徒駭河亦須加寬添築河堤方可合用

以上四大端皆係知無不言言無不盡是否有當均候裁奪示遵鑒此番奉委勘河常與司道大員及地方官會同查勘雖各人看法稍異而和衷共濟為國家宣勞為中堂致命以國計民生為懷作一勞永逸之想則不約而同蓋無分中外咸欲贊成利國利民之大功其胸中則毫無成見也 盧法爾 謹上

--	--	--	--	--	--	--	--	--	--

1

1

請啟續仍回原省片

再新選福建興化府知府啟續奉

旨交臣鴻章差遣於上年十一月行抵濟南當經派赴沿河查看工程臣鴻章旋奉

寄諭查辦事件復調該員回省承審要案現已查明議結全河各工亦經察勘竣事該員辦事認真能耐勞苦現係實缺人員應令到省即赴本任理合附片陳明伏乞

聖鑒飭部知照謹

奏奉

殊批吏部知道欽此